


Tęsitamenti Ikne
n'Ọnu Ikwere



New Testament in Ikwere

Ṭesitamenti Ikne n'Ọ_{nu} Ikwere

New Testament in Ikwere

copyright © 2010 Wycliffe

Language: Ikwere

Translation by: Wycliffe

Ikwere - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwere people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022
c17ee3a1-1c7a-5c05-8e0f-5043e8228d89

Contents

Matiyu	1
Maki	54
Lukwu	88
Joni	143
Ernu Ele Izi	182
Ele Rom	230
1 Ele Korinti	251
2 Ele Korinti	272
Ele Galasia	286
Ele Efesosi	294
Ele Filipai	302
Ele Kolosi	308
1 Ele Tesalonika	314
2 Ele Tesalonika	319
1 Timoti	322
2 Timoti	328
Taitosi	333
Filemoni	336
Ele Hiburu	338
Jemisi	354
1 Pita	360
2 Pita	367
1 Joni	371
2 Joni	377
3 Joni	378
Judu	380
Okpume	382

**Izi ọma lele kpa
Matiyu
gbarụ a n'ọkwukwo
Nhne gbasiri ọkwukwo ka**

Izi ọma lele kpa Matiyu gbarụ a n'ọkwukwo nookwu ọka izi ọma nụ Jizọsi bụ Nye Ọznohia Chiokike kweru mkwna a. Ọmumu Jizọsi nye Nazareti gweb-nanyarnu ẹli-eze ikne n'ọwa, ke bụ ọchichi Chiokike. Izi ọma Matiyu neegesi ẹli-eze ikne ka hite nụ nhne Jizọsi, nye bụ Mezaya, znirni nụ nhne o mernu. Matiyu gesiri kpa Jizọsi mezuru kpakara nhne be gbarụ nụ Tẹsitamenti Ọknani gbasiri a. O gesiri nụ be murnu Jizọsi hite n'avnrnu ele eze. Nne a Meri bụ woknornokno maa nyerukna. Matiyu tukparu ẹhni gba nụ ele bụo ele Ju nwernu igwe n'ẹli-eze Chiokike lele kpa ele Ju nwernu. O kwuru nhne gbasiri ẹnwu Jizọsi, olizọ n'ẹnwu a, nụ iwu o nyernu ele sno apna be zni kpakara ele zi n'ọwa izi ọma a.

Nhne zi n'ọkwukwo ka

Budnu wikoro Jizọsi (1:1--4:25)

Ikwu-onu Chiokike o kwuru n'olu rugwu (5:1--7:29)

Nhne o znirni, elulu nụ nhne berere nụ Galili (8:1--18:35)

Izne a ọ Jeruselem (19:1--20:34)

Ikwezu ipne-aznu Jizọsi nụ rime Jeruselem (21:1--27:66)

Olizọ n'ẹnwu a (28:1-20)

Nye gbarụ ọkwukwo ka: Matiyu (Liva)

Risi nhne o kwuo gba a: O gesi nụ Jizọsi bụ Mezaya, nye gweyarụ ẹli-eze ke bụ ọchichi Chiokike n'ọwa.

Osnusno ọmumu Jizọsi

(Luk 3:23-38)

¹ Ọkwukwo osnusno ọmumu Jizọsi Karaisi, nnwọ Devidi, nnwọ Ebereham.

² Ebereham murnu Aziki, Aziki mụhia Jekọpu, Jekọpu mụhia Juda nụ rumu nne a.

³ Juda mụhia Pẹzezi nụ Zẹra, nne be bụ Tama, Pẹzezi mụhia Hezironi, Hezironi mụhia Ram,

⁴ Ram mụhia Aminadabụ, Aminadabụ mụhia Nasoni, Nasoni mụhia Salimoni,

⁵ Salimoni mụhia Boazi, nne a bụ Rehabụ, Boazi mụhia Obedi, nne a bụ Rutu, Obedi mụhia Jesi,

⁶ Jesi mụhia Eze Devidi.

Devidi mụhia Solomoni, nne a bụ nnwerne Uraya,

⁷ Solomoni mụhia Rehoboam, Rehoboam mụhia Abija, Abija mụhia Asa,

⁸ Asa mụhia Jehosafati, Jehosafati mụhia Joram, Joram mụhia Uzaya,

⁹ Uzaya mụhia Jotam, Jotam mụhia Ehazị, Ehazị mụhia Hezikaya,

¹⁰ Hezikaya mụhia Manase, Manase mụhia Amoni, Amoni mụhia Josaya,

¹¹ Josaya mụhia Jekonaya nụ rumu nne a. Ka bụ ige ele Babiloni vuru be la n'ẹli Babiloni.

¹² Nga be vukworu be zne nụ Babiloni, Jekonaya mụhia Seateli, Seateli mụhia Zerubabeli,

¹³ Zerubabeli mụhia Abiudu, Abiudu mụhia Eliakim, Eliakim mụhia Azọ,

¹⁴ Azọ mụhia Zadoku, Zadoku mụhia Akim, Akim mụhia Eliudu,

¹⁵ Eliudu mụhia Eleza, Eleza mụhia Matani, Matani mụhia Jekọpu,

16 Jekopu mụhia Josefu nzi Meri. Meri bụ nye mụrnu Jizọsi, nye be kwu Karaịsi.

17 Kpakara ẹbnurnu hite n'Ebereham dụ Devidi bụ nri ẹbnurnu nụ ẹno, hite nụ Devidi dụ nga be vuru be zne n'ẹli Babiloni bụ nri ẹbnurnu nụ ẹno, hite nụ nga be wuru nụ Babiloni dụ nụ ọmumu Karaịsi bụ nri ẹbnurnu nụ ẹno.

*Omumu Jizọsi Karaịsi
(Luk 2:1-7)*

18 Ka bụ kpa be jiri mụ Jizọsi Karaịsi. Nga be kweru nụ Josefu jọolu nne a Meri,* nga be yáadnanyina, be whnurnu nụ ọ zị rime hite n'Enine Nsọ.

19 Josefu bụ nzi a bụ ọmamarna badnụ, ọ chọla ọ kpasị a iwhnerne nụ ruwhnu ọhna, o pioru ọ gba a nnam nụ mgwugwa.

20 Kọvu nga ọ zị naari kpakara nhne ka nụ mkpọma a, enine izi Nyenwe aị vakwnusiri a nụ mboro, kaa, "Josefu, nnwọ Devidi, i tũko ogwnu o kwuru nnwerne i Meri, nnwọ ọ zị rime a hi n'aka Enine Nsọ.

21 Ọ jọomuhia nnwọ rukna, i jookwu a Jizọsi, kwnornu nụ o jọoznohia ele ke a nụ kpakara mmehie be."

22 Ka bụ ma nhne Nyenwe aị kwuru hite n'ọnu nye ọwhnurninya mezu,

23 "Otu woknornokno máa nyerukna jọotu rime, ọ jọomuhia nnwọ rukna, be jookwu a Imanuẹli," ke bụ, "Chiokike zinu aị."

24 Nga Josefu tnenyarnu nụ anyarna, o lizo, o mee kpa enine izi Nyenwe aị nyernu a iwu, o kwuru Meri nnwerne a.

25 Kọvu ya nụ a dnányina dụ nga ọ mụhiaru nnwọ rukna, ọ jita rẹwhna a Jizọsi.

2

Ele akọ varu

1 Nga be murnu Jizọsi nụ Bẹtilehem n'ẹli Judiya, nga Erọdu bụ eze, ele akọ* hiri n'ọbosi ẹhnam vaduru Jeruselem,

2 neesikwa, "Ndaa hne ọ zị bụ nye be murnu, eze ele Ju? Kwnornu nụ a whnurnu mbọ a n'ọbosi ẹhnam, a varu ma a kponu a risi ẹli."

3 Nga Eze Erọdu nurnu nhne ka, mkpọma laru a mini, ya nụ kpakara ele zị nụ Jeruselem.

4 Nga o sukwukotaru kpakara ele risi arịohna nụ ele zni iwu ele Ju, ọ sịkwa be hne be jọomu Karaịsi wam.

5 Be kanu a nụ Bẹtilehem n'ẹli Judiya, ọ bụ kpa be gbaru a n'ọkwukwo hite n'ọnu nye ọwhnurninya, kaa,

6 "Ji Bẹtilehem, n'ẹli Juda,
i zila matị kakwo n'esilawuru risi ẹli Juda rịa rịa,
kwnornu nụ hite nụ ji hne nye risi jeehi whuya,
nye jọoznu ele ke m Izireli lele atnurnu."

7 Nga Erọdu sukwuru ele akọ wam nụ mgwugwa, ọ sịkwahia be nga mbọ wam whuyaru iwhne.

8 Ọ kanu be zne Bẹtilehem, kaa, "Anu zne piosi nnwọ ikne wam rikne, nga anu piohiaru a, anu va kanu m, m jeezne kponu a risi ẹli masi."

9 Nga be nurnu ọka Eze Erọdu, be whoga, le mbọ wam ke be whnurnu n'ọbosi ẹhnam neezne nụ ruwhnu be dụ nga ọ varu gwuzoru n'olu hne nnwọ wam zị.

10 Nga be whnurnu mbọ wam, be nwudnarnu k'agida.

* 1:18 Mọbu ọgbasi ọmu n'aka ke neegesi nụ aka ji a.

* 2:1 Ele akọ: bụ ele nọomu nhne gbasiri mbọ.

¹¹ Be bna nū rime ọro, whnū nnwọ ikne wam, ya nū Meri nne a, be dna n'ẹli kpọnu a risi ẹli. Be kpume igbe ẹkwu be, nyee a nkesi, golu, franki-isensi nū maa.

¹² Chiokike dọ be aka nū nsni nū mboro be lánkwadia ke Erọdu, be garu apna berere la ẹli be.

Be gbazne n'ẹli Ijipiti

¹³ Nga be laru, enine izi Nyenwe aṣ mernu Josefu whnū a anya nū mboro, kaa, "Lizọ, kwuru watakiri wam nū nne a gbazne Ijipiti, daziri nū pi du nga me jaakanu i, kwnornu nū Erọdu joopio nnwọ wam ma o gbu a."

¹⁴ O lizo, kwuru nnwọ wam nū nne a n'abalẹ gbazne Ijipiti.

¹⁵ Be zi n'Ijipiti tem Erọdu nwuma, ma nhne Nyenwe aṣ kwuru hite n'onu nye ọwhnurninya a mezu, "M sukwhiaru m nnwọ m hite Ijipiti."

Erọdu gburu rumu takiri

¹⁶ Nga Erọdu whnurnu nū ele ako wam nyernu a mkpari, o weru ẹhni k'agida, o zizne ele ọgwu kaa be gbu kpakara rumu rukna zi nū Betilehem ma ẹli zi be ndundu, hite nū ele gbaru awha lawuru ya ẹli. Ka bu hite n'ige wam ọ sikhahiaru oka n'onu ele ako wam.

¹⁷ N'ige wam bu hne be mezuru nhne Jerimaya nye ọwhnurninya kwuru, naakaa,

¹⁸ "Be nuru akpiri nū rime ẹli Rama,
naakwua ẹkwua nū okne ọgba mkpe,

Recheli naakwanu rumu a ẹkwua,

o kwéle be kasi a mkpoma kwnornu nū be zima."

Be hiri n'Ijipiti yahna

¹⁹ Nga Erọdu nwurnu, enine izi Nyenwe aṣ mernu Josefu whnū a anya nū mboro n'Ijipiti,

²⁰ kaa, "Lizọ kwuru nnwọ wam nū nne a zne n'ẹli Izireli, ele noopio budnu a nwunam."

²¹ O lizo kwuru nnwọ wam nū nne a, va n'ẹli Izireli.

²² Kọvu nga ọ nuru nū Akelosi nnwọ Erọdu bu eze Judiya nū ngadna nda a, ọ turu ogwun o zne pi. Nga Chiokike dọru a aka nū nsni nū mboro, Josefu tuhna zne Galili.

²³ Be zne wuru n'ẹli matj be kwu Nazareti, ma nhne be kwuru hite n'onu nye ọwhnurninya mezu, "Be jookwu a nye Nazareti."

3

Ikwu-onu Joni Nye Wu Mini

(Mak 1:1-8; Luk 3:1-18; Jon 1:19-28)

¹ N'ige wam Joni Nye Wu Mini varu ọokpo okwo ikwu-onu Chiokike n'ẹli-ikpa ke Judiya,

² naakaa, "Anu tuhna mkpoma, kwnornu nū ẹli-eze Chiokike zi ndundu."

³ Joni bu nye wam Azaya nye ọwhnurninya kwuru oka gbasiri a, naakaa, "Akpiri otu badnu ọokpo okwo n'ẹli-ikpa, naakaa,

'Anu mekwata apna Nyenwe aṣ,
anu mee apna a sni asni.' "

⁴ Joni wogwu iwo be jiri ri ni akpukpo anohia be kwu kameli mee, ajni ọ snu n'ikwun bu akpukpo anohia, wiri a bu igwurube nū mono ebeka ohia.

⁵ Ele Jeruselem nū kpakara ele Judiya nū kpakara ele wugwu nū ngeri Osimini Jodani gburugburu whokwnusiri a,

⁶ ọ wu be mini n'Osimini Jodani, be nookwhia mmehie be.

⁷ Kòvụ n'gà ọ whnụrụ agịda ele Farisi n'ụ ele Sadusi hne be naava ma ọ wụ be mini, ọ kanụ be, "Anụ ẹbụrụ agwọ, nyele kannụ anụ, anụ gbanahọrụ ovu owe ẹhni Chiokike ke jaava?"

⁸ Anụ mị mkpụrụ ke jeegesi n'ụ anụ t'uhnasnarnu mkpọma hite n'ụ mmehie.

⁹ Anụ riko n'ụ rime anụ, naakaa, 'Ebereham b'ụ nda aị,' me kanụ anụ n'ụ Chiokike nwernu rikne mee kpakara akaworugwu ka ghọ r'umu Ebereham.

¹⁰ K'itna, be t'ukwasilam ehnigwe n'ikw'nu kpakara isisi, ke b'ụ n'ụ be joogbudna isisi ọbula ke m'inyala mkpụrụ ọma, be j'otubna a n'ụ rime b'ekw'nu.

¹¹ "M'ji m' mini n'owu anụ mini ke neegesi n'ụ anụ t'uhnasnarnu mkpọma hite n'ụ mmehie anụ, k'ovu nye kagw'ụ m' rikne naava n'azn'ụ m, nye me d'ugwo n'ow'uhdnahie ch'iri okoro-ọchi a, nye wam jeeji Enine Nsọ n'ụ b'ekw'nu n'owu anụ mini.

¹² Nye nhne ọwhusna ikpa z'ị n'aka a, ọ j'ow'husna ikpa a nkari, ọ jaach'ikota ikpa a yisi n'ọbna a, k'ovu o jeeji b'ekw'nu ke ch'ni echni rnesnama ruznurnuznu ikpa."

Owuwu mini Jizosi

(Mak 1:9-11; Luk 3:21,22)

¹³ N'ige wam, Jizosi hiri n'ụ Galili vadu Osimini Jodani znekwnusi J'oni ma ọ w'ụ a mini.

¹⁴ K'ovu n'ụ J'oni kw'ele a, ọ kaa, "O z'ị m' mkpa ị w'ụ m' mini, j'ị n'iw'huru i, ị naavakwnusi m'?"

¹⁵ Jizosi kan'ụ a, "Ghar'ụ a k'pam k'itna, kwnornu n'ụ ọ b'uru ọma k'pam ma a mezu kpakara nhne b'uru ọma n'omume." J'oni ghar'ụ a.

¹⁶ N'ga J'oni w'uru Jizosi mini, ngangam o hiri n'ụ mini n'ow'uhya, le, oligwe kpumernu, Jizosi whn'ụ Enine ke Chiokike hne o neewhedna lele nduru, neebekwasi a.

¹⁷ Otu akp'iri hiri n'oligwe, naakaa, "Ka b'ụ Nnwọ m' me whn'ụrụ n'anya, nhne a mas'iri m."

4

Ornurna Jizosi

(Mak 1:12,13; Luk 4:1-13)

¹ Enine Nsọ duru Jizosi zne n'ẹli-ikpa ma Ekwensu rna a ọrnurna.

² N'ga o vukworu ọnu nri ọbochi ẹno iw'nhne hie n'ụ abali, wiri gwn'urnu a.

³ Nye ọrnurna wam vakwnusiri a, kan'ụ a, "O b'uru n'ụ ị b'ụ Nnwọ Chiokike, kan'ụ akaworugwu ele ka be ghọ br'edi."

⁴ Jizosi sar'ụ a, "Be gbar'ụ a n'okwukwo nsọ, kaa, 'O b'uo br'edi b'ụ nhne badn'ụ jeeri kp'oi ziri b'udnu, k'ovu n'ụ ọ b'ụ kpakara ikwu-ọnu ke hiri n'ọnu Chiokike wh'uya.' "

⁵ Ekwensu kwuru a zne Jeruselem, ẹli-ọhna nsọ, gwuzote a n'olu t'owa Oro Nsọ Chiokike,

⁶ ọ kan'ụ a, "O b'uru n'ụ ị b'ụ Nnwọ Chiokike, gb'udna ẹhni ị n'ẹli hna, kwnornu n'ụ be gbar'ụ a n'okwukwo nsọ, kaa,

'O jeenye ele enine izi a iw' gbas'iri ị, be jeegheru ị n'aka be, ma ị ghar'ụ ọ kp'oi ọchi ị n'ụ rugwu.' "

⁷ Jizosi sar'ụ a, "Berere kwno, be gbar'ụ a n'okwukwo nsọ, kaa, 'I rn'ako Nyenwe ị Chiokike ị ọrnurna.' "

⁸ Berere kwno, Ekwensu kwuru a zne rugwu z'ị n'olu k'agida, gerisi a kpakara ẹli-eze ke ọwa n'ụ igwugwu be.

⁹ O kanu a, “M jeenye i kpakara nhne ka, o buru nu i jaadna n'eli kponu m risi eli.”

¹⁰ Jizosi saru a, “Whoga m nu ruwhnu m, Setani, kwnornu nu be gbaru a n'okwukwo nso, kaa, ‘I jookponu Nyenwe i, Chiokike i risi eli. O bu ya kpoi bu nye i jeekpenu.’”

¹¹ Ige wam Ekwensu sigbasiri Jizosi, ele enine izi vakwnusiri a, neeznenu a izi.

*Jizosi panizoru ernu a
(Mak 1:14,15; Luk 4:14,15)*

¹² Nga Jizosi nuru nu be yisiri Joni n'ikelu, o lahna Galili.

¹³ O whoga nu Nazareti zne wuru nu Kapanom, ke zi nu ngeri osimini, n'eli Zebuloni nu Nafitali,

¹⁴ ma oka be kwuru hite n'onu Azaya nye owhnurninya mezu, kaa,

¹⁵ “Eli Zebuloni nu eli Nafitali,
n'apna okne osimini,

n'aznu Osimini Jodani,
Galili eli ele buo ele Ju.

¹⁶ Ele wu n'ochichiri
whnunam agida iwhne,
ele wu n'eli enwu kpusnigwu
bu ele iwhne noomukwasi.”

¹⁷ Hite n'ige wam Jizosi panizoru nookpo okwo, naakaa, “Anu tuhna na mkpoma, kwnornu nu eli-eze Chiokike zi ndundu.”

*Ele mbom sno apna Jizosi
(Mak 1:16-20; Luk 5:1-11)*

¹⁸ Nga Jizosi neezne izne n'onu mini Osimini Galili, o whnu rumu nne lawuru, Sajmoni nye be nookwu Pita nu Anduru nwene a, hne be nowu igbo n'osimini, kwnornu nu be bu ele noogbu aznu.

¹⁹ Jizosi kanu be, “Anu snornu m, m jeeme anu buru ele jookwuhia ele badnu lele kpa anu noogbu aznu.”

²⁰ Ngangam, be sigbasi igbo be sno a.

²¹ Nga o zneturu nu ruwhnu, o whnuru rumu nne lawuru berere, Jemisi nnwo Zebidi nu Joni nwene a, nu Zebidi nda be. Be zi nu rime ogbo neemekwa igbo be. Jizosi sukwu be.

²² Ngangam be sigbasi ogbo wam nu nda be sno a.

*Jizosi znirni nhne,
gwọ ele nriria
(Luk 6:17-19)*

²³ Jizosi znernu nu kpakara Galili neezni nhne n'oro ogbako ele Ju, nookpo okwo izi oma eli-eze Chiokike, noogwo ele nriria zi odo n'odo nu ehni igbugbu zi odo n'odo n'esilawuru be.

²⁴ Otutnu a gazuru kpakara Siriya, be kwuyan a kpakara ele naaria nriria nu ele ehni igbugbu zi odo n'odo, nu ele nowhnusi anya, ele renwu ojo nwugwu, nu ele akwukwu nu ele ngeri ehni be donwurnu donwu. Jizosi gwọ kpakara be.

²⁵ Agida ele badnu hi nu Galili, Dekapolisi nu Jeruselem nu Judiya nu aznu Osimini Jodani snornu a.

¹ Nga Jizọsi whnurnu agida badnu wam, o pnezne n'olu rugwu, daziri eli, ele sno apna a vakwnusi a,

² ọ panizo neezni be nhne, naakaa,

Mkpoma ọso n'onu n'ezị

(Luk 6:20-23)

³ “Ọwa ọma zinu ele mboni nu mkpoma,*
kwnornu nu eli-eze Chiokike bu ke be.

⁴ Ọwa ọma zinu ele naagba mkpe,
kwnornu nu be jaakasi be ovu.

⁵ Ọwa ọma zinu ele zi enwerne nu mkpoma,
kwnornu nu ele kam jeekehia ọwa.

⁶ Ọwa ọma zinu ele wiri nọogwnu nu ele akpiri kpọga bekwnu n'ome nhne buru ọma,
kwnornu nu ruwhoo jeeji be.

⁷ Ọwa ọma zinu ele nwernu obirizi
kwnornu nu be joodonu be obirizi.

⁸ Ọwa ọma zinu ele zi richna nu mkpoma,
kwnornu nu be jowhnu Chiokike.

⁹ Ọwa ọma zinu ele neeme udno,
kwnornu nu be jookwu be ọmu Chiokike.

¹⁰ Ọwa ọma zinu ele be naakpakna ehni kwnornu imerne ọma,
kwnornu nu eli-eze Chiokike bu ke be.

¹¹ “Ọwa ọma zinu anu nga ele badnu jaakpari anu, neemekpa anu ehni, nookwunu anu onu ojo, naaghagidne anu akebne aghalaghala zi ichne ichne kwnornu nu me.

¹² Anu nwurnihoru, mkpoma so anu n'onu k'agida, kwnornu nu ogwo ernu anu zi agida n'oligwe. O bu kpa be jiri kpakna ele owhnurninya ele be anu osno ehni.

Arua nu iwhne

(Mak 9:50; Luk 14:34,35)

¹³ “Anu bu arua ke ọwa, kovu o buru arua tuwhu oso n'onu a, be jeeji kini mee a o so n'onu? O zia iru o bnarnu berere, okwolem be tuwhu a n'ederezi, ele badnu zo a ochi.

¹⁴ “Anu bu iwhne ke ọwa. Mba wu n'olu rugwu bootugwali.

¹⁵ Be za nọomusi tonji bita a nu mkpururu nkita, tnunuma, n'olu nhne be bita tonji, o neenye kpakara ele zi n'oro wam iwhne.

¹⁶ Anu mee kpa iwhne anu jaazi noonwu nu ruwhnu ele badnu, ma be nọowhnu ernu ọma anu, znarni Nda anu ke zi n'oligwe.

Iwu Mozizi

¹⁷ “Anu cheko nu m varu m o lulu iwu Chiokike mọbu nhne ele owhnurninya gbaru, m vage m o lulu be, m varu m o mezu be.

¹⁸ N'ezị, me kanu anu, tem oligwe nu ọwa whume, o za otu nhne obula zi mati, ke zikakworu mati ke be jeegweme n'iwu, du nga kpakara be jeemezu.

¹⁹ Nye obula ke joolulu otu nu rime iwu ele ka, o burubedi iwu ke kakwo mati, ke jeezni ele badnu kpm, be jookwu a nye kakwo mati n'eli-eze Chiokike. Kovu nye obula ke jaabita iwu, neezni be, nye wam bu nye be jookwu nye kakwo n'olu n'eli-eze Chiokike.

²⁰ Me naakanu anu, o buru nu agwa ọma anu kala ke ele zni iwu nu ele Farisi mma, n'ezị, anu jabna n'eli-eze Chiokike.

* 5:3 ke bu ele noopio Chiokike

Ovu owe ẹhni

²¹ “Anụ nūrnu nụ be kannụ ele gbaka, ‘I gbúkọ badnụ, nye ọbula ke gburu badnụ jaabna n’aka ikpe.’

²² Kọvu me kanụ anụ, nye nwernu ovu ẹhni megidne nwene a jaabna n’ikpe. Nye ọbula ke jaakanụ nwene a, ‘O zia iru i bñagwụ,’ jeenye ẹhni a n’aka ele eze-ikpe. Nye ọbula ke jaakaa, ‘Nye iwħnirniwħno,’ jeenye ẹhni a n’aka bẹkwnu ẹli rẹnwu.

²³ Kam kpayarụ, ọ buru nụ i gweyarụ nkesi i nụ ruwħnu Chiokike n’ojo ariohna, i chenwanya nụ nwene i karu nụ i mernu a nhne ojo,

²⁴ sịgbasi nkesi i nụ pji nụ ruwħnu ojo ariohna, la, beru ọsno mee ma ji nụ nwene i ziri n’udno, yahna, nyega nkesi i.

²⁵ “Mee ma ji nụ nye kwu i neezne ikpe buru ọma wara wara, nga ji nụ ya zi n’apna, ma nye wam kwu i neezne ikpe gharu o gweru i nyee n’aka nye risi ikpe, nye risi ikpe gweru i nyee n’aka nye neezne izi, be túbna i ikelu.

²⁶ Me kanụ i ezi ọka, i jọwħwuya pji tem i kwuħnata kpakara iwai ipne-aznu i jiguw.

Iznizni gbasiri ome oyi

²⁷ “Anụ nuna m nụ be kannụ ele gbaka, ‘I mékọ oyi.’

²⁸ Kọvu nụ m naakanụ anụ, nụ nyerukna ọbula ke jeele nyerinya anya o masi a ma ya nụ nwerinya wam dnanyi, o mesilem a oyi nụ mkpoma a.

²⁹ O buru nụ anya akarikwninga i jeeme i, i mee mmehie, għnahia a, tuwħu a n’ẹhni i, kwnornu nụ ọ jaakanụ i mma nụ otu nhne zi i n’ẹhni whogaru, tnunuma be túbna kpakara ẹhni i nụ rime bẹkwnu ẹli rẹnwu.

³⁰ O buru nụ akarikwninga i jeeme i, i mee mmehie, gbubime a, tuwħu a n’ẹhni i, kwnornu nụ ọ jaakanụ i mma nụ otu nụ nhne zi i n’ẹhni whogaru, tnunuma be jootubna kpakara ẹhni i nụ rime bẹkwnu ẹli rẹnwu.

Ogba nnam

(Mat 19:9; Mak 10:11,12; Luk 16:18)

³¹ “Be kakwnornu nụ, ‘Nye ọbula ke jaagba nnwerne a nnam, o nyega a okwukwo nnam.’

³² Kọvu m naakanụ anụ, nye ọbula ke jaagba nnwerne a nnam, hne ọ búo nụ o mernu oyi, o neeme nyerinya wam buru nye neeme oyi, nye ọbula ke joolu nnwerne be gbaru nnam bu nye neeme oyi.

Okwe mkwna

³³ “Berere, anụ nuna m nụ be kannụ ele gbaka, kaa, ‘Bita mkwna i kweru, i lánna aznu nụ o mee mkwna i kweru, kọvu mee nhne i kweru mkwna nụ ruwħnu Nyenwe ai.’

³⁴ Kọvu me naakanụ anụ, anụ jí nhne ọbula dụ risi, anụ jí oligwe dụ risi, kwnornu nụ ọ bu ngadna eze Chiokike.

³⁵ Anụ jí ọwa dụ risi, kwnornu nụ ikpechi ọtukwasi ọchi a, anụ jí Jeruselem dụ risi, kwnornu nụ ọ bu ẹli-ohna ke eze kwu wam.

³⁶ I jí risi i dụ risi, kwnornu nụ i nwée rikne mee otu rukeri-ize ọ chna rịchna mọbu o ji riji.

³⁷ Kọvu ikwu-ọnu anụ buru ‘Owe, m jeeme mee a,’ mọbu, ‘Ọza, m jéeme mee a.’ Kwnornu nụ nhne ọbula kariri ka hi nụ nye ojo wam.

Iznizni gbasiri omegwnarnu

(Luk 6:29,30)

³⁸ “Anụ nūrnu nụ be karu, ‘Anyá lanu anyá, ize lanu ize.’

³⁹ Kọvu me naakanụ anụ, anụ mégwarnu ele mernu anụ nhne ojo. Nye ọbula ke gbọru i aka nụ nsni akarikwninga, tũmasnanu a nsni berere.

40 Ọ bụrụ nụ nye ọbula pioru o mesị i ọka ma ọ nahọru i iwo rime i, sigbasinu a iwo i ke olu masị.

41 Nye ọbula ke jeeme i ma i zne otu majli, snornu a zne majli lawuru.

42 Nyega nye ọbula nọorio i nhne, i gwákọ nye noopio ma i gbaznisi a nhne njọ.

Whnụ ele irno anụ n'anya
(Luk 6:27,28,32-36)

43 “Anụ nuna m nụ be karu, ‘Whnụ nye agbatibi i n'anya, sno nye irno i irno.’

44 Kọvu me naakanu anụ, anụ whnụ ele irno anụ n'anya,† kpenu ele neemekpa anụ ẹhni okpukpe.

45 Anụ mee kpa, anụ jọbu rumu Nda anụ ke zị n'oligwe, kwnornu nụ o neeme ma ẹhnam a nọomukwasi badnụ ojo nụ badnụ oma, o neeme masị ma mini zokwasị ele ome mma nụ ele ojo.

46 Ọ bụrụ nụ anụ whnuru ele wam n'anya bụ ele nọowhnu anụ n'anya, kini bụ ọgwo ẹrnu anụ? Ọ bụ nụ ele ọna ntụ mée kpa sa?

47 Ọ bụrụ masị nụ ọ bụ rumu nwene anụ kpọi bụ ele anụ neebekwu rewhna, kini bụ nhne anụ mernu karu ele berere? Ọ bụ nụ ele máa Chiokike mée kpa sa?

48 Anụ jọbu ele zuru ozu lele kpa Nda anụ ke oligwe zuru ozu.

6

Iznizni gbasiri okesi nhne

1 “Anụ whnụ nụ anụ zá neeme nhne oma anụ nụ ruwhnu badnụ, ma be whnuru anụ. Anụ mee kpa, anụ nwée ọgwo ẹrnu nụ hne Nda anụ ke oligwe zi.

2 “Ke bụ nụ nga i nọornu ẹrnu obirizi i, i jíkọ ọkwodu kpọ okwo lele kpa ele ruwhnu lawuru mee n'oro ọgbako ele Ju, ma n'apna, ma ele badnụ ja be mma. Owe, m naakanu anụ ezi ọka, be nwezulem ọgwo ẹrnu ke be.

3 Kọvu nga i nọornu ẹrnu obirizi, i kwékọ akarita i mahia nhne akarikw-nunga i neeme,

4 ma ẹrnu obirizi i bụrụ nhne zị mgwugwa. Nda i ke nọowhnu nhne zị nụ mgwugwa jọkwuhmata i.

Iznizni gbasiri okpukpe
(Luk 11:2-4)

5 “Nga anụ neekpe okpukpe, anụ mékọ lele ele ruwhnu lawuru, kwnornu nụ ọ naamasị be o gwuzoru n'oro ọgbako ele Ju ma ngeri apna neekpe okpukpe ma ele badnụ whnuru be. Owe, m naakanu anụ ezi ọka, be nwezulem ọgwo ẹrnu be.

6 Kọvu nga i neekpe okpukpe, bnazne nụ rime ọro i, nga i gbasnimernu mgbo i, kpenu Nda i ke zị nụ mgwugwa, Nda i ke nọowhnu nhne zị nụ mgwugwa jọkwuhmata i.

7 Nga anụ neekpe okpukpe, anụ kwíkọ agida ọka etekne, lele kpa ele máa Chiokike mee, kwnornu nụ be naari nụ be jọonu ogologo okpukpe be.

8 Anụ kpákwadia agwa lele be, kwnornu nụ Nda anụ magwu kpakara nhne ke zị anụ mkpa, sụ anụ ke rjọ a.

9 “Anụ kpe okpukpe kpa, ‘Nda aị ke zị n'oligwe,

† 5:44 Agwna ọkwukwo kamasiri: gozi ele nọovu anụ ọnu, menu ele sno anụ irno nhne oma

rewhna i buru nhne zi nsò,
 10 ẹ̀li-eze i va,
 be mee nhne i pioga,
 kpa be mee a n'oligwe,
 be mee a kpam n'òwa.

11 Nyega aì wiri tna,
 ke joozunu aì ọ̀bochi tna.

12 Gbarunu aì nhne ojo a mernu,
 lele kpa a naagbarunu ele mernu aì nhne ojo.

13 I yisi aì nù rime nhne ọ̀rnurna,
 kọ̀vu dọ̀hia aì n'aka nye ojo.*

14 O buru nù anù gbarunu badnu ọ̀gahie be, Nda anù ke oligwe jaagbarunu anù masi.

15 Kọ̀vu ọ̀ buru nù anù jáagbarunu badnu ọ̀gahie be, Nda anù ke zi oligwe jáagbarunu anù.

Iznizni gbasiri ovu onu

16 “Nga anù noovu onu, anù mékọ lele ele ruwhnu lawuru, ele naagbaru ruwhnu, dọ̀nwuta ruwhnu ma ọ̀ zi kpa ele badnu mahia nù be noovu onu. Owe, m naakanù anù ezi ọ̀ka, be nwezulem ọ̀gwo ẹ̀nu be.

17 Kọ̀vu nga i noovu onu, gweru mọ̀no te nù risi i, snù ruwhnu i,

18 ma ele badnu gharu ọ̀ mahia nù i noovu onu. Kọ̀vu Nda i nye nọ̀owhnu nhne zi nù mgwugwa jaamahia, Nda i jọ̀okwu i ọ̀gwo.

Ekwnu ke zi n'oligwe

(Luk 12:33,34)

19 “Anù kpabitanu ẹ̀hni anù ẹ̀kwnu n'òwa, hne akika nù ajarì naata, hne ele buznu nẹ̀liwa ọ̀ro nooznu buznu,

20 kọ̀vu anù kpabitanu ẹ̀hni anù ẹ̀kwnu n'oligwe, hne akika nù ajarì zá naata, ele buznu zá nẹ̀liwa ọ̀ro nooznu buznu.

21 Kwnornu nù hne ẹ̀kwnu i zi, bu hne mkpọ̀ma i jaazi masi.

Iwhne ke ẹ̀hni

(Luk 11:34-36)

22 “Iwhne ke ẹ̀hni bu anya, ke bu nù ọ̀ buru nù anya i buru ọ̀ma, kpakara ẹ̀hni i jọ̀obu iwhne iwhne.

23 Kọ̀vu ọ̀ buru nù anya i zila budnu, kpakara ẹ̀hni i jeejipiya n'ọ̀chichiri. O buru nù iwhne ke zi i n'ẹ̀hni bu ọ̀chichiri, ọ̀chichiri wam jaahna ezi.

Chiokike nu ẹ̀kwnu

(Luk 16:13; 12:22-31)

24 “O zá nye nwernu rikne buru ọ̀hi nda kwu lawuru. O buru kpam, o jooosno otu irno, whnu ke berere n'anya. Mọ̀bu ọ̀ jọ̀sobisinu otu k'agida, ledna ibne a anya. Anù jọ̀obuli ọ̀hi Chiokike nù ọ̀hi ẹ̀kwnu.

25 “Ka bu nhne me kwno naakanù anù, anù rigbuko ẹ̀hni anù n'oriri gbasiri budnu anù, nhne anù jeeri mọ̀bu nhne anù jọ̀onwo, mọ̀bu gbasiri ẹ̀hni anù iwo anù jooowo. O búo budnu kakwo wiri? O búo ẹ̀hni kakwo iwo sa?

26 Anù le wọ̀nunu ke oligwe, be ghá mkpuru, be gwémasia nhne n'ẹ̀kwu, ọ̀ zia nhne be chibna n'ọ̀bna, kọ̀vu Nda anù ke oligwe nọ̀oznu be. Anù búo nhne gburu okne onu ahia karu be?

27 Ndaa nye n'esilawuru anù nwernu rikne tukwasi nhne matì n'ogologo budnu a hite n'origbu ẹ̀hni a?

* 6:13 Agwna ọ̀kwukwo kwuru: *kwnornu nù ẹ̀li-eze bu ke i, ma iknerna, ma igwugwu, tim tom. Amim.*

28 “Kini mernu anu naarigbu ehi anu gbasiri iwo anu joowo? Anu lekọm okoko zi n’ohia, kpa be nooso, be za nọdogbu ehi be n’ernu, be kwné ikpe.

29 Kọvu me kanu anu o bubedi Solomoni n’iw huru a, nu kpakara igwugwu a, yi ge eyi lele otu nu rime be.

30 O buru nu Chiokike wosiri achara ke ohia iwo kpa, ke zi tna, ekile be tubna a n’ite bekwnu, o bu nu o jooosi anu iwo ke kakwo, anu ele okwnata ovu matị?

31 Anu rigbuko ehi anu, naakaa, ‘Ndaa nhne a jeeri?’ mọbu, ‘Ndaa nhne a joonwo?’ mọbu, ‘Ndaa nhne a joowo?’

32 Kwnornu nu kpakara nhne ele ka bu nhne ele ma Chiokike noopio, Nda anu ke oligwe magwu nu kpakara nhne ka zi anu mkpa.

33 Kọvu anu beru osno pio eli-eze Chiokike, nu ome oma a, be jootukwasinu anu kpakara nhne ele ka.

34 Kam kpayaru, anu rigbuko ehi anu n’oriri gbasiri ekile, ekile jaarhianu ehi a. Mmekpehi ke obochi obula zunnem a.

7

O kpe ele berere ikpe

(Luk 6:37,38,41,42)

1 “Anu kpe ikpe, ma Chiokike gharu o kpe anu ikpe.

2 Kwnornu nu ikpe anu kperu bu nhne Chiokike jeeji kpe anu, nhne anu jiri tunu nye berere bu nhne Chiokike jeeji tunu anu.

3 Kini kpayaru i ji neele nhne matị ke zi n’anya nwene i, kọvu i za naari oriri gbasiri igwe-isisi ke zi n’anya i?

4 Ndaa kpa i jeeji kanu nwene i, ‘Nwene, sete me gweme nhne matị ke zi i n’anya,’ ma, le, igwe-isisi zi n’anya ke i?

5 Ji nye ruwhnu lawuru, beru osno gweme igwe-isisi ke zi n’anya ke i, ngam, i jowhnusnama osno o gweme nhne matị wam n’anya nwene i.

6 “Anu nyekọ nkita nhne zi nso, o zi be tuhmasna doka anu. Anu tusako pali nu ruwhnu ezni, o zi be zokwasi be ochi.

Rio, pio, znu aka nu mgbo

(Luk 11:9-13)

7 “Anu rio, be jeenye anu, anu pio, anu joopiohia, anu znu aka n’onu-mgbo, be jaagbamanu anu.

8 Kwnornu nu nye obula ke nọorio, nọoriohia, nye noopio, noopiohia, nye nooznu aka nu mgbo, be jaagbamanu a.

9 “Ndaa nda n’esilawuru anu nye nnwo a jọorio brędi, o nyee a akaworugwu?

10 Mọbu nu o rio a aznu, o nyee a agwo?

11 O buru nu anu, anu bu ele ojo, magwu kpa be nyee rumu anu nkesi buru oma, o kọ buru Nda anu ke zi n’oligwe, o bu nu o jeenye ele nọorio a nhne buru oma?

12 Kpakara nhne ke anu pioru ma badnu menu anu, anu menu masi ele badnu kpm. Kwnornu nu ka bu nhne iwu nu ele owhnurninya kwuru.

Apna zi nworonwo

(Luk 13:24)

13 “Anu garu onu-mgbo ke zi nworonwo bna. Kwnornu nu onu-mgbo nu apna wam ke noodubna badnu nu mwu zi rude, ele naaga a masi zi agida.

14 Kọvu nu onu-mgbo wam zi nworonwo, apna wam ke noodubna nu budnu naara ehi nu oguga, ele noopiohia zi ele nu ele.

Isisi nū mkpuru a
(Luk 6:43,44)

¹⁵ “Anụ zeru ele ọwhnurninya aghalaghala, ele naavakwnusi anụ n’iwo atnurnu, ọvụ nụ rime be, be bụ edu nọdogbu atnurnu.

¹⁶ Anụ jaamahia be hite nụ mkpuru be nemi. Ele badnụ be nọoghohia mkpuru vaịni n’isisi akukara, mọbu mkpuru figi n’igwnu-ogna?

¹⁷ Kpam masị, ọmamarna isisi mịga mkpuru ọma, ọvụ isisi bụo ọma mịga mkpuru ojo.

¹⁸ Ọmamarna isisi nwée rikne mị mkpuru ojo, isisi ojo nwée rikne mị mkpuru ọma.

¹⁹ Isisi ọbula ke mínyala mkpuru ọma, be jeegbudna a, túbna a nụ rime bẹkwu.

²⁰ Kam kpayarụ, anụ jeehi nụ mkpuru be mahia be.

Odo aka nū nsni
(Luk 13:25-27)

²¹ “O bụo nye ọbula ke noosukwu m, ‘Nyenwe aị, Nyenwe aị,’ jaabna n’eli-eze Chiokike, okwolem nye neeme nhne Nda m ke zị n’oligwe noopio.

²² Agida badnụ jaakanụ m n’ọbochi wam, ‘Nyenwe aị, Nyenwe aị, a jílẹ rẹwhna ì whnụ ọwhnurninya? A jílẹ rẹwhna ì chihala ele rẹnwu ojo? A jílẹ rẹwhna ì rnu ẹrnu ndu-ehni zị ọdo n’odo?’

²³ M jaakanụ be, ‘M máam nye anụ bụ, anụ whoga nụ hne me zị, ele aruru-eli.’

Ntu-eli lawuru
(Luk 6:47-49)

²⁴ “Nye ọbula ke nọonu kpakara ikwu-ọnu m neeme be, m jeeji a sninu nyerukna ke marnụ nhne, nye wuru ọro a n’olu rugwu.

²⁵ Mini zo, mini-eli gba, ruwhere whe masị, kwna ọro wam, ọvụ ọ dnána, kwnornu nụ ọ turu ntụ-eli a n’olu rugwu.

²⁶ Nye ọbula ke nọonu kpakara ikwu-ọnu m ka, ọ zá neeme be, m jeeji a sninu nye iwhnirniwhno, nye wuru ọro a n’olu rịzna.

²⁷ Mini zo, mini-eli gba, ruwhere whe masị, kwna ọro wam, ọro wam dna girigidim, tų ogwnu.”

Rikne Jizosi

²⁸ O dụ nga Jizosi kwukworu kpakara ikwu-ọnu ka, nhne o znirni du kpa be hna ehni.

²⁹ Kwnornu nụ o neezni nhne lele nye nwernu rikne, ọ bụo lele ele zni iwu ele Ju.

8

Jizosi gworu nye nchnichna
(Mak 1:40-45; Luk 5:12-16)

¹ Nga Jizosi hiri n’olu rugwu hiedna, igbudu ele badnụ snornu a.

² Otu nye naarija nchnichna vakwnusiri a, gbunu a mpnerne ọchi, kaa, “Nyenwe aị, ọ bụru nụ ì piору, ì nwernu rikne mee m, m ziri rịchna.”

³ Jizosi dọsnima aka kpatụ a, kaa, “M piору m, ziri rịchna.” Ngangam, nchnichna wam whogaru n’ehni a.

⁴ Jizosi kanụ a, “O zá nye ọbula ì kanụ, ọvụ la, gweru ehni gesi nye ọkwa arịohna, gweru masị nhne Mozizi nyernu n’iwu kwa arịohna ma ọ bụru nhne akebe nye be.”

*Jizōsi gwōru nnwọ izi
nye risi ọgwu*

(Luk 7:1-10)

⁵ Nga Jizōsi bnanyarnu Kapanom, otu nye neechi otu riwhu ele ọgwu vakwnusiri a, rjo a,

⁶ kaa, “Nyenwe ai, nnwọ izi m dnanyiḡwu n'oro, otu ngeri eḡni a nwurnu onwu, o zi n'igbugbu k'agida.”

⁷ Jizōsi kanu a, “M jaava, gwọ a.”

⁸ Nye wam neechi otu riwhu ele ọgwu kanu a, “Nyenwe ai, m duge m nu nye i jaabnanya oro a, kovu kwu oka kpoi, i joogwo nnwọ izi m.

⁹ Kwnornu nu m bu m nye zi nu mkpururu oḡchichi ele kakwo m, m nwernu m ele ọgwu zi nu mkpururu m, me kanu nye ka, ‘Zne,’ o zne, m kanu nye berere, ‘Vaa,’ o vaa, m kanu nnwọ izi m, ‘Mee ka,’ o mee a.”

¹⁰ Nga Jizōsi nuru oka ka, o duru a eḡni, o kanu ele sno a n'aznu, “N'ezi, me kanu anu, m whnuḡlele m okwnata ovu hna kpa, ma nu ovu nye Izireḡi.

¹¹ Me kanu anu nu agida badnu jeehi n'obosi eḡnam nu odidna eḡnam va, snornu Ebereham, nu Aziki, nu Jekopu, daziri eli n'eli-eze Chiokike,

¹² kovu nu be jaachibna ele kwesiri o bna n'eli-eze Chiokike nu rime oḡchichiri, hne be jaazi naakwna ekwna, naata rukwnurnu-ize.”

¹³ Jizōsi kanu nye wam neechi otu riwhu ele ọgwu, “La, be menu i lele kpa i kweru.” Eḡni buru nnwọ izi a oma ngangam.

Jizōsi gwōru ele nriria

(Mak 1:29-34; Luk 4:38-41)

¹⁴ Nga Jizōsi bnarnu oro Pita, o whnurnu nne nnwerne a hne o dnanyi n'okpata naariḡa eḡni orne bekwnu.

¹⁵ O nwugwuru a aka, eḡni orne bekwnu wam sigbasi a, o lizo, bete neeznenu be izi.

¹⁶ N'ogbednachi, be kwuyanu a agida ele renwu ojo nwugwu, o ji ikwu-onu chihala ele renwu ojo, gwọ kpakara ele naariḡa nriria.

¹⁷ O gwōru be, ma nhne Azaya nye owhnurninya kwuru mezu, kaa, “Ya n'iwḡuru a vumernu kpakara eḡni igbugbu ai, vuru masi nriria ai zi odo n'odo.”

Nhne o joowhu

ele sno Jizōsi

(Luk 9:57-62)

¹⁸ Nga Jizōsi whnurnu agida ele badnu gbaru a gburugburu, o kanu ele sno apna a ma be whe aznu osimini kiyari.

¹⁹ Otu nye zni iwu ele Ju vakwnusiri a, kanu a, “Nye-zni-nhne, m joosno i, penupe obula i neezne.”

²⁰ Jizōsi kanu a, “Edu nwernu mkpewu hne be dnanyi, onunu oligwe nwernu alikwu hne be zukwa inwe, kovu Nnwọ ke Badnu nwée hne o jaabiḡa risi a.”

²¹ Nye ke berere n'esilawuru ele sno apna a, kanu a, “Nyenwe ai, kweru m me beru osno lite nda m.”

²² Kovu Jizōsi kanu a, “Sno m, gharu ele nwurnu onwu ma be lite ele nwurnu onwu ibne be.”

Jizōsi bigbōru

ruwhere osimini

(Mak 4:35-41; Luk 8:22-25)

²³ Nga Jizōsi bnarnu nu rime oḡbo, ele sno apna a sno a.

²⁴ Ngangam, okne ruwhere beteru ewhe n'olu osimini, ke mernu mini n'owubna n'ụ rime ogbo, k'ovu Jiz'osi n'iw'huru a neezni anyarna.

²⁵ Ele sno apna a vakwnusiri a, kpatnenya a, kanu a, "Nyenwe ai, d'ohia ai, a noowhu."

²⁶ O kanu be, "Kini mernu anu n'otu ogwnu, anu ele okwnata ovu mati?" O lizo, bigbo ruwhere osimini, ohna dna bil.

²⁷ O du kpa be hna ehni, be naakaa, "Nye ka bu odo badnu kini? Ruwhere nu okne osimini noobnotenu a nsni."

*Jiz'osi gw'oru
ele rukna lawuru*

(Mak 5:1-20; Luk 8:26-39)

²⁸ Nga o varu n'aka osimini kiyari n'eli ele Gadara, ele rukna lawuru ele renwu oju nwugwu, ele hi nu hne be li iznu whuya, ele ruwhnu be tu ogwnu, ke kpayaru o za nye neewhe n'apna wam.

²⁹ Be siwama okokoba, kaa, "Ai nu ji nwekogwu kini, Jiz'osi, ji Nnw'wo Chiokike? I varu ma i ta ai awhn'whnu hne ige ai y'oduge?"

³⁰ Agida ezni zi hne zila ikere naata wiri.

³¹ Renwu oju wam riasno a, kaa, "O buru nu i chihala ai, zizne ai ma a bna nu rime ezni ele ka."

³² O kanu be, "Anu zne." Be whuya, zne bna n'agida ezni wam, kpakara agida ezni wam gbadnarnu nu ngwulangwu dnabna nu rime osimini, rinwu nu rime mini.

³³ Ele nooznu be gbawhu, bna n'eli-ohna wam t'usi nhne be whnurnu, nu nhne mernu ele wam renwu oju nwugwu.

³⁴ Kpakara ele eli wam whuya kwnusi Jiz'osi. Nga be whnurnu a, be riasno Jiz'osi o whoga n'eli be.

9

*Jiz'osi gw'oru nye ehni a
d'ownurnu o'donwu*

(Mak 2:1-12; Luk 5:17-26)

¹ Jiz'osi bna nu rime ogbo, lahna aka osimini kiyari, va n'eli ke a.

² Be vyanu a otu nyerukna ke ngeri ehni a d'ownurnu o'donwu, dnanyi n'olu okpata, nga Jiz'osi whnurnu okwnata m'kpoma be, o kanu nye wam ngeri ehni a d'ownurnu o'donwu, "M'kpoma si i rikne, si nnw'wo m, be gbarunam ji kpakara mmehie i."

³ Agwna ele zni iwu ele Ju nesikwa nu m'kpoma be, "Nyerukna ka nookwulu Chiokike."

⁴ Jiz'osi mahiaru m'kpoma be, o kanu be, "Kini k'pahiaru anu naari oriri ka nu m'kpoma anu?"

⁵ Ndaa ke zi ewheke, o kaa, 'Be gbarunam ji kpakara mmehie i,' m'obu, o kaa, 'Lizo, zne izne?'

⁶ M jegesi anu nu Nnw'wo ke badnu nwernu iknernema n'owa o gbaru mmehie." O kanu nye wam ngeri ehni a d'ownurnu o'donwu, "Lizo, chiri etere i, la oro i."

⁷ Nyerukna wam lizo, la n'oro a.

⁸ Nga agida ele badnu whnurnu a, be tu ogwnu, znarni Chiokike, nye nyegar' badnu iknernema nu kpa.

Jiz'osi sukwuru Matiyo

(Mak 2:13-17; Luk 5:27-32)

⁹ O du nga Jizōsi hiri nū pji neewhe, o whnurnu otu nye rēwhna a bu Matiyu, hne o dazī n'oro ntū, o kanū a, “Sno m.” O lizō snornu a.

¹⁰ Nga Jizōsi dazī neeri wiri n'oro Matiyu, agīda ele ɔna ntū nū ele mmehie varū snornu Jizōsi nū ele sno apna a neeri wiri.

¹¹ Nga ele Farisi whnurnu a, be sīkwa ele sno apna a, “Kīni mernu Nye-zni-nhne anū sno ele ɔna ntū nū ele mmehie neeri wiri?”

¹² Nga Jizōsi nurnu a, o kanū be, “Mkpa dibjā zīko naakpa ele ɛhni bŭru ɔma, okwolem ele nrīria.

¹³ Kɔvu anū zne mŭhia nhne ka bu, ‘M noopio obirizi, o bŭo ariohna.’ Kwnornu nū m vāge m o sukwu ele ɔma, kɔvu ele mmehie.”

Ajji gbasiri ovu ɔnu

(Mak 2:18-22; Luk 5:33-39)

¹⁴ Ele sno apna Jōni vakwnusiri Jizōsi sīkwa a, “Kīni kpayarū aī nū ele Farisi noovu ɔnu ige ɔbula, kɔvu ele sno apna ī zā noovu ɔnu?”

¹⁵ Jizōsi sarū be, “Ele be ziri va hne be nɔolu nnwerne ikne, be jaazi noodukwa ruwhnu hne be nū nye nɔolu nnwerne ikne zī? Kɔvu ɔbochi vawa nga be jaanahɔru be nye nɔolu nnwerne ikne, ige wam be joovu ɔnu.”

¹⁶ “O zā nye jeegweru mkpekele ikpe ikne dnŭsni n'īwo ɔknani, kwnornu nū ke ikne jɔodokahala nhne n'ɛhni iwo ɔknani, o jɔodoka ke kakwo agīda.

¹⁷ O zī masī nye jeegweru manya ikne gbasī n'olori akpukpo ɔknani, be mee kpam, orori wam jaagbawama, manya nū orori akpukpo whume etekne. Kɔvu be gbasī manya ikne n'olori akpukpo ikne, kam jaabīta be lawŭru nkari.”

Nnwɔ rinya matī nū

nwerinya ntū ɔvnarna

(Mak 5:21-43; Luk 8:40-56)

¹⁸ Nga o naakanū be ɔka ka, le, otu nye risi varū, kponu a risi ɛli, kaa, “Nnwɔ m rinya nwunam kītna, kɔvu va tŭkwasi a aka ī, o jaazī bŭdnu.”

¹⁹ Jizōsi lizō, snornu a zne, ele sno apna a sno a masī.

²⁰ Otu nyerinya ke naaria ntū ɔvnarna nri nū awha lawŭru, garū a n'aznū, kpatū ɔnu iwo a aka.

²¹ Kwnornu nū nyerinya kannū ɛhni a, “O bŭru nū me kpatū ɔnu iwo a aka kpōi, o jeeme ɛhni bŭru m ɔma.”

²² Kɔvu nū Jizōsi tŭhnasnarnu, whnū a, kanū a, “Nnwɔ m rinya, mkpɔma si i rikne, ɔknwata mkpɔma ī znɔhialam jī.” Be gwɔru nwerinya wam ngangam.

²³ Nga Jizōsi varū n'oro nye risi wam, whnū ele jī opi nɔogwnu eri oli iznu nū agīda mkpakpo pji,

²⁴ o kanū be, “Anū whɔga hna, kwnornu nū nnwɔ rinya matī ka nwŭna ɔnwu, kɔvu nū o neezni anyarna.” Be mŭ a rŭmu.

²⁵ Nga o chīhalaru agīda ele badnū wam, o bna nū rime ɔro, nwŭgwu nnwɔ rinya matī wam n'aka, nnwɔ rinya matī wam lizō.

²⁶ ɔtnutnu a gazu kpakara ɛli wam.

Jizōsi gwɔru ele isni

²⁷ Nga Jizōsi hiri nū pji whŭya, ele isni lawŭru snornu a, neesi lŭlo, naakaa, “Jī Nnwɔ Devidi, dɔnu aī obirizi.”

²⁸ Nga o bnarnū n'oro, ele isni lawŭru wam vakwnusi a, Jizōsi sīkwa be, “Anū kweru nū m nwernu m rikne o gwɔ anū?”

Be kaa, “Owe, Nyenwe aī.”

²⁹ O kpatū be aka n'anya, kaa, “Lele kpa ɔknwata mkpɔma anū nū, o menu anū kpam.”

³⁰ Anya be snama. Jizọsi dọ be aka nọ nsni, kaa, “Whnụ nọ ọ zá nye anụ kanụ.”

³¹ Kọvu nga be whọgaru, be wheke rẹwhna Jizọsi kpakara ẹli wam.

Ogwugwo nye mgbu

³² Nga be nọowhoga, be kwuyanụ Jizọsi nye mgbu ke rẹnwu ojo nwu gwu.

³³ Nga ọ chihalaru rẹnwu ojo wam, nye mgbu wam kwuru ọka, o du agida ele badnụ ẹhni be, naakaa, “A whnụlele nhne nọ kpa n'Izireli.”

³⁴ Kọvu ele Farisi karu, “O ji rikne nye risi rẹnwu ojo naachihala ele rẹnwu ojo.”

Ele ẹrnu zị ele nọ ele

³⁵ Jizọsi neezneghari kpakara ẹli-ohna ma nọ mgbu neezni nhne n'oro ogbako be, nọkpo okwo izi oma ẹli-eze Chiokike, nọogwo kpakara nriria nọ ẹhni igbugbu zị ọdo n'odo.

³⁶ Kọvu nọ nga ọ whnurnu agida ele badnụ wam, ọ donu be obirizi, kwnornu nọ inwe gwuru be, be nwée rikne yinu ẹhni be aka, be gbasaru lele atnurnu nwée nye nọoznu be.

³⁷ Ọ kanu ele sno apna a, “N'ezi, ogwe nhne ẹkwu zị agida, kọvu nọ ele ẹrnu zị ele nọ ele.”

³⁸ Kam kpararu, anụ rịo Nyenwe ogwe nhne ẹkwu ma o zizne ele ẹrnu n'ẹkwu a.”

10

Ele izi nri nọ ẹbo

(Mak 3:13-19; Luk 6:12-16)

¹ Jizọsi sukwuru nri nọ badnu lawuru wam ele sno apna a. O nyee be rikne be chihala rẹnwu ojo, gwọ masi kpakara nriria nọ ẹhni igbugbu zị ọdo n'odo.

² Ka bu rẹwhna ele izi nri nọ ẹbo wam, nye mbom bu Saimoni, nye be nookwu Pita, nọ Anduru nwene a, nọ Jemisi nnwọ Zebidi nọ Jóni nwene a,

³ Filipu nọ Batolomi, Tọmosi nọ Matiyo nye ọna ntụ, Jemisi nnwọ Alifayosi nọ Tadiyosi,

⁴ Saimoni nye zị n'esilawuru ele noonwu bẹkwu nọ mkpoma, nọ Judasi Isikarioti, nye reru a.

Ernu ele izi nri nọ ẹbo

(Mak 6:7-13; 13:9-13; Luk 9:1-6; 21:12-17)

⁵ Jizọsi zihala nri nọ badnu lawuru ka, dọ be aka nọ nsni, kaa, “Anụ znéko n'eli ele búo ele Ju, mọbu nọ rime ẹli-ohna obula ke ele Sameria.

⁶ Kọvu anụ znekwnusi ele Izireli, ele nọ lele rumu atnurnu whuru owu.

⁷ Nga anụ neezne anụ kanu be, ‘Eli-eze Chiokike zị ndundu.’

⁸ Anụ gwọ ele nriria, mee ele nwurnu onwu be hi n'ẹnwu lizọ, anụ gwọ ele nchnichna, anụ chihala rẹnwu ojo. Anụ nahjaru ewhu ewhu, anụ nyee n'ewhu ewhu.

⁹ Anụ jí iwai obula nọ rẹkpa anụ.

¹⁰ Anụ jí rẹkpa n'izne anụ, mọbu iwo lawuru, mọbu okoro-ochi, mọbu mkpara, kwnornu nọ nye ẹrnu kwesiri be nyee a wiri nọ hne ọ nọornu ẹrnu.

¹¹ “Eli-ohna obula, mọbu mgbu obula anụ bnarnu, anụ piohia ezi badnụ nọ rime a, daziri pi tem anụ whoga.

¹² Nga anụ bnarnu n'oro wam, anụ kaa, ‘Udno zinu anụ.’

¹³ Ọ buru nọ ọro wam buru oma, udno anụ jaadazinu a, kọvu nọ ọ buru nọ ọro wam búo oma, udno anụ jeehiehnakwnusi anụ.

14 Nye ọbula ke nábnanyana anụ, ke n'ụna ikwu-ọnu anụ, anụ jọowhoga n'oro wam mọbu n'ẹli-ọhna wam, lịsnama ruznurnuznu ọchi anụ.

15 N'ezị me naakanụ anụ, be joodonu ẹli Sodom nụ Gómora obirizi n'ọbochi ikpe karụ ẹli-ọhna kị.

16 "Le, m neezihala anụ lele atnurnu n'esilawuru edu, anụ nwe akọ lele agwọ, kpa enwerne lele nduru.

17 "Kọvu anụ ze ele badnụ, kwnornu nụ be jeegweru anụ nyee n'aka ele ikpe, be jaapniā anụ nhne n'oro ọgbako ele be.

18 Be jookwuru anụ zne nụ ruwhnu ele risi ọchichi nụ ele eze kwnornu m, ma anụ kanụ be nhne gbasiri, ma ele bụo ele Ju.

19 Kọvu nụ nga be jeegweru anụ nyee ele ikpe, mkpoma lákọ anụ mini kpa anụ jọogoru ọnu anụ mọbu nhne anụ jookwu, ige wam be jeenye anụ nhne anụ jookwu.

20 Kwnornu nụ ọ bụo anụ nookwu ọka, kọvu ọ bụ Enine ke Nda anụ nookwu ọka nụ rime anụ.

21 "Nwene jeegweru nwene a nyee ma be gbu a, nda jeegweru nnwọ a nyee, rụmụ jeelizọ megidne ele mụmụ be, mee be nwuma.

22 Kpakara ele badnụ joosno anụ irno kwnornu nụ rẹwhna m, Kọvu be jọoznohia nye ọbula ke jaaknata mkpoma dazigidne dụ okwukwo kpakara nhne.

23 Nga be kpagburu anụ n'otu ẹli-ọhna, anụ gbazne nụ ke berere. Me naakanụ anụ ezi ọka, anụ jáagazu kpakara ẹli-ọhna Izireli dụ nga Nnwọ ke Badnụ jaava.

24 "Nye sno apna nye-zni-nhne jáaka nye zni a nhne. Ọhi jáaka nyenwe a.

25 Ọ dulam nga nye sno apna nye-zni-nhne jọonu lele nye zni a nhne, nụ ọhi ọ nụ lele nyenwe a. Ọ bụru nụ be sukwuru nda nwe ọro Bẹlizibolu, ọ bụ nụ be jósukwu ele ọro a karukwo?

Nye anụ jootu ogwnu a

(Luk 12:2-7)

26 "Anụ tũko ogwnu be, kwnornu nụ ọ zá nhne be kpusnirni okpusni ke be jókupme, mọbu nhne zị mgwugwa ke be jáamahia.

27 Nhne me kannụ anụ n'ọchichiri, anụ kwu a n'iwnehnie, nhne be tũkasiri nụ nsnị, anụ kwusa a n'olu ọro.

28 Anụ tũ ogwnu ele noogbu anọ-ẹhni, ele nwée rikne gbu mkpoma. Kọvu anụ tũ ogwnu nye wam ke nwernu rikne gbu mkpoma nụ anọ-ẹhni nụ bẹkwnu ẹli rẹnwu.

29 Be zá neere wọnzna lawuru otu mkpuru iwai matị? Kọvu otu nụ rime be jáadna n'ẹli sụ Nda anụ kwéle.

30 Kọvu nụ kpakara rukeri-ize ke zị anụ nụ risi gwnurnu ogwnu.

31 Ogwnu tũ anụ, anụ zị okne ọnu ahia karụ agida wọnzna.

O kwuhia nụ ọ ju Karaisi

(Luk 12:8,9)

32 "Nye ọbula be jookwuhia m nụ ruwhnu ele badnụ, ọ bụ ya bụ nye me jookwuhia nụ ruwhnu Nda m ke oligwe.

33 Kọvu nye ọbula ke jọogonahoru m nụ ruwhnu ele badnụ, bụ nye me jọogonahoru nụ ruwhnu Nda m ke zị n'oligwe.

Ọ bụo udno

kọvu ama-ogwnu

(Luk 12:51-53; 14:26,27)

³⁴ “Anụ chéko nụ m varụ m o gweya udno n'owa, m váge m o gweya udno, kọvu ama-ogwnu.

³⁵ Kwnornu nụ m varụ m o kewa
‘nnwọ rukna nụ nda a,
nnwọ rinya nụ nne a,
nnwerne nnwọ nụ nne nzi a.

³⁶ Nye irno badnụ jọbu ele ezi-nụ-oro a.’

³⁷ “Nye obula ke whnurnu nda a mọbu nne a n'anya karụ m, kwésile m, nye whnurnu nnwọ a rukna mọbu nnwọ a rinya n'anya karụ m, kwésile m.

³⁸ Nye obula ke vúrúle ogba a sno m n'aznụ, kwésile m.

³⁹ Nye obula ke noopio bụdnụ a jootuwu a, nye tuwhuru bụdnụ a kwnornu m, joopohia a.

Ogwo ernal
(Mak 9:41)

⁴⁰ “Nye obula ke nabnanyarnụ anụ, nabnanyarnụ m, nye nabnanyarnụ m, nabnanyarnụ nye ziyaru m.

⁴¹ Nye obula ke nabnanyarnụ nye owhnurninya kwnornu nụ o bụ nye owhnurninya, jaanahia masi ogwo ernal nye owhnurninya. Nye nabnanyarnụ nye mee mma kwnornu nụ o bụ nye mee mma, jaanahia ogwo ernal nye mee mma.

⁴² Nye obula ke jookwute otu nụ rime ele matị ka otu okiko mini jiri iyi kwnornu nụ o bụ nye sno apna m, owe, me naakanụ anụ ezi oka, o jaanahiariri ogwo ernal a.”

11

Jizosi nu Jóni
Nye Wu Mini
(Luk 7:18-35)

¹ Nga Jizosi nyekworu ele sno apna a nri nụ ẹbo wam iwu, o hiri nụ pị whoga, zne zni nhne, kpọ okwo izi oma kpakara ẹli-ohna zị be ndundu.

² Jóni nurnu n'oro ikelu kpakara ernal Karaishi nornu, o zizne agwna ele sno apna a.

³ Be sika a, “O bụ jiwa bụ nye jaava, sọbu a le anya nye berere?”

⁴ Jizosi saru be, “Anụ lahna kanụ Jóni kpakara nhne anụ nurnu nụ nhne anụ whnurnu,

⁵ ele isni n'owhnu osno, ele mgworo neezne izne, be neeme ele nchnichna be ziri richna, ele nsnị inyo nnonu nhne, ele nwurnu onwu lizoro n'enwu, be neezni ele mboni izi oma.

⁶ Chiokeke jogozị nye obula ke júla m kwnornu nhne me mernu.”

⁷ Nga ele sno apna Jóni larụ, Jizosi bete naakanụ agida ele badnụ wam nhne gbasiri Jóni. O sika be, “Kini bụ nhne anụ zneru o whnụ n'eli-ikpa? Ekere achara ruwhere noovu?”

⁸ Sọbu kini nhne anụ zneru o whnụ? Nyerukna wogwu iwo zị piali piali sa? Le, ele wogwu iwo zị piali piali zị n'oro ele eze.

⁹ Anụ kanụ m, kini bụ nhne anụ whogaru zne o whnụ? Nye owhnurninya sa? Owe! Nye kakwo nye owhnurninya.

¹⁰ Nye ka bụ nye be gbarụ nhne gbasiri a n'okwukwo nsọ, kaa, ‘Le, m neezizne nye izi m nụ ruwhnu i,
nye jeemekwata apna i nụ ruwhnu i.’

¹¹ N'ezi me kanụ anụ, n'esilawuru ele ele rinya murnu, o zá nye ke kakwo Jóni Nye Wu Mini, kọvu nye zikakworu matị n'eli-eze Chiokeke kakwo Jóni.

¹² Hite n'òbochi Jóni Nye Wụ Mini dọ kítà, be neeme ẹ̀li-eze Chiokike nhne rikne, ele gbasìri rikne naagbalí ọ bna nù rime a.

¹³ Tem dọ n'íge Jóni, kpakara ele ọ̀whnurninya nù iwu kwuru nhne gbasìri ẹ̀li-eze Chiokike wam.

¹⁴ Ọ̀bùru nù anù jeekweru a, Jóni bụ Ẹ̀lajja nye be gbarù nhne gbasìri a nù ọ jaava.

¹⁵ Nye nwernu nsni, ọ nurnu.

¹⁶ “Ndaa nhne me jeeji sninu ebiri ka? Ebiri ka nù lele rùmu takìri dazìgwu n'ahia, noosukwu ibne be ikwu,

¹⁷ be naakaa,

‘A kwannù anù eri,

anù tńéne eri,

a gwnù eri mkpe,

anù kwnána ẹ̀kwna.’

¹⁸ Kwnornu nù Jóni varù ríle wiri, ọ nwóge manya, be kaa, ‘O nwernu rẹ̀nwu ọjo.’

¹⁹ Nnwọ ke Badnù varù, neeri wiri, nọonwo manya, be kaa, ‘Le, nye okne wiri, nù nye nwọ okne manya, enyi ele ọ̀na ntù nù ele mmehie.’ Ẹ̀rnu ọ̀ma ke neehi nù akọ̀nìche Chiokike whùya neegesi nù akọ̀nìche bọru ọ̀ma.”

Eli-ohna kwé ekwe

(Luk 10:13-15)

²⁰ Jizọsi bete ọ nyanù agida ẹ̀li-ohna ọ̀nyinya hne ọ rnurnu agida ẹ̀rnu kwnornu nù be kwéle ọ tũhnasna mkpọ̀ma nù mmehie be.

²¹ “Awhnùwhnu jaazinu i, jì Korazini, awhnùwhnu jaazinu i, jì Betesaida, ọ bọru nù be rnurnu kpakara agida ẹ̀rnu ndu-ẹ̀hni ka nù Taya nù Sajdoni bụ ke be rnurnu nù rime anù, be znernu ọ̀tũhnasna mkpọ̀ma agida ige wheru ewhe, dazìri n'íkpe mkpe nù rẹ̀tnu.

²² Kọ̀vu me kanù anù, be jọdonu Taya nù Sajdoni obirizi n'òbochi ikpe karù anù.

²³ Jì n'iwuhuru i masì, Kapanom, be jeegwelizọ i olu dọ oligwe? Be jeegwedna i ẹ̀li, dọ bẹ̀kwu ẹ̀li rẹ̀nwu. Ọ̀ bọru nù agida ẹ̀rnu ndu-ẹ̀hni be rnurnu nù rime i nù be rnurnu a nù Sodom, o znernu adazì dọ ọ̀bochi tna.

²⁴ Kọ̀vu me kanù anù, be jọdonu ẹ̀li Sodom obirizi n'òbochi ikpe karù i.”

Ozukwa inwe

(Luk 10:21-22)

²⁵ N'íge wam Jizọsi karù, “Meka, Nda, Nyenwe oligwe nù ọ̀wa, kwnornu nù i bigwaru nhne ele ka n'anya ele akọ̀ nù ele marnù nhne, kọ̀vu i kpumennu be rùmu takìri.

²⁶ Owe! Nda, meka, kwnornu nù ọ̀ bọru ọ̀ma kpam n'anya i.

²⁷ “Nda m yisiri kpakara nhne n'aka m. Ọ̀ zá nye magwù Nnwọ wam, okwolem Nda. Ọ̀ zì masì nye magwù Nda wam, okwolem Nnwọ a kpọ̀i, nù ele Nnwọ wam pioru o kpumenu a.

²⁸ “Anù vakwnusi m, anù ele nọdogbu ẹ̀hni anù n'ẹ̀rnu, ele be vuteru ivu rìnya, m jeeme anù zukwaru inwe.

²⁹ Anù ynarnù yokwu m* n'ìli anù, anù mụhia nhne n'ọ̀nu m, kwnornu nù m bụ m nye zì wọ̀hnernerne nù nye gwednarnù mkpọ̀ma n'ẹ̀li, anù joopohia ozukwa inwe nù mkpọ̀ma anù.

³⁰ Kwnornu nù yokwu m gbú igbugbu, ivu m zì ewheke.”

* **11:29** Yokwu bụ isisi be knegidnerne n'ìli anọ ọ̀ro ma be rnù ẹ̀rnu be karù be mee.

12

Ajji gbasiri

Ọbochi Ozukwa Inwe

(Mak 2:23-28; Luk 6:1-5)

¹ N'ige wam, Jizọsi naagawhe n'ekwu ikpa n'Ọbochi Ozukwa Inwe, wiri ńoogwnu ele sno apna a, be bete ńoogho ikpa naata.

² Nga ele Farisi whńrnu a, be kanu a, "Le, ele sno apna i neeme nhne kwésile n'iwu n'Ọbochi Ozukwa Inwe."

³ Ọ kanu be, "Anu gwnuna nhne Devidi mernu nga wiri gwnurnu a, ya nu ele snogwu a?"

⁴ Ọ bnazernu n'oro nsọ Chiokike ri bredi be bitaru nu ruwhnu Chiokike, ke kwésile n'iwu nu Devidi nu ele sno a ri, okwolem ele okwa arịohna kwesiri o ri a?"

⁵ Mọbu anu gwnuna n'iwu kpa ele okwa arịohna Chiokike ji neemeru Ọbochi Ozukwa Inwe n'Oro Nsọ Chiokike, kovu ikpe mana be?"

⁶ Kovu me kanu anu nu nye kakwo Oro Nsọ Chiokike zi hna.

⁷ Ọ buru nu anu mahiaru nhne ikwu-onu ka bu, 'M noopio obirizi, o buo arịohna,' anu jama ele ikpe mana ikpe.

⁸ Kwnornu nu Nnwọ ke Badnu bu Nyenwe Ọbochi Ozukwa Inwe."

Nyerukna aka

donwurnu donwu

(Mak 3:1-6; Luk 6:6-11)

⁹ Jizọsi hi nu pi whoga, bna n'oro ogbako ele Ju,

¹⁰ otu nwerukna aka donwurnu donwu zi pi. Be noopio nhne be jeeji bno Jizọsi nhne, be sikwa a, "Ọ buru oma n'iwu o gwọ nriria n'Ọbochi Ozukwa Inwe?"

¹¹ Jizọsi kanu be, "Ndaa nye nu rime anu ke jeenwe otu aturnu, o buru nu aturnu wam dnabna rime olulu n'Ọbochi Ozukwa Inwe, o bu o jonwugwu a, dhia a?"

¹² Badnu gburu onu karu aturnu. Ka bu nu o buru oma o mee nhne oma n'Ọbochi Ozukwa Inwe."

¹³ Ọ kanu nye nyerukna wam, "Dọsnima aka i." Ọ dọsnima aka a, aka a buru oma lele aka a berere.

¹⁴ Ngam, ele Farisi whogaru gba iznuznu kpa be joogbu a.

Nnwọ izi Chiokike hohiaru

¹⁵ Nga Jizọsi mahiaru a, o hi nu pi whoga, agida badnu snornu a, o gwọ kpakara ehni igbugbu be.

¹⁶ Ọ doru be aka nu nsni be meko ele badnu mahia nye o bu.

¹⁷ O mernu ka ma nhne be gbaru n'okwukwo nsọ hite n'onu Azaya nye owhnurninya mezu, ke kwuru,

¹⁸ "Le, ka bu nye izi m me hohiaru, nye me whurru n'anya, nye nhne a nọoso m.

M jeeysi Enine m nu rime a.

Ọ jọkpo okwo ikpe zi snam nu kpakara mba.

¹⁹ Ọ jolu ogwnu, o jeesi lulo,

o za nye jonu akpiti a n'ederez.

²⁰ Ọ jaagbaji ekere achara hipiagwu ehipia, mọbu whusnime tonji noohio runwurnu,

tem o mee ikpe zi snam megbu.

²¹ Kpakara mba jeenwe olile anya nu rewhna a."

*Jizōsi nū Belizibolu**(Mak 3:20-30; Luk 11:14-23)*

²² Ige wam be kwuyanū Jizōsi otu badnū rēnwu ojo n̄wūgwu, nye kpuru isni, ke dnarnū mgbu, ọ gwọ a ẹhni igbugbu wam, nye mgbu wam kwuru ọka, whnū masi ọsno.

²³ Ọ duru agida ele badnū wam ẹhni, be kaa, “Nyerukna ka, ọ jọbu Nnwọ Devidi sa?”

²⁴ Kọvu nga ele Farisi nurnu a, be kaa, “Nwerukna ka neeji rikne Belizibolu nye risi ele rēnwu ojo naachihala rēnwu ojo.”

²⁵ Nga Jizōsi mahjaru oriri be, ọ kanū be, “Eli-eze ọbula kewama megidne ẹhni a, jootubiri etekne, ẹli-ọhna ọbula mọbu ọro ọbula ke kewarū megidne ẹhni a joo gwuzoli.

²⁶ Ọ buru nū Setani chihala Setani, o kewarū megidne ẹhni a, ẹli-eze a jaaga ọla gwuzo?”

²⁷ Ọ buru nū m ji m rikne Belizibolu naachihala ele rēnwu ojo, nū rikne nyele bu hne ele ke anū ji naachihala be? Be jọbu ele ikpe anū.

²⁸ Kọvu ọ buru nū m ji m Enine ke Chiokike naachihala rēnwu ojo, le, ẹli-eze Chiokike dulam anū ẹhni.

²⁹ Berere kwno, badnū jaaga ọla bna n'oro nye dikne, nahoru a kpakara nhne n'aka rikne, ọ buru nū o béle ọsno kne dikne wam eriri? Nga wam o jeenwe rikne nahoru a nhne zị n'oro a.

³⁰ “Nye nū me zila, bu nye neemegidne m, nye snone m naachikota nhne, bu nye nọobosa ọbosa.

³¹ Kwnornu nū ka, m naakanū anū, be jaagbarūnu badnū mmehie nū okwulu ọbula be kwuluru, kọvu nū be jáagbarūnu okwulu be kwuluru Enine Nso.

³² Nye ọbula ke jookwugidne Nnwọ ke Badnū, be jaagbarūnu a, kọvu nye ọbula ke jookwugidne Enine Nso, be jáagbarūnu a, ọ búo n'ige ka, mọbu ige ke jaava.

*Isisi nū mkpuru a**(Luk 6:43-45)*

³³ “Anū mee isisi ma ọ buru ọma, mee masi mkpuru a ma ọ buru ọma, mọbu mee isisi ma ọ buru isisi ojo, mee masi mkpuru a ma ọ buru mkpuru ojo. Kwnornu nū be mahia isisi hite nū mkpuru a.

³⁴ Anū ẹbnurnu agwo, anū jaaga ọla kwu ọka ọma, hne anū bu ele ojo? Kwnornu nū nhne jipiyaru mkpoma bu nhne ọnu nookwu.

³⁵ Badnū ọma hite n'ekwnu ọma ke zị nū mkpoma a neegwehia nhne ọma, badnū ojo hite n'ekwnu ojo ke zị nū mkpoma a neegwehia nhne ojo.

³⁶ Kọvu me kanū anū, nū ọka ọbula ele badnū nookwu ke bnágwo nū nhne, be jaasa aiji a n'ọbochi ikpe.

³⁷ Kwnornu nū be jeehite n'ikwu-ọnu i gwnusi i nū nye mee mma, hite masi n'ikwu-ọnu i maa i ikpe.”

*Nhne elekema ke Jona**(Mat 8:11,12; Luk 11:29-32)*

³⁸ Ige wam agwna ele zni iwu nū ele Farisi kanū a, “Nye-zni-nhne, a noopio ọ whnū nhne elekema n'aka i.”

³⁹ Jizōsi sarū be, “Ebiri ojo ke naagba ewhere noopio nhne elekema, ọ zá nhne elekema be jeenye a, okwolem nhne elekema Jona nye ọwhnurninya.

⁴⁰ Lele kpa Jona daziri ọbochi ẹto iwhnehnie nū abali nū ruwho aznū, ọ bu kpa Nnwọ ke Badnū jaadazi nū rime ẹli ọbochi ẹto iwhnehnie nū abali.

⁴¹ Ele rukna Ninive joosno ebiri ka lizo n'ikpe, be jaama be ikpe, kwnornu nu be tuhnasnarnu mkpoma n'okpo okwo Jona. Kovu le, nhne kakwo Jona zi hna.

⁴² Eze nyerinya Seba jeelizo ya nu ele ebiri ka bna n'ikpe, o jaama be ikpe, kwnornu nu o hiri n'osotoma owa va nuru akoniche Solomoni. Kovu le, nhne kakwo Solomoni zi hna.

Renuw ojo hiehnarnu

(Luk 11:24-26)

⁴³ “Nga renwu ojo hiri nu rime badnu whoga, o zneghari n'eli chna chna chna, noopio hne o joozukwa inwe, kovu o plohjala,

⁴⁴ o kaa, ‘M jaalahna n'oro m hne me hiri whuya.’ Nga o vaduru, o whnu nu o za nye wu nu rime oro wam, nu be zasnarnu a, bikwata nhne nkari.

⁴⁵ O jeezne chiri renwu ojo esau ibne a ele nwernu risi rikne karu a, be bna wuru nu rime nye wam, onodi ipne-aznu ke nye wam johnasi bujo karu kpa o zi nu mbom. O bu kpa o joonu n'ebiri ojo ka.”

Nne Jizosi nu rumu nne a

(Mak 3:31-35; Luk 8:19-21)

⁴⁶ Nga o nookwunu agida ele badnu wam oka, nne a nu rumu nne a varu gwuzoru n'ederezi noopio o kwunu a oka.

⁴⁷ Otu badnu kanu a, “Le, nne i nu rumu nne i gwuzogwu n'ederezi noopio i o kwunu i oka.”

⁴⁸ Jizosi saru a, “Nyele bu nne m, ele kele bu rumu nne m?”

⁴⁹ O dosnima aka nu hne ele sno apna a zi, kaa, “Anu le nne m nu rumu nne m.

⁵⁰ Kwnornu nu nye obula ke jeeme nhne Nda m ke zi n'oligwe noopio, nye wam bu nwene m rukna nu nwene m rinya, nu nne m.”

13

Elulu nye ogha mkpuru

(Mak 4:1-9; Luk 8:4-8)

¹ N'obochi wam Jizosi whuyaru nu rime oro zne daziri eli nu ngeri osimini.

² Agida ele badnu gbakoru hne o zi, ke kpayaru o jiri bna nu rime ogbo, daziri eli, agida ele badnu wam gwuzoru nu mkpomkpo eli.

³ O ji elulu zi odo n'odo zni be agida nhne, kaa, “Otu nye ernu ekwu znernu agha mkpuru.

⁴ Nga o naagha, agwna mkpuru dna nu ngeri apna, rumu onunu varu tuturu be ta.

⁵ Agwna mkpuru dnarnu n'eli rugwu, hne be nwée agida rizna, ngangam mkpuru wam fuharu, kwnornu nu be nwée agida rizna.

⁶ Nga ehnam wasiri, be chnanwu, kwnornu nu be nwée egwnugwnu.

⁷ Agwna mkpuru berere dnarnu n'esilawuru igwnu, igwnu wam sohia, kpagbu be.

⁸ Agwna mkpuru berere dnarnu n'eli oma, be mji mkpuru otu riwhu, berere nri isunu, berere nri eto.

⁹ Nye nwernu nsi, o nuru.”

Nhne o kwno tnu elulu

(Mak 4:10-12; Luk 8:9,10)

¹⁰ Ele sno apna a vakwnusi a, sikwa a, “Kini kpayaru i nookwunu be oka n'elulu?”

11 Jizọsi saru be, “Be mernu anu mahia nhne tugwaru otugwa ke eli-eze Chiokike, kovu nu o buo be.

12 Nye obula ke nwernu nhne, be jeenye hnasị a, o jeenwe agida nhne, kovu nye ke nwée, be jaanahoru a o bubedi ke o nwernu.

13 Kam kpararu, me notnunu be elulu. Be neele anya kovu be za nowhnu, be noobno nsni, be za nonu, be joghohia nhne.

14 Nhne Azaya nye owhnurninya kwuru gbasiri be mezu nu risi be, ke kwuru,

‘Anu jonu kpoi, kovu anu jomuhia rja rja,
anu jowhnu kovu anu joghohia rja rja.

15 Kwnornu nu mkpoma ele ka gbasninem n’oto,
nsni kposninem be masi.

Be kpusninem anya be,
ma be gharu o ji anya be whnu osno,
gharu o jiri nsni be nuru nhne,
gweru mkpoma be ghohia, ma be tuhmasna,
ma m gwọ m be.’

16 Anu bu ele owa oma, kwnornu nu anya anu nowhnu osno, nsni anu nonu nhne.

17 N’ezi me kanu anu, o gwnurnu agida ele owhnurninya nu ele oma ogwnu o whnu nhne anu nowhnu, kovu nu be whnu, nu o nuru nhne anu nonu kovu nu be nuna.

Risi elulu nye ogha mkpuru

(Mak 4:13-20; Luk 8:11-15)

18 “Anu bnote nsni ma anu mubia risi elulu nye ogha mkpuru wam.

19 Nye obula ke nuru ikwu-onu eli-eze Chiokike, kovu o ghohiala a, nye ojo wam va, nahoru a nhne be kpari nu mkpoma a. Ka bu mkpuru ke be ghasiri nu ngeri apna.

20 Mkpuru ke be ghasiri nu rugwu bu ele nuru ikwu-onu wam, ngangam be gweru snarnima nwugwu a.

21 Kovu nu be nwée egwnugwnu nu rime be, be dazi ige mati, nga mmekpehni mibu awnwhnu varu kwnornu nu ikwu-onu wam, ngangam, be dnahnala aznu.

22 Mkpuru ke be ghasiri n’esilawuru igwnu bu ele nuru ikwu-onu wam, kovu mmekpehni ke owa ka nu aghigho owhnu ekwnu n’anya kpagburu ikwu-onu wam, o buru nhne mina mkpuru.

23 Mkpuru ke be ghasiri n’eli buru oma, bu ele ke nuru ikwu-onu wam, be ghohia a, be mbia mkpuru k’ezi, otu riwhu, ke berere nri isunu, berere nri eto.”

Elulu achara atna

24 Jizosi tnu nu be elulu berere, kaa, “Eli-eze Chiokike nu lele hne badnu kpari mkpuru oma n’ekwu a.

25 Nga ele badnu neezni anyarna, nye irno varu kpari atna n’ekwu wam, la.

26 Nga mkpuru oma wam fuharu, o mi mkpuru, atna wam whoru iwhne.

27 Ele izi nye nwe ekwu wam vakwnusi a, kanu a, ‘Nda-ai-kwu, i kpasi la mkpuru oma n’ekwu i? O zi hnele fuhia atna?’

28 “O kanu be, ‘Ka bu aka ernu nye irno.’

“Ele izi a sikwa a, ‘I pioru a zne whome be?’

29 “O kanu be, ‘Oza! O zi kpa anu zi noowho atna anu whokota ipka.

³⁰ Anụ gharụ be lawuru sokota du ige o gwe nhne n'ekwu, nga wam, m jaakanu ele neegwe nhne n'ekwu be beru osno whome atna wam, kpukota be n'okwukwu, kpo be bekwnu. Kovu anu chibna ikpa wam n'obna m.' ”

Mkpuru mositadi nu

nhne whu bredi

(Mak 4:30-34; Luk 13:18-21)

³¹ Jizosi tnu nu be elulu berere, kaa, “Eli-eze Chiokike nu lele mkpuru isisi be kwu mositadi, ke badnu kpasiru n'ekwu a.

³² O bu n'ezi nu o zi mati kakwo kpakara mkpuru, o gho isisi kakwo kpakara nhne be kpasiri n'ekwu, ke onunu oligwe naava nonu alikwu nu nkala a.”

³³ O tnu nu be elulu berere, kaa, “Eli-eze Chiokike nu lele nhne whu bredi, ke nyerinya gweru gwasị nu rime agida ikpa, tem kpakara a whu.”

³⁴ Kpakara ikwu-onu ka bu ke Jizosi kwunnu igbudu badnu n'elulu. O kwugene be ikwu-onu hne o jile elulu.

³⁵ “Ka bu ma nhne be kwuru hite n'onu nye owhnurninya mezu, ke karu, 'M jookpume onu m tnu elulu, m jaakahia nhne be bigwaru abigwa ke nga owa panizoru.' ”

Jizosi kowamarnu risi

elulu achara atna

³⁶ Nga o ghasaru igbudu badnu wam, o bna nu rime oro. Ele sno apna a vakwnusiri a, naakaa, “Kowanu a risi elulu atna wam zi n'ekwu wam.”

³⁷ O kaa, “Nye naagha mkpuru oma bu Nnwọ ke Badnu.

³⁸ Ekwu bu owa, mkpuru oma wam bu rumu eli-eze Chiokike, kovu atna wam bu ele ke nye ojo wam.

³⁹ Nye irno wam ke kpasiru be bu Ekwensu, ogwe nhne n'ekwu bu okwukwo owa, ele wam neegwe nhne n'ekwu bu ele enine izi.

⁴⁰ Lele kpa be nookpokota atna wam nokpo be bekwnu, o bu kpa o jaazi n'okwukwo owa.

⁴¹ Nnwọ ke Badnu jeezihala ele enine izi a, be chikota n'eli-eze a kpakara ele naakpahia aruru-eli nu ele neeme mmehie.

⁴² Be jootubna be n'okne bekwnu wam hne be jaazi naakwana ekwna, naata rukwnurnu-ize.

⁴³ Ige wam ele mee mma joonwu lele ehnam n'eli-eze Chiokike Nda be. Nye nwernu nsi, o nurnu.

Elulu eto

⁴⁴ “Eli-eze Chiokike nu lele ekwnu be bigwaru n'ekwu, ke otu badnu whnurnu. O gweru nhne kpusnime a, gweru snarnima la, re kpakara nhne o nwernu, zuru eli wam.

⁴⁵ “Eli-eze Chiokike nu lele nye mgbama-ahia noopio pali oma.

⁴⁶ Nga o whnurnu otu pali gburu okne onu, o zne re kpakara nhne o nwernu, zuru a.

⁴⁷ “Berere kwno eli-eze Chiokike nu lele igbo be wusiri nu rime osimini, ke gburu agida aznu zi odo n'odo.

⁴⁸ Nga o jiru, be dohia a nu mkpomkpo eli, daziri eli hosi aznu ele ke buru oma nu rime nhne, tuwhume aznu ele ke buo oma.

⁴⁹ O bu kpa o jaazi n'okwukwo ke owa, ele enine izi jowhuya, kewahia ele ojo n'ehni ele mee mma.

⁵⁰ Be jootubna ele ojo n'okne bekwnu, hne be jaazi naakwana ekwna, naata rukwnurnu-ize.”

⁵¹ Jizosi sikwaru be, “Anu ghohiaru kpakara nhne ka?”

Be kaa, “Owe.”

⁵² O kanu be, “Nye zni iwu obula be znirni apna eli-eze Chiokike, nu lele nye nwe oro nye hiri n'ekwnu a neegwehija nhne ikne nu nhne oknani.”

Be juru Jizosi nu Nazareti
(Mak 6:1-6; Luk 4:16-30)

⁵³ Nga Jizosi tnukworu elulu, o hiri nu pi whoga.

⁵⁴ Nga o varu n'eli ke aka a, neezni nhne n'oro ogbako be, ke kpayaru nhne o znirni duru be ehni, be kaa, “Ndaa hne nwerukna ka nwehjaru akoniche nu ernu ndu-ehni ka?”

⁵⁵ Nyerukna ka o buo nnwo omenka ai? O buo nne a bu nye be kwu Meri nu rumu nne a rukna, Jemisi, nu Josefu, nu Saimoni nu Judasi?

⁵⁶ Rumu nne a rinya be zia n'esilawuru ai? Ndaa hne nwerukna ka nwehjaru kpakara nhne ka?”

⁵⁷ Be we ovu ehni megidne a.

Kovu Jizosi kanu be, “Okwolem nu eli ke a nu ezi-nu-oro a bu hne nye ohnurninya nwée oso anya.”

⁵⁸ O rnuna agida ernu ndu-ehni nu pi kwnornu nu be nwée okwnata mkpoma.

14

Enwu Joni Nye Wu Mini
(Mak 6:14-29; Luk 9:7-9)

¹ N'ige wam Eze Erodu nye neechi Galili nuru otnutnu gbasiri Jizosi.

² O kanu ele neeznenu a izi, “Nyerukna ka bu Joni Nye Wu Mini, o hilem n'enwu lizo, o bu nhne mernu o nwernu rikne ka o ji noornu ernu ndu-ehni.”

³ N'ige wheru ewhe Erodu nwugwuru Joni, kne a eriri, yisi a n'oro ikelu kwnornu nu Erodiasi nnwerne Filipu nwene a rukna.

⁴ Kwnornu nu Joni kannu a, “O buo oma n'iwu o lu nnwerne nwene i.”

⁵ Erodu pioru o gbu a, kovu o turu ogwnu ele Ju, kwnornu nu be kwegwu Joni bu nye ohnurninya.

⁶ Nga obochi ochenwanya omumu Erodu duru, nnwo rinya Erodiasi neetne eri nu ruwhnu be, o soro Erodu n'onu k'ezi,

⁷ o kwe a mkwna, kwesi a rikne nu o jeenye a nhne obula o jorio.

⁸ Nne a zni a ezni o kaa, “Nye m risi Joni Nye Wu Mini n'agbugba hna.”

⁹ O gburu eze igbugbu nu mkpoma, kovu kwnornu nu mkwna wam o kweru, nu ele ya nu be dazi neeri wiri, o karu be nyee a.

¹⁰ O zizne be gbuhija risi Joni n'oro ikelu.

¹¹ Be vuya risi a n'agbugba, nyee nnwo rinya wam, o nyee a nne a.

¹² Ele sno apna Joni va, vuru iznu a, li a, be zne kanu Jizosi nhne mernu.

Jizosi nyernu pokwu
badnu isne wiri

(Mak 6:30-44; Luk 9:10-17; Jon 6:1-14)

¹³ Nga Jizosi nuru a, o hiri nu piam whoga, ya nu nsunu a bna n'ogbo zne hne koru owu. Kovu ele badnu piohjaru hne o zi, be hi nu kpakara eli-ohna wam snornu a n'ochi eli.

¹⁴ Nga Jizosi whuyaru n'ogbo whnu agida badnu, o donu be obirizi, gwọ ele ke naaria nriria.

¹⁵ Nga o duru ogbednachi, ele sno apna a vakwnusiri a, kaa, “Hna kogwu owu, obochi zne neminem, zila ele ka ma be zne nu rime eli-ohna zne zuru nhne oriri.”

16 Jizōsi kanu be, “O zila mkpa nu be jaala, anu nyee be nhne be jeeri.”

17 Be kanu a, “Nhne a nwernu hna kwolem ike bredi isne nu aznu lawuru.”

18 Jizōsi kanu be, “Anu chiyanu m be hna.”

19 O kanu kpakara igbudu badnu wam daziri eli n'olu achara. O gweru ike bredi isne nu aznu lawuru wam, le anya n'oligwe, tu mmamma, nyawama be, nyee ele sno apna a, be gweru a nyee igbudu badnu wam.

20 Kpakara be ri, riji ruwho, ele sno apna a tutukota ruvnuvnu ke gwnarnu agwna, ke jiharu nkita nri nu nkita lawuru.

21 Ele riri wiri wam bu pokwu ele rukna isne, be gweme ele rinya nu rumu takiri.

Jizōsi znernu izne

n'olu mini

(Mak 6:45-52; Jon 6:15-21)

22 Ngangam Jizōsi kanu ele sno apna a be bna n'ogbo, beru a osno whe aka osimini kiyari, ma o zila igbudu badnu wam.

23 Nga o zilakworu igbudu badnu wam, o pnezne n'olu rugwu nu nsunu a zne kpe okpukpe. N'ige ogbednachi, ya nu nsunu a zi pjam.

24 Kovu nu ogbo wam zi ikere n'olu osimini, abaka-mini zi noovu a, kwnornu nu ruwhere neewhegidne a.

25 Kovu n'onu osisi, Jizōsi neezne izne n'olu mini ma o vakwnusi be.

26 Nga ele sno apna a whuru a, hne o neezne izne n'olu mini, mkpoma whuru be, be tu ogwnu, si okokoba nu o bu renwu.

27 Ngangam Jizōsi kanu be, “Mkpoma si anu rikne, o bu mawa. Anu toko ogwnu.”

28 Pita sa a, “Nyenwe ai, o buru nu o bu jiwa, kanu m me vakwnusi i n'olu mini.”

29 Jizōsi kanu a, “Vaa.”

Pita hi n'ogbo hiedna, zne izne n'olu mini, neeznekwnusi Jizōsi.

30 Kovu nga o whuru okne ruwhere, o tu ogwnu, bete neemi, o siwama, “Nyenwe ai, znohia m.”

31 Ngangam Jizōsi dosihala aka a, nwugwuru a, kanu a, “Nye okwnata mkpoma mati, kini kpararu i jiri nwe mkpoma lawuru?”

32 Nga be barnu nu rime ogbo, ruwhere wam whebiri.

33 Ele zi nu rime ogbo wam varu kponu a risi eli, be naakaa, “N'ezi, i bu Nnwō Chiokike.”

Jizōsi gworu ele nriria

n'eli Genezareti

(Mak 6:53-56)

34 Nga be wheru aznu mini wam, be va du n'eli Genezareti.

35 Ele rukna eli wam mahiaru Jizōsi, be zihala nu kpakara eli kwyanu a ele nriria.

36 Be riasno a ma be kpatu onu iwo a aka kpoi. O gworu kpakara ele kpaturu onu iwo a aka.

15

Omen'eli ke ele mbom

(Mak 7:1-13)

1 Nga ele Farisi nu ele zni iwo ele Ju hiri nu Jeruselem vakwnusi Jizōsi, be sikwa a,

2 “Kini kpayarụ ele sno apna ị zá naabịta omen'eli ele mbọm? Be zá nọokwo aka hne be ri wiri.”

3 Jizọsi sarụ be, “Kini kpayarụ anụ zá naabịta nhne Chiokike nyernu n'iwu kwnornu omen'eli anụ?”

4 Chiokike karụ, ‘Sọbisinu nda ị nụ nne i,’ nụ ‘Nye ọbula ke jọovu nda a mọbu nne a ọnu, be gbu a.’

5 Kọvu anụ karụ nụ nye ọbula ke jaakanụ nda a mọbu nne a, ‘Nhne i jeerihia n'aka m bu nkesi me nyernu Chiokike,’

6 Ọ zima mkpa nụ ọ jọosobisinu nda a mọbu nne a rịa rịa. Anụ neeme ikwu-ọnu Chiokike nhne etekne kwnornu omen'eli anụ.

7 Ele ruwhnu lawụru, Azaya nye ọwhnurninya kwuru ezi ọka gbasiri anụ nga ọ kwuru,

8 ‘Ele ka ịi mgbele-ọnu etekne nọosobisinu m, kọvu nụ mkpọma be ịi ikere nụ hne me ịi.

9 Be nọokponu m risi eli n'etekne, be neezni nhne badnụ nyernu n'iwu lele nụ ọ bu iwu Chiokike.’ ”

Nhne neemeru badnụ

(Mak 7:14-23)

10 Jizọsi sukwurụ igbudu badnụ wam, kanụ be, “Anụ bnote nsni, anụ ghohia masi.

11 Ọ bụo nhne bnarnụ n'ọnu badnụ bu nhne neemeru badnụ, ọ bu nhne hi n'ọnu whụya bu nhne neemeru badnụ.”

12 Ele sno apna a vakwnusiri a, kanụ a, “Ị mahiaru nụ ele Farisi weru ẹhni nga be nurnu ọka wam?”

13 Jizọsi sarụ be, “Be joowhohala isisi ọbula ke Nda m ke oligwe kpásiła.

14 Anụ gharụ be, be bu ele kpuru isini noodu ele kpuru isini. Ọ bụru nụ nye isini noodu nye isini, be lawuru jaadnabna nụ rime olulu.”

15 Pita kanụ a, “Kọwanu aị risi elulu ka.”

16 Jizọsi kanụ be, “Anụ nwée oghohia dū kịta?”

17 Ọ bu anụ máa nụ nhne ọbula ke bnarnụ n'ọnu neezne nụ ruwho, be nynohala a n'osoro?

18 Kọvu nụ nhne ke hiri n'ọnu whụya hi nụ mkpọma whụya, ka bu nhne ke neemeru badnụ.

19 Kwnornu nụ hite nụ rime mkpọma bu hne kpakara ọriri ojo hi nọowhuya, ogbu badnụ, ome ọyi, ọgba ewhere, oznu buznu, akebne aghalaghala nụ ọkaja ele berere.

20 Nhne ele ka bu nhne meru badnụ, kọvu o ri wiri n'aka kwóge ọkwo méru badnụ.”

Okwnata ovu otu nyerinya

(Mak 7:24-30)

21 Jizọsi hiri nụ piam whọga, zne n'eli Taya nụ Sajdoni.

22 Otu nyerinya Kena, nye eli wam, whụyarụ, siwama, “Nyenwe aị, Nnwọ Devidi, dọnu m obirizi, renwu ojo nwugwusi nnwọ m rinya aka rikne.”

23 Jizọsi sála a nhne ọbula. Ele sno apna a vakwnusi a, riasno, kaa, “Chihala a, kwnornu nụ o neesisno aị lulo.”

24 Jizọsi sarụ, “Be ziyaru m kwnornu atnurnu whuru owhu ke ele Izireli kpoi.”

25 Nyerinya wam varụ kponu a risi eli, kaa, “Nyenwe aị, yisinu m aka.”

26 Jizọsi sarụ, “Ọ bụo ọma o gweru wiri rụmu takiri tūhalanu rụmu nkịta.”

²⁷ Nyerinya wam karu, “Owe, Nyenwe aị, kọvu nụ rụmu nkịta neeri agwna rụnnuruvnu ke hi nụ n'olu ikpechi ele nwe be naadna.”

²⁸ Ige wam, Jizọsi saru a, “Nyerinya, ọkwnata mkpoma ị hna ezi, ọ dazịnu ị lele kpa ị pioru.” Ngangam, ẹhni buru nnwọ a rinya ọma.

Jizọsi gwọru ele nrịria

²⁹ Jizọsi hi nụ ọiam whụya, va nụ ngeri Osimini Galili. O pnezne n'olu rgwu, daziri ẹli.

³⁰ Agida ele badnu vakwnusiri a, kwuru ele mgworo, nụ ele isni, ele vu ọru, nụ ele mgbu, nụ agida ele naaria nrịria zị ọdo n'ọdo va. Be kwubita be n'ẹli n'ochi Jizọsi, ọ gwọ kpakara be.

³¹ Ka kpararu o duru ele badnu wam ẹhni, nga be whnuru ele mgbu hne be kwuru ọka, ele vu ọru, ẹhni buru be ọma, ele mgworo neezne izne, nụ ele isni whnuru ọsno. Be ja Chiokike ke Izireli mma.

Jizọsi nyernu pokwu

badnu ẹno wiri

(Mak 8:1-10)

³² Jizọsi sukwu ele sno apna a, kaa, “M nọdonu agida ele badnu ka obirizi, kwnornu nụ me nụ be dazilam ọbochi ẹto kịta, be nwée nhne be jeeri, m jéezila be n'ọnu etekne, ọ zị be tubo n'apna.”

³³ Ele sno apna a kanu a, “Ndaa hne a jeenwehia brẹdi n'ẹli-ikpa ka ke jeeji igbudu badnu ka rụwho?”

³⁴ Jizọsi sịkwa be, “Anu nwernu ike brẹdi ele?”

Be saru, “Esa, nụ aznu matị ele nụ ele.”

³⁵ Jizọsi kanu igbudu badnu wam be daziri ẹli.

³⁶ O gweru ike brẹdi ẹsau nụ aznu wam, tų mmamma, ọ nyawama be, nyee ele sno apna a, ele sno apna gweru nyee igbudu badnu wam.

³⁷ Kpakara be ri, riji rụwho, be tụtukota rụnnuruvnu ke gwnarnu agwna, nkita ẹsau jipiyaru.

³⁸ Ele riri a bu pokwu ele rukna ẹno, be gweme ele rinya nụ rụmu takiri.

³⁹ Nga Jizọsi zihalaru ele badnu wam, ọ bna n'ogbo zne n'ẹli Magada.

16

Orio nhne elekema

(Mak 8:11-13; Luk 12:54-56)

¹ Ele Farisi nụ ele Sadusi vakwnusiri Jizọsi naakpa a iru, kanu a, o gesi be nhne elekema hi n'oligwe.

² Ọ saru be, “N'ogbednachi, anu naakaa, 'Ruwhnu oligwe buru ọma, kwnornu nụ oligwe naachna ihie ihie.’

³ N'osisi, anu naakaa, 'Ruwhnu oligwe buo ọma tna, kwnornu nụ oligwe dugwu ruwhnu naachna ihie ihie.’ Anu magwu kpa be le ọwa nụ ruwhnu oligwe anya gwnu nhne ọ jọbu. Kọvu ndaa kpa anu máa ige ka?

⁴ Ebiri ojo naagba ewhere, noopio nhne elekema, ọ zá nhne elekema be jeenye anu, okwolem nhne elekema Jona nye ọwhnurninya.” Ọ gharu be, whọga.

Nhne whu brẹdi ke

ele Farisi nụ ele Sadusi

(Mak 8:14-21)

⁵ Nga ele sno apna a gawheru nụ ngeri kiyari, be chezuru o gweru brẹdi.

⁶ Jizọsi kanu be, “Anya du anu ẹli, anu neeze nhne whu brẹdi ke ele Farisi nụ ele Sadusi.”

7 Be n̄otnurita n'esilawuru be, naakaa, "O bu kwnornu nu a jile br̄edi."

8 Nga Jiz̄osi mah̄iaru a, o kaa, "Ele ok̄wnata ovu mat̄i, k̄ini kpayaru anu ji nookwu n'esilawuru anu nu anu nw̄ee br̄edi?"

9 Anu gh̄ohia k̄oriri, anu ch̄enwanyana ike br̄edi isne ke pokwu badnu isne, nu nk̄ita ele anu pnojiri?

10 M̄obu nga me keru ike br̄edi ̄esau ke pokwu badnu ̄eno wam, nk̄ita ele anu pnojiri?

11 K̄ini kpayaru anu gh̄ohiala nu o buo br̄edi hne me naakaa? K̄ovu anu zeru nhne n̄owhu br̄edi ke ele Farisi nu ele Sadusi."

12 Nga be gh̄ohiaru nu o k̄ala be ze nhne n̄owhu br̄edi, k̄ovu be neeze iznizni ele Farisi nu ele Sadusi.

*Pita kah̄iaru nye Jiz̄osi bu
(Mak 8:27-30; Luk 9:18-21)*

13 Nga Jiz̄osi varu n'odoru ̄eli Sizaria Filipai, o s̄ikwa ele sno apna a, "Ele badnu be naakaa nu Nnw̄o ke Badnu bu nyele?"

14 Be kaa, "Agwna be kaa Joni Nye Wu Mini, ele berere kaa ̄Elaija, ele berere kwno kaa Jerimaya m̄obu otu nyenum nu rime ele owh̄nurninya."

15 O s̄ikwa be, "Anu n'iw̄huru anu, anu kanu nu m bu m nyele?"

16 Sāimoni Pita kanu a, "Ji n'iw̄huru i bu Karāisi wam, Nnw̄o Chiokike zi budnu."

17 Jiz̄osi kanu a, "I bu nye owa oma, Sāimoni nnw̄o Jona, kwnornu nu an̄o-̄ehni nu ovnarna kp̄umennu i ya, okwolem Nda m ke zi n'oligwe.

18 Me kanu i, nu ji n'iw̄huru i bu Pita, o bu n'olu rugwu ka hne me joowu ogbako ke m, ikn̄ernema ̄enwu jaaka a rikne r̄ia r̄ia.

19 M jeenye i snamb̄i ke ̄eli-eze Chiokike, nhne obula ke i kn̄ernu eriri n'owa Chiokike jeekne a eriri n'oligwe, nhne obula ke i tōmarnu n'owa, Chiokike jootoma a n'oligwe."

20 Ige wam Jiz̄osi do ele sno apna aka nu ns̄ni, be k̄anukwadia nye obula nu o bu Karāisi.

*Jiz̄osi kwuru oka
gbas̄iri ̄enwu a*

(Mak 8:31--9:1; Luk 9:22-27)

21 Hite n'ige wam Jiz̄osi bete naakanu ele sno apna a nu o jeezner̄iri Jeruselem, ta aḡida aw̄hn̄uw̄hnu n'aka ele okno badnu nu ele risi ar̄iohna nu ele zni iwu ele Ju, be jooju a, gbu a, n'obochi ke ̄eto, o jeehi n'̄enwu lizo.

22 Pita kwuhala Jiz̄osi ichne, bete naabnanu a mbna, naakaa, "Chiokike kw̄e, Nyenwe ai, nhne ka jeeme i."

23 K̄ovu Jiz̄osi tuh̄nasarnu kanu Pita, "Zne n'aznu m, Setani, i naadnasninu m apna. Kwnornu nu i neeche echiche lele badnu, o buo lele Chiokike."

24 Ige wam Jiz̄osi kanu ele sno apna a, "O buru nu nye obula joosno m n'aznu, o jooju ̄ehni a, vuru ogba a, sno m.

25 Nye obula ke noopio o d̄ohia budnu a, jootuw̄hu a, k̄ovu nye obula ke jootuw̄hu budnu a kwnornu m, o joopiohia a.

26 Mbnarna k̄ini bu nhne badnu jeenwe, o buru nu o rih̄ia k̄pakara owa n'iru, k̄ovu tuw̄hume budnu a? K̄ini bu nhne badnu jeeji gbanwo budnu a?

27 Kwnornu nu Nnw̄o ke Badnu jaava n'igwugwu ke Nda a, ya nu ele enine izi a, ige wam o jookwuh̄nata nye obula oowo ̄enu nhne o rn̄urnu.

28 N'ezi, me kanu anu, nu agwna ele gwuzo hna j̄onwu ̄enwu tem be wh̄nu Nnw̄o ke Badnu hne o naava ch̄i lele eze."

17

*Onwoghari ke Jizōsi
(Mak 9:2-13; Luk 9:28-36)*

1 Nga ọbochi isunu whemernu, Jizōsi kwuru Pita, nū Jemisi, nū Jōni nwene a, yisinu ẹhni a, kwuru be whọga ichne, pne olu rugwu hna n'olu.

2 O nwoghari nū ruwhnu be, ruwhnu a noonwu lele ẹhnam, iwo a naachna lele iwhe.

3 Be whnurnu Mozizi nū Ẹlajia hne be nū Jizōsi nookwurita ọka.

4 Pita kanū Jizōsi, “Nyenwe aị, ọ buru ọma a daziri hna, ọ buru nū i jeekwe, a wu ọro-ẹka ẹto hna, otu buru ke i, otu ke Mozizi, otu ke Ẹlajia.”

5 Nga ọ kpụ ọka ka n'ọnu, erumeru oligwe ke chnaga rịchna kpusunri be, otu akpiri hiri n'erumeru oligwe wam dna, kaa, “Ka bụ Nnwọ m me whnurnu n'anya, nye nhne a masiri m, anụ bnonu a nsni.”

6 Nga ele sno apna a nurnu a, be dna, kpute ruwhnu n'eli, tū ogwnu k'agida.

7 Jizōsi vakwnusiri be, kpatu be aka, kaa, “Anụ lizo, anụ tū ogwnu.”

8 Nga be lelizoru anya, ọ zá nye be whnurnu, okwolem Jizōsi kpọi.

9 Nga be hiri n'olu rugwu wam hiedna, Jizōsi dọ be aka nū nsni, kaa, “Ọ zá nye anụ kanū nhne anụ whnurnu tem Nnwọ ke Badnū hi n'ẹnwu lizo.”

10 Ele sno apna a sịkwa a, “Kini kpayarū ele zni iwu ele Ju jiri kaa nū Ẹlajia jeebe ọsno va?”

11 Jizōsi kanū be, “Ẹlajia jeebe ọsno va n'ezi, ọ jaabikwata kpakara nhne.

12 Kọvu me kanū anū nū Ẹlajia valẹm, be máhjala a, be mee a kpa o jiri masi be. Ọ bụ masi kpa be jeeme Nnwọ ke Badnū ta awhnūwhnu n'aka be.”

13 Ige wam ele sno apna a ghọhiaru nū ọ kannū be ọka gbasiri Jōni Nye Wụ Mini.

*Jizōsi gwọru wikoro rukna
(Mak 9:14-29; Luk 9:37-43a)*

14 Nga be vakwnusiri igbudu badnū wam, otu nyerukna vakwnusiri Jizōsi gbunu a mpnerne ọchi n'eli,

15 kaa, “Nyenwe aị, dọnu nnwọ m rukna obirizi, ọ naata awhnūwhnu k'agida kwnornu nū ọ naari a akwukwu, agida ige, ọ naadnabna bẹkwu, agida ige masi ọ dnabna mini.

16 M kwuyanū a ele sno apna i, kọvu nū be nwée rikne gwọ a.”

17 Jizōsi sarū be, “Anū ebiri ka nwée ọkwnata mkpọma, ele mkpọma hiri aghi, me nū anū jaadazi dū ngele? Me jeesinu anū mkpọma dū ngele? Anū kwuyanū m nnwọ wam hna.”

18 Jizōsi bigbọ rẹnwu ojo wam, o hi nū rime a whuya, Jizōsi gwọ nnwọ wam ngangam.

19 Nga ele sno apna a vakwnusiri a ichne, be sịkwa a, “Kini kpayarū a nwéne rikne chihala rẹnwu ojo wam?”

20 Jizōsi kanū be, “Kwnornu nū ọkwnata ovu anū zị mati. N'ezi me kanū anū, ọ buru nū anū nwernu ọkwnata ovu hna lele mkpuru mositadi, anū jaakanū rugwu ka, ‘Hi nū hna zne hne berere,’ o jeezne, ọ zá nhne jaara ẹhni hne anū zi.” [

21 Kọvu nū rẹnwu ojo nū kpa jọowhoga, okwolem hite n'okpukpe nū ovu ọnu.]

*Jizōsi kwukwnornu
ọka gbasiri ẹnwu a
(Mak 9:30-32; Luk 9:43b-45)*

²² Nga Jizōsi nū ele sno apna a gbakōru nū Galili, Jizōsi kanū be, “Be jeegweru Nnwō ke Badnū resi n’aka ele badnū.

²³ Be joogbu a, kōvu n’ōbochi ke ẹto, o jeehi n’ẹnwu lizō.” O gbu ele sno apna a igbugbu k’agida.

Ntū iwai Oro Nso

²⁴ Nga Jizōsi nū ele sno apna a vaduru Kapanom, ele naana iwai ntū Oro Nso Chiokike vakwnusiri Pita, sika, “Nye-zni-nhne anū ọ zia nọtou ntū Oro Nso?”

²⁵ Pita kaa, “Owe, ọ nọtou.”

Nga be bnarnū n’oro, Jizōsi beru osno sika Pita, “Saimoni, kini bu echiche i, ọ bu n’aka ele kele hne ele eze ọwa ka naarnū ntū ahia mọbu ntū risi badnū, n’aka rumu be mọbu n’aka ele izne?”

²⁶ Pita kanū a, “N’aka ele izne.”

Jizōsi kanū a, “Ọ buri kpam, rumu be zila nū rime a.

²⁷ Kōvu ma a gharū o mee nhne jeewe be ehni, zne n’osimini, tsi arj aznū, gweru aznū obula beru osno whuya, nga i kpumernu ọnu a, i jowhnu otu mkpuru iwai, gweru a nyee be, ọ buri ke me nū ji.”

18

Nyele kakwo ibne a?

(Mak 9:33-37; Luk 9:46-48)

¹ N’ige wam ele sno apna Jizōsi vakwnusiri a, sika a, “Nyele kakwo n’eli-eze Chiokike?”

² Jizōsi sukwu otu watakiri, gwuzote a n’esilawuru be.

³ Ọ kanū be, “Me kanū anū ezi oka, okwolem ma anū tuhnasarnu lele rumu takiri, anū jaabna n’eli-eze Chiokike rja rja.

⁴ Nye obula ke jeegwedna ehni a lele watakiri ka, nye wam kakwo n’eli-eze Chiokike.

⁵ Nye obula ke jaanarnū otu watakiri nū kpa nū rewhna m, nanabnanya m.

Nhne jeeme badnu mehie

(Mak 9:42-48; Luk 17:1,2)

⁶ “Kōvu nye obula ke jeeme ma otu nū rime ele matj ka kwehjaru nū me mehie, ọ jaakanū a mma ọ buri be gweru okne rugwu ogwe-wiri nyasi a n’ili, migbu a nū rime osimini.

⁷ Awhnwhnu jaazinu ọwa kwnornu nū nhne ornurna ke neeme ele badnū neeme mmehie. Ọ zi mkpa nū ornurna jaava, kōvu awhnwhnu zinu nye wam ornurna jeehi n’aka a va.

⁸ Ọ buri nū aka i, mọbu ochi i, jeeme i, i mee mmehie, bihala a, tuwhume a, ọ kanū i mma i bna nū budnu buri nye mgworo mọbu vuru ọru, karū o nwernu aka lawuru mọbu ochi lawuru be tubna i nū bekwnu eli renwu chni ehni.

⁹ Ọ buri masi nū anya i jeeme i, i mee mmehie, gweme a, tuwhume a, ọ kanū i mma i bna nū budnu nwernu otu anya, karū o nwernu anya lawuru be tubna i nū bekwnu eli renwu.”

Elulu atnurnu whuru owhu

(Luk 15:3-7)

¹⁰ Anū whnū nū anū zia neeedna otu nū rime ele matj ka anya, kwnornu nū me kanū anū, n’oligwe ele enine izi be nōowhnu ruwhnu Nda m ke zi n’oligwe anya ige obula. [

¹¹ Kwnornu nū Nnwō ke Badnū varū ọ znohia ele whuru owhu.]

¹² Kini bu echiche anū? Ọ buri nū badnū nwernu otu riwhu atnurnu, otu nū rime be kpawhu ori, ọ jaaghasa nri tolu nū tolu kiyari n’olu rugwu, zne noopio ke kpawhuru ori?

13 Me kanu anu ezi oka, nga o piohjaru a, o joonwudna nu risi a karu nu risi nri tolu nu tolu wam whule owhu.

14 Kpam masi, o buo echiche Nda anu ke zi n'oligwe, nu otu nu rime ele mati ka joowhu etekne.

Nga nwene i mernu i nhne ojo

(Luk 17:3)

15 "Berere, o buru nu nwene i mee i nhne ojo, zne kanu a nhne o mernu i n'esilawuru ji nu ya kpoi. O buru nu o nurnu nhne i karu, i rihialam nwene i n'iru.

16 Kovu o buru nu o nuna, kwuru otu badnu mabu badnu lawuru yisinu ehni i, oka obula be kwuru jooburu nhne ele akebe lawuru mabu eto jeemesi rikne.

17 O buru nu o kwéle o bnonu be nsni, kanu ogbako Chiokike. O buru nu o bnoge ogbako Chiokike nsni, gweru a lele nye ma Chiokike mabu nye ona nu.

18 "Me kanu anu ezi oka, nhne obula ke anu jeekne eriri n'owa, Chiokike jeekne a eriri n'oligwe, nhne obula ke anu jootoma n'owa, Chiokike jootoma a n'oligwe.

19 "Berere, me kanu anu, o buru nu anu badnu lawuru kwerekota nu nhne obula anu rjoru n'owa, Nda m ke zi n'oligwe jeemezunu anu ya.

20 Kwnornu nu hne badnu lawuru mabu eto gbakoru nu rwhna m, m zi m hnam n'esilawuru be."

Elulu ohi ke nwé mkpoma obirizi

21 Pita vakwnusiri Jizosi sikwa a, "Nyenwe ai, mgba ele bu hne nwene m jeemehie megidne m, m gbarunu a? Du mgba esau sa?"

22 Jizosi kanu a, "M kágene m ji du mgba esau, kovu du nri esau mgba esau.

23 Kam kpayaru, be jeeji eli-eze Chiokike neesninu otu nye eze, nye piору ma ya nu ele ohi a piakota iwai.

24 Nga o beteru naapia, be kwuyanu a otu badnu ke ji a nri pokwu talenti.*

25 Kovu nu kpa o nwéle rikne nokwu ogwo o ji, nyenwe a karu be re ya nu nnwerne a nu rumu a, nu kpakara nhne o nwernu, ma be kwuhnata ogwo o ji.

26 "Ohi wam dnarnu n'eli kpomu a risi eli, kaa, 'Nyenwe m, knatanu m mkpoma, m jookwuhnata i kpakara nhne me ji i.'

27 Nyenwe ohi wam donu a obirizi, o sigbasi a, gbarunu a ogwo o ji a.

28 "Kovu nu ohi wam whogaru, whnu otu nu rime ohi ibne a, ke ji a otu riwhu mkpuru iwai, o nwugwusi a rikne, whatasi a n'akpiri, naakaa, 'Kwuhnata m nhne obula i ji m.'

29 "Ohi ibne a dna n'eli riasno a, kaa, 'Knatanu m mkpoma, m jookwuhnata i.'

30 "O kwéle, tnunuma, o gweru a tubna a n'oro ikelu, du nga o jookwuhnata a ogwo o rigwu a.

31 Nga ele ohi ibne a whnurnu nhne mernu, o gbu be igbugbu k'agida, be zne tnusinu nyenwe be kpakara nhne mernu.

32 Ige wam nyenwe ohi wam sukwuru a, kanu a, 'Ji ohi ojo, m gbarunu m i kpakara ogwo wam kwnornu nu i riasnornu m.

33 O bu nu i kwésile o donu ohi ibne i obirizi, lele kpa me jiri donu i obirizi?"

34 Nyenwe be weru ehni k'agida, o gweru a zizne n'oro ikelu ma be ta a awnhwuhnu du nga o jookwuhnata kpakara ogwo o jigwu a.

35 "O bu kpa Nda m ke oligwe jeeme anu, o buru nu nye obula nu rime anu jagbarunu nwene a hite nu mkpoma a."

* 18:24 nri pokwu talenti: ka whuyaru nhne nu lele agida pokwu ndasi mkpuru iwai.

19

*Ogba nnam**(Mak 10:1-12)*

¹ Nga Jizōsi kwukworu ọka ka, o hi nū Galili whọga, zne n'ike ẹli Judiya n'aznū Osimini Jodani kiyari.

² Igbudu ele badnū snornu a, ọ gwọ be nriria be pji.

³ Agwna ele Farisi vakwnusiri Jizōsi, naakpa a iru, kaa, “Ọ buri ọma n'iwu nyerukna gba nnwerne a nnam kwnornu nū nhne ọbula?”

⁴ Ọ sarū be, “Anū gwnūna nū nye kpuru be hite n'ọpanizo 'kpuru be nyerukna nū nyerinya,”

⁵ kaa, ‘Ka kpararu, nyerukna jaagharu nda a nū nne a, takwnusi n'ehni nnwerne a, bē lawuru jọgho otu anọ-ẹhni?”

⁶ Kam kpararu, be buma badnū lawuru, kovu otu anọ-ẹhni. Nhne Chiokike knekotaru, badnū tómana a.”

⁷ Bē sika a, “Kini kpararu Mozizi nyernu iwu, kaa be gba ọkwukwo nnam nyee nyerinya, chihala a?”

⁸ Jizōsi kanu be, “Mozizi kweru ka kwnornu mkpoma ojo anu, kweru anu gba nnwerne anu nnam, kovu hite nū mbom, ọ buo kpa ọ zi.

⁹ Me kanu anu, nye ọbula ke jaagba nnwerne a nnam, hne ọ buo nū o neeme oyi, luru nnwerne berere, o neeme masi oyi.”*

¹⁰ Ele sno apna a kanu a, “Ọ buri kpam n'esilawuru nyerukna nū nyerinya, ọ ka mma badnū gharu ọ lu nnwerne mọbu gbọ nzi.”

¹¹ Kovu Jizōsi saru be, “Ọ buo kpakara badnū jeegweru ọka ka, okwolem ele Chiokike nyernu rikne.

¹² Kwnornu nū agwna ele rukna bu okiri-badnū hite nū ruwho nne be, ọ zi masi ele badnū ibne be meteru okiri-badnū, ele ke berere bu ele meteru ehni be okiri-badnū kwnornu ẹli-eze Chiokike. Nye nwernu rikne o gweru ọka ka, gweru a.”

*Jizōsi goziri rumu takiri**(Mak 10:13-16; Luk 18:15-17)*

¹³ Be kwuyanū Jizōsi rumu takiri ma ọ tūkwasi be aka a lawuru, kpenu be okpukpe. Kovu ele sno apna a bigboru ele kwuyaru be.

¹⁴ Kovu nū Jizōsi kannu be, “Anu gharu rumu takiri ma be vakwnusi m, anu bnosni be, kwnornu nū ẹli-eze Chiokike bu ke ele nū kpa.”

¹⁵ Ọ tūkwasi be aka a lawuru, hi nū pji whọga.

*Eze wikoro**(Mak 10:17-31; Luk 18:18-30)*

¹⁶ Otu nyerukna vakwnusi Jizōsi, sika a, “Nye-zni-nhne, kini bu nhne ọma me jeeme ma m nwe m budnu kwó okwo?”

¹⁷ Jizōsi kanu a, “Kini kpararu i neesikwa m nhne gbasiri nhne ọma? Ọ zá nye bu nye ọma okwolem otu badnū, bu Chiokike kpọ. Kovu ọ buri nū i pioru ọ bna nu budnu, bita nhne Chiokike nyernu n'iwu.”

¹⁸ Ọ sika a, “Ndaa iwu ko?”

Jizōsi kanu a, “I gbúko badnū, i méko oyi, i znúko buznu, i gbáko akebne aghalaghala,

¹⁹ sobisinu nda i nū nne i, i jowhnu nye agbatibi i n'anya lele ehni i.”

²⁰ Wikoro wam kaa, “M bitaru m kpakara iwu ele ka. Kini gwnarnu berere me jeeme?”

* **19:9** Ọkwukwo berere kamasiri: *Nye jolu nyerinya wam nga nzi a gharu a nnam neeme masi oyi.*

²¹ Jizōsi kanu a, “O buru nu i pioru nu i joozu ozu k'ezi, la, re kpakara nhne i nwernu, kesi ele mboni, i jeenwe ekwnu n'oligwe, vaa, sno m.”

²² Nga wikoro wam nuru ikwu-onu ka, o la, naagbaru ruwhnu, kwnornu nu o nwernu ekwnu k'agida.

²³ Jizōsi kanu ele sno apna a, “Me kanu anu ezi oka, o jaara ehni nye nwernu ekwnu o bna n'eli-eze Chiokike.

²⁴ Berere kwno, me kanu anu, o zinu anohia be kwu kameli ewheke o gawhe n'anya alanga, karu nye nwernu ekwnu o bna n'eli-eze Chiokike.”

²⁵ Nga ele sno apna a nuru oka ka, o du kpa be hna ehni, be sikwa, “Ndakwanu nye be jooznohia?”

²⁶ Kovu nu Jizōsi legidnenu be anya, kanu be, “Nu hne badnu zi be jeemeli a, kovu be meli kpakara nhne hne Chiokike zi.”

²⁷ Pita sikwa a, “Le, a sigbasiri kpakara nhne a nwernu snornu i, kini bu nhne a jeekehia?”

²⁸ Jizōsi kanu be, “Me kanu anu ezi oka, anu ele sno m, nga Nnwō ke Badnu jaadazi nu ngadna eze ke igwugwu a n'owa ikne wam, anu n'iwuru anu joosno m daziri nu ngadna eze nri nu ebo neekpe eburnu nri nu ebo ke Izireli ikpe.

²⁹ Nye obula ke sigbasiri oro, mobu rumu nne rukna mobu rumu nne rinya, nda mobu nne, mobu rumu, mobu ekwu, kwnornu nu rewhna m, o jeekehia otu riwhu nhne o sigbasiri, kehia masi budnu kwō okwo.

³⁰ Kovu nu agida ele be osno jobu ele ipne-aznu, ele ipne-aznu jobu ele be osno.”

20

Elulu ele ernu ekwu vaini

¹ “Eli-eze Chiokike nu lele otu nyerukna nwernu ekwu ke whogaru n'onu osisi zne o gno ele ernu jornunu a ernu n'ekwu vaini a.

² Nga ya nu ele ernu wam kwekotaru nu o jookwu be otu mkpuru iwai n'obochi, o zizne be n'ekwu vaini a.

³ “O whoga masi nu nhne nu lele otu-ige tolu n'osisi whnu ele berere nwee nhne be nornu hne be gwuzogwu n'ederezi ahia.

⁴ O kanu be, ‘Anu zne nu rime ekwu vaini m, nhne dunnu anu bu nhne me jeenye anu.’

⁵ Be zne. O whoga kwno nhne nu lele otu-ige ke nri nu ebo, nu otu-ige ke eto n'esilawuru iwhehnie, mee masi otu nhne wam.

⁶ O whoga masi n'otu-ige ke isne n'ogbednachi whnu ele berere hne be gwuzogwu n'ederezi ahia, o sikwa be, ‘Kini kpararu anu gwuzogwu hna kpakara obochi, o za nhne anu nornu?’

⁷ “Be kaa, ‘Kwnornu nu o za nye gnornu ai ernu.’

“O kanu be, ‘Anu zne n'ekwu vaini m.’

⁸ “N'ogbednachi, nye nwe ekwu vaini wam kanu nye risi ele ernu o sukwu ele ernu wam, kwu be ogwo ernu be. O panizo nu ele ipne-aznu du nu ele be osno.

⁹ “Nga ele be gnornu ernu n'otu-ige ke isne varu, be nahjaru otu badnu otu mkpuru iwai.

¹⁰ Kovu nga ele be osno varu, be cheru nu be jaanahia ke kakwo, be nahja kwno otu badnu otu mkpuru iwai.

¹¹ Nga be nahjaru a, be takponu nye nwe ekwu.

¹² Be kaa, ‘Ele ipne-aznu ka rnurnu ernu otu otu-ige, i kwuru ai nu be otu onu iwai, ai bu ele vuru ivu rinya ke obochi tna neerne bekwnu.’

13 “Kovu o saru nni m nri rime be, kaa, ‘Enyi m, m méhiele m i, me nu ji a kwékoritala nu m jeenye i otu mkpuru iwai?’

14 Gweru ke bu ke i, laba, o masiri m me nyee ipne-aznu lele kpa me nyernu i.

15 O kwésiele n'iwu me gweru nhne m mee kpa me pioru sa? I neewe eñhi kwnornu nu m neemenu ele badnu imerne oma sa?

16 “Kpam masi, ele ipne-aznu jeebe osno, ele be osno jobu ele ipne-aznu.”

Jizosi kwuru oka gbasiri

enwu a ke mgba eto

(Mak 10:32-34; Luk 18:31-34)

17 Kpa Jizosi neezne Jeruselem, o kwuru ele sno apna a nri nu ebo wam zne ichne nu ngeri apna. O kanu be,

18 “Le, a neezne Jeruselem, be jeegweru Nnwọ ke Badnu nyewhete n'aka ele risi arịohna nu n'aka ele zni iwu ele Ju, be jaama a ikpe enwu,

19 be jeegweru a nyewhete n'aka ele buo ele Ju, be jeeme a nhne mkpari, pnia a nhne, kpogidne a n'ogba, n'obochi ke eto, o jeehi n'enwu lizo.”

Aririo ke nne rumu Zebidi

(Mak 10:35-45)

20 Nne rumu Zebidi vakwnusiri a, ya nu rumu a rukna, kpọnu a risi eli, nọorio nhne n'aka.

21 Jizosi sika a, “Kini nhne i noopio?”

O kanu a, “Kweru rumu m rukna lawuru ka daziri otu n'akarikwnunga i, otu n'akarita i n'eli-eze i.”

22 Jizosi kanu be, “Anu ma nhne anu nọorio. Anu jọonwoli okiko ke me nọonwo?”

Be kanu a, “A nwernu rikne.”

23 Jizosi kanu be, “Anu jọonwo n'okiko m, kovu o dazi n'akarikwnunga m nu akarita m, o buo ke m n'onyege, kovu nu o bu ke ele Nda m bikwatannu a.”

24 Nga ele sno apna a nri ke gwnarnu nurnu a, o we be eñhi k'agida kwnornu rumu nne lawuru ka.

25 Jizosi sukwukota be, kanu be, “Anu magwu nu ele risi ele buo ele Ju neeme ele be neechi kpa o masiri be. Ele kwu be ji aka rikne neechi ele zi nu mkpururu be.

26 O jazi kpam n'esilawuru anu. Kovu nye pioru o buru nye kwu n'esilawuru anu, o jobu nye neeznenu anu izi,

27 nye ke pioru o buru nye mbom n'esilawuru anu jobu ohi anu.

28 Lele kpa Nnwọ ke Badnu vage ma be znenu a izi, kovu ma o neeznenu ele berere izi, gweru masi budnu a nyee ma o buru nhne ogbahia agida badnu.”

Jizosi gworu ele isni

(Mak 10:46-52; Luk 18:35-43)

29 Kpa Jizosi nu ele sno apna a nọowhuya nu Jeriko, agida ele badnu noosno a.

30 Ele rukna lawuru kpuru isni daziguwu nu ngeri apna, nga be nurnu nu Jizosi neewhe, be si lulo, kaa, “Donu ai obirizi, Nyenwe ai, Nnwọ Devidi.”

31 Agida ele badnu wam bigboru be, kanu be, be kpuni onu. Kovu nu be siwama k'agida, kaa, “Donu ai obirizi, Nyenwe ai, Nnwọ Devidi.”

32 Jizosi gwuzoru, sukwu be, kaa, “Kini bu nhne anu pioru me menu anu?”

33 Be kaa, “Nyenwe ai, a pioru ma i mee ma a whnu osno.”

34 Jizosi donu be obirizi, o kpatu be aka n'anya, ngangam be beteru o whnu osno, be snornu a.

21

Jizōsi bnaznenu Jeruselem

(Mak 11:1-11; Luk 19:28-38; Jōn 12:12-19)

1 Nga be vaduru Jeruselem ndundu, be dūru Bētifagi, ke zī nū Rugwu Olivu, Jizōsi ziznenu badnū lawūru ele sno apna a.

2 O kanū be, “Anū zne nū mgbu matī ke zī nū ruwhnu anū, ngangam anū jōwhnu iyinya be kpōkwnusiri, ya nū nnwō a, anū tōma be, tōyanu m be.

3 Nye sīkwaru anū nhne oḅula, anū kanū a, ‘Be zī Nyenwe aī mkpa,’ ngangam o jeenye anū be.”

4 Ka bū ma nhne be kwuru hite n’ōnu nye owhnurninya mezu,

5 “Kanū ele Zayōni,
‘Le, eze i naavakwnusi i,
o bū enwerne badnū,
o dazīgwu n’olu iyinya,
n’olu nnwō iyinya.’ ”

6 Ele sno apna a zne mee kpa Jizōsi nyernu be iwu.

7 Be tōya iyinya wam nū nnwō a, wūkwasi be iwo be, Jizōsi dazīri n’olu be.

8 Igbudu ele badnū gbata iwo be n’apna, ele berere gbubihīaru nkala isisi, tūsa be n’apna.

9 Igbudu badnū ele neezne nū ruwhnu a nū ele snogwu a, neesi lūlo, naakaa,

“Ozana* zīnu Nnwō Devidi!

Chiokike gozi nye naava nū rēwhna Nyenwe aī,
Ozana nū hne kakwo n’olu.”

10 Nga o bnanyarnu nū Jeruselem, kpakara ẹli-ohna mernu imerne, naakaa, “Nyele bū nyerukna ka?”

11 Igbudu ele badnū wam naakaa, “Nyerukna bū Nye Owhnurninya wam, Jizōsi ke hi nū Nazareti ke Galili va.”

Nhne Jizōsi mernu

n’Oro Nsō Chiokike

(Mak 11:15-19; Luk 19:45-48; Jōn 2:13-22)

12 Jizōsi bna n’Oro Nsō Chiokike chīhala ele neere, nōozu ahīa n’Oro Nsō. O kpute ikpechi kpakara ele naagbanwo iwai ruwhnu n’ẹli, nū ngadna ele neere nduru.

13 O kanū be, “Be gbarū a n’okwukwo nsō, kaa, ‘Be jookwu oḅo m oḅo okpukpe,’ kōvu nū anū mernu a o būru oḅna ele buznu.”

14 Ele isni nū ele mgwōro vakwnusi a n’Oro Nsō, o gwō nrīria be.

15 Kōvu nga ele risi arīohna nū ele zni iwu ele Ju whnurnu kpakara ẹrnu ndu-ehni o nōornu, nū rūmu takīri neesi okokoba n’Oro Nsō, naakaa, “Ozana zīnu Nnwō Devidi,” o we be ẹhni k’agīda.

16 Be sīkwa a, “I nurnu nhne rūmu takīri ka nookwu?”

Jizōsi kanū be, “Owe! Anū gwnūna nhne okwukwo nsō kwuru,
‘Hite n’ōnu rūmu takīri nū rūmu nōonwo rēma,
i mernu oznarni dna oḅna.’ ”

17 O gharū be, whōga, zne Bētani, dazīri chi bō.

Jizōsi vūru isisi

be kwu figi ọnu

(Mak 11:12-14,20-24)

18 N’osisi, nga Jizōsi hiri nū Bētani naala Jeruselem, wiri gwnurnu a.

* 21:9 N’ikwu-ọnu ele Hiburu, Ozana bū Znhial

19 Nga ɔ whnurnu isisi figi n'apna, ɔ vadu a ɛhni, kɔvu ɔ whnuna mkpuru ɔbula n'olu a, okwolem ɔkwukwo budnu kpɔi, ɔ kanu isisi wam, "Mkpuru miko n'olu i tim tom." Isisi figi wam kpɔnwu ngangam.

20 Nga ele sno apna a whnurnu a, o duru be ɛhni, be kaa, "Ndaa kpa isisi ka jiri kpɔnwu ngangam?"

21 Jizosi saru be, "Me kanu anu ezi oka, ɔ buru nu anu nwernu ɔkwnata mkpoma, nwee mkpoma lawuru, ɔ buo nhne be mernu isisi figi ka bu nhne anu jeemeli dai, kovu ɔ buru nu anu jaakanu rugwu ka, 'Lizo, dnabna osimini,' o jeeme.

22 Kpakara nhne ɔbula anu jorio n'okpukpe, anu jaanahia, ɔ buru nu anu nwernu ɔkwnata mkpoma."

Rikne Jizosi

(Mak 11:27-33; Luk 20:1-8)

23 Nga ɔ bnanyarnu n'Oro Nso Chiokike, ele risi ariohna nu ele okno badnu ele ju vakwnusiri a. Nga o neezni nhne, be sikwa a, "Rikne kini bu nhne i ji neeme nhne i neeme? Nyele nyernu i rikne i ji neeme kpakara nhne ka?"

24 Jizosi saru be, "M jaasikwa anu otu ajji, ɔ buru anu sa m, m jaakanu anu rewhna rikne me ji neeme kpakara nhne ka.

25 Owu mini Joni o hi hnele va? O hi n'oligwe sa, mɔbu n'aka badnu?"

Be kwu a n'esilawuru ɛhni be, kaa, "O buru nu a kaa, 'O hiri n'oligwe,' ɔ jaasikwa ai, 'Kini mernu anu kwéle a?"

26 Kovu ɔ buru a kaa, 'O hi n'aka badnu,' a nɔotu ogwnu ele badnu ka, kwnornu nu kpakara badnu kweru nu Joni bu nye ɔwhnurninya."

27 Be saru Jizosi, "A máa."

Jizosi kanu be, "M jáaka masinu anu rewhna rikne me ji neeme kpakara nhne ka."

Elulu rumu rukna lawuru

28 Jizosi kanu be, "Kini bu nhne anu naari? Otu nyerukna nwernu rumu rukna lawuru, ɔ zneknusi ke mbom, kanu a, 'Nnwɔ m, zne ɛnu tna n'ekwu vajni m.'

29 "O kaa, 'M jeezne,' omekwo, ɔ tuhnasa mkpoma zne.

30 Nda be zneknusi ke ɛbo, kwu otu nhne wam, ke ɛbo kaa, 'M jeezne, nyenwe m,' kovu nu o znéle.

31 "Nyele nu rime be lawuru mernu nhne nda a piuru?"

Be kaa, "Nye ke mbom."

Jizosi kanu be, "Me kanu anu ezi oka, nu ele ona ntu nu ele naagba ewhere jeebe anu osno bna n'eli-eze Chiokike.

32 Kwnornu nu Joni varu gesi anu apna ome mma, anu kwéle, kovu ele ona ntu nu ele naagba ewhere kweruru. Nga anu whnurnu a, anu tuhnasnana mkpoma, kweru a.

Elulu ele ɛnu ɛkwu vajni

(Mak 12:1-12; Luk 20:9-19)

33 "Anu nurnu elulu berere, otu nyerukna zi ke nwernu ɛkwu, ɔ kparu vajni. O gba a mgbugba gburugburu, gwu igbodo hne be jaazi nɔozosna manya nu rime a, wu masi ɔro olu ele nse nu rime a. O gweru ɛkwu wam yisi n'aka ele jeelekota a, whoga zne n'eli berere.

34 Nga ige ɔ ghɔ mkpuru duru, o ziznenu ele izi be zneknusi ele ɛnu ɛkwu wam, nahia be mkpuru ke dunnu a.

35 "Ele ɛnu ɛkwu wam nwugwu ele izi wam, pnia otu nhne, gbu otu, lo kwno ke berere akaworugwu.

³⁶ O zizne kwno ele izi berere ke kakwo ele ke mbom, be mee kwno be kparam.

³⁷ N'ipne-aznu o ziznenu nnwo a, kaa, 'Be jiosobisinu nnwo m.'

³⁸ "Kovu nga ele ernu ekwu wam whuru nnwo wam, be gba iznuznu, kaa, 'Ka bu nye jeeri mkpe nye nwe ekwu ka, anu va ma a gbu a, ri mkpe a.'

³⁹ Be nwugwu a, gwehala a n'aznu ekwu vaini wam, gbume a.

⁴⁰ "Nga nye nwe ekwu vaini wam varu, kini bu nhne o jeeme ele ernu ekwu wam?"

⁴¹ Be kanu a, "O jeeme ele ojo wam nwu enwu ojo, gweru ekwu vaini a nyewhete n'aka ele ernu ekwu berere ele jeenyehnata a mkpuru a n'ige a."

⁴² Jizosi kanu be, "Anu gwnuna nhne be gbaru n'okwukwo nso,

kijam ghulam risi nsukala oro.

Ka bu ernu Nyenwe ai,

o bu nhne ndu-ehni n'anya ai.'

⁴³ "Me naakanu anu nu be jaanahoru anu eli-eze Chiokike, nyewhete ele berere ke jaami mkpuru a.]

⁴⁴ Nye obula ke jaadnakwasi akaworugwu ka, jaagbawa ibekala ibekala, kovu nye obula ke akaworugwu ka jaadnakwasi, o jeegweri a lele retnu.]"

⁴⁵ Nga ele risi ariona nu ele Farisi uru elulu ele ka, be maharu nu o nookwu oka gbasiri be.

⁴⁶ Be noopio kpa be jeeji nowugwu a, kovu nu be uru ogwnu igbudu badnu wam, kwnornu nu be gweruru a nu nye owhurninya.

22

Elulu olulu nnwerne

(Luk 14:15-24)

¹ Jizosi tukwnonu be elulu berere, kaa,

² "Be jeeji eli-eze Chiokike sninu otu nyerukna bu eze, ke mennu nnwo a rukna iriri olu nnwerne.

³ O zihala ele izi a be sukwu ele be ziri va n'iriri olu nnwerne wam. Kovu be kwéle o va.

⁴ "O zihala ele izi a berere, kaa, 'Kanu be nu m mekwatalam nhne iriri, be gbulem kpakara okne ehni m nu umu nnwo ehni m be zuru oznu, be mekwakwolem kpakara nhne, anu vanu m iriri olu nnwerne.'

⁵ "Kovu nu be lewhuru a anya, znenu ke be, otu nyenum n'ekwu a, ke berere n'ernu a.

⁶ Ele gwnarnu nwugwu ele izi a mee be nhne iwhnerne, gbu be.

⁷ Eze wam weru ehni k'agida, o zizne ele ogwnu a, be zne gbumekele ele ogbu badnu wam, kpo eli-ohna be bekwnu.

⁸ "O kanu ele izi a, 'M bikwakwolem nhne iriri olu nnwerne, kovu nu ele me sukuru kwéle.

⁹ Anu zne nu kpakara ngeri apna, sukwu kpakara badnu anu whuru, be va ri wiri olu nnwerne ke m.'

¹⁰ Ele izi wam whoga n'apna, sukwu kpakara badnu be whuru, kpa be hna, ma ele ojo ma ele oma, oro olu nnwerne wam jipiyaru nu badnu.

¹¹ "Kovu nga eze wam bnanyaru o lesi ele izne wam, o whuru otu nyerukna ke woge iwo olu nnwerne.

¹² O sika, 'Enyi m, ndaa kpa i jiri bnanya hna ma woge iwo olu nnwerne?' Onu snirni a.

13 “Ige wam eze kannu ele izi a, ‘Anu kne a eriri ochi nu aka, gwehala n’ederezi, bita a n’ochichiri hne be jaazi naakwna ekwna, naata rukwnurnu-ize.’”

14 N’ochikota kpakara nhne n’otu, Jizosi kaa, “Be sukwuru agida badnu, kovu nu ele be hohiaru zi ele nu ele.”

Otu ntu-eli

(Mak 12:13-17; Luk 20:20-26)

15 Ige wam ele Farisi zneru gba iznuznu kpa be jeeme ma o hite n’ikwu-onu gbu nu mbita be.

16 Be ziznenu a ele sno apna be nu ele dagwunu Erodu, kaa, “Nye-zni-nhne, a magwu nu i bu nye ezi oka, nye neezni apna Chiokike n’ezi oka, nu i so badnu anya kwnornu nu i le badnu anya nu ruwhnu.

17 Kanu ai, kini bu echiche i, o buru oma n’iwu a tu ntụ nyee Siza, sobu o buo oma?”

18 Kpa Jizosi magwu nhne ojo be vu nu mkpoma, o sika be, “Ndaa nhne anu kwno naakpa m iru, ele ruwhnu lawuru ka?”

19 Anu gesi m mkpuru iwai ntụ.” Be gweyanu a otu mkpuru iwai.

20 O sika be, “Nyele nwe ruwhnu ka nu rewhna be gbakwasiri a?”

21 Be kaa, “Siza nwe.”

O kanu be, “Anu nyee Siza nhne ke Siza, nyee masi Chiokike nhne ke Chiokike.”

22 Nga be nurnu a, o duru be ehni, be whoga, gharu a lahna.

Ajji gbasiri olizo n’enu

(Mak 12:18-27; Luk 20:27-40)

23 N’obochi wam masi, ele Sadusi vakwnusiri a, ka bu ele karu nu olizo n’enu zila. Be sika a,

24 “Nye-zni-nhne, Mozizi karu, ‘O buru nu nyerukna nwu, nwee rumu, nwene a rukna jooluru nnwerne a mughianu nwene a rukna rumu.’

25 Kitna, rumu nne rukna esau nu ai wuru hna, ke mbom luru nnwerne, nwuma nwee nnwo, o sigbasinu nwene a rukna nnwerne a.

26 Otu nhne wam mernu nwene a rukna ke ebo, nu ke eto, du nu ke esau.

27 Omekwo kpakara be nwukworu, nwerinya wam masi nwurnu.

28 N’olizo n’enu, nwerinya wam o joo bu nnwerne nyele nu rime esau wam? Kwnornu nu kpakara be luru a nu nnwerne.”

29 Jizosi saru be, “Anu gahieru apna, anu ma nhne be gbaru n’okwukwo nsu, mubu rikne ke Chiokike.

30 Kwnornu nu n’olizo n’enu, be lu nnwerne, be gbó nzi. Be jonu lele ele enine izi zi n’oligwe.

31 Kovu nhne gbasiri olizo n’enu ke ele nwurnu onwu, anu gwnuna nhne Chiokike kannu anu? O karu,

32 ‘Mawa bu Chiokike ke Ebereham, nu Chiokike ke Aziki, nu Chiokike ke Jekpu?’ Chiokike buo Chiokike ke ele nwurnu onwu. O bu Chiokike ke ele zi budnu.”

33 Nga igbudu badnu wam nurnu a, o du kpa be hna ehni n’iznizni a.

Iwu ke kakwo ibne a

(Mak 12:28-34; Luk 10:25-28)

34 Nga ele Farisi nurnu nu Jizosi mesnirni ele Sadusi onu, be gbakoru n’otu.

35 Otu badnu nu rime be, bu nye ogwnu iwu sika a ajji naakpa a iru. O kaa,

36 “Nye-zni-nhne, ndaa iwu ke kakwo kpakara Iwu Mozizi nyernu ai?”

37 Jizosi saru a, “ ‘I jeegweru kpakara mkpoma i, gweru kpakara mkpuru ovu i, gweru kpakara oriri i, whnu Nyenwe ai Chiokike n’anya.’”

³⁸ Ka bu iwu ke kakwo nu nhne mbom be nyernu n'iwu.

³⁹ Iwu ke ebo nu lele ya, 'I jowhnu nye agbatibi i n'anya lele ehi i.'

⁴⁰ Kpakara Iwu nu kpakara iznizni ele owhnurninya Chiokike knogwu aka n'iwu lawuru ka."

Karaisi bu nnwo nyele?

(Mak 12:35-37; Luk 20:41-44)

⁴¹ Kpa ele Farisi gbakoru, Jizosi sikwa be,

⁴² "Kini bu echiche anu gbasiri Karaisi? O bu nnwo nyele?"

Be kanu a, "O bu Nnwọ Devidi."

⁴³ Jizosi kanu be, "Kini mernu Enine Chiokike jiri mee Devidi sukwu a 'Nyenwe m'? Devidi karu,

⁴⁴ 'Nyenwe ai kanu Nyenwe m,
Daziri eli n'akarikwnunga m,
tem du nga me jaabita ele irno i
nu mkpururu ochi i lawuru.' "

⁴⁵ "O buru nu Devidi sukwuru a 'Nyenwe m,' ndaa kpa o jeeji buru kwno nnwo a?"

⁴⁶ Be maá nhne be jaasa a. Hite n'ige wam o zima nye nwernu anya rikne o sikwa a ajiji berere.

23

Ele Farisi nu

ele zni iwu ele Ju

(Mak 12:38-40; Luk 11:37-52; 20:45-47)

¹ Nga wam, Jizosi kanu agida ele badnu wam nu ele sno apna a,

² "Ele zni iwu nu ele Farisi ji rikne Mozizi neezni iwu.

³ Anu bnote nsni, anu mee nhne be karu anu mee, kovu anu kpakwadia agwa lele be. Kwnornu nu be mee nhne be neezni.

⁴ Be noovute ele badnu ivu rinya, kovu be nwee rikne gweru otu mpaka kpatu ivu wam.

⁵ "Kpakara nhne be neeme bu ma ele badnu lekiri be. Be neeme rekpa akpukpo anohia be biga iwu ziri rude, mee onu iwo be zi ogologo.

⁶ O naamasị be o dazi nu risi ngadna nu ige iriri, ma nu risi ngadna n'oro ogbako ele Ju.

⁷ O naamasị be ele badnu neebekwu be ikwu n'ahia, ele badnu noosukwu be, 'Nye-zni-nhne.'

⁸ "Anu kweko be sukwu anu 'Nye-zni-nhne,' kwnornu nu otu nyenum bu Nye-zni-nhne anu, kpakara anu bu rumu nda.

⁹ Anu sukwu nye obula 'nda' n'owa, kwnornu nu otu nyenum bu nda anu, Nda ke oligwe.

¹⁰ Be sukwu anu 'Nda-ai-kwu,' kwnornu nu otu nyenum bu Nda-ai-kwu, ya bu Karaisi.

¹¹ Nye kwu n'esilawuru anu jowbu nye izi anu.

¹² Nye obula ke jeegwelizo ehi a olu, be jeegwedna a eli, nye obula ke jeegwedna ehi a eli, be jeegwelizo a olu.

¹³ "Awhnuwhnu zinu anu, ele zni iwu nu ele Farisi, ele ruwhnu lawuru. Anu naagbasni mgbo eli-eze Chiokike nu ruwhnu ele badnu, anu za naabna, anu kwe ele naabna be bna. [

¹⁴ Awhnuwhnu zinu anu, ele zni iwu nu ele Farisi, ele ruwhnu lawuru. Anu neerida oro ele rinya nzi be nwurnu, neekpe ogologo okpukpe ma ele badnu whnu anu, anu jeenwe omuma ikpe kakwo ele berere.]

15 “Awhnuwhnu zĩnu anu, ele zni iwu nu ele Farisi, ele ruwhnu lawuru, anu neewhe okne osimini ma nu eli etekne mee otu badnu o buru nye sno anu kpenu Chiokike, nga anu mernu a, anu mee nye wam o buru nye kwesiri o zne bekwnu eli renwu mgba lawuru karu anu.

16 “Awhnuwhnu zĩnu anu ele ndu isni, ele karu, ‘Nye obula ke jeegweru Oro Nso Chiokike du risi, o za nhne o bu, kovu nye obula ke jeeji golu zi n'Oro Nso du risi jigwu ogwo.’

17 Anu ele iwhnirniwhno whnu osno, ndaa ke kakwo, golu, sobu Oro Nso ke bitaru golu nso?

18 “Anu karu, ‘Nye obula ke jeeji ojo ariohna du risi, o za nhne o bu, kovu nye obula ke jeeji nkesi zi n'olu a du risi jigwu ogwo.’

19 Ele whnu osno, ndaa ke kakwo, nkesi sobu ojo ariohna ke bitaru nkesi wam nso?

20 Kam kpayaru, nye ji ojo ariohna du risi, ji a, nu kpakara nhne zi n'olu a du risi.

21 Nye ji Oro Nso Chiokike du risi, ji a, nu Nye wu nu rime a du risi.

22 Nye jiması oligwe du risi, ji ngadna eze Chiokike, nu nye dazi n'olu a du risi.

23 “Awhnuwhnu zĩnu anu, ele zni iwu nu ele Farisi, ele ruwhnu lawuru, anu nookwu otu nga nu nri nga ke mkporo okwukwo nwernu eknarna oma, minti nu anisi nu kumi, anu gharu nhne zi rinya n'iwu, bu ikpe zi snam, nu obirizi, nu okwnata mkpoma. O zi mkpa nu anu znernu eme nhne ka nu ke berere.

24 Anu ele ndu isni, anu naazahala ndna, kovu ro kameli.

25 “Awhnuwhnu zĩnu anu, ele zni iwu nu ele Farisi, ele ruwhnu lawuru, anu nosnu aznu okiko nu okwu be ziri richna, kovu nu rime be jipiyaru nu owhonanya nu badnu nwée rikne jikwaru ehni a.

26 Ji nye Farisi kpuru isni, beru osno mee ma rime okiko nu agbugba ziri richna, ma aznu a buru kwno nhne zi richna.

27 “Awhnuwhnu zĩnu anu, ele zni iwu nu ele Farisi, ele ruwhnu lawuru, anu nu lele ilili be teru nznu, ke neegesi ehni a lele nhne marnu mma n'iwhe, kovu okpukpu ele nwurnu onwu nu kpakara nhne zila richna jiharu nu rime a.

28 O bu kpa anu neegesi ehni anu ele badnu lele ele oma, kovu ruwhnu lawuru nu agwa ojo jiharu nu rime anu.

29 “Awhnuwhnu zĩnu anu, ele zni iwu nu ele Farisi, ele ruwhnu lawuru, anu noowu ilili ele owhnurninya, bikwata hne be liri ele oma.

30 Anu naakaa, ‘O buru nu a zi n'obochi ele nda ai, a bo snone be wusi onnarna ele owhnurninya.’

31 Kam kpayaru, anu naagbagidne ehni anu akebne, anu bu rumu ele gburu ele owhnurninya.

32 Anu mezute nhne otutu mmehie ke ele nda anu.

33 Anu agwo, anu eburnu okpu-eli, ndaa kpa anu jaagbanahoru ikpe ke bekwnu eli renwu?

34 M neeziyanu anu ele owhnurninya nu ele akoniche nu ele zni Iwu Mozizi. Kovu anu joogbu agwna be, kpogidne be n'ogba, anu jaapnja agwna be nhne n'oro ogbako anu, kpagbu be hite nu otu eli-ohna du eli-ohna berere.

35 Kam kpayaru, onnarna kpakara ele oma be wuwuru n'owa jaadnakwası anu, hite n'onnarna Ebeli nye oma du onnarna Zakaraya nnwo Berekaya, nye anu gburu n'iketa hne zi nso nu ojo ariohna.

36 Me kanu anu ezi oka, kpakara nhne ka jaadnakwası ebiri ka.

*Jizōsi whnurnu
Jeruselem n'anya
(Luk 13:34,35)*

³⁷ “Chei! Jeruselem, Jeruselem, ji ke noogbu ele owhnurninya, ke ji akaworugwu n̄olo ele be ziyannu i. Mgba ele kpa me piuru o chikota r̄umu i lele kpa enwerne o chichi n̄echikota r̄umu a n̄u mkpururu aka nkwu a lawuru, k̄ovu i kw̄ele.

³⁸ Le, be naaghasan̄u an̄u oro an̄u ma o t̄obiri etekne.

³⁹ Kwnornu n̄u ka, me kan̄u, hite k̄itna, an̄u j̄owhnu m berere d̄u nga an̄u jaakaa, ‘Chiokike gozi nye wam ke naava n̄u r̄ewhna Nyenwe ai.’ ”

24

*Be joolulu Oro Nso
Chiokike*

(Mak 13:1,2; Luk 21:5,6)

¹ Jizōsi hi n'Oro Nso Chiokike wh̄oga, ele sno apna a vakwnusi a neegesi a kpa be jiri wu Oro Nso Chiokike.

² Jizōsi kan̄u be, “An̄u whnurnu kpakara nhne ka? Me kan̄u an̄u ezi oka, otu akaworugwu j̄oogwuzo n'olu ibne a, be jaakwnadna kpakara be n'eli.”

*Mmekp̄ehni n̄u
okpakna ēhni*

(Mak 13:3-13; Luk 21:7-19)

³ Nga Jizōsi daz̄iri eli n'olu Rugwu Olivu, ele sno apna a vakwnusi a ichne, be kaa, “Kan̄u āi nga kpakara nhne ele ka jeeme. K̄ini jeegesi n̄u ōvua i z̄i ndundu, ya n̄u okwukwo ōwa?”

⁴ Jizōsi sar̄u be, “Anya d̄u an̄u eli o z̄i nye ōbula duhie an̄u.

⁵ Kwnornu n̄u aḡida ele badn̄u jaava n̄u r̄ewhna m, naakaa, ‘Mawa bu Karāisi,’ be jooduwhu aḡida ele badn̄u.

⁶ An̄u j̄oonu ogwnu n̄u ōnutnu ogwnu, k̄ovu mkp̄oma lá an̄u mini. Kpakara nhne ka jeebe ōsno mee, k̄ovu okwukwo ȳooduge.

⁷ “Mba jeeliz̄o megidne mba, eli-eze jeeliz̄o megidne eli-eze, ōkwnunyo n̄u eli otne enye jaaz̄i n̄u hne z̄i ichne ichne.

⁸ Kpakara nhne ka j̄oonu lele ōpanizo igbugbu ōmumu nnw̄o.

⁹ “Ige wam be jeegweru an̄u nyee ma be kpakna an̄u ēhni, gbu agwna an̄u, kpakara mba joosno an̄u irno kwnornu m.

¹⁰ Aḡida ele badn̄u j̄aab̄ita ōkwnata mkp̄oma be, be jeere ibne be, sno ibne be irno.

¹¹ Aḡida ele owhnurninya aghalaghala jeeliz̄o masi, duwhu aḡida ele badn̄u.

¹² Kwnornu n̄u nhne ōjo jaaz̄i aḡida, owhnun'anya aḡida ele badn̄u jeeji iyi.

¹³ K̄ovu be j̄oznohia nye ōbula ke jaaknata mkp̄oma, daz̄igidne d̄u okwukwo kpakara nhne.

¹⁴ Be j̄ookpo okwo izi ōma ka ke gbas̄iri eli-eze Chiokike n̄u kpakara ōwa ma o buru nhne akebe nyee kpakara mba, ige wam okwukwo kpakara nhne jaava.

*Awhnuwhnu ke
ele Jeruselem jaata*

(Mak 13:14-23; Luk 21:20-24)

¹⁵ “An̄u j̄owhnu nhne r̄uru oru ke neegweya gba ēso n'eli hne o gwuzo n̄u hne z̄i ns̄o, ke Dan̄eli nye owhnurninya kwuru ōka gbas̄iri a. (Bno ns̄i, nye ōbula ke n̄oogwnu nhne ka, gh̄ohia a masi.)

16 Ige wam, ele zì nù Judiya gbazne n'olu rugwu.

17 Nye zì n'olu ọro híedna ọ kwahala nhne zì n'oro a.

18 Nye zì n'ẹkwu lánna aznú, chíri iwo a.

19 Awhnúwhnu jaazínu ele rinya zì rime nù ele neechi nnwọ rẹma n'ige wam.

20 Anù kpenu Chiokike ọgba ẹso anù búko n'ige okirika mọbu n'Ọbochi Ozukwa Inwe.

21 Kwnornu n'ige wam okne mmekpẹhni jaazì ke nù lele ya zìkolele hite n'ọpanizo ọwa dù kítna, owe, ọ jáazịma berere.

22 Ọ búru nù be méne ọbochi wam zìri ichichi, ọ zá badnú ọbula be jooznohiali, kọvu kwnornu nù ele Chiokike họhiaru, o mernu ọbochi wam zìri ichichi.

23 Ige wam ọ búru nù nye ọbula kanù í, 'Le Karaìsi zì hna,' mọbu, 'Ọ zì pìari,' í kwé.

24 Kwnornu nù Karaìsi aghalaghala zì ọdo n'odo, nù ele ọwhnurninya aghalaghala zì ọdo n'odo joowho iwhe, nọornu agida ẹrnu ndu-ẹhni nù ẹrnu elekema zì ọdo n'odo, ma be duwhu ele Chiokike họhiaru ọ búru nù o jeekwe omume.

25 Anù bnote nsì, m bele m ọsno kanù anù.

26 "Ọ búru nù nye ọbula kanù anù, 'Le ọ zì n'ẹli-ìkpa,' anù zné, mọbu 'Ọ zì nù rime ọro matì,' anù kwé.

27 Kwnornu nù lele kpa amùma oligwe neehi n'ọbosi ẹhnam dna nù ọdidna ẹhnam, bú kpa ọ jooonu nga Nnwọ ke Badnú jaava.

28 Henuhne ọbula iznu dnarnù, idele jaagbakọ pìi.

Nnwọ ke Badnú wawa

(Mak 13:24-27; Luk 21:25-28)

29 "Wara wara mmekpẹhni ka whemernu n'ọbochi wam, ẹhnam jaagba ọchichiri,

ẹnwa jéenye iwhe a,

mbo ke oligwe jaadna,

kpakara iknernema ke oligwe jooonio ohnio.

30 "Ige wam, nhne elekema ke Nnwọ ke Badnú joowhuya iwhe n'oligwe, kpakara mba jaagbanù a mkpe. Be joowhnu Nnwọ ke Badnú hne o naava n'erumeru oligwe n'iknernema nù okne igwugwu.

31 Be jooḡbu okne ọkwodu, o jeezihala ele enine izi a, be chíkotanu a ele ke Chiokike họhiaru hite nù ruwhere ẹno k'owa, hite n'ọsotoma ọwa dù n'ọsotoma berere.

Mùhia nhne hite

n'isisi be kwu figi

(Mak 13:28-31; Luk 21:29-33)

32 "Anù mùhia nhne hite n'isisi figi, nga nkala a zìlam pìali pìali nooru ọkwukwo ikne, anù mahia nù nduru-mini zì ndundu.

33 Kpam masì, nga anù joowhnu kpakara nhne ka, anù mahia nù ige wam zì ndundu n'ọnu-mḡbo.

34 Me kanù anù ezi ọka, ebiri ka jéewhe tem kpakara nhne ka mee.

35 Oligwe nù ọwa jaagawhe, kọvu ikwu-ọnu m jáagawhe rìja rìja.

Ọ zá nye magwu

ọbochi wam

(Mak 13:32-37; Luk 17:26-30,34-36)

36 "Ọ zá nye magwu ọbochi mọbu ọtnu-ige wam, ele enine izi ke oligwe mámasì, Nnwọ wam mámasì. Okwolem Nda m kpọi bú nye magwu ọbochi wam.

³⁷ Lele kpa ọ n'ọbochi Noa, ọ bụ kpa ọ jọonu ige Nnwọ ke Badnụ jaava.

³⁸ Hne ọ dū ige mgba-mini ẹli wam, ele badnụ zị neeri, nọonwo, nọolu nnwerne, nọogbo nzi, dū n'ọbochi Noa bnaznenu nū rime ọgbo.

³⁹ Be máa, tem mgba-mini ẹli wam va vuru kpakara be zne. Ọ bụ kpa ọ jaazị nga Nnwọ ke Badnụ jaava.

⁴⁰ Badnụ lawuru jaazị n'ekwu, be gweru otu ghasa ibne a.

⁴¹ Ele rinya lawuru jaazị neegwe wiri nū hne be gwe wiri, be gweru otu ghasa ibne a.

⁴² “Kam kpayaru, anụ neese nse, kwnornu nū anụ máa ọbochi Nyenwe anụ jaava.

⁴³ Kọvu anụ mahia nū ọ bụru nū nye nwe ọro mahiaru ọtnu-ige nye buznu jaava, o znenu ose ọro a, o béekwele be liwa ọro a.

⁴⁴ Kpam masi, anụ ziri nū ojiknenu, kwnornu nū Nnwọ ke Badnụ jaava ige anụ túge anya a.

Ọhi ke kwesiri

ọ kwnata ovu

(Luk 12:41-48)

⁴⁵ “Nyele bụ ọhi wam ke nwenu akoniche be kwesiri ọ kwnata mkpoma, nye nda a kwu mernu nye risi ele ọhi berere zị n'oro a ma o neenye be wiri n'ige kwesiri?

⁴⁶ Ọwa ọma zinu n'ohi wam ke nda a kwu hiehnarnu whnụ nū o neeme kpa nda a kwu karu.

⁴⁷ Me kanu anụ ezi oka, o jeeme a nye jeelekota kpakara ekwu a.

⁴⁸ Kọvu ọ bụru nū ọhi wam bụ ọhi ojo, ọ kanu ẹhni a, ‘Nda m kwu joogbu okwnu.’

⁴⁹ o bete naaligbu ele ọhi ibne a, snornu ele manya noogbu, neeri nọonwo manya.

⁵⁰ Nda kwu ọhi wam jaava n'ige ọ túge anya a, n'otnu-ige ọ máa.

⁵¹ O joogbubi a ichichi lawuru, mee ya nū ele ruwhnu lawuru bna n'otu ogbo, hne be jaazị naakwna ekwna, naata rukwnurnu-ize.”

25

Elulu nri

rụmu oknornokno

¹ “Ige wam be jeeji ẹli-eze Chiokike sninu nri rụmu oknornokno ele ọhị tọnji be zne o kwnusi nye nọolu nnwerne ikne.

² Isne n'esislawuru be bụ ele iwahnirniwhno, isne bụ ele nwenu echiche.

³ Ele iwahnirniwhno gweru tọnji kọvu be jile mọno.

⁴ Ele nwenu echiche gweru tọnji, gbaru mọno n'olori gweru zne.

⁵ Nye nọolu nnwerne ikne váge ngwa, anyarna turu kpakara be, be zni anyarna.

⁶ “N'esislawuru abali, be siri lulo, ‘Le nye nọolu nnwerne ikne, anụ whuya, zne kwnusi a.’

⁷ “Kpakara rụmu oknornokno wam lizo, tulizo tọnji be.

⁸ Ele iwahnirniwhno kanu ele nwenu echiche, ‘Anụ nyebosi ai agwna mọno anụ, tọnji ai neechi echni.’

⁹ “Rụmu oknornokno wam nwenu echiche saru be, ‘Ọza, mọno a nwenu jóozunu ai nū anụ, anụ zne n'aka ele neere mọno zuru mọno ke anụ.’

¹⁰ “Kpa be znenu ọ zụ mọno, nye nọolu nnwerne ikne varu, rụmu oknornokno ele jiknenu snornu a bna n'iriri ọlu nnwerne. Be gbasni ọro.

11 “Omekwo rụmu oknornokno iwahnirniwhno wam varu, nooznu aka n'onu-mgbo, naakaa, 'Nyenwe aị, Nyenwe aị, gbamanu aị ọro.'

12 “Kovu o saru be, 'Me kanu anu ezi oka, m maam ele anu bu.'

13 “Kam kpayaru, anu ziri nu nse, kwnornu nu anu ma a obochi wam mọbu nga ọtnu-ige wam jọbu.

*Elulu talenti**

(Luk 19:11-27)

14 “Berere kwno, be jeeji eli-eze Chiokike sninu otu nyerukna ke neezne izne, o sukwu ele ohi a, gweru ekwnu a nyewhete be n'aka.

15 O nyernu otu badnu talenti isne, nye berere talenti lawuru, nyee masi nye ke berere otu talenti. O nyernu nye obula lele kpa rikne a hna. O lizo zne hne o znezne.

16 Nye ke o nyernu talenti isne znernu ngangam ọozu ahia, o nwehia mbnarna talenti isne berere.

17 Nye ke nahiaru talenti lawuru zne mee masi kpm, o nwehiaru mbnarna talenti lawuru berere.

18 Kovu nye ke nahiaru otu talenti znernu gwu eli, lite iwai nyenwe a.

19 “Nga agida ige whemernu, nyenwe ele ohi wam varu ma ya nu be piakota nhne o nyernu be.

20 Nye wam ke nahiaru talenti isne gweru talenti isne berere va, kaa, 'Nyenwe m, i nyernu m talenti isne, kovu le, m nwehiaru m mbnarna talenti isne berere.'

21 “Nyenwe a kanu a, 'I mekwaru nkari, ohi oma, ke be kwesiri o kwnata mkpoma, i kwesiri be kwnata i mkpoma nu nhne ele nu ele, m jeeme i nye risi agida nhne. Vaa, snornu Nyenwe i n'ovu oso n'onu a.'

22 Nye ke nahiaru talenti lawuru varu masi, kaa, 'Nyenwe m, i nyernu m talenti lawuru, le m nwehiaru m mbnarna talenti lawuru berere.'

23 “Nyenwe a kanu a, 'I mekwaru nkari, ohi oma ke be kwesiri o kwnata mkpoma, i kwesiri be kwnata i mkpoma nu nhne ele nu ele, m jeeme i nye risi agida nhne. Vaa, snornu Nyenwe i n'ovu oso n'onu a.'

24 “Nye wam ke nahiaru otu talenti varu, kaa, 'Nyenwe m, m maam nye i bu, nu i bu badnu aka-nchni, i neegwe nhne i ekwu hne i kpala mkpuru, i naachikota nhne hne i ghala mkpuru.

25 Kam kpayaru, ogwnu turu m, m gweruru m talenti i lite n'eli, le, gwehnarnu ke bu ke i.

26 “Nyenwe a saru a, 'Ohi ojo, nye ime-mgwu, i magwu nu m neegwe nhne n'ekwu hne me kpala mkpuru, naachikota nhne hne me ghala mkpuru?

27 O buru oma, i znernu eyisi iwai m n'aka ele gbanwo iwai, nga me varu m znernu m anahoru iwai m nu mbnarna.

28 “‘Anu nahia a talenti wam nyega a nye wam ke nwernu nri talenti.

29 Kwnornu nu nye obula ke nwernu nhne, be jeenye, o nwehnasiru, kovu nye ke nwee, be jaanahoru a, o bubedi ke o nwernu.

30 Anu tubna ohi ke bnage nu nhne wam n'ederezi, o bna n'ochichiri hne be jaazi naakwna ekwna, naata rukwnurnu-ize.'

Rumu owu nu aturnu

31 “Nga Nnwọ ke Badnu jaava n'igwugwu a, ya nu kpakara ele enine izi a, o jaadazi eli nu ngadna eze ke igwugwu.

* 25:13 *Talenti*: N'ige mbom, ogwo ernu obochi bu otu mkpuru iwai. Otu talenti hna lele nri pokwu mkpuru iwai.

³² Be jaachikota kpakara mba nu ruwhnu a, o jeekeme ele badnu n'esilawuru ibne be, lele kpa nye nooznu atnurnu neekewahala atnurnu n'esilawuru owu.

³³ O jaabita atnurnu n'akarikwnunga a, bita owu n'akarita a.

³⁴ "Eze wam jaakanu ele zi a n'akarikwnunga, 'Anu va, ele Nda m goziri, anu kehia eli-eze be bitannu anu hite nga Chiokike kpuru owa.

³⁵ Kwnornu nu wiri gwnurnu m, anu nyernu m wiri, akpiri kporu m bekwnu, anu nyernu m mini, m bu m nye izne, anu kwubnarnu m oro anu.

³⁶ M gbaru m eto, anu chita m ikpe, m rjaru m nriria, anu leru nriria, m zi m n'oro ikelu anu varu lekwa m.'

³⁷ "Ige wam ele oma wam jaakaa, 'Nyenwe ai, ndaa ige a whnurnu wiri noogwnu i, a nyega i wiri, mibu ige akpiri nookpo i bekwnu, a kwute i mini?

³⁸ Ndaa ige a whnurnu nu i bu nye izne, a kwubnanya i n'oro ai, mibu nu i gba eto, a chita i ikpe?

³⁹ Ndaa ige a whnurnu nu i naaria nriria mibu n'oro ikelu, a lekwa i?"

⁴⁰ "Eze wam jaasa be, 'Me kanu anu ezi oka, kpakara nhne anu mennu nye ka kakwo mati n'esilawuru rumu nda m, anu mennu me.'

⁴¹ "Nga wam, o jaakanu ele ke zi a n'akarita, 'Anu whoga hne me zi, ele be vuru onu, bna nu bekwnu noonwu tim tom ke be bitannu Ekwensu nu ele enine zi a.

⁴² Kwnornu nu wiri gwnurnu m, anu nyege m wiri, akpiri kporu m bekwnu, anu kwutege m mini.

⁴³ M bu m nye izne, anu kwubnanyage m, m gbaru m eto, anu chitage m ikpe, m rjaru m nriria, m zi m n'oro ikelu, anu lekwa m.'

⁴⁴ "Be jaasa a masi, 'Nyenwe ai, ndaa ige a whnurnu nu wiri noogwnu i, mibu nu akpiri nookpo i bekwnu, mibu nu i bu nye izne, mibu nu i gba eto, mibu nu i naaria nriria, mibu nu i zi n'oro ikelu, a lekwa i?"

⁴⁵ "O jaasa be, 'Me kanu anu ezi oka, kwnornu nu anu mennu a otu nye ke kakwo mati n'esilawuru ele ka, anu mennu m.'

⁴⁶ "Ige wam be jeeze ta awhnuwhnu ke kwó okwo, kovu ele oma jaabna nu budnu kwó okwo."

26

Be gbaru iznuznu

o gbu Jizosi

(Mak 14:1,2; Luk 22:1,2; Jon 11:45-53)

¹ Nga Jizosi kwukworu kpakara oka ka, o kanu ele sno apna a,

² "Anu magwu nu obochi lawuru wheme nu Iriri Ogawhe jaazi, be jeegweru Nnwó ke Badnu nyee ma be kpoigidne a n'ogba."

³ Ige wam ele risi arjohna nu ele okno badnu ke ele Ju gbakoru n'obiri nye risi arjohna be nookwu Kayafasi.

⁴ Be gba iznuznu kpa be jeeji aghigho nwugwu Jizosi, gbu a.

⁵ Kovu be karu, "O jobu n'Iriri ka, o zi a kpasu ohna."

Be teru Jizosi mono

nu Betani

(Mak 14:3-9; Jon 12:1-8)

⁶ Nga Jizosi zi nu Betani, n'oro Saimoni nye rjaru nchnichna,

⁷ otu nwerini bnayarnu nye vu mono otute zi gburu okne onu ke nweru eknarna oma ke zi n'ite alabasita, o wusi mono otute ka nu risi Jizosi kpa o dazi eli neeri wiri.

⁸ Nga ele sno apna a whnurnu a, o we be eḥni, be kaa, “Kini kpayaru be wuwhuru moṇo otute ka etekne?”

⁹ Be znernu o re moṇo otute ka agida iwai, nyee ele mboni.”

¹⁰ Kpa Jizosi mahiaru nhne be nookwu, o kanu be, “Kini kpayaru anu neemekpa nwerinya ka eḥni? O rnurnu ernu oma n'eḥni m.

¹¹ Anu nu ele mboni zi kpakara ige, kovu nu me nu anu jaazi kpakara ige.

¹² O wusiri moṇo otute ka n'eḥni m, o mernu a ma o bikwata m n'olili m.

¹³ Me kanu anu ezi oka, hne nu hne obula be jookpo okwo izi oma ka nu kpakara owa, be jookwuhia nhne nwerinya ka mernu, ma o buru nhne o chenwanya a.”

Judasị kweruru

o re Jizosi

(Mak 14:10,11; Luk 22:3-6)

¹⁴ Ige wam otu badnu n'esilawuru ele sno apna a nri nu ebo wam, be kwu Judasị Isikarioti, znekwnusiri ele risi ariohna,

¹⁵ o sika be, “Kini bu nhne anu jeenye m, o buru me gweru a nyee n'aka anu?” Be kwu a nri siliva eto.

¹⁶ Hite n'ige wam, o bete o pio oghere o jeegweru Jizosi nyee be.

Jizosi nu ele sno apna a

riri Iriri Ogawhe

(Mak 14:12-21; Luk 22:7-13; Jon 13:21-30)

¹⁷ N'obochi mbom ke Iriri Bredi Whuge Qwhu, ele sno apna a vakwnusiri Jizosi, sika wa, “Ndaa hne i pioru ma a mekwatanu i ma i ri Iriri Ogawhe?”

¹⁸ O kanu be, “Anu zne eli-ohna ka, znekwnusi nye nu kpa, kanu a, ‘Nye-zni-nhne karu kpa, Ige m zi ndundu, me nu ele sno apna m jeeri Iriri Ogawhe n'oro i.’”

¹⁹ Ele sno apna a mee lele kpa Jizosi nyernu be iwu, be mekwata Iriri Ogawhe.

²⁰ N'ogbednachi, Jizosi nu ele sno apna a nri nu ebo wam daziri neeri wiri.

²¹ Kpa be neeri wiri, o kaa, “Me kanu anu ezi oka, otu badnu n'esilawuru anu jeere m.”

²² O gbu be igbugbu k'agida, kpakara be n'otu n'otu panizo naakanu a, “Nyenwe ai, o bu mawa sa?”

²³ Jizosi saru be, “Nye me nu a noosnukota aka n'otu agbugba wiri, nye wam jeere m.

²⁴ Nnwọ ke Badnu jaala lele kpa be gbaru a n'okwukwo nsọ gbasiri a, kovu nu awnwhnu jaazinu nyerukna wam be jeehi n'aka a re Nnwọ ke Badnu. O buru oma o buru be muna nyerukna wam.”

²⁵ Ige wam Judasị, nye reru a, kaa, “Nye-zni-nhne, o bu mawa sa?”

Jizosi saru a, “Ji n'iwuhuru i karu kpa m.”

Wiri Anyasnu Nyenwe ai

(Mak 14:22-26; Luk 22:14-20; 1 Kor 11:23-25)

²⁶ Kpa be neeri wiri, Jizosi gweru bredi, tunu Chiokike mmamma, nyawama a, nyee ele sno apna a, kaa, “Anu gweru, ri, ka bu ano-eḥni m.”

²⁷ O gweru okiko, tu mmamma, nyee be, kaa, “Kpakara anu nwọ nu rime a.

²⁸ Kwnornu nu ka bu onarna m ke ogha-njo-eḥni ke be nowusi kwnornu agida badnu ma be gbarunu be mmehie be.

²⁹ Me kanu anu, hite kitna m joonwoma manya hi n'isisi vaini whuya rja rja tem du n'obochi me nu anu jounwo a ke ikne n'eli-eze nda m.”

³⁰ Nga be gwnụkparu eri, be whọga zne nụ Rugwu Olivu.

Jizọsi karu nụ Pita

jọogonahoru a

(Mak 14:27-31; Luk 22:31-34; Jọn 13:36-38)

³¹ Nga wam, Jizọsi kanu be, “Kpakara anu jaagbakwo eso n'abalị tna, kwnornu nụ be gbaru a n'okwukwo nsọ, kaa, 'M joogbu nye nọoznu atnuru, atnuru a jaagbakemekwo.'”

³² Kọvu nga me hiri n'enwu lizo, m jeebe anu osno zne Galili.”

³³ Pita saru a, “O bụbedi nụ kpakara badnu gbanahoru i, m jaagba eso rịa rịa.”

³⁴ Jizọsi kanu a, “Me kanu i ezi oka, n'abalị ka, ige okne ochichi yáakwnana ekwna, i jọogonahoru m mgba eto.”

³⁵ Pita kanu a, “O bụbedi nụ o zi mkpa me sno i nwuma, m jọogonahoru i rịa rịa.” O bụ masi kpa kpakara ele sno apna a kwuru.

Jizọsi kperu okpukpe

nụ Gesemani

(Mak 14:32-42; Luk 22:39-46)

³⁶ Jizọsi nụ be vaduru n'ekwu Gesemani, o kanu ele sno apna a, “Anu daziri hna, me zne kpe okpukpe nụ piari.”

³⁷ O kwuru Pita nụ rumu rukna Zebidi lawuru yisinu ehni a, o panizo o gbu a igbugbu nụ o wute a nụ mkpoma.

³⁸ O kanu be, “O noogbu m mkpoma m igbugbu k'agida du enwu, anu dazigidne hna, snornu m se nse.”

³⁹ O znetu nụ ruwhnu matị, dna, kpu ruwhnu a n'eli, kpe okpukpe, kaa, “Nda m, o buru nụ o kwe omume, ma okiko awhnuwhnu ka whenahoru m, kovu o buo nhne me pioru, kovu nhne i pioru.”

⁴⁰ O vakwnusi ele sno apna a, hne be neezni anyarna, o kanu Pita, “Kini, anu nwée rikne snornu m se nse otu otu-ige?”

⁴¹ Anu se nse, neekpe okpukpe, o zi anu dnabna n'ornurna. Enine ke badnu zi bekwnu, kovu nụ anọ-ehni zila rikne.”

⁴² O gharu be zne kwno berere ke mgba lawuru, kpe okpukpe, kaa, “Nda m, o buru nụ okiko awhnuwhnu ka jéewhenahoru m, okwolem ma m nwornu m a, be mee nhne i pioru.”

⁴³ Jizọsi hiehna berere, whnu be neezni anyarna, kwnornu nụ anya be zi rinya.

⁴⁴ O gharu be, zne kpe okpukpe ke mgba eto, nookwu koriri otu oka wam.

⁴⁵ Nga o hiehna hne ele sno apna a zi, o kanu be, “Anu zi koriri neezni anyarna, noozukwa inwe? Le, otu-ige ke m zi ndundu. Be neegweru Nnwọ ke Badnu resi n'aka ele mmehie.

⁴⁶ Anu lizo, ma a zne. Anu le, nye neegweru m nyee zi ndundu.”

Be nwudneru Jizọsi

(Mak 14:43-50; Luk 22:47-53; Jọn 18:3-13)

⁴⁷ Kpa Jizọsi kpu oka n'onu, le, Judasi, otu nu rime nri nụ badnu lawuru wam varu, ya nụ agida badnu ji ama-ogwnu nụ okpiri. Be hi nụ hne ele risi arịohna nụ ele okno badnu ele Ju va.

⁴⁸ Judasi, nye wam reru a nyernu be nhne elekema, kaa, “Nye obula ke me joosnutu onu, nye wam bu ya, anu nwugwu a.”

⁴⁹ Ngangam, o znekwnusi Jizọsi, kaa, “Nye-zni-nhne, m bekwulem ji.” O snutu a onu.

⁵⁰ Jizọsi kanu a, “Enyi m, mee nhne i varu o mee.”

Be vakwnusi Jizōsi, be tūkwasị a aka, nwūgwusi a rikne.

⁵¹ Otu badnū nū rime ele sno apna Jizōsi dōsnimarnu aka, mniōhia ama-ogwunu a, gbu nye izi nye risi ariōhna, bihala a nsni.

⁵² Jizōsi kanū a, “Mniōhnasi ama-ogwunu i n’oḅo a, kwnornu nū kpakara ele gbu ama jaala n’ama.

⁵³ O bụ nū i máa nū m nwernu m rikne kanū Nda m, o ziyanu m nhne kakwo lijōni * nri nū ḅo ele enine izi a?

⁵⁴ Kọvu me mee kpam, nhne be gbarū n’okwukwo nsọ nū o jeemeriri, ndaa kpa o jeemezu?”

⁵⁵ Ige wam, Jizōsi kanū agida ele badnū wam varū o nwūgwu a, “Anū varū chiri ama-ogwunu nū okpiri o nwudne m lele nū bụ m nye neemegidne iwu ḗli. Kpakara oḅochi m daziri m n’Oro Nsọ Chiokike neezni nhne, anū nwúdnene m.

⁵⁶ Kpakara nhne ka mernu ma nhne ele owhnurninya gbarū n’okwukwo nsọ mezu.” Ige wam kpakara ele sno apna a ghasarū a, gbawhu.

Jizōsi gwuzo nū ruwhnu

ele eze-ikpe

(Mak 14:53-65; Luk 22:54,55,63-71; Jōn 18:13,14,19-24)

⁵⁷ Ele nwudnenu Jizōsi duru a zne n’oro Kayafasi, nye risi ariōhna, hne ele zni iwu nū ele okno badnū gbakogwu.

⁵⁸ Pita snornu a, be zitagwo ndundu. O bna nū rime ederezi nye risi ariōhna, daziri eli n’esilawuru ele nse, ma o whnu risi nhne neeme.

⁵⁹ Ele risi ariōhna nū kpakara ele eze-ikpe noopio ele akebne aghalaghala gbagidne Jizōsi ma be gbu a.

⁶⁰ O bụ n’ezi nū agida ele akebne aghalaghala whuyaru, kọvu be nwée rikne piohia nhne.

N’ipne-aznū, badnū lawuru whuyaru,

⁶¹ be kaa, “Nyerukna ka karū nū o nwernu rikne kwadna Oro Nsọ Chiokike ka, wu a n’oḅochi ḗto.”

⁶² Nye risi ariōhna lizọ sika Jizōsi, “O zá nhne i naasa? Kini bụ akebne ka ele badnū ka naagbagidne i?”

⁶³ Kọvu nū Jizōsi kpusnirni onu. Nye risi ariōhna kanū a, “M ji m Chiokike ke zi bndu kwusi a rikne, ma i kanū ai, ji n’iwhuru i bụ Karaisi, Nnwọ Chiokike.”

⁶⁴ Jizōsi sarū a, “Owe! Ji n’iwhuru i karū. Kọvu me kanū anū, Hite kitna, anū jowhnu Nnwọ ke Badnu

hne o dazi n’akarikwnunga Chiokike ke bụ Dikne, naava masi n’erumeru oligwe.”

⁶⁵ Nye risi ariōhna dōwama iwo a, kaa, “O kwululem Chiokike, ndaa nhne a kwno noopio ele akebne berere? Anū nurnu kpa o kwuluru Chiokike.

⁶⁶ Kini bụ echiche anū?”

Be sarū, “O kwesiri o nwū ẹnwu.”

⁶⁷ Ige wam be bete nōogbu a onu mini, naapnia a nhne. Ele berere nōogbo a aka,

⁶⁸ be kaa, “Whnū nū ai owhnurninya, Karaisi, nyele gbōru i aka?”

Pita Gōnahoru Jizōsi

(Mak 14:66-72; Luk 22:56-62; Jōn 18:15-18,25-27)

⁶⁹ Pita dazi n’ederezi, otu nnwọ oknornokno ele neezne izi vakwnusi a, kaa, “Ji nū Jizōsi nye Galili sno masi!”

⁷⁰ Kọvu Pita gōru nū ruwhnu kpakara be, kaa, “M máam nhne i naakaa.”

* 26:53 *Lijōni:* bụ pokwu ele ogwunu isunu.

⁷¹ Nga ọ whọgaru n'ọnu-mgbo, nnwọ oknornokno berere whnụ a, ọ kanụ ele zị pji, “Nyerukna ka nụ Jizọsi nye Nazareti sno.”

⁷² Pita kwusi a rikne, gọ kwno berere, kaa, “M máam nyerukna ka.”

⁷³ Ige matị berere, ele gwuzo ndundu vakwnusiri Pita, kanụ a, “N’ezi, jị n’iwhuru i bụ otu badnụ nụ rime be, kwnornu nụ ikwu-ọnu i neegwehịa i iwhne.”

⁷⁴ Ige wam ọ panịzo nọogo ẹhni a ngugo, nọodu risi, kaa, “M máam nyerukna ka.” Ngangam, okne ọchichi kwnarnụ ẹkwna.

⁷⁵ Pita chenwanya ikwu-ọnu Jizọsi kwuru, kaa, “Ige okne ọchichi yáakwnana ẹkwna, i jọogonahoru m mgba ẹto.” Ọ whọga ederezi kwna ẹkwna mkpuru ovu k’agida.

27

Be kwuznennu Paịleti

Jizọsi

(Mak 15:1; Luk 23:1,2; Jọn 18:28-32)

¹ N’ọnu ọsisi, kpakara ele risi arịohna nụ ele okno badnụ ele Ju gbaru iznuznu, kpebi o gbu Jizọsi.

² Be kne a eriri, duru a zne, gweru a nyewhete n’aka Paịleti nye nẹchi.

Enwu Judasi

(Ernu 1:18,19)

³ Nga Judasi nye reru a whnurnu nụ be kperu Jizọsi ikpe ẹnwu, marnụhnini mernu a k’agida, ọ chihnalanu ele risi arịohna nụ ele okno badnụ nri siliva ẹto wam,

⁴ kaa, “M mmehiele m nụ ogweru ọvnarna nye ikpe mána resi anụ.”

Be kanụ a, “Ndaa ke gbasiri aị? Kị bụ mkpa i.”

⁵ Judasi tusa iwai wam nụ rime Ọro Nsọ Chiokike, whoga, kpogbu ẹhni a.

⁶ Ele risi arịohna gweru kpakara iwai wam, kaa, “O megidnernu iwu aị o yisi iwai ka nụ nhne be b́ta iwai n’Ọro Nsọ Chiokike, kwnornu nụ ọ bụ iwai ọvnarna.”

⁷ Be kpebi o gweru iwai wam zụ ẹli ele kpụ ite hne be jeeli ele izne.

⁸ Ka kpayarụ be nookwu a Ẹli Ọvnarna dụ tna.

⁹ Nhne ka mernu ma nhne Jerimaya nye ọwhnurninya kwuru mezu, “Be gweru

nri siliva ẹto

bụ ọnu ahịa

ele Izireli whnurnu ọnu a,

¹⁰ be gweru a zụya ẹli ele ọkpụ ite,

lele kpa Nyenwe aị nyernu m n’iwu.”

Jizọsi gwuzo nụ

ruwhnu Paịleti

(Mak 15:2-5; Luk 23:3-5; Jọn 18:33-38)

¹¹ Kọvu nụ Jizọsi gwuzo nụ ruwhnu nye nẹchi ẹchi, nye ọchichi wam sịkwa a, “I bụ Eze ele Ju?”

Jizọsi sarụ a, “Owe! Jị n’iwhuru i karụ kpatam.”

¹² Nga ele risi arịohna nụ ele okno badnụ noobno a nhne, ọ sála be nhne ọbula.

¹³ Paịleti sịkwa a, “I nuna kpakara nhne be noobno i?”

¹⁴ Kọvu nụ Jizọsi sála a ọka ọbula, ke mernu o gbagwojiri nye ọchichi anya k’agida.

*Be marnu Jizosi**ikpe enwu**(Mak 15:6-15; Luk 23:13-25; Jɔn 18:39--19:16)*

15 N'Iriri Ọgawhe ọbula, nye neechi ẹchi neesigbasinu be otu nye ikelu be rjoru a.

16 Be nwernu otu nye ojo ke ọhna marnu zi n'oro ikelu be nookwu Barabasi.

17 Nga igbudu badnu wam gbakoru, Paileti sikwa be, "Ndaa nye anu piuru me sigbasinu anu, Barabasi* sọbu Jizosi, nye be kwu Karaisi?"

18 Paileti kwuru ka kwnornu nu o magwu nu be kwuyannu a Jizosi kwnornu owho-anya.

19 Kpa Paileti daziri nu ngadna ikpe a, nnwerne a ziznenu a izi, kaa, "Aka i zi nu nhne gbasiri nye mee mma wam, kwnornu nu m taru m agida awhnuwhnu nu mboro tna kwnornu a."

20 Kọvu nu ele risi arjohna nu ele okno badnu sigidnenu igbudu ele badnu wam be rjo a Barabasi, gbu Jizosi.

21 Paileti sikwa be, "Ndaa nye anu piuru me sigbasinu anu n'ehni badnu lawuru ka?"

Be kaa, "Barabasi."

22 O sikwa be, "Kini bu nhne anu piuru me mee Jizosi, nye be kwu Karaisi?" Kpakara be siwama, "Kpogidne a n'ogba."

23 Paileti sikwa, "Kini mernu? Kini bu nhne ojo ke o mernu?"

Be siwama okokoba ke kakwo, kaa, "Kpogidne a n'ogba."

24 Nga Paileti whnurnu nu o nwée rikne mee nhne ọbula, kọvu agida ọgbugbo dnarnu, o gweru mini kwọ aka a lawuru nu ruwhnu kpakara be, kaa, "Aka m zi rịchna n'ovnarna nwerukna ka, anu n'iwuhuru anu magwu nhne gbasiri a."

25 Kpakara be karu, "Ovnarna a zi nu risi ai, zi masi nu risi rumu ai."

26 Paileti sigbasinu be Barabasi. Nga o pniarnu Jizosi nhne, o gweru a nyewhete be ma be kpogidne a n'ogba.

*Ele ọgwu kpariri Jizosi**(Mak 15:16-20; Jɔn 19:2,3)*

27 Ele ọgwu nye ọchichi duru Jizosi zne n'obna ele ọgwu hne kpakara odobiri ele ọgwu gbaru a gburugburu.

28 Be tuma a iwo a, wosi a iwo ihie ihie.

29 Be kpa okpu igwnu, kpusi a nu risi, nyee a mkpara n'akarikwnunga, gbnun a mpnerne ọchi nu ruwhnu a, kpari a, be kaa, "A bekwulem ji, Eze ele Ju."

30 Be gbua a onu-mini, gweru mkpara wam neeli a nu risi.

31 Nga be kparikworu a, be tuma a iwo wam, wosi a kpakara iwo a, duru a zne ma be kpogidne a n'ogba.

*Be kpogidnenu**Jizosi n'ogba**(Mak 15:21-32; Luk 23:26-43; Jɔn 19:17-27)*

32 Nga be whuyaru, be whnurnu otu nwerukna Sirini, rewhna a bu Saimoni, be sigidne a ma o vuru ogba a sno be.

33 Nga be vaduru hne be kwu Golugota, ke bu "Hne Okpokoro Risi,"

34 be nyee Jizosi manya be gwaru nhne lu nlulu. Kọvu nga Jizosi raturu a riro, o kwéle o nwọ a.

* 27:17 Barabasi: Agwna ọkwukwo kwuru Jizosi Barabasi

35 Be kpogidne a n'ogba, ele ogwnu ke iwo a n'esilawuru be nga be vukworu ogbanuchi. †

36 Be daziri eli neese a.

37 Be bitaru n'olu risi a nhne be bnornu a, "Ka bu Jizosi, Eze ele Ju."

38 Be kpogidneru ele buznu lawuru nu Jizosi n'olu ogba, otu badnu n'akarikwunga a, nye ke berere n'akarita a.

39 Ele naagawhe naakaja a, neewhnuwhne risi,

40 be kaa, "Ji nye naakwnadna Oro Nso Chiokike, wu a n'obochi eto, znohia ehni i. O buru nu i bu Nnwọ Chiokike, hi n'olu ogba hiedna."

41 O bu masi kpa ele risi ariohna nu ele zni iwu nu ele okno badnu naakpari a.

42 Be kaa, "O znohiaru ele berere, kovu o nwée rikne znohia ehni a, o bu eze Izireli, o hi n'olu ogba hiedna kitna, a jeekweru nu a.

43 O tukwasiri Chiokike mkpoma, o znohia a kitna, o buru nu o masiri a, kwnornu nu o karu, 'M bu m Nnwọ Chiokike.' "

44 O bu masi kpa ele buznu wam be kpogidneru be nu Jizosi n'olu ogba zi masi naakpari a.

Enwu Jizosi

(Mak 15:33-41; Luk 23:44-49; Jon 19:28-30)

45 Hite n'esilawuru iwhnehnie,‡ ochichiri gbasnirni kpakara eli wam du n'otnu-ige ke eto. §

46 N'otnu-ige ke eto, Jizosi jiri okne nkoli siwama, kaa, "Eloi, Eloi, lama sabatani," ke bu, "Chiokike m, Chiokike m, kini mernu i ghasaru m?"

47 Agwna ele gwuzo ndundu nurnu a, be kaa, "O noosukwu Elaija."

48 Ngangam, otu badnu gba eso gweru sponji gbajite a nu manya gbaru oka, tukwasi a n'olu isisi, nyee a ma o nwọ.

49 Ele berere kaa, "Gharu a, a lesi ma Elaija jaava o znohia a."

50 Nga Jizosi jiri okne nkoli si okokoba berere, o nwebime inwe.

51 Ige wam ikpe obnosni ke Oro Nso Chiokike gbawaru ibekala lawuru hite n'olu du n'eli. Eli otne enye dnarnu, agida rugwu gbawaru.

52 Ilii kpmernu, agida ele hiri n'enu lizo,

53 be whuya nu rime ilili. Nga Jizosi hiri n'enu lizo, be bnazne nu rime eli-ohna nso, gesi agida ele badnu ehni be.

54 Nga nye neechi otu riwhu ele ogwnu nu ele ogwnu a zi neese Jizosi whnurnu eli otne enye nu kpakara nhne mernu, be tu ogwnu k'agida, be kaa, "N'ezi, nyerukna ka buri Nnwọ Chiokike."

55 Agida ele rinya zi masi hne zi ikere neelekiri, ele hi nu Galili snornu Jizosi va, neeznenu a izi.

56 N'esilawuru be bu Meri Magidalini, nu Meri nne Jemisi nu Josefu, nu nne rumu Zebidi.

Be liri Jizosi

(Mak 15:42-47; Luk 23:50-56; Jon 19:38-42)

57 Nga ogbednachi, otu nye eze be kwu Josefu, nye Arimatiya, nye sno apna Jizosi,

58 znekwnusiri Paleti, rjo a iznu Jizosi. Paleti nyernu iwu be vute a iznu Jizosi.

† 27:35 Agwna okwukwo kwuru: *Be mernu ka ma nhne be kwuru hite n'onu nye owhnurninya mezu, "Be keru iwo m n'esilawuru be, gweru iwo m vu ogbanuchi."* ‡ 27:45 n'esilawuru iwhnehnie: okwukwo ke mbom kwuru ige awa isunu

§ 27:45 otu-ige ke eto: okwukwo ke mbom kwuru ige awa tolu

⁵⁹ Josefu vuru iznu wam, whu a n'ikpe abochna marnu mma,

⁶⁰ zne lite a nu rime ilili ikne ke aka a, ke o gwuwaru nu rime rugwu. O vuru otu rugwu hna ezi kpusni onu-mgbo ilili wam.

⁶¹ Meri Magidalini nu Meri kiyari zi ndundu, kete ruwhnu n'ilili wam.

⁶² N'ekile a, ke bu obochi ke sno obochi ojiknenu, ele risi ariohna, nu ele Farisi gbakoru znekwnusi Paleti,

⁶³ kaa, "Nda-ai-kwu, a chenwanyarnu nu nye nduwu wam karu nga o zi budnu, 'Nga obochi eto whemenu, m jeehi n'enwu lizo.'

⁶⁴ Kam kpayaru, nyee iwu ma be mesni ilili wam rikne du obochi eto, ma ele sno apna a gharu o znurnu a n'abali, kanu ele badnu nu o hiri n'enwu lizo. Aghalaghala ke ipne-aznu jaakakwo ke mbom."

⁶⁵ Paleti kanu be, "Anu zne, gweru ele ogwnu, be se, anu mesni ilili wam rikne kpa anu nwernu rikne o mee a."

⁶⁶ Be zne, mesni ilili rikne, kasu ilili a akara n'olu akaworugwu, bita masi ele nse.

28

Jizosi lizoru n'enwu

(Mak 16:1-10; Luk 24:1-12; Jon 20:1-10)

¹ Nga Obochi Ozukwa Inwe whemenu, nga chi noobo n'obochi mbom n'ikwezu, Meri Magidalini, nu Meri kiyari varu lekasi ilili.

² Ngangam, eli tneru enye, enine izi Nyenwe ai hiri n'oligwe hiedna, vume akaworugwu wam, daziri eli n'olu a.

³ Ruwhnu a nu lele amuma, iwo a naachna lele mkpuru-mini.

⁴ Ogwnu turu ele nse wam, be ma ririri dna n'eli lele ele nwurnu onwu.

⁵ Enine izi wam kanu ele rinya wam, "Ogwnu tu anu, m maam nu anu noopio Jizosi, nye be kpogidneru n'ogba.

⁶ O zila hna, kwnornu nu o hilem n'enwu lizo, lele kpa o kwuru. Anu va whnu hne be liru a.

⁷ Anu zne wara wara kanu ele sno apna a, nu o hilem n'enwu lizo, o belem anu osno neezne Galili, anu jowhnu a pli. Le, m bele m osno kanu anu."

⁸ Be gweru eso, gweru izne hi n'ilili wam gbawhu, be notu ogwnu, mkpoma noso masi be n'onu k'agida. Be zne kanu ele sno apna a.

⁹ Jizosi kwnusiri be kpa be neezne n'apna, o kanu be, "M bekwulem anu." Be bna a n'ochi lawuru, kponu a risi eli.

¹⁰ Jizosi kanu be, "Ogwnu tuko anu, anu zne kanu rumu nda m, be zne Galili, o hne be jowhnu m."

Otnutnu ele nse

¹¹ Kpa ele rinya wam naala, agwna ele ogwnu wam neese ilili znernu n'elionna kanu ele risi ariohna kpakara nhne mernu.

¹² Ele risi ariohna nu ele okno badnu gba iznuznu, be kwu be agida iwai.

¹³ Be kaa, "Anu kaa, 'Ele sno apna a varu n'abali nga a neezni anyarna znurnu iznu a.'

¹⁴ O buru nu nye neechi echi nu a, a jeeme o kweru nu ikpe mana anu, anu jabna nu mmekpehni."

¹⁵ Ele ogwnu wam gweru iwai wam mee nhne ele risi ariohna nu ele okno badnu karu be mee. Be wheke otnutnu ka kpakara n'esilawuru ele Ju du tna.

Jizosi mernu ele sno apna a

whnu a anya

(Mak 16:14-18; Luk 24:36-49; Jon 20:19-23; Eru 1:6-8)

¹⁶ Ele sno apna a nri nū otu wam zne nū Galili n'olu rugwu lele kpa Jizōsi kanū be.

¹⁷ Nga be whnūrnu a, be kpōnu a risi ẹli, kōvu agwna be nwernu mkpōma lawuru.

¹⁸ Jizōsi vakwnusi be, kaa, “Be nyernu m kpakara rikne ke zị n'oligwe ma n'owa.

¹⁹ Anū zne nū kpakara ọwa mee ele badnū be bụru ele sno apna m, nọowu be mini nū rewhna ke Nda, nū ke Nnwọ nū ke Enine Nsọ.

²⁰ Anū zni be bịta kpakara nhne me nyernu anū n'iwu. N'ezi, me nū anū zị kpakara ige dū ọkwukokwnu.”

**Izi ɔma lele kpa
Makı
gbaru a n'okwukwo
Nhne gbasiri okwukwo ka**

Izi ɔma lele kpa Makı gbaru a n'okwukwo jiri mkpuru ɔka ka panizo, "Opanizo izi ɔma Jizosi Karaısi, Nnwɔ Chiokike." Makı gesiri nı Jizosi bı badnı ke nɔornu ɛrnı ndu-ɛhni nı nye nwernu rikne. Iknerne ma a whıyarı iwhne nı nhne o znirni, nı rikne megidne rɛnwu ojo, nı rikne ɔ gbaru ele badnı mmehie. Jizosi kwuru ɛhni a Nnwɔ ke Badnı, nye varı o gweru bıdnı a nyee ma ɔ dɔhia ele badnı hite nı mmehie be.

Makı gbaru nhne Jizosi mernu karı ikwu-ɔnu o kwuru nı nhne o znirni. O gbaru nhne matı gbasiri Joni Nye Wı Mini, ɔwuwu mini a, nı ɔrnurnı Jizosi. O znernu nı ruwhnu kwu nhne gbasiri ele sno apna Jizosi nı ele irno a. N'ipne-aznı okwukwo a, o kwuru gbasiri ɛnwu Jizosi nı olizɔ n'ɛnwu a.

Nhne zi n'okwukwo ka

Opanizo izi ɔma (1:1-13)

Ernu Jizosi nı rime Galili (1:14--9:50)

Jizosi znirni nhne rnı ɛrnı ndu-ɛhni nı Judiya (10:1-52)

Hite nı Galili dı Jeruselem (11:1--15:47)

Olizɔ n'ɛnwu Jizosi (16:1-8)

Jizosi gesiri ɛhni a, mekwu lahna oligwe (16:9-20)

Nye gbaru okwukwo ka: Makı

Risi nhne o kwono gba a: O gesi nı Jizosi bı Nnwɔ Chiokike, hite nı ɛrnı ndu-ɛhni a.

Ikwu-ɔnu Joni

Nye Wı Mini

(Mat 3:1-12; Luk 3:1-18; Jon 1:19-28)

¹ Opanizo izi ɔma Jizosi Karaısi, Nnwɔ Chiokike.

² Lele kpa Azaya nye ɔwhnurninya gbaru a n'okwukwo, Chiokike karı,

"Bno nsni, le, m neezizne nye izi m nı ruwhnu i, nye jeemekwata apna i.

³ Akpıri otu badnı nɔokpo okwo n'eli-ikpa, naakaa, 'Anı mekwata apna Nyenwe aı, anı mee ma apna a snıri ası.' "

⁴ Joni Nye Wı Mini bı nye wam whıyarı iwhne n'eli-ikpa nɔokpo okwo naakaa ele badnı tuhna ma mkpoma ma be wı be mini, ma Chiokike gbaru ele mmehie.

⁵ Kpakara ele zi nı mgbu Judiya nı eli Jeruselem whɔkwunsi a. O wı be mini n'Osimini Jodani, be nookwuhı mmehie be.

⁶ Joni wogwu iwo rijni akpıko anɔhia be kwu kameli. Ajni ɔ snı n'ikwunı bı akpıko anɔhia. Wiri a bı igwurube nı mɔno ebeka ɔhia.

⁷ O nɔokpo okwo naakaa, "Nye kakwo m rikne vawa n'aznı m, nye me kwesile o whudnahie eli tɔma eriri okoro-ɔchi a lawuru.

⁸ M ji m mini wı anı mini, kɔvu nı nye wam jeeji Enine Nsɔ nɔowu anı mini."

Qwuwu mini Jizosi
nụ Ornurna a

(Mat 3:13—4:11; Luk 3:21,22; 4:1-13)

⁹ N'ige wam, Jizosi hiri nụ Nazareti ke zị n'eli Galili va, Jōni wụ a mini nụ rime Osimini Jodani.

¹⁰ Ngangam Jizosi hiri nụ mini nọowhuya, ọ whnụrnu oligwe hne o kpumernu, ọ whnụ Enine Nsọ hne o neewhekwasị a lele nduru.

¹¹ Otu akpịri hiri n'oligwe kaa, “Ji bụ Nnwọ m me whnụrnu n'anya, nhne i masiri m.”

¹² Ngangam Enine Nsọ wam duru a bna ẹli-ikpa.

¹³ O zị n'eli-ikpa nri obochi ẹno. Ekwensu naarna a ornurna, ya nụ rụmu anọhia zị. Kọwu nụ ele enine izi neeznenu a izi.

Jizosi sukwuru ele
noogbu aznu

(Mat 4:12-22; Luk 4:14,15; 5:1-11)

¹⁴ Nga be yisiri Jōni n'ikelu, Jizosi znernu Galili neezni izi oma Chiokike gweyarụ.

¹⁵ O naakaa, “Ige zulem, ẹli-eze Chiokike zị ndundu, anụ tūhnasna mkpọma kweru izi oma.”

¹⁶ Nga o znernu nụ ngeri Osimini Galili, ọ whnụ Sajmoni nụ Anduru nwene a rukna hne be zị nọowu igbo nụ rime osimini, kwnornu nụ be bụ ele noogbu aznu.

¹⁷ Jizosi kanụ be, “Anụ va sno m n'aznụ, m jeeme anụ bụru ele jọokwnuhia ele badnụ lele kpa anụ noogbu aznụ.”

¹⁸ Ngangam be sigbasi igbo be, sno a.

¹⁹ O zne nụ ruwhnu matị, ọ whnụ Jemisi nnwọ Zebidi nụ Jōni nwene a rukna zị n'ogbo berere, neemekwata igbo be.

²⁰ O sukwu be, ngangam be gharụ Zebidi nda be n'ogbo, ya nụ ele be gnornu ẹnu, snornu a.

Jizosi chihalaru
renwu ojo

(Luk 4:31-37)

²¹ Be nụ Jizosi zne n'eli-ohna Kapanom bna n'oro ogbako ele Ju n'Obochi Ozukwa Inwe neezni nhne.

²² Nhne o neezni duru be ẹhni, kwnornu nụ o znirni nhne lele nye nwernu rikne, ọ bụo lele ele zni iwu ele Ju.

²³ Otu nwerukna renwu ojo nwugwu bnanyarnụ nụ rime oro ogbako be, siwama,

²⁴ “Kini bụ nhne aị nụ ji nwekọgwu, Jizosi nye Nazareti? I varu ma i gbumekwo aị? M maam nye i bụ, i bụ nye nsọ ke Chiokike.”

²⁵ Jizosi bigbọru a, kaa, “Kpusnime onu i, hi nụ rime a whuya.”

²⁶ Renwu ojo wam dọsiri a rikne. O gweru okne nkọli si okokoba, hi nụ rime a whuya.

²⁷ O duru kpakara be ẹhni ke mernu be bete neesikwarita ẹhni be, “Ka bụ kịni? O bụ o zni nhne ikne sa? O nwernu rikne ke o ji nọtunu renwu ojo oka, be bnotenu a nsni.”

²⁸ Be tñsị otnutnu a nụ kpakara ẹli Galili.

Jizosi gworu ele nriria
(Mat 8:14-17; Luk 4:38-41)

²⁹ Nga Jizosi hiri n'oro ogbako ele Ju wam whuya, ya nụ Jemisi nụ Jōni, be bna n'oro Sajmoni nụ Anduru.

³⁰ Ige wam nne nnwerne Saımoni dnanyi naarija ęhni orne bękwnu, ngangam be kanu Jizosi nhne gbasiri nwerinya wam.

³¹ O znekwnusi a, jiri a n'aka, dọlizo a olu. Ngangam ęhni orne bękwnu wam sigbasi a, o bete neeznenu be izi.

³² N'ogbednachi, nga ęhnam dnarnu, be kwuyanụ Jizosi kpakara ele nriria, nu ele renwu ojo nwugwu.

³³ Kpakara ele zi n'eli wam gbakoru n'onu-mgbo neelekiri.

³⁴ O gworu agida ele nriria zi odo n'odo, o chimarnu agida renwu ojo. O kwéle renwu ojo kwu oka, kwnornu nu be magwu nye o bu.

Jizosi znirni izi oma

nu Galili

(Luk 4:42-44)

³⁵ N'onu osisi, nga chi yobochnage, o lizo zne hne koru owu, neekpe okpukpe.

³⁶ Saımoni nu ele ya nu be zi noopio a.

³⁷ Nga be piohıaru a, be kanu a, "Kpakara ele badnu noopio i."

³⁸ Kovu Jizosi kanu be, "A jeezne n'eli ele ke berere ma m zni m be izi oma, kwnornu ka bu nhne me kwnornu va."

³⁹ O zne nu rime kpakara oro ogbako ele Ju zi nu kpakara Galili neezni izi oma, chihala masi renwu ojo.

Jizosi gworu nye nchnichna

(Mat 8:1-4; Luk 5:12-16)

⁴⁰ Otu nye naarija nchnichna vakwnusiri a, riasno a, gbunu a mpnerne ochi, kaa, "O buru nu i pioru, i nwernu rikne mee m ziri richna."

⁴¹ Jizosi donu a obirizi, dosnima aka a, kpatu a, kaa, "M pioru m, ziri richna."

⁴² Ngangam be gworu a nchnichna wam, o ziri richna.

⁴³ Jizosi doru a aka nu nsnı k'agida chihala a.

⁴⁴ O kanu a, "O za nye obula i kanu, kovu la, gweru ęhni i gesi nye okwa arıohna, gweru masi nhne Mozizi nyernu n'iwu kwa arıohna ma o buru nhne akebe nyee be nu i zi richna."

⁴⁵ Kovu o whogaru bete notnunu ele badnu, neewheke oka wam, ke kpahıaru nu Jizosi nwema rikne berere o bna nu rime eli-ohna hne ele badnu jowhnu a, kovu o znernu hne koru owu, ele badnu neehi penupe obula naavakwnusi a.

2

Jizosi gworu nye ęhni a

donwurnu donwu

(Mat 9:1-8; Luk 5:17-26)

¹ Nga Jizosi lahnarnu n'eli Kapanom, kpa obochi ele nu ele whemernu, agida ele badnu nurnu nu o zi n'oro.

² Agida ele badnu varu jipiya kpa o zima oghere zi, ma n'onu-mgbo. O zi masi nookwunu be ikwu-onu Chiokike.

³ Be vakwnusi a, vyanu a otu nye ngeri ęhni a donwurnu donwu, badnu ęno vu a.

⁴ Nga be nwee rikne du a ęhni kwnornu nu agida ele badnu wam, be koma olu oro hne o zi. Nga be dokamarnu a, be vudna okpata ke nye ngeri ęhni a wam donwurnu donwu danyi.

⁵ Nga Jizosi whnurnu okwnata ovu be, o kanu nye wam ngeri ęhni a nwurnu onwu, "Nnwọ m, be gbarunam ji kpakara mmehie i."

⁶ Kovu nu agwna ele zni iwu ele Ju dazi eli pji, zi nesikwa nu mkpoma be,

7 “Kini mernu nwerukna ka jiri kwu oka kpa? O kwululem Chiokike. Ndaa nye nweru rikne o gbaru mmehie hne o buo Chiokike kpoi?”

8 Ngangam, Jizosi mahiaru nu rime enine a nu be zi naari oka wam nu rime mkpoma be, o sika be, “Kini kphiaru anu naari ori ka nu mkpoma anu?”

9 Ndaa ke zi ewheke, o kanu nye ngeri ehni a donwurnu odonwu, ‘Be gbarunam ji kpakara mmehie i,’ mabu o kaa, ‘Lizo, chiri etere i, zne izne.’

10 M pioru m anu mahia nu Nnwọ ke Badnu nweru rikne n'owa o gbaru mmehie.” Jizosi kanu nye wam ngeri ehni a donwurnu odonwu,

11 “M ka m ji, lizo, chiri etere i, la oro i.”

12 Ngangam, o lizo, chiri etere a, whoga nu ruwhnu kpakara be, o du kpakara be ehni, be znarni Chiokike, naakaa, “A whnulele nhne nu kpa.”

Jizosi sukwuru Livaị

(Mat 9:9-13; Luk 5:27-32)

13 Jizosi whoga kwno berere nu ngeri Osimini Galili, agida ele badnu vakwnusiri a. O bete neezni be nhne.

14 Nga o neewhe, o whnu Livaị nnwọ Alifayosi, hne o dazi n'oro ntụ. O kanu a, “Sno m.” O lizo snornu a.

15 O du nga Jizosi dazi neeri wiri n'oro Livaị, agida ele ona ntụ nu ele mmehie snornu Jizosi nu ele sno apna a neeri wiri. Ige wam, ele sno a zi agida.

16 Nga ele zni iwu ele ju ele bu ele Farisi whnurnu nu ele mmehie nu ele ona ntụ sno a neeri wiri, be sika ele sno apna a, “Kini mernu o noosole ele ona ntụ nu ele mmehie neeri wiri?”

17 Nga Jizosi nurnu a, o kanu be, “Mkpa dibia ziko naakpa ele ehni buru oma, okwolem ele nriria. M vage m o sukwu ele oma, okwolem ele mmehie.”

Ajji gbasiri ovu onu

(Mat 9:14-17; Luk 5:33-39)

18 O du nga ele sno Joni nu ele Farisi noovu onu, agwna ele badnu vakwnusi Jizosi sika a, “Kini mernu ele sno Joni nu ele sno ele Farisi noovu onu, kovu ele sno apna i za noovu onu.”

19 Jizosi saru be, “Ele varu hne be nolu nnwerne ikne be joovu onu hne nyerukna wam nolu nnwerne ikne nu be zi? Kpakara ige ke be nu nye nolu nnwerne ikne zi, be jovu onu.

20 Kovu obochi vawa nga be jaanahoru be nye nolu nnwerne ikne. Obochi wam be joovu onu.

21 “O za nye jeegweru mkpekele ikpe ikne dnusi n'iwo oknani. O mene kpm, iwo ke ikne jodokahala nhne n'ehni ke oknani. O jodoka ke kakwo agida.

22 O zi masi nye jeegweru manya ikne gbasị n'olori akpukpo oknani. O mene kpm, manya wam jaagbawama, manya nu olori akpukpo whume etekne. Kovu be gbasị manya ikne n'olori akpukpo ikne.”

Ajji gbasiri

Obochi Ozukwa Inwe

(Mat 12:1-8; Luk 6:1-5)

23 O du n'otu Obochi Ozukwa Inwe, Jizosi nu ele sno apna a naagawhe n'esilawuru ekwu ikpa. Ele sno apna a bete o ghọ ikpa kpa be zezne.

24 Ele Farisi kanu a, “Le, kini mernu be neeme nhne kwesile o mee n'Obochi Ozukwa Inwe?”

25 Jizosi saru be, “Anu gwnuna nhne Devidi mernu nga o zi nu mmekpehni, nga wiri gwnurnu a, ya nu ele snogwu a?”

26 O bnaznenu n'oro nsọ Chiokike, nga Abjata bu nye risi ariohna, o ri brędi be bitaru nu ruwhnu Chiokike ke kwęsile n'iwu o ri, okwolem ele ọkwa ariohna bu ele kwesiri n'iwu o ri a, o nyee masi ele nu ya snogwu.”

27 O kanu be, “Chiokike mernu Ọbochi Ozukwa Inwe kwnornu badnu, be męne badnu kwnornu Ọbochi Ozukwa Inwe.

28 O nhne kphariu Nnwọ ke Badnu jiri buru masi Nyenwe Ọbochi Ozukwa Inwe.”

3

Nyerukna aka

dęnwurnu ọdonwu

(Mat 12:9-14; Luk 6:6-11)

1 Jizosi bna kwno berere n'oro ọgbako ele Ju, otu nwerukna aka dęnwurnu ọdonwu zi pi.

2 Ele Farisi zi neese a, ma ọ jęogwo a n'Ọbochi Ozukwa Inwe, ma be bno a nhne.

3 O kanu nyerukna wam aka a dęnwurnu ọdonwu, “Lizọ, gwuzoru nu ruwhnu kpakara ele badnu.”

4 O sika be, “O buru ọma n'iwu o mee nhne ọma, mọbu o mee nhne buọ ọma n'Ọbochi Ozukwa Inwe? O znọhia budnu mọbu o gbụ ọgbu?”

Kwu be nyasimernu bidim.

5 Nga o lekparu anya ngaramanga o we ęhni, o nwe ovu ojo kwnornu nu mkpọma ojo be. O kanu nyerukna wam, “Dọsnima aka i.” O dọsnima aka a, aka a buru ọma lele kpa ọ zi nu mbom.

6 Ele Farisi whọga, ngangam be nu ele dagwu nu Erọdu zne gbagidne a izuznu, kpa be joogbu a.

Agida ele badnu

snornu Jizosi

7 Jizosi nu ele sno apna a whọgaru zne ngeri Osimini Galili. Agida ele badnu hi n'ęli Galili snornu a, ma ele hi nu Judiya,

8 ma ele hi n'ęli Jeruselem, nu ęli Idumiya, ma n'ọbosi ęhnam ke Osimini Jodani nu gburugburu Taya nu Saidoni, vakwnusiri Jizosi nga be nurnu kpakara nhne o mernu.

9 O kanu ele sno apna a be mee kpa otu ọgbo matị jaaziri a ndundu kwnornu agida ele badnu wam, ọ zi be kpagbu a.

10 Ige wam, Jizosi gwọru agida ele nriria, ke kphariu agida ele nriria ojo zi ọdo n'ọdo nọokpu n'ęhni a ma be kpatu a aka.

11 Nga ọbula ele renwu ojo whnurnu a, be dna n'ęli nu ruwhnu a, siwama, kaa, “Jiwa bu Nnwọ Chiokike.”

12 Jizosi do be aka nu nsni be meko ele badnu mahia nye ọ bu.

Jizosi hęruru nri nu

badnu lawuru ele izi

(Mat 10:1-4; Luk 6:12-16)

13 Jizosi pnezne n'olu rugwu, sukwu ele o pioru. Be znekwnusi a.

14 O hęru ele rukna nri nu ębo ma ya nu be daziri, kwu be ele izi, ma o zihala be zne kpọ okwo izi ọma,

15 o nyernu be rikne ọ chihala renwu ojo.

16 Ka bu nri nu badnu lawuru wam ọ hęruru, Sajmoni, nye Jizosi jiri rewhna Pita,

17 nū Jemisi nnwọ Zebidi, nū Jōni nwene Jemisi, ọ jì kwno be rẹwhna Banajisi, ke bụ rụmu egbe oligwe,

18 nū Anduru, nū Filipu, nū Batolomi, nū Matiyu, nū Tọmosi, nū Jemisi nnwọ Alifayosi, nū Tadiyosi nū Saịmoni nye zị n'esilawuru ele noonwu bẹkwnu nū mkpọma,

19 nū Judasị Isikarioti, nye reru a.

Jizọsi nū Bẹlizibolu

(Mat 12:22-32; Luk 11:14-23; 12:10)

20 Jizọsi bna n'otu ọro, agida ele badnụ jipiya kwno berere, ke kpayarụ o nwée oghere ri wiri.

21 Nga rụmu nne a nūrmu a, be whọga ma be nwụgwu a, kwnornu nū be karụ, “Mkpọma a zúle ozu.”

22 Agwna ele zni iwu ele Ju hiri nū Jeruselem va, kaa, “O nwernu Bẹlizibolu, o ji rikne nye risi rẹnwu ojo naachihala rẹnwu ojo.”

23 Jizọsi sukwukọta be, tñunu be elulu zị ọdo n'ọdo, “Setani ọ jaachihala Setani?”

24 Ọ bụru nū ẹli-eze kewama megidne ẹhni a, ẹli-eze wam jóogwuzoli.

25 Ọ bụru masị nū ezi-nụ-ọro kewama megidne ẹhni a, ezi-nụ-ọro wam jóogwuzoli.

26 Ọ bụru masị nū Setani lizọru megidne ẹhni a, kewama, o jóogwuzoli, ẹnwu a valẹm.

27 “Ọ zá nye jaabnali n'ọro nye dikne, naahọru a kpakara nhne a, ọ bụru nū o béle ọsno kne dikne wam eriri. Ige wam o jeenwe rikne naahọru a nhne zị n'ọro a.

28 “Owe! M naakanụ anụ ezi ọka, Chiokike jaagbarunu rụmu badnụ kpakara aruru-ẹli be ruru nū ọka ojo be nookwu,

29 Kọvu nye ọbula ke kwuru kwugidne Enine Nsọ jéenwe ọgbarunu tim tọm. Kwnornu nū nye wam rulam aruru-ẹli nwée ọgbarunu ọkwnukokwnu.”

30 Jizọsi kwuru ka kwnornu nū be naakaa nū o nwernu rẹnwu ojo.

Nne Jizọsi nū rụmu nne a

(Mat 12:46-50; Luk 8:19-21)

31 Nne Jizọsi nū rụmu nne a varụ, be gwuzoru n'ederezi, ziznenu a izi, noosukwu a.

32 Agida ele badnụ wam zị a gburugburu kanụ a, “Le, nne i nū rụmu nne i zị n'ederezi noopio i.”

33 Jizọsi sịkwaru be, “Nyele bụ nne m nū rụmu nne m?”

34 O lehnata anya ele dazị a gburugburu, kanụ be, “Anụ le nne m nū rụmu nne m.

35 Nye ọbula ke neeme nhne Chiokike noopio, nye wam bụ nwene m rukna nū nwene m rinya nū nne m.”

4

Elulu nye ogha mkpuru

(Mat 13:1-9; Luk 8:4-6)

1 Jizọsi panizo neezni kwno nhne nū ngeri osimini. Agida ele badnụ jihiaru hne ọ zị, ke kpayarụ ọ bnazne n'ogbo, daziri ẹli. Kpakara igbudu badnụ wam gwuzoru nū mkpomkpo ẹli.

2 O ji elulu neezni be agida nhne zị ọdo n'ọdo. Nū nhne o neezni, ọ kaa,

3 “Anụ bnote nsni, otu nye ẹrnu ẹkwu znernu agha mkpuru.

⁴ O dü nga o naagha mkpuru, agwna mkpuru dnarnu nu ngeri apna. Rumu onunu tuturu be ta.

⁵ Agwna mkpuru dnarnu n'eli rugwu hne be nwée agida rizna, ngangam mkpuru wam fuhjaru, kwnornu nu be nwée agida rizna.

⁶ Kovu nga ehnam wasiri, be chnanwu, kwnornu nu be nwée egwnugwnu.

⁷ Agwna mkpuru berere dnarnu n'esilawuru igwnu, igwnu wam sohja, kpagbu a, o minyage mkpuru.

⁸ Agwna mkpuru berere dnarnu n'eli buru oma, fuhja, nooso, naaba, mihia nri mkpuru eto, berere nri isunu, berere otu riwhu."

⁹ O kanu be, "Nye nwernu nsnı o ji o nu nhne, o nurnu."

Nhne o kwno tnu elulu

(Mat 13:10-17; Luk 8:9,10)

¹⁰ Nga Jizosi nu ele sno apna a nri nu badnu lawuru wam zi, nu agwna ele berere, be sikwaru a nhne gbasiri agida elulu.

¹¹ O kanu be, "Be mernu anu mahja nhne tugwaru otugwa ke eli-eze Chiokike, kovu ele zi n'ederezi, be naakanu be kpakara nhne n'elulu,

¹² ma

'Be neele anya kpoi, gharu o whnu,
 nonu nu nsnı, gharu o ghohia,
 o zi be tuhna na mkpoma hne Chiokike zi,
 nwehia ogbaru.'"

Risi elulu nye

ogha mkpuru wam

(Mat 13:18-23; Luk 8:11-15)

¹³ Jizosi sikwa be, "Anu ghohiage elulu ka? Ndaa kpa anu jeeji ghohia kpakara elulu?"

¹⁴ Nye ernu ekwu naagha mkpuru ghasiri ikwu-onu Chiokike.

¹⁵ Mkpuru ele ke dnarnu nu ngeri apna nu lele ele ke nurnu ikwu-onu wam, kovu nga be nurnu a, ngangam Ekwensu varu gweme oka wam nu mkpoma.

¹⁶ Mkpuru ke be ghasiri nu hne rugwu zi nu lele ele ke nurnu ikwu-onu wam, ngangam be gweru snarnima gweru a.

¹⁷ Kovu nu be nwée egwnugwnu, be dazi ige mati, omekwo, nga mmekpehni mōbu awhnūwhnu varu kwnornu nu ikwu-onu wam, ngangam be dnahnala aznu.

¹⁸ Mkpuru ke be ghasiri n'esilawuru igwnu nu lele ele ke nurnu ikwu-onu wam,

¹⁹ kovu mmekpehni ke owa ka, nu aghigho o whnu ekwnu n'anya, nu nkoli ke nhne berere, bnanyarnu, kpagbu ikwu-onu wam. O ghō nhne mina mkpuru.

²⁰ Mkpuru ke be ghasiri n'eli buru oma nu lele ele ke nurnu ikwu-onu wam, be narnu a, o mipiya nri mkpuru eto, berere nri isunu, berere otu riwhu."

Elulu tonji n'olu ikpechi

(Luk 8:16-18)

²¹ Jizosi kanu be, "Anu neegweya tonji bita a nu mkpururu nkita, mōbu nu mkpururu okpata? O buo n'olu nhne be bita tonji?"

²² Kwnornu nu o za nhne be bigwaru abigwa, ke be jeeme o whuya iwhne, be jookpume kpakara nhne be kpusnirni okpusni.

²³ O buru nu nye nwernu nsnı o ji o nu nhne, o nurnu."

²⁴ O kanu be, "Anu bnote nsnı nkarı nkarı nhne anu nonu. Nhne anu jiri tunu nye berere bu nhne be jeeji tunu anu, be jeenye anu karukwo.

²⁵ Nye nwernu nhne bu nye be jeenye, nye nwée, be jaanahọru a, ọ bụbedi ke o nwernu.”

Elulu mkpuru nooso oso

²⁶ Jizọsi kaa, “Eli-eze Chiokike nụ lele nga badnụ kpasiri mkpuru n'eli.

²⁷ O zni anyarna n'abalị tnenya n'iwhnehnie, mkpuru wam fuhia, nooso, nye wam maa kpa o ji neeme kpan.

²⁸ Eli nụ nsununu a neeme isisi nooso, naamihia mkpuru, ke mbom, o fuhia, omekwo igwugwere, omekwo ikpa karu aka ke hi n'igwugwere.

²⁹ Kọvu nga ikpa wam karu, ngangam, o gweru ama bete o gbu ikpa kwnornu n'ige o gwe nhne n'ekwu dulam.”

Mkpuru mọsitadi

(Mat 13:31,32,34; Luk 13:18,19)

³⁰ Jizọsi kaa, “A jeeji kini gbu esni eli-eze Chiokike? Mọbu ndaa kpa a jeeji nootnu elulu a?

³¹ O nụ lele mkpuru isisi be kwu mọsitadi, ke, nga be kpasiri a n'eli, ọ bu mkpuru isisi zị matị kakwo kpakara mkpuru n'owa.

³² Kọvu nga be kpasiri a, o sohia buru nhne kakwo kpakara nhne be kpasiri n'eli, wahia agida nkala hna ezi, ke mernu onunu nọornu alikwu nụ mkpururu idno a.”

³³ Jizọsi jiri agida elulu nụ kpa nookwunu be ikwu-onu Chiokike, lele kpa be jonuli.

³⁴ O kwugene be ikwu-onu hne o jile elulu. Kọvu nga ya nụ ele sno apna a kpoi daziri, ọ kọwanu be risi kpakara elulu ka.

Jizọsi bigboru

ruwhere osimini

(Mat 8:23-27; Luk 8:22-25)

³⁵ O duru n'ogbednachi, ọ kanu ele sno apna a, “Ngwa ma a whe aka osimini kiyari.”

³⁶ Nga be whogaru n'igbudu badnụ wam, be bnakwnusi Jizọsi n'ogbo ke ọ zị, be nụ ya snornu. Ogbo ele ke berere sno be.

³⁷ Okne abaka-mini lizo, mini nọowubna nụ rime ogbo wam, ke kpahiaru mini jihia n'ogbo wam.

³⁸ Kọvu nụ Jizọsi zị n'aznụ ogbo neezni anyarna n'olu nhne oche-risi. Be kpatnanya a, kanu a, “Nye-zni-nhne, ọ gbásila i nụ a noowhu sa?”

³⁹ O tnenya, bigbo ruwhere, kanu okne osimini, “Udno! Daziri bii.” Ruwhere whebiri, ohna dna bii.

⁴⁰ Jizọsi kanu be, “Kini mernu anu nọtou ogwnu? O bu nụ anu nwée okwnata mkpoma sa?”

⁴¹ Be turu ogwnu k'agida, be nęesikwarita ehni be, “Nye ka bu nyele? Ke ruwhere nụ okne osimini noobnotenu nsni?”

5

Jizọsi gwọru nye

renwu ojo nwugwu

(Mat 8:28-34; Luk 8:26-39)

¹ Jizọsi nụ ele sno apna a vadu ngeri Osimini Galili kiyari, n'eli ele Gerasa.

² Nga o hiri n'ogbo whuya, otu nyerukna renwu ojo nwugwu hiri nụ hne be li iznu kwnusi a.

³ O wu nụ hne be li iznu, ọ zima nye nwernu rikne tu a ijigba,

4 kwnornu nı be tısilam a ijigba nı nhne ikelu agıda ige, o gbajikwo ijigba, lijkwo nhne ikelu be tıgwu a. O zıma nye nwernu rikne mee anya dno a.

5 Ige obula, abalı nı iwhnehnie o zı nı hne be li iznu ma n'olu rugwu, neesi okokoba, gweru akaworugwu buko noodowa ełni a ełni.

6 Kọvu nga o whnurnu Jizọsi nı hne zı ikere, o gba ẹso, kpọnu a risi ẹli.

7 O gweru okne nkọli si okokoba, naakaa, “Kini bu nhne me nı jı nwekọgwu, Jizọsi Nnwọ ke Chiokike Kakwo Nhne Dum Olu?”

8 Ka bu kwnornu nı Jizọsi kannu a, “Hi nı rime a whıya, jı renwu ojo.”

9 Jizọsi sika a, “Kini bu rewhna i?”

O kaa, “Rewhna m bu Lijoni, kwnornu nı a zı agıda.”

10 O riasnosi Jizọsi rikne o chihala be n'eli wam.

11 Kọvu agida ezni zı piam naata wiri nı ngeri rugwu zı ndundu.

12 Kpakara renwu ojo wam riasno Jizọsi, kaa, “Zizne ai nı rime ezni ma a bna nı rime be.”

13 Jizọsi kweru be, kpakara renwu ojo wam whıyaru zne bna nı rime ezni wam, kpakara rumu anohia wam, ke duru pokwu lawuru, gbadnarnu nı ngwulangwu ngeri mini, rinwu nı rime mini.

14 Ele nooznu be gbawhuru, tnusi a n'eli-ohna ma nı rime ekwu. Be va whnu nhne mernu.

15 Be vakwnusi Jizọsi, whnu nye wam agida renwu ojo nwugwu nı mbom, hne o dazi ẹli, woru iwo, mkpoma a zumasiri ozu, be tu ogwnu.

16 Ele whnurnu a tnurnu nhne mernu nye wam renwu ojo nwugwu nı odokwnu ezni wam.

17 Be bete riasno Jizọsi o whoga nı ngeri ẹli be.

18 Nga o naabna nı rime ogbo, nye wam renwu ojo nwugwu nı mbom riasno a ma o snornu a la.

19 Jizọsi kwẹle. Kọvu o kanu a “La n'oro i, lakwnusi ele ke i, tnusinu be kpakara nhne Nyenwe ai mennu, nı kpa o donnu i obirizi.”

20 Nwerukna wam la, panizo nootnu nı rime Dekapolisi nhne Jizọsi mennu a, o duru kpakara ele badnu ełni.

Nnwọ rinya matı nı

nwerinya ntı ovnarna

(Mat 9:18-26; Luk 8:40-56)

21 Nga Jizọsi lahnarnu aznu bna n'ogbo du nı aznu osimini kiyari, agida ele badnu jiharu nı hne o zı. O daziri nı ngeri osimini.

22 Otu nı rime ele risi oro ogbako ele Ju, nye rewhna a bu Jariosi, varu, nga o whnurnu Jizọsi, o dna n'eli n'ochi a,

23 riasno a, kaa, “Nnwọ m rinya matı zı n'onu enwu, va soso tukwasi a aka i lawuru ma i dohia a, o ziri budnu.”

24 Jizọsi snornu a zne. Agida badnu snornu a naakpagbu a.

25 Otu nyerinya ke naaria ntı ovnarna nri nı awha lawuru sno nı igbudu ele badnu wam,

26 ke whnurnu agida awhnwhnu n'aka agida ele dibia, tuwhukwo kpakara nhne o nwernu, kọvu o bnana mbnarna obula, o joru bujo ke agida.

27 Nga o nurnu nhne gbasiri Jizọsi, o va n'aznu a n'igbudu badnu wam, kpatu iwo a aka,

28 kwnornu nı o karu, “O buru me kpatu iwo a aka kpọi, o jeeme ełni buru m oma.”

29 Ngangam ovnarna a gbabiri, o metu a n'ełni nı be gwolam a nriria ojo wam.

³⁰ Ngangam Jizōsi mahiaru nū rikne hilem n'ehni a whōga. Ọ tūhnasna n'igbudu badnū wam sīkwa, “Nyele kpatūru iwo m aka?”

³¹ Ele sno apna a kanū a, “Ị whnūrnū igbudu badnū naadnagidne i, ị naakaa, ‘Nyele kpatūru m aka?’”

³² O le anya gburugburu ma ọ jōowhnu nye ke mernu nhne ka.

³³ Nwerinya wam, kpa ọ mahiaru nhne mernu a, ọ yahna n'ogwnu naama a ririri, dna n'eli n'ochi a, kōwanu a kpakara ezi ọka zī a.

³⁴ Jizōsi kanū a, “Nnwō m rinya, ọkwnata mkpōma ị znōhialam jī, la nū udno, nrīria ị la.”

³⁵ Nga Jizōsi kpū ọka n'ōnu, ele hi n'ōro nye risi ọro ọgbako ele Ju wam va, naakaa, “Nnwō ị rinya nwūnam. Ndaa ke ị naakpaknata Nye-zni-nhne ehni?”

³⁶ Jizōsi bnóge nsnī nū nhne be nookwu, ọ kanū nye risi ọro ọgbako ele Ju wam, “Ị tūko ogwnu, kweru kpōi.”

³⁷ O kwéle nye ọbula snornu a zne, okwolem Pita, nū Jemisi nū Jōni nwene Jemisi.

³⁸ Nga be vaduru n'oro nye risi ọro ọgbako ele Ju wam, ọ whnūrnū mkpakpō, nū agīda ele naakwna ẹkwna, neesi okokoba.

³⁹ Nga ọ bnaznernu, ọ sīkwa be “Ndaa nhne anū naakpakpōnu, naakwna? Nnwō rinya ka nwūna ọnwu, kōvu ọ zī n'anyarna.”

⁴⁰ Be mū a rūmu. Nga ọ chīhalaru kpakara be, o kwuru nda watakīri wam nū nne a nū ele nū ya sno bna nū hne watakīri wam dnanyi.

⁴¹ Ọ nwūgwuru watakīri wam n'aka, kanū a, “Talīta kumi,” ke bū, “Nnwō rinya matī, m ka m jī, lizō.”

⁴² Ngangam, nnwō rinya matī wam lizō, neezne izne (ọ gbarū nri nū awha lawūru). O duru be ehni k'agīda.

⁴³ Jizōsi dō be aka nū nsnī ọ zīko nye mahīa nhne mernu. Ọ kaa masī be nyee a nhne o ri.

6

Be juru Jizōsi nū Nazareti (Mat 13:53-58; Luk 4:15-30)

¹ Jizōsi hi hnam whōga, va n'eli a, ele sno apna a snornu a.

² Ọ dū n'Ọbochi Ozukwa Inwe, ọ panīzo o zni nhne n'oro ọgbako ele Ju. Nga be nūrnū nhne o neezni, o duru be ehni, be neesikwa, “Ndaa hne nwerukna ka nwehīaru kpakara nhne ka? Kīni bū akōnīche ke be nyernu a. Ndaa kpa o jī nōrnū kpakara ẹrnū ndu-ehni ka?”

³ Ka ọ būo nye ọkwa-nka wam, nnwō Meri, nū nwene Jemisi nū Josefu, nū Judasi, nū Saimoni? Ọ būo rūmu nne a rinya zī n'esilawūru aī hna?” Be we ovu ehni megidne a.

⁴ Jizōsi kanū be, “Okwolem nū ẹli ke a nū ezi-nū-oro a, ma nū esilawūru ele ke a, bū hne nye ọwhnurninya nwée ọsobisinu.”

⁵ Ọ rnūlige ẹrnū ndu-ehni n'eli kī, okwolem nū o bikwasiri ele nrīria ele nū ele aka, me ehni siri be rikne.

⁶ Ókwe ekwe be duru a ehni.

Jizōsi zihalaru ele izi a nri nū ẹbo

(Mat 10:5-15; Luk 9:1-5)

Jizōsi zne nū rime ẹli-ọhna zī ichne ichne zī be ndūndu, neezni nhne.

⁷ O sukwu ele izi nri nū ẹbo wam, panīzo neezihala be ẹbo ẹbo, nyee masī be rikne nū hne rēnwu ojo zī.

⁸ O nyee be iwu be jíkọ nhne ọbula n'izne be, okwolem mkpara, be jíkọ nhne oriri, mọbu rẹkpa, mọbu iwai nù rẹkpa iwo be.

⁹ O karu be woru okoro-ọchi, be wóko iwo lawuru.

¹⁰ O kanu be, “Anu dazigidne n'oro ọbula anu jaabna, tem anu whoga n'eli wam.

¹¹ Hne ọbula be nábnanyana anu mọbu bnóne nsnì n'ikwu-ọnu anu, anu joowhoga pìi, lisanma rizna ke zì n'ọchi anu, ma ọ buru nhne akebne megidne be.”

¹² Be whoga nookwunu ele badnu ikwu-ọnu Chiokike, be tuhmasna mkpoma.

¹³ Be chihalaru agida renwu ojo, tesi masi agida ele naaria aria mono, me ehni siri be rikne.

*Enwu Jóni Nye Wụ Mini
(Mat 14:1-12; Luk 9:7-9)*

¹⁴ Eze Erọdu nurnu a, kwnornu nu rewhna Jizosi wholam iwhne. Agwna badnu naakaa nu Jóni Nye Wụ Mini hilem n'enuw lizo, ọ bu nhne mernu kpakara rikne ka ji nọornu ọnu ndu-ehni nu rime a.

¹⁵ Ele berere karu, “O bu Elaija.”

Ele berere kaa, “O bu nye ọwhnurninya, lele otu nu rime ele ọwhnurninya gbaka.”

¹⁶ Kọvu Erọdu nurnu a, ọ kaa, “O bu Jóni Nye Wụ Mini, nye me biri risi, o lizolam.”

¹⁷ Erọdu karu nu mọm be nwudne Jóni, kne a eriri n'oro ikelu kwnornu nu Erodiasi nnwerne Filipu nwene a, nye ọ luru.

¹⁸ Jóni kanu Erọdu, “O buo oma n'iwu ọnu nnwerne nwene i.”

¹⁹ Erodiasi heteru o vunu Jóni irno nu mkpoma, o pioru o gbu a, kọvu nu o nwée rikne,

²⁰ kwnornu nu Erọdu turu ogwnu Jóni. O mahiaru nu ọ bu nye mee mma nu nye zì nsọ, ọ bıkwata a nkari. Ige ọbula ọ nurnu ikwu-ọnu a, oriri jihia mkpoma, kọvu nu o ji snarnima nurnu ikwu-ọnu a.

²¹ N'ipne-aznu, oghere whyanu Erodiasi. Erọdu siri wiri o chenwanya omumu a. O sukwu ele nu ya sno neechi, nu ele risi ogwnu nu ele risi eli Galili.

²² Nga nnwo rinya Erodiasi bnanyaru tne eri soru Erọdu nu ele nu ya zì n'onu k'agida, eze kanu woknornokno wam, “Rjo m nhne ọbula masiri i, m jeenye i.”

²³ O kweru a mkwna kwesi a rikne, kaa, “Nhne ọbula i rjoru m, m jeenye i, ọ bubedi o keme eli-eze m ẹbo.”

²⁴ O whoga sika nne a, “Kini bu nhne me joorio?”

O kanu a, “Risi Jóni Nye Wụ Mini.”

²⁵ Nnwọ rinya wam gba eso kwnusi eze, kanu a, “M choru m i nyee m risi Jóni Nye Wụ Mini n'agbugba kina.”

²⁶ Ehni nwurnu eze, kọvu kwnornu mkwna wam o kweru nu ele ya nu be dazi neeri wiri, ọ masila a ọ la aznu nu mkwna o kweru a.

²⁷ Ngangam, o zihala nye gbu badnu, nyee a iwu o bihia risi Jóni. O zne bihia risi Jóni n'oro ikelu.

²⁸ O vuya risi a n'agbugba, nyee a nnwo rinya wam, nnwo rinya wam nyee a nne a.

²⁹ Nga ele sno apna Jóni nurnu a, be va vuru iznu a lite.

*Jizosi nyernu pokwu
badnu isne wiri
(Mat 14:13-21; Luk 9:10-17; Jón 6:1-14)*

³⁰ Ele izi Jizōsi hiebnanyarnu hne Jizōsi zi, be tnuṣinu a kpakara nhne be mernu nu kpakara nhne be znirni ele badnu.

³¹ Kwnornu nu agida ele badnu naava, naala, oghere o ri wiri zila, Jizōsi kanu be, “Anu va ichne nu hne kōru owu, zukwaru inwe.”

³² Be nu nsnunu be bna n'ogbo zne hne kōru owu.

³³ Agida badnu whnurnu nga be neezne. Be mahjaru be, be hi nu kpakara eli-ohna gweru ochi gbako nu pii, beru be osno du.

³⁴ Nga Jizōsi whuyaru n'ogbo, o whnu igbudu ele badnu, o donu be obirizi, kwnornu nu be nu lele aturnu nwée nye nooznu be. O panizo neezni agida nhne.

³⁵ Nga obochi znemirnu, ele sno apna a vakwnusi a, kaa, “Hna kogwu owu, obochi zneminem.

³⁶ Zihala ele ka ma be zne nu rime ekwu ma nu rime eli-ohna zne zuru nhne oriri.”

³⁷ Kōvu Jizōsi kanu be, “Anu nyee be nhne be jeeri.”

Be sika a, “A jeezne zuya brēdi riwhu mkpuru iwai lawuru, nyega be, ma be ri?”

³⁸ O sika be, “Anu nwernu ike brēdi ele? Zne lekasi.”

Nga be mahjaru, be kaa, “Ike brēdi isne, nu aznu lawuru.”

³⁹ Jizōsi kanu be mee kpakara be daziri eli nu mkpuru nu mkpuru n'olu achara budnu.

⁴⁰ Be daziri eli nu mkpuru nu mkpuru, ele otu riwhu nu ele nri isne.

⁴¹ Jizōsi gweru ike brēdi isne wam nu aznu lawuru wam, le anya n'oligwe, tu mmamma, nyawama ike brēdi isne wam, nyee ele sno apna a ma be nyee ele wam. O keme aznu lawuru wam n'esilawuru kpakara be.

⁴² Kpakara be ri, riji ruwho.

⁴³ Ele sno apna a tutukota ruvnuruvnu brēdi nu aznu ke gwnarnu ke jihjaru nri nu nkita lawuru.

⁴⁴ Ele riri brēdi wam bu pokwu ele rukna isne.

Jizōsi znernu izne n'olu mini

(Mat 14:22-33; Jon 6:15-21)

⁴⁵ Ngangam o mee ele sno apna a bna n'ogbo, beru a osno kwowhe aznu osimini du eli Betesaida, nga o neezila igbudu badnu wam.

⁴⁶ Nga o zilakworu be, o zne n'olu rugwu zne kpe okpukpe.

⁴⁷ N'ogbednachi, ogbo wam zi n'esilawuru okne osimini, ya nu nsnunu a zi n'olu eli.

⁴⁸ O whnu be hne be zi nodoli nokwo ogbo kwnornu nu ruwhere nee-whegidne be. O vakwnusi be nu omu osisi neezne izne n'olu mini. O pio o whe be,

⁴⁹ Kōvu nga be whnurnu a hne o neezne izne n'olu osimini, o nu be lele renwu. Be si okokoba k'agida.

⁵⁰ Kpa kpakara be whnurnu a, mkpoma la be mini.

O kanu be, “Mkpoma si anu rikne, o bu mawa. Anu tiko ogwnu.”

⁵¹ O pnekwnusi be nu rime ogbo, ruwhere wam whebiri. O duru kpakara be ehni k'agida.

⁵² Be ghoyage ernu ndu-ehni gbasiri ike brēdi isne wam, mkpoma be ghoyagele a.

Jizōsi gworu ele nriria n'eli Genezareti (Mat 14:34-36)

⁵³ Nga be wheru, be vadu n'eli Genezareti kpokwnusi ogbo be.

⁵⁴ Kpa be whuyaru n'ogbo, ngangam agida ele badnu mahiaru Jizosi.

⁵⁵ Be gbazu kpakara eli wam, panizo noovuya n'okpata ele nriria penupe obula be nurnu o zi.

⁵⁶ Hne nu hne obula o bnazneru, n'eli matj, mofu eli hna ezi, mofu n'ekwu, be dnanyita ele nriria n'ahia, be naariasno a ma be kpatu ke bu onu iwo aka. O gworu kpakara ele kpaturu onu iwo a aka.

7

Omen'eli ke ele mbom

(Mat 15:1-9)

¹ Nga ele Farisi nu agwna ele zni iwu ele Ju hiri nu Jeruselem vakwnusi Jizosi,

² be whnurru nu ele sno apna a ji aka kpuru rune neeri wiri, ke bu aka be kwola okwo.

³ Ele Farisi nu kpakara ele Ju ri wiri hne be kwola aka nkari. Be naabita omen'eli ke ele mbom znirni be.

⁴ Be hi ahia yahna, be ri nhne obula hne be hniage ehni. O zi masi omen'eli berere ke be nahiaru, noosno, lele kpa be snu okiko, nu ite, nu okwu.

⁵ Ele Farisi nu ele zni iwu ele Ju sikwa Jizosi, "Kini kpayaru ele sno apna i za naabita omen'eli ele mbom? Be gweru aka be kwokwala nkari neeri wiri."

⁶ Jizosi saru be, "Azaya whnurru owhnurninya gbasiri anu k'ezi, naakaa, anu bu ele ruwhnu lawuru, lele kpa be gbaru a n'okwukwo nsu, naakaa, 'Ele ka ji mgbele-onu etekne nosobisinu m, kovu mkpoma be zi ikere nu hne me zi.

⁷ Be nokponu m risi eli n'etekne, neezni nhne badnu nyernu n'iwu lele nu o bu iwu ke Chiokike.'

⁸ Anu naagharu iwu ke Chiokike, nwukwaru omen'eli ke badnu."

⁹ Jizosi kanu be, "Anu marnu ama gharu nhne Chiokike nyernu n'iwu ma anu bita omen'eli anu.

¹⁰ Kwnornu nu Mozizi karu, 'Sobisinu nda i nu nne i,' nu 'Nye obula ke jovu nda a mofu nne a onu, be gbu a.'

¹¹ Kovu anu karu nye obula ke jaakanu nda a mofu nne a, 'Nhne i jeerihia n'aka m bu Kobani' (ke bu nkesi o nyernu Chiokike)

¹² ige wam anu jeekwe o menu nda a mofu nne a nhne berere.

¹³ Anu neeme nhne ka neegweru ikwu-onu Chiokike neeme nhne etekne hite n'omen'eli ke anu, neenyewhete a n'aka ele berere. Nu agida nhne nu kpa anu neeme."

Nhne neemeru badnu

(Mat 15:10-20)

¹⁴ Jizosi sukuru igbuda badnu wam berere kanu be, "Anu bnote nsnj n'ikwu-onu m, anu ghohia a masi.

¹⁵ O za nhne ke hi n'ederezi bna nu rime badnu ke nwernu rikne meru a. Kovu nhne ke hiri nu rime badnu whuya bu nhne neemeru badnu." [

¹⁶ Nye nwernu nsnj o ji o nu nhne o nurru.]

¹⁷ Nga o gharuru agida ele badnu wam bna nu rime oro, ele sno apna a sikwaru a ajiji gbasiri elulu wam.

¹⁸ O saru be, "Ke bu nu anu nwee oghohia? Anu ma nu nhne ke hiri n'ederezi bna nu rime badnu nwee rikne meru a?

¹⁹ Kwnornu nu o bna nu rime mkpoma a, hne o bnarnu bu ruwho a, be nynghala a n'osoro." (Ka bu ke Jizosi jiri kaa nu kpakara wiri zi richna.)

²⁰ Jizōsi zī kōriri nookwu, “Nhne ke hiri nū rime badnū whūya bū nhne neemeru badnū.

²¹ Kwnornu nū ọ bū nū rime mkpōma badnū bū hne kpakara ọriri ojo hi nōowhuya, ome ọyi, oznu buznu, ogbu badnū,

²² ome ọyi ele nwernu nnwerne nū ele nwernu nzi, anyakwu, aruru-eli, aghigho, ọgba ewhere, ọwho-anya, ọkaja, oknomokno, iwhnirniwhno,

²³ Kpakara nhne ojo ka hi nū rime badnū whūya, be meru badnū.”

*Okwnata ovu otu
nwerinya Sirofinisa
(Mat 15:21-28)*

²⁴ Jizōsi hi nū rime pji whōga, zne n'eli zī Taya ndundu. Ọ bna n'otu ọro, ọ pirole ele badnū mahija, kọvu nū be nwée rikne bīgwa a.

²⁵ Ngangam, otu nwerinya ke nnwọ a rinya maị nweru renwu ojo nurnu nhne gbasiri Jizōsi, o varu dna n'eli n'ochi a.

²⁶ Nwerinya wam buo nye Ju, be muru a nū Sirofinisa. Ọ riasno a ma ọ chihala renwu ojo wam n'ehni nnwọ a rinya.

²⁷ Jizōsi kanu a, “Beru osno nyejite rumu takiri wiri ruwho, kwnornu nū ọ buo oma o gweru wiri rumu takiri tuhalanu nkita.”

²⁸ Kọvu ọ saru, “Nyenwe ai, ọ bubedi rumu nkita ke zī nū mkpururu ikpechi neeri ruvnuruvnu wiri rumu takiri.”

²⁹ Jizōsi kanu a, “Kwnornu nū nhne ka i kwuru, la, renwu ojo wam whogalam n'ehni nnwọ rinya.”

³⁰ Ọ la n'oro a, whnu nū nnwọ a dnanyi n'olu ọkpata, nū renwu ojo wam whogalam masi.

*Jizōsi gwōru nye mgbu
nū nsni inyo*

³¹ Jizōsi whogaru nū ngeri Taya gawhe n'esilawuru Sajdoni, hi n'esilawuru eli Dekapolisi du Osimini Galili.

³² Be kwyanu a otu nyenum ke dnarnu mgbu ke nu nsni, be riasno a ma o bikwasị a aka a.

³³ Jizōsi kwuhala a n'esilawuru agida badnu whoga ichne, ọ yisi mkpaka a nu nsni a lawuru, gbū ọnu-mini, kpatu riro a aka.

³⁴ O lelizo anya n'oligwe, snu idne, kaa, “Efata,” ke risi a bu, “Kpume.”

³⁵ Ngangam nsni a lawuru kpumernu, nhne knesnirni a riro tomarnu, o kwukwata oka.

³⁶ Jizōsi kasinu be rikne be kanukwadia nye obula, kovu kpa ọ naakanusinu be rikne bu kpa be neewheke a.

³⁷ O duru kpa be hna ehni k'agida, be naakaa, “O neeme kpakara nhne buru oma. O mernu ele nsni inyo nu nsni, ele mgbu kwu oka.”

8

*Jizōsi nyernu
pokwu badnu eno wiri
(Mat 15:32-39)*

¹ N'ige wam nga agida ele badnu gbaqoru berere, be nwée masi nhne be jeeri. Jizōsi sukwu ele sno apna a, kanu be,

² “M nọdonu agida ele badnu ka obirizi, kwnornu nū me nū be dazilam ọbochi eto, be nwée nhne be jeeri.

³ Ọ buru nū me zihala be n'onu etekne, anya-aju joovu be n'apna, agwna be hi hne zī ikere va.”

4 Ele sno apna a sika a, “Ndaa kpa badnu jeeji nyeji ele badnu ka wiri ruwho n'eli-ikpa hna?”

5 O sika be, “Anu nwernu ike bredi ele?”

Be kaa, “Esau.”

6 O kanu agida ele badnu wam daziri eli. O gweru ike bredi esau wam, tunu Chiokike mmamma, o nyawama be, nyee ele sno apna a be bete neenye ele badnu, ele sno apna a kesiri ele badnu wam wiri.

7 Be nwemasiri aznu mati ele nu ele, o tu kwno mmamma, kaa be nyee ele wam.

8 Be ri, ruwho ji be, be tutukota ruvnuruvnu bredi ke gwnarnu, ekperi nkita esau jihiaru.

9 Be duru pokwu eno, Jizosi zihala be.

10 Jizosi bna nu rime ogbo, ya nu ele sno apna a, be va nu eli Dalamana.

Ele Farisi piuru

nhne elekema

(Mat 16:1-4)

11 Ele Farisi varu panizo nesikwa a ajiji, noopio nhne elekema hi n'oligwe, naakpa a iru.

12 O snu idne k'agida nu rime ovu a, kaa, “Kini kpahiaru ebiri ka noopio nhne elekema? N'ezime kanu anu, o za nhne elekema be jeenye ebiri ka.”

13 O gharu be bna kwno nu rime ogbo whe aznu osimini kijari.

Nhne whu bredi

ele Farisi nu Erodu

(Mat 16:5-12)

14 Ele sno apna a chezuru o gweru bredi, be ji otu ike bredi kpoi nu rime ogbo.

15 Jizosi kasinu be rikne, “Anyadu anu eli, anu neeze nhne whu bredi ke ele Farisi nu Erodu.”

16 Be notnurita n'esilawuru be, naakaa, “O bu kwnornu nu a jile bredi.”

17 Nga Jizosi mahiaru a, o kanu be, “Kini kpahiaru anu naakaa nu anu jile bredi? Anu yoghoyage? Nduu otula anu sa?”

18 Anu nwernu anya, anu whnu osno? Anu nwernu nsni, anu nu nhne? Anu gbadiyala?

19 Nga me keru ike bredi isne n'esilawuru pokwu badnu isne, nkita ele jihiaru nu ruvnuruvnu anu vulizoru?”

Be kaa, “Nri nu ebo.”

20 “Nga me keru esau nye pokwu badnu eno, ruvnuruvnu nkita ele bu nhne anu vulizoru?”

Be kaa, “Esau.”

21 O kanu be, “O bu nu anu yoghohiala koriri?”

Jizosi gworu nye isni

nu Betesaida

22 Jizosi nu ele sno apna a va n'eli Betesaida. Be kwuyanu a otu nye isni, riasno a ma o kpatu a aka.

23 O nwugwuru nye isni wam n'aka, duru a zne n'aznu eli-ohna wam. O gbusi a onu mini n'anya, tukwasi a aka a lawuru, o sika, “O zi nhne i noowhnu?”

24 O le anya n'olu, kaa, “M noowhnu badnu, kovu be nu lele isisi neezne izne.”

25 Jizosi tukwasi kwno a aka a lawuru n'anya a berere, o legidne anya, anya a buru oma, o whnuna kpakara nhne nkari.

26 O zihala a n'oro a, kanu a, “I lahnakwadia nu rime eli-ohna berere.”

Pita kahjaru nye Jizōsi bu
(Mat 16:13-20; Luk 9:18-21)

²⁷ Jizōsi whōga, ya nū ele sno apna a bna nū kpakara ẹli-ohna matj zj ndūndu Sizaria Filipai. Nga be zj n'apna, o sika wa ele sno apna a, "Ele badnū be naakaa nū me bū nyele?"

²⁸ Be saru a, "Agwna be naakaa Joni Nye Wū Mini, ele ke berere naakaa Ẹlajia, ele ke berere kaa otu nū rime ele owhnurninya."

²⁹ O sika, "Anū n'iwhuru anū, anū kanū nū m bū m nyele?"

Pita saru a, "Ji n'iwhuru i bū Karajisi wam."

³⁰ O do be aka nū nsnj, kaa, "O zá nye anū kanū nhne gbasiri m."

Jizōsi kwuru oka

gbasiri enwu a

(Mat 16:21-28; Luk 9:22-27)

³¹ Jizōsi panjo neezni be nhne, naakaa, "Nnwō ke Badnū jaatariri agida awhnūwhnu, ele okno badnū nū ele risi ariohna nū ele zni iwu ele Ju jooju a, be gbu a, nga obochi ẹto whemernu, o jeehi n'enwu lizo."

³² O kwuru ka kpa nye obula joooghohia. Pita kwuhala a, naabnanu a.

³³ Nga o tuhnasarnu whnū ele sno apna a, o bigbo Pita, kanu a, "Zne n'aznu m, Setani, kwnornu nū i neeche echiche lele badnū, o buo lele Chiokike."

³⁴ O sukwu igbudu badnū wam nū ele sno apna a, o kanu be, "O buru nū nye obula joosno m n'aznu, o jooju ehni a, vuru oga a sno m.

³⁵ Nye obula ke noopio o dohia budnu a jootuwu a, kovu nye obula ke jootuwu budnu a kwnornu m nū izi oma, o jooznohia a.

³⁶ Mbnarna kini bu nhne badnū jeenwe o buru nū o rihja kpakara owa n'iru tuwhume budnu a?

³⁷ Kini bu nhne badnū jeeji gbanwo budnu a?

³⁸ Nye obula ke iwhnerne m nū ikwu-onu m jootu n'ebiri ewhere nū aruru-eli ka, iwhnerne nye wam jootu Nnwō ke Badnū nga o jaava n'igwugwu ke Nda a, ya nū ele enine izi a zj nsō."

9

¹ Jizōsi kanu be, "Me kanu anu ezi oka, agwna ele gwuzo hna jōonwu enwu tem be whnū ẹli-eze Chiokike hne o ji iknernema va."

Onwoghari Jizōsi

(Mat 17:1-13; Luk 9:28-36)

² Nga obochi isunu whemernu, Jizōsi kwuru Pita, nū Jemisi, nū Joni duru be pnezne n'olu rugwu zj olu whōga ichne. O nwoghari nū ruwhnu be.

³ Iwo a noonwu va-a-a ke o zá nye zj n'owa ka jooznuli iwo ki.

⁴ Be whnurnu Ẹlajia nū Mozizi, be nū Jizōsi nookwurita oka.

⁵ Pita kanu Jizōsi, "Nda-aj-kwu, o buru oma a daziri hna, ngwa ma a wu o-roka ẹto, otu buru ke i, otu ke Mozizi, otu ke Ẹlajia."

⁶ Ogwnu turu be ke kpayaru o máa nhne o nookwu.

⁷ Erumeru oligwe varu kpusni be, akpiri hiri nū erumeru oligwe wam whuya, kaa, "Ka bu Nnwō m me whnurnu n'anya, anu bnotenu a nsnj."

⁸ Kpurugadnam, nga be leru anya gburugburu, o zá nye be whnurnu, okwolem Jizōsi kpoi.

⁹ Nga be hiri n'olu rugwu wam hiehna, o kasinu be rikne, be kanu nye obula nhne be whnurnu, tem Nnwō ke Badnū hi n'enwu lizo.

¹⁰ Be bita nhne ka nū mkpoma be. Be neesikwa n'esilawuru ehni be, "Kini bu risi olizo n'enwu?"

11 Be sika a, “Kini kparu ele zni iwu ele Ju jiri kaa nu Elaija jeebe osno va?”

12 Jizosi saru be, “O bu n’ezi nu Elaija jeebe osno va, bikwata kpakara nhne lele kpa o zi nu mbom. Kini mernu be gbaru a n’okwukwo nso gbasiri Nnwọ ke Badnu, nu o jaata agida awnhuwhnu, be ju masi a?”

13 Kovu me kanu anu nu Elaija vaem, be mee a kpa o jiri masi be, lele kpa be gbaru a n’okwukwo nso gbasiri a,”

*Jizosi gworu nnwo rukna
(Mat 17:14-21; Luk 9:37-43a)*

14 Nga Jizosi nu badnu eto ele sno apna a vakwnusiri ele sno apna a ele berere, be whuru igbuda badnu gbaru be gburugburu, whu masi ele zni iwu ele Ju hne be nodogbuta.

15 Ngangam o du kpa be hna ehi k’agida nga be whuru a, be gbazne, bekwu a.

16 Jizosi sika ele sno apna a, “Kini bu nhne anu nu be nodogbuta?”

17 Otu nyemu nu rime igbuda badnu wam saru a, “Nye-zni-nhne, m kwuyannu m ji nnwo m rukna ke nweru renwu dnarnu mgbu.

18 Penupe obula o nwugwuru a, o vudna a n’eli, o nodogbo okoto n’onu, naata rukwnuru-ize, roknete ehi. M kanu ele sno apna i ma be chihala a, kovu nu be nwe rikne.”

19 Jizosi saru be, “Anu ebiri ke nwe okwnata mkpoma, me nu anu jaadazi du ngele? Me jeesinu anu ovu du ngele? Anu kwuyanu m nnwo wam hna.”

20 Be kwuyan a nnwo rukna wam. Nga renwu ojo wam whuru Jizosi, ngangam, o dosi nnwo rukna wam rikne. O dna n’eli noturni a, o nodogbo okoto n’onu.

21 Jizosi sika nda a, “Ndaa nga nhne ka beteru eme a?”

O kaa, “Hite nga o bu nnwo mati.

22 Agida ige, o dobnaru a nu rime bekwu ma nu rime mini ma o gbu a. O buru nu o nweru nhne i jeemeli, donu ai obirizi, yisinu ai aka.”

23 Jizosi kanu a, “I naaka, o buru nu o nweru nhne me jeemeli? Kpakara nhne jeemelinu nye nweru okwnata ovu.”

24 Ngangam, nda nnwo watakiri wam siwama, “M kweru m, yisinu okwe ekwe m aka.”

25 Nga Jizosi whuru nu agida badnu naagbaya, o bigbo renwu ojo wam kaa, “Ji renwu ke dnarnu mgbu nu nsu inyo, m neenye i iwu, hi nu rime a whuya, i bnama nu rime a berere.”

26 Renwu ojo wam si okokoba, dosi a rikne, hi nu rime a whuya. Nnwọ wam dna lele nye whuru onwu, ke kparu agida badnu jiri kaa, “O nwunam we.”

27 Kovu Jizosi nwugwuru a n’aka dolizo a, o lizo.

28 Nga Jizosi bnaryaru n’oro, ele sno apna a sika a ichne, “Kini kparu a nwe rikne chihala renwu ojo wam.”

29 O kanu be, “Renwu nu lele ka jowhoga nu nhne obula, okwolem n’okpukpe.”*

*Jizosi kwukwnonu oka
gbasiri enwu a
(Mat 17:22,23; Luk 9:43b-45)*

30 Be hi nu pi whuya gawhe n’esilawuru Galili. O kwele nye obula mahia hne be zi,

* 9:29 Agwna okwukwo kwuru: hite n’okpukpe nu ovu onu.

³¹ kwnornu nu o neezni ele sno apna a nhne, naakaa, “Be jeegweru Nnwọ ke Badnu resi n’aka ele badnu, be joogbu a, nga ọbochi ẹto whemernu, o jeeji n’ẹnwu lizọ.”

³² Kọvu nu be ghọhiala ọka wam, ogwnu kwéle be sịkwa a nhne gbasiri a.

Nyele kakwo ibne a?

(Mat 18:1-5; Luk 9:46-48)

³³ Be vadu Kapanom, nga Jizọsi bnarnu n’oro, ọ sịkwa be, “Kini bu nhne anu nookwu n’apna?”

³⁴ Kọvu be mesnirni onu be, kwnornu nu be noodogbuta n’apna nye kakwo ibne a n’esilawuru be.

³⁵ Jizọsi daziri eli sukwu ele sno apna a nri nu ebo wam. O kanu be, “O buru nu nye obula noopio o bu nye risi, o jọbu nye ipne-aznu, nu nye neeznenu kpakara ele badnu izi.”

³⁶ O kwuru otu watakiri gwuzote a n’esilawuru be, o jiri a n’aka a, kanu be,

³⁷ “Nye obula ke jaanarnu otu nu rime watakiri ka nu rewhna m, nanarnu m, nye obula ke jaanarnu m k’ezi, o buo me bu nye o nanarnu k’ezi, o bu nye ziyaru m.”

Nye za neemegidne aj

dagwunu aj

(Luk 9:49,50)

³⁸ Joni kanu a, “Nye-zni-nhne, a whnurnu otu badnu hne o naachihala renwu ojo nu rewhna i, a bnosni a, kwnornu nu o za noosno aj.”

³⁹ Jizọsi kaa, “Anu bnosni a, kwnornu nu o za nye jorumu ẹnu ndu-ehni nu rewhna m, ke jaakaa m ọka ojo ngwa ngwa.

⁴⁰ Nye za neemegidne aj dagwunu aj.

⁴¹ M naakanu anu ezi oka, nye obula ke jookwute anu otu okiko mini anu nwọ kwnornu nu anu bu ele Karaisi jaanahariri ogwo ẹnu a.”

Nhne jeeme badnu mehie

(Mat 18:6-9; Luk 17:1,2)

⁴² “Nye obula ke jeeme otu nu rime ele matị ka mehie, bu ele kweru nu me, o jaakanu a mma nu be gweru okne rugwu ogwe-wiri nyasi a n’ili, migbu a n’okne osimini.”

⁴³ O buru nu aka i jeeme i, i mee mmehie, gbubime a, o jaakanu i mma o bna nu budnu kwọ okwo vuru ọru karu o nwernu aka i lawuru bna nu bekwnu eli renwu chni echni. [

⁴⁴ Ki bu hne rukpurukpuru be nwu onwu, bekwnu be chni echni.]

⁴⁵ O buru masi nu ochi i jeeme i, i mee mmehie, gbubime a, o jaakanu i mma o bna nu budnu kwọ okwo nu mgworo karu o nwernu ochi lawuru i, be tubna i nu bekwnu eli renwu. [

⁴⁶ Ki bu hne rukpurukpuru be nwu onwu, bekwnu be chni echni.]

⁴⁷ O buru masi nu anya i jeeme i, i mee mmehie, gwupu a, o jaakanu i mma o bna n’eli-eze Chiokike nwernu otu anya karu o nwernu anya lawuru be tubna i nu bekwnu eli renwu.

⁴⁸ Ki bu hne rukpurukpuru be nwu onwu, bekwnu be chni echni.

⁴⁹ “Lele kpa a ji arua mee wiri so n’onu, o bu kpa Chiokike neeji bekwnu awhnuwhnu mee ele ke a buru ele agwa oma.

⁵⁰ “Arua buru oma, kovu arua tuwhu oso n’onu a, be jeeji kini mee a o so n’onu? Anu nwernu arua nu rime anu ma anu nu ibne anu ziri n’udno.”

10

Ogba nnam

(Mat 19:1-12; Luk 16:18)

¹ Jizōsi whōga zne n'ike ẹli Judiya n'aznū Osimini Jōdani kiyari, agida ele badnū jipiya kwno hne ọ zị. Lele kpa o mesị, o neezni be nhne.

² Agwna ele Farisi vakwnusi a, sịkwa a, “Ọ bụru ọma n'iwu nyerukna gba nnwerne a nnam?” Be naakpa a iru.

³ Ọ sịkwa be, “Kini bụ nhne Mozizi nyernu anụ n'iwu?”

⁴ Be kaa, “Mozizi kwerruru nyerukna gba ọkwukwo nnam nyee nnwerne a, chihala a.”

⁵ Jizōsi kanụ be, “Kwnornu nū mkpọma ojo anụ kpayarū Mozizi gbarū iwu ka n'ọkwukwo.

⁶ Kọvu hite n'ọpanizo okike ọwa, Chiokike kpuru be nyerukna nū nyerinya.

⁷ Kwnornu nū ka, nyerukna jaagharū nda a nū nne a, takwnūsi n'ẹhni nnwerne a,

⁸ be lawūru jōogho otu anọ-ẹhni. Be buma badnū lawūru, kọvu otu anọ-ẹhni.

⁹ Nhne Chiokike knekọtaru, badnū tọmana a.”

¹⁰ Nga be bnarnū nū rime ọro, ele sno apna a sịkwa a ajiji gbasiri ọka ka berere.

¹¹ Ọ kanū be, “Nye ọbula ke jaagba nnwerne a nnam lū nnwerne berere, neemegidne a ọyi.

¹² Ọ bụru masị nū nnwerne gba nzi a nnam, gbọru nzi berere, o neeme masị ọyi.”

Jizōsi gōziri rumu takiri

(Mat 19:13-15; Luk 18:15-17)

¹³ Ele badnū nookwuyanū Jizōsi rumu takiri ma ọ kpatū be aka, kọvu ele sno apna a bigbọru ele kwuyaru be.

¹⁴ Nga Jizōsi whnurnu a, o we ẹhni k'agida, ọ kanū be, “Anū gharū rumu takiri ma be vakwnusi m, anū bnósni be, kwnornu nū ẹli-eze Chiokike bụ ke ele nū kpa.

¹⁵ Me kanū anū ezi ọka, nye ọbula ke jéegweru ẹli-eze Chiokike lele nnwọ matị, ọ jáabna nū rime a rịa rịa.”

¹⁶ Ọ kwuru be n'aka a lawūru, tūkwasị be aka a, gōzi be.

Otu nye ọchichi

(Mat 19:16-30; Luk 18:18-30)

¹⁷ Nga Jizōsi whōgaru n'apna, otu nyenum gbakwnusi a, gbunu a mpnerne ọchi, sịkwa a, “Ọmamarna Nye-zni-nhne, kini bụ nhne me jeeme ma m kehia m budnu kwó okwo?”

¹⁸ Jizōsi saru a, “Kini kpayarū i noosukwu m nye ọma? Ọ zá nye bụ nye ọma, okwolem otu badnū, bụ Chiokike kpọi.

¹⁹ I maam kpakara nhne be nyernu n'iwu, i gbúko badnū, i méko ọyi, i znúko buznu, i gbákọ akebne aghalaghala, i mégbukọ badnū, sọbisinu nda i nū nne i.”

²⁰ Ọ kanū a, “Nye-zni-nhne, kpakara nhne ka bụ nhne me bítaru hite n'ikoro m.”

²¹ Jizōsi leru a anya ọma, kanū a, “Otu nhne gwnarnū i jeeme, la, re kpakara nhne i nwernu, kesi ele mboni, i jeenwe ẹkwnu n'oligwe, vaa, sno m.”

²² Ruwhnu gbarūru a n'ọka wam, ọ la, naagbarū ruwhnu, kwnornu nū ọ nwernu ẹkwnu k'agida.

²³ Jizōsi leri anya gburugburu, kanu ele sno apna a, “Le kpa o jiri ra eñni ele nwernu ekwuu o bna n’eli-eze Chiokike!”

²⁴ Oka wam du ele sno apna a eñni, kovu nu Jizōsi ka masinu be, “Rumu m, le kpa o jiri ra eñni o bna n’eli-eze Chiokike.”

²⁵ O zinu anohia kameli ewheke o gawhe n’anya alanga karu ele nwernu ekwuu o bna n’eli-eze Chiokike!”

²⁶ O du kpakara ele sno apna a eñni k’agida, be sɔkwarita eñni be, “Ndakwanu nye be joznohia?”

²⁷ Jizōsi leri be anya kaa, “Hne badnu zi be jeemeli a, kovu o buo hne Chiokike zi. Be meli kpakara nhne hne Chiokike zi.”

²⁸ Pita panizo naakanu a, “Le, a sigbasiri kpakara nhne a nwernu, snornu i.”

²⁹ Jizōsi kanu, “Me kanu anu ezi oka, o za nye obula ke sigbasiri oro, mobu rumu nwene rukna, mobu rumu nwene rinya, mobu nne, mobu nda, mobu rumu, mobu ekwu kwnornu m nu izi oma,

³⁰ ke jaanahia karu riwhu nga riwhu n’ige ka, oro nu rumu nwene rukna, nu rumu nwene rinya, nu nne, nu rumu, nu ekwu, be nu mmekpehni masi, nu budnu kwó okwo n’ige wagwu nu ruwhnu.

³¹ Kovu agida ele be osno jobu ele ipne-aznu, ele ipne-aznu jobu ele be osno.”

Jizōsi kwuru oka gbasiru

enwu a ke mgba eto

(Mat 20:17-19; Luk 18:31-34)

³² Nga be zi n’apna neezne Jeruselem, Jizōsi neezne nu ruwhnu be, o du ele sno apna a eñni, ele snogwu a n’aznu notu ogwuu. O kwuru kwno nri nu badnu lawuru wam ichne, panizo naakanu be nhne jeeme a.

³³ O kanu be, “A neezne Jeruselem, be jeegweru Nnwó ke Badnu nyewhete n’aka ele risi arjohna nu n’aka ele zni iwu ele Ju, be jaama a ikpe enwu, gweru a nyee n’aka ele buo ele Ju.

³⁴ Be jeeme a nhne rumu, gbú a onu mini, pnia nhne, gbú a, nga obochi eto whemernu o jeehi n’enwu lizo.”

Aririo rumu Zebidi

(Mat 20:20-28)

³⁵ Jemisi nu Joni rumu Zebidi, vakwnusi Jizōsi, rjo a, “Nye-zni-nhne, a norio ma i menu ai nhne obula a jorio i.”

³⁶ O sɔkwa be, “Kini bu nhne anu noopio me menu anu?”

³⁷ Be kanu a, “Mee kpa a jaadaziri otu n’akarikwnunga i, otu n’akarita i, n’igwugwu i.”

³⁸ Jizōsi kanu be, “Anu ma nhne anu norio. Anu jonwoli okiko ke me nonwo? Mobu be wuli anu mini ke be nonwo m?”

³⁹ Be kanu a, “A nwernu rikne.”

Jizōsi kanu be, “Okiko me nonwo bu ke anu jonwo, mini be wuru m bu ke be jonwo anu.

⁴⁰ Kovu o dazi n’akarikwnunga m nu akarita m buo ke m n’onyega. O bu ke ele Chiokike bkwatannu a.”

⁴¹ Nga ele sno apna a nri ke gwnarnu nuru a, be wesanu Jemisi nu Joni eñni k’agida.

⁴² Jizōsi sukwukota be, kanu be, “Anu magwu nu ele be gwnurnu n’ele risi ke ele buo ele Ju neeme ele be nechi kpa o masiri be, ele kwu be ji aka rikne nechi ele zi nu mkpururu be.

⁴³ Kovu o buo kpam n’esilawuru anu. Nye pioru o buru nye kwu n’esilawuru anu jobu nye neeznenu anu izi.

44 Nye pioru o b̄uru nye mb̄om n'esilawuru an̄u, j̄obu ohi kpakara an̄u.

45 Kwnornu n̄u Nnw̄o ke Badn̄u v̄age ma be znenu a izi, k̄ovu ma o neezneu ele berere izi, ma o gweru masi b̄udnu a nyee, ma o b̄uru nhne ogbahia aḡida badn̄u.”

Jiz̄osi gw̄oru Batim̄osi

nye isni

(Mat 20:29-34; Luk 18:35-43)

46 Be vadu Jeriko, nga Jiz̄osi n̄owhoga n̄u Jeriko, ya n̄u ele sno apna a n̄u aḡida ele badn̄u, Batim̄osi nnw̄o rukna Tim̄osi nye kpuru isni daz̄i n̄u ngeri apna n̄orio nhne.

47 Nga o n̄urnu n̄u o b̄u Jiz̄osi nye Nazareti neewhe, o paniz̄o neesi okokoba, naakwnakwu a, “Jiz̄osi, Nnw̄o Devidi, d̄onu m obirizi.”

48 Aḡida ele badn̄u bigb̄oru a ma o kpusnime ōnu a, k̄ovu o siwama k'aḡida, “Ji Nnw̄o Devidi, d̄onu m obirizi.”

49 Jiz̄osi gwuzoru, kaa, “An̄u sukwu a.”

Be sukwu nye isni wam, kan̄u a, “Mkp̄oma si i rikne, lizo, o noosukwu i.”

50 O ch̄iwhume iwo a, w̄ulizo, kwnusi Jiz̄osi.

51 Jiz̄osi s̄ikwa a, “Kini b̄u nhne i pioru me menu i?”

Nye isni wam kaa, “Nyenwe āi, mee ma m whn̄urnu m ōsno.”

52 Jiz̄osi kan̄u a, “La, okwnata mkp̄oma i zn̄ohialam ji.”

Ngangam o bete o whn̄u ōsno, snornu Jiz̄osi n'apna.

11

Jiz̄osi bnaznernu

Jeruselem

(Mat 21:1-11; Luk 19:28-40; J̄on 12:12-19)

1 Nga Jiz̄osi n̄u ele sno apna a naavadu Jeruselem nd̄undu, n'eli B̄etifagi n̄u B̄etani, be vadu n̄u Rugwu Olivu, o zizne badn̄u lawuru n̄u rime ele sno apna a.

2 O kan̄u be, “An̄u zne n̄u mgbu mat̄i ke z̄i n̄u ruwhnu an̄u, ngangam an̄u naabna n̄u rime a, an̄u j̄owhnu nnw̄o iyinya be kp̄ogwu eriri, ke o z̄iko nye daz̄iri n'olu a, an̄u t̄oma a, t̄oya hna.”

3 O z̄i nye s̄ikwaru an̄u, “Kini mernu an̄u neeme nhne ka?” An̄u kaa, “O z̄i Nyenwe āi mkpa, o jeegwehnahe a k̄itna.”

4 Be znernu whn̄u nnw̄o iyinya be kp̄ogwu n'̄onu-mgbo ōro z̄i n'apna, be t̄opiya a.

5 Ele gwuzogwu p̄i s̄ikwa be, “Kini b̄u nhne an̄u neeme, n̄oto nnw̄o iyinya wam?”

6 Be kan̄u be nhne Jiz̄osi kar̄u, be ghar̄u be.

7 Be t̄oyanu Jiz̄osi nnw̄o iyinya wam, w̄ukwasi a iwo be n'olu a, o daz̄iri n'olu a.

8 Aḡida ele badn̄u gbata iwo be n'apna, ele berere nkala isisi ke be gbuh̄iaru n'ohia.

9 Ele neezne n̄u ruwhnu n̄u ele noosno, neesi okokoba, naakaa, “Ozana!

Chiokike gozi nye ke naava n̄u r̄ewhna Nyenwe āi.

10 Nhne be goziri ogozi b̄u ēli-eze nda i Devidi!

Ozana n̄u hne kakwo n'olu!”

11 Jiz̄osi bna n̄u rime Jeruselem, bnazne Ōro Nso, nga o lekworu kpakara nhne anya, kpa o b̄u ogbednachi, o wh̄oga zne B̄etani, ya n̄u nri n̄u badn̄u lawuru wam, ele sno apna a.

*Jizōsi vuru isisi
be kwu figi onu
(Mat 21:18,19)*

12 N'ekile a, nga be hiri nū Bētani naava, wiri gwnūrnū Jizōsi.

13 Nga o whnūrnū isisi figi nū hne zī ikere ke nwernū ọkwukwo būdnu, o zne ma o zī nhne o jōowhnu n'olu a. Nga o vaduru a eħni, o whnūna nhne ọbula okwolem ọkwukwo būdnu, kwnornū nū o būo ige mkpūru figi.

14 O kanū isisi figi wam, “O zá badnū ọbula jeeri mkpūru hi n'olu i berere.” Ele sno apna a nūrnū a.

*Nhne Jizōsi mernu
n'Ọro Nsọ Chiokike
(Mat 21:12-17; Luk 19:45-48; Jon 2:13-22)*

15 Be vadu Jeruselem, Jizōsi bna Ọro Nsọ Chiokike panizo o chihala ele neere, nū ele nọozu ahia n'Ọro Nsọ Chiokike. O kpute ikpechi kpakara ele naagbanwo iwai ruwhnu n'ẹli nū ngadna ele neere nduru.

16 O kwéle badnū ọbula vuru nhne gawhe Ọro Nsọ Chiokike.

17 O neezni nhne, naakaa, “Be gbarū a n'ọkwukwo nsọ, kaa, ‘Be jookwu ọro m ọro okpukpe ke kpakara mba.’ Kọvu anū mernu a o būru ọbna ele buznu.”

18 Ele risi ariohna nū ele zni iwu ele Ju nūrnū a, pio kpa be joogbu a. Kọvu nū be tūru ogwnu o mee a nhne ọbula, kwnornū nū nhne o znirni duru agida ele badnū eħni.

19 N'ige ogbednachi, Jizōsi whọga n'ẹli-ọhna Jeruselem, ya nū ele sno apna a.

*Isisi figi wam kpōnwurnu
(Mat 21:20-22)*

20 Nga be neezne n'osisi, be whnū isisi figi wam nū o kpōnwunam dū egwnugwnu a.

21 Pita chenwanya, kanū a, “Nda-aị-kwu, le isisi figi wam i vuru ọnu kpōnwunam.”

22 Jizōsi sarū be, “Anū nwe ọkwunata ovu nū Chiokike.

23 N'ezi me kanū, nye ọbula ke jaakanū rugwu ka, ‘Lizọ, dnabna osimini,’ ke nwéle mkpoma lawūru, kọvu nū o kweruru nū nhne o kwuru jeeme, o jeemenu a kpan.

24 Kam kpayaru, me naakanū anū, nhne ọbula anū jọorio n'okpukpe, kweru nū anū nwehialam a, o jọobu masi ke anū.

25 Berere, nga anū gwuzoru neekpe okpukpe, anū gbarūnu nye ọbula nhne ojo o mernu anū, ma Nda anū ke zī n'oligwe gbarūnu anū kpakara nhne ojo anū. [

26 Kọvu o būru nū anū jáagbarūnu badnū, Nda anū ke zī n'oligwe jáagbarūnu anū nhne ojo anū.”]

*Rikne Jizōsi
(Mat 21:23-27; Luk 20:1-8)*

27 Be va kwno berere nū Jeruselem. Nga Jizōsi neezneghari nū rime Ọro Nsọ Chiokike, ele risi ariohna nū ele zni iwu ele Ju nū ele okno badnū vakwnusiri a.

28 Be sịkwa a, “Rikne kịni bụ nhne i ji neeme kpakara nhne ka? O bụ nyele nyernu i rikne neeme i ji neeme be?”

29 Jizōsi sarū be, “M jaasịkwa anū otu ajiji, anū sa m, omekwo, m jaakanū anū rẹwhna rikne me ji neeme kpakara nhne ka.

30 Ọwu mini Jōni, o hiri n'oligwe mọbu n'aka badnū? Anū sa m.”

³¹ Be kwu a n'esilawuru be, kaa, "O buru nu a kaa, 'O hiri n'oligwe,' o jaasikwa ai, 'Kini mernu anu kwéle a?'"

³² Kovu o buru nu a kaa, 'O hi n'aka badnu...' " (Be notu ogwnu ele badnu kwnornu nu kpakara badnu kweru nu Joni bu nye owhnurninya n'ezi.)

³³ Be saru Jizosi, "A máa."

Jizosi kanu be, "M jáaka masinu anu rewhna rikne me ji neeme kpakara nhne ka."

12

Elulu ele ernu ekwu vaini

(*Mat 21:33-46; Luk 20:9-19*)

¹ Jizosi panizo nookwunu be oka n'elulu, "Otu nyerukna kparu vaini, o gba a mgbugba gburugburu. O gwu igbodo hne be zosna mkpuru isisi. O wuru oro olu ele nse, o gweru ekwu wam yisi n'aka ele jeelekota a, whoga zne n'eli berere.

² Nga ige o gho mkpuru duru, o ziznenu ele ernu ekwu wam otu ohi, ma o nahia be agwna mkpuru hi n'ekwu wam.

³ Be nwugwu a, pnia nhne, zihala a n'aka etekne.

⁴ O zizne kwno ohi berere, be liwa nye ki risi, mee kwno a nhne iwhnerne.

⁵ O zizne kwno nye berere, be gbu nye ki, nu agida ele berere, be pnia agwna nhne, gbu agwna be.

⁶ "Nyerukna wam nwernu otu badnu ke gwnarnu, bu nnwo o whnurnu n'anya, o zizne a n'ipne-aznu, kaa, 'Be josobisinu nnwo m.'"

⁷ "Kovu nu ele ernu ekwu wam kwuritaru n'esilawuru be, 'Ka bu nye jeeri mkpe nye nwe ekwu ka, anu va ma a gbu a, nhne mkpe a jobu ke ai.'"

⁸ Be nwugwu a gbu a, tuwhume a n'aznu ekwu wam.

⁹ "Kini bu nhne nye nwe ekwu wam jeeme? O jaava, gbumekwo ele ekwu wam, gweru ekwu wam nyewhete n'aka ele berere.

¹⁰ Anu gwnuna nhne be gbaru n'okwukwo nsq,
'Akaworugwu ke ele noowu oro juru,

kiyam gholam risi nsukala oro.

¹¹ Ka bu ernu Nyenwe ai,
o bu nhne ndu-ehni n'anya ai?"

¹² Be pio kpa be jonwugwu a, kwnornu nu be mahiaru nu be bu ele o kwno tnu elulu ka. Kovu nu be turu ogwnu agida ele badnu wam, be gharu a lahna.

Otu ntụ-eli

(*Mat 22:15-22; Luk 20:20-26*)

¹³ Be ziznenu a agwna ele Farisi nu ele dagwunu Erudu ma be nwugwu a n'ikwu-onu a.

¹⁴ Be vaa, kanu a, "Nye-zni-nhne, a magwu nu i kwu ezi oka, i so badnu anya, kwnornu nu i le badnu anya nu ruwhnu, kovu i neezni apna Chiokike n'ezi oka, o buru oma n'iwu a tu ntụ nyee Siza, sobu nu o buo oma? A tu sobu a tu?"

¹⁵ Jizosi mahiaru ruwhnu lawuru be. O kanu be, "Anu kwno kini naakpa m iru? Gweyanu m otu mkpuru iwai me ledu a anya."

¹⁶ Be gweyanu a, o sikwa be, "Nyele nwe ruwhnu nu rewhna ka?"

Be kaa, "Siza nwe."

¹⁷ Jizosi kanu be, "Anu nyee Siza nhne ke Siza, nyee masi Chiokike nhne ke Chiokike."

O du kpakara be ehni nu hne o zi.

*Ajji gbasiri olizo n'enwu**(Mat 22:23-33; Luk 20:27-40)*

¹⁸ Ele Sadusi, ka bu ele karu nu olizo n'enwu za, vakwnusi Jizosi, sika a,

¹⁹ "Nye-zni-nhne, Mozizi gbaru n'okwukwo nyee ai, kaa, 'O buru nu nwene rukna nyerukna nwu, ghasa nnwerne a, kovu nu o nwée rumu, nwene a rukna jooluru nnwerne a mụhianu nwene a rukna rumu.'

²⁰ Rumu nne esau zi, ke mbom luru nnwerne nwuma, nwée nnwo,

²¹ ke ebo kwuru a, o nwu masi, o nwée nnwo, ke eto masi otu aka wam.

²² Ele rukna esau wam nwée nnwo, n'ipne-aznu kpakara be nu nwerinya wam nwukparu.

²³ N'olizo n'enwu, nyerinya wam o joo bu nnwerne nyele n'esilawuru be, kwnornu nu be esau luru a nu nnwerne?"

²⁴ Jizosi saru be, "Anu gahieru apna, anu ma a nhne be gbaru n'okwukwo nso, mọ bu rikne ke Chiokike.

²⁵ Kwnornu nu nga be jeehi n'enwu lizo, be lu nnwerne, be gbọ nzi, kovu nu be nu lele ele enine izi n'oligwe.

²⁶ Nu nhne gbasiri olizo n'enwu ke ele nwuru onwu, anu gwnu na n'okwukwo Mozizi nu hne be gbaru nhne gbasiri isisi mati wam neerne bekwnu, kpa Chiokike jiri kanu a, 'Mawa bu Chiokike ke Eberham, nu Chiokike ke Aziki, nu Chiokike ke Jekpu'?

²⁷ O buo Chiokike ke ele nwuru onwu, kovu Chiokike ke ele zi budnu. Anu naagahie apna k'agida."

*Iwu ke kakwo ibne a**(Mat 22:34-40; Luk 10:25-28)*

²⁸ Otu nu rime ele zni iwu ele Ju varu, nu hne be neesikwarita ehni be ajji, o maharu nu Jizosi sakwaru be nkari, o sika a, kaa, "Ndaa ke bu ke mbom nu kpakara nhne be nyernu n'iwu?"

²⁹ Jizosi saru a, kaa, "Ke mbom bu ka, 'Anu bnote nsni Izireli, Nyenwe ai Chiokike ai, Nyenwe ai bu otu.

³⁰ I jowhnu Nyenwe ai bu Chiokike i n'anya, hite nu kpakara mkpoma i, hite nu kpakara enine i, hite nu kpakara oriri i, hite nu kpakara iknernema i.'

³¹ Ke ebo bu ka, 'I jowhnu nye agbatibi i n'anya lele ehni i.' O za nhne berere be nyernu n'iwu ke kakwo ka."

³² Nye zni iwu ele Ju wam kaa, "Owe! Nye-zni-nhne, i kalam n'ezi nu o bu otu Chiokike, nu o za nye berere, okwolem ya,

³³ nu o whnu a n'anya hite nu kpakara mkpoma i, hite nu kpakara oghohia i, hite nu kpakara iknernema i, nu o whnu nye agbatibi i n'anya lele ehni i, kakwo kpakara ariohna okporne bekwnu nu ariohna berere."

³⁴ Nga Jizosi whuru nu o sakwayaru a lele nye nwernu akoniche k'ezi, o kanu a, "I zila ikere nu hne eli-eze Chiokike zi."

Nga ka wheru, o zima nye berere nwernu rikne sika a ajji berere.

*Karaisi bu nnwo nyele?**(Mat 22:41-46; Luk 20:41-44)*

³⁵ Nga Jizosi neezni nhne n'Oro Nso Chiokike, o sika a, "Ndaa kpa ele zni iwu ele Ju jiri naakaa nu Karaisi bu Nnwọ Devidi?"

³⁶ Enine Nso hiri n'onu Devidi kwu oka, kaa,

'Nyenwe ai kannu Nyenwe m,
Daziri eli n'akarikwnunga m,
tem du nga me jaabita ele irno i
nu mkpururu ochi i lawuru.'

³⁷ Devidi n'iwihuru a noosukwu a Nyenwe a, ndaa kpa o jeeji bụru nnwọ Devidi?"

Anụ zeru ele zni iwu

ele Ju

(Mat 23:1-36; Luk 20:45-47)

Agida ele badnụ wam jiri snarnịma nurnu ikwu-ọnu a.

³⁸ Kpa Jizọsi neezni nhne, ọ kaa, "Anụ zeru ele zni iwu ele Ju, ele ọ naamasị be o wo iwo awura ogologo naagaghari, ọ naamasị be ele badnụ neebekwu be ikwu n'ahia,

³⁹ nụ ọ dazị n' risi ngadna n'oro ọgbako ele Ju, ma nụ ngadna kakwo mma n'ogbako iriri anụ.

⁴⁰ Be bụ ele neeridna ọro ele rinya nzi be nwurnu, neekpe ogologo okpukpe ma ele badnụ whnụ be. Be jaata awhnụwhnu ke kakwo."

Nkesi ke nwerinya

nzi a nwurnu

(Luk 21:1-4)

⁴¹ Jizọsi daziri n'oro Nso Chiokike kete ruwhnu nụ hne be bitaru nhne ntụ, ọ whnurnu agida ele badnụ hne be ọotusi iwai nụ nhne be ọotubna iwai. Agida ele kwu ọotusi k'agida.

⁴² Otu nyerinya, bụ womboni ke nzi a nwurnu varu, tūbna mkpuru iwai matị lawuru, ke whuyaru iwai matị.

⁴³ O sukwu ele sno apna a, kanu be, "Me kanu anu ezi oka, nwerinya ka bụ womboni ke nzi a nwurnu, tūsiri iwai kakwo ke kpakara ele berere tūbnarnu hne be bi iwai.

⁴⁴ Kpakara be masiri aka n'agida ekwnu be nwernu gweworu tūsi, kovu nū ya, womboni wam, tūsikworu kpakara nhne o nwernu o jiri wuru."

13

Be joolulu Oro Nso

Chiokike

(Mat 24:1,2; Luk 21:5,6)

¹ Nga Jizọsi whuyaru n'oro Nso Chiokike, otu nū rime ele sno apna a karu, "Nye-zni-nhne, le kpa ọro ele ka nū akaworugwu be jiri wu be nū mma."

² Jizọsi saru a, "I whnuna kpakara ọro kwu ele ka? Otu akaworugwu joo gwuzo n'olu ibne a hna, be jaakwnadna kpakara be n'eli."

Mmekpẹhni nū

Okpakna ehni

(Mat 24:3-14; Luk 21:7-19)

³ Nga ọ daziri eli n'olu Rugwu Olivu ke kegwu ruwhnu n'oro Nso Chiokike, Pita nū Jemisi, nū Joni, nū Anduru, sika a ichne, kaa,

⁴ "Kanụ aị nga kpakara nhne ele ka jeeme. Kini jeegesi ige nhne ka jeemezu?"

⁵ Jizọsi kanu be, "Anyā dū anū eli, ọ zị nye ọbula duhie anū.

⁶ Kwnornu nū agida ele badnū jaava nū rewhna m, naakaa, 'Mawa bụ Karaisi,' be jooduwhu agida ele badnū.

⁷ Nga anū ọonu ogwnu nū ọnutnu ogwnu, anū tūko ogwnu. Kpakara nhne ka jeebe ọsno mee, kovu okwukwo nhne yooduge.

⁸ Mba jeelizo megidne mba berere, eli-eze jeelizo megidne eli-eze berere, eli otne enye jaazi nū hne zị ọdo n'odo, okwnunyo jaazi. Kpakara nhne ka ọonu lele ọpanizo igbugbu ọmumu nnwọ.

9 “Kovu anya du anu eli hne anu zi. Be jeegweru anu nyee n'aka ele ikpe zi odo n'odo, be jaapnia anu nhne n'oro ogbako ele Ju zi odo n'odo, anu joogwuzo nu ruwhnu ele risi nu ele eze kwnornu nu me, ma o buru nhne akebne.

10 Be jeeberu osno kpo okwo izi oma nu kpakara mba.

11 Nga be nwugwuru anu gweya anu n'oro ikpe, anu beekwadia osno rigbu ehni anu n'oriri nhne anu jaakaa. Anu kwu nhne obula Chiokike karu anu kwu ige wam, kwnornu nu Enine Nso jookwunu anu onu anu.

12 Nwene jeegweru nwene a nyee n'aka enwu, nda jeegweru nnwo a nyemako. Rumu jeelizo megidne ele muru be, mee ma be nwu enwu.

13 Kpakara ele badnu joosno anu irno kwnornu nu me. Kovu be jooznohia nye obula ke jaaknata mkpoma, dazigidne du okwukwo kpakara nhne.

*Awhnuwhnu ke
ele Jeruselem jaata
(Mat 24:15-28; Luk 21:20-24)*

14 “Nga anu jowhnu nhne ru ru o ru ke zi nu hne o kwesile o zi, nye noogwunu nhne ka, ghohia, ele zi nu eli Judiya n'ige wam gbazne n'olu rugwu.

15 Nye ke zi n'olu oro, o hiednako, mabu bna nu rime oro zne kwahala nhne zi nu rime oro a.

16 Nye zi masi n'ekwu, o lagna aznu zne chiri iwo a.

17 Awhnuwhnu jaazinu ele rinya zi rime nu ele neechi nnwo rema n'ige wam.

18 Anu kpe okpukpe o buko n'ige okirika.

19 Kwnornu nu ige wam agida mmekpehni jaazi ke zikolele ke nga owa ke Chiokike kparu panizoru du kina, owe, o jazi kwno berere.

20 O buru nu Nyenwe ai mene obochi wam zi ichichi, o za badnu obula be jooznohiali. Kovu kwnornu nu ele o hohiaru, o mernu obochi wam ziri ichichi.

21 “N'ige wam, o buru nu badnu obula jaakanu anu, ‘Le, Karaisi zi hna,’ mabu ‘O zi piri,’ anu kweko.

22 Karaisi aghalaghala zi odo n'odo, nu ele owhnurninya aghalaghala zi odo n'odo jowo iwhe, neegesi nhne elekema nu nhne ndu-ehni zi odo n'odo, ma be duwu ele Chiokike hohiaru, o buru nu o jeekwe omume.

23 Kovu anya du anu eli, m bele m osno kakwnonu anu kpakara nhne nga be yeemene eme.

*Nnwọ ke Badnu wawa
(Mat 24:29-31; Luk 21:25-28)*

24 “N'ige wam, nga mmekpehni wam whemernu, ‘Ehnam jaagba ochichiri, enwa jeyene iwhe a,

25 mbọ ke oligwe jaadna, kpakara iknerna ke zi oligwe jooonio ohnio.’

26 “N'ige wam be jowhnu Nnwọ ke Badnu hne o naava n'okne iknerna nu igwugwu.

27 O jeezhala ele enine izi a be hite nu ruwhere eno k'owa chikota ele ke a Chiokike hohiaru, hite n'otu osotoma owa du n'osotoma berere.

*Muhia nhne hite n'isisi
be kwu figi
(Mat 24:32-35; Luk 21:29-33)*

28 “Anu muhia nhne hite n'isisi figi. Nga nkala a zilam piali piali, nooruhia masi okwukwo ikne, anu mahia nu nduru-mini zi ndundu.

²⁹ Kpam masi, nga anu jowhnu kpakara nhne ka hne be beteru neeme, anu mahia nu n'ige wam zi ndundu, n'onu-mgbo.

³⁰ Me kanu anu ezi oka, ebiri ka jeeuwe rja rja tem kpakara nhne ka mezu.

³¹ Oligwe nu owa jaagawhe, kovu kpakara ikwu-onu m jaagawhe rja rja.

O za nye magwu

obochi wam

(Mat 24:36-44)

³² “Kovu o za nye magwu obochi wam mubu otnu-ige wam, ele enine izi zi n'oligwe ma masi, Nnwọ wam ma masi. Okwolem Nda m kpọi bu nye magwu.

³³ Anya du anu eli, anu se nse, kpe okpukpe, kwnornu nu anu ma nga ige jaava.

³⁴ O nu lele hne badnu neezne nhne, nga o nowhoga n'oro a, o nyewhete oro a n'aka ele phi a, ma be legidne a anya. O nyee kwno nye obula nhne o jornu, nyee masi nye ke zi n'onu-mgbo iwu o se nse.

³⁵ Kam kpayaru, anu neese nse, kwnornu nu anu ma nga nyenwe oro jaava, mubu n'anyasnu, mubu n'esilawuru abali, mubu ige ochichi kwnarnu ekwna, mubu n'osisi.

³⁶ Anu se nse, o zi o va kpurugadnam, wnu hne anu neezni anyarna.

³⁷ Nhne me naakanu anu bu nhne me naakanu kpakara badnu, anu se nse.”

14

Be gbaru iznuznu

o gbu Jizosi

(Mat 25:1-5; Luk 22:1,2; Jon 11:45-53)

¹ O gwnarnu obochi lawuru o du Iriri Ogawhe nu Iriri Bredi Whuge Owhu. Ele risi arjohna nu ele zni iwu ele Ju noopio apna be jowwugwu Jizosi n'aghigo, ma be gbu a.

² Be karu, “Kovu o jobu n'Iriri ka, o zi a kpasu ohna.”

Be teru Jizosi mono

nu Betani

(Mat 26:6-13; Jon 12:1-8)

³ Nga Jizosi zi nu Betani n'oro Saimoni nye rjaru nchnichna, o dazi neeri wiri. Otu nyerinya bnanyarnu, nye vu mono otute zi n'ite alabasita gburu onu be ji ekarna nadi zi snam mee. O liwama ite wam, wusi mono otute wam nu risi Jizosi.

⁴ Agwna ele zi pii weru ehni k'agida naakaa, “Kini kpayaru be wuwuru mono otute ka etekne?”

⁵ Be znernu ere ya riwhu mkpuru iwai eto nyee ele mboni.” Be naatamunu nwerinya wam.

⁶ Jizosi kanu be, “Anu gharu a! Ndaa nhne anu kwno neemekpa a ehni? O rnuru ernu oma n'ehni m.

⁷ Ele mboni nu anu zi ige obula, ige obula anu pioru, anu nwernu rikne menu be nhne oma, kovu nu anu jeeuwehia m ige obula.

⁸ O mernu nhne o nwernu rikne o mee. O beru osno te ehni m mono, bikwata m n'olili m.

⁹ Me kanu anu ezi oka, hne nu hne obula be kporu okwo izi oma ka nu kpakara owa, be jookwuhia nhne nwerinya ka mernu, ma o buru nhne be jeei neechenwanya a.”

Judasị kweruru o re Jizọsi
(Mat 26:14-16; Luk 22:3-6)

¹⁰ Judasị Isikarijoti, otu nụ rime nri nụ badnụ lawụru ele sno apna a, zneknwusiri ele risi ariohna, ma o gweru Jizọsi nyee n'aka be.

¹¹ Nga be n'uru a, be nwụdnarnu, be kwe o nyee a iwai. O bete o pio oghere o jeegweru Jizọsi nyee be.

Jizọsi nụ ele sno apna a
riri Iriri Ogawhe

(Mat 26:17-25; Luk 22:7-14,21-23; Jọn 13:21-30)

¹² N'ọbochi mbom ke Iriri Brēdi Whúge Owhu, nga be naakwa ariohna atnurnu Ogawhe, ele sno apna a sịkwa Jizọsi, "Ndaa hne ị piuru ma a mekwatanụ ị ma i ri Iriri Ogawhe?"

¹³ O zihala badnụ lawụru nụ rime ele sno apna a, ọ kanụ be, "Anụ zne nụ rime Jeruselem, otu nyerukna vugwu idudu mini jaavakwnusi anụ, anụ sno a.

¹⁴ Anụ snornu a zne n'oro ọbula ọ bnaznenu, anụ kanụ nyenwe ọro wam, 'Nye-zni-nhne karụ, Ndaa hne ọro ele izne m zị, hne me nụ ele sno apna m jeeri Iriri Ogawhe?"

¹⁵ O jeegesi anụ otu ọnu-oro zị rude n'oro olu be mekwataru, bıkwata masị. Anụ mekwatanụ aị pii."

¹⁶ Ele sno apna a whoga, bna nụ Jeruselem whnụkpa kpakara nhne lele kpa Jizọsi karu. Be mekwata Iriri Ogawhe.

¹⁷ N'ogbednachi, Jizọsi nụ nri nụ badnụ lawụru ele sno apna a snornu va.

¹⁸ Nga be daziri ẹli neeri wiri, Jizọsi kaa, "N'ezi me kanụ anụ, otu badnụ n'esilawuru anụ, bụ nye me nụ a neerikọ wiri, jeere m."

¹⁹ Ọ panizo noogbu be igbugbu n'ovu, be neesikwa a n'otu n'otu, "Ọ bụ mawa sa?"

²⁰ Ọ kanụ be, "Ọ bụ otu nyenum nụ rime anụ nri nụ badnụ lawuru, nye me nụ a noosnukota wiri n'otu agbugba wiri.

²¹ Nnwọ ke Badnụ jaala lele kpa be gbarụ a n'okwukwo nsọ gbasiri a, kovu nụ awhnụwhnu jaazinu nyerukna wam be jeehi n'aka a re Nnwọ ke Badnụ. Ọ buru oma ọ buru be muna nyerukna wam."

Wiri Anyasnu Nyenwe aị
(Mat 26:26-30; Luk 22:14-20; 1 Kọr 11:23-25)

²² Nga be zị neeri wiri, Jizọsi gweru brēdi, tūnu Chiokike mmamma, nyawama a, nyee ele sno apna a, kaa, "Anụ gweru, ka bụ anọ-ẹhni m."

²³ O gweru okiko, tū mmamma o nyee be, kpakara nwornu nụ rime a.

²⁴ Ọ kanụ be, "Ka bụ ọvnarna m ke ọgba-njọ-ẹhni be nọowusi kwnornu agida badnụ.

²⁵ N'ezi me kanụ anụ, m jónwoma m manya hi n'isisi vajini whuya rja rja tem dū n'ọbochi me jónwo a ke ikne n'ẹli-eze Nda m."

²⁶ Nga be gwnụkparu eri, be whoga zne nụ Rugwu Olivu.

Jizọsi karu nụ Pita
jogonahoru a

(Mat 26:31-35; Luk 22:31-34; Jọn 13:36-38)

²⁷ Jizọsi kanụ be, "Kpakara anụ jaagbakwo ẹso, kwnornu nụ be gbarụ a n'okwukwo nsọ, kaa, 'M joogbu nye nọoznu atnurnu, atnurnu a jaagbakeme.'

²⁸ Kovu nga me hiri n'enwu lizo, m jeebe anụ ọsno zne Galili."

²⁹ Pita kanụ a, “Ọ bụrubi nụ kpakara badnụ gbakwo ẹso, kọvu m jáagba ẹso.”

³⁰ Jizọsi kanụ a, “N’ezi me naakanụ i, n’abalị ka, nga okne ọchichi náakwnana ẹkwna mgba lawuru, i jọgonahoru m mgba ẹto.”

³¹ Kọvu o kwusiri rikne k’agida kaa, “Ọ bụru nụ ọ zị mkpa nụ m joosno i nwu, m jọgonahoru i rịa rịa.” Kpakara be kakwnornu kpm.

Jizọsi kperu okpukpe

nụ Gẹsemani

(Mat 26:36-46; Luk 22:39-46)

³² Be vadu nụ hne be kwu Gẹsemani, Jizọsi kanụ ele sno apna a, “Anụ daziri hna, me kpe okpukpe.”

³³ O kwuru Pita nụ Jemisi nụ Jọni, ọ panizo o gbu a igbugbu nụ o wute a nụ mkpoma.

³⁴ O kanụ be, “O noogbu m mkpoma m igbugbu k’agida dụ ẹnwu, anụ dazigidne hna, se nse.”

³⁵ O znetu nụ ruwhnu, dna kpu ruwhnu n’eli kpe okpukpe, ma ige awhnwhnu ka gawheru a, ọ buri nụ o jeekwe omume.

³⁶ O kaa, “Papa, Nda m, i meli nhne dum, gwemenu m okiko awhnwhnu ka, kọvu ọ bụo nhne me piuru, kọvu nhne i piuru.”

³⁷ O va whnụ hne be neezni anyarna, ọ kanụ Pita, “Saijmoni, i neezni anyarna? I nwée rikne se nse otu ọtnu-ige?”

³⁸ Anụ se nse, kpe okpukpe, ọ zị anụ dnabna nụ rime ọrnurna. Enine ke badnụ zị bẹkwnu, kọvu nụ anọ-ẹhni zila rikne.”

³⁹ O zne kwno berere kpe okpukpe, nookwu otu ọka wam.

⁴⁰ O yahna berere whnụ ele sno apna a hne be neezni anyarna kwnornu nụ anya be zị rinya, be máa nhne be jaasa a.

⁴¹ O va ke mgba ẹto, ọ kanụ be, “Anụ zị kọriri neezni anyarna, noozukwa inwe? O kwna kpm, ọ dula, be neegweru Nnwọ ke Badnụ resi n’aka ele mmehie.

⁴² Anụ lizo, ma a zne. Le nye neegweru m nyee zị ndundu.”

Be nwudnenu Jizọsi

(Mat 26:47-56; Luk 22:47-53; Jón 18:3-12)

⁴³ Ngangam Jizọsi kpugwu ọka wam n’onu, Judasi, otu nụ rime nri nụ badnụ lawuru wam ele sno apna a varu, ya nụ agida badnụ ele ji ama-ogwnu nụ okpiri hite nụ hne ele risi ariohna nụ ele zni iwu ele Ju nụ ele okno badnụ zị va.

⁴⁴ Nye reru a nyenem be nhne elekema, kaa, “Nye ọbula ke me joosnutu onu nye wam bu ya, anụ nwugwu a, duru a zne.”

⁴⁵ Ngangam Judasi varu, o znekwusi Jizọsi, sukwu a, “Nye-zni-nhne.” O snutu a onu.

⁴⁶ Be tükwasi Jizọsi aka, nwugwusi a rikne.

⁴⁷ Otu n’ele gwuzogwu ndundu mnihiaru ama-ogwnu a, gbu nye izi nye risi ariohna, bihala a nsni.

⁴⁸ Jizọsi kanụ be, “Anụ kpagwu ama-ogwnu nụ okpiri whuya ọ nwugwu m lele m bu m nye neemegidne iwu eli?”

⁴⁹ Kpakara ọbochi me nụ anụ zị n’Oro Nso Chiokike hne me neezni anụ nhne, anụ nwúge m, kọvu kpakara nhne ka mernu ma nhne be gbaru n’okwukwo nsọ mezu.”

⁵⁰ Kpakara ele sno apna Jizọsi ghasaru a gbawhu.

51 Otu wikoro snogwu Jizōsi, nye ji iwo abochna kpusni eñni a. Be nwugwu a,
52 o sigbasi iwo abochna a, gbarụ ẹto gbawhu.

*Jizōsi gwuzo nụ ruwhnu
ele eze-ikpe*

(Mat 26:26,57-68; Luk 22:54,55,63-71; Jon 18:13,14,19-24)

53 Be duru Jizōsi znekwnusi nye risi arịohna, kpakara ele risi arịohna nụ ele okno badnụ nụ ele zni iwu ele Ju gbakoru.

54 Pita snornu a nụ hne zị ikere, bna nụ rime ederezi nye risi arịohna, o daziri n'esilawuru ele nse, naanya bekwnu.

55 Ele risi arịohna nụ kpakara ele eze-ikpe piuru nhne be ji gbagidne Jizōsi akebne ma be gbu a, be piohjala.

56 Agida ele badnụ gbarụ akebne aghalaghala gbagidne a, kovu nụ akebne be buo otu.

57 Agwna be lizo, gba akebne aghalaghala gbagidne a, naaka,

58 "A nurnu hne o karu, 'M jaakwnadna Oro Nso Chiokike ka be jiri aka wu, n'obochi ẹto m joowu Oro Nso berere ke be jile aka wu.' "

59 Kovu nụ akebne be dnakotala.

60 Nye risi arịohna lizoru n'esilawuru be sikwa Jizōsi, kaa, "O za nhne i naasa? Kini bu akebne ka ele badnụ ka naagbagidne i?"

61 Kovu Jizōsi kpusnirnu onu, o za nhne o saru. Nye risi arịohna sikwa kwno a, "O bu jiwa bu karaisi, Nnwọ Chiokike be goziri ogozi?"

62 Jizōsi kaa, "O bu mawa, anu joowhnu masi Nnwọ ke Badnụ hne o dazi n'akarikwnunga Chiokike ke bu Dikne, naava masi n'erumeru oligwe."

63 Nye risi arịohna dowama iwo a, kaa, "Ndaa nhne a kwno noopio ele akebne berere?"

64 Anu nurnu okwulu wam o kwuru kwugidne Chiokike, kini bu echiche anu?"

Kpakara be marnu a ikpe enwu, kaa, "O kwesiri o nwu enwu."

65 Agwna be panizo o gbusi a onu-mini, nụ o knesni a ruwhnu, nogo a aka, naakanu a, "Whnunu a! owhnurninya." Ele nse donawhuru be Jizōsi, nogo aka.

Pita gonahoru Jizōsi

(Mat 26:69-75; Luk 22:56-62; Luk 18:15-18,25-27)

66 Nga Pita zị nụ ederezi, otu nnwọ oknornokno ele neeznenu nye risi arịohna izi varu.

67 Nga o whnurnu Pita naanya bekwnu, o le a anya, kaa, "Ji n'iwuhuru i nụ Jizōsi nye Nazareti zị."

68 Kovu o goru kaa, "M maam, m ghohjala m nhne i naaka." O whoga zne n'onu-mgbo, okne ochichi kwna ekwna.

69 Woknornokno wam whnu a, o naakanu kwno ele gwuzo ndundu, "Nwerukna ka bu otu nụ rime be."

70 Pita go kwno berere.

Nga ige matị whemernu ele gwuzo ndundu kanu Pita berere, "N'ezi, i bu otu nụ rime be, kwnornu nụ i bu nye Galili."

71 O panizo nogo ngu, nodu risi, naaka, "M maam nyerukna ka anu nookwu oka a."

72 Ngangam, okne ochichi kwnarnu ekwna ke mgba lawuru. Pita chenwanya ikwu-onu wam Jizōsi kwunnu a, "Nga okne ochichi yaakwnana ekwna mgba lawuru, i joogonahoru m mgba ẹto." Nga o chenwanyarnu a, o kwna ekwna.

15

*Jizōsi gwuzo nū
ruwħnu Paileti*

(Mat 27:1,2,11-14; Luk 23:1-5; Jōn 18:28-38)

¹ N'ōnu ősisi, ele risi ariōhna nū ele okno badnū nū ele zni iwu ele Ju nū kpakara ele eze-ikpe gbarū iznužnu, be kne Jizōsi eriri, duru a zne, gweru a nyewhete n'aka Paileti.

² Paileti sīkwa a, “Ī bū eze ele Ju?”

Jizōsi sarū a, “Owe! Ji n'iwhuru i karū kpm.”

³ Ele risi ariōhna noobno a agīda nhne.

⁴ Paileti sīkwa kwno a berere, “Ō zá nhne i naasa? Le agīda nhne be noobno i.”

⁵ Kōvu Jizōsi sála nhne ọbula. Ka duru Paileti ẹhni.

Be marnu Jizōsi ikpe enwu

(Mat 27:15-26; Luk 23:13-25; Jōn 18:39--19:16)

⁶ N'iriri Ọgawhe ọbula Paileti nẹsigbasinu be otu nye ikelu, nye be rjoru a.

⁷ Otu nye zī n'ikelu be nookwu Barabasi nye zī n'ikelu ya nū ele lizōru lusi ele risi ọchichi ọgwnu. O gburu badnū n'ọgwnu wam.

⁸ Agīda ele badnū wam panižo n̄orio Paileti ma o menu be lele kpa o ji neemenu be.

⁹ Paileti sīkwaru be, “Anū piuru me sigbasinu anū eze ele Ju?”

¹⁰ Ō mahjari nū ele risi ariōhna kwuyannū a Jizōsi kwnornu ọwho-anya.

¹¹ Kōvu ele risi ariōhna sigidnenu igbudu ele badnū wam be kaa ọ sigbasinu be Barabasi, ọ b̄u Jizōsi.

¹² Paileti sīkwaru berere, “Ō bū kīni nhne anū piuru me mee nye wam anū nookwu eze ele Ju?”

¹³ Be siwama okokoba berere, “Kpogidne a n'ogba.”

¹⁴ Paileti sīkwa be, “Kīni mernu? Kīni bū nhne ọjo ke o mernu?”

Be siwama okokoba ke kakwo, “Kpogidne a n'ogba.”

¹⁵ Kpa Paileti piuru o mee nhne jaamasī agīda ele badnū wam, ọ sigbasinu be Barabasi. Nga ọ pniakworu Jizōsi nhne, o gweru a nyewhete be ma be kpogidne a n'ogba.

Ele ọgwnu kpariri Jizōsi

(Mat 27:27-31; Jōn 19:2,3)

¹⁶ Ele ọgwnu duru Jizōsi bna n'ọbna nye ọchichi. Be sukwukota kpakara odobiri ele ọgwnu.

¹⁷ Be wosi a iwo naachna odno odno, be kpa okpu igwnu, kpusi a nū risi.

¹⁸ Be panižo neebekwu a, naakaa, “A bekwulem ji, Eze ele Ju.”

¹⁹ Be gweru isisi n̄eli a nū risi, n̄ogbu a ọnu-mini, gbu mpnerne ọchi n'ẹli, kpōnu a risi ẹli.

²⁰ Nga be mekworu a nhne r̄umu, be t̄uma a iwo odno odno wam, wosi a kpakara iwo a. Be duru a zne ma be kpogidne a n'ogba.

Be kpogidnenu Jizōsi

n'ogba

(Mat 27:32-44; Luk 23:26-43; Jōn 19:17-27)

²¹ Be sigidne otu nye neewhe ewhe, kanū a, o vuru ọgba a. Nye ka bū Sajmoni nye Sirini, nda Alekizanda nū Rufōsi, hne o hi n'aznū mba naabnanya Jeruselem.

²² Be duru Jizōsi zne nū hne be kwu Ọlugota, ke bū “Hne Okpokoro Risi.”

23 Be nyega a manya be gwaru maa, kovu nu o nwona a.

24 Be kpogidne a n'ogba, ele ogwu ke iwo a n'esilawuru be nga be vukworu ogbanuchi ke gesiri ke nye obula jeegwe.

25 O bu nu otnu-ige tolu* n'osisi nga be kpogidneru a n'ogba.

26 Be gbaharu nhne be bnornu a, "Eze ele Ju."

27 Be kpogidneru ya nu ele rukna lawuru nooznu buznu n'olu ogba, otu badnu n'akarikwnunga a, nye ke berere n'akarita a. [

28 Nhne be gbaru n'okwukwo nsọ mezuru ke karu, "Be gwnukotaru ya n'ele aruru-eli.]"

29 Ele naagawhe naakaja a, neewhnuwhne risi be, naakaa, "Ngwanu! Ji nye jaakwnadna Oro Nso Chiokike, wu kwno a n'obochi eto.

30 Znhia ehni i, hi n'olu ogba hiedna."

31 O bu masi kpa ele risi arjohna nu ele zni iwo ele Ju naakpari a n'esilawuru be, naakaa, "O znhiaru ele berere, o nwée rikne znhia ehni a.

32 Karaisi eze Izireli, hi n'olu ogba hiedna kitna, ma a whnu, kweru masi."

Ele be kpogidneru be nu Jizosi n'olu ogba zi masi naakpari a.

Enwu Jizosi

(Mat 27:45-56; Luk 23:44-49; Jon 19:28-30)

33 Hite n'esilawuru iwhnehnie,† ochichiri gbasnirni kpakara eli wam du n'otnu-ige ke eto.‡

34 N'otnu-ige ke eto, Jizosi jiri okne nkoli siwama, "Eloi, Eloi lama sabatani," ke bu, "Chiokike m, Chiokike m, kini mernu i ghasaru m?"

35 Agwna ele gwuzogwu ndundu, nga be nuru a, be naakaa, "Bno nsni, o noosukwu Elaija."

36 Otu nyenum gbaru eso, gweru manya gbaru oka rusi sponji ke zi n'isisi nu rime a, nyee Jizosi ma o nwọ, kaa, "Gharu a, a lesi ma Elaija jaava o gwedna a n'ogba."

37 Jizosi gweru okne nkoli si okokoba, nwebime inwe.

38 Ikpe obnosni ke Oro Nso Chiokike gbawaru ebo hite n'olu du eli.

39 Nga nye risi ogwu neechi otu riwhu ele ogwu gwuzo ndundu kela ruwhu hne o zi, whuru kpa o jiri kna inwe, o kaa, "N'ezi, nyerukna ka buri Nnwọ Chiokike."

40 Ele rinya zi ikere neelekiri nhne neeme, agwna be bu Meri Magidalini, nu Meri nne Jemisi ke mati nu Josis, nu Salomi.

41 Ele ka snornu Jizosi nga o zi nu Galili, ele neeznenu a izi. Nu agida ele rinya berere ele snornu a va Jeruselem.

Be liri Jizosi

(Mat 27:57-61; Luk 23:50-56; Jon 19:38-42)

42 Nga o duru ogbednachi, hne o bu obochi ojknernu, ke bu obochi begwu Obochi Ozukwa Inwe osno,

43 Josefu nye Arimatiya varu, nye bu otu nu ele ikpe, bu masi nye be noosobisinu, nye neese eli-eze Chiokike, nwerukna ka ji anya rikne znekwnusi Pajleti rjo a iznu Jizosi.

44 O gbagwojiri Pajleti anya nu Jizosi nwunam. O sukwu nye risi ogwu wam sikwa a ma o nwuna.

45 Nga o mahiaru n'onu nye risi ogwu wam nu Jizosi nwunam, o kweru be vute Josefu iznu a.

* 15:25 otnu-ige tolu: okwukwo ke mbom kwuru ige awa ke eto † 15:33 n'esilawuru iwhnehnie: okwukwo ke mbom kwuru ige awa isunu ‡ 15:33 otnu-ige ke eto: okwukwo ke mbom kwuru ige awa tolu

46 Josefu zuya ikpe marnu mma, nga o vudnarnu iznu a, o whu a n'ikpe marnu mma wam, vubna a nu rime ilili ke be gwuharu nu rime rugwu. O gweru otu rugwu kpunsni onu ilili wam.

47 Meri Magidalini, nu Meri nne Josis whuru hne o liri a.

16

Jizosi lizoru n'enwu

(Mat 28:1-8; Luk 24:1-12; Jon 20:1-10)

1 Nga Obochi Ozukwa Inwe wheru, Meri Magidalini nu Meri nne Jemisi, nu Salomi, zuyaru mono neesni eknarna oma zi odo n'odo ma be zne te iznu Jizosi mono.

2 N'onu osisi n'obochi mbom n'ikwezu, be znernu n'ilili a nga ennam waru.

3 Be nookwurita n'ehni be, "Nyele jookpumeni ai rugwu wam n'onu ilili?"

4 Nga be lelizoru anya be whuru nu be vumenem rugwu wam. O zi rinya k'agida.

5 Be bna rime ilili whuru wikoro daziguwu n'akarikwnunga, o wogwu awura abochna, ogwnu turu be.

6 O kanu be, "Ogwu tuko anu. Anu noopio Jizosi nye Nazareti, nye be kpoigidnenu n'ogba. O lizalam, o zila hna. Le hne be bitaru a.

7 Kovu anu la, kanu ele sno apna a nu Pita, 'O belem anu osno neezne Galili, anu jowhnu a pii, lele kpa o kannu anu.' "

8 Be whoga, hi n'ilili wam gbahala, ehni naama be ririri nu ogbagwoji anya jigwu be, o za nye be kannu nhne obula, kwnornu nu ogwnu notu be.

Jizosi mernu Meri Magidalini

whuru a anya

(Mat 28:9,10; Jon 20:11-18)

9 Nga Jizosi hiri n'enwu lizo n'onu osisi n'obochi mbom n'ikwezu, o beru osno gesi ehni a Meri Magidalini, nye o chihalaru renwu ojo esau nu rime a.

10 O zne kanu ele nu Jizosi daziguwu nu mbom hne be zi naagba mkpe, naakwna ekwna.

11 Nga be uru nu Jizosi zi budnu, nu ya n'iwuru a whuru a, be kwéle.

12 Nga ka wheru, Jizosi mernu badnu lawuru whuru a n'ozizi berere nga be neezne aznu mba.

13 Be lahna zne kanu ele gwarnu, be kwéle nhne be kwuru masi.

14 Omekwo, Jizosi whuru iwuhne hne nri nu otu badnu wam ele sno apna a zi neeri wiri. O bnanu be mbna kwnornu n'okwe ekwe be nu mkpoma osi rikne be, ke mernu be kwéle ikwu-onu ele whuru a nga o hiri n'enwu lizo.

15 O kanu be, "Anu zne nu kpakara owa kponu kpakara badnu okwo izi oma.

16 Nye kweruru, be wu a mini, bu nye be jooznohia a, nye ke kwéle, be jaama a ikpe.

17 Nhne elekema ele ka joosno ele kweru, be jaachihala renwu ojo nu rewhna m, be jookwu oka nu riro ikne zi odo n'odo.

18 Be jaachi agwo n'aka, o buru nu be nwu nhne obula ke jaakpaya enwu, o za nhne o jeeme be, be jootukwasi ele nrira aka, mee ehni buru be oma."

Jizosi laru n'oligwe

(Luk 24:50-53; Eru 1:9-11)

19 Nga Nyenwe ai Jizosi kwukwonnu be oka, be gwelizo a la n'oligwe, o daziri eli n'akarikwnunga Chiokike.

²⁰ Ele sno apna a whogaru n'okpo okwo izi oma hne obula, Nyenwe aj noosno be, n'ornu ernu, neegesi nu ikwu-onu Chiokike bu ezi oka, hite n'ernu ndu-ehni zi odo n'odo ke be n'ornu.]

Izi ọma lele kpa Lukwu gbarụ a n'ọkwukwo Nhne gbasiri ọkwukwo ka

Izi ọma lele kpa Lukwu gbarụ a n'ọkwukwo neegesi Jizọsi lele Nye Ọznohia Izireli nù Nye Ọznohia ke kpakara ele badnù zì n'ọwa. Lukwu gbarụ nù Enine Nyenwe aì sukwuru Jizọsi ma o zni “ele mboni izi ọma.” Lukwu nye dibịa snornu ele sno apna Jizọsi n'izi ọma be znirni, ma Polu nye izi Jizọsi. Ọ sịkwahiaru nhne n'ọnu ele whnurnu Jizọsi nga ọ zì n'ọwa. Ka mernu o nwernu ọnu rikne ọ gbanụ Tiofilọsi ọkwukwo. Lukwu kwuru nhne gbasiri budnu Jizọsi, hite n'omumu a, ige ọ bụ wikoro, ọnu a, ẹnwu a, olizọ n'ẹnwu tem dụ nga Jizọsi larụ oligwe.

Nhne zì n'ọkwukwo ka

Omumu Jizọsi nù wikoro a (1:1--2:52)

Ọwuwu mini Jizọsi nù ọrnurna a (3:1--4:13)

Ernu Jizọsi nù rime Galili (4:14--9:50)

Ernu Jizọsi nù apna nga o neezne Jeruselem (9:51--19:27)

Ernu Jizọsi nù rime Jeruselem (19:28--20:47)

Ọka Jizọsi kwuru gbasiri nhne ke jeeme nù ruwhnu (21:1-38)

Ernu Jizọsi nù olizọ n'ẹnwu a (22:1--24:53)

Nye gbarụ ọkwukwo ka: Lukwu nye dibịa

Risi nhne o kwno gba a: O gesi ọtnutnu zuru ozu gbasiri budnu nù ọnu Jizọsi Karaịsi, obirizi a n'ẹhni ele be neemegbu, nù ọznohia ke ele buo ele Ju.

¹ Tiofilọsi, agịda ele badnù yisiri aka be n'ogba ọkwukwo gbasiri nhne be mernu n'esilawuru aì,

² lele kpa be nyernu aì n'aka a bita. Ele nyernu aì bụ ele hiri n'ọpanizo gweru anya be whnù be, buru ele izi ikwu-ọnu Chiokike.

³ Ọ buru ọma hne me snornu kpakara nhne nkari hite nù mbom, me gbanụ ì ọkwukwo nù ekere nù ekere, Tiofilọsi zì igwugwu,

⁴ mee ma ì mahia nù kpakara nhne be jiri ikwu-ọnu ọnu zni ì bụ nhne kwesiri ọkwnata mkpoma.

Omumu Jóni Nye Wụ Mini

⁵ N'ige Erọdu bụ eze Judiya, otu nye ọkwa arịohna zì, be kwu Zakaraya, ke hi n'oro Abija, nnwerne a bụ Elizabeti nye hi n'ẹbnurnu Erọni.

⁶ Be lawuru bụ ele ọma nù ruwhnu Chiokike, be naabita kpakara nhne Nyenwe aì nyernu n'iwu, be nwée ọru.

⁷ Kọvu nù be nwée nnwọ, kwnornu nù Elizabeti bụ nyerinya rẹkpa nnwọ a mesnirni emesni. Be lawuru menem okno badnù.

⁸ Otu ọbochi, ige ele otu Zakaraya nọornu ọnu, Zakaraya zì nọornu ọnu nye arịohna nù ruwhnu Chiokike,

⁹ lele kpa ọnu arịohna jiri zì, ọ dnabnarnu nù ọ bụ ya jọokporne isensi n'Orọ Nso Nyenwe aì.

¹⁰ Kpakara ele Ju neekpe okpukpe n'ederezi ige ọ nọokporne isensi.

¹¹ Enine izi Nyenwe aì mernu Zakaraya whnù a anya hne o gwuzo n'akarikwnunga ojo arịohna hne be nọokporne isensi.

¹² Nga Zakaraya whnurnu a, mkpoma larụ a mini, ogwnu tumako a.

¹³ Enine izi wam kanu a, “Ogwnu tuko ì, Zakaraya, Chiokike nuna m okpukpe i. Elizabeti nnwerne ì joomunu ì nnwọ rukna, ì jookwu rẹwhna a Jóni.

14 I j̄oonwudna, mkp̄oma j̄oso masi i n'onu, agida ele badnu jeenwe snarnima kwnornu omumu a.

15 O j̄oobu nye kwu n'anya Nyenwe a. O j̄oonwo manya m̄obu nhne obula ke bna n'anya r̄ia r̄ia. Enine N̄so Chiokike jeejih̄ia n̄u rime a, hite n̄u rime ruwho nne a.

16 O jeeme agida ele Izireli hiehnakwnusi Nyenwe a Chiokike be.

17 O jeezne n̄u ruwhnu Nyenwe a n'enine n̄u rikne Ēlaj̄a. O jeeme ele nda tuh̄nasna mkp̄oma hne rūmu be zi, ma ele za noobno n̄s̄ni bna n'apna ak̄oniche ele oma, o jikn̄ernu Nyenwe a ele kwesiri a."

18 Zakaraya s̄ikwa enine izi wam, "Ndaa nhne me jeeji mah̄ia ka? Le, me n̄u nnwerne m̄ menem okno badnu k'agida."

19 Enine izi wam saru a, "Mawa bu Gebureli, nye noogwuzo n̄u ruwhnu Chiokike. Chiokike ziyaru m me kanu i oka ka nu o zni i izi oma ka.

20 Le, i jaadna mgbu, i j̄eenwe rikne kwu oka tem du obochi k̄pakara nhne ka jeeme, kwnornu n̄u i kw̄ele ikwu-onu m ke jeemezu n'ige a."

21 Ele badnu wam zi neese Zakaraya n'ederezi, be naari nhne k̄payaru o gburu okwnu n'Oro N̄so Chiokike.

22 Nga o wh̄yaru, o nw̄ee rikne o kwunu be oka. Be mah̄ia n̄u o wh̄nurnu owh̄nurninya n'Oro N̄so Chiokike, o neewhenu be aka, k̄ovu o nw̄ee rikne kwunu be oka.

23 Nga ige ernu a zuru n'Oro N̄so Chiokike, Zakaraya lahna oro a.

24 Nga nhne ka mekworu, Ēlizabeti nnwerne a t̄uru rime, o tugwa ēhni a enwa isne n̄u rime oro.

25 O kaa, "Ka bu nhne Nyenwe a mennu m, o gesilem ruwhnu oma a, ma o kwnosnama iw̄hnerne m n'esilawuru ele badnu."

Be kwuru oka gbasiri

omumu Jiz̄osi

26 N'enwa isunu a,* Chiokike zizn̄ernu enine izi Gebureli zne n'eli Nazar̄eti ke zi n̄u Galili,

27 znekwnusi otu nnwo oknornokno māa nyerukna be kwu Meri, nye Josefu ke hi n'ebnurnu Devidi kweru o lu.

28 Enine izi wam zne hne o zi, kaa, "M bekwulem o, ji nye Nyenwe a dagwunu, i bu nye owa oma."

29 Mkp̄oma laru Meri mini nga o nurnu ikwu-onu a, o naagbadi n̄u mkp̄oma a okpa ibekwu ke n̄u kpa.

30 K̄ovu enine izi wam kanu a, "Meri, ogwnu t̄uko i, Chiokike menu i oru k'agida.

31 I j̄ootu rime, muh̄ia nnwo rukna, i jookwu a Jiz̄osi.

32 O j̄oobu nye kwu, be jookwu a Nnwo Nye Kakwo Nhne Dum Olu. Nyenwe a Chiokike jeenye a ngadna eze nda a, Devidi.

33 O jaachi oro Jek̄opu tim tom, ēli-eze a j̄ookwo okwo."

34 Meri saru enine izi wam, "Ndaa kpa be jeeme nhne ka, hne me māa nyerukna?"

35 Enine izi wam saru a, "Enine N̄so jaadnakwas̄i i, ikn̄ernema ke Nye Kakwo Nhne Dum Olu jookpusni i. Be jookwu nnwo wam zi ns̄o ke i j̄oomu Nnwo Chiokike.

36 Le, Ēlizabeti nwene i rinya zi rime omumu n'okno badnu a, o bu nye be nookwu nnwerne nw̄ee nnwo, ka bu enwa isunu a.

37 O za nhne nyirni Chiokike."

* 1:26 Ka bu kpa Ēlizabeti t̄uru rime.

38 Meri saru, “Le, m bu m nnwo izi ke Nyenwe ai, o menu m lele kpa i kwuru.” Enine izi wam gharu a la.

Meri znernu o lekasi

Elizabethi

39 Ige wam, Meri jiknernu wara wara zne n'otu eli rugwu ke zi nu Judiya.

40 O bna n'oro Zakaraya bekwusi Elizabethi.

41 Nga Elizabethi nurnu ibekwu Meri, nnwo zi a nu ruwho wulizoru olu. Enine Nso jipiyaru Elizabethi.

42 O gweru okne nkoli kwu oka kaa, “I bu nye owa oma n'esilawuru ele rinya, nnwo ke i joomu bu masi nye owa oma.

43 M bu m nye ruwhnu oma nu nne ke Nyenwe m jaava lekasi m.

44 Kwnornu nu kpa me nurnu ibekwu i, nnwo zi m nu ruwho wulizoru olu nu snarnima.

45 I bu nye owa oma kwnornu nu i kweru nhne Nyenwe ai kwuru nu o jeemezu a.”

Meri gwnurnu eri ojija

46 Meri kaa,

“Mkpoma m ja Nyenwe ai,

47 ovu m nonwudna onwudna kwnornu nu Chiokike Nye Oznohia m,

48 kwnornu nu o chenwanyarnu

nnwo izi a ovu hieru eli.

Hite nu kitna kpakara ele ebiri jookwu m nye owa oma,

49 kwnornu nu Chiokike Nye bu Dikne menu m nhne hna ezi, rewhna a zi nsu.

50 Chiokike nonodonu ele notu ogwnu a obirizi,

hite n'otu ebiri du ebiri berere.

51 O ji aka dikne a mee nhne hna ezi,

o chisaru kpakara ele oknomokno nu kpakara mmuma be.

52 O gwednarnu ele eze nu ngadna eze be,

o gwelizoru ele ovu hieru eli.

53 O nyejilem ele wiri nonogwnu ruwho,

kovu o gbataru ele eze aka.

54 O yinu nye izi a Izireli aka,

o chenwanyarnu o donu a obirizi,

55 ke o kweru Ebereham nu ebnurnu a mkwna tim tom,

lele kpa o kanu ele nda ai.”

56 Meri daziri n'oro Elizabethi enwa eto, lahna oro a.

Omumu Joni Nye Wu Mini

57 Ige omumu nnwo Elizabethi duru, o mphia nnwo rukna.

58 Ele agbatibi† a nu rumu nwene a nurnu nu Nyenwe ai donnu a obirizi k'agida, be snornu a nwudna.

59 O du n'obochi esato, be varu o kpa nnwo wam nka. Be noopio o jita a rewhna Zakaraya ma o buru ogbo nda a,

60 kovu nne a karu, “Oza, rewhna a bu Joni.”

61 Be kanu a, “O za nye naaza rewhna ka n'esilawuru ele ke i.”

62 Be whenu nda a aka, jikwa a rewhna be jookwu nnwo wam.

63 O kaa be nyee a nhne ogba okwukwo, o gbagwojuru be anya nga o gbasiri, “Rewhna a bu Joni.”

† 1:58 agbatibi: ele ya nu a wuta ndundu

⁶⁴ Ngangam, ọnu a kpumernu, riro a tọma, o bete nookwu ọka, naaznarni Chiokike.

⁶⁵ Ogwnu turu kpakara ele agbatibi be, be wheke ọtnutnu ka kpakara ẹli rugwu Judiya.

⁶⁶ Nye ọbula ke nurnu a zi nechenwu, be neşikwa, “Okpa badnu kini bu nhne nnwo ka jọobu?” Kwnornu nu be whnurnu nu aka Nyenwe aji zi nehni a.

Zakaraya gwnurnu

eri ojija

⁶⁷ Enine Nso jipiyaru Zakaraya nda Joni, o whnu ọwhnurninya, kaa,

⁶⁸ “Ojija zinu Nyenwe aji, Chiokike ke Izireli,
kwnornu nu o lekasiri ma o gbahia ele ke a.

⁶⁹ O gweyaru nye dikne jọoznohia aji
hite n'oro nnwo izi a Devidi,

⁷⁰ Iele kpa o kwuru hite n'onu ele ọwhnurninya a zi nso agida ige wheru ewhe.

⁷¹ O jọoznohia aji hite n'aka kpakara ele sno aji irno.

⁷² O donnu ele nda aji obirizi,
o chenwanyarnu ọgba-njo-ehni nso a.

⁷³ O kwesiri Eberham nda aji mkwna rikne,

⁷⁴ O dohia aji n'aka ele irno aji,
ma a kpenu aji n'enne ogwnu,

⁷⁵ ma a ziri nso nu ele mee mma nu ruwhnu a kpakara budnu aji.

⁷⁶ Ji, nnwo m mati, be jookwu i nye ọwhnurninya ke Nye Kakwa Nhne Dum
Olu,

kwnornu nu i jeezne nu ruwhnu Nyenwe aji neemekwatanu a apna.

⁷⁷ I jeeme ele ke a mahia ọznohia,
hite n'ogbarunu be mmehie be.

⁷⁸ Hite n'obirizi nu ovu oma ke Chiokike aji,
o jeeme ehnani ọomukwasi aji hite n'oligwe,

⁷⁹ iwhne joomukwasi ele zi n'ochichiri
nu ele zi n'oyinyo ke enwu,
noodumako ochi aji n'apna udno.”

⁸⁰ Nnwo wam nooso oso, gbasiri rikne nu enine, o wu n'eli-ikpa tem du nga be gesiri a ele Izireli.

2

Omumu Jizosi *(Mat 1:18-25)*

¹ N'ige wam, eze Siza Ọgositosi yiri iwu be gbasiri rewhna kpakara ele wu n'eli ele Rom neechi n'okwukwo.

² (Ka bu ọgba rewhna n'okwukwo ke mbom nga Kwirinosi bu nye neechi Siriya.)

³ Nye ọbula la n'eli a zne gba rewhna n'okwukwo.

⁴ Josefu hiri n'eli Nazareti ke zi nu Galili zne Betilehem nu Judiya, ẹli be murnu Devidi, kwnornu nu o hi n'ebnurnu oro Devidi.

⁵ O zneru ma be gbasiri rewhna ya nu Meri n'okwukwo, bu nwerinya o kweru nu o jpolu, nye zi rime omumu.

⁶ Nga be zi nu Betilehem, ige Meri joomu nnwo duru.

⁷ O muhia oziri nnwo rukna a, o whu a n'ikpe nute a nu rime nhne be biganu anohia wiri, kwnornu nu o za oro zinu be n'oro ele izne.

*Ele n̄oznu atn̄urnu**n̄u ele enine izi*

⁸ Ele n̄oznu atn̄urnu z̄i n'eli wam n̄u rime ɔhia neese atn̄urnu be n'abal̄i.

⁹ Enine izi Nyenwe āi mernu be whn̄u a anya, igwugwu Nyenwe āi mukwasiri be, ogwnu t̄uru be k'aḡida.

¹⁰ K̄ovu enine izi wam kan̄u be, "Ogwnu t̄uko an̄u. An̄u bno nsn̄i, m gweyan̄u m an̄u izi ɔma ke snarn̄ima ke jaaz̄inu kpakara ele badn̄u.

¹¹ Tnawa, n'eli Devidi be m̄unnu an̄u Nye Ọznohia, Karāisi Nyenwe āi.*

¹² Ka b̄u nhne an̄u jeeji mah̄ia a, an̄u ɔ̄owhnu nnw̄o ikne be wh̄uru n'ikpe nute n̄u rime nhne be biɔanu an̄ohia wiri."

¹³ Ngangan, aḡida ele enine izi wh̄yaru snornu enine izi wam naaznarn̄i Chiokike, naakaa,

¹⁴ "Oson'anya dum b̄uru ke Chiokike n̄u hne kakwo n'olu, udno z̄iri n'owa n'esilaw̄uru ele nhne be naamas̄i a."

¹⁵ Nga ele enine izi wam lahnarn̄u oligwe, ele n̄oznu atn̄urnu wam kan̄u ɛhni be, "An̄u va ma a zne B̄etilehem whn̄u nhne mernu ke Nyenwe āi kann̄u āi."

¹⁶ Be gweru ɛso gweru izne zne whn̄u Meri n̄u Josefu, n̄u nnw̄o ikne wam be nuteru n̄u rime nhne be biɔanu an̄ohia wiri.

¹⁷ Nga be whn̄urnu a, be tn̄usa nhne enine izi kwuru gbas̄iri nnw̄o ikne ka.

¹⁸ O duru kpakara ele n̄urnu nhne ele n̄oznu atn̄urnu wam kwuru ɛhni.

¹⁹ K̄ovu Meri b̄itaru kpakara nhne ka n̄u mkp̄oma a, n̄echinwu a.

²⁰ Ele n̄oznu atn̄urnu wam lahnarn̄u, n̄ogwnu eri, naaja Chiokike kwnornu n̄u nhne be n̄urnu, whn̄u mas̄i lele kpa enine izi wam kan̄u be.

Be j̄iri Jiz̄osi r̄ewhna

²¹ N'obochi ɛsato, be va ɔ kpa nnw̄o wam nka, be j̄ita r̄ewhna a Jiz̄osi, b̄u r̄ewhna enine izi wam kwuru a s̄u be t̄uru rime a.

*Be kwubnarnu Jiz̄osi**Oro Ns̄o Chiokike*

²² Ige duru ma Josefu n̄u Meri mee ma be z̄iri riɔhna lele kpa Iwu Mozizi kwuru, be kwuru nnw̄o wam zne Jeruselem, chete a n̄u ruwhnu Nyenwe āi.

²³ Lele kpa be gbar̄u a n'iwu Nyenwe āi, "Be jaab̄itanu Nyenwe āi nnw̄o rukna ɔbula be beru ɔso m̄u ns̄o."

²⁴ Be kwa ar̄iohna lele kpa iwu Nyenwe āi kwuru, "Nduru law̄uru m̄obu rumu weresi law̄uru."

²⁵ Otu nwerukna z̄i n̄u Jeruselem, nye r̄ewhna a b̄u Simīoni, nye mee mma, nye n̄otuu ogwnu Chiokike. Ọ b̄u nye neese ɔznohia ke Izirēli, Enine Ns̄o z̄i n'ehni a.

²⁶ Enine Ns̄o kann̄u a n̄u ɔ j̄onwu ɛnwu tem ɔ whn̄u Karāisi Nyenwe āi.

²⁷ Enine Ns̄o duru a zne n'Oro Ns̄o Chiokike nga ele m̄urnu Jiz̄osi var̄u ọ menu a lele kpa Iwu Mozizi kwuru.

²⁸ Simīoni kwuru nnw̄o wam n'aka a, znarn̄i Chiokike, kaa,

²⁹ "Nyenwe m, kweru ma nnw̄o izi i la n'udno, lele kpa i kweru m mkwna,

³⁰ kwnornu n̄u anya m whn̄unam ɔznohia i,

³¹ ke i b̄ikwataru n'anya kpakara ele badn̄u,

³² iw̄hne ke jookpume nhne gbas̄iri i nyee ele b̄uo ele Ju,

nh̄u igwugwu ke ele ke i Izirēli."

³³ Nhne be kwuru gbas̄iri nnw̄o ikne ka duru nda a n̄u nne a ɛhni.

* **2:11 Karāisi:** Karāisi b̄u Nye Ọznohia wam Chiokike kweru mkwna ọ ziya.

³⁴ Simiṣi gozi be, kanu Meri, nne a, “Nnwọ ka jọburu nhne jaakpahia ọdida nū olizọ agida badnu n'Izireli, buru masi nhne elekema be jookwu ọka megidne.

³⁵ O jookpume echiche agida ele badnu. Kọvu nhne igbugbu jọduwa mkpoma i lele ama-ogwuu.”

³⁶ Otu nwerinya owhnurninya zi, nye rewhna a bu Ana, adna Fanueli, ke hi n'ebnurnu Asa whuya. Nwerinya ka nu nzi a wuru awha esau kpoi,

³⁷ Kọvu o menem okno badnu ke gbaru nri awha esato nu eno, o bu nnwerne nzi a nwurnu onwu. O za nọwhoga n'Oro Nso Chiokike iwhnehnie nu abali, o zi neekpe okpukpe, noovu onu.

³⁸ O bnanyarnu n'ige wam, o tunu Chiokike mmamma, kwu ọka gbasiri nnwọ ikne wam, kanu kpakara ele neese ogbahia ke Jeruselem.

Be kwuru Jizosi lahna Nazareti

³⁹ Nga Josefu nu Meri mekworu kpakara nhne iwu Nyenwe a kwuru, be laha Galili zne eli ke be, Nazareti.

⁴⁰ Watakiri wam nooso, gbasiri rikne, akoniche jihjiru nu rime a, oru Chiokike zi masi a n'ehni.

Wikoro Jizosi zi n'Oro Nso Chiokike

⁴¹ Ele murnu a neezne Jeruselem kpakara awha n'Iriri Ogawhe.†

⁴² Nga Jizosi gbaru nri nu awha lawuru, be zne Iriri Ogawhe lele kpa be mesi.

⁴³ Nga be mekworu Iriri wam, be bete o laha oro be, kọvu wikoro Jizosi daziri nu Jeruselem, kọvu ele murnu a ma.

⁴⁴ Be neche nu o zi n'igbudu badnu, be zne izne otu obochi, be noopio a n'esilawuru ele enyi be nu rumu nwene be.

⁴⁵ Nga be whuna a, be hiehna nu Jeruselem noopio a.

⁴⁶ N'obochi ke eto, be whu a n'Oro Nso Chiokike, hne o dazi n'esilawuru ele zni iwu ele ju, noobno nsni nhne be nookwu, nesisikwa be ajiji.

⁴⁷ Kpakara ele nurnu ikwu-onu a nu akọ zi nu nhne o saru be, o duru be ehni.

⁴⁸ Nga ele murnu a whurnu a, o du be ehni, nne a kanu a, “Nnwọ m, kini kpayaru i jiri mee me nu nda i kpa? Me nu nda i ji anya-mini noopio i.”

⁴⁹ O sikwa be, “Kini kpayaru anu noopio m? Anu ma nu m jorumu ernu Nda m?”

⁵⁰ Kọvu be ghoyage nhne o kannu be.

⁵¹ Jizosi snornu be la Nazareti, noobnonu be nsni. Kọvu nne a bitaru kpakara nhne ka nu mkpoma a.

⁵² Jizosi nooso n'akoniche nu dimkpa, neenwe oru nu ruwhnu badnu nu Chiokike.

3

Ikwu-onu Joni Nye Wu Mini

(Mat 3:1-12; Mak 1:1-8; Jon 1:19-28)

¹ N'awha ke nri nu isne ke ochichi Taberosi Siza, nga Pontiosi Paileti neechi Judiya, nga Erudu neechi Galili, nwene a rukna Filipu neechi Ituria nu Tirakonitisi, Lisanasi neechi Abilini,

† 2:41 *Iriri Ogawhe*: Iriri Ogawhe bu ige ele ju neechenwanya nga Chiokike dophiaru be n'ohi n'aka ele Ijipiti. Okwnehala 12:1-27; Ditaronomi 16:1-8.

² Anasị nụ Kayafasị bụ ele risi arịohna, ige wam ikwu-ọnu Chiokike duru Jōni, nnwọ Zakaraya nsnị n'ẹli-ikpa.

³ O zne nụ kpakara ẹli ke zị Osimini Jodani gburugburu, nọokpo okwo naakaa ele badnụ tũhnasna mkpoma ma be wụ be mini, ma Chiokike gbarunu be mmehie.

⁴ Lele kpa be gbarụ a n'okwukwo nsọ hite n'ọnu Azaya nye ọwhnurninya, kaa, "Akpiri otu badnụ nọokpo okwo n'ẹli-ikpa, anụ mekwata apna Nyenwe aị, anụ mee apna a snị asnị.

⁵ Be jeemesni kpakara ngwulangwu, be jaakwnadna kpakara rugwu nụ rugwu matị. Kpakara apna zị mgbahirigodo jaasnị asnị, kpakara apna zị ndagwurugwu jaazị snam.

⁶ Kpakara ele badnụ jowhnu ọznohia Chiokike."

⁷ Jōni kanụ igbudu badnụ nọwhokwnusi a ma o wụ be mini, "Anụ ẹbnurnu agwo, nyele kannụ anụ gbanahoru ovu owe ẹhni Chiokike ke naava?"

⁸ Anụ minya mkpuru ke neegesi nụ anụ tũhnasarnu mkpoma. Anụ kaa nụ Eberham bụ nda anụ. Kwnornu me kanụ anụ ezi oka, Chiokike nwernu rikne mee kpakara akaworugwu ka gho rumu Eberham.

⁹ Be bitalam ehngwe n'ikwnu kpakara isisi, isisi ọbula ke minyinala mkpuru oma, be joogbudna a, tũbna nụ rime bẹkwnu."

¹⁰ Ele badnụ wam sịkwa a, "Kini bụ nhne a jeeme?"

¹¹ Jōni saru be, "Nye nwernu iwo lawuru, o kesi nye nwée otu, nye nwernu wiri, mee masị kpatm."

¹² Ele ọna ntụ varu ma Jōni wụ be mini, be sịkwa a, "Nye-zni-nhne, kini bụ nhne a jeeme?"

¹³ Jōni saru be, "Anụ nájia ele badnụ iwai kakwo kpa be nyernu anụ iwu."

¹⁴ Ele ogwnu sịkwa a, "Kini bụ nhne a jeeme?"

O kanụ be, "Anụ mée ele badnụ nhne rikne, mọbu bno ele badnụ nhne aghalaghala, ogwo ẹrnu anụ ji anụ ruwho."

¹⁵ Ele badnụ neele anya nụ Jōni bụ Karaisi.

¹⁶ Jōni kanụ be, "M ji m mini wụ anụ mini, kovu nụ nye kakwo m rikne wawa, nye me kwésile o whudnahie toma eriri okoro-ochi a lawuru. Nye wam jeeji Enine Nso nụ bẹkwnu wụ anụ mini.

¹⁷ Nye nhne ọwhusna ikpa zị n'aka a, o jowohusna ikpa a nkari, chibna ikpa a n'obna, kovu o jeeji bẹkwnu chni echni kporne ruznurnuznu ikpa."

¹⁸ Jōni ji agida ikwu-ọnu zị ichne ichne zni izi oma, naariasno be tũhnasna mkpoma.

¹⁹ Kovu nụ Jōni bigboru Eze Erọdu kwnornu Erodiasi nnwerne nwene a, nụ agida nhne ojo berere ke Erọdu mernu.

²⁰ Erọdu tũkwasiri n'olu nhne ojo ka, nga o yisiri Jōni ikelu.

*Owuwu mini Jizosi
(Mat 3:13-17; Mak 1:9-11)*

²¹ Nga Jōni wukparu ele badnụ mini, o wuru Jizosi mini masị.* Nga Jizosi neekpe okpukpe, oligwe kpumernu.

²² Enine Nso whekwasiri a lele nduru, otu akpiri hiri n'oligwe dna kaa, "Ji bụ Nnwọ m, me whnurnu n'anya, nhne i masiri m."

*Osnusno omumu Jizosi
(Mat 1:1-17)*

* 3:21 Nhne ka mernu tũtu Erọdu yisiri Jōni ikelu.

²³ Nga Jizōsi gbarū nri awha ẹto, ọ panịzo ẹrnu izi ọma a, ele badnụ naari nū
 ọ bụ nnwọ Josefu,
 nnwọ Hili,
²⁴ nnwọ Matati,
 nnwọ Livai, nnwọ Meliki,
 nnwọ Janai, nnwọ Josefu,
²⁵ nnwọ Matatayasi, nnwọ Emōsi,
 nnwọ Nahum, nnwọ Ẹsili,
 nnwọ Nagai,
²⁶ nnwọ Mati,
 nnwọ Matatayasi, nnwọ Sẹmeni,
 nnwọ Joseki, nnwọ Joda,
²⁷ nnwọ Jonani, nnwọ Resa,
 nnwọ Zerubabeli, nnwọ Seateli,
 nnwọ Neri,
²⁸ nnwọ Meliki,
 nnwọ Adi, nnwọ Kosam,
 nnwọ Elimadam, nnwọ Ẹr,
²⁹ nnwọ Josua, nnwọ Eleza,
 nnwọ Jorim, nnwọ Matati,
 nnwọ Livai,
³⁰ nnwọ Simiōni,
 nnwọ Juda, nnwọ Josefu,
 nnwọ Jonam, nnwọ Ẹliakim,
³¹ nnwọ Mela, nnwọ Mena,
 nnwọ Matata, nnwọ Natani,
 nnwọ Devidi,
³² nnwọ Jesi,
 nnwọ Obedi, nnwọ Boazi,
 nnwọ Salimoni, nnwọ Nasoni,
³³ nnwọ Aminadabu, nnwọ Ram,
 nnwọ Hezirōni, nnwọ Pẹzezi,
 nnwọ Juda,
³⁴ nnwọ Jekọpu,
 nnwọ Aziki, nnwọ Ebereham,
 nnwọ Tera, nnwọ Nahọ,
³⁵ nnwọ Sẹrugị, nnwọ Ru,
 nnwọ Pẹlegi, nnwọ Ẹbe,
 nnwọ Sela,
³⁶ nnwọ Kaijani,
 nnwọ Afazadi, nnwọ Sẹm,
 nnwọ Noa, nnwọ Lamẹki,
³⁷ nnwọ Metusela, nnwọ Inoku,
 nnwọ Jarẹdi, nnwọ Mahalalẹli,
 nnwọ Kaijani,
³⁸ nnwọ Enōsi,
 nnwọ Sẹti, nnwọ Adam,
 nnwọ Chiokike.

4

¹ Enine Nso jihjaru nū rime Jizōsi nga o hiri nū Osimini Jodani hiehna, Enine Nso duru a zne n'eli-ikpa.

² O zī n'eli-ikpa nri obochi ẹno, Ekwensu naarna a ọrnurna, ọ zá nhne o riri kpakara obochi wam, omekwo, wiri gwnurmu a.

³ Ekwensu kanu a, "O buru nu i bu Nnwọ Chiokike, kanu akaworugwu ka o gho bredi."

⁴ Jizōsi saru a, "Be gbaru a n'okwukwo nso, kaa, 'O buo bredi bu nhne badnu kpọi jeeri ziri budnu.' "

⁵ Ekwensu duru a pnezne n'olu rugwu gerisi a kpakara eli-eze k'owa n'ige mati.

⁶ O kanu a, "M jeenye i kpakara rikne ka nu igwugwu be, kwnornu nu be nyernu m be, m jeenye a nye obula masiri m.

⁷ O buru nu i jookponu m risi eli, kpakara a jọbu ke i."

⁸ Jizōsi saru a, "Be gbaru a n'okwukwo nso, kaa, 'I jookponu Nyenwe i, Chiokike i risi eli, o bu ya kpọi bu nye i jeekpenu.' "

⁹ Ekwensu duru a zne nu Jeruselem, mee o gwuzoru n'olu towa Oro Nso Chiokike, kanu a, "O buru nu i bu Nnwọ Chiokike, gbudna ẹhni i n'eli hna.

¹⁰ Be gbaru a n'okwukwo nso, kaa, 'O jeenye ele enine izi a iwu gbasiri i ma be chekwata i nkari.

¹¹ Be jeegheru i n'aka be, ma i gharu o kpọbi i ochi nu rugwu.' "

¹² Jizōsi saru a, "Be gbakwnornu a n'okwukwo nso, kaa, 'I rna Nyenwe i, Chiokike i ọrnurna.' "

¹³ Nga Ekwensu rnakworu a ọrnurna, o gharu a ige mati.

*Jizosi panizoru ẹnu a
(Mat 4:12,17; Mak 1:14,15)*

¹⁴ Jizōsi lahna Galili nu rikne Enine Nso, be tnu si ọntutnu a kpakara ohna.

¹⁵ O zni nhne kpakara n'oro ogbako ele Ju, kpakara ele badnu naazarni a.

*Be juru Jizosi nu Nazareti
(Mat 13:53-58; Mak 6:1-6)*

¹⁶ Jizōsi zne nu Nazareti hne o soru, o bna n'oro ogbako ele Ju n'Obochi Ozukwa Inwe ele Ju lele kpa o mesi, o lizo ma o gwnu okwukwo nso.

¹⁷ Be nyee a okwukwo Azaya nye owhnurninya, o kpume a whnu hne be gbaru,

¹⁸ "Enine Nso Nyenwe ai zi n'ehni m, kwnornu nu Chiokike ai teru m mono, o zni ele mboni izi oma.

O ziyaru m o kpọ okwo ogbahia ele zi n'oro ikelu, mee ele isni whnurmu osno, nu o dohia ele be neemegbu,

¹⁹ nu o kpọ okwo awha Nyenwe ai jooznohia ele ke a."

²⁰ O kpusni okwukwo wam nyehnata nye neezne izi, daziri eli. Kpakara ele zi n'oro ogbako ele Ju legidne a anya.

²¹ O panizo naakanu be, "Be mezuru nhne okwukwo nso kwuru n'anya anu tna."

²² Kpakara ele badnu kwuru a oka oma, ikwu-onu oma a duru agida be ehni, be ẹnesikwa, "Ka o buo nnwọ Josefu?"

²³ Jizōsi kanu be, "N'ezi anu jootnunu m elulu ka, 'Wodibia digba ehni i, kpakara nhne a nuru i mernu nu n'eli Kapanom, mee be hna n'eli i.' "

²⁴ "Me kanu anu ezi oka, nye owhnurninya nwée oso anya n'eli a.

²⁵ Kọvu me kanu anu, agida ele nnwerne nzi be nwurnu zi n'eli Izireli n'ige Elaija, nga Chiokike mesnirni oligwe, mini zoge awha eto nu enwa isunu, ke kpahiaru okne okwnunyo dnarnu nu kpakara eli.

²⁶ Be ziznege Elaija znekwnusi nye obula nu rime be, okwolem otu nnwerne nzi a nwurnu ke zi nu Zerefati* ke zi ndundu Sajdoni.

²⁷ Agida ele nchnichna zi masi n'eli Izireli n'ige Elisia nye owhnurninya, o za nye be mernu o ziri richna, okwolem Nemanj nye Siriya."

²⁸ Onuma jihiaru kpakara ele zi n'oro ogbako ele Ju mkpoma nga be nurnu nhne ka.

²⁹ Be lizo, chihala a n'eli be, duru a zne n'onu rugwu hne be wukwasiri eli be ma be kwnadna a n'eli.

³⁰ Kọvu o hiri n'esilawuru be whoga.

Jizosi chihalaru renwu ojo

(Mak 1:21-28)

³¹ Jizosi zne Kapanom n'eli Galili, n'Obochi Ozukwa Inwe neezni ele badnu nhne.

³² Eñni duru be nu nhne o neezni, kwnornu nu o neezni nhne lele nye nwernu rikne n'aka Chiokike.

³³ Otu nwerukna ke renwu ojo nwugwu zi n'oro ogbako ele Ju wam, o gweru okne nkoli si lulo,

³⁴ "Kini bu nhne a nu ji nwekogwu, Jizosi nye Nazareti? I varu ma i gbumekwo ai? M maam nye i bu, i bu nye nsọ ke Chiokike."

³⁵ Jizosi bigboru a, kanu a, "Kpusni onu i, hi nu rime a whuya." Renwu ojo wam vudna a n'eli nu ruwhnu ele badnu wam, hi nu rime a whuya, o mekasila a nhne.

³⁶ O duru kpakara ele badnu eñni, be neesikwarita ibne be, "Ka bu iznizni kini? Nwerukna ka nwernu rikne o ji notunu renwu ojo oka, be whuya masi."

³⁷ Otutnu gbasiri a gbasaru kpakara eli zi be gburugburu.

Jizosi gworu ele badnu

(Mat 8:14-17; Mak 1:29-34)

³⁸ Jizosi hi n'oro ogbako ele Ju wam whuya, bna n'oro Sajmoni. Nne nnwerne Sajmoni naarija eñni orne bekwnu, be riasno Jizosi o yinu a aka.

³⁹ O zne gwuzoru nu ngeri okpata a, bigbo eñni orne bekwnu wam, o sigbasi a. O lizo ngangam neeznenu be izi.

⁴⁰ Nga eñnam dnarnu, be kwuyan Jizosi kpakara ele naarija eñni igbugbu zi odo n'odo, o tukwasi be aka a otu otu, gwọ kpakara be.

⁴¹ Renwu ojo hi nu rime agida ele badnu whuya, neesi lulo. "Ji bu Nnwọ Chiokike."

Kovu Jizosi bigboru be, o kwéle be kwu oka, kwnornu nu be magwu nu ya bu Karaisi wam.

Jizosi znirni izi oma

n'oro ogbako ele Ju

(Mak 1:35-39)

⁴² Nga chiboru, o zne nu hne koru owu. Ele badnu noopio a, nga be piohiaru a, be kwéle o gharu be whoga.

⁴³ Kovu Jizosi kanu be, "M jeezne n'eli ele ke berere zni be izi oma eli-eze Chiokike, kwnornu nu ka bu nhne Chiokike kwno ziya m."

⁴⁴ O neezni izi oma nu kpakara oro ogbako ele Ju zi nu rime Judiya.

* 4:26 Zerefati: Ka buo eli Izireli.

5

Ele mbom sno apna Jizosi
(Mat 4:18-22; Mak 1:16-20)

¹ Otu obochi Jizosi gwuzo nu ngeri Osimini Genezareti, agida ele badnu naadnagidne a, nonu ikwu-onu Chiokike.

² O whnu ogbo lawuru zi nu ngeri mini, ele noogbu aznu whogaru nu rime be nosnu igbo be.

³ Jizosi bna n'otu ogbo ke bu keru Sajmoni, kanu a o nubna mati nu rime mini, o daziri eli nu rime ogbo wam neezni ele badnu nhne.

⁴ Nga o znikworu nhne, o kanu Sajmoni, "Nubna ogbo nu rime mini wusi igbo i, gbu aznu."

⁵ Sajmoni saru a, "Nda-ai-kwu, a doligburu ehni a n'ernu kpakara abali ka, o za nhne obula a gburu, kovu kwnornu nu ikwu-onu i, m jowusi igbo."

⁶ Nga be wusiri igbo, be gbu agida aznu, ke mernu igbo bete nodoka.

⁷ Be whenu ele ibne be aka ele zi n'ogbo berere, be va yinu be aka. Be va gbuji ogbo lawuru wam n'aznu, be bete neemi.

⁸ Nga Sajmoni Pita whnuru nhne mernu, o dna n'eli n'ochi Jizosi kaa, "Nyenwe ai, hi nu hne me zi whoga kwnornu nu m bu m nye ojo."

⁹ Aznu be gburu duru be ehni k'agida.

¹⁰ O bu masi kpa o duru Jemisi nu Joni rumu Zebidi ehni, ele be nu Sajmoni sno noogbu aznu. Jizosi kanu Pita, "Ogwu tuko i, hite nu kitna i jowu nye jowkwnuhia badnu."

¹¹ Be kwohia ogbo be n'onu mini, sigbasi kpakara nhne snornu Jizosi.

Jizosi gworu
nye nchnichna

(Mat 8:1-4; Mak 1:40-45)

¹² Nga Jizosi zi rime eli-ohna, otu nwerukna naaria nchnichna vakwnusiri a. Nga o whnuru Jizosi, o dna n'eli nu ruwhnu a, riasno, kaa, "Nyenwe ai, o buru nu i pioru, i nwernu rikne mee m ziri richna."

¹³ Jizosi dosnima aka a, kpatu a, kaa, "M pioru m, ziri richna." Ngangam, nchnichna wam whogaru n'ehni a.

¹⁴ Jizosi dora a aka nu nsni kanu a, "O za nye obula i kanu, kovu la, gweru ehni gesi i nye okwa ariohna, gweru nhne Mozizi nyernu n'iwu kwa ariohna ma o buru nhne akebne nyee be nu i zi richna."

¹⁵ Kovu otnutu a gbasaru k'agida, ke kpayaru agida ele badnu naava nonu ikwu-onu a, ma o gwu nriria be.

¹⁶ Agida ige Jizosi whoga, zne hne koru owu, neekpe okpukpe.

Jizosi gworu nye ehni a
donwuru donwu

(Mat 9:1-8; Mak 2:1-12)

¹⁷ O du n'otu obochi, nga Jizosi neezni nhne, ele Farisi nu ele zni iwu ele Ju ele hi nu kpakara mgbu ke zi n'eli Galili nu Juediya nu Jeruselem va, be dazi, rikne Nyenwe ai zi n'ehni a, o noogwo ele nriria.

¹⁸ Ele rukna vuyanu a otu nye ngeri ehni a donwuru donwu, nye dnanyi n'olu okpata, be pio kpa be joovubna nu ruwhnu Jizosi.

¹⁹ Nga be nwee rikne du a ehni kwnornu nu agida ele badnu wam, be pne n'olu oro, hi nu hne be dokahalaru nhne vudna a n'olu okpata o dnanyi n'esilawuru igbudu badnu wam nu ruwhnu Jizosi.

²⁰ Nga Jizosi whnuru okwnata mkpoma be, o kaa, "Nwerukna, be gbarunam ji kpakara mmehie i."

²¹ Ele Farisi nū ele zni iwu ele Ju n̄esikwa nū mkp̄oma be, “Nwerukna ka bụ nyele ke nookwulu Chiokike? Ndaa nye nwernu rikne ọ gbarū mmehie, hne ọ b̄uo Chiokike kp̄oi?”

²² Jiz̄osi mahīaru nhne be naari nū mkp̄oma be, ọ s̄ikwa be, “K̄ini kpah̄iaru anū naari ọrii ka nū mkp̄oma anū?”

²³ Ndaa ke z̄i ewheke nū ọ kaa, ‘Be gbarūnam j̄i kpakara mmehie,’ s̄obu ọ kaa, ‘Liz̄o zne izne?’

²⁴ M̄ piuru m̄ anū mah̄ia nū Nnw̄o ke Badnū nwernu rikne n'owa ọ gbarū mmehie.” Ọ kanū nwerukna wam ngeri ẹhni a d̄onwurnu ọdonwu, “M̄ ka m̄ j̄i, liz̄o, vuru ọkpata i, la ọro i.”

²⁵ Ngangam, o liz̄o nū ruwhnu be, ch̄iri etere ọ dnan̄yi n'olu a, la n'oro a, naaznarn̄i Chiokike.

²⁶ Ẹhni dū kpakara be, be tū ogwnu znarn̄i Chiokike, naakaa, “A whn̄nam nhne ikne tna.”

Jiz̄osi sukwuru Livai

(Mat 9:9-13; Mak 2:13-17)

²⁷ Nga nhne ka mekworu, Jiz̄osi whogaru whnū otu nye ọna ntū be kwu Livai, hne ọ daz̄i n'oro ntū, Jiz̄osi kanū a, “Sno m.”

²⁸ Livai liz̄o, sigbasi kpakara nhne snornu a.

²⁹ Livai sinu Jiz̄osi okne iriri n'oro a, aḡida ele ọna ntū nū ele berere snornu be neeri wiri.

³⁰ Ele Farisi nū ele zni iwu ele Ju s̄ikwa ele sno apna a, “K̄ini mernu anū noosno ele ọna ntū nū ele mmehie neeri wiri?”

³¹ Jiz̄osi sarū be, “M̄kpa dib̄ia z̄iko naakpa ele ẹhni b̄uru ọma, okwolem ele nr̄iria.

³² M̄ váge m̄ o sukwu ele ọma, k̄ovu ele mmehie ma be t̄uhnasna mkp̄oma.”

Ajji gbas̄iri ovu ọnu

(Mat 9:14-17; Mak 2:18-22)

³³ Be kanū a, “Ele sno apna J̄oni noovu ọnu neekpe okpukpe ige ọbula, ma ele sno ele Farisi neeme mas̄i kpam, k̄ovu ele sno apna i neeri, n̄onwo.”

³⁴ Jiz̄osi sarū be, “Ele varū hne be n̄olu nnwerne ikne be joovu ọnu hne be nū nye n̄olu nnwerne ikne z̄i?”

³⁵ K̄ovu ọbochi vawa, nga be jaanah̄oru be nye n̄olu nnwerne ikne, ọ b̄u nga be joovu ọnu n'ọbochi wam.”

³⁶ Jiz̄osi t̄nunu be elulu ka, “Ọ zá nye j̄oodokaru mkpekele ikpe ikne dn̄usni n'iw̄o ọknani, o mene kpam, ọ j̄oodoka ke ikne, ikpe ikne nū ke ọknani jáadnabna.

³⁷ Ọ z̄i mas̄i nye jeegweru manya ikne gbas̄i n'olori akpukpo ọknani, o mene kpam, manya ikne wam jaagbawama olori akpukpo ọknani, manya nū olori akpukpo whume etekne.

³⁸ K̄ovu be gbas̄i manya ikne n'olori akpukpo ikne.

³⁹ Ọ zá nye ke nw̄ornu manya ọknani noopio ke ikne, kwnornu nū ọ karū ke ọknani ka mma.”

6

Ajji gbas̄iri

Ọbochi Ozukwa Inwe

(Mat 12:1-8; Mak 2:23-28)

¹ Ọ dū otu Ọbochi Ozukwa Inwe, Jiz̄osi nū ele sno apna a naagawhe n'esilaw̄uru ẹkwu īkpa, ele sno apna a bete n̄ogho īkpa, naata, naarīria a n'aka be.

² Agwna ele Farisi sịkwa, “Kini mernu anụ neeme nhne kwésile n'iwu n'Ọbochi Ozukwa Inwe?”

³ Jizọsi sarụ be, “Anụ gwnụna nhne Devidi mernu nga wiri gwnụrnụ a, ya nụ ele sno a?”

⁴ Ọ bnazernu n'oro nsọ Chiokike, gweru brẹdi be bịtaru nụ ruwhnu Chiokike ke ele ariohna bụ ele kwesiri o ri, ri a, nyee masị ele nụ ya sno.”

⁵ Jizọsi kanụ be, “Nnwọ ke Badnụ bụ Nyenwe Ọbochi Ozukwa Inwe.”

Nwerukna aka

dọnwurnu ọdonwu

(Mat 12:9-14; Mak 3:1-6)

⁶ Ọ dụ n'Ọbochi Ozukwa Inwe berere, Jizọsi bna n'oro ọgbako ele Ju neezni nhne, otu nwerukna aka dọnwurnu ọdonwu zị pji.

⁷ Ele Farisi nụ ele zni iwu ele Ju noopio nhne be jeeji bno Jizọsi nhne, be needne a ma be jọowhnu ma ọ jọogwo nrịria n'Ọbochi Ozukwa Inwe.

⁸ Kọvu nụ Jizọsi mahiaru nhne be naari nụ mkpọma be. Ọ kanụ nwerukna wam aka dọnwurnu ọdonwu, “Lizọ, gwuzoru nụ ruwhnu kpakara ele badnụ.” O lizọ, gwuzoru.

⁹ Jizọsi kanụ be, “Me sịkwa anụ, ọ bụru ọma n'iwu o mee nhne ọma n'Ọbochi Ozukwa Inwe sọbu o mee nhne bụo ọma, ọ znọhia bụdnụ sọbu o gbu ogbu?”

¹⁰ O lezute be anya, kanụ nwerukna wam, “Dọsnima aka i.” Ọ dọsnima aka a, aka a bụru ọma lele kpa ọ zị nụ mbom.

¹¹ Kọvu ovu weru be ẹhni k'agịda, be bete nẹsikwarita ẹhni be nhne be jeeme Jizọsi.

Jizọsi hōhiaru nri nụ

badnụ lawuru ele izi

(Mat 10:1-4; Mak 3:13-19)

¹² N'ige wam Jizọsi whọgaru zne nụ rugwu zne kpe okpukpe, o neekpenu Chiokike tem chi bọ.

¹³ Nga chi bọru, o sukwukọta ele sno apna a, hōru nri nụ badnụ lawuru nụ rime be, sukwu be ele izi.

¹⁴ Ka bụ rẹwhna be, Saịmoni, nye o sukwuru Pita, nụ Anduru nwene a, Jemisi, Jōni, Filipu, Batolomi,

¹⁵ nụ Matiyu, Tọmosi, Jemisi nnwọ Alifayosi, Saịmoni nye zị n'esilawuru ele noonwu bẹkwnu nụ mkpọma,

¹⁶ nụ Judasị nnwọ Jemisi, nụ Judasị Isikarijoti, nye reru a.

Jizọsi znirni nhne

gwọ nrịria

(Mat 4:23-25)

¹⁷ Nga ya nụ be hiri nụ olu rugwu hiedna, be gwuzoru n'ẹli etekne, agịda ele sno apna a nụ agịda ele badnụ ele hiri nụ kpakara Judiya, nụ Jeruselem ma ele wu nụ ngeri mini ẹi Taya nụ Saịdoni varụ gbakọ nụ hne be zị.

¹⁸ Kpakara ele ka varụ ma be nurnu ikwu-ọnu a, ma Jizọsi gwọ be nrịria be. Ọ gwọru ele rẹnwu ojo nwụgwu.

¹⁹ Kpakara ele badnụ wam noopio ma be kpatụ a aka, kwnornu nụ rikne hiri n'ẹhni a nọogwo kpakara be nrịria be.

Ovu ọso n'ọnu nụ

nhne igbugbu ke mkpọma

(Mat 5:1-12)

²⁰ Jizọsi gwelizọ anya a olu le ele sno apna a, kaa, “Ọwa ọma zinu anụ ele mboni,

kwnornu nụ anụ jeenwe ẹli-eze Chiokike.

- 21 Ọwa ọma zịnu anụ ele wiri nọogwnu kịtna,
kwnornu nụ rụwho jeeji anụ.
Ọwa ọma zịnu anụ ele naakwna ẹkwna kịtna,
kwnornu nụ be jọmu rụmu.
- 22 Ọwa ọma zịnu anụ nga ele badnụ snornu anụ irno,
nga be jaachihala anụ n'ogbako be, kpari anụ,
kaa nụ anụ bụ ele ojo kwnornu Nnwọ ke Badnụ.
- 23 “Anụ nwudna ọnwudna, anụ tne eri snarnịma, ọgwo ẹrnu anụ zị agịda
n'oligwe. Kwnornu nụ ọ bụ kpa ele nda be mernu ele ọwhnurninya.
- 24 Kọvu nụ awhnụwhnu jaazịnu anụ ele eze,
kwnornu nụ anụ rilem iru ke anụ.
- 25 Awhnụwhnu jaazịnu anụ ele neeriji rụwho kịtna,
kwnornu nụ wiri jọogwnu anụ.
Awhnụwhnu jaazịnu anụ ele nọomu rụmu kịtna,
kwnornu nụ anụ jaakwna ẹkwna, gba masị mkpe.
- 26 Awhnụwhnu jaazịnu anụ nga kpakara ele badnụ naakaa anụ ọka ọma,
ọ bụ kpa ele nda be mernu ele ọwhnurninya aghalaghala.

Whnụ ele irno anụ n'anya
(Mat 5:38-48; 7:12a)

- 27 “Kọvu me naakanụ anụ, anụ ele nọonu ikwu-ọnu m, anụ whnụ ele irno
anụ n'anya, anụ menu ele snornu anụ irno nhne ọma.
- 28 Anụ gozi ele nọovu anụ ọnu, kpenu ele neemegbu anụ okpukpe.
- 29 Ọ bụru nụ nye ọbula gbọru i aka nụ nti, chetenu a berere masị. Ọ bụru nụ
nye ọbula chịnahoru i iwu olu i, chịta masị a iwo rime i.
- 30 Nyega nye ọbula nọorio i nhne, ọ bụru nụ nye ọbula nahọru i nhne i, i káa
o nyehnata i.
- 31 Lele kpa anụ pioru ma ele badnụ menu anụ, anụ menu be kпам.
- 32 “Ọ bụru nụ anụ whnurnu ele wam n'anya bụ ele nọowhnu anụ n'anya,
kini bụ mbnarna anụ nwernu? Ọ bụbedi ele mmehie nọowhnu ele whnurnu
be n'anya n'anya.
- 33 Ọ bụru masị nụ anụ neemenu ele neemenu anụ nhne ọma nhne ọma kpọi,
kini bụ mbnarna anụ nwernu? Ele mmehie neeme kпам.
- 34 Ọ bụru nụ anụ gbaznisiri ele anụ jaanahia nhne n'aka be nhne kpọi, mb-
narna kini anụ nwernu? Ele mmehie naagbaznisi ele mmehie be jaanahọru
nhne n'aka be nhne.
- 35 Kọvu anụ nọowhnu ele irno anụ n'anya, anụ menu be nhne ọma, anụ
gbaznisi be nhne, le anya nụ anụ jaanahia nhne ọbula n'aka be. Ige wam ọgwo
ernu anụ jaazi agịda, anụ jọobu rụmu Nye Kakwo Nhne Dum Olu, kwnornu nụ
Chiokike neemenu ele nwée mkpọma mmamma nụ ele ojo imerne ọma.
- 36 Anụ nwe mkpọma obirizi lele kpa Nda anụ nwernu mkpọma obirizi.

O kpe ele berere ikpe
(Mat 7:1-5)

- 37 “Anụ kpé ikpe, ma Chiokike gharu o kpe anụ ikpe. Anụ máa nye ọbula
ikpe, ma Chiokike gharu ama anụ ikpe. Anụ gbarunụ ele mernu anụ nhne
ojo, ma Chiokike gbarunụ anụ masị.
- 38 Anụ nyega, be jeenyega masị anụ. Nhne ọtutu bụru ọma, be bñarnu aka,
yuyọ ke jiwheru ejiwhe, bụ nhne Chiokike jeenye i ke ji nụ nsnunu i jéenwe
rikne vuli. Kwnornu nụ nhne anụ jiri tũnu nye berere bụ nhne be jeeji tũnu
anụ.”
- 39 Jizọsi tũnu be elulu ka, “Nye isni o nwernu rikne noodu nye isni? Be
lawuru be jáadnabna nụ rime olulu?”

⁴⁰ Nye sno apna nye-zni-nhne jáakakwo nye zni a nhne. Kòvu nye òbula m̀hiaru nhne nkari jòonu lele nye znirni a nhne.

⁴¹ “Kini kphajaru i neele nhne matì ke zì n'anya nwene i, kòvu ì zá naari òriri gbasiri igwe-isisi ke zì n'anya ì?”

⁴² Ndaa kpa i jeeji kanu nwene i, ‘Nwene, sete me gweme nhne matì ke zì n'anya ì, nga i whnúna igwe-isisi ke zì ì n'anya?’ Jì nye ruwhnu lawuru, beru osno gweme igwe-isisi ke zì n'anya ke ì, ige wam ì jòowhnusna osno o gweme nhne matì ke zì n'anya nwene i.

Isisi nu mkpuru a

(Mat 7:16-20; 12:33-35)

⁴³ “Ò zá isisi oma òbula ke jaami mkpuru ojo, isisi ojo nwée rikne m̀i mkpuru oma.

⁴⁴ Be mahja isisi hite nu mkpuru a. Ele badnu zá nòogho mkpuru figi hite n'isisi akukara, m̀obu mkpuru vai ni n'igwnu-ogna.

⁴⁵ Badnu oma neegwehia nhne buru oma hite n'ekwnu oma ke zì nu mkpoma a. Badnu ojo hite n'ekwnu ojo ke mkpoma a neegwehia nhne ojo. Kwnornu nu onu nookwu hite nu nhne ke zì nu mkpoma a.

Ntu-eli lawuru

(Mat 7:24-27)

⁴⁶ “Kini kpayaru anu noosukwu m, ‘Nyenwe aì, Nyenwe aì,’ kòvu anu zá neeme nhne me kwuru?”

⁴⁷ Nye òbula ke vakwnusiri m, nurnu ikwu-ònu m, neeme masì be, m jeegesi anu nye o yiri.

⁴⁸ O yiri otu nwerukna noowu òro, o gwubna eli nkari, tu ntu-eli a n'olu rugwu. Nga mgbá-mini eli gharu, kwana òro wam, o nwée rikne kwnadna òro wam, kwnornu nu be wusiri a rikne.

⁴⁹ Kòvu nye òbula ke nurnu ikwu-ònu m ò zá neeme be, yiri otu nwerukna wuru òro a n'olu rizna, ke gwúmigwo eli nkari, mini-eli gba, kwana òro wam, ò dna girigidim, tu ogwnu.”

7

Jizosi gworu nnwọ izi

nye risi ogwnu

(Mat 8:5-13)

¹ Nga Jizosi kwukworu kpakara òka ka nu nsni ele badnu wam, ò bna Kapanom.

² Otu nye ogwnu neechi otu riwhu ele ogwnu nwernu otu nnwọ izi zì a mkpa k'agida, ke zì n'onu enwu.

³ Nga ò nurnu nhne gbasiri Jizosi, o ziznenu a ele okno badnu ele Ju, riasno a ma ò va gwọ nnwọ izi a.

⁴ Nga be vakwnusiri Jizosi, be riasnosi a rikne, “Nwerukna ka kwesiri nye i jeemenu nhne nu kpa.

⁵ Nwerukna ka whnurnu eli aì n'anya, o wunnu aì òro ogbako.”

⁶ Jizosi snornu be zne.

⁷ Nga ò zì ndundu n'oro a, nye ogwnu wam ziznenu a ele enyi a, kanu a, “Nyenwe aì, ì dógbu ehni ò va, m kwésile m nye ì va òro a.

⁷ Ka mernu me gwnúsige ehni m nu nye kwesiri ò vakwnusi ì. Kòvu kwu òka kpọì, be jòogwo nnwọ izi m.

⁸ Kwnornu nū m bụ nye zị n'òchichi, m nwernu m ele ka m, nū ele me ka. Me kanū nye ka 'Zne,' o zne, kanū nye berere 'Vaa,' o va. Me kanū nnwọ izi m 'Mee ka,' o mee a."

⁹ Nga Jizọsi nūrnu ọka ka, o duru a ẹhni, o tūhnasna, kanū igbudu badnū wam sno a, "Me kanū anū ezi ọka, m whnūlele m ọkwnata ovu hna kpa n'Izireli."

¹⁰ Ele wam o ziyaru lahna n'oro a, be whnū nū be gwọlam nnwọ izi wam.

Jizọsi gwọru nnwọ rukna nwerinya nzi a nwūrnu

¹¹ Kpa ige matị whemernu, Jizọsi zne otu ọhna be kwu Neni, ele sno apna a nū igbudu badnū snornu a zne.

¹² Kpa be naabna n'ọnhna ẹli-ọhna wam, ele badnū vu iznu, otu nnwọ nwerinya nzi a nwūrnu nwernu, agida ele ẹli wam sno a.

¹³ Nga Nyenwe aị whnūrnu a, o ọdnu a obirizi, kanū a, "I kwnáma ẹkwna."

¹⁴ O znekwusi ele vu ọkpata-iznu wam, kpatū a aka, be gwuzoru. Jizọsi kaa, "Wikoro rukna, m ka m ji, lizo."

¹⁵ Nye wam nwūrnu ọnwu lizo, daziri ẹli nookwu ọka, Jizọsi kwuru a nyehnata nne a.

¹⁶ Kpakara ele badnū tū ogwnu naaja Chiokike. Be kaa, "Otu nye ọwhnurninya hna ezi whuyalam n'esilawuru aị, Chiokike valẹm o yinu ele ke a aka."

¹⁷ Ọsusu gbasiri Jizọsi gazu kpakara Judiya nū kpakara ẹli zị a gburugburu.

Jizọsi nū Jọni Nye Wụ Mini (Mat 11:2-19)

¹⁸ Ele sno apna Jọni kanū a kpakara nhne ka. O sukwu badnū lawuru nū rime be,

¹⁹ be zne sịkwa Nyenwe aị, "Ọ bụ jịwa bụ nye ke jaava, sọbu a le anya nye berere?"

²⁰ Nga be vakwnusiri Jizọsi, be kaa, "Jọni Nye Wụ Mini ziyaru a sịkwa i, 'Ọ bụ jịwa bụ nye ke jaava, sọbu a le anya nye berere?'"

²¹ Ige wam Jizọsi gwọru agida ele nrịria zị ọdo n'odo, rẹnwu ojo hiri nū rime ele badnū whuya, ele isni whnūrnu ọsno.

²² Ọ sarū ele izi wam, "Anū lahna kanū Jọni kpakara nhne anū whnūrnu nū ke anū nūrnu. Ele isni whnūrnu ọsno, ele mgworo znernu izne, be neeme ele nchnichna ziri richna, ele nsni jinyo ọnonu nhne, ele nwūrnu ọnwu lizoru n'ẹnwu, be neezni ele mboni izi ọma.

²³ Chiokike jọgozi nye ọbula ke jula m kwnornu nhne me mernu."

²⁴ Nga ele izi Jọni larū, Jizọsi bete naakanū igbudu badnū wam nhne gbasiri Jọni. "Kini bụ nhne anū znernu o whnū n'ẹli-ikpa? Ekere achara ruwhere noovu?"

²⁵ Ọ bụ kini nhne anū znernu o whnū? Nwerukna wogwu iwo marnū mma sa? Le, ele noowo iwo marnū mma, ele wu budson oriri nū ọnwunwo zị n'oro ele eze.

²⁶ M ka m, risi kini bụ nhne anū znernu o whnū? Nye ọwhnurninya sa? Owe! Me kanū anū, o bụ nye kakwo nye ọwhnurninya.

²⁷ Ka bụ nye wam be gbarū nhne n'ọkwukwo nsọ gbasiri a, 'M jeezizne nye izi m nū ruwhnu i, nye jeemekwata apna nū ruwhnu i.'

²⁸ Me kanū anū, n'esilawuru ele ele rinya mūrnu, o zá nye kakwo Jọni, kovu nye zikaru matị n'ẹli-eze Chiokike kakwo Jọni."

29 (Nga kpakara ele badnụ, ma ele ọna ntụ nurnu nhne Jizọsi kwuru, be kweru nụ apna Chiokike zị snam, kwnornu nụ Jọni wụru be mini.

30 Kọvu ele Farisi nụ ele zni iwu ele Ju juru mmụma Chiokike, kwnornu nụ Jọni wúge be mini.)

31 Jizọsi sịkwa be, “Ndaa nhne me jeeji sninu ebiri ka? Be nụ lele kịni?”

32 Be nụ lele rụmu takiri dazịgwu n'ahia noosukwu ibne be ikwu, kaa,
'A kwannụ anụ eri,
anụ tńége eri,
A gwnụ eri mkpe
anụ kwnáge ẹkwna.'

33 Jọni Nye Wụ Mini varụ, o ríle wiri, nwóge manya, anụ kaa, 'O nwernu renwu ojo.'

34 Nnwó ke Badnụ varụ, neeri wiri, nọonwo manya, anụ kaa, 'Nye ka bụ nye okne wiri nụ nye nwó okne manya, enyi ele ọna ntụ nụ ele mmehie.'

35 Kọvu nhne ele magwụ Chiokike neeme neegesi nụ akoniche Chiokike ziri ezi."

Be teru Jizọsi mọno

36 Otu nye Farisi sukwuru Jizọsi wiri n'oro a, o zne n'oro nye Farisi wam daziri n'ikpechi neeri wiri.

37 Otu nwerinya ke wu bụdnụ mmehie n'eli wam mahiaru nụ Jizọsi neeri wiri n'oro nye Farisi, o zne zụya mọno otute zị n'ite alabasita.

38 O gwuzoru n'aznụ Jizọsi naakwina ẹkwina n'ochi a, anya-mini a nọowu n'ochi Jizọsi. O gweru rukeri-ize a kwnosnama be, snutu ọchi a ọnu, gweru mọno otute wam te ọchi a lawuru.

39 Nga nye Farisi wam sukwuru Jizọsi wiri whnurnu a, o kaa nụ mkpọma a, "O bụru nụ nwerukna ka bụ nye ọwhnurninya, o zneru a mahia nụ nwerinya ka naakpatụ aka bụ nye mmehie."

40 Jizọsi sarụ a, "Sajmoni, o nwernu nhne me jaakanụ i?"

O kaa, "Kanụ m, Nye-zni-nhne."

41 Jizọsi kanụ a, "Otu nwerukna ke naagbznisi ele badnụ iwai nwernu ele rukna lawuru ji a ogwo. Otu nyenum ji a riwhu mkpuru iwai isne, nye berere ji nri isne.

42 Be lawuru nwée nhne be jeeji nọokwu ogwo, o gbarunu be ogwo wam be ji a. Nyele n'esilawuru be jowhnu a n'anya karukwo?"

43 Sajmoni sarụ, "M che m nụ o bụ nye wam o gbarunu ogwo zị agida."

Jizọsi kanụ a, "I kperu ikpe oma."

44 Jizọsi tughnasna hne nwerinya wam zị kanụ Sajmoni, "I whnurnu nwerinya ka? M varụ m ọro i, i nyége m mini me snụ ọchi m, kọvu o ji anya-mini a snụ ọchi m lawuru, gweru rukeri-ize a kwnosnama be.

45 I snúge m ọnu, kọvu nwerinya ka, hite n'ige me varụ, zị noosnutu ọchi m lawuru ọnu.

46 I tége risi m mọno, kọvu o wusiri mọno ẹknarna oma n'ochi m lawuru.

47 Kam kpayarụ, me kanụ i, lele kpa be gbarunu a agida mmehie, ọwhnun'anya a zị agida. Nye be gbarunu nhne matị nwernu ọwhnun'anya zị matị."

48 Jizọsi kanụ nwerinya wam, "Be gbarunam ji mmehie i."

49 Ele nụ Jizọsi dazị neeri wiri nookwurita n'ehni be, "Nye ka bụ nyele ke naagbarụ mmehie?"

50 Jizọsi kanụ nwerinya wam. "Okwnata mkpoma i znohialam ji, la n'udno."

8

*Agwna ele rinya ke**snornu Jizōsi*

¹ Nga ka mekworu, Jizōsi znernu hite n'otu ẹli matì dū n'ẹli agida berere n'okpo okwo izi ọma ẹli-eze Chiokike. Nri nū badnū lawūru wam ele izi a sno a,

² ma agwna ele rinya be gwōru rēnwu ojo nū nrīria zì ọdo n'ọdo, Meri, nye be kwu Magidalini, nye Jizōsi chīhalaru rēnwu ojo ẹsau nū rime a,

³ Joana nnwerne Kuza, nye neelegidne ọro Erōdu, ele rinya berere sno a bụ Suzana nū agida ele berere. Ele rinya ka neeyinu be aka nū mkpa be hite nū nhne hi n'aka be whūya.

*Elulu nye ogha mkpuru**(Mat 13:1-9; Mak 4:1-9)*

⁴ Kpa igbudu badnū naagbakō hne Jizōsi zì, hite n'agida ẹli-ọhna, ọ tñunu be elulu ka.

⁵ “Otu nye ẹrnu ẹkwu znernu agha mkpuru. Kpa ọ naagha mkpuru, agwna mkpuru dna nū ngeri apna, ele badnū zō be ọchi, rūmu ọnunu tūturu be fa.

⁶ Agwna be dnarnū n'olu rugwu, nga be furu, be chnanwū kwnornu nū be nwée mini.

⁷ Agwna mkpuru berere dnarnū n'esilawūru igwnu, igwnu wam sohia kpagbu be.

⁸ Agwna mkpuru berere dnarnū n'ẹli būru ọma, be so, mīnya mkpuru, otu riwhu kakwo kpa be kparū be.”

Nga o kwukworu ọka ka, ọ kaa, “Nye nwernu nsnì o ji ọ nū nhne, ọ nūnu.”

*Nhne o kwno tñu elulu**(Mat 13:10-17; Mak 4:10-12)*

⁹ Ele sno apna a sika a risi elulu ka.

¹⁰ Jizōsi kanū be, “Be mernu ma anū mahia nhne tugwaru otugwa ke ẹli-eze Chiokike, kọvu be jookwunu ele berere ọka n'elulu, ma,

‘Be neele anya, kọvu be jọowhnu ọsno,
be noobno nsnì, kọvu be jọoghohia.’

*Risi elulu nye**ogha mkpuru wam**(Mat 13:18-23; Mak 4:13-20)*

¹¹ “Ka bụ risi elulu wam. Mkpuru wam bụ ikwu-ọnu Chiokike.

¹² Mkpuru ke zì nū ngeri apna nū lele ele nūnu ikwu-ọnu Chiokike, Ekwensū va gweme ikwu-ọnu wam nū mkpoma be, ma be gharū o kweru, be znōhia be.

¹³ Ele ke zì nū rugwu nū lele ke nūnu ikwu-ọnu wam gweru snarnīma nwūgwu a, kọvu nū be nwée ẹgwngwnu, be kweru ige matì, kọvu nga nhne ọkpa iru varū, be dnahnala aznū.

¹⁴ Mkpuru ke dnarnū n'esilawūru igwnu nū lele ele nūnu ikwu-ọnu wam, kọvu kpa be nooso, ọriri nū ẹkwnu nū nhne ọso n'ọnu k'ọwa ka, kpagbu be, ọ ghō nhne mīna mkpuru.

¹⁵ Kọvu ele ke dnarnū nū hne ẹli būru ọma bụ ele ke ji mkpoma ọma be nū ezi ọka, bīta ikwu-ọnu ka nga be nūnu a, be hite n'ọsnuta mkpoma mīnya mkpuru.

*Tonji zì olu nhne tonji**(Mak 4:21-25)*

16 “O zá nye n̄omusi t̄onji b̄ita a n̄u mkpururu ọkpata, m̄obu kpusni a nhne, t̄n̄numa, ọ b̄ita a n'olu nhne be b̄ita t̄onji, ma ele naabnanya ọro whn̄urnu iwhe a.

17 Nhne ọbula be tugwaru otugwa j̄owhuya iwhe, be jookpume kpakara nhne be kpusniri okpusni ma ele badn̄u whn̄urnu be.

18 Kam kpayar̄u, anya d̄u an̄u ẹli nhne an̄u n̄onu. Be jeenye nye ọbula ke nwernu, k̄ovu nye nwée, be jaanah̄oru a ọ b̄ubedi, ke ọ r̄iri n̄u o nwernu.”

Nne Jiz̄osi n̄u rumu nne a

(Mat 12:46-50; Mak 3:31-35)

19 Nne Jiz̄osi n̄u rumu nne a var̄u ma be whn̄u a anya, k̄ovu n̄u be nwée rikne zne nd̄undu kwnornu igbudu badn̄u wam.

20 Be kan̄u Jiz̄osi, “Nne i n̄u rumu nne i gwuzogwu n'ederezi noopio ọ whn̄u i.”

21 Jiz̄osi sar̄u be, “Nne m n̄u rumu nne m b̄u ele n̄urnu ikwu-ọnu Chiokike, neeme be.”

Jiz̄osi bigb̄oru

ruwhere osimini

(Mat 8:23-27; Mak 4:35-41)

22 Otu ọbochi Jiz̄osi kan̄u ele sno apna a, “An̄u ngwa ma a whe aka osimini k̄iyari.” Be bna n̄u rime otu ọgbo zneba.

23 Kpa be neezne, Jiz̄osi znirni anyarna. Okne ruwhere neewhe, mini n̄owubna n̄u rime ọgbo, ọgbo noopio o mii.

24 Ele sno apna a vakwnusi a, kpatn̄enya a, kaa, “Nda-ā-kwu, mini neeri ai.”

O lizo, bigb̄o ruwhere wam n̄u abaka-mini wam, be whebi, ọhna dna bii.

25 Jiz̄osi s̄ikwa ele sno apna a, “Ndaa hne ọkwnata mkp̄oma an̄u z̄i?”

Be t̄u ogwnu, o ji be anya, be n̄esikwarita ibne be, “Nye ka b̄u nyele? Ọ n̄otunu ruwhere n̄u abaka-mini ọka, be bnonu a nsni.”

Jiz̄osi gw̄oru nye

ren̄wu ōjo nw̄ugwu

(Mat 8:28-34; Mak 5:1-20)

26 Jiz̄osi n̄u ele sno apna a kw̄oru ọgbo be zne n'ẹli ele Gerasa ke z̄i n'azn̄u Osimini Galili.

27 Nga Jiz̄osi hiri n'ogbo wh̄uya, otu nye ren̄wu ōjo nw̄ugwu hi n'ẹli wam kwnusi a. Nwerukna ka gbulem ọkwnu o wó iwo, o wú n'ọro, ọro a b̄u n'ilili.

28 Nga ọ whn̄urnu Jiz̄osi, o si lulo dna n'ẹli n'ọchi a, siwama n'okne nk̄oli, “K̄ini b̄u me n̄u j̄i nwek̄ogwu, Jiz̄osi Nnw̄o ke Chiokike Kakwo Nhne Dum Olu? Bikno, i tá m awhn̄uwhnu.”

29 O kwuru kpa kwnornu n̄u Jiz̄osi nyernu ren̄wu ōjo wam iwu o hi n̄u rime a wh̄uya. Aḡida ige be kpagidn̄ernu nwerukna wam, be t̄u a ijigba ọchi n̄u aka, be neese a nse, ọ gbajikwo ijigba, ren̄wu ōjo ch̄ibna n̄u hne k̄oru owu.

30 Jiz̄osi s̄ikwa a, “K̄ini b̄u r̄ehna i?”

Ọ kaa, “Lij̄oni,”* kwnornu n̄u aḡida ren̄wu ōjo bnarn̄u n̄u rime a.

31 Be r̄iasno Jiz̄osi ọ ch̄ibna be n'olulu awhn̄uwhnu.

32 Odokwnu ezni z̄i n̄u nd̄undu naata wiri n'olu rugwu, ren̄wu ōjo r̄iasno Jiz̄osi o kweru be zne bna n̄u rime ezni wam, ọ kar̄u be zne.

33 Ren̄wu ōjo wam hiri n̄u rime nwerukna wam wh̄uya, bna n̄u rime ezni wam, odokwnu ezni wam gbada ngwulangwu wam, dnabna n̄u rime mini, rinw̄u n̄u rime mini.

* 8:30 *Lij̄oni* ke b̄u aḡida ele ogwnu.

³⁴ Nga ele n'ozo ezni wam whnurnu nhne mernu, be gbawhu, zne n'usinuru ele zi nu rime eli-ohna ma nu ekwu.

³⁵ Ele badnu whoga zne whnu nhne mernu, be vakwnusi Jizosi, whnu nwerukna wam renwu ojo whogaru nu rime a hne o dazi eli n'ochi Jizosi, woru iwo, echiche a zuru ozu, ogwnu tu be.

³⁶ Ele whnurnu nhne mernu kanu ele badnu kpa be gworu nwerukna wam renwu ojo nwugwu.

³⁷ Kpakara ele wu n'eli Gerasa gburugburu kanu Jizosi o whoga n'eli be, kwnornu nu ogwnu notu be. O bna nu rime ogbo lahna.

³⁸ Nwerukna wam renwu ojo whogaru nu rime a riasno a ma o snornu a la, kovu Jizosi chihala a, kanu a,

³⁹ "La n'oro i, kanu ele badnu nhne Chiokike mennu i."

Nwerukna wam la, notnusa kpakara n'eli-ohna nhne Jizosi mennu a.

Nnwọ rinya matị nu

nwerinya ntu ovnarna

(Mat 9:18-26; Mak 5:21-43)

⁴⁰ Nga Jizosi lahnarnu, igbudu badnu nabnanyarnu a, kwnornu nu be neele anya a.

⁴¹ Otu nwerukna rewhna a bu Jariosi, nye risi oro ogbako ele Ju, vakwnusiri a, dna n'eli n'ochi Jizosi, riasno a o va oro a.

⁴² O riasno a kwnornu nu o nwernu otu nnwo rinya kpoi, ke gbaru nri nu awha lawuru, nye zi n'onu enwu.

Kpa Jizosi neezne n'apna, igbudu badnu snornu a naadnagidne a.

⁴³ Otu nwerinya ke naariya ntu ovnarna nri nu awha lawuru, zi n'esilawuru igbudu badnu wam, tuwhukwo kpakara nhne o nwernu n'aka ele dibia, kovu o za nye nwernu rikne gwọ a.

⁴⁴ O varu n'aznu Jizosi kpatu onu iwo a aka, ngangam, ovnarna a ghabiri.

⁴⁵ Jizosi sika, "Nyele kpaturu m aka?"

Kpakara be goru. Pita kaa, "Nda-ai-kwu, igbudu badnu ka naadnagidne i."

⁴⁶ Kovu Jizosi karu, "Otu badnu kpaturu m aka, m maam nu rikne hiri n'ehni m whoga."

⁴⁷ Nga nwerinya wam whnurnu nu o nwee rikne tugwa, ehni naama a ririri, o dna n'eli n'ochi Jizosi, kahia nu ruwhnu igbudu badnu wam nhne mernu o jiri kpatu iwo a aka, nu kpa be gworu a ngangam.

⁴⁸ Jizosi kanu a, "Nnwọ m rinya, okwnata mkpoma i znohialam ji, la n'udno."

⁴⁹ Kpa Jizosi kpu oka n'onu, otu badnu hiri n'oro Jariosi va, kanu Jariosi nye nnwo a naariya ariya, "Nnwọ i rinya nwunam. I kpaknama Nye-zni-nhne ehni berere."

⁵⁰ Nga Jizosi nuru a, o kanu Jariosi, "I tuko ogwnu, kweru kpoi, be jogwo a."

⁵¹ Nga o vaduru n'oro, o kwéle nye obula snornu a bna nu rime oro, okwolem Pita, Joni nu Jemisi, nu nda nu nne nnwo rinya wam.

⁵² Kpakara ele badnu zi naakwna ekwna, naagbanu nnwo rinya wam mkpe. Jizosi kanu be, "Anu kwnama ekwna, nnwo rinya ka nwuna onwu, o neezni anyarna."

⁵³ Be mu a rumu, kwnornu nu be magwu nu nnwo rinya wam nwurnu onwu.

⁵⁴ Kovu nu Jizosi nwugwuru a n'aka, kaa, "Nnwọ, lizo."

⁵⁵ Enine a hiehnarnu, o lizo ngangam. Jizosi kanu be, be nyee a nhne, ma o ri.

⁵⁶ O duru ele muru a ehni, kovu Jizosi kanu be, be kahianu nye obula nhne mernu.

9

*Jizōsi zihalaru nri
nụ badnụ lawuru*

(Mat 10:5-15; Mak 6:7-13)

¹ Jizōsi sukwukōta ele izi nri nū ẹbo wam n'otu, nyee be rikne nū rikne ọchichi ọ chihala rẹnwu ọjọ nū ọ gwọ nriria.

² O zihala be zne kpọ okwo ẹli-eze Chiokike, gwọ ele nriria.

³ O kanu be, “Anu ji nhne ọbula kpa anu neezne. Anu ji mkpara mọbu rẹkpa, mọbu brẹdi, mọbu iwai, anu chi iwo lawuru.

⁴ Oro ọbula anu bnarnu, anu daziri pi tem anu whoga n'eli-ohna wam.

⁵ O buru nū ele badnụ nābnanyana anu, anu whoga n'eli-ohna wam, lịsname rịzna ke zị n'ọchi anu, ma ọ buru nhne akebne megidne be.”

⁶ Be whoga, zne hite n'otu ẹli zne ẹli berere, nọkpo okwo izi oma, nọogwo ele nriria kpakara ohna.

O gbagwojiri Erodu anya

(Mat 14:1-12; Mak 6:14-29)

⁷ Nga Erodu nye nẹchi Galili nurnu kpakara nhne neeme, ọ gbagwojiri a anya, kwnornu nū agwna ele badnụ naakaa nū Jōni hilem n'ẹnwu lizọ,

⁸ ele berere naakaa nū Ẹlajja whuyaru iwihne, ele berere naakaa nū otu nū rime ele ọwhnurninya gbaka hiri n'ẹnwu lizọ.

⁹ Erodu kaa, “M biri m Jōni risi, nyele bu nye ka me nọonu nhne gbasiri a?” O pio ọ whnụ Jizōsi.

Jizōsi nyernu

pokwu badnụ isne wiri

(Mat 14:13-21; Mak 6:30-44; Jōn 6:1-14)

¹⁰ Nga ele izi wam hiehnarnu, be kanu Jizōsi nhne be mernu. O kwuru be whoga ichne, zne ẹli Betesaida.

¹¹ Nga igbudu badnụ wam mahiaru, be snornu a. O kwubnanya be, kwunu be ọka gbasiri ẹli-eze Chiokike, gwọ masi ele nriria.

¹² N'ogbednachi nga chi neeji, nri nū badnụ lawuru wam vakwnusi Jizōsi, kanu a, “Zihala ele ka ma be zne nū rime ẹli-ohna ma nū rime ẹkwu, zuru nhne oriri, dnanyi n'abalị a, kwnornu nū a zị nū hne kọru owu.”

¹³ Jizōsi saru be, “Anu nyee be nhne be jeeri.”

Be saru a, “Nhne a nwernu hna kwolem ike brẹdi isne nū aznụ lawuru, okwolem ma a jeezne zuya wiri a jeenye igbudu badnụ ka.”

¹⁴ Pokwu ele rukna isne zị pi.

Kọvu Jizōsi kanu ele sno apna a, “Anu mee ma be daziri ẹli nū mkpuru nri badnụ isne, mkpuru nri badnụ isne.”

¹⁵ Ele sno apna a mee kpam, nye ọbula daziri ẹli.

¹⁶ Jizōsi gweru ike brẹdi isne wam nū aznụ lawuru wam, le anya n'oligwe, tū mmamma, nyawama be. O nyee be ele sno apna a, be nyee igbudu badnụ wam.

¹⁷ Kpakara be ri, riji ruwho, ele sno apna a tụtukota ruvnuruvnu ke gwarnu, nri nū nkita lawuru jihiaru.

Pita kahiaru nye Jizōsi bu

(Mat 16:13-19; Mak 8:27-29)

¹⁸ Otu ọbochi, nga Jizōsi neekpe okpukpe ichne, ele sno apna a nū ya zị, ọ sika be, “Ele badnụ be naakaa nū me bu nyele?”

¹⁹ Be saru a, “Agwna be naakaa, Jōni Nye Wụ Mini, ele berere naakaa, Ẹlajja, ele berere masi naakaa, otu nū rime ele ọwhnurninya gbaka hiri n'ẹnwu lizọ.”

²⁰ Kọvu Jizọsi sịkwa be, “Anụ n’iwwhuru anụ, anụ kanụ nụ m bụ m nyele?” Pita sarụ a, “Ị bụ Karaịsi ke Chiokike.”

Jizọsi kwuru ọka

gbasiri ẹnwu a

(Mat 16:20-28; Mak 8:30---9:1)

²¹ Jizọsi dọ be aka nụ nsị be kánụ nye ọbula.

²² O kanụ be, “Nnwọ ke Badnụ jaatariri agịda awwhnụwhnu, ele okno badnụ nụ ele risi arịohna nụ ele neezni iwu ele Ju jọọju a, be gbu a, nga ọbochi ẹto whemernu, o jeehi n’ẹnwu lizọ berere.”

²³ O kanụ kpakara be, “O bụru nụ nye ọbula jooosno m n’aznụ, o jọọju ẹhni a, vuru ọgba a kpakara ọbochi sno m.

²⁴ Kwnornu nụ nye ọbula ke noopio o znohia bụdnụ a, jootuwu a, kọvu nye ọbula ke jootuwu bụdnụ a kwnornu m, jọoznohia a.

²⁵ Mbnarna kini bụ nhne badnụ jeenwe ọ bụru nụ ọ rihia kpakara ọwa n’iru, kọvu tuwhume bụdnụ a?

²⁶ Nye ọbula ke iwghnerne m nụ ikwu-ọnu m jootu, Nnwọ ke Badnụ jootu iwghnerne nye wam nga ọ jaava n’igwugwu a nụ n’igwugwu ke Nda a nụ ke ele enine izi nsọ.

²⁷ N’ezi me kanụ anụ, agwna ele gwuzo hna jọonwu ẹnwu tem be whnụ ẹli-eze Chiokike.”

Onwoghari ke Jizọsi

(Mat 17:1-8; Mak 9:2-8)

²⁸ Nga ọbochi ẹsato whemernu kpa Jizọsi kwuru ikwu-ọnu ka, o kwuru Pita, Jọni nụ Jemisi yisinu ẹhni a zne n’olu rugwu kpe okpukpe.

²⁹ Kpa o zị neekpe okpukpe, ruwhnu a gbanwornu, iwo naacha va-a-a, neeke eke lele amụma.

³⁰ Ngangam, be whnụ ele rukna lawuru nụ ya nookwurita ọka, be bụ Mozizi nụ Ẹlajja.

³¹ Be whụyaru n’igwugwu, be nụ Jizọsi kwu ọka gbasiri ẹnwu a ke jeemezu nụ Jeruselem.

³² Anyarna turu Pita nụ ele nụ ya zị, kọvu nga anya dnornu be, be whnurnu igwugwu Jizọsi nụ ele rukna lawuru be nụ a gwuzo.

³³ Kpa be nọowhoga hne Jizọsi zị, Pita kanụ a, “Nda-ai-kwu, ọ bụru ọma a daziri hna. Ngwa ma a wu ọro-ẹka ẹto hna, otu ke i, otu ke Mozizi, otu Ẹlajja.” (Ọ máa nhne o jookwu.)

³⁴ Kpa ọ kpu ọka ka n’ọnu, erumeru oligwe whụyaru kpusni be, ogwnu turu be kpa be zị n’erumeru oligwe wam.

³⁵ Otu akpiri hiri n’erumeru oligwe wam, kaa, “Ka bụ Nnwọ m, nye me hohiaru, anụ bnotenu a nsị.”

³⁶ Nga akpiri wam kwukworu, be whnurnu Jizọsi nsnunu a. Ele sno apna a bítaru nhne be whnurnu nụ mkpọma be, ọ zá nye be kannụ nhne be whnurnu ige wam.

Jizọsi gwọru

wikoro rukna

(Mat 17:14-18; Mak 9:14-27)

³⁷ N’ekile a, nga be hiri nụ rugwu wam hiedna, igbudu badnụ vakwnusiri Jizọsi.

³⁸ Otu nwerukna hiri n’igbudu badnụ wam siwama lulo, “Nye-zni-nhne, bikno le nnwọ m rukna anya, kwnornu nụ ọ bụ otu nnwọ me nwernu.

³⁹ Rēnwu ojo n̄wụgwu a, o si l̄lo, o vudna n'ēli n̄odo a, ọ n̄ogbo okoto n'ọnu, o gbu ọkwu sụ ọ sigbasi a, ma o gbu a.

⁴⁰ M riasno ele sno apna i ma be ch̄ihala a, k̄ovu be nw̄ee rikne.”

⁴¹ Jiz̄osi saru be, “Anu ebiri ka nw̄ee ọkw̄nata mkp̄oma, ele mkp̄oma h̄iri agh̄i, me nu anu jaadazi du ngele? Me jeesinu anu mkp̄oma du ngele?” O kanu nwerukna wam, “Kwuya nnw̄o i rukna hna.”

⁴² Nga nnw̄o rukna wam naava, rēnwu ojo wam vudna a n'ēli, d̄osi a rikne. K̄ovu Jiz̄osi bigb̄oru rēnwu ojo wam, gw̄o a, kwuhnata a nda a.

⁴³ Rikne ọmu Chiokike duru kpakara be ẹhni.

Jiz̄osi kwukwnornu ọka

gbasiri ẹnwu a

(Mat 17:22,23; Mak 9:30-32)

Kpakara nhne o neeme noodu ele badnu ẹhni, Jiz̄osi kanu ele sno apna a,

⁴⁴ “Anu bno ns̄i nhne me naakanu anu. Be jeegweru Nnw̄o ke Badnu resi n'aka ele badnu.”

⁴⁵ K̄ovu be gh̄oyage nhne o nookwu. O bu nhne tugwaru otugwa n'anya be, be māa nhne ọ bu. Ogwnu kw̄ele be s̄ikwa a nhne gbasiri a.

Nyele kakwo ibne a?

(Mat 18:1-5; Mak 9:33-37)

⁴⁶ Ele sno apna a bete neesigha ọka n'esilawuru be nye kakwo ibne a.

⁴⁷ Nga Jiz̄osi mah̄iaru nhne zi be nu mkp̄oma, o kwuru otu watakiri gwuzote a nu ngeri a.

⁴⁸ O kanu be, “Nye ọbula ke jaanarnu watakiri ka nu r̄whna m, nanarnu m, nye ọbula ke nanarnu m, nanarnu nye ziyaru m. Kwnornu nu nye kakwo mat̄i n'esilawuru anu, nye wam bu nye kakwo.”

Nye za neemegidne anu,

dagwunu anu

(Mak 9:38-40)

⁴⁹ Joni kanu a, “Nda-aj-kwu, a wh̄nu mu otu badnu ke naach̄ihala rēnwu ojo nu r̄whna i, a bnosni a, kwnornu nu ọ za noosno ai.”

⁵⁰ Jiz̄osi kaa, “Anu bn̄osni a, kwnornu nu nye za neemegidne anu, dagwunu anu.”

Otu mgbu kw̄ele

ọ nabnanya Jiz̄osi

⁵¹ Kpa ige n̄odo ọ jaala oligwe, Jiz̄osi kpebitem o zne Jeruselem.

⁵² O zihala ele izi nu ruwhnu a, be zne otu ẹli Sameria ma be mekwatanu a nhne.

⁵³ K̄ovu ele ẹli wam kw̄ele ọ nabnanya a, kwnornu nu ọ nu lele nu o neezne Jeruselem.

⁵⁴ Nga ele sno apna a Jemisi nu Joni wh̄nu ru ka, be s̄ikwa a, “Nyenwe ai, i pioru ma a sukwudna b̄kw̄nu n'oligwe rnegbukwo kpakara be?”

⁵⁵ K̄ovu nu Jiz̄osi t̄uhnasnarnu, bigb̄o be.

⁵⁶ [O kaa, “Anu māa enine anu nwernu. Nnw̄o ke Badnu v̄age ma o gbu badnu, k̄ovu ọ zn̄ohia budnu badnu.”] Be whe zne ẹli berere.

Nhne o joowhu ele

sno apna Jiz̄osi

(Mat 8:19-22)

⁵⁷ Kpa be neezne nu apna, otu nwerukna kanu a, “M joosno i hne ọbula i neezne.”

⁵⁸ Jizọsi kanụ a, “Edu nwernu mkpewu hne be dnanị, ọnnu oligwe nwernu alikwu hne be zukwa inwe, kọvu Nnwọ ke Badnụ nwée hne ọ jaabịta risi a.”

⁵⁹ Ọ kanụ nye berere, “Sno m.”

Kọvu nwerukna wam kaa, “Nyenwe aị, kweru me beru ọsno lite nda m.”

⁶⁰ Jizọsi kanụ a, “Gharu ele nwurnu ọnwu ma be lite ele nwurnu ọnwu ibne be, kọvu zne kpọ okwo izi ọma ẹli-eze Chiokike.”

⁶¹ Nye berere kwno kaa, “Nyenwe aị, m joosno i, kọvu kweru m me beru ọsno zne bekwu ele ọro m ikwu ipne-aznụ.”

⁶² Jizọsi kanụ a, “Ọ zá nye ọbula ke yisiri aka nụ mfama ẹkwu ke anọ ọro nọopnughari, daziri neele anya n'aznụ, kwesiri ẹli-eze Chiokike.”

10

Jizọsi zihalaru nri

badnụ ẹsau nụ ẹbo

¹ Nga ka mekworu, Jizọsi hohiaru nri badnụ ẹsau nụ ẹbo, ma o zihala be ẹbo ẹbo nụ rime ẹli-ọhna nụ mgbu ọbula ọ jaabna.

² Ọ kanụ be, “Ogwe nhne ẹkwu zị agịda, kọvu nụ ele ọrnu zị ele nụ ele. Kam kpayarụ, anụ rịo Nyenwe ogwe nhne ẹkwu ma o zizne ele ọrnu n'ẹkwu a.

³ Anụ zne, m neezizne anụ lele rụmu atnurnu n'esilawuru edu.

⁴ Anụ jí rẹkpa iwai, mọbu rẹkpa, mọbu okoro-ọchi, anụ békwu nye ọbula n'apna.

⁵ “Nga anụ bnarnụ ọro ọbula, anụ beru ọsno kaa, ‘Udno zinu ọro ka.’

⁶ Ọ bụru nụ nye udno zị n'oro wam, udno anụ jaazinu a, ọ bụru nụ nye udno zila, udno anụ jaahiehnakwnusi anụ.

⁷ Anụ dazigidne n'oro wam, neeri, nọonwo nhne be jeenye anụ. Ka bụ kwnornu nụ nye ọrnu kwesiri ọgwo ọrnu a. Anụ znékpọ n'oro n'oro.

⁸ “Nga anụ bnarnụ ẹli-ọhna ọbula ke be nabnanyarnụ anụ, anụ ri nhne ọbula be jeenye anụ.

⁹ Anụ gwọ ele nrịra zị pịi, anụ kanụ be, ‘Eli-eze Chiokike zị anụ ndundu.’

¹⁰ Kọvu nụ ẹli ọbula anụ bnarnụ ke be nábnyanya anụ, anụ zne n'apna a, kaa,

¹¹ “Ọ bụbedi rịzna ẹli anụ ke takwnụsiri n'ọchi aị, a lịsnarnu a megidne anụ. Kọvu anụ mahia nụ ẹli-eze Chiokike zị ndundu.’

¹² Me kanụ anụ, Chiokike jọdonu ẹli Sodom obirizi karu ẹli wam n'ọbochi ikpe.

Eli-ọhna kwé ekwe

(Mat 11:20-24)

¹³ “Awhnụwhnu jaazinu i, jị Korazini. Awhnụwhnu jaazinu i, jị Bętesaida. Kwnornu nụ ọrnu ndu-ehni ke be rnurnu nụ rime anụ, ọ bụru nụ be rnụ be nụ ẹli Taya nụ ẹli Sajdoni, be znernu ọtuhnasna mkpọma agịda ige wheru ewhe, daziri n'ikpe mkpe nụ rẹtnu.

¹⁴ Kọvu be jọdonu Taya nụ Sajdoni obirizi n'ikpe karu anụ.

¹⁵ Jịwa masị, Kapanom, be jeegwelizọ i olu dọ oligwe? Be jeegwedna i ẹli, dọ bekwu ẹli rẹnwu.

¹⁶ “Nye noobnonu anụ nsnị noobnonu m nsnị, nye juru anụ nọju m. Nye ọbula ke juru m nọju nye ziyaru m.”

Nri badnụ ẹsau nụ ẹbo wam

hiehnaru

¹⁷ Nri badnụ ẹsau nụ ẹbo wam jiri snarnima hiehna, kaa, “Nyenwe aị, ele rẹnwu ọjọ bnonnu aị nsnị nụ rẹwhna i.”

18 Jizōsi kanụ be, “M whn̄rnu m Ekwensu hne o hi n'oligwe dna lele amuma.

19 M nyernu m anụ rikne ọ zọkwasi agwọ nụ akpị ọchi nụ o megbu kpakara rikne ke nye irno, ọ zá ke nwernu rikne mekasi anụ nhne rịa rịa.

20 Kọvu mkpoma sọ anụ n'ọnu kwnornu nụ rẹnwu ojo noobnonu anụ risi, kọvu anụ nwudna nụ be gbarụ rẹwhna anụ n'ọkwukwo n'oligwe.”

*Jizōsi nwudnarnu
(Mat 11:25-27; 13:16,17)*

21 Ige wam Jizōsi nwudnarnu k'agida nụ rime Enine Nso, kaa, “Meka, Nda, Nyenwe oligwe nụ ọwa, kwnornu nụ i bigwaru nhne ka n'anya ele akọ nụ ele marnụ nhne, kọvu i kpumennu be rumu takiri. Owe! Nda, meka, kwnornu nụ ọ bụru ọma kpam n'anya i.

22 “Nda m yisiri kpakara nhne n'aka m. Ọ zá nye magwụ nye Nnwọ wam bụ, okwolem Nda. Ọ zá nye magwụ masị nye Nda bụ, okwolem Nnwọ wam, nụ ele Nnwọ wam pioru o kpumenu a.”

23 Ige wam ọ tūhnasna hne ele sno apna a zị, kanụ be ichne, “Ọwa ọma zīnu anya ke whn̄rnu nhne anụ whn̄rnu.

24 Me kanụ anụ, agida ele ọwhnurninya nụ ele eze pioru ọ whn̄ nhne anụ nọowhnu kọvu be whn̄na, nụ ọ n̄rnu nhne anụ nọonu, kọvu nụ be n̄na.”

Elulu nye Sameria ọma

25 Otu mgba, nye ọgwnu iwu lizọru naakpa Jizōsi iru, sịkwa a, “Nye-zni-nhne, k̄ini bụ nhne me jeeme ma m keh̄ia m b̄dnu kwó okwó?”

26 Jizōsi sarụ a, “K̄ini bụ nhne be gbarụ n'iwu? Ndaa kpa i n̄ogwnu a?”

27 Ọ sarụ, “I jeegweru kpakara mkpoma i n̄ kpakara mkpuru ovu i, n̄ kpakara iknernema i n̄ kpakara echiche i whn̄ Nyenwe ā Chiokike i n'anya. Whn̄ masị nye agbatibi i n'anya lele ẹhni i.”

28 Jizōsi kanụ a, “I sakwah̄aru a, mee kpam, i jaazị b̄dnu.”

29 Kọvu o pioru o mee ẹhni a nye ọma, ọ sịkwa Jizōsi, “Nyele bụ nye agbatibi m?”

30 Jizōsi sarụ a, “Otu nwerukna hiri n̄ Jeruselem neezne Jeriko, ọ dnabna n'aka ele buznu. Be woru iwo a, l̄i a nhne, gbawhu, s̄gbasi a n'ọnu ẹnwu.

31 Ọ dnabna n̄ otu nye ariohna neewhe n'apna wam, nga ọ whn̄rnu a, ọ garu ngeri berere znernu hne o znezne.

32 Kpam masị, otu nye Livai, nga ọ vaduru hne ọ zị, whn̄ a, ọ garu ngeri berere znernu hne o znezne.

33 Kọvu otu nye Sameria neewhe n'apna wam, vaduru hne ọ zị, nga ọ whn̄ru a, ọ d̄nu a obirizi.

34 Ọ znekwnusi a, w̄si a m̄ono n̄ manya, knesi ẹnya a. O vukwasị nwerukna wam n'olu an̄ ọro a, kwuzne a n'ọro ele izne, legidne anya nkari.

35 N'ekile a, o nyee nyenwe ọro ele izne wam iwai, kanụ a, ‘Legidne a anya nkari, me hiehna, m j̄okwu i nhne ọbula i mewhuru n̄ risi.’

36 “N'esilawuru badn̄ ẹto ka, ndaa nye i cheru gesiri n̄ nye wam dnabnarn̄ n'aka ele buznu b̄ nye agbatibi a?”

37 Kọvu ọgwnu iwu wam kaa, “Nye wam ke d̄nu a obirizi.”

Jizōsi kanụ a, “Zne, mee kpam.”

Jizōsi znernu ọro

Mata n̄ Meri

38 Nga be neezne n'apna, Jizōsi n̄ ele sno apna a va otu ẹli-ọhna, zne n'ọro Mata nye gbaman̄ a ọro a.

³⁹ Mata nwernu otu nwene rinya rēwhna a bu Meri, Meri znernu daziri ẹli n'ochi Nyenwe aị, n'oonu ikwu-ọnu a.

⁴⁰ Kọvu echiche Mata jihiaru n'ernu o n'oonu, o vakwnusi Jizọsi kaa, "Nyenwe aị, o gbásila i nu nwene m rinya sigbasiri me n'unsu m n'oonu ẹnu? Kanu a ma o yisinu m aka."

⁴¹ Jizọsi saru a, "Mata, Mata, i naari ọriri, neemekpa ẹhni i ẹhni kwnornu agida nhne.

⁴² Kọvu otu nhne zi mkpa. Meri horulam nhne ke ka mma, o za nye jeenwe rikne nahoru a ya."

11

Jizọsi znirni nhne

gbasiri okpukpe

(Mat 6:9-13; 7:7-11)

¹ O du otu obochi Jizọsi zi neekpe okpukpe n'otu hnanum, nga o kpekworu, otu nu ele sno apna kanu a, "Nyenwe aị, zni aị kpa be kpe okpukpe lele kpa ịoni znirni ele sno apna a."

² O kanu be, "Nga anu neekpe, anu kaa, 'Nda aị,

rēwhna i buru nhne zi nsọ.

Ẹli-eze i va.*

³ Nyee aị wiri tna, ke joozunu aị obochi tna.

⁴ Gbarunu aị mmehie aị,

lele kpa a jaagbarunu ele mehieru aị.

I yisi aị nu rime nhne ọrnurna.' "†

⁵ O kanu be, "O buru nu otu nu rime anu nwernu enyi, o zneknwusi a n'esilawuru abali, kaa, 'Enyi m, gbaznisi m ike bredi ẹto.

⁶ Otu enyi m berere vakwnusiri m, m nwée m nhne me jeenye a.'

⁷ "Enyi a hi nu rime ọro sa a, 'I kpakna m ẹhni. M tusnilem ọro, me nu rumu m dnanyi n'okpata. M jeenwe rikne lizo nye i nhne obula.'

⁸ Me kanu anu, o bu n'ezi nu o jeelizọ nye a kwnornu nu o bu enyi a, kovu kwnornu nu iwhterne za notu nye ọro, o jeelizọ nye a.

⁹ "Kpam masi, me kanu anu, anu rjo, be jeenye anu, anu pio, anu joopiohia, anu znu aka n'onu-mgbo, be jaagbamanu.

¹⁰ Kwnornu nu nye obula ke ọorio, ọoriohia, nye noopio, noopiohia, nye nooznu aka nu mgbo be jaagbamanu a.

¹¹ "Ndaa nye bu nda n'esilawuru anu, nye nnwo a ọorio aznu, o nyee a agwo? ‡

¹² Mọbu o rjo a ẹkwna ochichi, o nyee a akpi?

¹³ O buru anu ele joogburu ẹhni anu nu bujo mahiaru o nyee rumu anu nkesi buru oma, o ko buru Nda anu ke oligwe, o bu nu o jeenye ele ọorio a Enine Nso?"

Jizọsi nu Belizibolu

(Mat 12:22-30; Mak 3:20-27)

¹⁴ Jizọsi naachihala renwu ojo ke dnarnu mgbu. Nga renwu ojo wam whogaru, nwerukna wam ke dnarnu mgbu kwuru oka, o du kpakara ele badnu ẹhni.

* **11:2** Agwna nhne be gbaru kwuru be mee nhne i noopio n'owa lele kpa be mee a n'oligwe † **11:4** Agwna nhne be gbaru kwuru dphia n'aka nhne ọrnurna ‡ **11:11** Agwna nhne be gbaru kwuru bredi

¹⁵ Kọvu agwna be kaa, “O ji rikne Bẹlizibolu nye risi ele rẹnwu ojo naachihala rẹnwu ojo.”

¹⁶ Ele berere naakpa a iru, kaa, o gesi be nhne elekema hi n'oligwe.

¹⁷ Jizọsi mahiaru mkpọma be, o kanu be, “Eli-eze obula kewama megidne ẹhni a, o jootubiri etekne, ọro obula kewama megidne ẹhni a, ọ jaadna.

¹⁸ O buru nu Setani kewama megidne ẹhni a, eli-eze a joo gwuzoli. M nookwu ka kwnornu nu anu karu nu m ji m rikne Bẹlizibolu naachihala rẹnwu ojo.

¹⁹ Kiti, o buru nu m ji m rikne Bẹlizibolu naachihala rẹnwu ojo, ele sno anu ji rikne nyele naachihala be? Be joo bu ele ikpe anu.

²⁰ Kọvu o buru nu m ji m aka Chiokike naachihala rẹnwu ojo, eli-eze Chiokike dulam anu ẹhni.

²¹ “Nga nye dikne woru mgwna ogwnu a, neese ọro a, ẹkwu a zi n'udno.

²² Kọvu nga nye kakwo a rikne varu, megbu a, o nahoru a kpakara mgwna ogwnu a ke o tukwasiri mkpọma, kesa ẹkwu a.

²³ “Nye dagwu nu m, neemegidne m, nye sone m chikota nhne, noobosa obosa.

Renwu ojo hiehnarnu

(Mat 12:43-45)

²⁴ “Nga rẹnwu ojo hiri nu rime badnu whoga, o zneghari n'eli chna chna chna, noopio hne o joozuka inwe. O buru nu o whnu, o kaa, ‘M jaalahna n'oro me hiri whuya.’

²⁵ Nga o vaduru, o whnu nu be zasnarnu oro wam bikwata nhne nkari.

²⁶ O jeezne chiri rẹnwu ojo esau ibne a ele nwernu risi rikne karu a, be wuru nu rime nye wam. Onodi ipne-aznu nye wam jhnasi bujo karu kpa o zi nu mbom.”

Nye ọwa ọma n'ezi

²⁷ Kpa Jizọsi zi nookwu oka ka, otu nwerinya siwama n'igbudu badnu wam, “Ruhwo ke vuru i nu rema ke i nwornu bu nhne be goziri ogozi.”

²⁸ Jizọsi saru, “Ele ọwa ọma karukwo bu ele nonu ikwu-onu Chiokike, neeme be.”

Nhne elekema ke Jona

(Mat 12:38-42)

²⁹ Kpa igbudu badnu wam gbakoru hne Jizọsi zi, o kanu be, “Ebiri ojo ka noopio nhne elekema, o za nhne elekema be jeenye be, okwolem nhne elekema Jona.

³⁰ Lele kpa Jona bu nhne elekema ke ele Ninive, o bu kpa Nnwọ ke Badnu joo bunu ebiri ka.

³¹ Eze nyerinya Seba jeelizo ya nu ele ebiri ka bna n'ikpe, o jaama be ikpe, kwnornu nu o hiri n'osotoma k'owa va nurnu akoniche Solomoni. Kọvu le, nhne kakwo Solomoni zi hna.

³² Ele Ninive jeelizo, be nu ebiri ka bna n'ikpe, be jaama be ikpe, kwnornu nu be tuhnasarnu mkpọma n'okpo okwo Jona. Kọvu le, nhne kakwo Jona zi hna.

Iwhne ke ẹhni

(Mat 5:15; 6:22,23)

³³ “O za nye joomusi tonji bita a nu hne tugwaru otugwa, mọbu bita nu mkpuru ru nkita. Tnnuma, be bita a n'olu nhne be bita tonji, ma ele naabnanya oro whnurnu iwhne a.

³⁴ Anya bu iwhne ke ẹhni. O buru nu anya i buru ọma, kpakara ẹhni i joo bu iwhne iwhne. Kọvu o buru nu anya i buo ọma, kpakara ẹhni i jaagba ochichiri.

³⁵ Anụ ledukom anya o zi iwhe ke zi anụ n'ehni bo gho ochichiri.

³⁶ Ka kpayarụ, o buru nụ kpakara ehni i bu iwhe iwhe, o za ngeri ke gbarụ ochichiri, kpakara ehni i jobu iwhe lele nga tonji nomukwasi i iwhe a.”

*Ele Farisi nu
ele zni iwu ele Ju*

(Mat 23:1-36; Mak 12:38-40)

³⁷ Nga Jizosi kwukworu oka ka, otu nye Farisi sukwu a, o va snornu a ri wiri, o snornu a zne, o daziri n'ikpechi.

³⁸ Nye Farisi wam whnurnu nụ Jizosi kwoge aka bete ri wiri, o du a ehni.

³⁹ Nyenwe ai kanu a, “Kitna anu ele Farisi beru osno snu aznu okiko nu agbugba wiri, kovu nu owho-anya nu agwa ojo jiharu nu rime anu.

⁴⁰ Anu ele iwheirniwhe! O buo otu badnu wam mernu rime okiko nu aznu a?”

⁴¹ Anu gweru nhne zi nu rime agbugba wiri donu ele mboni obirizi, kpakara nhne jaazinu anu richna.

⁴² “Awhnuwhnu zinu anu ele Farisi, kwnornu nu anu nookwu otu nga nu nri ke kpakara mkporo okwukwo nwernu eknarna oma ke ekwu, kovu anu juru ikpe zi snam nu owhnun'anya Chiokike. O zi mkpa nu anu znernu eme nhne ka nu ke berere.

⁴³ “Awhnuwhnu zinu anu, ele Farisi, kwnornu nu anu whnurnu risi ngadna n'oro ogbako anu n'anya, o naamasị anu ele badnu neebekwu anu ikwu n'ahja.

⁴⁴ “Awhnuwhnu zinu anu, ele Farisi, kwnornu nu anu nu lele ilili ke ele badnu ma n'ozo ochi n'olu a.”

⁴⁵ Otu nye ogwnu iwu saru Jizosi, “Nye-zni-nhne, oka ka i nookwu naakpasị ai iwheirne.”

⁴⁶ Jizosi saru nye ogwnu iwu wam, “Awhnuwhnu jaazinu anu ele ogwnu iwu, kwnornu nu anu noovute ele badnu ivu rinya be vuru, kovu anu n'iwheuru anu jee gweru otu mkpaka anu yinu be aka.

⁴⁷ Awhnuwhnu zinu anu, kwnornu nu anu noowo ilili ele owhnurninya, ele nda anu oknani gburu.

⁴⁸ Anu bu ele akebe nu ele kwnagidnenu nhne ele nda anu oknani mernu, be gburu ele owhnurninya, anu wu ilili be.

⁴⁹ Chiokike nu nhne omuma a karu, ‘M jeeziznenu be ele owhnurninya nu ele izi, be joogbu agwna be, be jaakpakna ele berere ehni.’

⁵⁰ Kam kpayarụ, ebiri ka jaata awnwhnu kpakara ovnarna ele owhnurninya be gburu hite n'opanizo owa,

⁵¹ hite n'ovnarna Ebeli du n'ovnarna Zakaraya, nye be gburu n'iketa ojo ariona nu hne zi nsọ. Owe! Me kanu anu, ebiri ka jookwu kpakara ogwo ovnarna ka.

⁵² “Awhnuwhnu zinu anu ele ogwnu iwu, kwnornu nu anu gwemernu snambi ke naagbama onuhna akoniche, anu bna ge, anu kwéle ele pioru o bna be bna.”

⁵³ Nga Jizosi hiri nu pii whoga, ele Farisi nu ele zni iwu ele Ju nookwunu a onu rikne, nesikwa ajji agida nhne.

⁵⁴ Be needne, noopio ma be jonu nhne be jeeji bno a nhne.

12

*O do aka nu nsu
gbasiri ruwhnu lawuru
(Mat 10:26,27)*

1 Nga igbudu ele badnụ gbakọru hne Jizọsi zị ke mernu be nọozo ibne be ọchi, Jizọsi beru ọsno naakanụ ele sno apna a, “Anụ neeze nhne whụ bredi ke ele Farisi, ke bụ ruwhnu lawuru.

2 Kwnornu nụ be jookpume kpakara nhne be kpusnirni okpusni, kpakara nhne be tugwaru otugwa jowhuya iwhe.

3 Nhne anụ kwuru n'ọchichiri, be jookwuhia n'iwhehnie, ke anụ tukasiri nụ nsnị nụ rime ọro matị, be jookwuhia n'olu ọro.

Nye anụ kwesiri

ọ tū ogwnu

(Mat 10:28-31)

4 “Ele enyi m, me kanụ anụ, anụ tū ogwnu ele noogbu anọ-ehni, ele nwée rikne o mee nhne berere.

5 Kọvu me kanụ anụ nye anụ jọotu ogwnu a, anụ tū ogwnu nye wam ke nwernu rikne gbu anọ-ehni, tūbna enine nū rime bekwnu. Owe! Me kanụ anụ, anụ tū ogwnu a.

6 Be zá neere wonzna isne mkpuru iwai matị lawuru? Kọvu Chiokike zá nechezu otu nū ruwhnu a.

7 N'ezị, be gwnuru kpakara rukeri-ize ke risi anụ ọnu. Ogwnu tū anụ, anụ zị okne ọnu ahia karu agida wonzna.

O kwuhia nu ọ ju Karaisi

(Mat 10:32,33; 12:32; 10:19,20)

8 “Me kanụ anụ, nye ọbula ke jookwuhia m nū ruwhnu ele badnụ, Nnwọ ke Badnụ jookwuhia nye wam nū ruwhnu ele enine izi Chiokike.

9 Kọvu nye ọbula ke jọgonahoru m nū ọ máa nye me bụ nū ruwhnu ele badnụ, m jọgonahoru a nū ruwhnu ele enine izi Chiokike.

10 Nye ọbula ke kwuru ọka ọjo megidne Nnwọ ke Badnụ, be jaagbarunu a, kọvu nye ọbula ke kwuru kwugidne Enine Nsọ, be jáagbarunu a.

11 “Nga be jookwuru anụ zne n'oro ọgbako ele Ju, nū ruwhnu ele ọchichi nū ele risi, kpe anụ ikpe, mkpoma lákọ anụ mini kpa anụ jọgoru ọnu anụ mọbu nhne anụ jookwu.

12 Enine Nsọ jeezni anụ n'ige wam nhne anụ jookwu.”

Elulu nye eze

iwhnirniwhno

13 Otu badnụ n'esilawuru igbudu badnụ wam, kanụ Jizọsi, “Nye-zni-nhne, kanụ nwene m rukna ma o keme mkpe a!”

14 Jizọsi saru a, “Enyi m, nyele mernu m nye ikpe mọbu nye ke mkpe n'esilawuru anụ?”

15 Ọ kanụ be, “Anyá dū anụ ẹli gbasiri kpakara ọwho-anya, kwnornu nū budnu badnụ híge n'agida ẹkwnu o nwernu whuya.”

16 Jizọsi tnuhu be elulu ka, “Ekwu otu nye eze mĩrni agida mkpuru.

17 Nye eze wam naari nū mkpoma a, “Ndaa nhne me jeeme? M nwée m ọbna hne me jaabita mkpuru m.”

18 “Ọ kaa, ‘Ka bụ nhne me jeeme, m jaakwnadna kpakara ọbna m, wu ọbna ikne ke zị rude, m jaabita kpakara mkpuru m nū ẹkwnu m nū rime be.

19 M jaakanụ ehni m, I nwernu agida ẹkwnu ị kpabitaru agida awha, zukwaru inwe, ri, nwọ, mkpoma sọ ị n'ọnu.

20 “Kọvu Chiokike kannu a, ‘Ji nye iwhnirniwhno, be noopio budnu ị n'aka ị n'abalị ka. Nyele jeenwe kpakara nhne ị kpabitanu ehni?’”

21 “Ka bụ kpa ọ jaazinu kpakara ele kpabitanu ehni be ẹkwnu, kọvu be nwée ẹkwnu nū ruwhnu Chiokike.”

Anụ kwnata Chiokike

mkpoma

(Mat 6:25-34)

22 Jizọsi kanụ ele sno apna a, “Ka bụ nhne me kwno naakanụ anụ, anụ rígbuko ẹhni anụ n’oriri gbasiri bụdnu anụ, nhne anụ jeeri, mọbu gbasiri ẹhni anụ, iwo anụ joowo.

23 Bụdnu kakwo wiri, ẹhni kakwo iwo.

24 Anụ le rụmu ọnunu, be ghá mkpuru, be zá neegwe nhne n’ekwu, be nwée obna hne be bíta mkpuru, kọvu Chiokike nọoznu be. Anụ zị okne ọnu ahia karukwo rụmu ọnunu.

25 Ndaa badnụ n’esilawuru anụ ke nwernu rikne tükwasi nhne nụ bụdnu a hite n’oribu ẹhni a?

26 Hne ọ bụ nụ anụ nwée rikne mee nhne matị nụ kpa, kịni mernu anụ naaribu ẹhni anụ gbasiri nhne ke berere?

27 “Anụ lekọm atna kpa be nooso. Be zá nọdogbu ẹhni be n’ernu, be kwné ikpe. Kọvu me kanụ anụ, ọ bụbedi Solomoni n’iwhuru a nụ kpakara igwugwu a, yíge ẹyi lele otu nụ rime be.

28 Ọ bụru nụ Chiokike noowosi achara ke zị n’ekwu iwo, bụ ke zị tna, ekile be kpọrne be nụ bẹkwnu, ọ kọ bụru anụ, ọ joowosi anụ iwo, anụ ele ọkwnata ovu matị.

29 Anụ tükwasi mkpoma anụ nụ nhne anụ jeeri mọbu nhne anụ jọonwo, anụ rígbu ẹhni anụ gbasiri a.

30 Kwnornu nụ kpakara nhne ka bụ nhne ele máa Chiokike noopio, Nda anụ magwụ nụ kpakara nhne ka zị anụ mkpa.

31 Kọvu anụ pio ẹli-eze Chiokike, ọ jọtukwasinu anụ kpakara nhne ka masị.

Ekwnu ke zị n’oligwe

(Mat 6:19-21)

32 “Anụ tū ogwnu, ogbori atnurnu matị, kwnornu nụ ọ masiri Nda anụ ọ nyee anụ ẹli-eze a.

33 Anụ re nhne anụ nwernu kesi ele mboni. Anụ mehianu ẹhni anụ rekpá iwai ke zá aka, anụ kpabíta ẹkwnu n’oligwe ke kwó okwo, hne nye buznu nwée rikne zne, akịka zá naata ẹkwnu zị pịi.

34 Kwnornu nụ hne ẹkwnu anụ zị bụ hne mkpoma anụ jaazi masị.

Ele izi anya duru ẹli

35 “Anụ jiknenu nọornu ernalu, ele tọnji be noonwu onwu.

36 Lele ele neese nyenwe be znenu iriri ọlulu nnwerne ikne ma o hiehna, nga o hieru, znu aka n’onu-mgbo, be gbamanu a ọro wara wara.

37 Ọwa ọma zinu ele izi wam nyenwe be jọowhnu hne be neese nse nga o hiehnarnu. Me kanụ anụ ezi ọka, ọ jọosuru ajinị n’ikwnu, kanụ be, be daziri ẹli ri wiri, ọ bụru nye izi be.

38 Ọwa ọma zinu ele izi wam, ọ bụru nụ nyenwe be varu n’esilawuru abali mọbu n’onu ọsisi, ọ jọowhnu nụ be zị neese nse.

39 Kọvu anụ mahia nụ ọ bụru nụ nye nwe ọro mahiaru ọtnu-ige nye buznu jaava, ọ béekwele be liwa ọro a.

40 Kam kpayaru, anụ neese masị nse, kwnornu nụ Nnwọ ke Badnụ jaava ige anụ tuge anya a.”

Ọhi ke kwesiri

ọ kwnata mkpoma

(Mat 24:45-51)

41 Pita sịkwa a, “Nyenwe aị, ị nọotnunu aị elulu ka, sọbu kpakara badnụ.”

⁴² Nyenwe aị saru a, “Nyele bu ohi wam ke be kwesiri o kwnata mkpoma, nye nyenwe a mernu nye risi oro a, ma o neenye ele ohi wiri n'ige kwesiri?”

⁴³ Nye risi oro wam jobu nye owa oma o buru nu nyenwe a jaava whnu nu o mernu nhne kwesiri.

⁴⁴ Me kanu anu ezi oka, nyenwe a jeeme a nye jeelekota kpakara ekwnu a.

⁴⁵ Kovu o buru nu ohi wam jaakaa nu mkpoma a, 'Nda m kwu gbulem okwnu,' o bete naalibu ele ohi rukna nu rinya, neeri, nonwo manya, manya noogbu masi a.

⁴⁶ Nda kwu ohi wam jaava n'obochi o tuge anya a nu n'ige o ma. O joogbubi a ichichi lawuru, mee ya nu ele kwe ekwe tako awnhnuhnu.

⁴⁷ “Nye izi ke marnu nhne nda a kwu pioru, o jikernune o mee a, be jaapnia agida mbinibini.

⁴⁸ Kovu nye ke ma, ke mernu nhne kwesiri be ta a awnhnuhnu, be jaapnia a mbinibini mati. Kwnonu nu nye be nyernu agida nhne, bu nye be joopio agida nhne n'aka a. Nye be nyernu agida nhne o legidne anya, be joopio nhne zi agida karukwo n'aka a.

Jizosi, nhne neegweya okewa

(Mat 10:34-36)

⁴⁹ “M varu m o gweya bekwnu n'owa, nhne me noopio o bu nu o noonwu kitna.

⁵⁰ M nwernu m mini be jowu m, m joozukwa inwe tem be mezu a.

⁵¹ Anu cheru nu m gweyaru m udno n'owa? Oza! Me kanu anu, m gweyaru m okewa.

⁵² Hite nu kitna zne nu ruwhnu, badnu isne zi n'otu oro jeekewa, badnu eto megidne badnu lawuru, badnu lawuru megidne badnu eto.

⁵³ Be jeekewa

Nda megidne nnwo a rukna,
nnwo rukna megidne nda a,
nne megidne nnwo a rinya,
nnwo rinya megidne nne a,
nne nzi megidne nnwerne nnwo a,
nnwerne nnwo megidne nne nzi a.”

Anu ghohia ige ka

(Mat 16:2,3)

⁵⁴ Jizosi kanu igbudu badnu wam, “Nga anu whnuru ruwnuru oligwe hi n'odidna ehnani, ngangam anu kaa, 'Mini joozo,' mini zo masi.

⁵⁵ Nga anu whnuru ruwhere ndidna hne o neewhe, anu jaakaa, 'O jeerne bekwnu,' o ziri kpam.

⁵⁶ Anu ele ruwhnu lawuru! Anu magwu kpa be le owa nu ruwhnu oligwe anya gwnu nhne o jobu. Kovu ndaa kpa anu ma ige ka?”

Ji nu nye irno i mee udno

(Mat 5:25,26)

⁵⁷ “Kini mernu anu ma nhne buru oma nu omume?”

⁵⁸ Nga ji nu nye kwu i neezne ikpe zi n'apna, gbal ma ji nu a mee udno n'apna, o buka kpam, o jooonuru i nyee nye risi ikpe, nye risi ikpe nyewhete i nye neelekota ele ikelu, o tubna a n'oro ikelu.

⁵⁹ Me kanu i, i jowhuya pii tem i kwuhkata kpakara iwai ipne-aznu i jigwu.”

13

Tuhnasna mkpoma hite nu mmehie mọbu nwụ enwu

¹ Agwna ele zị nụ pịi kanụ Jizọsi nhne gbasiri ele Galili ele Paileti jiri ọwnarna be gwasị n'ariohna be.

² Jizọsi sarụ be, “Anụ che nụ ele Galili ka bụ ele mmehie kakwo ele Galili berere kwnornu nụ be tarụ awhnụwhnu kpa?”

³ Me kanụ anụ, ọza. Kọvu okwolem ma anụ tuhnasnarnu mkpoma, anụ jọonwu lele be.

⁴ Mọbu anụ che nụ nri nụ badnụ ọsato ele ọro olu ke zị nụ Saịlom dnagburu, nụ be bụ ele ikpe marnụ karụ ele berere ele zị nụ Jeruselem?

⁵ Me kanụ anụ, ọza. Kọvu ọ bụru nụ anụ tuhnasnana mkpoma, anụ jọonwu lele be.”

Elulu isisi figi

⁶ Jizọsi tñunu be elulu ka, “Otu nwerukna kpasiri figi n'ekwu a, o zne noopio mkpuru n'olu a, kọvu ọ whnuna mkpuru ọbula.

⁷ Ọ kanụ nye neelekwa ekwu figi wam, ‘Ka bụ awha ọto me naava hna noopio mkpuru n'olu isisi figi ka, kọvu m zá nọowhnu mkpuru ọbula. Gbudna a! Ndaa ke o noolulu ẹli n'etekne?’

⁸ “Ọ sarụ a, Nda-aị-kwu, ‘Gharụ a otu awha berere, m joogwu ẹli gburugburu wụsi a nsnị anọ.

⁹ Ọ bụru nụ ọ mịnya mkpuru, ọ bụru ọma, kọvu ọ bụru nụ ọ mịnyage mkpuru, i gbudna a.’”

Jizọsi gwọru nrịria n'Ọbochi Ozukwa Inwe

¹⁰ N'otu Ọbochi Ozukwa Inwe, Jizọsi zị neezni nhne n'oro ọgbako ele Ju,

¹¹ otu nwerinya zị nụ nrịria nri awha nụ ọsato, ke kpayarụ nụ o gbewhu egbewhu, o nwée rikne gwuzoru kwem rịa rịa.

¹² Nga Jizọsi whnurnu a, o sukwu a, kanụ a, “Nwerinya, nrịria i lalam.”

¹³ Ọ tükwasi a aka a lawuru, ngangam, nwerinya wam gwuzoru kwem, znarnị Chiokike.

¹⁴ Kọvu ovu weru nye risi ọro ọgbako ele Ju ẹhni k'agịda kwnornu nụ Jizọsi gwọru nrịria n'Ọbochi Ozukwa Inwe. Ọ kanụ ele badnụ wam, “A nwernu ọbochi isunu a ji nọornu ọrnu, anụ va ma be gwọ anụ nrịria n'Ọbochi ele ka, kọvu ọ bụo n'Ọbochi Ozukwa Inwe.”

¹⁵ Nyenwe aị sarụ a, “Anụ ele ruwhnu lawuru, anụ zá nọotoma ehni anụ mọbu iyinya anụ n'Ọbochi Ozukwa Inwe zne nyee a mini?”

¹⁶ Nwerinya ka ke bụ nnwọ rinya Ebereham nye Ekwensu knernụ eriri nri awha nụ ọsato ka, ọ bụo ọma be tọma a eriri ka ma o nwernu ẹhni a n'Ọbochi Ozukwa Inwe?”

¹⁷ Nga o kwuru ka, iwhnerne tų kpakara ele noogwuzogidne a. Kọvu igbudu badnụ wam nwudnarnu kwnornu agịda ọrnu ndu-ẹhni ọ nọornu.

Mkpuru mọsitadi nụ nhne whụ bredi

(Mat 13:31-33; Mak 4:30-32)

¹⁸ Jizọsi sịkwa be, “Eli-eze Chiokike, o yiri lele kịni? Kịni bụ nhne me jeeji gbu esi a?”

¹⁹ Ọ nụ lele mkpuru isisi be kwu mọsitadi ke badnụ kpasiri n'ekwu a. O so, ghọ isisi ke rụmu ọnunu oligwe nọornu alikwu nụ nkala a.”

²⁰ Berere kwno, ọ kaa, “Ndaa nhne me jeeji sninu ẹli-eze Chiokike?”

21 O nụ lele nhne whụ bṛedi ke nyerinya gweru gwasị n'agịda ikpa tem kpakara a whụ.”

*Onu-mgbo ke zi nwọronwo
(Mat 7:13,14,21-23)*

22 Jizọsi neezne hi nụ otu ẹli-ọhna dū ẹli-ọhna berere neezni nhne kpa o neezne Jeruselem.

23 Otu badnụ sịkwa a, “Nyenwe aị, okwole badnụ ele nụ ele bụ ele be jọoznohia?”

Jizọsi sarụ be,

24 “Anụ yisi ẹhni garụ n'ọnu-mgbo ke zi nwọronwo, me kanụ anụ ezi ọka, agịda ele badnụ jooپیo ọ bna, kọvu be jéenwe rikne bna.

25 Nga nda kwu nwe ọro lizọru gbasni ọro, anụ joogwuzo n'ederezi nooznu aka, naariasno, 'Nda-aị-kwu, bikno, gbamanụ aị ọro.'

“Ọ jaasa anụ, 'M máam ele anụ bụ mọbu hne anụ hi va.'

26 “Ige wam anụ jaakaa, 'A sno i ri wiri, nwọ nhne ọnwunwo, i zirniri nhne n'ẹli aị.'

27 “Kọvu ọ jaasa anụ, 'M máam ele anụ bụ mọbu hne anụ hi va. Anụ hi hne me zi whọga, anụ ele aruru-ẹli.'

28 “Okwna ẹkwna nụ ọta rụkwnurnu-ize jaazi nụ pịi nga anụ joowhnu Ebereham, Aziki nụ Jekọpu nụ kpakara ele ọwhnurninya n'ẹli-eze Chiokike, kọvu anụ bụru ele be chihalaru n'ederezi.

29 Ele badnụ jeehi n'ọbosi ẹhnam nụ ọdidna ẹhnam, hi nụ rugwu nụ ọdidna va, daziri ẹli n'iriri ke ẹli-eze Chiokike.

30 N'ezi ọka, agwna ele ipne-aznụ jọbu ele be ọsno, agwna ele be ọsno jọbu ele ipne-aznụ.”

*Jizọsi whnurnu
Jeruselem n'anya
(Mat 23:37-39)*

31 Ige wam agwna ele Farisi vakwnusiri Jizọsi kanụ a, “Hi nụ hna whọga, zne hne berere. Erọdu pioga o gbu i.”

32 Jizọsi sarụ be, “Anụ zne kanụ edu wam, m jaachihala rẹnwu ojo, gwọ masi ele nrịria tna nụ ekile, n'ọbochi ke ẹto, m jọornuzu ẹrnu m.

33 Kpa ọ zi, m jeeznerịri tna nụ ekile nụ ọbochi ke sno a, kwnornu nụ o kwésile be gbu nye ọwhnurninya nụ hne búo Jeruselem.

34 “Chei! Jeruselem, Jeruselem, jị ke noogbu ele ọwhnurninya, ke jị akaworugwu nọlo ele be ziyannu i. Mgba ele kpa me pioru ọ chikota rụmu i lele kpa enwerne ọchichi nẹchikota rụmu a nụ mkpururu aka nkwa a lawuru, kọvu i kwéle.

35 Le, be nẹsigbasinu anụ ọro anụ ma ọ tọbiri etekne. Me kanụ anụ, anụ jọowhnu m berere tem dū nga anụ jaakaa, 'Chiokike gọzi nye wam ke naava nụ rẹwhna Nyenwe aị.’”

14

Jizọsi zị n'ọro nye Farisi

1 O dū otu Ọbochi Ozukwa Inwe, nga Jizọsi zị n'ọro otu nye Farisi be marnụ rẹwhna a neeri wiri, ele badnụ zị needne a.

2 Otu nwerukna ọchi a lawuru nụ aka a zarụ aza zị nụ ruwhnu a.

3 Jizọsi sịkwa ele Farisi wam nụ ele zni iwu, “Ọ bụru ọma n'iwu ọ gwọ nrịria n'Ọbochi Ozukwa Inwe, sọbu ọ búo ọma?”

⁴ Kọvu be kpusnirni ọnu be. Jizọsi nwụgwu nwerukna wam n'aka gwọ a nriria wam, zihala a.

⁵ Jizọsi sịkwa be, “Ọ bụru nụ i nwernu nnwọ rukna mọbu ehni ke dnabnarnu omi n'Ọbochi Ozukwa Inwe, anụ jéegwehịa a n'Ọbochi Ozukwa Inwe?”

⁶ Ọ zá nhne be sarụ a.

Badnụ o gwedna ẹhni a ẹli

nụ ovu Oma

⁷ Nga Jizọsi whnurnu kpa ele be sukwuru nọohoru risi ngadna be jaadazi, ọ tnuu be elulu ka,

⁸ “Nga badnụ ọbula sukwuru i ikwu iriri ọlulu nnwerne, i dązi nụ risi ngadna, kwnornu nụ nye nwernu igwugwu kákwo i nwernu rikne va.

⁹ Ọ bụru kpam, nye sukwuru anụ lawuru jaavakwnusi i, kanụ i, ‘Nye nwerukna ka ngadna i.’ Ige wam i jeeji iwchnerne daziri nụ ngadna ke zị ẹli ẹli.

¹⁰ Kọvu nga be sukwuru i, daziri ẹli nụ ngadna ke zị ẹli ẹli. Nye wam ke sukwuru i jaavakwnusi i, kanụ i, ‘Enyi m, zne nụ ngadna ke ka mma.’ Ige wam i jeenwe igwugwu nụ ruwhnu ele varu pịi.

¹¹ Kwnornu nụ be jeegwedna nye ọbula ke gwelizọru ẹhni a olu, nye ọbula ke gwednarnu ẹhni a ẹli, be jeegwelizọ a.”

¹² Jizọsi kanụ nye wam sukwuru a, “Nga i siri wiri ọsisi mọbu ke anyasnu, i síkwu ele enyi i kpọi, nụ rumu nwene i mọbu ele ibne i ele eze, i mee kpam, be jeesi wiri sukwu kwno i, i ge wam be kwulam ji ọgwọ.

¹³ Kọvu nga i mernu iriri, sukwu ele mboni, nụ ele ọru, nụ ele mgworo nụ ele isni,

¹⁴ be jọgozi i. Ọ bụ n'ezi nụ be nwée rikne kwụ i ọgwọ, kọvu Chiokike jọokwuhata i nga ele oma jeehi n'ẹnwu lizọ.”

Elulu okne iriri

(Mat 22:1-10)

¹⁵ Nga otu nye dazị neeri wiri nurnu a, ọ kanụ Jizọsi, “Owa oma zinu nye jeeri wiri n'ẹli-eze Chiokike.”

¹⁶ Jizọsi sarụ a, “Otu nwerukna siri okne iriri sukwu agida ele badnụ.

¹⁷ N'ige iriri wam, o zihala nye izi a, ọ kanụ ele be sukwuru, ‘Vaa, be mekwolem kpakara nhne.’

¹⁸ “Kọvu kpakara be n'otu bete nọorio be gharu be. Nye ke mbom kaa, ‘M zuru m ẹli ẹkwu, m jeezne lekwa a, bikno gwnusi m n'ele i gharuru.’

¹⁹ “Nye berere kaa, ‘M zuru m nri ehni be knekọtara ẹbo ẹbo, m neezne o tula be, bikno gwnusi m n'ele i gharuru.’

²⁰ “Nye berere kaa, ‘M luru m nnwerne ikne, m jéenwe rikne va.’

²¹ “Nye izi wam hiehna kanụ nda a kwu kpakara nhne ka. Ige wam ovu weru nda nwe ọro wam ẹhni, ọ kanụ nye izi a, ‘Wara wara, zne nụ ngeri apna nụ kpakara apna ke ẹli-ọhna kwubnanya ele mboni, nụ ele ọru nụ ele isni nụ ele mgworo.’

²² “Nye izi wam zne, hiehna, kaa, ‘Nda-aị-kwu, m mene m nhne i karu me mee, kọvu oghere zị kọiri.’

²³ “Nda a kwu kanụ a, ‘Zne n'apna ma nụ ẹkwu, kwnagidne ele badnụ ma be bnanya, ma ele badnụ jihia n'oro m.’

²⁴ Me kanu i, kpakara ele wam me sukwuru ikwu nụ mbom, ọ zá otu badnụ nụ rime be ke jeeri iriri m.”

Nhne nye sno apna Jizọsi

jọowhnu

(Mat 10:37,38)

²⁵ Agịda ele badnụ sno Jizọsi neezne, ọ tughnasna kanụ be,

²⁶ “Ọ bụru nye ọbula vakwnusiri m, kọvu o snóné nda a nụ nne a, nụ nnwerne a, nụ rụmu a, nụ rụmu nne a rukna nụ rụmu nne a rinya irno, ma bụdnụ ke a masị, ọ jọobuli nye sno apna m.

²⁷ Nye ọbula ke vúrúle ọgba a sno m, jọobuli nye sno apna m.

²⁸ “Ndaa otu badnụ n'esilawuru anụ ke noopio o wu ọro olu, o jéébe ọsno daziri ẹli gwnụ nhne o jeegwe a, ma o nwernu iwai o jeeji wukwo a?”

²⁹ Kwnornu nụ ọ bụru nụ ọ wa ẹli, kọvu o nwée rikne wukwo a, nye ọbula ke whnrnu a jọomu a rụmu,

³⁰ kaa, ‘Nwerukna ka panizoru o wu ọro, kọvu o nwée rikne wukwo a.’

³¹ “Mọbu ndaa eze ke neezne ọgwnu megidne eze berere, ke jéébe ọsno daziri ẹli tokwu o nwernu rikne gweru nri pokwu ele ọgwnu gwuzogidne nye chi nri pokwu lawuru megidne a?”

³² Ọ bụru nụ o nwée rikne, nga nye wam zị ikere, o jeezizne ele izi rịo nhne udno.

³³ Kpam masị, ọ zá nye ọbula nụ rime anụ ke jọobu nye sno apna m, ọ bụru nụ ọ gharula kpakara nhne o nwernu.

Arụa bnána iru

(Mat 5:13; Mak 9:50)

³⁴ “Arụa bụru ọma, kọvu ọ bụru arụa tuwhu ọso n'ọnu a, be jeeji kịni mee a ọ sọ n'ọnu?”

³⁵ Ọ buma ọma n'ẹli mọbu nụ mkpomkpo. Be jootuwhu a n'ederezi.

“Nye nwernu nsị o ji ọ nụ nhne, ọ nuru.”

15

Elulu atnrnu whuru owhu

(Mat 18:12-14)

¹ Ele ọna ntụ nụ ele mmehie gbakọru nọonu ikwu-ọnu Jizọsi.

² Kọvu ele Farisi nụ ele zni iwu ele Ju naatamu, be kaa, “Nwerukna ka nanabnanya ele mmehie, ya nụ be sno neeri wiri.”

³ Jizọsi tnrnu be otu elulu,

⁴ “Ọ bụru nụ otu badnụ n'esilawuru anụ nwernu otu riwhu atnrnu, otu kpawhu ọri. Ọ jáaghasa nri tolu nụ tolu ke gwnarnụ n'ọhia zne piọ otu ke kpawhuru akpawhu tem o piohia a?”

⁵ Nga o piohiaru a, ọ tükwasị a n'obe-aka a, nọonwudna.

⁶ Ọ la ọro sukwu ele enyi a nụ ele agbatibi a, kaa, ‘Anụ snornu m nwudna, nụ m piohiaru m atnrnu m ke kpawhuru ọri.’

⁷ Me kanụ anụ, ọ bụ kpa snarnịma jaazị n'oligwe nụ risi otu nye mmehie ke tughnasarnu mkpoma, kakwo nri tolu badnụ nụ tolu ele ọma ke ọtughnasna mkpoma zá mkpa.

Elulu mkpuru iwai

whuru owhu

⁸ “Ọ bụru nụ nyerinya nwernu nri mkpuru iwai, otu whunahọru a. Ọ jọomusi tọnji, za ọro a, piọsi a rikne tem o piohia a.

⁹ Nga o piohiaru a, o sukwu ele enyi a nụ ele agbatibi a, kaa, ‘Anụ snornu m nwudna, m piohiaru m iwai m me tuwhuru.’

¹⁰ Me kanụ anụ, ọ bụ kpa snarnịma jaazị nụ ruwhnu ele enine izi Chiokike nụ risi otu nye mmehie ke tughnasarnu mkpoma.”

Elulu nnwọ whuru owhu

11 Jizọsi nụ kwno elulu berere, kaa, “Otu nwerukna nwernu rụmu rukna lawuru.

12 Ke matị kanụ nda a, ‘Nda m, kesi m mkpe ke m.’ Nda a keme ẹkwnu a n’esilawuru be lawuru.

13 “Nga obochi ele nụ ele whemernu, nnwọ ke matị chikota kpakara ẹkwnu a, lizo, zne mba zị ikere, daziri pji lulukwo kpakara ẹkwnu a nụ bụdnu ojo.

14 Nga o mewhukworu kpakara nhne o nwernu, okne ọknunyo dnarnu n’eli wam, ọ bna nụ mkpa.

15 O zne yisi ẹhni n’ernu n’aka otu nye ẹli wam, nye wam zizne a ọ znu ezni n’ohia.

16 Ọ masiri a o ri ori ezni, kovu ọ zá nye nyernu a.

17 “Nga anya dornu a nụ risi, ọ kaa, ‘Kpakara ele nda m gornu ernu nwernu wiri be ri, nootuwu agwna a, kovu m zị m hna nnonwu n’ogwnu wiri.

18 M jeelizo, lahnakwnusi nda m, m jaakanu a, Nda m, m mehielem megidne oligwe ma ji.

19 M kwésile m be kwu m nnwọ i berere, kovu me buru otu nụ rime ele i gornu ernu.’

20 Ngam, o lizo, znekwunusi nda a.

“Kovu nga ọ zị hne zị ikere, nda a whnurnu a, donu a obirizi k’agida, gba eso kwnusi a, bnagidne a, snutu a onu.

21 “Nnwọ wam kanu nda a, ‘Nda m, m mehielem m megidne oligwe ma ji. M kwésile m be kwu m nnwọ i berere.’

22 “Kovu nda a kanu ele izi a, ‘Wara wara, anu chija iwo ke kakwo mma, anu wosi a, gbasị a arị mkpaka n’aka a, anu wosi a okoro-ochi n’ochi a.

23 Anu toya nnwọ ehni be zurnu oznu gbu a, mee iriri ma a nwudna.

24 Kwnornu nụ nnwọ m ka nwurnu onwu, kovu ọ zị bụdnu, o whuru owu, be piohia a.’ Be bete nonwudna.

25 “Kpa nhne ka neeme, onarna a zị n’ekwu. Nga ọ vaduru ọro ndundu nū eri nū eri be neetne,

26 ọ sukwu otu nye izi sika nhne be neeme.

27 Ọ saru a, ‘Nwene i rukna hiehnarnu, nda i gbulem nnwọ ehni be zurnu oznu, kwnornu nū ọ whnurnu a n’ehni siri rikne.’

28 “Ovu weru nwene a rukna ke sọru a ẹhni k’agida, o kwéle ọ bna n’oro. Nda a vakwnusi a, riasno a.

29 Ọ saru nda a, ‘Le, agida awaha me zị nonunu i ernu lele ohi, ọ zá ige me mernu risi rikne nū nhne i nyernu n’iwu. Kovu i nyélele m otu nnwọ owu me nū ele enyi m ri.

30 Kovu nga nnwọ i ka ke mewhukworu kpakara ẹkwnu i, ya nū ele rinya ewhere varu, i gbunnu a nnwọ ehni be zurnu oznu.’

31 “Nda a kanu a, ‘Nnwọ m, me nū ji zị ige dum, kpakara nhne me nwernu bu ke i.

32 A kwesiri ọ nwudna, kwnornu nū nwene i rukna ka nwurnu onwu, kovu ọ zị bụdnu, o whuru owu, kovu be piohiaru a.’ ”

16

Elulu nye neelekota ẹkwnu

1 Jizọsi kanu ele sno apna a, “Otu nye eze nwernu nye neelekota ẹkwnu a, be kanu nye eze wam nū nye neelekota ẹkwnu a noolulu kpakara ẹkwnu a.

2 O sukwu a, sika a, ‘Kini bu otutnu ka me nonu gbasiri i? Vaa ma a piakota kpakara nhne i nonu, kwnornu nū i jeelekotama ẹkwnu m berere.’

3 “Nye neelekọta wam kanụ ẹhni a, ‘Kini bụ nhne me jeeme? Nda m kwu neegweme m n’ẹrnu. M nwée m iknerna me jeeji nri ẹrnu rikne, iwhnerne ọ bụ nye ọrọ nọtu m.

4 M maam nhne me jeeme, nga me whọgaru n’ẹrnu, ele badnụ jeekweru me bnanya ọro be.’

5 “O sukwu ele jigwu nda a kwu ọgwo n’otu n’otu. Ọ sịkwa nye mbom, ‘I ji nda m kwu kini?’

6 “O kaa, ‘Otu riwhu obele mọno.’

“Nye neelekọta ẹkwu wam kanụ a, ‘Gweru ọkwukwo, daziri ẹli, gbasị nri isne wara wara.’

7 “O sịkwa nye ke ẹbo, ‘I ji nda m kwu iwai ele?’

“O kaa, ‘Otu pokwu ọtutu ikpa wheti.’

“O kanụ a, ‘Gweru ọkwukwo gbasị riwhu ẹsato.’

8 “Nda kwu nye neelekọta wam ke kparụ agwa ojo znarni a, kwnornu nụ o mernu lele nye nwernu echiche. Kwnornu nụ rumu ke ọwa ka nwernu echiche o mee nhne gbasiri be kakwo rumu ke iwhe.

9 Me kanụ anụ, anụ gweru ẹkwu k’owa ka mee ele badnụ enyi, nga ẹkwu anụ jookwome, be kweru anụ bnanya n’oro kwó okwo.”

10 “Nye be kwesiri ọ kwnata mkpoma nụ nhne matị, kwesiri be kwnata a mkpoma nụ nhne hna ezi. Nye bụ masị badnụ ojo nụ nhne matị bụ badnụ ojo nụ nhne hna ezi.

11 Ọ bụru nụ anụ búo ele be kwnata mkpoma n’ẹkwu k’owa, nyele jeenye anụ ezi ẹkwu?

12 Ọ bụru nụ anụ búo ele be kwnata mkpoma n’ẹkwu nye berere, nyele jeenye anụ ẹkwu ke aka anụ?

13 “O zá ọhi ke nwernu rikne bụru ọhi nda kwu lawuru. Ọ bụru kpam, o joosno otu irno, whnụ ke berere n’anya. Mọbu ọ joosobisinu otu k’agida, ledna ibne a anya. Anụ jọbuli ọhi Chiokike nụ ọhi ẹkwu.”

Agwina ikwu-ọnu Jizosi

(Mat 11:12,13; 5:31,32; Mak 10:11,12)

14 Nga ele Farisi ele whnuru iwai n’anya nurnu ikwu-ọnu ka, be mụ Jizosi rumu.

15 Jizosi kanụ be, “Anụ bụ ele nọgwu ẹhni anụ nụ anụ bụ ele ọma nụ ruwhnu ele badnụ, kọvu Chiokike magwụ mkpoma anụ. Nhne zị okne ọnu n’anya ele badnụ bụ nhne ruru ọru n’anya Chiokike.

16 “Nhne be nyerna n’iwu nụ ele ọwhnurninya zị tem Joni, hite n’ige wam, be nọkpo okwo izi ọma ẹli-eze Chiokike, nye ọbula neeyisi ẹhni ma ọ bna nụ rime a.

17 Ọ zị ewheke nụ oligwe nụ ọwa jaagawhe kakwo otu nhne ke zikakworu matị n’iwu jaadna.

18 “Nye ọbula ke jaagba nnwerne a nnam, lụ nyerinya berere neeme ọyi, nyerukna ọbula ke luru nnwerne be gbarụ nnam neeme ọyi.

Nye eze nụ Lazarosi

19 “Otu nye eze zị, ke noowo iwo odno odno nụ abochna marnụ mma, wu budnu iriri kpakara ọbochi.

20 Otu nye mboni be dnanyitaru n’ogodo ọnu-mgbo a, nye rẹwhna a bụ Lazarosi, nye ẹnya kpuru kpakara ẹhni.

21 Ọ nọgwu a ma be nyee a rụnruruvnu wiri ke hi n’ikpechi nye eze wam dna. Rumu nkita varu naarasna ẹnya a.

22 “Ige duru nụ nye ọrọ wam nwurnu, ele enine izi vuru a zne hne Ebereham zị. Nye eze wam nwụ masiri, be lite a.

²³ Nụ rime bẹkwu ẹli rẹnwu hne ọ zị nọowhnuji anya, o le anya n'olu whnu Eberham nū hne zị ikere nū Lazarosi zị n'akwankọ a.

²⁴ Nye eze wam sukwu a, 'Nda aị Eberham, ọnu m obirizi, zizne Lazarosi o rusi ọnu mkpaka a nū mini mejị riro m, kwnornu nū m nọowhnuji anya nū rime bẹkwu ka.'

²⁵ "Kọvu Eberham saru a, 'Nnwọ m, chenwanya nū nga i zị bụdnu i riru nhne ọma, kọvu Lazarosi naahjaru nhne bụo ọma. Kịtna be naakasi a mkpọma, kọvu i nọowhnuji anya.

²⁶ Be gweme kpakara nhne ka, be gwuru otu olulu hna ezi n'iketa aị nū anụ, ke kpayaru ele noopio o hi nū hna vakwnusi anụ jéenwe rikne, ọ zị masị nye nweru rikne hi hne anụ zị vakwnusi aị.'

²⁷ "Nye eze wam saru, 'Bikno, nda, zizne Lazarosi ọro nda m,

²⁸ kwnornu nū m nwernu rumu nne rukna isne, ọ dọ be aka nū nsni, ma be gharu ọ va hne ọwhnuji anya ka.'

²⁹ "Eberham saru a, 'Be nwernu Mozizi nū ele ọwhnurninya, be bnonu be nsni.'

³⁰ "Nye eze wam karu, 'Ọza, nda Eberham, ọ buri nū badnu hi n'ẹnwu lizo znekwnusi be, be jootuhnasna mkpọma.'

³¹ "Eberham kanu a, 'Ọ buri nū be jooobnonu Mozizi nū ele ọwhnurninya nsni, be jootuhnasna mkpọma ọ bụbedi nū badnu hiri n'ẹnwu lizo.' "

17

Mmehie, ọkwnata mkpọma

nụ ọrnu

(Mat 18:6,7,21,22; Mak 9:42)

¹ Jizosi kanu ele sno apna a, "Nhne neeme ma badnu mee mmehie jaavarị, kọvu awhnuwhnu jaazinu nye o jeehi n'aka a va.

² Ọ jaakanu nye wam mma ọ buri nū be gweru okne rugwu ogwe-wiri nyasi a n'ili tubna n'osimini karu o mee ma otu nū rime ele ka zị matị mehie.

³ Anu ledu anya nū nhne anu neeme.

"Ọ buri nū nwene i rukna mmehie i, bigbo a, ọ buri nū ọ tūhnasna mkpọma a, gbarunu a.

⁴ Ọ buri nū o mehieu i mgba ẹsau n'ọbochi, tūhnasna masi mgba ẹsau, kaa 'M tūhnasnarnu m,' gbarunu a."

⁵ Ele sno apna a kanu Nyenwe aị, "Mejitenu aị ọkwnata mkpọma."

⁶ Jizosi saru be, "Ọ buri nū anu nwernu ọkwnata mkpọma lele mkpuru mositadi, anu jaakanu okne isisi ka, 'Be whome i kpasị i n'esilawuru osimini,' o jooobnonu anu nsni.

⁷ "Ọ buri nū otu badnu nū rime anu nwernu otu nye izi ke nọonu ẹkwu a mọbu nọoznu atnurnu a, nga o hiri ẹkwu hiehna, ọ jaakanu a, 'Vaa daziri ẹli, ri wiri?'

⁸ Ọza! Kọvu ọ jaakanu a, 'Mesinu m wiri, woru iwo i, sete m me rikwo wiri, omekwo, i ri ke i.'

⁹ Be za naakanu nye izi meka nū o mernu nhne be karu o mee.

¹⁰ Ọ bu kpa ọ zinu anu, nga anu mernu kpakara nhne be karu anu mee, anu kaa, 'A bu ele izi etekne, a rnurnu ọrnu aị.'"

Jizosi gwọru nri

ele nchnichna

¹¹ Nga Jizosi zị nū apna neezne Jeruselem, ọ naagawhe n'esilawuru Sameria nū Galili,

12 kpa ọ naabna nụ rime otu ẹli-ọhna, nri ele rukna nchnịchna kwnusiri a. Be gwuzoru nụ hne zị ikere,

13 be gweru okne nkọli siwama, “Nda-ai-kwu, Jizọsi, dọnu ai obirizi.”

14 Nga Jizọsi whnurnu be, ọ kaa, “Anụ zne gesi ele arịohna ẹhni anụ.” Kpa be neeze, be gwọru be nchnịchna wam.

15 Nga otu nyenum nụ rime be whnurnu nụ be gwọlam a, ọ lahna, gweru okne nkọli naaja Chiokike.

16 Ọ dna n'ẹli n'ọchi Jizọsi tūnu a mmamma. Nwerukna ka bụ nye Sameria.

17 Jizọsi sịkwa a, “Be gwọla nri badnụ? Ndaa badnụ tolu ele berere?”

18 Ọ zá nye varụ ọ tūnu Chiokike mmamma, okwolem nye izne ka?”

19 Jizọsi kanụ a, “Lizọ, la, ọkwnata mkpọma ì dọhialam ì.”

Ige ẹli-eze Chiokike

(Mat 24:23-28,37-41)

20 Agwna ele Farisi sịkwa Jizọsi nga ige ẹli-eze Chiokike jaava. Jizọsi sarụ be, “Ẹli-eze Chiokike jáava lele kpa ele badnụ neele anya a.

21 Ọ zá nye jaakaa, ‘Le ọ zị hna,’ mọbu ‘Pjari,’ kwnornu nụ ẹli-eze Chiokike zị nụ rime anụ.”

22 Ige wam Jizọsi kanụ ele sno apna a, “Ige vawa nga ọ jọogwnu anụ ọ whnụ otu rime ọbochi ke Nnwọ ke Badnụ, kọvu anụ jọowhnu a.

23 Ele badnụ jaakanụ anụ, ‘Le, Nnwọ ke Badnụ zị pịi,’ mọbu ‘Ọ zị hna.’ Anụ snó be zne.

24 Lele kpa amụma oligwe neehi n'otu ọsotoma oligwe mụkesi n'ọsotoma berere, bụ kpa ọbochi ke Nnwọ ke Badnụ jaazi.

25 Kọvu ọ jeeberu ọsno ta agida awhnụwhnu, ebiri ka jọoju a.

26 “Lele kpa ọ nụ n'ọbochi Noa, ọ bụ kpa ọ jọonu n'ọbochi Nnwọ ke Badnụ.

27 Ele badnụ zị neeri, nọonwo, nọolu nnwerne, nọogbo nzi, dụ n'ọbochi Noa bnaznenu nụ rime ọgbo, mgba-mini ẹli gbukwo kpakara be.

28 “Ọ bụ masị kpam n'ọbochi Lọtu, kpakara be zị neeri, nọonwo, neere, nọozu ahia, naakpa mkpuru, noowu ọro.

29 Kọvu n'ọbochi Lọtu whogaru nụ ẹli Sodom, Chiokike wudnarnu bẹkwnu nụ rugwu bẹkwnu lele mini ozuzo, gbukwo kpakara be.

30 “Ọ bụ kpa ọ jaazi n'ọbochi be jookpume Nnwọ ke Badnụ.

31 N'ọbochi wam, nye ọbula ke zị n'olu ọro a, ọ bná nụ rime ọro a zne kwahala nhne a, kpam masị, nye ke zị n'ekwu lánna aznụ kwnornu nhne ọbula.

32 Anụ chenwanya nnwerne Lọtu.

33 Nye ọbula ke noopio ọ znohia bụdnú a, jootuwhu a, nye nootuwhu bụdnú a, jọoznohia a.

34 Me kanụ anụ, n'abalị wam, badnụ lawuru jaadnanyị n'ọkpata, be gweru otu gharụ ibne a.

35 Ele rinya lawuru jaazi neegwe wiri, be gweru otu, gharụ ibne a. [

36 Ele rukna lawuru jaazi n'ekwu, be gweru otu ghasa ibne a.”]

37 Ele sno apna a sịkwa a, “Ndaa pọ, Nyenwe ai?”

Jizọsi sarụ be, “Idele jaaziri hne ọbula iznu nwurnu ọnwu zì.”

18

Nwerinya nzi a nwurnu

nụ nye ikpe

1 Jizọsi tūnu be otu elulu neezni be kpa be kpe okpukpe kpakara ige neegweme aka.

² Ọ kaa, “Otu nye ikpe zị n’otu ẹli, nye zá nọtu ogwnu Chiokike mọbu sọ badnụ anya.

³ Otu nyerinya nzi a nwurnu zị masị n’ẹli wam, o neezne ọro nye ikpe ka, naarijasno a, ‘Bikno, kpenu m ikpe ọma megidne nye neemegbu m.’

⁴ “O kwéle o yinu a aka gbu ọkwnu. Omekwo, ọ kanụ ẹhni a, ‘Ọ bụ n’ezi nụ m zá m nọtu ogwnu Chiokike, mọbu sọ badnụ anya.

⁵ Kọvu kwnornu nụ nwerinya ka nzi a nwurnu naakpakna m ẹhni, m jeekpenu a ikpe ọma, ọ zị rikne gwu m kwnornu nụ ọ naava ige ọbula.”

⁶ Nyenwe aị kaa, “Anụ bno nsị nhne nye ikpe ojo wam kwuru.

⁷ Chiokike, ọ jọoznohia ele ke a, ele ọ hōhiaru, bụ ele naakwnakwu a iwhnehnie nụ abalị? Ọ jọogbu ọkwnu ọ dōhia be.

⁸ Me kanụ anụ, ọ jọoznohia be wara wara. Kọvu nga Nnwọ ke Badnụ jaava, ọ jọowhnu ele kwesiri ọkwnta mkpọma n’ọwa?”

Elulu nye Farisi

nụ nye ọna ntụ

⁹ Jizọsi tñunu ele kwnataru mkpọma n’imerne ọma be, kọvu ledna ele berere anya elulu ka.

¹⁰ “Ele rukna lawuru znernu Ọro Nsọ Chiokike zne kpe okpukpe, otu nye Farisi nụ otu nye ọna ntụ.

¹¹ Nye Farisi gwuzoru ichne kpenu ẹhni a okpukpe, kaa, ‘Chiokike, meka nụ m bụo m nye ọwho-anya, mọbu nye ojo, mọbu nye neeme ọyi lele ele berere. Meka nụ m bụo m nye ojo lele nye ọna ntụ ka.

¹² M noovu ọnu mgba lawuru n’ikwezu, m nọkwu otu nụ nri nga kpakara nhne me nwernu.’

¹³ “Kọvu nye ọna ntụ wam gwuzoru nụ hne zị ikere, o nwé rikne gwelizo a anya le oligwe, kọvu ọ kwa aka nụ mkpọma, o wute a, kaa, ‘Chiokike, dọnu m me nye mmehie obirizi.’”

¹⁴ Jizọsi kaa, “Me kanụ anụ, nye ọna ntụ ka nụ Chiokike mernu udno sụ ọ laru ọro a, ọ bụo nye Farisi, kwnornu nụ be jeegwedna nye ọbula ke gwelizọru ẹhni a olu, nye ọbula ke gwednarnu ẹhni a ẹli, be jeegwelizo a.”

Jizọsi gọziri rumu takiri

(Mat 19:13-15; Mak 10:13-16)

¹⁵ Agwna ele badnụ nookwuyanu Jizọsi rumu takiri be ma ọ kpatu be aka. Nga ele sno apna a whnurnu be, be bnanu be mbna.

¹⁶ Kọvu Jizọsi sukwuru rumu takiri vakwnusi a, kaa, “Anụ gharu rumu takiri ma be vakwnusi m, anụ bnósi be, kwnornu nụ ẹli-eze Chiokike bụ ke ele nụ kpa.

¹⁷ Me kanụ anụ ezi ọka, nye ọbula ke jéegweru ẹli-eze Chiokike lele nnwo matị, ọ jáabna nụ rime a rịa rịa.”

Otu nye ọchichi

(Mat 19:16-30; Mak 10:17-31)

¹⁸ Otu nye nẹechi ele Ju sịkwaru Jizọsi, “Nye zni-nhne ọma, kịni bụ nhne me jeeme ma m kehia m bụdnu kwó okwo?”

¹⁹ Jizọsi saru a, “Kịni kpararu i noosukwu m nye ọma? Ọ zá nye bụ nye ọma, okwolem otu badnụ, bụ Chiokike kpọi.

²⁰ I maa m nhne be nyernu n’iwu, ‘I mékọ ọyi, i gbúko badnụ, i znúko buznu, i gbákọ akebal aghalaghal, sọbisinu nda i nū nne i.’”

²¹ Nye ọchichi wam kaa, “M bítaru m kpakara nhne hite n’ige me bụ wikorọ.”

²² Nga Jizọsi nurnu nhne ka, ọ kaa, “I jeeme otu nhne kpọi. La, re kpakara nhne i nwernu, kesi ele mboni, i jeenwe ọkwnu n’oligwe, vaa, sno m.”

²³ Nga nye ọchichi wam n̄rnu ka, o wuteru a k'agịda, kwnornu n̄u o nwernu ẹkwu k'agịda.

²⁴ Jizọsi le a anya, kaa, “Ọ bụ nhne rarụ ẹhni k'agịda n̄u ele nwernu ẹkwu ọ bna n'ẹli-eze Chiokike.

²⁵ N'ezi, ọ z̄nu anọhia be kwu kameli ewheke ọ gawhe n'anya alanga karụ ele nwernu ẹkwu ọ bna n'ẹli-eze Chiokike.”

²⁶ Ele n̄rnu ọka ka, s̄kwa, “Ndakwanụ nye be j̄oznohia?”

²⁷ Jizọsi saru, “Nhne rarụ ẹhni hne badn̄u z̄i, be meli kpakara nhne hne Chiokike z̄i.”

²⁸ Pita kanụ a, “Le, a sigbasiri kpakara nhne snornu i.”

²⁹ Jizọsi kanụ be, “Me kanụ anụ ezi ọka, ọ zá nye ọbula ke sigbasiri ọro, m̄ọbu nnwerne, m̄ọbu nwene, m̄ọbu ele m̄rnu a, m̄ọbu r̄umu, kwnornu ẹli-eze Chiokike,

³⁰ ke j̄aanahia karukwo n'ige ka, n'ige ke jaava, b̄udnu kwó okwo.”

Jizọsi kwuru ọka gbasiri

enwu a ke mgbà eto

(Mat 20:17-19; Mak 10:32-34)

³¹ Jizọsi kwuru nri n̄u badn̄u lawuru wam, kanụ be, “A neezne Jeruselem, kpakara nhne ele ọwhnurninya gbarụ n'ọkwukwo gbasiri Nnwọ ke Badn̄u jeemezu.

³² Be jeegweru a nyewhete n'aka ele b̄uọ ele Ju. Be jeeme a nhne r̄umu, nyee a mkpari, gbu a ọnu mini,

³³ p̄nīa a nhne, gbu a. N'ọbochi k'ẹto, o jeehi n'ẹnwu lizọ.”

³⁴ Ele sno apna a gh̄oyage kpakara nhne ka. Be kpusnirni ọka ka n'anya be. Be máa risi nhne o nookwu.

Jizọsi gworu nye ọriọ isni

(Mat 20:29-34; Mak 10:46-52)

³⁵ Nga Jizọsi naavadu Jeriko, otu nye isni daz̄i n̄u ngeri apna n̄orio nhne.

³⁶ Nga ọ n̄rnu agida badn̄u neewhe, ọ s̄kwa be nhne neeme.

³⁷ Be kanụ a, “Jizọsi nye Nazareti neewhe hna.”

³⁸ O siwama l̄ulo, “Jizọsi, Nnwọ Devidi, ọnu m obirizi.”

³⁹ Ele be Jizọsi ọsno bigb̄oru a, o kpusni ọnu a, k̄ovu, o siwama k'agịda, “Ji Nnwọ Devidi, ọnu m obirizi.”

⁴⁰ Jizọsi gwuzoru, kaa, be kwuyanụ a ya. Nga ọ varu, Jizọsi s̄kwa a.

⁴¹ “K̄ini b̄u nhne i piuru me menu i?”

Nye isni wam kaa, “Nyenwe āi, mee ma m whn̄rnu m ọsno.”

⁴² Jizọsi kanụ a, “Whn̄rnu ọsno, ọkwnata mkp̄oma i gw̄olam ji.”

⁴³ Ngangam, o bete ọ whn̄u ọsno, snornu Jizọsi n'apna, naaznarni Chiokike. Kpakara ele whn̄rnu a znarni Chiokike.

19

Jizọsi n̄u Zakiyosi

¹ Jizọsi bnazne n̄u rime Jeriko, neewhe n'esilawuru a.

² Otu nye risi ele ọna nt̄u r̄whna a b̄u Zakiyosi z̄i p̄i, ọ b̄u nye baru aba.

³ O noopio kpa ọ j̄owhnu Jizọsi, k̄ovu o nw̄ee rikne kwnornu n̄u ọ b̄u nye z̄i ichichi n'esilawuru igbudu badn̄u.

⁴ Ọ gba ẹso zne n̄u ruwhnu, p̄ne n'olu isisi s̄kamo ma ọ whn̄u Jizọsi nga o jeewhe n̄u apna wam.

⁵ Nga Jizọsi d̄uru n̄u piyam, o le anya n'olu, kanụ a, “Zakiyosi, hiedna wara wara, kwnornu n̄u m jaadaz̄i n'oro i tna.”

6 Zakiyosi mee wara wara hiedna, nabnanya a nụ mkpọma ọso n'ọnu.

7 Kpakara ele badnụ whnurnu a, be bete naatamu, kaa, "Nwerukna ka znernu ọ bụru nye izne n'oro nye mmehie."

8 Zakiyosi lizọ kanụ Nyenwe aị, "Nyenwe aị, m jeekewa kpakara nhne me nwernu ẹli lawuru, kesi ele mboni, nye ọbula ke me ghogburu, m jọokwuhmata a ẹli ẹno."

9 Jizọsi kanụ a, "Ọznohia varu n'oro ka tna, kwnornu nụ nwerukna ka bu masi nnwọ Ebereham.

10 Kwnornu nụ Nnwọ ke Badnụ varu o pio nụ ọ znọhia ele whuru owhu."

Elulu nri mkpuru iwai

*be kwu mịnasi**

(Mat 25:14-30)

11 Kpa be zị noobno nsni, Jizọsi zne nụ ruwhnu tñunu be otu elulu, kwnornu nụ ọ zị Jeruselem ndundu, ele badnụ wam naari nụ ẹli-eze Chiokike jọwhuya iwhe kịtna.

12 Ọ kaa, "Otu nwerukna be marnu rẹwhna a znernu mba zị ikere ma be chni a eze sụ o hiehna ẹli a.

13 Hne o zne, o sukwu nri ele ọhi a, nyee be nri mkpuru iwai, kanu be, 'Anu zu ahia tem m hiehna.'

14 "Kovu ele ẹli wam snornu a irno, be zizne izi kaa, 'A chola nwerukna ka buri eze aị.' "

15 "Be chni a eze, o hiehna. O sukwu ele ọhi a ele o nyernu iwai ma ọ mahia mbnarna be nwehianu nụ iwai o nyernu be.

16 "Nye ke mbom varu, kaa, 'Nyenwe aị, mkpuru iwai i nyernu m nwehianu nri mkpuru iwai mbnarna berere.' "

17 "Nyenwe a kanu a, 'I mekwaru nkari, ọhi oma. Kwnornu nụ i kwesiri be kwnata i mkpoma nụ nhne matị, neechi nri mba.' "

18 "Nye ke ẹbo varu, kaa, 'Nyenwe aị, mkpuru iwai i nwehianu mkpuru iwai isne berere.' "

19 "Nyenwe a saru a, 'Buru nye neelekota ẹli-ohna isne.'

20 "Nye ke ẹto varu kaa, 'Nyenwe aị, le iwai i, m knernu m iwai i n'ikpe tugwatanu i ya.

21 Ogwnu i turu m, kwnornu nụ i bu nye anya rikne. I neegweru nhne buo ke i, neegwe nhne n'ekwu hne i kpala mkpuru.'

22 "Nyenwe a saru, 'M jeeji nhne hi n'onu i kpe i ikpe, ji ọhi ojo. I magwu nụ m bu m nye anya rikne, neegweru nhne buo ke m, m neegwe nhne n'ekwu me kpala mkpuru.

23 Kini mernu i yisige iwai m n'aka ele oro iwai? Kpa me hiehnarnu, m znernu m anahuru iwai m nụ mbnarna a.'

24 "O kanu ele gwuzo ndundu, 'Anu nahia a iwai ki nyega nye wam ke nwernu nri.'

25 "Be kanu a, 'Nda-ai-kwu, o nwernu nri.'

26 "O saru be, 'Me kanu anu, nye ọbula ke nwernu be jeenye a, o nwehnasiru, kovu nye ke nwée, be jaanahuru a ọ buredi ke o nwernu.

27 Kịtna, ele irno m ele kwége me buru eze be, anu kwuya be hna gbumekwo kpakara be nụ ruwhnu m.' "

* **19:10** mịnasi: Jizọsi tñunu elulu mkpuru iwai be kwu mịnasi. N'ige mbom, ogwo ẹnu ọbuchi bu otu mkpuru iwai etekne. Otu mịnasi hna lele otu riwhu mkpuru iwai.

*Jizōsi bnazneru**Jeruselem**(Mat 21:1-11; Mak 11:1-11; Jōn 12:12-19)*

²⁸ Nga Jizōsi kwukworu ọka ka, o beru be ọsno neezne Jeruselem.

²⁹ Nga ọ vaduru Bẹtifagi nū Bẹtani nū Rugwu Olivu o zizne ele sno apna a lawuru, kanū be,

³⁰ “Anū zne nū mgbu matị ke zị nū ruwhnu anū, kpa anū naabna, anū jōowhnu otu nnwọ ịyinya be kpoḡwu pị, ke ọ zá nye daziri n'olu a, anū tōma a, toya hna.

³¹ Ọ buru nū badnū ọbula sịkwa anū, ‘Kini mernu anū nọtoma a,’ anū kanū a, ‘Ọ zị Nyenwe aị mkpa.’”

³² Ele o dusiri zne whnū lele kpa Jizōsi kanū be.

³³ Kpa be nọtoma nnwọ ịyinya wam, ele nwe a sịkwa be, “Kini mernu anū nọtoma nnwọ ịyinya wam?”

³⁴ Be sarū be, “Ọ zị Nyenwe aị mkpa.”

³⁵ Be tōyanu a Jizōsi, wụkwasi iwo be n'olu a, dazita Jizōsi n'olu a.

³⁶ Kpa Jizōsi neezne, ele badnū naagbasa iwo be n'apna.

³⁷ Nga ọ vaduru hne apna larū Rugwu Olivu, igbudu badnū ele sno apna a bete nọonwudna, nọtunu Chiokike mmamma n'okne nkọli kwnornu agịda ẹrnu ndu-ẹhni be whnurnu.

³⁸ Be naakaa,

“Chiokike ọzi eze
ke naava nū rẹwhna Nyenwe aị,
Udno n'oligwe,

ọznarni zinu Chiokike nū hne kakwo n'olu.”

³⁹ Agwna ele Farisi ele sno igbudu badnū wam kanū Jizōsi, “Nye-zni-nhne, bigbọ ele sno apna i ma be kpusni ọnu.”

⁴⁰ Jizōsi sarū be, “Me kanū anū, ọ buru nū ele ka kpusni ọnu be, akaworugwu ele ka jeesi lulo.”

*Jizōsi kwnanu**Jeruselem ẹkwna*

⁴¹ Jizōsi vadu Jeruselem ndundu, whnū a, kwnanu a ẹkwna.

⁴² Ọ kaa, “Ọ buru nū i mahiaru ọbochi tna nhne jeegweyanū anū udno, kọvu anya anū kpuru isni.

⁴³ Ọbochi wawa nga ele irno anū jaadazigidne anū, gbagidne anū n'apna ọbula.

⁴⁴ Be jōozopia anū nū rumu takiri anū, be joolulu ẹli ka nū ele wu nū rime a, be jéesigbasi otu akaworugwu n'olu ibne a hna, kwnornu nū anū máa ige Chiokike varū ọ znọhia anū.”

*Nhne Jizōsi mernu**n'Oro Nsọ Chiokike**(Mat 21:12-17; Mak 11:15-19; Jōn 2:13-22)*

⁴⁵ Jizōsi bnazne Ọro Nsọ Chiokike, chihala ele neere ahia pị.

⁴⁶ Ọ kanū be, “Be gbarū a n'okwukwo nsọ, kaa,
'Oro m jọbu ọro okpukpe,'
kọvu anū mernu a ọ buru ọbna ele buznu.”

⁴⁷ Jizōsi zị neezni nhne kpakara ọbochi n'Ọro Nsọ Chiokike. Ele risi arịohna nū ele zni iwu ele Ju nū ele okno badnū Izireli needne kpa be joogbu a.

⁴⁸ Kọvu be máa nhne be jeeme, kwnornu nū kpakara ele berere zị kọriri noobno nsni nū nhne o nookwu.

20

*Rikne Jizōsi**(Mat 21:23-27; Mak 11:27-33)*

¹ O dū otu ọbuchi n̄ga Jizōsi zi n'Ọro Nsọ Chiokike neezni izi ọma, ele risi ariọhna nū ele zni iwu ele Ju, be nū ele okno badnū Izireli varū.

² Be kanū a, “Kanū aị rẹwhna rikne i ji neeme kpakara nhne ka. Nyele nyernu i rikne ka?”

³ Jizōsi sarū be, “M jaasikwa anū otu ajiji masi, anū kanū m,

⁴ ọwu mini Jōni, o hiri n'oligwe mọbu n'aka badnū va?”

⁵ Be kwu a n'esilawuru be, kaa, “Ọ buri nū a kaa, ‘O hiri n'oligwe,’ ọ jaasikwa aị, ‘Kini mernu anū kwéle a?’ ”

⁶ “Kọvu a kaa nū o hi n'aka badnū, kpakara ele badnū ka jọtugbu aị akaworugwu, kwnornu nū be kweru nū Jōni bụ nye ọwhnurninya.”

⁷ Be sarū a, “A máa hne o hi va.”

⁸ Jizōsi kanū be, “M jáaka masiṅu anū rẹwhna rikne me ji neeme kpakara nhne ka.”

*Elulu ele ẹrnu ẹkwu vaịni**(Mat 21:33-46; Mak 12:1-12)*

⁹ Jizōsi tñunu ele badnū elulu ka, “Otu nyerukna kparū vaịni, gweru ẹkwu wam yisi n'aka ele jeelekọta a, whọga gbu ọkwnu.”

¹⁰ N̄ga ige ọ ghọ mkpuru duru, o zizne otu nye izi o znekwnusi ele ẹrnu ẹkwu wam ma be nyee a agwna mkpuru vaịni. Kọvu ele ẹrnu ẹkwu wam pñia a nhne, zila a n'aka etekne.

¹¹ O zizne kwno nye izi berere, ele ẹrnu ẹkwu wam li a nhne, kpasị a iwhnerne, zila a n'aka etekne.

¹² O zizne kwno nye izi ke ẹto, be mekasi a nhne, tuwhu a n'ederezi.

¹³ “Ige wam nye nwe ẹkwu vaịni wam karū, ‘Ndaa nhne me jeeme? M jeezizne nnwọ m me whnurnu n'anya, eleghi anya be jọoso a anya.’

¹⁴ “Kọvu n̄ga ele ẹrnu ẹkwu wam whnurnu a, be kanū ẹhni be, ‘Ka bụ nye jeeri mkpe nye nwe ẹkwu ka, anū va ma a gbu a, a jeekeri mkpe a.’

¹⁵ Be tuwhu a n'aznū ẹkwu wam gbu a.

“Kini bụ nhne nye nwe ẹkwu wam jeeme ele ojo wam?”

¹⁶ Ọ jaava gbumekwo ele ẹrnu ẹkwu ojo wam, gweru ẹkwu wam nyewhete n'aka ele berere.”

N̄ga ele badnū wam nurnu ọka ka, be kaa, “Chiokike kwé.”

¹⁷ Jizōsi le be anya, sika be, “Kini bụ risi nhne be gbarū n'ọkwukwo nsọ? ‘Akaworugwu ke ele noowu ọro juru

kijam gholam risi nsukala ọro.’

¹⁸ Nye ọbula ke jaadnakwasị akaworugwu ka, jaagbawa ibekala ibekala, kọvu nye ọbula ke akaworugwu ka jaadnakwasị, o jeejweri a lele retnu.”

¹⁹ Ele zni iwu ele Ju nū ele risi ariọhna pio kpa be jọonwugwu Jizōsi ngangam, kwnornu nū be magwū nū ọ tñunnu be elulu ka. Kọvu be ọọtu ogwnu ele badnū.

*Otu ntu-eli**(Mat 22:15-22; Mak 12:3-17)*

²⁰ Be zizne ele naadna ndidna ele mernu lele nū be bụ ele ezi ọka. Be noopio kpa be jeeji nwugwu Jizōsi hite n'ikwu-ọnu a ma be gweru a nyewhete n'aka nye ọchichi.

²¹ Be sika Jizōsi, “Nye-zni-nhne, a magwū nū i kwu ezi ọka neezni nhne kwesiri, i zá neele badnū anya nū ruwhnu, kọvu i neezni apna Chiokike n'ezi ọka.

22 O bụru ọma a tū ntū nyee Siza sọbu o bụo ọma?"

23 Jizọsi whnuru aghigho ke mkpọma be, o kanu be,

24 "Anu gesi m otu mkpuru iwai. Nyele nwe ruwhnu ka nu nhne be gbakwasiri n'olu a?"

25 Be saru a, "Siza nwe."

Jizọsi kanu be, "Anu nyee Siza nhne ke Siza, nyee masi Chiokike nhne ke Chiokike."

26 Be nwée nhne be jeeji nwugwu a hite n'ikwu-onu o kwuru nu ruwhnu ohna. Osisa o saru be jiri be anya, be daziri bii.

Ajji gbasiri olizo n'enwu

(Mat 22:23-33; Mak 12:18-27)

27 Agwna ele Sadusi, ka bu ele karu nu olizo n'enwu zila, vakwnusiri Jizosi, sikwa a ajji,

28 "Nye-zni-nhne, Mozizi gbaru n'okwukwo iwu nyee ai, 'O buru nu nyerukna nwurnu sigbasi nnwerne a, hne be nwée rumu, nwene a rukna jooluru nnwerne nwene a wam mụhianu nwene a rukna rumu.'

29 Rumu nne esau nu ai zi, ke mbom luru nnwerne, nwuma hne o nwée nnwo.

30 Nye ke ebo luru a,

31 nye ke eto lu a, otu aka wam kpa rumu nne esau wam luru nwerinya wam, kpakara be nwée nnwo, be nwukwo.

32 N'ipne-aznu nwerinya wam nwu masi.

33 Kitna, n'obochi olizo n'enwu, nwerinya wam jobu nnwerne nyele n'esilawuru be, kwnornu nu be esau luru a?"

34 Jizosi saru be, "Ele badnu k'owa ka nolu nnwerne, neekesi nzi.

35 Kovu ele kwesiri o kehia igwe n'olizo n'enwu ma be zi budnu n'ige ke jaava, be lu nnwerne, be gbọ nzi.

36 Be jonuwu enwu berere, kwnornu nu be nu lele ele enine izi. Be bu rumu Chiokike kwnornu nu be hiri n'enwu lizo.

37 Kovu Mozizi neegesi nu ele nwurnu onwu jeehi n'enwu lizo, hite nu nhne o gbaru n'okwukwo gbasiri isisi mati wam neerne bekwu. O sukwuru Nyenwe ai 'Chiokike ke Ebereham, Chiokike ke Aziki, nu Chiokike ke Jekpu.'

38 Chiokike bu Chiokike ke ele zi bu budnu, o buo ke ele nwurnu onwu, kpakara ele badnu zi budnu n'anya Chiokike."

39 Agwna ele zni iwu ele Ju karu, "Nye-zni-nhne, i sakwaru nkaru."

40 O zima nye nwernu rikne sikwa a ajji berere.

Karaisi bu nnwo nyele?

(Mat 22:41-46; Mak 12:35-37)

41 Jizosi kanu be, "Ndaa kpa be naakaa nu Karaisi bu Nnwọ Devidi?"

42 Kwnornu nu Devidi n'iwhuru a kwuru n'okwukwo Eri Oma,

'Nyenwe ai kannu Nyenwe m,

Daziri eli n'akarikwnunga m

43 tem du nga me jaabita ele irno i

lele nhne i jootukwasi ochi i lawuru.'

44 Devidi sukwuru a 'Nyenwe m,' ndaa kpa o jeeji buru kwno nnwo a?"

Anu zeru ele zni iwu

ele Ju

(Mat 23:1-36; Mak 12:38-40; Luk 11:37-54)

45 Kpa kpakara ele badnu wam zi noobno nsni, Jizosi kanu ele sno apna a,

⁴⁶ “Anụ neeze ele zni iwu ele Ju. Ọ naamasị be o wo awura ogologo naagaghari, ọ naamasị be ele badnụ neebekwu be ikwu n’ahia, be n’ohoru risi ngadna n’oro ọgbako ele Ju, ma ngadna kakwo mma n’ogbako iriri anụ.

⁴⁷ Be bu ele neeridna oro ele rinya nzi be nwurnu, neekpe ogologo okpukpe ma ele badnụ whnurnu be. Be jaata awhnwuhu ke kakwo.”

21

Nkesi nwerinya

nzi a nwurnu

(Mak 12:41-44)

¹ Jizosi leru anya whnụ ele eze n’otusi nhne nkesi be nụ hne be n’otusi iwai n’oro Nso Chiokike.

² Ọ whnụ otu w’omboni nzi a nwurnu hne o n’otusi mkpuru iwai matị lawuru.

³ Jizosi kaa, “Me kanu anụ ezi ọka, nwerinya ka bu w’omboni nzi a nwurnu t’usiri karukwo kpakara ele n’otusi iwai.

⁴ Kpakara ele badnụ ka masiri aka n’agida ekwuu be nwernu gweboru t’usi, k’ovu nwerinya mboni ka t’ukparu kpakara nhne o nwernu.”

Be joolulu Oro Nso

Chiokike

(Mat 24:1,2; Mak 13:1-2)

⁵ Agwna ele sno apna a nookwu, naajakiri Oro Nso Chiokike nụ akaworugwu be jiri a wu mma, ya nụ nkesi be jiri cho Oro Nso Chiokike mma. K’ovu Jizosi kaa,

⁶ “Kpakara nhne anụ n’owhnu, ige vawa nga otu akaworugwu jóogwuzo n’olu ibne a, be jaakwnadna kpakara be n’eli.”

Mmekp’ehni nụ

Okpakna ehni

(Mat 24:3-14; Mak 13:3-13)

⁷ Be s’ikwa a, “Nye-zni-nhne, ndaa nga nhne ka j’obu? K’ini j’obu nhne jeegesi nga nhne ka jeeme?”

⁸ Jizosi saru be, “Any a du anụ eli, anụ kwé be duhie anụ. Agida ele badnụ jaava nụ r’whna m, naakaa, ‘Ọ bu mawa, ige val’em,’ k’ovu anụ snó be.

⁹ Nga anụ j’onu ot’nutnu ogwnu nụ omegidne, ogwnu t’uko anụ. Kpakara nhne ka jeebe osno mee, k’ovu okwukwo nhne y’oduge.”

¹⁰ Ọ kanu be, “Mba jeeliz’o megidne mba, eli-eze jeeliz’o megidne eli-eze.”

¹¹ Okne eli otne enye jaazi nụ hne zi ichne ichne, okwnunyo nụ nr’ria ojo jaazi nụ hne zi ichne ichne. Nhne zi ogwnu nụ okne nhne elekema jeehi n’oligwe va.

¹² “K’ovu su kpakara nhne ka mee, be j’onwugwu anụ, kpakna anụ ehni, gweru anụ nyee n’aka ele ikpe be kpe anụ ikpe n’oro ọgbako ele Ju, be yisi anụ n’oro ikelu. Anụ joogwuzo nụ ruwhnu ele eze nụ ele ọchichi kwnornu nụ r’whna m.

¹³ Ka j’obu oghere anụ jeeji gba akebe izi oma.

¹⁴ K’ovu anụ béru osno rigbu ehni anụ kpa anụ jeeji goru onu anụ.

¹⁵ Kwnornu nụ m jeeyisi ọka nụ ak’oniche ke ele irno anụ j’eenwe rikne gwuzogidne m’obu megbu anụ.

¹⁶ Ele m’urnu anụ jeegweru anụ nyewhete, r’umu nne anụ nụ r’umu nwene nụ ele enyi, be joogbu agwna anụ.

¹⁷ Kpakara ele badnụ joosno anụ irno kwnornu nụ me.

¹⁸ K’ovu otu rukeri-ize ke risi anụ jaadna n’eli m’obu whu etekne.

19 Anụ gwuzosi rikne ma anụ zñohia bụdnu anụ.

Be joolulu Jeruselem

(Mat 24:15-21; Mak 13:14-19)

20 “Nga anụ jōowhnu ele ogwnu ele irno gbarụ Jeruselem ngaramanga, anụ mahia n’olulu a zị ndundu.

21 Ige wam ele zị nụ Judiya gbazne n’olu rugwu, ele zị n’eli-ohna whoga, ele zị n’ekwu be lánna nụ rime eli-ohna.

22 Kwnornu nụ ka bụ ige ọ ta awnhūwhnu ma kpakara nhne be gbarụ n’okwukwo nsọ mezu.

23 Awnhūwhnu jaazinu ele rinya zị rime nụ ele neechi nnwọ rēma n’ige wam. Okne awnhūwhnu jaadnakwasị eli ka, Chiokike jōonwudna ovu owe ẹhni a megidne ele badnụ ka.

24 Be jeegweru ama-ogwnu gbu agwna badnụ, be jōodoru ele berere lele ele ikelu zne kpakara mba. Ele bụo ele Ju jōozodna Jeruselem tem ige be zu.

Nnwọ ke Badnụ wawa

(Mat 24:29-31; Mak 13:24-27)

25 “Nhne elekema jaazị n’ẹhnam nụ ẹnwa nụ mbọ. N’owa mkpoma ọla mini jaazị n’esilawuru kpakara mba, be jōotu ogwnu abaka-mini nụ ruwhere osimini.

26 Ele badnụ jōotubo kwnornu ogwnu nụ nhne be nōowhnu jeeme n’owa, kwnornu nụ kpakara iknerna ke oligwe jooohnio ohnio.

27 Ige wam be jōowhnu Nnwọ ke Badnụ hne ọ naava n’erumeru k’oligwe, n’iknerna nụ okne igwugwu.

28 Nga kpakara nhne ka beteru neeme, anụ lizọ, gwelizọ risi anụ olu kwnornu nụ ige ọznohia anụ zị ndundu.”

Muhia nhne hite n’isisi

be kwu figi

(Mat 24:32-35; Mak 13:28-31)

29 Jizọsi tñunu be elulu ka, “Anụ le isisi figi nụ kpakara isisi berere.

30 Nga anụ nōowhnu nụ be nooruhia okwukwo bụdnu, anụ mahia nụ nduru-mini zị ndundu.

31 Kpam masị, nga anụ jōowhnu kpakara nhne ka neeme, anụ mahia nụ eli-eze Chiokike zị ndundu.

32 “Me kanụ anụ ezi oka, ebiri ka jéewhe sụ kpakara nhne ka mee.

33 Oligwe nụ ọwa jaagawhe, kọvu ikwu-ọnu m jáagawhe rịa rịa.

Ọdo aka nụ nsni

34 “Any a dū anụ eli, anụ kwé okne nhne oriri nụ nhne ọnwunwo nụ ọriri ke bụdnu ka, jihia mkpoma anụ, ke jeeme ọbochi wam vakwnusi anụ nū nga anụ tūge anya a.

35 Kwnornu nụ ọ jaavakwnusi kpakara ele zị n’owa lele mbita be sninnu anghia.

36 Anụ neese nse ige ọbula, anụ kpe okpukpe ma anụ nwe rikne gbanahoru kpakara nhne ka jeeme, nū o gwuzo nū ruwhnu Nnwọ ke Badnụ.”

37 Jizọsi zị neezni nhne kpakara ọbochi n’Oro Nsọ Chiokike, n’ige ogbed-nachi ọ whoga zne Rugwu Olivu zukwaru inwe nū ọ dnanị tem chi bọ.

38 Kpakara ele badnụ neezne Ọro Nsọ Chiokike n’onu ọsisi ma be nurnu nhne o neezni.

22

*Be gbarụ iznuznu**o gbu Jizōsi**(Mat 26:1-5; Mak 14:1,2; Jōn 11:45-53)*¹ Ige Iriri Brēdi Whúge Qwhu ke be kwu Qgawhe zị ndundu.² Ele risi arịohna nū ele zni iwu ele Ju noopio oghere be jeeji gbu Jizōsi, kpa be n'ọtu ogwnu ele badnụ.*Judasị kweruru**o re Jizōsi**(Mat 26:14-16; Mak 14:10,11)*³ Ekwensu bna nū rime Judasị nye be kwu Isikarịoti, nye bụ otu nū rime ele sno apna a nri nū ẹbo wam.⁴ Judasị znekwnusi ele risi arịohna nū ele risi ele neese Qro Nsọ Chiokike, gba iznuznu kpa o jeenye be Jizōsi.⁵ Ovu sọru be n'ọnu, be kwe o nyee a iwai.⁶ Judasị kweru, o noopio kpa o jeenwe oghere o gweru Jizōsi nyee be nga ele badnụ máa.*Be jikneru o ri**Iriri Qgawhe**(Mat 26:17-25; Mak 14:12-21; Jōn 13:21-30)*⁷ O dụ n'ọbochi ke Iriri Brēdi Whúge Qwhu, nga be naakwa arịohna atnụrnu Qgawhe.⁸ Jizōsi zizne Pita nū Jōni, “Anụ zne bịkwatanu aị Iriri Qgawhe.”⁹ Be sịkwa a, “Ndaa hne i pioru a bịkwata a?”¹⁰ Jizōsi kanụ be, “Kpa anụ naabna n'ẹli ka, anụ jọowhnu otu nwerukna wugwu idudu mini, anụ snornu a bna n'oro ke o jaabna.¹¹ Anụ kanụ nyenwe ọro wam, ‘Nye-zni-nhne kaa a sịkwa i, Ndaa ọro ele izne hne me nū ele sno apna m jeeri Iriri Qgawhe?’¹² O jeegesi anụ otu ọnu-oro zị rude n'oro olu, be mekwataru, anụ mekwata kpakara nhne.”¹³ Be zne whnụ kpakara nhne lele kpa Jizōsi kannụ be. Be mekwata Iriri Qgawhe.*Wiri Anyasnu Nyenwe aị**(Mat 26:26-30; Mak 14:22-26; 1 Kọr 11:23-25)*¹⁴ Nga ige duru, Jizōsi nū ele izi a daziri neeri wiri.¹⁵ O kanụ be, “N'ezị o gwnụsiri m rikne me nū anụ rikọ Iriri Qgawhe ka sị me ta awhnụwhnu.¹⁶ Kwnornu me kanụ anụ, m jéeri kwno a berere tem o mezu n'ige ẹli-eze Chiokike.”¹⁷ Jizōsi gweru okiko, tūnu Chiokike mmamma, kaa, “Anụ gweru ka, keme n'esislawuru anụ.¹⁸ Kwnornu me kanụ anụ, m jónwoma manya hi n'isisi vaịni whụya rịa rịa tem ẹli-eze Chiokike va.”¹⁹ O gweru brēdi, tūnu Chiokike mmamma, nyawama a, nyee be, kaa, “Ka bụ anọ-ẹhni m me nyernu kwnornu anụ, anụ neeme ka neechenwanya m.”²⁰ Kpam masị, nga wiri anyasnu wheru, o gweru okiko, kaa, “Okiko ka bụ ogba-njọ-ẹhni ikne ke ọvnarna m, ke me wusiri kwnornu anụ.²¹ Kọvu anụ le, nye neere m nū me dazigwu n'ikpechi neeri wiri.²² Nnwọ ke Badnụ jaala lele kpa Chiokike kpebiri a, kọvu awhnụwhnu jaazinu nyerukna wam be jeehi n'aka a re Nnwọ ke Badnụ.”

23 Be n̄esikwarita ẹhni be nye jeeme nhne ka.

Nye kakwo ibne a

24 Ele sno apna a bete n̄odogbuta nye kakwo n'esilawuru be.

25 Jiz̄osi kanu be, "Ele eze ele buo ele ju n̄echi ele ke be n'aka rikne, ele nwernu rikne hne be zi kaa nu be bu enyi ele badnu.

26 K̄ovu o kw̄esile o zi kpa n'esilawuru anu. Nye kakwo ibne a n'esilawuru anu j̄onu lele watakiri, nye noodu anu lele nye izi.

27 Kwnornu nyele kakwo, nye neeri wiri n'ikpechi sobu nye neezne izi? O bu nye dazi ẹli neeri wiri. K̄ovu m zi m n'esilawuru anu lele nye izi.

28 "Anu dazigidnenu m n'ornurna m.

29 M jeenye anu rikne o chi ẹli-eze lele kpa Nda m nyernu m,

30 ma anu snornu m ri wiri, nwo masi nu ẹli-eze m, daziri nu ngadna eze neekpe ẹbnurnu nri nu ẹbo ke Izireli ikpe.

Jiz̄osi karu nu Pita

j̄ogonahoru a

(Mat 26:31-35; Mak 14:27-31; Jon 13:36-38)

31 "Saīmoni, Saīmoni, le, Ekwensu r̄ioru o yo i lele kpa be yo ikpa.

32 K̄ovu m kpennu m ji okpukpe, Saīmoni, ma okwnata mkpoma i ziri kwem. Nga i tuhnasarnu, kwnagidne r̄umu nda i."

33 K̄ovu Pita saru, "Nyenwe ai, m jiknenu m o sno i zne ikelu m̄obu nwuma."

34 Jiz̄osi saru a, "Pita, me kanu i, su okne ōchichi kwna ẹkwna tna, i j̄ogonahoru m mgba ẹto."

Rekpa mati, rekpa nu

ama-ogwnu

35 Jiz̄osi sikwa be, "Nga me zihalaru anu, anu jile rekpa iwai, m̄obu rekpa, m̄obu okoro-ochi, o nwernu nhne koru anu?"

Be saru a, "O za nhne koru ai."

36 O kanu be, "K̄ovu kitna, nye nwernu rekpa iwai gweru a, nye nwernu rekpa berere, gweru a, o buru nu i nw̄ee ama-ogwnu, re iwo olu i, zuru otu.

37 Kwnornu nu be gbaru a n'okwukwo ns̄o, 'Be gwnukotarua ya nu ele mmehie,' be jeemezu nhne ka. Owe! Nhne be gbaru gbasiri m jeemezu."

38 Ele sno apna a kaa, "Nyenwe ai, le ama-ogwnu lawuru."

Jiz̄osi kanu be, "O joozu."

Jiz̄osi kperu okpukpe

nu Rugwu Olivu

(Mat 26:36-46; Mak 14:32-42)

39 Jiz̄osi whoga zne nu Rugwu Olivu lele kpa o mesi, ele sno apna a snornu a.

40 Nga o vaduru pji, o kanu be, "Anu kpe okpukpe o zi anu dnabna nu rime ornurna."

41 O whoga zne nu ruwhnu mati, gbu mpnerne ochi n'eli kpe okpukpe, kaa,

42 "Nda m, o buru nu o masiri i, gwemenu m okiko awhn̄uwhnu ka, k̄ovu o buo nhne me pioru, k̄ovu nhne i pioru."

43 Enine izi hi n'oligwe varu gba inwe.

44 Hite n'igbugbu, o kpe okpukpe k'ezi, ruhara baru a nu lele okne okpurukpu ōvnarna naadnasa n'eli.

45 Nga o kpe kworu okpukpe, o lahnakwnusi ele sno apna a, whnu nu be neezni anyarna hite nu nhne igbugbu nu rikne gwuru be.

⁴⁶ O sịkwa be, “Kini mernu anụ neezni anyarna? Anụ lizọ kpe okpukpe ọ zị anụ dnabna nụ rime ọrnurna.”

Be nwudneru Jizọsi

(Mat 26:47-56; Mak 14:43-50; Jọn 18:3-11)

⁴⁷ Kpa Jizọsi kpu ọka n'ọnu, Judasi, otu nụ rime ele sno apna a nri nụ ẹbo wam, duru igbudu ele badnụ va, o znekwunusi Jizọsi, snutu ọ ọnu.

⁴⁸ Kọvu Jizọsi sịkwaru a. “Judasi, i ji osnutu ọnu neere Nnwọ ke Badnụ?”

⁴⁹ Nga ele sno Jizọsi whnurnu nhne neeme, be kaa, “Nyenwe aị, a gweru ama-ogwnu aị lụ ogwnu sa?”

⁵⁰ Otu nyenum n'esilawuru be, ji ama-ogwnu gbu, bihala nnwọ izi nye risi ariohna nsnị akarikwnunga a.

⁵¹ Kọvu Jizọsi saru be, “Ozulem!” Ọ kpatu nsnị nwerukna wam aka, gwọ a.

⁵² Jizọsi kanu ele risi ariohna nụ ele risi ele neese Ọro Nso Chiokike nụ ele okno badnụ, ele varu ọ nwu gwu a, “Anụ ji ama-ogwnu nụ okpiri va lele nụ m bu m nye neemegidne iwu ẹli.

⁵³ Me nụ anụ zị kpakara ọbochi n'Ọro Nso Chiokike, anụ nwée rikne nwu gwu m. Kọvu ka ige ke anụ, ige rikne ọchichiri nẹchi.”

Pita gonahuru Jizọsi

(Mat 26:57,58,69-75; Mak 14:53,54,66-72; Jọn 18:12-18,25-27)

⁵⁴ Kpa be nwu gwu Jizọsi, be duru Jizọsi zne n'oro nye risi ariohna, Pita snornu nụ be nụ hne zị ikere.

⁵⁵ Nga be kpawhusiri ẹkwnu n'esilawuru ederezi, Pita snornu be daziri ẹli nụ ngeri ẹkwnu.

⁵⁶ Otu nnwọ oknornokno ele neezne izi whnurnu Pita hne ọ zị nụ ngeri ẹkwnu. O legidne a anya, kaa, “Nwerukna ka nụ Jizọsi sno.”

⁵⁷ Pita go, kaa, “Nwerinya, m máam nye ọ bu.”

⁵⁸ Ige matị wheme, otu nwerukna whnurnu a, kaa, “I bu otu nụ rime be.”

Pita saru a, “Nwerukna, m búla m.”

⁵⁹ Nga otu awa whemernu, nye berere kwusi a rikne kaa, “N'ezi ọka, nwerukna ka nụ ya sno, kwnornu nụ ọ bu nye Galili.”

⁶⁰ Pita saru, “Nwerukna, m máam nhne i nookwu.” Kpa ọ kpu ọka n'ọnu, okne ọchichi kwnarnu ẹkwna.

⁶¹ Nyenwe aị tughnasna legidne Pita anya. Pita chenwanya ikwu-ọnu Nyenwe aị kwunnu a, “Sụ okne ọchichi kwana ẹkwna tna, i jọgonahuru m mgba ẹto.”

⁶² Pita whọga ederezi kwana ẹkwna mkpuru ovu k'agida.

Jizọsi zị nụ ruwhnu

ele eze-ikpe

(Mat 26:67,68; Mak 14:65)

⁶³ Ele neese nse bete naapni Jizọsi nhne nọomu a rumu.

⁶⁴ Be gweru ikpe knesi a anya, kaa, “Whnunu aị ọwhnurninya, nyele gbọru i aka?”

⁶⁵ Be kwu nhne berere zị ichne ichne, kpasị a iwghnerne.

Jizọsi gwuzo nụ

ruwhnu ele eze-ikpe

(Mat 26:59-66; Mak 14:55-64; Jọn 18:19-24)

⁶⁶ Nga chi bọru, ele okno badnụ ele ju, nụ ele risi ariohna nụ ele zni iwu ele ju, gbakọru n'otu, be kwuyanụ be Jizọsi n'ikpe be.

⁶⁷ Be kaa, “Ọ bụru nụ i bu Karaịsi, kanu aị.”

Jizōsi saru be, “O buru nu me kanu anu, anu jeekweru m.

⁶⁸ O buru me sikwa anu ajiji, anu jaasa.

⁶⁹ Kovu hite nu kitna zne nu ruwhnu, Nnwọ ke Badnu jaadazi n'akarikwnunga ke Chiokike ke bu Dikne.”

⁷⁰ Be sikwa a, “O bu jwa bu Nnwọ Chiokike?”

O saru be, “Anu karu nu m bu m.”

⁷¹ Be kaa, “A piole akebne berere, a nurnu nhne hi n'onu a whuya.”

23

Jizōsi gwuzo nu

ruwhnu Paileti

(*Mat 27:1-2,11-14; Mak 15:1-5; Jon 18:28-38*)

¹ Ele iznuznu ikpe ele Ju lizo duru Jizōsi zne nu ruwhnu Paileti,

² be bete noobno a nhne, be kaa, “A whnuru nwerukna ka hne o nooduwhu ele ke ai, o nookwu be tukwadia ntụ nye Siza, naakaa masi nu o bu Karaisi, eze ai.”

³ Paileti sikwa a, “I bu eze ele Ju?”

Jizōsi saru a, “Owe! Ji n'iwuru i karu kparam.”

⁴ Paileti kanu ele risi ariohna nu igbudu badnu wam, “O za nhne ojo me whnuru nu rime nwerukna ka.”

⁵ Kovu be kwusiri a rikne, “O neegweya onu gharu onu n'esilawuru ele Ju zi nu Judiya hite nu nhne o neezni. O panizoru a nu Galili tem o vadu hna.”

Jizōsi gwuzo nu

ruwhnu Erodu

⁶ Nga Paileti nurnu a, o sikwa be ma nwerukna ka o bu nye Galili.

⁷ Nga o mahiaru nu Jizōsi hi n'eli ke Erodu nechi, o ziznenu a Erodu nye zi nu Jeruselem n'ige wam.

⁸ Mkpoma sora Erodu n'onu k'agida nga o whnuru Jizōsi, kwnornu nu o noopio o whnu a agida ige wheru ewhe. Hite nu nhne o nurnu gbasiri a, o neele anya nu Jizōsi joornu ernu ndu-ehni nu ruwhnu a.

⁹ Kam kpararu, Erodu sikwa Jizōsi agida ajiji, kovu nu Jizōsi sala a oka obula.

¹⁰ Ele risi ariohna nu ele zni iwu ele Ju gwuzoru pi noobno Jizōsi agida nhne.

¹¹ Erodu nu ele ogwnu a mee Jizōsi nhne rumu, kpari a iwernerne. Be wosi a iwo marnu mma, zihnaznenu a Paileti.

¹² Paileti nu Erodu buru enyi hite n'obochi wam, kwnornu nu be bu ele irno nu mbom.

Be marnu Jizōsi

ikpe enwu

(*Mat 27:15-26; Mak 15:6-15; Jon 18:39--19:6*)

¹³ Paileti sukwukota ele risi ariohna nu ele nechi echi nu kpakara ele badnu,

¹⁴ o kanu be, “Anu kwuyannu m nwerukna ka nu o bu nye nooduhie ele badnu, m lebnana m anya nu kpakara nhne anu bnornu nwerukna ka nu ruwhnu anu, o za nhne me whnuru bu risi nhne anu noobno a.

¹⁵ Erodu masi whnuge nhne ojo obula nu rime a, kwnornu nu o zihnayarnu ai ya, o za nhne kwesiri enwu ke o mernu.

¹⁶ M jaapnia nhne, gharu a, o la.” [

¹⁷ N'ige Iriri Ogawhe obula, Paileti nesigbasinu be otu nye ikelu.]

¹⁸ Kpakara igbudu badnu gweru otu nkoli siwama, “Gbu nwerukna ka, sigbasinu ai Barabasi.”

19 (Be yisiri Barabasị n'oro ikelu kwnornu nụ o yiri aka n'ele megidnenu nye nēchi ẹchi, o gburu badnụ.)

20 Paịleti pioru ma ọ sigbasi Jizọsi, ọ riasno igbudu badnụ wam.

21 Kọvu be siwama kọriri, “Kpọgidne n'ogba, kpọgidne a n'ogba.”

22 Paịleti sịkwa be ke mgba ẹto, “Kini mernu? Kini bu nhne ojo ke o mernu? M whnuge m nhne ojo ke o mernu ke kwesiri ẹnwu. M jaapniya nhne, sigbasi a, ọ la.”

23 Kọvu be zị kọriri neesi lulo n'okne nkọli be kpọgidne a n'ogba, be nwehiaru nhne be neesi.

24 Paịleti marnu Jizọsi ikpe, o nyee be nhne be pioru.

25 Ọ sigbasinu be nye wam zị n'oro ikelu nye megidnenu ele nēchi ẹchi, gbu masị badnụ, nye be rioru a. O gweru Jizọsi nyewhete be.

Be kpọgidnenu Jizọsi

n'ogba

(Mat 27:32-44; Mak 15:21-32; Jọn 19:17-27)

26 Be duru Jizọsi zne, n'apna be sigidne Saịmoni nye Sirini, nye hi n'aznu mba naabnanya, be vukwasị a ọgba, ma o vuru a snornu Jizọsi n'aznu.

27 Agida ele badnụ snornu a, ma ele rinya ele naakwnanu Jizọsi ẹkwana.

28 Jizọsi tũhnasarnu, kanu be, “Ele rinya Jerusalem, anu kwnanu m ẹkwana, kọvu anu kwanu ehni anu nu rumu anu ẹkwana.

29 Kwnornu nụ ige wawa nga be jaakaa, ‘Ele rinya nwée nnwọ bu ele ọwa ọma, nụ ele muge nnwọ nụ ele chíge rumu rẹma.’

30 Ige wam,

Ele badnụ jaakanu rugwu, ‘Dnagidne ai,
nụ rugwu matị ‘Kpusni ai.’

31 Ọ buru nụ ele badnụ mee kpa nga isisi zị budnu, ndaa kpa ọ jọonu nga ọ kporu bẹkwnu?”

32 Be kwuru ele ojo lawuru berere ma be gbu be nụ Jizọsi.

33 Nga be vaduru nū hne be kwu Okpokoro Risi, be kpogbu a, ya nū ele ojo wam, otu badnū n'akarikwnunga a, nye ke berere n'akarita a.

34 Jizọsi kaa, “Nda m, gbarunu be kwnornu nū be máa nhne be neeme.”

Be keru iwo a n'esilawuru be, nga be vukworu ogbanuchi.

35 Ele badnū gwuzoru neelekiri, ele risi ele Ju nọomu a rumu. Be kaa, “Ọ znohiaru ele berere, ọ znohia ehni a, ọ buru nū ọ bu Karaịsi wam, nye Chiokike hohiaru.”

36 Ele ogwnu nọomu a rumu. Be nyee a manya gbaru ọka,

37 be kaa, “Ọ buru nū i bu eze ele Ju, znohia ehni i.”

38 Be gbaru nhne gbasiri a n'olu ogba a, “Ka bu Eze ele Ju.”

39 Otu nyenum nū rime ele be kpogidnenu ya nū be, nọogo a nugo, “Kwa i bu Karaịsi, znohia ehni i, znohia masi ai.”

40 Nye ke berere bigbo a, kaa, “I tu ogwnu Chiokike, i zị n'otu ikpe wam.

41 A naata awhnwuhnu kwesiri ai, kwnornu nū a nanahia ogwo ẹnu ai. Kọvu nwerukna ka méne nhne ojo ọbula.”

42 Ọ kanu Jizọsi, “Jizọsi, chenwanya m nga i jaava chi lele eze.”

43 Jizọsi saru a, “Me kanu i ezi ọka, me nū ji jaazi tna nū Paradasị.”

Enwu Jizọsi

(Mat 27:45-56; Mak 15:33-41; Jọn 19:28-30)

44 Hite n'esilawuru iwhehnie,* ọchichiri gbasnirni kpakara ẹli wam du

* 23:44 n'esilawuru iwhehnie: ọkwukwo ke mbom kwuru ige awa isunu

n'otnu-ige ke eto,†

⁴⁵ kwnornu nū ehnām gbarū ọchichiri. Ikpe ke bnosnirni hne zị nsọ n'Ọro Nsọ Chiokike gbawarū nā lawūru.

⁴⁶ Jizọsi gweru okne nkọli siwama lūlo, “Nda m, m neeyisi enine m n'aka i.” Nā o kwuru ka, ọ kna inwe.

⁴⁷ Nā nye nēechi otu riwūhu ele ọgwū whnūrnū nhne mernu, ọ znarni Chiokike, kaa, “N'ezi, nwerukna ka bụ nye mee ọma.”

⁴⁸ Nā ele gwuzo neelekiri whnūrnū nhne mernu, be kwa aka nū mkpọma, whoga.

⁴⁹ Kọvu kpakara ele magwū Jizọsi nū ele rinya ele snornu a hite nū Galili gwuzo nū hne zị ikere, nọowhnu nhne neeme.

Be liri Jizọsi

(Mat 27:57-61; Mak 15:42-47; Jọn 19:38-42)

⁵⁰ Otu nwerukna rēwhna a bụ Josefu, nye bụ otu nū ele ikpe, nye be nọoso anya, nye ọma.

⁵¹ Ọ bụ nye ikpe, kọvu o snoge be kwekọrita nū nhne be kpebiri nū nhne be mernu, nye hi nū Arimatiya ke zị nū Judiya, nye neese nā ige ẹli-eze Chiokike jaava.

⁵² O zneknwusi Paileti, riọ a iznu Jizọsi.

⁵³ O vudna iznu Jizọsi n'olu ọgba, gweru ikpe marnū mma whū a, lite a nū rime ilili ke zị nū rime rugwu ke ọ zā nye be liru nū rime a nū mbom.

⁵⁴ Ọ bụ ọbochi ojiknernu, Ọbochi Ozukwa Inwe ele Ju gwnarnū matị ọ panizo.

⁵⁵ Ele rinya wam hi nū Galili va snornu Josefu whnū kpa ilili a nū, nū kpa ọ dnanyiataru a Jizọsi.

⁵⁶ Be lahna ọro, gwakọta mọno otute nwernu ẹknarna ọma be jeete iznu a.

Be zukwa inwe n'Ọbochi Ozukwa Inwe lele kpa nhne be nyernu n'iwu kwuru.

24

Jizọsi lizọru n'ẹnwu

(Mat 28:1-10; Mak 16:1-8; Jọn 20:1-10)

¹ N'ọnu ọsisi n'ọbochi mbom n'ikwezu, ele rinya wam gweru mọno otute wam be gwakọtaru ke nwernu ẹknarna ọma, zne ilili Jizọsi.

² Be whnūrnū nū be vumernu akaworugwu be jiri kpusni ọnu ilili wam.

³ Be bnazne nū rime ilili, be whnūge iznu Nyenwe aị Jizọsi.

⁴ Be gwuzoru naari nhne ka bụ, ngangam, ele rukna lawūru wogwu iwo abochna noogbu amuma gwuzoru nū ngeri be.

⁵ Ogwū tūru ele rinya wam, be dna kpu ruwhnu n'eli, kọvu ele rukna wam kanū be, “Kini kpararū anū noopio nye zị būdnu n'esilawūru ele nwūrnū ọnwu?”

⁶ Ọ zila hna, o hilem n'ẹnwu lizọ. Anū chenwanya nhne ọ kannū anū nā ọ zị nū Galili,

⁷ nū be jeegweru Nnwọ ke Badnū nyega ele mmehie, be kpogidne a n'ogba, n'ọbochi ke eto, o jeehi n'ẹnwu lizọ.”

⁸ Ele rinya wam chenwanya ikwu-ọnu a.

⁹ Be hi n'ilili wam lahna, kanū nri nū otu badnū ele sno apna a nū ele berere nhne be whnūrnū.

† 23:44 Ọtnu-ige ke eto: ọkwukwo ke mbom kwuru ige awa tolu

10 Ele rinya wam bụ Meri Magidalini, nụ Joana, nụ Meri nne Jemisi, be nụ ele rinya berere kanụ ele izi wam ọka ka.

11 Kọvu be kwége nhne ele rinya kwuru, be naari nụ ọ bụ ọka etekne.

12 Pita lizọ, gba ẹso zne n'ilili, o whudna, whnụ ikpe iznu, ọ zá nhne berere ọ whnuru. Ọ lahna ọro naari nhne mernu.

*N'apna zne Emaosi
(Mak 16:12,13)*

13 N'ọbochi wam, ele sno apna a lawuru neezne ẹli Emaosi, nhne nụ lele maili ẹsau.

14 Be nookwurita kpakara nhne mernu.

15 Kpa be neezne nookwu nhne ka, Jizosi n'iwhuru a kpayabeturu ndundu, snornu be neezne.

16 Be whnụ a, kọvu be máa nụ ọ bụ Jizosi.

17 Jizosi sịkwa be, "Kini bụ nhne anụ nọtourni kpa anụ neezne?"

Be gwuzoru bii, gbarụ ruwhnu.

18 Otu nụ rime be rewhna a bụ Kilopasi, sịkwa a, "Okwole jiwa bụ nye izne ke zị nụ Jeruselem nye máa nhne mernu ọbochi ele nụ ele ka wheru ewhe?"

19 Jizosi sịkwa a, "Kini bụ nhne kọ?"

Be kaa, "Nhne gbasiri Jizosi nye Nazareti, nwerukna ka bụ nye ọwhnurninya Chiokike, ọ bụ dikne n'ikwu-ọnu ma nụ ẹnu nụ ruwhnu Chiokike ma nụ ruwhnu ele badnu.

20 Ele risi ariohna nụ ele risi aị gweru a nyee ma be kpe ikpe ẹnu, be kpoigidne a n'ogba.

21 Kọvu a leru anya nụ ọ bụ nye jaagbahia Izireli. Ke kakwo, tna bụ ọbochi ẹto a kpa nhne ka mernu.

22 Agwna ele rinya aị nụ be zị kpasiri aị ogwnu tna. Be znernu n'ilili a n'ọnu Osi.

23 kọvu be whnúge iznu a. Be va kanụ aị nụ be whnuru ọwhnurninya ele enine izi, ke kanụ be nụ ọ zị budnu.

24 Agwna ele aị nụ be zị znernu ilili a, whnụ masi lele kpa ele rinya wam kwuru, kọvu be whnúge iznu a."

25 Jizosi kanụ be, "Anụ bụ ele iwhnirniwhno, anụ zila gnarnagnarna nụ okweru nhne kpakara ele ọwhnurninya kwuru.

26 Ọ zị mkpa nụ Karaisi jaata kpakara awhnūwhnu, bna n'igwugwu a."

27 Jizosi kowamanu be nhne be gbarụ n'okwukwo nsọ gbasiri ẹhni a, hite n'okwukwo Mozizi nụ ele ọwhnurninya.

28 Kpa be vaduru ẹli wam be neezne, Jizosi mee lele o neewhe ruwhnu,

29 be sigidne a, kaa, "Snornu aị daziri, ọbochi zneminem." O snornu be daziri.

30 O snornu be daziri ẹli n'ikpechi wiri, o gweru brẹdi, tų mmamma, nyawama a, bete neenye be.

31 Anya be kpume, be mahia a, kọvu o whume n'anya be.

32 Be kwukwarita n'ehni be, "Ọ nụ lele nụ bẹkwnu neerne nụ mkpoma aị nga o nookwunu aị ọka n'apna, nọkowanu aị ọkwukwo nsọ."

33 Be lizọ ngangam lahna Jeruselem. Be whnụ ele sno apna a nri nụ otu wam, hne be gbakogwu nụ otu nụ ele berere.

34 Be naakaa, "Ọ bụ n'ezị, Nyenwe aị hilem n'ẹnu lizọ, o mernu Saimoni whnụ a anya."

35 Badnu lawuru wam kowanu be nhne mernu n'apna, nụ kpa be jiri mahia Nyenwe aị nga ọ nyawaru brẹdi.

*Jizōsi mernu ele sno apna a**whnu a anya**(Mat 28:16-20; Mak 16:14-18; Jon 20:19-23; Ērnu 1:6-8)*

³⁶ Kpa be zì nookwu ọka ka, Jizōsi gwuzoru n'esilawuru be, kanu be, "Udno zinu anu."

³⁷ Ogwnu turu be k'agida, be che nu be whuru ru renwu.

³⁸ Jizōsi kanu be, "Kini mernu ogwnu ọtutu anu? Kini mernu anu neenwe mkpoma lawuru nu mkpoma anu?"

³⁹ Anu le aka m lawuru nu ọchi m lawuru. O bu mawa. Anu kpatu m aka whuru ru, renwu nwée an-ehni nu ọkpukpu, lele kpa anu whuru ru me nwernu."

⁴⁰ Nga o kwuru ka, o gesi be aka a lawuru nu ọchi a lawuru.

⁴¹ Be nwée rikne kweru kwnornu ovu ọso n'onu nu ọtun'anya, o sika be, "Anu nwernu wiri o riri hna?"

⁴² Be nyee a otu azu be siri esi,

⁴³ o gweru a ri nu ruwhnu be.

⁴⁴ O kanu be, "Ka bu nhne me kanu anu nga me nu anu zi. Kpakara nhne be gbaru n'okwukwo nsọ gbasiri m n'iwu Mozizi jeeme, ma ke ele ọwhurninya nu Eri Oma."

⁴⁵ O kpume echiche be ma be ghohia nhne be gbaru n'okwukwo nsọ.

⁴⁶ O kanu be, "Ka bu nhne be gbaru n'okwukwo nsọ, nu Karaisi jaatariri awnwhnu, nu o jeehi n'enu lizo n'obochi ke ẹto,

⁴⁷ nu be jeeji rewhna a kpọ okwo ọtuhnasna mkpoma nu rime kpakara mba, ma Chiokike gbaru mmehie be. Be jeehite nu rime Jeruselem panizo ọokpo okwo.

⁴⁸ Anu bu ele akebne kpakara nhne ka.

⁴⁹ M jeeziyanu anu nhne Nda m kweru nu mkwna, kovu anu daziri nu Jeruselem tem rikne ke hi n'oligwe dnakwasị anu."

*Jizōsi laru n'oligwe**(Mak 16:19,20; Ērnu 1:9-11)*

⁵⁰ Jizōsi duru be whoga zne n'eli Betani, o chilizo aka lawuru olu, gozi be.

⁵¹ Kpa o zi ọogozu be, be gwelizo a la n'oligwe.

⁵² Be kpou a risi eli, lahna Jeruselem, snarnima jihia mkpoma be.

⁵³ Be dazigidne n'Oro nsọ Chiokike ọtutumu Chiokike mmamma.

**Izi ọma lele kpa
Jōni
gbarụ a n'ọkwukwo
Nhne gbasiri ọkwukwo ka**

Izi ọma lele kpa Jōni gbarụ a n'ọkwukwo gwējāru Jizōsi iwhe lele Ikwu-Onu Chiokike, nye “ghọru badnụ, va wuru n'esilawuru aị” (1:14). Lele kpa ọkwukwo wam kwuru, be gbarụ izi ọma ka ma ele badnụ kweru nụ Jizōsi bụ Nye Oznohia wam, Nnwọ Chiokike, hite n'ọkwunata mkpọma nụ rẹwhna a, be nwehija bụdnu (20:31).

Jōni mernu a mahija nụ Jizōsi bụ Ikwu-Onu Chiokike. Eru ndu-ehni Jizōsi gesiri nụ ọ bụ Nye Oznohia wam Chiokike kweru mkwna. Ọkwukwo ka gesiri nụ agwna ele badnụ kweru nụ Jizōsi ghọ ele sno apna a, kọvu ele berere kwéle nụ a, be bụru ele neemegidne Jizōsi dū n'ẹnwu a.

Jōni kwusiri nhne gbasiri nkesi bụdnu kwó okwo rikne hite nụ Karaịsi, nookwu nụ Jizōsi bụ apna, ezi ọka nụ bụdnu. Nụ ọkwukwo Jōni, a whnurnu nụ nhne a nọowhnu anya kpakara ọbochi lele mini, brēdi, iwhe, nye znụ atnurnu nụ atnurnu a, isisi nụ mkpuru a, neegesi nhne ke Enine.

Nhne zi n'ọkwukwo ka

Ọpanizo (1:1-18)

Jōni Nye Wụ Mini nụ ele sno apna Jizōsi mbom (1:19-51)

Eru Jizōsi nụ ọhna (2:1--12:50)

Ọbochi ipne-aznụ nụ rime Jerusalem (13:1--19:42)

Olizọ n'ẹnwu nụ ọwhuya iwhe Nyenwe aị (20:1-31)

Ọ whųyaru iwhe nụ Galili (21:1-25)

Nye gbarụ ọkwukwo ka: Jōni

Risi nhne o kwno gba a: Ma ele badnụ kweru nụ Jizōsi bụ Karaịsi wam, ma hite n'ọkwunata mkpọma nụ rẹwhna a, be nwehija bụdnu.

Ikwu-ọnu ke ghọru badnụ

¹ Nụ mbom hne Ikwu-ọnu wam zi, Ikwu-ọnu wam nụ Chiokike zi nụ mbom, Ikwu-ọnu wam bụ Chiokike.

² Ya nụ Chiokike zi nụ mbom.

³ Be keru kpakara nhne hite n'aka a, ọ zá nhne ke be keru hne ọ zila.

⁴ Ikwu-ọnu wam bụ risi bụdnu, bụdnu wam bụ masị iwhe ke badnụ.

⁵ Iwhe wam nọomu nụ rime ọchichiri, ọchichiri nwée rikne nwegidne a.*

⁶ Chiokike ziyaru otu nyerukna rẹwhna a bụ Jōni.

⁷ Jōni varụ lele nye akebne ke iwhe wam, ma kpakara ele nurnu izi a kweru n'iwhe wam.

⁸ Jōni bụo iwhe wam, kọvu ọ bụ nye akebne iwhe wam.

⁹ Ka bụ iwhe wam n'ezi bụ ke varụ n'ọwa, ke neenye kpakara ele badnụ iwhe.

¹⁰ Ikwu-ọnu wam zi n'ọwa, ọ bụ n'ezi nụ Chiokike keru ọwa hite nụ rime a, kọvu ọwa maa nye ọ bụ.

¹¹ Ọ vakwnusiri ele ke a, kọvu ele ke a nábnyanya a.

¹² Kọvu kpakara ele nabnanyarnu a, kwerumakọ nụ rẹwhna a, o nyernu be rikne be bụru rumu Chiokike.

* 1:5 nwée rikne nwegidne a: mọbu nwée rikne ghohia a.

¹³ Be múge ele ka lele kpa be m̀urnu ele badnu. Be múge be hite n'echiche ke badnu, m̀obu hite nu nda k'owa, kovu Chiokike bu Nda be.

¹⁴ Ikwu-onu wam ghoru badnu, va wuru n'esilawuru ai. A whnurnu igwugwu a, bu igwugwu ke Nnwọ Nda a m̀urnu kpọi, oru nu ezi oka jihiaru nu rime a.

¹⁵ Joni gbaru akebe gbasiri a, siwama, kaa, "Ka bu nye me nookwu oka a nu o snogwu m n'aznu, kovu o kakwo m, kwnornu nu o zi su be m̀urnu m."

¹⁶ Hite n'oru a zi agida, a nwernu ngozi tukwasi nu ngozi.

¹⁷ Chiokike hiri n'aka Mozizi nyee iwu, Chiokike nyee masiri oru nu ezi oka hite n'aka Jizosi Karaisi.

¹⁸ O za nye whnuleru Chiokike anya. Nnwọ Nda a m̀urnu kpọi, nye bu Chiokike, nye zi n'akwankọ ke Nda a, mernu ele badnu mahia Nda a.

Joni karu nu o buo

Karaisi

(Mat 3:1-12; Mak 1:1-8; Luk 3:1-18)

¹⁹ Ka bu akebe Joni gbaru nga ele risi ele Ju zi nu Jeruselem ziznenu ele arjohna nu ele Livaị be sikwa a, "I bu nyele?"

²⁰ Joni saru be, o gola ego, kovu o kwusiri a rikne, kaa, "M bu la m Karaisi."

²¹ Be sikwa a, "I bu ko nyele? I bu Elaija sa?"

Joni kaa, "Oza."

Be sikwa a, "I bu Nye Owhnurninya wam?"†

O saru be, "Oza."

²² Be kaa, "Kanụ ai nye i bu, ma a mahia nhne a jaakanu ele dusiri ai. Kini bu nhne i kwuru gbasiri ehni i?"

²³ Joni saru be,

"M bu m akpiri nye nọkpo okwo n'eli-ikpa,

'Anụ mekwata apna Nyenwe ai ma o snirmi asni,'

lele kpa Azaya nye owhnurninya kwuru."

²⁴ Ele izi ele Farisi ziyaru,

²⁵ sikwaru Joni, "I buo Karaisi, m̀obu Elaija, m̀obu Nye Owhnurninya wam, kini mernu i nọowu ele badnu mini?"

²⁶ Joni saru be, "M ji m mini nọowu ele badnu mini, kovu otu nyenum gwuzo n'esilawuru anụ, nye anụ máa."

²⁷ O snogwu m n'aznu, kovu m kwésile m o toma eriri okoro-ochi a."

²⁸ Kpakara nhne ka mernu nu Bẹtani n'obosi ehnám ke aznu Osimini Jodani kijari, hne Joni nọowu ele badnu mini.

Jizosi, Nnwọ

Atnurnu Chiokike

²⁹ N'ekile a, Joni whnurnu Jizosi hne o naavakwnusi a, o kaa, "Anụ le, ka bu Nnwọ Atnurnu ke Chiokike, nye noovume mmehie k'owa."

³⁰ Ka bu nye wam me nookwu oka nga me karu, "Otu nyenum sno m n'aznu, kovu o kakwo m, kwnornu nu o zi su be m̀urnu m."

³¹ M máam nye o bu, kovu m nọowu ele badnu mini ma ele Izirẹli mahia nye o bu."

³² Ka bu akebe Joni gbaru, "M whnurnu m Enine Nso hi n'oligwe lele nduru dnakwasị a, daziri n'olu a."

³³ Kovu nu m máam nye o bu. Chiokike nye ziyaru m me wu ele badnu mini kannu m, 'I jowhnu Enine Nso hi n'oligwe dnakwasị otu badnu dazigidne nu ya, nye wam bu nye jeeji Enine Nso nọowu ele badnu mini.'

† **1:21** Nye Owhnurninya wam: Gwnu Ditaronomi 18:15; Eru Ele Izi 3:22

³⁴ Me nū iwħuru m whnũrnu a, gba akebne nū nye ka bũ Nnwọ Chiokike.”

Ele mbom sno

apna Jizōsi

³⁵ N'ekile a, Jōni nū ele sno apna a lawũru gwuzo.

³⁶ Nga ọ whnũrnu Jizōsi hne o neewhe, ọ kaa, “Anũ le Nnwọ Atnũrnu ke Chiokike.”

³⁷ Ele sno apna a lawũru wam nũrnu a, be snornu Jizōsi.

³⁸ Jizōsi tũhnasarnu whnũ nū be noosno a n'aznũ, ọ sũkwa be, “Kĩni bũ nhne anu noopio?”

Be kaa, “Rabaj” (ke bũ, Nye-zni-nhne), “Ndaa hne i wu?”

³⁹ Jizōsi sarũ be, “Anũ va whnũrnu.” Ọ bũ nhne nū lele ọtnu-ige ke ẹno n'iwħnehnie,[‡] be snornu a zne whnũrnu hne o wu, be nū a dazĩri kpakara ọbochi wam.

⁴⁰ Otu nū rime ele nũrnu nhne Jōni kwuru ke snornu Jizōsi bũ Anduru nwene rukna Saĩmoni Pita.

⁴¹ Ngangam, o piohĩaru nwene a rukna, Saĩmoni, ọ kanũ a, “A whnũna m Mezaya” (ke bũ Karaĩsi).

⁴² O kwuznenu Jizōsi Saĩmoni.

Jizōsi legidne Pita anya kaa, “I bũ Saĩmoni nnwọ Jōni, be jookwu i Kifasi,” be tũhnasna a, Pita, ke bũ rugwu.

Jizōsi sukwuru Filipu

nũ Natanẹli

⁴³ N'ekile a, Jizōsi kpebi o zne Galili, o piohĩa Filipu, ọ kanũ a, “Snornu m zne.”

⁴⁴ Filipu, Anduru nū Pita hi nū ẹli Bẹtesaida.

⁴⁵ Filipu pohĩa Natanẹli, ọ kanũ a, “A whnũrnu nye wam Mozizi nū ele ọwhnũrninya gbarũ nhne gbasĩri a n'ọkwukwo nsọ, Jizōsi nye Nazareti, nnwọ Josefu.”

⁴⁶ Natanẹli sũkwa a, “Eli Nazareti, o nwernu nhne ọma ọbula ke jeehi n'ẹli Nazareti whũya?”

Filipu sarũ a, “Vaa, whnũrnu.”

⁴⁷ Nga Jizōsi whnũrnu Natanẹli naavakwnusi a, o kwu nhne gbasĩri a, “Ka bũ nye Izireli n'ezi, nye aghĩgho zĩla nū rime a.”

⁴⁸ Natanẹli sũkwa a, “Nda kpa i jiri mahĩa m?”

Jizōsi sarũ a, “M whnũrnu m jĩ nū mkpururu isisi figi sũ Filipu sukwuru i.”

⁴⁹ Natanẹli sarũ a, “Nye-zni-nhne, i bũ Nnwọ Chiokike. I bũ eze Izireli.”

⁵⁰ Jizōsi sũkwa a, “I kweruru kpọi kwnornu nū m karũ m nū m whnũrnu m jĩ nga i zĩ mkpururu isisi be kwu figi? I jọowħnu nhne ke kakwo ka.”

⁵¹ Ọ kanũ be, “Me kanũ anũ ezi ọka, anũ jọowħnu hne oligwe kpumernu, nū ele enine izi Chiokike neepnezne, neehidna n'olu Nnwọ ke Badnũ.”

2

Jizōsi mernu mini

ghọ manya

¹ N'ọbochi ke ẹto, ọlulu nnwerne zĩ n'ẹli Kana n'ẹli Galili, nne Jizōsi zĩ masi pii.

² Be sukwuru Jizōsi nū ele sno apna a n'ọlulu nnwerne wam.

³ Nga manya be nọonwo kworu, nne Jizōsi kanũ a, “Be nwéma manya.”

[‡] 1:39 Ọtnu-ige ke ẹno n'iwħnehnie: ọkwukwo ke mbom kwuru ige nri awa

4 Jizōsi saru a, “O gbásiła m, si nwerinya. Ige m yóoduge.”

5 Nne a kanu ele neezne izi, “Anu mee nhne obula o karu anu mee.”

6 Idudu mini isunu gwuzo ndundu be jiri rugwu kpu, ke ele Ju ji nḡosnu nhne lele kpa omen'eli be jiri ziri, ke otu jeeri nri lawuru mḡbu nri eto galoni mini.

7 Jizōsi kanu ele neezne izi, “Anu gbajite be nu mini.” Be gbaji be mini du n'onu be.

8 O kanu be, “Anu kwuhia agwna mini wam gweznenu nye risi ngadna iriri.”

Be gweznenu a.

9 O detu mini wam ke gḡoru manya riro. O ma hne manya wam hi, kḡvu ele neezne izi ele gbaru mini wam magwu. O sukwu nye nḡolu nnwerne,

10 o kanu a, “Nye obula neekesi manya kakpa mma n'oziri, nga ele izne nwḡparu manya, o ke manya ojo. Kḡvu i bitaru manya kakpa mma du kitna.”

11 Ka bu eru ndu-ehni mbom Jizōsi rnuru. O rnuru a nu Kana n'eli Galili, o gesi igwugwu a, ele sno apna a kwnata a mkpoma.

12 Nga ka whemernu, Jizōsi nu nne a, nu rumu nne a, nu ele sno apna a zne Kapanom, be daziri pi obochi ele nu ele.

Nhne Jizōsi mernu

n'Oro Nso Chiokike

(Mat 21:12,13; Mak 11:15-17; Luk 19:45,46)

13 Iriri Ogawhe ele Ju zi ndundu, Jizōsi zne Jeruselem.

14 O whnuru ele neere aturu nu ehni nu nduru nu ele naagbanwo iwai dazigu n'ikpechi n'Oro Nso Chiokike.

15 O gweru eriri mee mbinibini, chihala kpakara be, ma ehni ma aturu. O kpote ikpechi kpakara ele naagbanwo iwai ruwhnu n'eli, chisakwo iwai be.

16 O kanu ele neere nduru, “Anu whoga hna, anu mema oro Nda m oro ahia.”

17 Ele sno apna a chenwanya nhne be gbaru n'okwukwo nso, “Nhne gbasiri Oro Nso Chiokike neerne lele bekwnu nu rime m.”

18 Ele Ju sikwa a, “Ndaa eru ndu-ehni ke i joruru ke neegesi nu i nwernu rikne mee nhne i neeme?”

19 Jizōsi saru be, “Anu kwnadna Oro Nso ka, m joowulizo a n'obochi eto dai.”

20 Ele Ju saru a, “Be jiri nri awha eno nu isunu wu Oro Nso ka, i joowu a n'obochi eto?”

21 Kḡvu Jizōsi kwuru oka gbasiri ehni a lele Oro Nso Chiokike.

22 Nga Jizōsi hiri n'enwu lizo, ele sno apna a chenwanya nu o kwuru oka ka, be kweru nhne okwukwo nso kwuru nu nhne Jizōsi kwuru.

23 Kpa Jizōsi zi nu Jeruselem nu Iriri Ogawhe, agida ele badnu kweru nu ya kpa be whuru agida eru ndu-ehni o noru.

24 Kḡvu Jizōsi kwéle o nyee be ehni a, kwnornu nu o magwu kpakara badnu nkari nkari.

25 O zila mkpa nu be kanu a nhne gbasiri nye obula, kwnornu nu o magwu nhne zi nu mkpoma be.

3

Jizōsi nu Nikodimosi

1 Otu nwerukna be kwu Nikodimosi, otu nu rime ele Farisi, nye risi ele Ju,

2 vakwnusiri Jizōsi n'abali. O kaa, “Rabai, a magwu nu i bu Nye-zni-nhne ke Chiokike ziyaru, kwnornu nu o za nye jorunuli eru ndu-ehni i noru okwolem ma Chiokike dagwunu a.”

³ Jizòsi saru, “Me kanu i ezi oka, o za nye jowhnu n'eli-eze Chiokike anya, o buru nu be mugele a berere.”*

⁴ Nikodimosi sika a, “Ndaa kpa be jomu badnu berere nga o mernu okno badnu? O jaabna nu ruwho nne a berere, be mu a?”

⁵ Jizòsi saru a, “Me kanu i ezi oka, o za nye jaabna n'eli-eze Chiokike o buru nu be mugele a hite nu mini nu Enine.

⁶ Nye ke badnu etekne murnu bu an-ehni, nye Enine murnu bu enine.

⁷ O gbágwaji i anya nu m karu m nu be jomuriri anu berere.

⁸ Ruwhere neewhe hne o masigwu a, i nonu imerne a, kovu i máa hne o hi mabu hne o neezne. Nye obula ke be murnu hite n'Enine nu kpa.”

⁹ Nikodimosi sika a, “Ndaa kpa be jeeme nhne nu kpa?”

¹⁰ Jizòsi saru a, “I bu nye-zni-nhne n'eli Izireli, kovu i máa nhne ka.

¹¹ Me kanu i ezi oka, a nookwu nhne a magwu, a naagba akebne nhne ke a whuru, kovu anu kwé o nahoru akebne ai.

¹² Anu kwé nhne me kwuru gbasiri nhne k'owa. Ndaa kpa anu jeekweru o buru me kanu anu nhne k'oligwe?

¹³ O za badnu obula ke znernu oligwe nu mbom, okwolem Nnwó ke Badnu nye hiri n'oligwe hiedna.

¹⁴ Lele kpa Mozizi gwelizoru agwo n'olu isisi n'eli chna chna chna, o bu kpa be jeegwelizo Nnwó ke Badnu olu,

¹⁵ ma nye obula ke kweru nu ya jeenwe budnu kwó okwo.

¹⁶ Kwnornu nu Chiokike whuru owa n'anya kpa, o gweru Nnwó o murnu ya nu nsunu a kpó nyega, ma nye obula ke kweru nu ya jónwu enwu, kovu o jeenwe budnu kwó okwo.

¹⁷ Kwnornu nu Chiokike ziyage Nnwó a n'owa o buru nye kpe k'owa, kovu ma o buru Nye Oznohia k'owa.

¹⁸ Be jéekpe nye obula ke kweru nu Nnwó wam ikpe, kovu nye obula ke kwége bu nye be kperu ikpe, kwnornu nu o kwége nu Nnwó Chiokike murnu ya nu nsunu a.

¹⁹ Ka bu ikpe wam be kperu owa, iwhne varu n'owa, ele badnu whuru ochichiri n'anya karu iwhne, kwnornu nu be nonu ernu ojo.

²⁰ Nye obula ke nonu ernu ojo bu nye irno ke iwhne, o jáava nu rime iwhne o zi iwhne kpume ernu ojo a.

²¹ Kovu nye obula ke nonu ernu oma jaava nu rime iwhne ma iwhne gesi nu ernu a bu nhne o ururu hite nu Chiokike.”

Jizòsi nu Jóni

Nye Wu Mini

²² Nga ka mekworu, Jizòsi nu ele sno apna a znernu n'eli Judiya, ya nu be daziri ige mati, o wu ele badnu mini.

²³ Jóni masi zi nonu mini n'Enoni ke zi Salim ndundu, kwnornu nu agida mini zi pi. Ele badnu neeznekwnusi a, o nonu be mini.

²⁴ (Be yéeyisige Jóni n'oro ikelu n'ige ka.)

²⁵ Agwna ele sno apna Jóni nu otu nye Ju nodogbuta nhne gbasiri osnusnu nhne lele kpa omen'eli ele Ju jiri ziri.

²⁶ Be vakwnusi Jóni kanu a, “Nye-zni-nhne, nwerukna wam ji nu a zi n'aznu Osimini Jodani kiyari, nye i gbaru akebne gbasiri a, o nonu ele badnu mini, agida ele badnu neeznekwnusi a.”

²⁷ Jóni saru be, “O za nye obula ke jeenwe nhne ke Chiokike késile a.

* 3:3 be mugele a berere: mabu be mugele a hite n'oligwe.

²⁸ Anu þu ele akebbe m nu m karu m, 'M buo m Karaísi, kovu be beru osno ziya m nu ruwhnu a.'

²⁹ Nye noolu nnwerne ikne þu nye nwe nnwerne ikne, kovu enyi nye noolu nnwerne ikne, nye noogwuzo noobno nsní, mkpoma nooso a n'onu nu o nurnu nkoli nye wam noolu nnwerne ikne. O þu kpa snarníma m jiri zu ozu kítna.

³⁰ O jaazi naaba aba, kpa me jaazi naaya eli eli."

Nye ke hiri n'oligwe va

³¹ Nye wam ke hiri n'oligwe va kakwo kpakara badnu, nye hi n'owa þu nye ke owa, o nookwu nhne ke owa. Nye hiri n'oligwe kakwo kpakara badnu.

³² O nookwu nhne o whnurru nu nhne o nurru, kovu o za nye neekweru izi a.

³³ Nye obula ke jeegweru izi a naakahia nu Chiokike þu nye ezi oka.

³⁴ Nye Chiokike ziyaru nookwu ikwu-onu Chiokike, kwnornu nu Chiokike nyéne a Enine a n'apna zi mati.

³⁵ Nda whnurru Nnwọ a n'anya, gweru kpakara nhne yisi n'aka a.

³⁶ Nye obula ke kweru nu Nnwọ wam nwernu budnu kwó okwo, nye obula ke za noobnonu Nnwọ wam nsní, jéenwe budnu, kovu ovu owe ehni Chiokike jaazi nu risi a okwnukokwunu.

4

Jizosi nu nwerinya

Sameria

¹ Ele Farisi nurru nu Jizosi neewehia ele sno apna a, noowu be mini karu Jóni.

² O þu n'ezi nu Jizosi wúge ele badnu mini, kwolem ele sno apna a.

³ Nga Jizosi nurru a, o whuya nu Judiya naalahna Galili.

⁴ O zi mkpa nu o jaagawhe n'esilawuru eli Sameria.

⁵ O vadu n'otu eli-ohna Sameria be kwu Saika, ke zi ndundu otu eli Jekopu nyernu nnwọ a rukna Josefu.

⁶ Omi Jekopu zi pi. Inwe gwuru Jizosi kwnornu nu izne wam, o daziri eli nu ngeri omi wam n'iwhehnie.*

⁷ Otu nwerinya Sameria varu o turu mini n'omi, Jizosi kanu a, "Kesi m mini."

⁸ (Ele sno apna a znernu nu rime eli-ohna o zu wiri.)

⁹ Nwerinya Sameria wam kanu a, "I þu nye Ju, m þu m nye Sameria, ndaa kpa i noorio m mini?" (Ele Ju nu ele Sameria mekota nhne.)

¹⁰ Jizosi saru a, "O buru nu i magwu nkesi Chiokike, nu nye ke noorio i mini, i jorio a ma o kesi i mini ke budnu."

¹¹ Nwerinya wam kaa, "Nda-aj-kwu, i nwée nhne i jeeji notu mini, omi ka miri emi k'agida, ndaa hne i jeegwehia mini budnu ka.

¹² I kakwo nda aj Jekopu nye nyernu aj omi ka, o nwornu mini hi nu rime a, ma rumu a, ma rumu anohia a?"

¹³ Jizosi saru a, "Nye obula ke jonwo mini ke hi n'omi ka, akpíri jookpo a bekwnu berere,

¹⁴ kovu nye obula ke jonwo mini ke me jeenye a, akpíri jookpo a bekwnu berere. Mini ke me jeenye a jogho risi mini ke jaagba du budnu kwó okwo."

¹⁵ Nwerinya wam kaa, "Nda-aj-kwu, kesi m mini ka ma akpíri gharu o kpọ m bekwnu, ma m gharu m o va o tu mini n'omi ka."

¹⁶ Jizosi kanu a, "Zne, sukwu nzi i, va hna."

* **4:6** n'iwhehnie: okwukwo ke mbom kwuru otu-ige ke isunu

17 Nwerinya wam kaa, “M nwée m nzi.”

Jizòsi kanù a, “I kwukwaru nkari nù i nwée nzi,

18 kwnornu nù ì gbolam nzi isne, nye ke jì nù a wu kítna búo nzi ì. I kwuru ezi òka nù ì nwée nzi.”

19 Nwerinya wam kaa, “Nda aì-kwu, m whnurnu nù ì bú nye owhnurninya.

20 Ele nda aì kpòru risi òli n'òlu rugwu ka, kòvu anù ele Ju karù nù hne be kwesiri ò kpò risi òli bú nù Jeruselem.”

21 Jizòsi kanù a, “Nwerinya, kweru nhne me naakanù ì, ige vawa nga ele badnù jòokponu Nda risi òli n'òlu rugwu ka mòbu nù Jeruselem.

22 Anù ele Sameria máa nye anù nòokponu risi òli, aì ele Ju magwù nye a nòokponu risi òli, kwnornu nù òznohia hi n'aka ele Ju va.

23 Kòvu ige vawa, owe, ige wam valem masi, nga ele nòokponu Nda risi n'òli n'èzi jòokponu a risi òli n'enine nù n'èzi òka. Ka bú ele Nda pioru kpònu a risi òli.

24 Chìokike bú enine, ele nòokponu a risi òli jòokporirinu a risi òli n'enine nù n'èzi òka.”

25 Nwerinya wam kanù a, “M maam nù Mezaya, nye be kwu Karaìsi, jaava. Nga ò varù, ò jaakanù aì kpakara nhne.”

26 Jizòsi kanù a, “Me nye nookwunu ì òka, bú ya.”

27 Ige wam ele sno apna Jizòsi hiehna, ò jiri be anya nù ya nù nyerinya nookwurita òka. Kòvu ò zá nye sikkwaru, “Kìni bú nhne ì noopio?” mòbu, “Kìni mernu ì nookwunu nwerinya kà òka?”

28 Nwerinya wam sigbasi idudu mini a, lahna nù rime òli-òhna, kanù ele badnù,

29 “Anù va whnurnu nwerukna ke kannù m kpakara nhne me mernu. Nye ka ò jòoburu Karaìsi sa?”

30 Be gbahala nù rime òli-òhna znekwnusi Jizòsi.

31 Kòvu ele sno apna a zì naariasio Jizòsi, kaa, “Nye-zni-nhne, ri wiri.”

32 Jizòsi kanù be, “M nwernu m wiri ke anù máa.”

33 Ele sno apna a néesikwarita èhni be, “O nwernu nye gweyannù a wiri sa?”

34 Jizòsi kanù be, “Wiri m bú ò bìta echiche nye ziyaru m nù ò rnùkpa èrnu ò nyernu m.

35 Anù naakaa, ‘O gwnarnù ènwa èno, anù gwe nhne n'èkwu.’ Kòvu me kanù anù, anù le anya n'èkwu, mkpùru chnanam ma be ghòru nhne n'èkwu.

36 Nye neegwe nhne n'èkwu nwernu ògwo èrnu, ò chibna ele badnù lele mkpùru ma be nwehìa budnu kwó okwo. Kpam, nye ke kparù mkpùru nù nye ke gweru nhne n'èkwu jeenwekòta snarnìma.

37 Nhne be kwuru bú ezi òka, ‘Otu badnù kpasìri mkpùru, nye berere ghòru mkpùru.’

38 M ziznèrnu m anù ghòru mkpùru n'èkwu ke anù rnùge èrnu nù rime a. Ele berere nrnurn èrnu, anù nwehìa mbnarna n'èrnu be.”

39 Agida ele Sameria ele wu nù rime òli-òhna wam kweru nù Jizòsi kwnornu nù nhne nwerinya wam kwuru, “Ò kanù m kpakara nhne me mernu.”

40 Nga ele Sameria vakwnusiri a, be riasno a ma ya nù be dazìri, Jizòsi dazìri pìi òbochi lawùru.

41 Agida ele berere kweru kwnornu nù izi òma ò znirni be.

42 Be kanù nwerinya wam, “A kweru kítna, ò búo nù nhne ì kannù aì, kòvu kwnornu nù a nurnu nhne ò kwuru, a magwù nù nye ka bú Nye Òznohia ke òwa n'èzi.”

*Jizòsi gwòru nnwò
rukna nye risi*

43 Nga ọbochi lawuru wam whemernu, ọ whọga pji zne Galili.

44 Jizọsi n'iwuhuru a karu, "Nye ọwhnurninya nwée igwugwu n'ẹli a."

45 Nga ọ vaduru ẹli Galili, ele zi nu Galili naakweru a kwnornu nu be zneru Iriri Ọgawhe nu Jeruselem, be whnurnu kpakara nhne o mernu n'Iriri Ọgawhe wam.

46 Jizọsi lahna nu Kana ke Galili hne o mernu mini ghọ manya. Otu nye risi ọchichi ke nnwo a rukna zi n'ehni igbugbu nu Kapanom.

47 Nga ọ nurnu nu Jizọsi hiri nu Judiya va Galili, o zneknwusi a, kanu a, ọ va gwọ nnwo a rukna ehni igbugbu, nye zi n'onu ẹnwu.

48 Jizọsi kanu a, "Anu jéekweru kwekolam ma anu whnurnu ẹnnu ndu-ehni nu eru rikne."

49 Nwerukna wam kaa, "Nda-ai-kwu, snornu m zne, ọ zi nnwo m nwu."

50 Jizọsi kanu a, "La, nnwo i rukna zi budnu."

Nwerukna wam kweru nhne Jizọsi kanu a, la.

51 Nga ọ zi n'apna, ele izi a kwnusi a, kanu a, "Nnwọ i rukna zi budnu."

52 Ọ sika be ige ehni buru buru a rukna oma, be kanu a, "N'otnu-ige ke mbom n'iwhehnie† n'ekile wheru ewhe, ehni orne bekwnu wam sigbasiri a."

53 Nda nnwo wam chenwanya nu ọ bu ige wam Jizọsi kannu a, "Nnwọ i rukna zi budnu." Kam kpayaru, ya nu kpakara ele ọro a kweru.

54 Ka bu ẹnnu ndu-ehni ke ẹbo Jizọsi nrurnu nga o hiri nu Judiya va Galili.

5

Ọgwugwo n'Olulu Mini

Betisaida

1 Nga ka whemernu, Jizọsi zneru iriri ele Ju nu Jeruselem.

2 Otu olulu mini zi ngeri Onu-Mgbo Aturnu nu Jeruselem ke nwernu mgbemge ọro isne, ke ele Hiburu nookwu Betizata.

3 Agida ele nriria naadnanyi nu ngeri a, ele isni, nu ele mgworo, nu ele ngeri ehni be donwurnu ọdonwu. [Be zi neese ma be gbaru mini wam.

4 Kwnornu nu enine izi Nyenwe ai neehiedna hite n'ige du n'ige gbaru mini wam. Nye nriria ọbula ke beru ọsno dnabna nu rime mini wam nga enine izi gbarukparu a, ehni a ọoburu oma hite nu nriria ọbula ọ naaria.]

5 Otu nwerukna ke naaria nriria nri awha ẹto nu ẹsato zi pji.

6 Nga Jizọsi whnurnu a hne ọ dnanyi, ọ mahiaru nu ọ zi nu nriria gbu ọkwnu, ọ sika a, "I piuru be gwọ i nriria i?"

7 Nye nriria wam saru a, "Nda-ai-kwu, m nwée m nye jeeyisi m nu rime olulu mini nga be gbaruru mini, kpa me neezne, nye berere beru m ọsno dnabna."

8 Jizọsi kanu a, "Lizo, chiri etere i, zne izne."

9 Ngangam, be gworu nwerukna wam. Ọ chiri etere a, zne izne.

Nhne ka mernu n'Ọbochi Ozukwa Inwe.

10 Ka mernu ele Ju kanu nwerukna wam Jizọsi gworu nriria, "Tna bu Ọbochi Ozukwa Inwe, o megidnernu n'iwu nu i neechiri etere i."

11 Nwerukna wam saru be, "Nwerukna ke gworu m nriria kannu m, 'Chiri etere i, zne izne.'"

12 Be sika a, "Nyele bu nye ke karu ji chiri etere i zne izne?"

13 Kovu nu nwerukna wam be gworu ma a nye Jizọsi bu, kwnornu nu Jizọsi bnanam n'esilawuru igbudu badnu wam whoga.

14 Omekwo, Jizọsi pioharu a n'Ọro Nso Chiokike, ọ kanu a, "Le, be gworu i nriria i, i méma mmehie, ọ zi nhne ojo ke kakwo ka dnakwasị i."

† 4:52 Otnu-ige ke mbom n'iwhehnie: ọkwukwo ke mbom kwuru ige awa ke ẹsaw

15 Nwerukna wam whọga kanụ ele risi ele Ju nụ ọ bụ Jizọsi gwọru a nrịria a.

Budnu hi nụ Nnwọ

Chiokike

16 Ele Ju bete o mekpa Jizọsi ẹhni kwnornu nụ ọ gwọru nrịria n'Ọbochi Ozukwa Inwe.

17 Jizọsi kanụ be, “Nda m nọornu ẹnu kpakara ige, ọ bụ masị kpa me nọornu.”

18 Ikwu-ọnu ka mernu ele risi ele Ju oву owe ẹhni k'agịda, be noopiosi rikne o gbu Jizọsi, ọ búo nụ o luluru Ọbochi Ozukwa Inwe be kpọi, kọvu nụ ọ karu nụ Chiokike bụ Nda a, naakaa nụ ya nụ Chiokike hna n'otu.

19 Jizọsi kanụ be, “Me kanụ ezi ọka, ọ zá nhne ke Nnwọ nwernu rikne o mee n'ẹhni a, kọvu o neeme nhne ọ whnurnu Nda a neeme. Kwnornu nụ Nnwọ nọornu nhne Nda a nọornu.

20 Nda whnurnu Nnwọ a n'anya, neegesi a kpakara nhne o neeme. O jeegesi a nhne ke kakwo ka ke jaagbagwoji anụ anya.

21 Lele kpa Nda neeme ele nwurnu ọnwu hi n'ẹnwu lizo, nyee be budnu, ọ bụ masị kpa Nnwọ neenye ele masịri a budnu.

22 Nda zá neekpe nye ọbula ikpe, kọvu o yisiri kpakara ikpe n'aka Nnwọ a,

23 ma kpakara ele badnụ sọbisinu Nnwọ a lele kpa be nọsobisinu Nda. Nye ọbula ke zá nọsobisinu Nnwọ, zá nọsobisinu Nda nye ziyaru a.

24 “Me kanụ anụ ezi ọka, nye ọbula ke nọonu ikwu-ọnu m kweru nụ nye wam ke ziyaru m, nwernu budnu kwó okwo. Be jáama a ikpe, kọvu o hilem n'ẹnwu whe nụ budnu.

25 Me kanụ anụ ezi ọka, ige vawa, ige wam valẹm masị, nga ele nwurnu ọnwu jọnu nkọli ke Nnwọ Chiokike, ele nurnu a jaazị budnu.

26 Kwnornu lele kpa Nda nwernu budnu nụ rime a, ọ bụ masị kpa o mernu Nnwọ nwernu budnu nụ rime a.

27 O nyernu Nnwọ rikne o kpe ikpe, kwnornu nụ ọ bụ Nnwọ ke Badnụ.

28 “O gbágwoji anụ anya nụ ige vawa, nga ele zị n'ilili jọnu nkọli a,

29 be jeehi n'ilili lizo, ele mernu mma jeelizo n'ẹnwu ziri budnu, ele mmehie jeelizo n'ẹnwu bụru ele be jaama ikpe.

30 “M nwée m rikne mee nhne ọbula nụ rikne ke aka m. M neekpe ikpe kpa Nda m kannụ m me kpe. Ka neegesi nụ ikpe m zị snam, kwnornu nụ m zá neeme nhne me pioru, kọvu kwekọlam nhne nye ziyaru m pioru.

Akebne gbasiri Jizọsi

31 “Ọ bụru nụ me naagbanụ ẹhni m akebne, akebne m búo ezi.

32 Kọvu ọ zị nye naagbanụ m akebne, m magwụ m nụ akebne a zị kwem.

33 Anụ ziznenu ele izi znekwnusi Jóni, o kwuru nhne gbasiri ezi ọka.

34 Ka zá neegesi nụ m neegweru akebne ke badnụ, m nookwu nhne ka ma anụ nwehia ọznohia.

35 Jóni nụ lele tọnji ke noonwu, nọomuke, anụ kpebiri ọ nwudna ige matị n'iwhne a.

36 “M nwernu m nhne akebne ke kakwo akebne Jóni gbarụ. M nọornu ẹnu ke Nda m nyernu m, ẹnu wam naagbanụ m akebne, neegesi nụ Nda m ziyaru m.

37 Nda m nye ziyaru m naagbanụ m akebne. Anụ núlele nkọli a mọbu whnụ ruwhnu a.

38 Anụ zá naabita ikwu-ọnu a nụ mkpọma anụ, kwnornu nụ anụ kwéle nụ nye wam o ziyaru.

39 Anú tusa ełni nyosna nhne be gbarú n'okwukwo nsò anú, anú neeche nù anú jeenwe budnu kwó okwo hite nù nhne be gbarú nù rime a, be naagbanú m akebne.

40 Kòvú anú kwé ọ vakwnusi m, ma anú nwehía budnu kwó okwo.

41 “M zá m nanarnú ọznarni hite n'aka badnú.

42 M magwú m anú, anú nwée ọwhnun'anya Chiokike nù mkpọma anú.

43 M ji m rẹwhna Nda m va, anú kwége m, kọvu ọ bụru nù nye berere jiri rẹwhna a va, anú jeegweru a.

44 Ndaa kpa anú jeekwe, hne anú noopio ọznarni ke badnú, kọvu anú nwée rikne pio ọznarni ke hi n'aka nye ke bụ Chiokike kpọi va.

45 “Anú chékọ nù m joobno anú nhne nù ruwhnu Nda m. Kọvu ọ bụ Mozizi nye anú kwnatarú mkpọma, joobno anú nhne.

46 Ọ bụru nù anú kweruru Mozizi n'ezi, anú jeekweru m, kwnornu nù ọ gbarú nhne gbasiri m.

47 Kọvu hne anú kwége nhne Mozizi gbarú n'okwukwo nsò, ndaa kpa anú jeekweru nhne me nookwu?”

6

Jizọsi nyernu pokwu

badnú isne wiri

(Mat 14:13-21; Mak 6:30-44; Luk 9:10-17)

1 Nga ka mekworu, Jizọsi whe asnú Osimini Galili (ka bụ Osimini Taberasi).

2 Agida ele badnú snornu a, kwnornu nù be whnurnu ẹrnu ndu-ẹhni ọ rnurnu, nga ọ gwọru ele nriria.

3 Jizọsi pnezne n'olu rugwu daziri ẹli, ya nù ele sno apna a.

4 Ige Iriri Ọgawhe ele Ju zị ndundu.

5 Nga Jizọsi lehnatarú anya whnú agida ele badnú naavakwnusi a, ọ kanú Filipu, “Ndaa hne a jọozuya wiri a jeenye igbudu ele ka?”

6 Ka bụ ma ọ kpa Filipu iru, kwnornu nù ọ magwú nhne o jeeme.

7 Filipu sarú a, “Ọ bụru nù a zụ brẹdi riwhu mkpuru iwai lawuru, o jézu ma nye ọbula ri matị matị.”

8 Otu nù rime ele sno apna a, Anduru, nwene rukna Saịmoni Pita, kaa,

9 “Otu wikoro matị zị hna nye ji ike brẹdi balị* isne nù asnú matị matị lawuru. Ọ zá nhne kam bụ n'esilawuru igbudu ele badnú ka.”

10 Jizọsi kanú be, “Anú kanú be daziri ẹli.” Agida achara zị pị. Kpakara ele badnú wam daziri ẹli, be hna lele pokwu ele rukna isne.

11 Jizọsi gweru brẹdi wam, tų mmamma, nyee kpakara ele wam dazigwu ẹli. O gweru asnú wam mee kwno kpm. Be ri, riji rụwho be.

12 Nga be rikworu, Jizọsi kanú ele sno apna a, “Anú tụtukota kpakara rụvnuruvnu ke gwnarnú, ọ zá ke whu.”

13 Be tụtukota kpakara rụvnuruvnu a, ke jiri nri nù nkita lawuru hite n'ike brẹdi balị isne wam ke ele badnú riri.

14 Ele zị nga Jizọsi rnurnu ẹrnu ndu-ẹhni ka karú, “N'ezi ọka, ka bụ nye ọwhurninya wam ke jaava n'owa.”

15 Nga Jizọsi whnuru nù be noopio o chni a eze nù rikne, o hi n'esilawuru be whọga, ya nù nsnúnu a zne n'olu rugwu.

Jizọsi zneru izne

n'olu mini

(Mat 14:22,33; Mak 6:45-52)

* 6:9 balị Ka bụ ikpa be ji neeme brẹdi.

16 N'ogbednachi, ele sno apna a zne osimini.

17 Be bna n'ogbo neewhe aznụ osimini kiyari neezne Kapanom. Jizosi yáavage hne be zị tem dụ n'abali.

18 Okne ruwhere nụ abaka-mini neewhe n'olu mini.

19 Ele sno apna a kwọ ogbo nhne nụ lele maji ẹto mọbu ẹno nga be whnurnu Jizosi naavakwnusi be, neezne izne n'olu mini. Be tị ogwnu k'agida.

20 Kọvu Jizosi kanụ be, "Anụ tũko ogwnu, ọ bụ mawa."

21 Be kweru a, ọ bnakwnusi be nụ rime ogbo, ngangam ogbo be dụ n'eli wam be neezne.

Ele badnụ noopio Jizosi

22 N'ekile a, agida ele badnụ ele zị n'aznụ osimini kiyari mahjaru nụ otu ogbo matị zị pị whogalam vuru ele sno apna Jizosi kpoi. Jizosi snóge be.

23 Ogbo ele ke berere hiri nụ Taberasị va nụ ngeri hne ele badnụ wam riri brẹdi, nga Nyenwe aị tũkparu mmamma.

24 Nga ele badnụ wam whnurnu nụ Jizosi zila pị, ma ele sno apna a, be bna n'ogbo wam zne Kapanom noopio Jizosi.

Jizosi bụ Wiri ke Bụdnu

25 Nga ele badnụ wam whnurnu a n'aznụ osimini kiyari, be sịkwa a, "Nye-zni-nhne, ndaa nga ị varụ hna?"

26 Jizosi sarụ be, "Me kanụ anụ ezi ọka, anụ noopio m kwnornu nụ anụ rijiri rụwho nụ brẹdi me nyernu anụ, ọ bụo kwnornu nụ anụ whnurnu ẹnu ndu-ehni.

27 Anụ dọgbu ẹhni anụ n'ernu kwnornu nụ wiri ke nooro oro, tñnuma, anụ dọgbu ẹhni anụ n'ernu kwnornu nụ wiri ke jaazị tem dụ bụdnu kwó okwo, ke Nnwọ ke Badnụ neenye anụ. Ya bụ nye Chiokike nyernu rikne o mee kparam."

28 Be sịkwa Jizosi, "Kini bụ nhne a jeeme ma a rnụ ẹnu Chiokike?"

29 Jizosi sarụ be, "Ka bụ ẹnu Chiokike, anụ kweru nụ nye wam o ziyaru."

30 Be sịkwa a, "Kini bụ ẹnu ndu-ehni i jeeji gesi ma a whnurnu, kweru? Kini bụ nhne i jeeme?"

31 Ele nda aị ọknani riri mana n'eli chna chna chna, lele kpa ọkwukwo nsọ kwuru, 'O nyernu be brẹdi ke hi n'oligwe va, be ri.'

32 Jizosi kanụ be, "Me kanụ anụ ezi ọka, ọ bụo Mozizi nyernu anụ brẹdi ke hi n'oligwe va, kọvu Nda m neenye anụ ezi brẹdi ke hi n'oligwe va.

33 Kwnornu nụ brẹdi ke Chiokike neenye bụ nye wam ke hi n'oligwe va, bụ nye neenye ele ọwa bụdnu."

34 Be kaa, "Nda-aị-kwu, neenye aị brẹdi ka kpakara ige."

35 Jizosi kanụ be, "Mawa bụ brẹdi ke neenye bụdnu, nye vakwnusiri m, wiri jógwnu a rịa rịa, nye kweru nụ me, akpịri jókpo a bẹkwnu rịa rịa.

36 M karụ m, anụ whnurnu m, kọvu anụ kwége.

37 Nye ọbula ke Nda m nyernu m jaavakwnusi m, m jáachihala a rịa rịa.

38 Kwnornu nụ m hiri m n'oligwe hiedna mee echiche nye ziyaru m, ọ bụo o mee echiche m.

39 Ka bụ echiche nye ziyaru m, me túwhu nye ọbula ke o nyernu m, kọvu me mee ma be hi n'enwu lizọ n'ọbochi ipne-aznụ.

40 Kwnornu nụ ka bụ nhne Nda m noopio, nye ọbula ke jọowhnu Nnwọ wam, kweru nụ a, jeenwe bụdnu kwó okwo, m jeeme nye wam hi n'enwu lizọ n'ọbochi ipne-aznụ."

41 Ele Ju bete ọ takpo megidne a, kwnornu nụ ọ karụ, "Mawa bụ Brẹdi ke hiednarnụ n'oligwe."

42 Be kaa, “Nye ka o búo Jizòsi nnwò Josefu? A magwù nda a nù nne a, ndaa kpa o naakaa nù o hi n'òligwe hiedna?”

43 Jizòsi kanù be, “Anù tákpoma n'esilawùru ẹhni anù.

44 O zá nye jaavakwnusi m okwolem ma Nda m nye ziyaru m jòodoru a vakwnusi m, m jeeme o lizò n'ẹnwu n'òbochi ipne-aznù.

45 Ele ọwhnurninya gbarù a n'òkwukwo nsò, ‘Chiokike jeezni kpakara ele badnù nhne.’ Nye ọbula ke bnoteru Nda nsni mụhia nhne n'aka a, jaavakwnusi m.

46 O zá nye ọbula ke whnùleru Nda anya nù mbòm, kwekọlam nye wam ke hi hne Chiokike zì whnùru Nda anya.

47 Me kanù anù ezi ọka, nye ọbula ke kweru nwernu bụdnu kwó okwo.

48 Mawa bụ wiri ke bụdnu.

49 Ele nda anù ọknani riri mana n'ẹli chna chna chna, be nwù.

50 Kọvu wiri ke hi n'òligwe hiedna, nye ọbula ke riri a, jòonwu ẹnwu.

51 Mawa bụ wiri ke zì bụdnu ke hi n'òligwe hiedna. O bụru nù badnù ọbula ri wiri ka, o jaazì bụdnu tím tòm. Anọ-ẹhni m bụ wiri ke me jeenye ọwa ma be zìri bụdnu.”

52 Ka kpayarù ọdogbuta whùyarù n'esilawùru ele Ju. Be kaa, “Nwerukna ka, o jeenye aì anọ-ẹhni a ma a ri?”

53 Jizòsi kanù be, “Me kanù anù ezi ọka, okwolem ma anù riri anọ-ẹhni ke Nnwò ke Badnù, nwò ọvnarna a, anù jéenwe bụdnu nù rime anù.

54 Nye ọbula ke jeeri anọ-ẹhni m, nwò masì ọvnarna m nwernu bụdnu kwó okwo.

55 Kwnornu nù anọ-ẹhni m bụ wiri n'ezi, ọvnarna m bụ masì nhne be nwò ọnwò n'ezi.

56 Nye ọbula ke jeeri anọ-ẹhni m, nwò ọvnarna m, wu nù rime m, m wu masì m nù rime a.

57 Lele kpa Nda ke zì bụdnu ziyaru m, m zì m bụdnu kwnornu nù Nda m, kpam masì, nye ọbula ke jeeri anọ-ẹhni m jaazì bụdnu kwnornu me.

58 Ka bụ wiri wam ke hi n'òligwe hiedna, o búo kpa nda anù ọknani riri mana be nwù. Nye ọbula ke jeeri wiri ka jaazì bụdnu tím tòm.”

59 Ka bụ nhne Jizòsi kwuru nga o neezni nhne nù ọro ọgbako ele Ju zì nù Kapanòm.

Ikwu-ọnu ke bụdnu

kwó okwo

60 Nga agida ele sno apna a nurnu ọka a, be kaa, “Ikwu-ọnu ka siri rikne, nyele jeemeli a?”

61 Nga Jizòsi mahiaru nù ele sno apna a naatakpo gbasiri ọka ka, o kanù be, “Ka o mernu ovu we anù ẹhni sa?”

62 Ndaa kpa o jòonu nga anù jòowhnu Nnwò ke Badnù lahna hne o zì nù mbòm?

63 Enine neenye bụdnu, badnù etekne nwée rikne mee nhne ọbula. Ọka me nookwunu anù bụ enine bụ masì bụdnu.

64 Kọvu agwna anù kwége.” Jizòsi magwù hite n'ọziri ele kwé ekwe nù nye jeere a.

65 O kanù be, “Ka kpayarù me jiri kanù anù nù o zá nye jaavakwnusi m, okwolem ma Nda m nyernu a rikne o mee kpam.”

66 Hite nù nhne Jizòsi kwuru, agida ele sno apna a lahna aznù kwnornu nù ikwu-ọnu ka, be snóge a berere.

67 Jizòsi sịkwa nri nù badnù lawùru wam ele sno apna a, “Anù jaalahna masì?”

⁶⁸ Saïmoni Pita, kaa, “Nyenwe aì, a jaalakwnusi nyele? I nwernu ikwu-ònu ke neenye bụdnu kwó okwo.

⁶⁹ Kìtna, a kweru, mahia masì nù ì bụ nye nsò ke Chiokike.”

⁷⁰ Jizòsi kanù be, “Me hòhiaru anù nri nù èbo, kòvu otu nyenum nù rime anù bụ ekwensu.”

⁷¹ O nookwu gbasìri Judasì, nnwò Saïmoni Isikarijoti, kwnornu nù Judasì jeere a, ò bụ n'èzi nù ò bụ otu nù rime nri nù badnù lawùru wam èle snò apna Jizòsi.

7

Jizòsi nù rùmu nne a

¹ Nga ka mekworu, Jizòsi neezneghari nù rime Galili. Ò chòla o zne Judiya kwnornu nù ele Ju noopio o gbu a.

² Ige Iriri Òro Igwugwu ele Ju zì ndùndu.

³ Rùmu nne Jizòsi kanù a, “Whòga hna zne Judiya ma ele sno apna ì whnùrnù èrnù ì nòornu.

⁴ Nye pioru ma ele badnù mahia nye ò bụ rnù èrnù tugwaru otugwa. Mee ma òwa whnùrnù èrnù ì nòornu.”

⁵ Rùmu nne a kwuru ka kwnornu nù be kwéle nù ya.

⁶ Jizòsi kanù be, “Ige m yóoduge, kòvu ige anù zì n'aka anù.

⁷ Ele òwa jéenwe rikne sno anù iro, kòvu be snornu m irno, kwnornu nù m naakaa nù èrnù be bụo òma.

⁸ Anù zne n'Iriri ka, m jáava n'Iriri ka kìtna, kwnornu nù ige m yóoduge.”

⁹ Nga Jizòsi kwukworu kpa, ò dazìgidne nù Galili.

Jizòsi znernu Iriri

Òro Igwugwu

¹⁰ Nga rùmu nne a znernu Iriri wam, Jizòsi snornu be zne Iriri wam nù mgwugwa, ò bụo nù ruwhnu òhna.

¹¹ Ele Ju zì noopio a n'Iriri wam, be néesikwa, “Ndaa hne ò zì?”

¹² Agìda ele badnù nòotnurita n'esilawùru be, be naakaa, “Ò bụ nye òma.” Ele berere naakaa, “Óza, o nooduwhu ele badnù.”

¹³ Kòvu ò zà nye nookwuhiya nhne gbasìri a nù ruwhnu òhna, kwnornu nù be nòotu ogwnu ele risi ele Ju.

¹⁴ N'esilawùru Iriri wam, Jizòsi znernu n'Òro Nsò Chiokike bete neezni nhne.

¹⁵ Nhne o neezni jiri ele risi ele Ju anya, be kaa, “Nwerukna ka múlele nhne, ndaa kpa o jiri mahia nhne?”

¹⁶ Jizòsi sarù be, “Nhne me neezni bụo ikwu-ònu ke m, kòvu ke nye ziyaru m.

¹⁷ Nye òbula ke jeeme echiche nye ziyaru m, nye wam jaamahia ma nhne me neezni ma o hi n'aka Chiokike mòbu o hi n'aka ke m.

¹⁸ Nye nookwu nhne aka ke a, noopio igwugwu ke èhni a, kòvu nye noopio igwugwu nye ziyaru a bụ nye ezi òka, aghìgho zìla nù rime a.

¹⁹ Ò bụo Mozizi nyernu anù iwu? Kòvu ò zà otu nù rime anù ke naabìta iwu. Kìni mernu anù noopio o gbu m?”

²⁰ Ele badnù wam kaa, “Ì bụ nye rēnwu ojo nwùgwu. Nyele noopio o gbu i?”

²¹ Jizòsi kanù be, “M nrñrnù m otu èrnù ndu-èhni, o ji anù anya.

²² Mozizi nyernu anù iwu ò kpa rùmu anù nka (ò bụ n'èzi nù òkpa nka híge n'aka Mozizi, kòvu o hi n'aka ele gbaka), anù naakpa rùmu anù nka n'Òbochi Ozukwa Inwe.

23 O bǫru nǫ anǫ naakpa rǫmu anǫ nka n'Obochi Ozukwa Inwe, ma anǫ bǫta Iwu Mozizi, ndaa kpa ovu ji neewe anǫ ẹhni kwnornu nǫ m gwǫru m nye nrǫria n'Obochi Ozukwa Inwe?

24 Anǫ kpẹ ikpe hite nǫ nhne anya nǫowhnu, kǫvu anǫ kpe ikpe bǫru ọma.”

Jizọsi, ọ bǫ ya bǫ Mezaya?

25 Agwna ele zǫ nǫ Jerusẹlem kaa, “Ka ọ bǫo nye be noopio o gbu?

26 Le, o nookwu ọka n'ọhna, ọ zǫ nye nookwu nhne ọbula megidne a. Ele risi aǐ be magwǫ nǫ nye ka bǫ Karaǐsi n'ezǐ?”

27 Kǫvu nga Karaǐsi jaava, ọ zǫ nye jaamahǐa hne o jeehi va. Kǫvu kpakara aǐ magwǫ hne nwerukna ka hi va.

28 Kpa Jizọsi neezni nhne n'Oro Nsọ Chiokike, o gweru okne nkọli siwama lulo, kaa, “Anǫ magwǫ nye me bǫ, anǫ magwǫ masǐ hne me hi va, kǫvu m vǎge m nǫ rikne aka m, nye ziyaru m bǫ ezi ọka. Anǫ mǎa nye ọ bǫ.

29 Kǫvu m maam nye ọ bǫ, kwnornu m hi m hne ọ zǫ va, ya ziyaru m.”

30 Be pio kpa be jọonwugwu a, kǫvu ọ zǫ nye tǫkwasiri a aka, kwnornu nǫ ige a yóoduge.

31 Kǫvu agǐda ele badnǫ n'esilawǫru igbudu badnǫ wam kweru nǫ ya, be kaa, “Nga Karaǐsi jaava, ọ jọornu ẹrnu ndu-ẹhni kakwo ke nwerukna ka nọornu?”

Be ziznenu ele nse

be nwudne Jizọsi

32 Ele Farisi nǫrnu nhne igbudu ele badnǫ wam nookwu gbasǐri a, be nǫ ele risi arǫhna zizne ele neese Oro Nsọ Chiokike ma be nwǫgwu Jizọsi.

33 Jizọsi kaa, “Me nǫ anǫ jaazǐ ige matǐ, omekwo, m lakwnusi nye ziyaru m.

34 Anǫ joopio m, anǫ jọowhnu m, kwnornu nǫ anǫ jẹenwe rikne va nhne me naala.”

35 Ele risi ele Ju sǐkwa ẹhni be kaa, “Ndaa hne o jeezne hne a jọopiohǐali a? O jeezne hne ele Ju wu n'esilawǫru ele Giriki, zni ele Giriki nhne?”

36 Kǐni bǫ risi nhne o nookwu? Ọ karǫ, ‘Anǫ joopio m, kǫvu anǫ jọowhnu m, hne me neezne anǫ jẹenwe rikne va.’ ”

Osimini ke neenye bǫdnu

37 N'okne ọbochi ipne-aznǫ ke Iriri wam, Jizọsi gwuzoru, gweru okne nkọli siwama, kaa, “Nye ọbula ke akpǐri nọokpo bẹkwnu, ọ vakwnusi m, nwǫrnu mini.

38 Lele kpa ọkwukwo nsọ kwuru, ‘Nye ọbula ke kweru nǫ me, osimini ke mini bǫdnu jeehi nǫ rime rǫwho a naagbahǐa.’ ”

39 Jizọsi kwuru ka kwnornu nǫ Enine Nsọ ke ele kweru nǫ ya jaanahǐa. N'ige wam be ẹnyene Enine Nsọ, kwnornu nǫ be ẹnyene Jizọsi igwugwu.

Okewa n'esilawǫru

ele badnǫ

40 Agwna ele zǫ n'igbudu ele badnǫ wam, nga be nǫrnu ikwu-ọnu ka, be kaa, “N'ezǐ, nwerukna ka bǫ nye ọwhnurninya wam.”

41 Ele berere kaa, “Ọ bǫ Karaǐsi.”

Kǫvu ele berere kaa, “Karaǐsi o jeehi nǫ Galili va?

42 Ọkwukwo nsọ kwuru nǫ Karaǐsi jeehi nǫ avnǫrnu Devidi va, nǫ be jọomu a nǫ Bẹtilehem, ẹli-ọhna hne Devidi wuru.”

43 Ka kpararǫ okewa n'esilawǫru igbudu ele badnǫ wam kwnornu nǫ Jizọsi.

44 Agwna be pioru ọ nwudne a, kǫvu ọ zǫ nye tǫkwasiri a aka.

Ókwe ekwe ke ele risi
ele Ju

⁴⁵ Omekwo, ele neese Oro Nso Chiokike lahnakwnusi ele risi ariohna nù ele Farisi, be sɔkwa be, “Kini mernu anù nwúyagele a?”

⁴⁶ Ele nse wam sarù be, “O zá nye kwuleru óka lele kpa nwerukna ka kwuru.”

⁴⁷ Ele Farisi sɔkwa be, “O duhie masila anù sa?”

⁴⁸ O nwernu otu nye Farisi mɔbu ele risi ele Ju ke kweru nù ya sa?”

⁴⁹ Ele ka máa nhne óbula gbasiri iwu, óvu ónu Chiokike zì nù risi be.”

⁵⁰ Otu nye Farisi rɛwhna a bù Nikodimosi, nye znekwnsurì Jizosi n'abalì, kanù be,

⁵¹ “Iwu aì zá naama badnù ikpe sì ó nùna nhne hi n'ónu a, nù nhne o mernu.”

⁵² Be sarù a, “Ì bù masì nye Galili sa? Lekasi nù nhne be gbarù n'òkwukwo nsò, ó zá nye ówhnurninya ke hi nù Galili whùya.”

[
⁵³ Be gbasà, nye óbula la n'òro a.

8

Nwerinya be nwùgwuru
n'òyi

¹ Jizosi znernu nù Rugwu Olivu.

² N'ónu ósisi, ó lahna n'Óro Nso Chiokike, kpakara ele badnù gba a gburugburu, ó daziri òlì bete neezni be nhne.

³ Ele znì iwu ele Ju nù ele Farisi kwuyanù a otu nwerinya be nwùgwuru n'òyi, be gwuzote a n'esilawùru be.

⁴ Be kaa, “Nye-zni-nhne, a nwùgwuru nwerinya ka hne ya nù nyerukna dnanyi.

⁵ N'iwu aì, Mozizi karù be gweru akaworugwu tũgbu a. Kìni bù nhne i kwuru?”

⁶ Be kwuru ka naakpa a iru ma be bno Jizosi nhne.

Kòvu Jizosi whudnahie òlì gweru mkpaka a gba nhne nù rìzna.

⁷ Be zì kòriri nɛsìkwa a, o lizò, kanù be, “Nye óbula n'esilawùru anù ke mékòlele mmehie beru ósno tũ a akaworugwu.”

⁸ O whudnahie òlì berere naagba nhne nù rìzna.

⁹ Nga be nurnu a, be hite nù nye okno badnù dù nù nye matì, otu otu be whòga kwo. Ó gwnata Jizosi nù nwerinya wam.

¹⁰ Jizosi lizò, sɔkwa a, “Nwerinya, ndaa ele noobno i nhne? Ó zá nye gwnarnù ke jaama ì ikpe?”

¹¹ Nwerinya wam kaa, “Ó zá, sù Nda-aj-kwu.”

Jizosi kanù a, “M máge m masì m jì ikpe, kòvu la, i méma mmehie berere.”]

Jizosi, iwhne ke ówa

¹² Jizosi kakwnonu be, “Mawa bù iwhne ke ówa. Nye óbula ke joosno m jeenwe iwhne ke bùdnu, o jéezne izne n'òchichiri.”

¹³ Ele Farisi kaa, “Ì naagbanù òhni ì akebne kítna, nhne i nookwu búo ezi óka.”

¹⁴ Jizosi sarù be, “Ó bùbedi nù m naagbanù òhni m akebne, nhne me nookwu bù ezi óka, kwnornu nù m magwù m hne me hi nù hne me neezne.

¹⁵ Anù neekpe ikpe lele badnù. M zá m neekpe nye óbula ikpe.

16 Ó þúru nú me kpe ikpe, ikpe m ziri ezi kwnornu nú me nú nsnunu m zá n'íkpe, me nú Nda m nye ziyaru m zi.

17 Be gbarú a n'iwu anú, nú akebne badnú lawúru gbarú þú ezi óka.

18 M gbanú m ẹhni m akebne, Nda m nye ziyaru m gbakwnonu m akebne."

19 Be síkwa a, "Ndaa hne Nda í zì?"

Jizòsi sarú be, "Anú máa m, anú máa masí Nda m. Ó þúru nú anú magwú nye me þú, anú znernu amahía Nda m."

20 Jizòsi kwuru kpakara nhne ka nga o neezni nhne n'Óro Nso Chiokike, nú rime hne be naabíta igbe íwai. Ó zá nye tükwasiri a aka megidne a kwnornu nú ige a yáavage.

Anú jézneli hne me neezne

21 Jizòsi kanú be berere, "M jaala, anú joopio m, anú jónwu nú rime mmehie anú. Anú jéenwe rikne va hne me jaala."

22 Ele risi ele Ju kaa, "Ó kaa nú a jáavali hne ó naala. O joogbu ẹhni a sa?"

23 Jizòsi kanú be, "Anú hi hna, kovu m hi m n'olu va. Anú þú ele ówa ka, kovu m búo m nye ówa ka.

24 Ó þú nhne me jiri kanú anú nú anú jónwu nú rime mmehie anú. Ó þúru nú anú kwége nú m bú m nye me þú, anú jónwu nú rime mmehie anú."

25 Be síkwa a, "Í þú nyele?"

Jizòsi kanú be, "M bú m nye me karú nú m bú m n'óziri.

26 M nwernu m agída nhne me jookwu n'íkpe megidne anú. Kovu nye ziyaru m þú ezi óka, m jaakanú ówa nhne me nurnu hite n'ónu a."

27 Be ghóyage nhne o nookwu gbasíri Nda.

28 Ka kpayarú, Jizòsi kannú be, "Nga anú jeegwelizó Nnwó ke Badnú olu, ige wam anú jaamahía nú m bú m nye me þú. Ó zá nhne ke me neeme nú rikne aka ke m, kovu m neezni kpakara nhne Nda m znirni m.

29 Nye wam ziyaru m dagwunu m, ó ghárula me nú nsnunu m ría ría, kwnornu nú m neeme nhne naamasí a kpakara ige."

30 Agída ele nurnu nhne Jizòsi kwuru kweru nú ya.

Badnú nwernu ẹhni a n'ezi

31 Jizòsi kanú ele Ju ele ke kweru nú ya, "Ó þúru nú anú dazigidne n'ikwu-ónu m, anú jóburu ele sno apna m n'ezi.

32 Anú jaamahía ezi óka, ezi óka wam jeeme anú nwernu ẹhni anú."

33 Be sarú Jizòsi, "A þú rúmu Ebereham, a búkolele óhi n'aka badnú óbula. Ndaa kpa í naakaa nú a jeenwernu ẹhni aí?"

34 Jizòsi sarú be, "Me kanú anú ezi óka, nye óbula ke neeme mmehie þú óhi ke mmehie.

35 Óhi zá naadazigidne n'oro tim tòm, kovu nnwó nwe óro ókwnukokwnu.

36 Ó þúru nú Nnwó jeeme anú nwernu ẹhni anú, anú jeenwernu ẹhni anú n'ezi.

37 M magwú m nú anú þú rúmu Ebereham, kovu anú noopio o gbu m, kwnornu nú anú kwége ikwu-ónu m.

38 M naakanú anú nhne Nda m gesiri m, kovu anú neeme nhne nda anú kannú anú."

39 Be sarú a, "Ebereham þú nda aí."

Jizòsi kanú be, "Ó þúru nú Ebereham þú nda anú n'ezi, anú jórnu ẹrnu Ebereham rnurnu.

40 Nhne me mernu þú ó kanú anú ezi óka me nurnu n'ónu Chiokike, anú noopio o gbu m. Ebereham méne kpam.

41 Anụ neeme nhne anụ nda anụ mernu.”

Be kaa, “Chiokike bụ Nda a nwernu kpọi. A bụo rụmu ọyi.”

Rumu ke Ekwensu

42 Jizọsi kanụ be, “Ọ bụru nụ Chiokike bụ Nda anụ n'ezi, anụ znernu ọwhnu m n'anya, kwnornu nụ m hi m hne Chiokike zị whụya, va hna. M vágé m nù rikne aka ke m, kọvu ya ziyaru m.

43 Nhne mernu anụ ghóyage nhne me nookwu, ọ bụ nụ anụ bnóge nsni n'ikwu-ọnu m.

44 Anụ bụ rụmu nda anụ Ekwensu, anụ jọornu ẹnu nda anụ noopio. Ọ bụ nye noogbu badnụ hite n'ọpanizo. Ọ zila n'ezi ọka, kwnornu nụ ezi ọka zá nù rime a. Omen'eli a bụ ọ gha aghalaghala, kwnornu nù ọ bụ nye aghalaghala nù nda kpakara aghalaghala.

45 Me nookwunu anụ ezi ọka, kọvu anụ zá neekweru m.

46 Nyele n'esilawuru anụ jaama m ikpe mmehie? Ọ bụru nù me kanụ anụ ezi ọka, kịni mernu anụ kwége m?

47 Nye ọbula bụ ke Chiokike joojno nsni ikwu-ọnu Chiokike. Kọvu anụ joojno nsni kwnornu nù anụ bụo ele ke Chiokike.”

Jizọsi nù Ebereham

48 Ele Ju sarụ Jizọsi, “A kwukwaru nkarị nga a kwuru nù ì bụ nye Sameria ke rẹnwu ọjọ nwụgwu.”

49 Jizọsi kanụ be, “Ọ zá rẹnwu ọjọ nwụgwu m, kọvu m neenye Nda m igwugwu, kọvu anụ zá neenye m igwugwu.

50 M zá m noopio igwugwu ke m. O nwernu nye ke noopio igwugwu m, nye wam bụ nye ikpe.

51 Me kanụ anụ ezi ọka, ọ bụru nù nye ọbula bita ikwu-ọnu m, ọ jọowhnu ẹnwu anya rịa rịa.”

52 Ele Ju kanụ a, “Kịtna hne a mahiaru nù rẹnwu ọjọ nwụgwu ì. Ebereham nù kpakara ele ọwhnurninya nwurnu ẹnwu. Ì zì hna naakaa nù nye ọbula ke jaabita ikwu-ọnu ì joonwu ọnuw rịa rịa.

53 Nda aì Ebereham nwurnu ẹnwu. Ì kákwole Ebereham nù ele ọwhnurninya ele nwurnu ẹnwu. Ì che nù ì bụ dị nyele?”

54 Jizọsi sarụ, “Ọ bụru nù me nyee ẹhni m igwugwu, ọ zá nhne ọ bụ. Nda m nye anụ naakaa nù ọ bụ Chiokike anụ neenye m igwugwu.

55 Ọ bụ n'ezi nù anụ máa nye ọ bụ rịa rịa. Kọvu m maam nye ọ bụ. Ọ bụru me kaa nù m máam nye ọ bụ, m jooburu nye aghalaghala lele anụ, kọvu m magwu m nye ọ bụ, m naabita ikwu-ọnu a.

56 Nda anụ Ebereham nwernu ovu ọso n'ọnu nù ọ jọowhnu ọbochi m, ọ whnụ masi a, ọ nwudnarnu.”

57 Ele Ju kanụ a, “Ì yóoduge nri awaha isne, ì whnurnu Ebereham n'ezi?”

58 Jizọsi kanụ be, “Me kanụ anụ ezi ọka, m zì m sù be murnu Ebereham.”

59 Be chiri akaworugwu be jootugbu a, kọvu Jizọsi tugwa ẹhni a, hi n'Oro Nso Chiokike whọga.

9

Jizọsi gwọru nye be murnu n'isni

1 Kpa Jizọsi neewhe, ọ whnụ otu nyerukna be murnu n'isni.

2 Ele sno apna a sịkwa a, “Nye-zni-nhne, ọ bụ mmehie nyele mernu be murnu nwerukna ka n'isni? Mmehie ke a sọbu ke ele murnu a?”

3 Jizōsi kaa, “Isni kpuru a búo kwnornu nù mmehie ke a mọbu ke ele mǔrnu a. Kọvu o kpuru isni ma ẹrnu Chiokike whuya iwhe n'ẹhni a.

4 A jaazị nọrnu ẹrnu nye wam ziyaru m kpa ọbochi gwnarnu, kwnornu nù abalị wawa, nga ọ zá nye jeenwe rikne rnu ẹrnu.

5 Kpa me ziko n'owa, mawa bu iwhe ke owa.”

6 Nga o kwukworu ka, ọ gbusa ọnu-mini n'eli, gweru ọnu-mini wam me ọrura, o te ọrura wam n'anya nwerukna wam.

7 Ọ kanu a, “Zne snu ruwhnu i n'Olulu Mini Saịlom” (ke bu nye be ziznenu). Nwerukna wam zne, snu ruwhnu a, hiehna nọowhnu ọsno.

8 Ele agbatibi a nù ele whnurnu hne ọ nọorio nhne nù mbom sika, “Ka ọ búo nwerukna wam dazị ẹli nọorio nhne?”

9 Agwna be kaa, “Ọ bu ya.”

Ele berere kaa, “Ọza, o yiri ya.”

Kọvu nwerukna wam karu, “Ọ bu mawa.”

10 Be sika a, “Ndaa kpa anya i jiri kpume?”

11 Ọ saru, “Otu nwerukna be kwu Jizōsi mernu ọrura tesi n'anya m, kanu m, 'Zne n'Olulu Mini Saịlom snu ruwhnu,' kpa me snurnu, m whnurnu m ọsno.”

12 Be sika a, “Nda hne ọ zi?”

Ọ kaa, “M maam.”

Ele Farisi nọtule

Ọgwugwo wam

13 Be kwuznenu ele Farisi nwerukna wam kpuru isni nù mbom.

14 Jizōsi mernu ọrura kpume anya nwerukna wam n'Ọbochi Ozukwa Inwe.

15 Ele Farisi sika nwerukna wam berere kpa o jiri nọowhnu ọsno. Ọ kanu be, “O yisiri ọrura n'anya, m snu ruwhnu m, kina, m nọowhnu ọsno.”

16 Agwna ele Farisi kaa, “Nwerukna ka híge nu hne Chiokike zi va, kwnornu nù ọ zá naabita iwu ke Ọbochi Ozukwa Inwe.”

Ele berere kaa, “Ndaa kpa nye mmehie jeenwe rikne rnu ẹrnu ndu-ẹhni ele ka?” Ka vuyaru okewa n'esilawuru be.

17 Ele Farisi sika kwno nwerukna wam berere, “Ndaa nhne i kwuru gbasiri nye wam kpumernu anya i?”

Ọ saru be, “Ọ bu nye ọwhnurninya.”

18 Kọvu ele risi ele Ju kwege nù o kpuru isni nù mbom kọvu nọowhnu ọsno kina tem be sukwu ele murnu nwerukna wam.

19 Be sika be, “Ka ọ bu nnwo anu, nye anu karu nù o kpuru isni nga anu murnu a? Ndaa kpa o jiri nọowhnu ọsno kina?”

20 Ele murnu a saru be, “Ọ bu n'ezi nù ọ bu nnwo ai, nye a murnu n'isni.

21 Kọvu a ma kpa o jiri nọowhnu ọsno kina mọbu nye kpumernu anya a. Anu sikwahia a, ọ bu okno badnu, o jookwulinu ẹhni a.”

22 Ele murnu a kwuru ka kwnornu nù be nọtule ogwnu ele risi ele Ju. Kwnornu nù ele risi ele Ju kwekotaru nù nye ọbula ke jookwuhia nù Jizōsi bu Karaisi, be jaachihala a n'oro ọgbako ele Ju.

23 Ka kpaharu ele murnu a karu, “Ọ bu okno badnu, anu sika a.”

24 Be sukwu kwno nwerukna wam be murnu n'isni, be kanu a, “Nye Chiokike ọznarni, a magwu nù nwerukna ka bu nye mmehie.”

25 Nwerukna wam kaa, “M maam ma ọ bu nye mmehie, ma ọ búo nye mmehie. Kọvu otu nhne bu ke me maharu, m kpuru m isni nù mbom, kina m nọowhnu ọsno.”

26 Be sika kwno a, “Kini bu nhne o mernu i? Ndaa kpa o jiri kpume anya i?”

²⁷ O saru be, “M kannu m anu nu mbom, anu kwéle o bno nsni. Anu piuru o nu a berere? Anu noopio o buru ele sno apna a sa?”

²⁸ Be kpasị a iwhnerne, kaa, “I bu nye sno apna nye ka, a bu ele sno apna Mozizi.

²⁹ A magwu nu Chiokike kwunnu Mozizi oka, kovu nye ka, a máa hne o hi va.”

³⁰ Nwerukna wam saru be, “Ka bu nhne tu n'anya, anu máa hne o hi va, kovu o kpumernu anya m.

³¹ A magwu nu Chiokike zá noobnonu ele mmehie nsni, kovu o noobnonu ele nqosobisinu a nsni bu ele neeme nhne naamasị a.

³² Ke owa panizoru, o zá nye nuleru nu o nwernu nye kpumernu anya nye be muru n'isni.

³³ O buru nu nwerukna ka híge n'aka Chiokike, o jéenwe rikne mee nhne obula.”

³⁴ Be saru a, “Be muru i, znułizo i nu rime mmehie. I jọbu nye jeezni ai nhne sa?” Be chihala a nu rime oro ogbako ele Ju.

Isni ke Enine

³⁵ Nga Jizosi nuru nu be chihalaru a, o pohia a, kaa, “I kweru nu Nnwọ ke Badnu?”

³⁶ Nwerukna wam sikwa Jizosi, “Nda-ai-kwu, kanu m nye o bu ma m kweru m nu ya.”

³⁷ Jizosi kanu a, “I whnnam a, o bu nye nookwunu i oka kitna.”

³⁸ Nwerukna wam kaa, “Nyenwe ai, m kweru m.” O kponu a risi n'eli.

³⁹ Jizosi kaa, “M varu m n'owa o kpe ikpe, ma ele kpuru isni whnurru osno, ma ele nqowhnu osno kpu isni.”

⁴⁰ Agwna ele Farisi zi hne o zi nuru nhne o kwuru, be sikwa a, “A bu ele isni masi?”

⁴¹ Jizosi kaa, “O buru nu anu kpuru isni, ikpe mmehie ba mana anu, kovu anu karu nu anu nqowhnu osno, anu bu ele ikpe mmehie marnu.”

10

Jizosi omamarna nye

znu aturru

¹ Jizosi kaa, “Me kanu anu ezi oka, nye obula ke gala nu onu-mgbo bna n'oro aturru, kovu garu apna berere bna, bu nye buznu n'ezi.

² Nye ke garu n'onu-mgbo bna n'oro aturru bu nye nqoznu aturru.

³ Nye neese onu-mgbo jaagbanu a oro, rumu aturru a nuru nkoli a, o sukwu rumu aturru a nu rewhna be, duru be whoga.

⁴ Nga o chihiaru be, o beru be osno, rumu aturru a snornu a n'aznu, kwnornu nu be magwu nkoli a.

⁵ Be josisno nye berere, kovu be jaagbawhu, kwnornu nu be máa nkoli nye izne.”

⁶ Ka bu elulu Jizosi tnuunu be, kovu be ghoyage nhne o naakanu be.

⁷ Jizosi kanu be berere, “Me kanu anu ezi oka, mawa bu onu-mgbo ke aturru.

⁸ Kpakara ele beru m osno va bu ele buznu n'ezi. Aturru wam bnóne be nsni.

⁹ Mawa bu onu-mgbo. Be joznohia nye obula ke jeehi nu rime m bna, o jaabna nu rime, whoga kwno n'ederezi, whnu ori o jaata.

¹⁰ Nye buznu varu ma o znu buznu, gbu ogbu, lulu nhne, kovu m varu m ma be nwehia budnu, bu budnu ke zuru ozu.

11 “Mawa þú օmamarna nye znu atnuօrnu. օmamarna nye znu atnuօrnu jiknerneru օ nwunu atnuօrnu a օnwu.

12 Nye be gnornu օrnu, nye atnuօrnu wam buօ ke a, օesigbasi atnuօrnu gbawhu nga օ whnuօrnu edu naava. Edu tagbu atnuօrnu, chikeme kwo be.

13 օ gbaru օso kwnornu nu atnuօrnu buօ ke a, օ þu nye be gnornu օrnu, buօrnu rumu atnuօrnu wam zila a mkpa.

14 “Mawa þú օmamarna nye znu atnuօrnu. M maam atnuօrnu m, atnuօrnu m magwu m masi.

15 Lele kpa Nda m magwu m, þu kpa me magwu Nda m. M nօtusanu rumu atnuօrnu m buօrnu m.

16 M nwernu m rumu atnuօrnu berere ke za n'ogbori atnuօrnu ka, m jeegweya be. Be masi օonu nkoli m, kpakara be օoburu otu ogbori atnuօrnu. Be jeenwe otu nye znu atnuօrnu.

17 Ka þu nhne kpayaru Nda m jiri whnu m n'anya kwnornu nu m kweru m օ tubita buօrnu m, ma m gwelizo a berere.

18 օ za nye nanahja m buօrnu m. Mawa bitaru a hite nu mkpoma m. M nwernu rikne օ bita a, m nwe masiri m rikne օ gwelizo a. Ka þu nhne Nda m nyernu m n'iwu.”

19 Ka kpayaru okewa kwno n'esilawuru ele Ju.

20 Agida be naakaa, “Renwu ojo nwugwu a, օ þu nye օra. Kini mernu anu noobno a nsni?”

21 Kօvu ele berere kaa, “Nye renwu ojo nwugwu, o jookwu oka kpa? Ndaa kpa renwu ojo jookpumeli anya nye isni?”

Okwe ekwe ke ele Ju

22 N'ige Iriri Onyewhete Oro Nso Chiokike duru nu Jerusalem, n'ige okirika,

23 Jizosi zi n'Oro Nso Chiokike neezne izne nu mgbemgbe oro Solomoni.

24 Ele Ju gba a gburugburu, znekwusi a, kaa, “I bitaru a n'ochichiri ogologo ige, kawamanu ai օ buru nu jiwa þu Karaisi.”

25 Jizosi saru be, “M kannu m anu, kovu anu kwege. օrnu ndu-ehni me nօrnu nu rewhna Nda m naagbanu m akebne.

26 Kօvu anu kwege kwnornu nu anu buօ atnuօrnu ke m.

27 Atnuօrnu ke m օonu nkoli m, m maam be, be noosno m n'aznu.

28 M neenye be buօrnu kwօ okwo, be օonwu rja rja. օ za nye nwernu rikne dօhala be n'aka m.

29 Nda m nye nyernu m be kakwo kpakara nhne berere. օ za nye nwernu rikne dօhala be n'aka Nda m.

30 Me nu Nda m þu otu.”

31 Ele risi ele Ju tuturu kwno akaworugwu be օotu a.

32 Jizosi kanu be, “M rnurnu m agida օrnu ndu-ehni nu ruwhnu anu ke Nda m nyernu m, ndaa օrnu ke anu kwnornu nu a nօotu m akaworugwu?”

33 Ele Ju saru a, “A օotu i akaworugwu kwnornu nu օrnu օma, kovu kwnornu nu i kwuluru Chiokike hne i þu badnu etekne, i neeme ehni i Chiokike.”

34 Jizosi saru be, “Okwukwo nso anu kwuru nu Chiokike sukwuru be chi.

35 O sukwuru be chi þu ele nurnu ikwu-օnu Chiokike, aghalaghala zila nu nhne be gbaru n'okwukwo nso.

36 Nda m hohiaru m, bita m nso, ziya m n'owa. Ndaa kpa me nookwulu Chiokike kwnornu nu m karu m nu m þu m Nnwօ Chiokike?

37 Anu kwօ, օ buru nu m za m nօrnu օrnu Nda m.

38 Kօvu օ buru nu m nօrnu օrnu Nda m, օ bubedi nu anu kwele nu me, anu kweru n'օrnu m, ma anu mahja nu Nda m zi nu rime m, me nu rime Nda m.”

³⁹ Be pio ọ nwudne a berere, kọvu o hi n'aka be whọgaru.

⁴⁰ Jizọsi lahna n'aznụ Osimini Jodani kiyari, hne Jóni wụru mini nụ mbọm. Ọ daziri pji.

⁴¹ Agida ele badnụ vakwnusi a, kaa, “Jóni rnúge ọnu ndu-ẹhni, kọvu kpakara nhne Jóni kwuru gbasiri nwerukna ka bụ ezi ọka.”

⁴² Agida be kweru nụ ya pji.

11

Enwu Lazarọsi

¹ Otu nwerukna rewhna bụ Lazarọsi, nye wu nụ Bẹtani, dnarnụ ẹhni igbugbu. Bẹtani bụ hne Meri nụ nwene a rinya Mata wu.

² Ka bụ Meri wam ke wụsiri Jizọsi mono otute, gweru rukeri-ize a kwnos-nama ọchi a, bụ nye nwene a rukna Lazarọsi dnarnụ ẹhni igbugbu.

³ Rụmu nne a rinya ziznenu Jizọsi izi kaa, “Nyenwe aị, enyi i ke ị whnụrnu n'anya naarịa ari.”

⁴ Nga Jizọsi nurnu a, ọ kaa, “Ehni igbugbu ka jọbu ẹnwu Lazarọsi, kọvu o jeenye Chiokike igwugwu ma be hite nụ a nyee Nnwọ Chiokike igwugwu.”

⁵ Jizọsi whnụrnu Mata nụ nwene a rinya nụ Lazarọsi n'anya.

⁶ Kọvu nga ọ nurnu nụ Lazarọsi naarịa ẹhni igbugbu, ọ daziri nụ hne ọ zị ọbuchi lawuru berere.

⁷ Omekwo, ọ kanụ ele sno apna a, “Anụ va ma a lahna Judiya.”

⁸ Ele sno apna a kanụ a, “Nye-zni-nhne, o gbúle ọkwnu ele Ju pioru ọ tụ akaworugwu, ị naalahna kọriri pji?”

⁹ Jizọsi sarụ be, “Otu ọbuchi nwernu nri nụ awa lawuru, nye ọbula ke znernu izne n'iwhehnie jọkpobi ọchi, kwnornu nụ ọ nọowhnu iwhehnie k'owa.

¹⁰ Kọvu ọ bụru nụ o zne izne n'abalị, ọ jọkpobi ọchi, kwnornu nụ ọ zị iwhehnie zị nụ rime a.”

¹¹ Nga Jizọsi kwukworu kpa, ọ kaa, “Lazarọsi enyi aị neezni anyarna, kọvu m jeezne ma m kpatne a.”

¹² Ele sno apna a kaa, “Nyenwe aị, ọ bụru nụ o neezni anyarna, ẹhni jọburu a oma.”

¹³ Kọvu nhne Jizọsi nookwu bụ nụ Lazarọsi nwunam. Kọvu be neechे nụ ọ bụ ozni anyarna etekne.

¹⁴ Jizọsi kawhnomenu be, “Lazarọsi nwunam.

¹⁵ Mkpọma nọoso m n'ọnu kwnornu anụ, nụ m zila m hne ọ nwurnu, ma anụ kweru. Anụ lizọ ma a znekwnusi a.”

¹⁶ Tọmosi, nye be kwu Didimọsi (ke bụ ejima) kanụ ele sno apna a ibne a, “Anụ lizọ ma a snornu a zne, ma a snornu a nwụ ẹnwu.”

Jizọsi, olizọ n'ẹnwu nụ budnu

¹⁷ Nga Jizọsi vaduru, ọ whnụrnu nụ be lilem Lazarọsi ọbuchi ẹno wheru ewhe.

¹⁸ Bẹtani dúla maịli lawuru hite nụ Jeruselem.

¹⁹ Agida ele Ju varụ ọ kasi Mata nụ Meri mkpọma kwnornu ẹnwu nwene be rukna.

²⁰ Nga Mata nurnu nụ Jizọsi wawa, ọ whọga znekwnusi a, kọvu Meri daziri n'oro.

²¹ Mata kanụ Jizọsi, “Nyenwe aị, ọ bụru nụ ị zị hna, nwene m rukna bọ ọ nwuna.

²² Kọvu m maam nụ nhne ọbula ị rjoru n'aka Chiokike, o jeenye i ya.”

²³ Jizọsi kanụ a, “Nwene i rukna jeelizo berere.”

24 Mata sa a, “M maam nū o jeelizo berere n'obochi ipne-aznū.”

25 Jizōsi kanū a, “Mawa bū olizo n'ēnwu nū būdnu. Nye obula ke kweru nū me, o būrubi nū o nwūrnu ɔnwu, o jaazi būdnu.

26 Berere kwno, nye obula ke zi būdnu kweru nū me jōonwu ɛnwu tim tōm. Mata, i kweru nhne me nookwu?”

27 Mata sarū, “Owe! Nyenwe aī, m kweru m nū jī bū Karaīsi, Nnwō Chiokike ke varū n'owa.”

Jizōsi kwnarnū ɛkwna

28 Nga Mata kwukworu ka, o lahna, sukwu Meri nwene a rinya ichne kanū a, “Nye-zni-nhne zi hna, o noosukwu i.”

29 Nga Meri nūrnu ka, o lizo wara wara ma o kwnusi Jizōsi.

30 Jizōsi yáavaduge nū rime ɛli-ohna, o zi kōriri nū hne Mata kwnusiri a.

31 Ele Ju be nū Meri zi n'oro naakasi a mkpōma, snornu a nga be whnūrnu nū o lizōru wara wara whōga. Be neeche nū o neezne akwna ɛkwna n'ilili.

32 Nga Meri dūru hne Jizōsi zi, whnū a, o dna n'eli n'ochi a, kaa, “Nyenwe aī, o buri nū i zi hna, nwene m rukna bō o nwuna.”

33 O metūru Jizōsi nū mkpōma nga o whnūrnu Meri nū ele Ju sno a naakwna ɛkwna, o gbu a igbugbu nū mkpōma.

34 O sīkwa be, “Ndaa hne anū vubiri a?”

Be kaa, “Nyenwe aī, va whnūrnu.”

35 Jizōsi kwnarnū ɛkwna.

36 Ele Ju kaa, “Le, o whnūrnu a n'anya k'agīda.”

37 Kōvu agwna be kaa, “O kpumernu anya nwerukna kpuru isni, o buri nū o jēenwe rikne mee Lazarōsi gharū o nwū ɛnwu?”

Jizōsi mernu Lazarōsi hi

n'ēnwu lizo

38 O gbu kwno Jizōsi igbugbu nū mkpōma, o zne n'ilili be gwuru nū rime rugwu, be jiri rugwu kpusni ɔnu a.

39 Jizōsi kaa, “Anū gweme rugwu ka.”

Mata, nwene rinya nwerukna wam nwūrnu ɔnwu kaa, “Nyenwe aī, o jēenwe ɛknarna ojo, kwnornu nū tna bū obochi ɛno be liri a.”

40 Jizōsi kaa, “Me kannū i nū i jōowhnu igwugwu Chiokike o buri nū i jeekweru kpōi?”

41 Be vume rugwu wam. Jizōsi lelizō anya n'olu, kaa, “Nda m, meka, kwnornu nū i bnonem me nsnī.

42 M magwū m nū i noobnonu m nsnī ige obula, kōvu kwnornu nū ele ka zi hna m nookwu a ma be kweru nū jī ziyaru m.”

43 Nga o kwukworu ka, o gweru okne nkōli siwama, “Lazarōsi, whūya.”

44 Nwerukna wam nwūrnu ɔnwu whūya, nye be jī ikpe iznu whū a aka lawūru nū ochi lawūru, nū ikpe be jiri whū ruwhnu a. Jizōsi kanū be, “Anū tōma a, ma o la.”

Be gbarū iznuznu

o gbu Jizōsi

(Mat 25:1-5; Mak 14:1,2; Luk 22:1,2)

45 Agīda ele Ju ele varū elekwa Meri whnūrnu nhne Jizōsi mernu, kweru nū ya.

46 Kōvu agwna be lahna kanū ele Farisi nhne Jizōsi mernu.

47 Ele Farisi nū ele risi arīohna kwu ikwu kaa, “Ndaa nhne a neeme? Nwerukna ka nōornu agīda ɛrnu ndu-ɛhni.

⁴⁸ Ọ buru nū a gharū a, o neezne nū ruwḥnu, kpakara ele badnū jeekweru nū ya. Ele Rom jaava lulu ẹli aḡ ma Ọro Nsọ aḡ.”

⁴⁹ Otu nyenum n'esilawuru be, rẹwhna a bụ Kayafasị, nye bụ nye risi arịohna n'awha wam, kaa, “Anū máa nhne rịa rịa.

⁵⁰ Ọ buru ọma nū otu badnū nwuhianu kpakara badnū ẹnwu, ma kpakara mba gharū o whu etekne.”

⁵¹ N'ezi ọka, o kwúge nhne ka hite nū mkpọma a, kọvu lele nye risi arịohna n'awha wam, ọ whnurnu ọwhnurninya nū Jizọsi jọonwuhianu ele Ju ẹnwu.

⁵² Ọ búo ele Ju kpọi, kọvu kwnornu kpakara rụmu Chiokike be chisaru nū kpakara ọwa, chikota be ma be buru otu.

⁵³ Hite n'ọbochi wam ele risi ele Ju bete ọ gba iznuznu kpa be joogbu Jizọsi.

⁵⁴ Kam kpayarū, Jizọsi zima neezne izne nū ruwḥnu ọhna n'esilawuru ele Ju, kọvu ọ whọga zne hne zị ndundu n'ẹli-ikpa, bna n'otu ẹli be kwu Ifirem, ya nū ele sno apna a daziri pịi.

⁵⁵ Ige Iriri Ọgawhe ele Ju zị ndundu, agịda ele Ju zne Jeruselem, zne ọ bita ẹhni be nsọ sụ ọ dụ Iriri Ọgawhe be.

⁵⁶ Be noopio Jizọsi, be gbako n'Ọro Nsọ Chiokike, be nẹsikwa ibne be, “Ndaa nhne bụ echiche anū? Ọ bụ nū ọ jáava Iriri ka sa?”

⁵⁷ Ele risi arịohna nū ele Farisi nyernu iwu, kaa, nye ọbula ke magwū hne Jizọsi zị kanū be ma be nwudne a.

12

Be teru Jizọsi mọno

nū Bẹtani

(Mat 26:6-13; Mak 14:3-9)

¹ Ọ gwnarnū ọbochi isunu Iriri Ọgawhe ele Ju dụ. Jizọsi znernu Bẹtani hne Lazarọsi nwerukna wam o mernu o hi n'ẹnwu lizọ.

² Be sinu Jizọsi wiri anyasnu, Mata neezne izi, Lazarọsi bụ otu nū ele Jizọsi dazị neeri wiri.

³ Meri gweru otu olori mọno otute zị gburu ọnu be jiri nadi zị snam mee, ke nwernu ẹknarna ọma wụsi n'ọchi Jizọsi, gweru rukeri-ize a kwnosnama a. Ẹknarna mọno wam jihia rime ọro.

⁴ Otu nū rime ele sno apna Jizọsi be kwu Judasị Isikarijoti, nye jeere Jizọsi, kaa,

⁵ “Kini mernu be réle mọno otute ka riwhu mkpuru iwai ẹto, kesi ele mboni?”

⁶ Ọ búo nū nhne gbasiri ele mboni neemetu a nū mkpọma mernu o jiri kwu kpa. Kọvu kwnornu nū ọ bụ nye buznu, ya neeji rẹkpa iwai be, neeri nhne zị a nū rime.

⁷ Jizọsi sarū a, “Gharū nwerinya ka, ọ bítaru ka kwnornu ọbochi be jeeli m.

⁸ Jì nū ele mboni zì kpakara ige, me nū jì jáazì kpakara ige.”

Be gharū iznuznu

o gbū Lazarọsi

⁹ Agịda ele Ju nurnu nū Jizọsi zị nū Bẹtani, be va, ọ búo kwnornu Jizọsi kpọi, kọvu ma be whnurnu Lazarọsi nye Jizọsi mernu o hi n'ẹnwu lizọ.

¹⁰ Ele risi arịohna ma mmuma kpa be joogbu Lazarọsi masị.

¹¹ Agịda ele Ju gharuru ele risi ele Ju kweru nū Jizọsi kwnornu Lazarọsi.

Jizọsi bnaznenu

Jeruselem

(Mat 21:1-11; Mak 11:1-11; Luk 19:28-40)

12 N'òbóchi ke sno a, agída ele badnú ele varú Iriri Ọgawhe nǔrnu nǔ Jizọsi vawa Jeruselem.

13 Be gburu igwugwu bukúwu whọga zne kwnusi a, neesi lúlo,
 “Ozana! * Chiokike gozi nye naava nǔ rẹwhna Nyenwe aǐ,
 Chiokike gozi eze Izireli.”

14 Jizọsi pohia otu nnwọ iyinya daziri n'olu a, lele kpa ọkwukwo nsọ kwuru,
 15 “I túko ogwnu, jì adna Zayoni,
 Le, eze i gba nnwọ iyinya naava.”

16 Ele sno apna a ghóyage n'ige wam, kọvu nga Jizọsi hiri n'ẹnwu lizọ n'igwugwu, be chenwanya nhne ọkwukwo nsọ kwuru gbasiri a nǔ be mernu a nhne ka.

17 Agída ele badnú wam whnǔrnu nga Jizọsi sukwuhjara Lazarọsi n'ilili, mee ma o hi n'ẹnwu lizọ. Be kahjara nhne mernu.

18 Ka kpayaru agída ele badnú znekwnusi a, kwnornu nǔ be nǔrnu nǔ ọ rnrnu ẹrnu ndu-ẹhni ka.

19 Ele Farisi kanú ibne be, “Le, ọ zá nhne a neemeli, kpakara ọwa sno a n'aznú.”

Agwna ele Giriki noopio

Jizọsi

20 Agwna ele Giriki znernu Jeruselem n'ige Iriri wam zne kpọnu Chiokike risi eli.

21 Be vakwnusi Filipu nye Betesaida nǔ ẹli Galili, kaa, “Nda-aǐ-kwu, a noopio ọ whnú Jizọsi.”

22 Filipu zne kanú Anduru, be lawuru zne kanú Jizọsi.

23 Jizọsi sarú be, “Ige wam valẹm ma be nyee Nnwọ ke Badnú igwugwu.

24 M kanú anú ezi ọka, otu mkpuru ikpa zì etekne nga be kpásiila a nǔ rime n'eli. Nga be kpasiri a, ọ nwuma, fuhia, mji agída ike ikpa berere.

25 Nye obula ke nọowhnu budnu a n'anya jootuwu a, kọvu nye sno budnu a irno n'ọwa ka jaabita a dǔ budnu kwó okwo.

26 Nye obula ke nọornunu m ẹrnu joosno m n'aznú. Hne me zì nnwọ izi m jaazì pji. Nda m jọsobisinu nnwọ izi m.

Jizọsi kwuru ọka

gbasiri ẹnwu a

27 “Kítna mkpọma m naala mini. Ndaa nhne me jaakaa? M jaakaa, ‘Nda m, i kwékọ ige ka va’? Kọvu ka bú risi nhne me kwnornu va.

28 Nda m, nyee rẹwhna i igwugwu.”

Otu nkọli hiri n'oligwe dna, kaa, “M nyene m a igwugwu, m jeenye kwno a igwugwu berere.”

29 Igbudu ele badnú wam gwuzo pji kaa, “Egbe oligwe gbarú.” Ele berere kaa, “Enine izi kwunnu a ọka.”

30 Kọvu Jizọsi karu, “Ọ búo kwnornu me nhne nkọli ka kwuru ọka, ọ bú kwnornu anu.

31 Kítna bú ige be jeekpe ọwa ka ikpe, kítna be jẹchihala nye risi ke ọwa ka.

32 Kọvu me, ọ búru nǔ be gwelizọ m olu n'ọwa, m jọodoru kpakara badnú nyee ẹhni m.”

33 O kwuru ka ma o gesi ọkpa ẹnwu ọ jọonwu.

34 Igbudu ele badnú wam kaa, “A nǔrnu hite n'iwu aǐ nǔ Karaisi jaazì tim tọm. Ndaa kpa i naakaa nǔ be gwelizọ Nnwọ ke Badnú olu? Nyele bú Nnwọ ke badnú?”

* 12:13 Ozana n'ikwu-ọnu ele Hiburu, ke bú “Znọhia!”

³⁵ Jizōsi kanụ be, “Anụ jeenwe iwihne ige matị, anụ zne izne nụ rime a, ọ zị ọchichiri vakwnusi anụ. Kwnornu nụ nye neezne izne n'ọchichiri máa nhne o neezne.

³⁶ Anụ tükwasi ovu n'iwihne kịtna anụ nwernu a, ma anụ bụru rụmu ke iwihne.” Nga Jizōsi kwukworu ọka ka, ọ whọga, tugwa ẹhni a.

Ókwe ekwe ke ele Ju

³⁷ Ọ bụ n'ezị nụ Jizōsi rnụrnu kpakara ẹrnu ndu-ẹhni ka n'anya be, be kwéruge nụ ya.

³⁸ Ka bụ ma nhne Azaya nye ọwhnurninya kwuru mezu,
“Nyenwe aị, nyele kweru izi a ziri,
nda a nye Nyenwe aị kpumennu aka dikne a?”

³⁹ Kwnornu nụ be kwéle, Azaya kwuru nụ hne berere,

⁴⁰ “Chiokike mernu be kpu isni,
mee mkpọma be bụru nhne nwụrnu ọnwu,
ma be gharu o ji anya be whnụ ọsno,
gweru mkpọma be ghọhia, ma be tūhnasna,
ma m gwọ m be.”

⁴¹ Ka bụ nhne Azaya kwuru kwnornu nụ ọ whnurnu igwugwu Jizōsi, o kwu ọka gbasiri a.

⁴² N'ige wam agida ele risi ele Ju kweru nụ Jizōsi, kọvu kwnornu nụ ele Farisi, be nwée rikne kwuhia nhne gbasiri a, ọ zị be chihala be n'oro ọgbako ele Ju.

⁴³ Be mernu kpa, kwnornu nụ be whnurnu ọznarni ke badnụ n'anya kakwo ọznarni ke Chiokike.

Ikwu-ọnu Jizōsi jeekpe ikpe

⁴⁴ Jizōsi gweru okne nkọli siwama, kaa, “Nye ọbula ke kweru nụ me, o kwéruge nụ me kpọi, kọvu ma nụ nye ziyaru m.

⁴⁵ Nye ọbula ke neele m anya jọowhnu nye ziyaru m.

⁴⁶ M varu m n'owa lele iwihne, ma nye ọbula ke jeekweru nụ me jáadazigidne n'ọchichiri.

⁴⁷ “Nye ọbula ke jọonu ikwu-ọnu m, kọvu zá naabita be, m jéekpe a ikpe, kwnornu nụ m váge m o kpe ọwa ikpe, kọvu ọ zñohia ọwa.

⁴⁸ Nye ke zúsaru m, zá naabita ikwu-ọnu m nwernu nye jeekpe a ikpe. Ikwu-ọnu me kwuru jeekpe a ikpe n'ọbochi ipne-aznụ.

⁴⁹ Kwnornu nụ m kwúge m ọka ke m, kọvu Nda m nye ziyaru m nyernu m iwu nhne me jaakaa, nụ nhne me jookwu.

⁵⁰ M magwu m nhne o nyernu n'iwu bụ bụdnw kwó okwo. Nhne me kwuru bụ nhne Nda m karu me kwu.”

13

Jizōsi snurmu ọchi ele sno apna a

¹ N'ọbochi ke bọru ọbochi Iriri Ọgawhe, Jizōsi magwu nụ ige ọ jaaghasa ọwa ka lakwnusi Nda a dulam. Ọ whnurnu ele ka ele zị n'owa n'anya. Ọ whnurnu be n'anya dụ ipne-aznụ.

² Kpa be neeri wiri anyasnu, Ekwensu yisiri a nụ mkpọma Judasi Isikarioti nnwọ Sajmoni o re Jizōsi.

³ Jizōsi magwū nū Nda a yisilem kpakara nhne n'aka a, nū o hi hne Chiokike zī va, ọ naalahnakwnusi Chiokike.

⁴ O lizọ n'olu wiri, wopu iwo olu a, gweru akata kne n'ikwnu a.

⁵ O wūsi mini nū rime agbugba, bete n̄osnu ọchi ele sno apna a, gweru akata o kne n'ikwnu nookwnosna be.

⁶ O va hne Saịmoni Pita zī, Pita sịkwa a, “Nyenwe aị, ị j̄osnu ọchi m?”

⁷ Jizōsi sarū a, “Ị máa nhne me neeme k̄itna, k̄ovu omekwo, ị jaamahịa.”

⁸ Pita kaa, “Ị j̄osnu ọchi m r̄ia r̄ia.”

Jizōsi sarū a, “O b̄uru nū m sn̄uge m ọchi ị, me nū j̄i nwéko nhne ọbula.”

⁹ Pita sarū a, “O b̄uru kpam, ị sn̄u ọchi m kp̄oi, k̄ovu sn̄u ma aka m law̄uru ma risi m.”

¹⁰ Jizōsi sarū a, “Nye hn̄jarnu ẹhni zī r̄ichna kpam kpam, o kwésile ọ sn̄u ẹhni a berere, okwolem ọ sn̄u ọchi a. Kpakara an̄u zī r̄ichna, k̄ovu ọ búo kpakara anu.”

¹¹ Kwnornu nū Jizōsi magwū nye jeere a, b̄u nhne o kwno kaa nū kpakara be zī r̄ichna, okwolem otu badn̄u kp̄oi nye z̄fla r̄ichna.

¹² Nga ọ sn̄ukparu be ọchi, o woru iwo olu a berere daz̄iri ẹli nū hne ọ zī nū mb̄om. Ọ sịkwa be, “An̄u gh̄ohiaru nhne me mennu an̄u?”

¹³ An̄u noosukwu m Nye-zni-nhne, nū Nyenwe an̄u, ọ b̄u ezi ọka, kwnornu nū ọ nhne me b̄u.

¹⁴ K̄itna, me b̄u Nyenwe an̄u nū Nye-zni-nhne sn̄urnu ọchi an̄u, an̄u kwesiri ọ sn̄urita ọchi ibne an̄u.

¹⁵ M gesiri m an̄u nhne at̄u ma an̄u mee kpa me mernu.

¹⁶ Me kan̄u an̄u ezi ọka, ọ zá ọhi ke kakwo nyenwe a, ọ zá nnw̄o izi ke kakwo nye dusiri a izi.

¹⁷ Mkp̄oma j̄osno an̄u n'ọnu, ọ b̄uru nū an̄u mah̄iaru nhne ka, neeme be.

¹⁸ “M zá m nookwu kwnornu kpakara an̄u. M magwū m ele me h̄ohiaru, k̄ovu nhne ọkwukwo ns̄o kwuru jeemezuri, ‘Nye riri wiri m liz̄oru megidne m.’

¹⁹ M naakan̄u an̄u ezi ọka k̄itna sị o mee, ma nga o jeeme an̄u kweru nū m b̄u m ya.

²⁰ Me kan̄u an̄u ezi ọka, nye ọbula ke jaanabnanya nye me zizn̄ernu, nabnanyarn̄u m, nye nabnanyarn̄u m, nabnanyarn̄u nye ziyaru m.”

Jizōsi kwuru ọka

gbasiri o rure a

(Mat 26:20-25; Mak 14:17-21; Luk 22:21-23)

²¹ Nga Jizōsi kwuru ka, o gbu a igbugbu nū mkp̄oma k'agida, ọ kaa, “Me kan̄u an̄u ezi ọka, otu badn̄u n'esislaw̄uru an̄u jeere m.”

²² Ele sno apna a lehnata ẹhni be anya. Be máa nye ọ naakaa.

²³ Otu nye sno apna a Jizōsi wh̄nurnu n'anya ke daz̄i Jizōsi nd̄undu n'ẹhni.

²⁴ Saịmoni Pita kan̄u a, “Sịkwahia a nye ọ b̄u.”

²⁵ Nye sno apna wam dnabn̄ernu nū mkp̄oma Jizōsi sịkwa a, “Nyenwe aị, ọ b̄u nyele?”

²⁶ Jizōsi sarū a, “O b̄u nye me jeerusi br̄edi ka nū rime wiri nyee.” O gweru otu ibekala br̄edi, rusi a nū wiri nyee Judasi, nnw̄o Saịmoni Isikarioti.

²⁷ Ngangam Judasi gweruru br̄edi wam, Ekwensu bna nū rime a. Jizōsi kan̄u a, “O zī nhne i neeme, mee a wara wara.”

²⁸ O zá nye zī p̄ji neeri wiri mah̄iaru nhne Jizōsi nookwu.

²⁹ Hne ọ b̄u Judasi vugwu rekpa ịwai, agwna ele sno apna Jizōsi neeche nū Jizōsi kann̄u a o zne zuya nhne be jeeri n'Iriri wam, m̄obu o kesi ele mboni ịwai.

³⁰ Judasí narnu brędi wam, ọ whọga ngangam. Ka neeme n'abalí.

Iwu ikne

³¹ Nga Judasí whọgaru, Jizọsi kaa, “Kítna, be jeenye Nnwọ ke Badnu igwugwu, be jeenye masí Chiokike igwugwu nu rime a.

³² Ọ buru nu be nyee Chiokike igwugwu nu rime a, Chiokike jeenye Nnwọ a igwugwu n'íwhuru a. O jeeme a kítna.

³³ “Rumu m, me nu anu jáazi gbu ọkwnu. Anu joopio m, kọvu me kanu anu nhne me kannu ele risi ele Ju, anu jéenwe rikne va hne me neezne.

³⁴ “M neenye anu iwu ikne, anu whnu ibne anu n'anya. Lele kpa me whnurnu anu n'anya, anu ji ọgwo ọ whnu ibne anu n'anya.

³⁵ Kpakara ele badnu jaamahia nu anu bu ele sno apna m, ọ buru nu anu whnu ibne anu n'anya.”

Jizọsi kwuru nu Pita

jọogonahoru a

(Mat 26:31-35; Mak 14:27-31; Luk 22:31-34)

³⁶ Saímoni Pita síkwa a, “Nyenwe a, i zne hnele?”

Jizọsi saru a, “Anu jéenwe rikne sno m hne me neezne kítna, kọvu omekwo, anu jooosno m.”

³⁷ Pita síkwa a, “Kini mernu me jéenwe rikne sno i kítna? M jọonwunu i ẹnwu.”

³⁸ Jizọsi saru a, “I jọonwu kwnornu m n'ezi? Me kanu i ezi ọka, su okne ọchichi kwna ẹkwna, i jọogonahoru m mgba ẹto.”

14

Jizọsi bu apna

¹ “Mkpọma lákwadia anu mini. Anu kweru nu Chiokike, anu kweru masi nu me.

² Agida ọro jiri n'oro Nda m, m naala zne mekwatanu anu ọnodi. Ọ buru ọ buo kpa, m znernu m okanu anu.

³ Me zne mekwatanu anu ọnodi, m jeehiehna, kwuru anu yisi n'ẹhni m, ma me nu anu daziri n'otu hnanum.

⁴ Anu magwu apna hne me neezne.”

⁵ Tọmosi kanu a, “Nyenwe a, a máa hne i neezne, ndaa kpa a jaamahia apna a?”

⁶ Jizọsi saru a, “Mawa bu apna nu ezi ọka nu budnu. Ọ zá nye jeezne hne Nda m zi okwokọlam ma o hiri nu me.

⁷ Ọ buru nu i magwu m n'ezi, i jaamahia Nda m masi. Hite kítna anu magwu Nda m, anu whnu a anya.”

⁸ Filipu kaa, “Nyenwe a, gesi a Nda i, o joozunu a.”

⁹ Jizọsi saru a, “Filipu, me nu anu zi ogologo ige ka, i máa nye me bu? Nye obula ke whnurnu m, whnunam Nda m. Ndaa kpa i naakaa, ‘Gesi a Nda.’

¹⁰ Ọ buru nu i kwége sa nu m zi m nu rime Nda m, Nda m zi nu rime m? Ikwu-ọnu me nookwu buo ke m. Nda m ke zi nu rime m ọornu ẹnu a.

¹¹ Anu kweru nga me karu nu m zi m nu rime Nda m, Nda m zi nu rime m. Ọ buru nu ọ zá nhne berere, anu kweru kwnornu nu ẹnu ele ka.

¹² Me kanu anu ezi ọka, nye obula ke kweru nu me jọornu ẹnu me ọornu. Owe! Ọ jọornu ẹnu ke kakwo ka kwnornu nu m naalakwnusi Nda m.

¹³ Kpakara nhne anu jporio nu ẹwhna m, m jeeme a, ma be nyee Nda igwugwu hite nu Nnwọ a.

¹⁴ Nhne obula anu rioru nu ẹwhna m, m jeeme a.

*Jizōsi kweru mkwna**Enine Nso*

¹⁵ “O buri nū anū whnurnu m n'anya, anū jaabita nhne me nyernu n'iwu.

¹⁶ M jaarijasno Nda m, o jeenye anū Nye Okasi Mkpoma berere, nye jaadazinu anū tim tom.

¹⁷ O bu Enine ezi oka, ke owa jaanahjali, kwnornu nū ele zi n'owa nwée rikne whnū a mōbu mahia a. Kovu anū magwu a, kwnornu nū o wu nū rime anū, o jaadazigidnenu anū.

¹⁸ M jaagharu anū etekne, m jeehiehnakwnusi anū.

¹⁹ Ige mati owa jowhnu m, kovu anū jowhnu m. M zi m budnu, kam kpayarū anū jaazi masi budnu.

²⁰ N'obochi wam, anū jaamahia nū m zi m nū rime Nda m, anū nū rime m, lele kpa me zi nū rime anū.

²¹ “Nye obula ke jaabita nhne me nyernu n'iwu, bu nye whnurnu m n'anya. Nye whnurnu m n'anya bu nye Nda m jowhnu n'anya, m jowhnu masi a n'anya, gweru ehni m gesi a.”

²² Judasi (o buo Isikarioti) kaa, “Nyenwe ai, ndaa kpa i jeegesi ai ehni i, o buo ele owa?”

²³ Jizosi saru a, “Nye obula ke whnurnu m n'anya, jaabita ikwu-onu m. Nda m jowhnu a n'anya, me nu Nda m jaavakwnusi a, ai nu ya jowu.

²⁴ Nye obula ke whnuge m n'anya, jaabita ikwu-onu m. Ikwu-onu ke anū nurnu buo ke m. Be hi n'aka Nda m, nye ziyaru m.

²⁵ “M naakanu anū ka kpa me nu anū zi.

²⁶ Kovu Nye Okasi Mkpoma wam, Enine Nso, nye Nda m jeeziyanu anū nū rewhna m, jeezni anū kpakara nhne. O jeeme anū chenwanya kpakara nhne me znirni anū.

²⁷ M neesigbasinu anū udno, m neenye anū udno m, o buo lele kpa owa neenye bu kpa me neenye anū. Mkpoma lakwadia anū mini. Anū tuko ogwnu.

²⁸ “Anū nurnu kpa me karu nū m jaala, kovu m jeehiehnakwnusi anū. O buri nū anū whnurnu m n'anya, anū znernu onwudna, kwnornu nū m naalakwnusi Nda m, kwnornu nū Nda m kakwo m.

²⁹ M kannu m anū kitna hne o yeemege, ma nga o jeeme anū kweru.

³⁰ M jaakanu anū agida oka berere, kwnornu nū nye neechi owa ka vawa. Kovu o nwée rikne hne me zi.

³¹ Kovu owa jaamahia nū m whnurnu Nda m n'anya, bu nhne kpayarū me neeme kpakara nhne lele kpa o nyernu m iwu. Anū va ma a whoga hna.

15*Isisi vaini nu nkala a*

¹ “Mawa bu isisi vaini n'ezi, Nda m bu nye ernu ekwu.

² Nkala obula ke mige mkpuru nū rime m, o gbukwama a. O kwnasna nkala obula ke naami mkpuru ma o minya agida mkpuru, ma o ziri richna.

³ Anū zi richna hite n'ikwu-onu me kwuru.

⁴ Anū dazigidne nū rime m, me nū rime anū. O za nkala ke nwernu rikne mi mkpuru n'ehni a, okwolem ma o zi n'isisi, otu aka wam, anū nwée rikne mi mkpuru, okwolem ma anū dazigidnenu nū rime m.

⁵ “Mawa bu isisi vaini, anūwa bu nkala a. Nye obula ke jaadazigidne nū rime m, me nū rime a, jaami agida mkpuru, kwnornu nū anū nwée rikne meli nhne obula hne me zila.

⁶ Nye obula ke dazigidnenu nū rime m, be jootuwu a lele nkala ke mige mkpuru. O kpōnwu, ele badnu chikota kpōrne a nū bekwnu.

7 Q þúru nú anu dazigidne nú rime m, ikwu-önu m dazigidne nú rime anu, anu jöorio nhne öbula zi anu mkpa, ö jöoburu ke anu.

8 Ka þú nhne neenye Nda m igwugwu, anu minya agida mkpuru, ke jeegesi nu anu þú ele sno apna m.

9 “Lele kpa Nda m whnuru m n'anya, þú kpa me whnuru anu n'anya. Anu dazigidne n'öwhnun'anya m.

10 Q þúru anu þita nhne me nyernu n'iwu, anu jaadazigidne n'öwhnun'anya m, lele kpa me þitaru nhne Nda m nyernu n'iwu, m dazigidne n'öwhnun'anya a.

11 M naakanu anu nhne ka ma ovu öso n'önu m ziri nu rime anu, ma ovu öso n'önu anu zu ozu.

12 Ka þú nhne me nyernu n'iwu, anu whnurita ibne anu n'anya lele kpa me whnuru anu n'anya.

13 Q zá öwhnun'anya ke kakwo ka, nu badnu tuwhuru budnu a kwnornu ele enyi a.

14 Anu þú ele enyi m, ö þúru nú anu mee nhne me nyernu n'iwu.

15 M zá m noosukwu anu ele izi berere, kwnornu nu nnwö izi máa nhne nyenwe a neeme. Kövu m sukwuru m anu ele enyi m, kwnornu nu kpakara nhne me nurnu n'önu Nda m þú nhne me kannu anu.

16 Q búo anu höhiaru m, kövu me höhiaru anu, þita anu ichne, ma anu zne minya mkpuru, ma mkpuru anu dazigidne. Ka jeeme, nhne öbula anu jöorio Nda m nu rewhna m, ö jeenye anu.

17 Ka þú nhne me nyernu n'iwu, anu whnurita ibne anu n'anya.

Öwa snornu ele sno apna

Jizösi irno

18 “Q þúru n'öwa sno anu irno, anu chenwanya nu ö beru ösno sno m irno.

19 Q þúru nú anu þú ke öwa, öwa jöowhnu anu n'anya lele nhne ke a. Kövu m höhiaru m anu hite n'öwa, anu búo ke öwa, ka kpayaru öwa snornu anu irno.

20 Anu chenwanya nhne me kannu anu, Q zá öhi ke kakwo nyenwe a. Q þúru nu be kpakarnu m ehni, be jaakpakna anu ehni masi. Q þúru nu be þitaru ikwu-önu m, be jaabita ke anu.

21 Be jeeme anu kpakara nhne ka kwnornu nu anu kweru nu rewhna m, be máa nye ziyaru m.

22 Q þúru nú m váge m kwunu be öka, ikpe mmehie báamana be. Kítna be jeeji kini göhoru ehni be hite nu mmehie?

23 Nye öbula ke snornu m irno, snornu Nda m irno.

24 Q þúru nu m rnüge m ernu n'esilawuru be ke ö zá nye berere rnurnu, ikpe mmehie báamana be. Kítna be whnuru nhne me rnurnu, be sno me nu Nda m irno.

25 Ka þú ma nhne be gbaru n'ökukwo nsö mezu, ‘Be snornu m irno hne ö zá nhne me mernu be.’

26 “Nga Nye Okasi Mkpoma wam varu. Enine ke ezi öka, Nye me jeeziya hite nu hne Nda m zi, nye hi hne Nda m zi va, ö jaagbanu m akebne.

27 Anu jöobu masi ele akebne m kwnornu nu me nu anu zi hite n'öpanizo.

16

1 “M kannu m anu kpakara nhne ka ö zi anu dnahnala hite n'ökwnata ovu anu.

2 Be jaachihala anu n'öro ögbako ele Ju, ige vawa nga nye öbula ke gburu anu jeeche nu ö nöornu ernu Chiokike.

3 Be jeeme anụ nhne nụ kpa kwnornu nụ be máa Nda m mọbu me.

4 M kannụ m anụ nhne ele ka, ma nga be jeeme anụ chenwanya nụ m kannụ m anụ nhne gbasiri be. M káge m be nụ mọm kwnornu nụ me nụ anụ zị.

Ernu ke Enine Nso

5 “Kítna, m naalahna hne nye ziyaru m zị. Kọvu ọ zá nye n'esilawuru anụ n̄esikwa m, ‘Ndaa hne i neezne?’

6 Kítna me kannụ anụ, o noogbu anụ igbugbu nụ mkpọma.

7 Kọvu me kanụ anụ ezi ọka, ọ kanụ anụ mma me lahna, kwnornu nụ ọ bụru m láge m, Nye Ọkasi Mkpọma wam jáavakwnusi anụ. Kọvu me la, m jeeziyanu anụ ya.

8 Nga ọ varụ, ọ jaabanụ ọwa mbna kwnornu mmehie, nụ ome mma nụ ikpe.

9 Ọ jaabanụ ọwa mbna gbasiri mmehie, kwnornu nụ be kwége nụ me,

10 gbasiri ome mma, kwnornu nụ m naalakwnusi Nda m, anụ jọowhnuma m anya berere,

11 gbasiri ikpe, kwnornu nụ ikpe hieru nye risi n̄echi ọwa ka.

12 “Agida nhne zị ke me jaakanụ anụ, kọvu anụ j̄eenwe rikne vuru be kítna.

13 Kọvu nga Enine ezi ọka wam varụ, ọ jooduru anụ bna nụ kpakara ezi ọka. O jókwa nhne aka ke a, kọvu kpakara nhne ọ j̄onu bu nhne ọ jaakanụ anụ. Ọ jaakanụ anụ nhne ke jaava nụ ruwhnu.

14 O jeenye m igwugwu kwnornu ọ jeegweru nhne me kwuru kanụ anụ.

15 Kpakara nhne Nda m nwernu bu ke m. Ọ bu nhne me jiri kaa nụ Enine Nso jeegweru nhne ke m kanụ anụ.

Nhne igbugbu nụ snarnjima

16 “Ige matị anụ j̄owhnu m berere, omekwo, ige matị anụ j̄owhnu m.”

17 Agwna ele sno apna a n̄esikwarita ibne be, “Kini bu risi nhne ka? Ọ karụ, ‘Ige matị anụ j̄owhnu m, ige matị anụ j̄owhnu m,’ berere, ‘M naalakwnusi Nda m.’”

18 Be n̄esikwarita ibne be, “Kini bu ige matị? A máa nhne o nookwu ọka a.”

19 Jizọsi whnrnu nụ be noopio ọ s̄ikwa a, ọ kanụ be, “M karụ m ige matị anụ j̄owhnu m, omekwo, ige matị anụ j̄owhnu m. Ọ bu nhne anụ n̄esikwarita n'esilawuru anụ?

20 Me kanụ anụ ezi ọka, anụ jaakwna ẹkwna, gba mkpe, kọvu ọwa j̄onwudna. Anụ j̄eenwe nhne igbugbu, kọvu nhne igbugbu anụ j̄ogho ovu ọso n'onu.

21 Nga nyerinya n̄omu nnwọ, ọ zị nụ nhne igbugbu kwnornu nụ rime neeme a, kọvu nga ọ m̄dnarnu nnwọ, ọ chezu kpakara nhne igbugbu a, kwnornu snarnjima nụ ọ m̄rnu nnwọ ikne n'owa.

22 Kpam masi, anụ nwernu nhne igbugbu kítna, kọvu m j̄owhnu anụ anya berere, anụ j̄eenwe snarnjima, ọ zá nye j̄eenwe rikne nahoru anụ ovu ọso n'onu anụ.

23 N'ọbochi wam, anụ j̄orio m nhne ọbula, me kanụ anụ ezi ọka, Nda m j̄eenye anụ nhne ọbula anụ j̄orio a nụ r̄ewhna m.

24 Tem d̄u kítna, ọ zá nhne ọbula anụ r̄ioru nụ r̄ewhna m. Anụ r̄io, anụ jenweh̄ia, ma ovu ọso n'onu anụ zu ozu.

Mmeri megidne ọwa

25 “M ji m elulu kwunu anụ ọka, ige vawa nga me j̄ókwunu anụ ọka n'elulu berere. M j̄ókwunu anụ ọka zị snam nhne gbasiri Nda m.

26 N'ọbochi wam, anụ j̄orio nhne nụ r̄ewhna m, m jáakaa nụ m j̄orio Nda m nụ risi anụ.

²⁷ Kwnornu nù Nda m n'iwihuru a whnurnu anù n'anya, kwnornu nù anù whnurnu m n'anya, anù kweru nù m hi m hne Chiokike zì va.

²⁸ M hi m hne Nda m zì va bna n'owa, kítna, m n'èsigbasi owa naalahna hne Nda m zì."

²⁹ Ele sno apna a kaa, "Kítna, ì nookwunu aì oka dnornu aì anya, ì zá nookwu n'elulù.

³⁰ Kítna a magwu nù ì magwu kpakara nhne. O zá mkpa nù nye obula síkwa ì aji. Ka mernu a kweru nù ì hi hne Chiokike zì va."

³¹ Jizòsi sarù be, "Anù kweru kítna?"

³² Ige vawa, ige wam valèm, nga be jèchisa kpakara anù, nye obula n'oro ke a. Anù jèsigbasi me nù nsnunu m, kovu m zá m nù nsnunu m, kwnornu nù me nù Nda m zì.

³³ "M kannù m anù nhne ka ma anù nwe udno nù rime m. N'owa anù jeenwe mmekpèhni, kovu mkpoma si anù rikne, m megbulem owa."

17

Jizòsi kpennu ele sno apna a okpukpe

¹ Nga Jizòsi kwukworu oka ele ka, o lelizò anya n'oligwe, kaa, "Nda m, ige wam valèm, nyee Nnwò ì igwugwu, ma Nnwò ì nyee ì igwugwu.

² I nyernu a iknernema nù hne kpakara ele badnù zì, ma o kesi kpakara ele ke ì nyernu a budsonu kwó okwo.

³ Ka bù budsonu kwó okwo, ma ele badnù mahia ì, ì bù otu Chiokike ke bù ezi, nù Jizòsi Karaìsi nye ì ziyarù.

⁴ M nyernu m ì igwugwu n'owa hite n'ornukpa ernu ì nyernu m me rnù.

⁵ Kítna Nda m, nyee m igwugwu nù ruwhnu ì, bù igwugwu ke me nwernu sù ì kpuru owa.

⁶ "M mernu ele badnù mahia rewhna ì bù ele ì nyernu m hite n'owa. Be bù ele ke ì. Jì nyernu m be. Be bítaru ikwu-ònu ì.

⁷ Kítna, be magwu nù kpakara nhne ì nyernu m hi n'aka ì va.

⁸ M nyernu m be ikwu-ònu ke ì nyernu m. Be gweru a, be magwu n'ezì nù m hi m hne ì zì whùya, be kweru nù jì ziyarù m.

⁹ M neekpenu be okpukpe. M zá m neekpenu owa okpukpe, kovu ele wam ì nyernu m, kwnornu nù be bù ke ì.

¹⁰ Kpakara nhne me nwernu bù ke ì, kpakara nhne ì nwernu bù ke m masì, be bù igwugwu m.

¹¹ M zìma m n'owa berere, kovu be zì n'owa, m naavakwnusi ì, Nda zì nso, bijkwata be hite nù rikne ke rewhna ì, rewhna ke ì nyernu m, ma be zìri n'otu lele kpa a zì n'otu.

¹² Nga me nù be zì, m bítaru m be nù rewhna ì, bù rewhna ke ì nyernu m, m segidnèrnù m be. O zá nye whuru owu nù rime be, okwokolam nye wam whuzne owuzne, ma nhne be gbarù n'okwukwo nso mezu.

¹³ "M naavakwnusi ì kítna, m nookwu nhne ka n'owa ma be nwernu ovu oso n'ònu m, ma ovu oso n'ònu be zu ozu.

¹⁴ M nyernu m be ikwu-ònu ì, owa snornu be irno kwnornu nù be búo ke owa, lele kpa me búo ke owa.

¹⁵ M zá m naakaa jì gweme be n'owa. Kovu m n'òrio ì ma ì bítà be zòma n'aka nye ojo wam.

¹⁶ Be búo ke owa, lele kpa me búo ke owa.

¹⁷ Bítà be nso hite n'ezì oka ì, ikwu-ònu ì bù ezi oka.

18 Lele kpa i ziyaru m n'owa, bu kpa me neezizne be n'owa.

19 M kwnornu be bita enni m nso, ma be bita be nso n'ezi oka.

20 “M za m neekpenu be okpukpe kpoi, kovu m neekpekotanu ele jeekweru nu me hite n'ikwu-onu be.

21 M neekpe ma kpakara be ziri n'otu, Nda m, lele kpa i zi nu rime m, me nu rime i. Kpakara be ziri n'otu ma owa kweru nu ji ziyaru m.

22 M nyernu m be igwugwu ke i nyernu m, ma be ziri n'otu lele kpa a zi n'otu.

23 Me ziri nu rime be, ji nu rime m, ma be zu ozu n'ozu n'otu, ma owa mahia nu ji ziyaru m, nu i whnrnu be n'anya lele kpa i whnrnu m n'anya.

24 “Nda m, ji nyernu m be, m noopio be daziri hne me zi, ma be whnu igwugwu m, ka bu igwugwu ke i nyernu m kwnornu nu i whnrnu m n'anya si i kpuru owa.

25 “Nda ke mee mma, owa ma a nye i bu, kovu m magwu m nye i bu, ele ka magwu masi nu ji ziyaru m.

26 M mernu m be mahia i, m jaazi neeme kpam ma owhnun'anya ke i whnrnu m ziri nu rime be, ma me nu be buru otu.”

18

Be nwudneru Jizosi

(*Mat 26:47-56; Mak 14:43-50; Luk 22:47-53*)

1 Nga Jizosi kpekworu okpukpe ka, ya nu ele sno apna a whoga whe mini Kidironi. Be bna n'otu ekwu ke zi pi.

2 Judasi nye reru a magwu pi, kwnornu nu Jizosi nu ele sno apna a neezne pi i ge obula.

3 Judasi zhiri ele ogwnu nu ele neese Oro Nso Chiokike, ele ele risi ariohna nu ele Farisi zizneru, be vu tonji nu owa, nu mgwna ogwnu.

4 Kpa Jizosi magwu kpakara nhne jaadnakwasu a, o zneknwusi be, sikwa be, “Anu noopio nyele?”

5 Be kaa, “Jizosi, nye Nazareti.”

Jizosi kaa, “O bu mawa.” Judasi nye reru a nu be gwuzo.

6 Nga Jizosi karu, “O bu mawa,” Be lahna aznu, dna n'eli.

7 Jizosi sikwa kwno be, “Ndaa nye anu noopio?”

Be kaa, “Jizosi, nye Nazareti.”

8 Jizosi kanu be, “M kanu m anu nu me bu ya. O buru nu anu noopio m, anu gharu ele ka ma be la.”

9 Ka bu ma nhne o kwuru mezu, “Kpakara ele i nyernu m, o za otu ke me tuwhuru.”

10 Saimoni Pita ji ama-ogwnu, o mniohna a, gbu nye izi nye risi ariohna, bihala a nsn akarikwnunga. Rewhna nye izi wam bu Makosi.

11 Jizosi kanu Pita, “Mniohnasi ama-ogwnu i n'obo a. O bu nu m jonwo okiko awhnuwhnu Nda m nyernu m me nwo?”

Jizosi gwuzo nu

ruwhnu Anasi

(*Mat 26:57,58; Mak 14:53,54; Luk 22:54*)

12 Ele ogwnu nu nye risi be, nu ele neese Oro Nso Chiokike nwudne Jizosi, be kne a eriri.

13 Be beru osno gwezne a nu ruwhnu Anasi, nda nnwerne Kayafasi, nye risi ariohna n'awha wam.

14 O bu Kayafasi nye kanu ele Ju nu o buru oma otu badnu nuhianu kpakara be enwu.

*Pita gónahoru Jizósi**(Mat 26:69,70; Mak 14:66-68; Luk 22:55-57)*

¹⁵ Saimoni Pita nù nye sno apna Jizósi ke berere snornu Jizósi. Nye risi aríohna magwù nye sno apna a ka, o snornu Jizósi bna n'ederezi nye risi aríohna.

¹⁶ Kòvu Pita dazìri nù ngeri mgbo n'ederezi, nye sno apna wam ke nye risi aríohna magwù zne kanù nnwò rinya zì n'ònu-mgbo, o kwubnanya Pita.

¹⁷ Nnwò rinya zì n'ònu-mgbo kanù Pita, "Ì bụ otu nù rime ele sno apna nwerukna ka."

Pita sarù, "M búla m."

¹⁸ Iyi nòotu, ele izi nù ele neese nhne kpawhùsi bèkwnu, be gwuzoru gburugburu bèkwnu wam naakwna iyi. Pita gwuzo masì n'esilawùru be, naakwna iyi.

*Nye risi aríohna**nèesikwa Jizósi ajiji**(Mat 26:59-66; Mak 14:55-64; Luk 22:66-71)*

¹⁹ Nye risi aríohna síkwa Jizósi ajiji gbasìri ele sno apna a, nù nhne o neezni.

²⁰ Jizósi sarù a, "M kwuru m òka nù ogbo òhna, kpakara nhne me znirni bụ n'òro ògbako ele Ju nù n'Òro Nsò Chiokike hne kpakara ele Ju naagbakò. Ò zà nhne me kwuru nù mgwùgwa.

²¹ Ì síkwa m ajiji, síkwa ele nùrnu nhne me kwuru. Be magwù masì nhne me kwuru."

²² Nga Jizósi kwuru ka, otu nye neese nhne gbò a aka, kaa, "Kìni mernu ì nookwunu nye risi aríohna òka kpa?"

²³ Jizósi sarù a, "Ò búrù nù m kwuru m nhne búo òma, gba akebne nhne ojo me kwuru. Kòvu ò búrù nù m kwuru m ezi òka, kìni mernu ì gbòru m aka?"

²⁴ Anasì zizne a ke Kayafasì nye risi aríohna, hne o kne kòriri eriri.

*Pita gónahoru Jizósi**berere**(Mat 26:71-75; Mak 14:69-72; Luk 22:58-62)*

²⁵ Kpa Saimoni Pita gwuzo naakwna iyi, be síkwa a, "Ì búo otu nù rime ele sno apna a sa?"

Pita gò, kaa, "M búla m."

²⁶ Otu nù rime ele izi nye risi aríohna nwene nwerukna wam Pita bihalaru nsnì a, gwelizò ònu, síkwa a, "Ò búo jì nye me whnùrnu n'èkwu wam?"

²⁷ Berere kwno, Pita gò, ngangam, okne òchichi kwana èkwana.

*Jizósi gwuzo nù**ruwhnu Paìleti**(Mat 27:1,2,11-14; Mak 15:1-5; Luk 23:1-5)*

²⁸ Be hi n'òro Kayafasì kwuru Jizósi zne n'òbna nye òchichi, n'ònu òsisi. Ele Ju bnàna nù rime n'òbna kwnornu nù be noopio ò bíta èhni be rìchna ma be nwe rikne ri Iriri Ògawhe.

²⁹ Paìleti whòkwnusi be n'ederezi síkwa be, "Ndaa nhne anù noobno nwerukna ka?"

³⁰ Be sarù a, "Ò búrù nù ò búo nye aghorome, a znéne okwuyanù ì ya."

³¹ Paìleti kaa, "Anù kwuru a kpe a ikpe lele kpa iwu anù kwuru."

Be kaa, "A nwéee rikne gbu nye òbula."

³² Ka bụ ma nhne Jizósi kwuru mezu ke gbasìri òkpa ènwu ò jòonwu.

³³ Paìleti lahna n'òbna, síkwa Jizósi, "Ì bụ eze ele Ju?"

³⁴ Jizósi síkwa a, "Kì ò bụ echiche ì, sòbu ele berere kannù nhne gbasìri m?"

³⁵ Pāletì sa a, “M bụ nye Ju? Ọ bụ ele ke i nụ ele risi arīohna be kwuyannụ m jì. I mernu k̄ini?”

³⁶ Jiz̄osi kaa, “Èlì-eze m b̄uo ke ọwa ka. Ọ b̄uru n̄ụ ọ b̄u ke ọwa ka, ele izi m znernu ọlu ọgw̄nu ma ele risi ele Ju ghar̄u o gweru m nyee n'aka be. Ọ zá, èlì-eze m b̄uo ke ọwa ka.”

³⁷ Pāletì s̄ikwa a, “Ke b̄u n̄ụ ì b̄u eze?”

Jiz̄osi sar̄u a, “J̄iwa kar̄u n̄ụ m b̄u m eze. Ka b̄u risi nhne be kwnornu m̄u m n̄ụ nhne me kwnornu va n̄ụ rime ọwa, ma m gban̄u m ezi ọka akebe. Nye ọbula ke z̄i n'ezì ọka noobnonu m nsn̄i.”

³⁸ Pāletì s̄ikwa a, “K̄ini b̄u ezi ọka?”

Be marn̄u Jiz̄osi ikpe enwu

(Mat 27:15-31; Mak 15:6-20; Luk 23:13-25)

Pāletì wh̄okwnusi kwno ele risi ele Ju n'ederezi kan̄u be, “Ọ zá nhne ọjọ me wh̄n̄urnu n̄ụ rime nwerukna ka r̄ia r̄ia.

³⁹ Ọ b̄u omen'èlì an̄ụ me sigbasinu an̄ụ otu nye ikelu n'ige Iriri Ọgawhe. An̄ụ pioru me sigbasinu an̄ụ eze ele Ju?”

⁴⁰ Kpakara be siwama, “Ọza, ọ b̄uo nwerukna ka, sigbasinu āi Barabasī.” (Barabasī b̄u nye buznu.)

19

¹ Pāletì kwuru Jiz̄osi pn̄ia nhne.

² Ele ọgw̄nu kpa okpu igw̄nu kpusi a n̄ụ risi, be wosi a iwo odno odno.

³ Be znekwnusi a, kaa, “A bekwulem jì, Eze ele Ju.” Be gb̄o aka n̄ụ ruwhnu.

⁴ Pāletì lahna kwno hne ele risi ele Ju z̄i, ọ kan̄u be, “An̄ụ le, m jookwuyanu an̄ụ ya, ma an̄ụ marn̄u n̄ụ ọ zá nhne ọjọ me wh̄n̄urnu n̄ụ rime a.”

⁵ Jiz̄osi woru iwo odno odno n̄ụ okpu igw̄nu wh̄uya ederezi, Pāletì kan̄u be, “An̄ụ le nwerukna wam.”

⁶ Nga ele risi arīohna n̄ụ ele neese Oro Ns̄o Chiokike wh̄n̄urnu a, be siwama, “Kp̄ogidne a n'ogba, kp̄ogidne n'ogba.”

Pāletì kan̄u be, “An̄ụ kwuru a kp̄ogidne a n'ogba n'aka an̄ụ. K̄ovu me kan̄u an̄ụ, ọ zá nhne ọjọ me wh̄n̄urnu n̄ụ rime a.”

⁷ Ele risi ele Ju kwusi rikne, “A nwernu iwu, iwu āi kwuru n̄ụ o kwesiri ẹnwu kwnornu n̄ụ ọ kan̄u n̄ụ ọ b̄u Nnw̄o Chiokike.”

⁸ Nga Pāletì n̄urnu ka, ọ t̄u ọgw̄nu k'aḡida.

⁹ Ọ lahna kwno n'obna, ọ s̄ikwa Jiz̄osi, “Ndaa hne i hi va?” K̄ovu Jiz̄osi s̄ala a ọka ọbula.

¹⁰ Pāletì kan̄u a, “Ì zá naasa m ọka, ọ b̄u n̄ụ ì máa n̄ụ m nwernu m rikne ọ sigbasi ì m̄obu ọ kp̄ogidne ì n'ogba?”

¹¹ Jiz̄osi kaa, “Ì b̄eenwene rikne megidne m ọ b̄uru n̄ụ be nyéne ì rikne hite n'oligwe, nye kwuru m nyee n'aka ì nwe mmehīe ke k̄akwo.”

¹² Nga Pāletì n̄urnu ka, ọ gbal̄i ọ sigbasi Jiz̄osi. K̄ovu ele risi ele Ju si ọlo, “Ọ b̄uru n̄ụ ì sigbasi a, ì b̄uo enyi Siza. Nye ọbula ke neeme ẹn̄ni a eze neemegidne Siza.”

¹³ Nga Pāletì n̄urnu nhne ka, o kwuhala Jiz̄osi ederezi, daz̄iri èlì n̄ụ ngadna n̄ụ hne be jiri akaworugwu mee, be kwu n'ọnu Hiburu Gabata.

¹⁴ Nhne ka mernu n'iw̄hnehnie, n'otnu-ige ke nri n̄ụ ẹbo* n'ọbochi oj̄ikn̄ernu Ọgawhe.

Pāletì kan̄u be “An̄ụ le eze an̄ụ.”

¹⁵ Be siwama, “Gwepu a, gwepu a, kp̄ogidne a n'ogba.”

* **19:14** Otnu-ige ke nri n̄ụ ẹbo: ọkwukwo ke mb̄om kwuru ige awa ke isunu

Païleti sïkwa be, “Me kpogidne eze anụ n’ogba?”

Ele risi ariohna sarụ a, “A nwée eze berere kwolem Siza.”

¹⁶ Païleti nyewhete be Jizọsi, ma be kpogidne a n’ogba.

Be kpogidneru Jizọsi n’ogba

(Mat 27:32-44; Mak 15:21-32; Luk 23:26-43)

Ele ogwnu kwuru Jizọsi.

¹⁷ Jizọsi voru ogba a, ọ whoga zne hne be kwu Hne Okpokoro Risi (ke bu n’onu Hiburu Golugota.)

¹⁸ Be kpogidne a n’ogba pii, ya nu ele rukna lawuru berere, otu badnu n’akarikwnunga a, nye ke berere n’akarita a. Jizọsi ziri n’esilawuru be.

¹⁹ Païleti gbasiri nhne be jogwnu tukwasi a n’olu ogba a, “Jizọsi, nye Nazareti, Eze ele Ju.”

²⁰ Agida ele Ju gwnuru a, kwnornu nu hne be kpogidneru Jizọsi n’ogba zila ikere nu rime eli-ohna. Be gbaru nhne ogwnugwnu wam n’onu Hiburu, Latini nu Giriki.

²¹ Ele risi ariohna ele Ju kanu Païleti, “I gbasi ‘Eze ele Ju,’ kovu gbasị, ‘Nwerukna ka karu nu ọ bu eze ele Ju.’”

²² Païleti saru be, “Nhne me gbaru dazim kpa me gbaru a.”

²³ Nga ele ogwnu kpogidneru Jizọsi n’ogba, be gweru kpakara iwo a keru n’esilawuru be, keme be nga eno, be gweru a otu otu. Be chiri iwo olu a ke be dowala odowa be duru hi n’olu du n’eli.

²⁴ Be kaa, “A jodowa iwo ka, kovu a joovu ogbanuchi ma a mahia nye jeenwe a.” Ka bu ma nhne be gbaru n’okwukwo nsọ mezu, ke kwuru, “Be keriri kpakara iwo m n’esilawuru be,

be ji iwo m vu ogbanuchi.”

Ka bu nhne ele ogwnu wam mernu.

²⁵ Ele gwuzo ndundu nu hne ogba wam zi bu nne Jizọsi nu nwene rinya nne a, nu Meri nnwerne Kilopasi, nu Meri Magidalini.

²⁶ Nga Jizọsi whuru nne a nu nye sno apna a wam ọ whuru n’anya, ọ kanu nne a, “Nwerinya, le nnwo i.”

²⁷ Ọ kanu nye sno apna a wam, “Le nne i.” Hite n’ige wam, nye sno apna a wam kwuru a la n’oro a.

Enwu Jizọsi

(Mat 27:45-56; Mak 15:33-41; Luk 23:44-49)

²⁸ Kpa Jizọsi magwu nu be mezulem kpakara nhne, o mee ma nhne be gbaru n’okwukwo nsọ mezu, ọ kaa, “Akpiri nokpo m bekwnu.”

²⁹ Otu idudu manya gbaru oka zi pi, be rusi sponji nu rime a, knesi a nu nkala hisopu, gwelizo nu mgbele-onu Jizọsi.

³⁰ Kpa Jizọsi nworu manya wam, ọ kaa, “Okwolem.” Ọ piaya risi a nwuma.

*Be duru Jizọsi ara
nu ikpurutu*

³¹ Nhne ka mernu n’obochi ojikneru, ke bu obochi ke sno Obochi Ozukwa Inwe. Ọ masila ele risi ele Ju ọ sigbasi iznu be n’olu ogba n’Obochi Ozukwa Inwe kwnornu nu ọ bu okne obochi. Be riasno Païleti ma be gbaji kpakara be ochi ma be vudna iznu be n’olu ogba.

³² Ele ogwnu wam zne gbaji ochi nye ke mbom nu nye ke berere ele be kpogidneru be nu Jizọsi n’ogba.

³³ Kovu nga be vaduru hne Jizọsi zi, be whuru nu ọ nwunam, be gbajile ochi a.

³⁴ Otu nye ọgwu gweru ara ụ Jizọsi nụ ikpurutu, ngangam, ọvna nụ mini gbahịa.

³⁵ Nye wam ke whnuru nhne ka gbarụ akebne, akebne a bụ ezi ọka. Ọ magwu nụ o nookwu ezi ọka ma anụ kweru.

³⁶ Kpakara nhne ka mernu ma nhne be gbarụ n'okwukwo nsọ mezu, “Be jáagbaji otu ọkpukpu a.”

³⁷ Nhne be gbarụ n'okwukwo nsọ ke berere kwuru, “Ele badnụ jeele anya nye wam be ọuru ara.”

Be liri Jizọsi

(Mat 27:57-61; Mak 15:42-47; Luk 23:50-56)

³⁸ Omekwo, Josefu nye Arimatiya, zne rjọ Paileti ma o vuru iznu Jizọsi. Josefu bụ nye sno apna Jizọsi nụ mgwu, kwnornu nụ ọ nọtu ogwu ele Ju. Paileti kweru, ọ va vuru iznu a whoga.

³⁹ Nikodimosi nye znekwnusiri Jizọsi n'abalị, snornu Josefu, o gweya mọno nweru ẹknarna oma be gwaru nhne be kwu maa nụ alosi, zị agida.

⁴⁰ Ele rukna lawuru ka vuru iznu Jizọsi, whu a n'ikpe marnu mma nụ mọno wam, kwnornu nụ kpam bụ kpa ele Ju neeme iznu si be li.

⁴¹ Otu ẹkwu zị ndundu hne be kpogburu Jizọsi, otu ilili be gwuru ikne zị nụ rime ẹkwu wam, ọ zā nye be liru nụ rime a nụ mbom.

⁴² Kwnornu nụ ọ bụ ọbochi ojiknenu Ọbochi Ozukwa Inwe ele Ju, ilili wam zị masi ndundu, be lite Jizọsi nụ rime a.

20

Ilili ke ọ zā nye zị a

(Mat 28:1-8; Mak 16:1-8; Luk 24:1-12)

¹ N'onu osisi n'ọbochi mbom n'ikwezu, ọ gba koriri ọchichiri, Meri Magidalini znenu ilili wam whnụ nụ be vumenem rugwu be jiri kpusni onu ilili wam.

² Ọ gba eso znekwnusi Saimoni Pita nụ nye sno apna a wam Jizọsi whnuru n'anya. Ọ kanu be, “Be vumenem iznu Nyenwe a n'ilili, a ma hne be bitaru a.”

³ Pita nụ nye sno apna a wam whoga, neezne n'ilili.

⁴ Be lawuru bete agba eso, kovu nye sno apna a kiyari gbawhe Pita, beru Pita osno gbadu ilili.

⁵ O whudnahie eli whnụ ikpe marnu mma wam, kovu ọ bnage nụ rime.

⁶ Saimoni Pita va, bna nụ rime ilili. Ọ whnuru ikpe marnu mma wam dazi etekne,

⁷ n'ikpe be jiri whu risi Jizọsi, ya nụ ikpe be piakotaru be n'otu ichne.

⁸ Nye sno apna a wam ke beru osno va, bna nụ rime ilili, ọ whnuru, kweru masi.

⁹ (Be ghoyage nhne be gbaru n'okwukwo nsọ, nụ o jeehi n'enwu lizo.)

¹⁰ Ele sno apna a wam lahna.

Jizọsi gesiri Meri Magidalini

ehni a

(Mat 28:9,10; Mak 16:9-11)

¹¹ Kovu Meri gwuzoru n'ederezị ilili wam naakwa ẹkwu. Kpa ọ naakwa ẹkwu, o whudnahie le anya nụ rime ilili wam.

¹² Ọ whnụ ele enine izi lawuru wogu iwo abochna dazi eli nụ hne iznu Jizọsi zị nụ mbom, otu nụ risi a, otu n'ochi a.

¹³ Be sikwa a, “Nwerinya, kini neeme i ẹkwu?”

Ọ kaa, “Be vumenem Nyenwe m, m maam hne be vubiri a.”

14 Nga o kwuru ka, o tũhnasna whnũ Jizõsi, kõvu o máa nũ o bũ Jizõsi.

15 Jizõsi sũkwa a, “Nwerinya, kĩni neeme i ẽkwna? Ndaa nye i noopio?”

Meri che nũ o bũ nye ẽrnu ẽkwnu, o kaa, “Nda-ai-kwu, o buru nũ o bũ jĩ vumernu a, kanũ hne i vubiri a, m jeezne vuru a.”

16 Jizõsi sukwa a, “Meri.”

Meri tũhnasna, kete a ruwhnu, siwama n'õnu Hiburu, “Raboni!” (ke bũ Nye-zni-nhne).

17 Jizõsi kanũ a, “I kpákwadia m aka, kwnornu nũ m yáalakwnuznege m Nda m. Kõvu znekwnusi rũmu nda m, kanũ be m naalakwnusi Nda m nũ Nda anũ, nũ Chiokike m nũ Chiokike anũ.”

18 Meri Magĩdalini zne kanũ ele sno apna a nũ o whnũrnu Nyenwe ai, nũ ka bũ nhne o kanũ a.

Jizõsi gesiri ele sno apna a

ẽhni a

(Mat 28:16-20; Mak 16:14-18; Luk 24:36-49)

19 N'ogbednachi, n'õbõchi mbõm wam n'ikwezu, ele sno apna a gbakõru n'otu o ro tũgidne ẽhni be õnuhna, kwnornu be nõotu ogwnu ele risi ele Ju. Jizõsi varũ gwuzoru n'esilawũru be, kaa, “Udno zĩnu anũ.”

20 Nga o kwuru ka, o gesi be aka a lawũru nũ ikpurutu a. Mkpõma sõ ele sno apna a n'õnu kpa be whnũrnu Nyenwe ai.

21 Jizõsi kaa kwno berere, “Udno zĩnu anũ, lele kpa Nda m ziyaru m, o bũ kpa me neezni anũ.”

22 Nga o kwuru ka, o nyesi be inwe, kaa, “Anũ nahõru Enine Nsõ.

23 O buru nũ anũ gbarũnu ele badnũ mmehie be, be jaagbarũnu be mmehie be, kõvu o buru nũ anũ jáagbarũnu be, be jáagbarũnu be.”

Jizõsi nũ Tõmosi

24 Otu nũ nri nũ badnũ lawũru wam sno apna Jizõsi, nye rẽwhna a bũ Tõmosi, nye be kwu Didimõsi nũ be zĩla nga Jizõsi varũ.

25 Ele sno apna a ele berere kanũ a, “A whnũrnu Nyenwe ai.”

Tõmosi kanũ be, “Okwolem ma m whnũrnu m anũnu ituru nũ aka a lawũru, m yisi mkpaka aka m nũ rime be, yisi aka m n'ikpurutu a, m jéekweru.”

26 N'ikwezu a, ele sno apna Jizõsi gbakõgwu kwno n'otu o ro, tũgidne ẽhni õnuhna, Tõmosi nũ be zĩ masĩ. Be tũsnirmi o ro, kõvu Jizõsi varũ gwuzoru n'esilawũru be, kaa, “Udno zĩnu anũ.”

27 O kanũ Tõmosi, “Yisi aka i hna, le aka m lawũru, dnõsnima aka i yisi n'ikpurutu m, i nwẽma mkpõma lawũru, kweru.”

28 Tõmosi sarũ a, “Nyenwe m nũ Chiokike m.”

29 Jizõsi kanũ a, “I kweruru kwnornu nũ i whnũrnu m, ngõzi zĩnu ele whnũge, kõvu be kweru.”

Risi õkwukwo ka

30 Jizõsi rnũrnu agĩda ẽrnu ndu-ẽhni berere nũ ruwhnu ele sno apna a ke be gbáge n'õkwukwo ka.

31 Kõvu be gbarũ ka ma anũ kweru nũ Jizõsi bũ Karaĩsi wam, Nnwõ Chiokike, ma hite n'õkwonata mkpõma nũ rẽwhna a, anũ jeenwe bũdnu.

21

Jizõsi gesiri ele sno apna a

ẽsau ẽhni a

1 Omekwo, Jizõsi gesiri ele sno apna a ẽhni a n'apna berere, nũ ngeri Osimini Taberasi.

² Saĩmoni Pita, Tõmosi nye be kwu Didimõsi, nu Nataneli nye Kana ke Galili, nu rumu rukna Zebidi, nu ele sno apna a lawuru berere zi.

³ Saĩmoni Pita kaa, “M neezne o gbu aznu.”

Be kanu a, “A joosno i zne.” Kpakara be zne bna n'otu oḡbo, kovu o za nhne be gburu kpakara abali wam.

⁴ N'õnu õsisi, Jizõsi gwuzoru n'õnu mini, kovu ele sno apna a ma nu o bu Jizõsi.

⁵ O sika be, “Rumu takiri, o zi aznu anu gbuharu?”

Be sa a, “Oza.”

⁶ Jizõsi kanu be, “Anu wusi igbo anu n'akarikwnunga oḡbo, anu jowhnu aznu.” Be wusi igbo be, be nwee rikne doli igbo wam kwnornu nu be gburu agida aznu.

⁷ Nye sno apna wam Jizõsi whuru n'anya kanu Pita, “O bu Nyenwe ai.” Kpa Saĩmoni Pita uru nu o bu Nyenwe ai, o jeru ikpe a (kwnornu nu o gba eto) dnabna mini.

⁸ Ele sno apna a ele berere kworu oḡbo, doru igbo wam aznu jiri va mkpomkpo eli. Be za ikere nu mkpomkpo eli, nhne hne lele riwhu rula eto.

⁹ Nga be duru mkpomkpo eli, be whuru esekere bekwnu nu aznu nu zi n'olu a nu bredi zi pi.

¹⁰ Jizõsi kanu be, “Anu gweya agwna aznu anu gburu.”

¹¹ Saĩmoni Pita zne doru igbo wam nu mkpomkpo eli, aznu okpotokpo jiri a, otu riwhu nu nri isne nu eto, igbo wam dokala, o bu n'ezi nu aznu zi agida.

¹² Jizõsi kanu be, “Anu va ri wiri.” O za nye sno apna a ke nwernu rikne o nyipohia sika a, “I bu nyele?” Be magwu nu o bu Nyenwe ai.

¹³ Jizõsi gweru bredi wam nyee be, ya nu aznu.

¹⁴ Ka mernu mgba eto Jizõsi gesiri ele sno apna a ehni a kpa o hi n'enwu lizo.

Jizõsi nu Pita

¹⁵ Nga be rikworu wiri, Jizõsi kanu Saĩmoni Pita, “Saĩmoni nnwo Jõni, i whuru n'anya kakwo nhne ele ka?”

O sa a, “Owe, Nyenwe ai, i magwu nu m whuru m ji n'anya.”

Jizõsi kanu a, “Nyee aturu m wiri.”

¹⁶ Jizõsi kanu a ke mgba lawuru, “Saĩmoni, nnwo Jõni, i whuru n'anya n'ezi oka?”

O sa a, “Owe, Nyenwe ai, i magwu nu m whuru m ji n'anya.”

Jizõsi kanu a, “Nõoznu aturu m.”

¹⁷ Jizõsi kanu a ke mgba eto, “Saĩmoni, nnwo Jõni, i whuru n'anya?”

O gbu Pita igbugbu nu Jizõsi kannu ke mgba eto, “I whuru n'anya?” O kaa, Nyenwe ai, i magwu kpakara nhne, i magwu nu m whuru m ji n'anya.

Jizõsi kanu a, “Nyee aturu m wiri.”

¹⁸ Me kanu i ezi oka, nga i bu wikoro, i nõosnu ajni n'ikwnu i zne hne obula o masiri i. Kovu, nga i jeeme okno badnu, i jodosni aka i, nye berere snusi i ajni, kwuru i zne hne masila i.”

¹⁹ Jizõsi kwuru ka ma o gesi kpa Pita jõnwu enwu, ma o nyee Chiokike igwugwu. Jizõsi kanu a, “Sno m.”

Jizõsi nu nye sno apna a ke berere

²⁰ Pita tuhna whnu nye sno apna a wam, nye Jizõsi whuru n'anya, nye dnabnenu Jizõsi nga be neeri wiri anyasnu wam, sika a, “Nyenwe ai, nyele jeere i?”

²¹ Nga Pita whnũrnu a, ọ kanũ Jizọsi, “Nyenwe aị, ndaa nhne i kwuru gbasịri nwerukna ka?”

²² Jizọsi sarũ a, “Ọ bũru nũ m pioru m ọ zịri bũdnu tem m va, ọ gbásịla ị, sno m.”

²³ Be tũsa a n'esilawũru ele sno apna Jizọsi nũ nye sno apna a ka jọonwu ẹnwu. Kọvu Jizọsi kála nũ ọ jọonwu ẹnwu, kọvu o karũ, “Ọ bũru nũ m pioru m ọ zịri bũdnu tem m va, ọ gbásịla ị.”

²⁴ Ya bũ nye sno apna a ke kwuru kpakara nhne ka, nye gba masịri a n'ọkwukwo, a magwũ nũ nhne ọ gbarũ bũ ezi ọka.

Okwukwo

²⁵ Agida nhne ele berere ke Jizọsi mernu, ọ bũru nũ be gba kpakara be n'ọkwukwo, m che m nũ kpakara ọwa n'iwhuru a jéenwe rikne vuli kpakara ọkwukwo be jaagba.

Ernu Ele Izi

Nhne gbasiri ọkwukwo ka

Ernu Ele Izi sno izi ọma lele kpa Lukwu gbarụ n'ọkwukwo n'aznụ. Risi ọka a bụ o gesi kpa ele sno apna Jizọsi panizoru ernalu izi ọma be. Enine Nso duru be gbasia Izi Ọma gbasiri Jizọsi hite n'ụ Jeruselem, n'ụ kpakara Judiya n'ụ Sameria, tem d'ụ n'osotoma ọwa (1:8). Nye gbarụ ọkwukwo ka mernu ma ele n'ogwunu a mahia n'ụ ele Chiokike (Kirisiteni) b'ụo otu ele n'odo ọchichi ke neemegidne ọchichi ele Rom.

Be kewarụ ọkwukwo ka nga ẹto, ke neegesi kpa be kporu okwo Izi Ọma gbasiri Jizọsi n'ụ ọpanizo ọgbako Chiokike. (1) Ọpanizo otu ele Chiokike n'ụ Jeruselem nga Jizọsi lahnarn'ụ oligwe. (2) Ọgbasa izi ọma n'ụ kpakara ẹli Palēsitini. (3) Ọgbasa izi ọma d'ụ kpakara ọwa, d'ụ Rom.

Otu nhne z'ị okne mkpa n'ụ *Ernu Ele Izi* b'ụ ernalu Enine Nso, nye nyernu be rikne n'ọbochi Pentikosi, nye z'ị koriri naagba ọgbako Chiokike inwe n'ụ ele risi a. Ọkwukwo *Ernu Ele Izi* neegesi iknernema ikwu-ọnu Chiokike n'ụ b'udnu ele kweru n'ụ omekorita ele ọgbako Chiokike.

Nhne z'ị n'ọkwukwo ka

Ojiknernu ọ gba akebne (1:1-26)

Nhne Jizọsi nyernu n'iwu ipne-azn'ụ n'ụ mkwna (1:1-14)

Nye gweruru ọnodi Judasi (1:15-26)

Akebne be gbar'ụ n'ụ Jeruselem (2:1--8:3)

Akebne n'ụ rime Judiya n'ụ Sameria (8:4--12:25)

Ernu Polu (13:1--28:31)

Ọgaghari neezni izi ọma ke mbom (13:1--14:28)

Ọgbo ke z'ị n'ụ Jeruselem (15:1-35)

Ọgaghari neezni izi ọma ke ẹbo (15:36--18:22)

Ọgaghari neezni izi ọma ke ẹto (18:23--21:16)

Polu nye ikelu n'ụ Jeruselem, Sizeria n'ụ Rom (21:17--28:31)

Jizọsi kweru mkwna

Enine Nso

¹ Tiofilosi, n'ọkwukwo mbom ke me gbar'ụ, m gbar'ụ m kpakara nhne Jizọsi mernu n'ụ nhne o znirni hite n'ige ọ panizoru ernalu a,

² tem d'ụ n'ọbochi be gweruru a la n'oligwe. Si ọ lar'ụ oligwe, o nyernu ele rukna wam ọ h'ohiaru iwu hite n'ụ rikne ke Enine Nso.

³ Nga ọ takworu aw'hn'ụwhnu, o gesiri ele izi wam ọ h'ohiaru ẹhni a, nyee be agida nhne mesiri a rikne n'ụ ọ z'ị b'udnu. Be whn'urnu a, ya n'ụ be kwu ọka gbasiri ẹli-eze Chiokike nri ọbochi ẹno.

⁴ Nga be gbakoru n'otu, o nyernu be iwu ka, "An'ụ hiko n'ụ Jeruselem whoga, kovu an'ụ seru nkesi ke Nda m kweru mkwna, ke an'ụ n'urnu nhne me kwuru gbasiri a.

⁵ Joni jiri mini w'ụ ele badn'ụ mini, kovu be jeeji Enine Nso n'owu an'ụ mini nga ọbochi ele n'ụ ele whemernu."

Jizọsi lar'ụ oligwe

(Mak 16:19-20; Luk 24:50-53)

⁶ Nga ele izi wam gbakoru n'otu, be s'ikwa Jizọsi, "Nyenwe a'ị, i jeegweru ọchichi ka nyehnata ele Izir'eli k'itna?"

⁷ Jizọsi kan'ụ be, "Nda m ji iknernema a b'ita ige n'ụ ọbochi, o kw'esige an'ụ mahia a.

⁸ Kọvu nū anụ jaanahja rikne nga Enine Nso wam dnakwasiri anụ, anụ jọobu ele akebne m nū rime Jeruselem, ma nū kpakara Judiya, nū Sameria nū hne ọwa sọtoru.”

⁹ Nga o kwukworu ọka ka, kpa be neele a anya, be gwelizo a la n'oligwe, erumeru gweme a n'anya be.

¹⁰ Kpa be zi neelegidne anya n'oligwe kpa o naala, ele rukna lawuru wogwu iwo abochma gwuzoru n'esilawuru be.

¹¹ Be kaa, “Ele rukna Galili, ndaa kpa anụ gwuzo neele anya n'oligwe? Jizosi ka, nye be gweruru la oligwe, jaava berere lele kpa anụ whnurnu a la oligwe.”

Matayasị gweruru

Onodi Judasi

¹² Ele izi wam lahna Jeruselem hite nū Rugwu Olivu, nhne nū lele izne otu Ọbochi Ozukwa Inwe.

¹³ Be zne Jeruselem, bna nū rime ọro olu hne be wu. Pita, Jōni, Jemisi, nū Anduru, Filipu nū Tōmosi, Batolomi nū Matiyu, Jemisi nnwọ Alifayosi, Saimoni nye zi n'esilawuru ele noonwu bekwnu nū mkpoma nū Judasi nnwọ Jemisi.

¹⁴ Kpakara be zi n'otu neekpe okpukpe ige ọbula, be nū ele rinya wam nū Meri nne Jizosi nū rumu nne a.

¹⁵ N'ọbochi wam, Pita gwuzoru n'esilawuru ele sno apna Jizosi, be bu otu riwhu nū nri lawuru.

¹⁶ O kaa, “Rumu nda m, nhne be gbaru n'okwukwo nso ke Enine Nso kwuru hite n'onu Devidi gbasiri Judasi nye duru ele nwugwuru Jizosi, jeemezu.

¹⁷ Judasi bu otu badnu nū rime ai, be hohiaru a ma o kehja igwe n'ernu ai.”

¹⁸ (Judasi bu nye ji iwai be kwuru a n'ernu aruru-eli a zu otu eli, o dna, kpu ruwhnu n'eli, kpakara nhne zi a nū ruwho wuhia.

¹⁹ Kpakara ele wu nū Jeruselem nurnu a, be kwu eli wam n'ikwu-onu be, Akelidama, ke bu Eli Ovna.)

²⁰ “Kwnornu nū be gbaru n'okwukwo Eri Oma,

‘Oro a daziri etekne,

o za nye wu nū rime a.’

Be gba kwno a nū nhne berere,

‘Nye berere gweru onodi ernu a.’

²¹ Kitna, o zi mkpa a horu otu nyerukna n'esilawuru ele sno ai n'ige Nyenwe ai Jizosi snornu ai whoga, bnanya masi n'esilawuru ai,

²² hite n'owu mini Jōni du nga Jizosi laru n'oligwe. Nye wam jọoburu nye joosno ai gba akebne nū Jizosi hiri n'enwu lizo.”

²³ Be hohia ele rukna lawuru, Josefuru nye be kwu Basabasi nye rewhna a berere bu Jositosi nū Matayasị.

²⁴ Be kpe okpukpe kaa, “Nyenwe ai, ji nye magwu mkpoma kpakara ele badnu, bikno, Nyenwe ai, gesi ai nye i hohiaru n'esilawuru ele rukna lawuru ka,

²⁵ nye jeegweru onodi ernu nye izi ke Judasi ghasaru zne hne o kwesiri.”

²⁶ Be vu oghanuchi, oghanuchi wam dnakwasị Matayasị, be gwnusi a n'esilawuru ele izi nri nū otu wam.

2

Enine Nso varu

n'ọbochi Pentikosi

¹ Nga ọbochi Pentikosi zuru, kpakara be gbaoru n'otu ọro.

2 Ngangam, imerne ke nū lele okne ruwhere hiri n'oligwe va, jipiya kpakara ọro wam be zị.

3 Be whnurnu nhne nū lele riro bẹkwu ke daziri n'olu risi be otu otu.

4 Enine Nsọ mejiharu be, be bete nookwu ọka nū riro ele berere lele kpa Enine Nsọ wam nyernu be iknerna o kwu ọka.

5 Agwna ele Ju ele nootu ogwnu Chiokike wu nū Jeruselem, ele hi nū kpakara mba ke zị nū mkpururu oligwe va.

6 Nga be nurnu mkpakpo ka, be gbako, ọ turu be n'anya kwnornu nū be nurnu kpa ele sno apna Jizosi nookwu ọka nye ọbula nū ikwu-ọnu ke a.

7 Ehni nwurnu be, be kaa, “Kpakara ele ka nookwu ọka, be buo ele Galili sa?”

8 Ndaa kpa a nonu be nookwu ọka n'ikwu-ọnu be jiri mụ aị?

9 Ele Patja, nū Midia, ele Elam, ele hi nū Mesopotemia, Judiya nū Kapadosia, nū ele hi nū Pōntosi nū Asia,

10 ele hi nū Firigia nū Pamfilia, ele hi nū Ijipiti nū ele hi agwna ẹli Libiya ke zị Sirini ndundu, nū agwna ele hi nū Rom,

11 ma ele Ju ma ele bnarnu okpukpe ele Ju, ele Kiriti nū ele Arabu, a nurnu kpa be nookwu ọka n'ikwu-ọnu aị gbasiri ernalu ndu-ehni Chiokike.”

12 O gbagwojiri be anya, kpakara be nesisikwa, “Ka bu kini?”

13 Kọvu ele berere mernu be nhne mkpari, be kaa, “Manya noogbu ele ka.”

Pita kwunnu igbudu badnu

ọka

14 Pita gwuzoru ya nū nri badnu nū otu wam bete nookwunu ele badnu wam ọka n'okne nkoli, kaa,

“Ele Ju ibne m nū kpakara anu ele wu nū Jeruselem, anu bnote nsnị nū nhne me nookwu gbasiri nhne anu whnurnu.

15 O za manya noogbu ele rukna ka lele kpa anu cheru, o bu ọtnu-ige tolu ke ọsisi.*

16 Kọvu ka bu nhne nye ọwhnurninya Juweli kwuru ọka gbasiri a,

17 Chiokike karu kpa,

‘Ka bu nhne me jeeme n'ọbochi ipne-aznu,

m jowukwasi Enine m n'ehni kpakara ele badnu,

rumu anu ele rukna nū ele rinya jookpo okwo ikwu-ọnu Chiokike,

rumu ikoro anu jowhnu ọwhnurninya,

ele okno badnu anu joro mboro.

18 M jowukwasi ele izi m rukna nū rinya Enine m n'ọbochi wam,

be jowhnu ọwhnurninya.

19 M jeegesi ernalu ndu-ehni n'oligwe

nū nhne elekema n'owa nū mkpururu oligwe,

ovnarna nū bẹkwu nū okne runwurnu bẹkwu.

20 Ehnam jaagba ọchichiri,

enwa jaachna ihie ihie lele ọvnarna,

ka jeeme si okne ọbochi ke zị igwugwu ke Nyenwe aị va.

21 Be jooznobia nye ọbula ke noosukwu rewhna Nyenwe aị.’

22 “Ele Izireli, anu bnote nsnị n'oka ka, Chiokike jiri kpakara ernalu ndu-ehni nū nhne tu n'anya nū elekema ka n'esilawuru anu gesi nū ya ziyaru Jizosi nye Nazareti. Kpakara anu magwu kpa.

23 Chiokike marnu ama kweru be gweru a nyega anu, anu gweru a nyee n'aka ele ma Chiokike, be kpojidne a n'ogba, gbu a.

* 2:15 ọtnu-ige tolu ke ọsisi: ọkwukwo ke mbom kwuru ige awa ke ọto

24 Kòvụ nụ Chiokike mernu o hi n'ẹnwu lizọ, gweme nhne igbugbu ke ẹnwu kwnornu nụ ẹnwu nwée rikne nwụgwu a.

25 Ka bụ nhne Devidi kwuru gbasiri a,
'M whnurnu m Nyenwe aị nụ ruwhnu m kpakara ige.
Ọ zị n'akarikwnunga m,
ovu jáala m mini.

26 Ka kpayarụ ovu sọru m n'ọnu, riro m nwụdnarnu k'agịda,
anọ-ẹhni m jaazi bụdnụ n'olile anya.

27 Kwnornu nụ ị jéesigbasi mkpuru ovu m n'ilili,
i jéekwe nye nsọ ke i ro oro.

28 I gesiri m apna ke bụdnụ,
ruwhnu i mernu snarnịma jihia mkpoma m.'

29 "Rumu nda m, m nookwunu anụ ọka n'anya rikne nhne gbasiri nda aị
oknani bụ Devidi, ọ nwurnu ẹnwu, be li a, ilili a zị hna dụ tna.

30 Ọ bụ nye ọwhnurninya, ọ magwụ nụ Chiokike kwesiri a mkwna rikne nụ
ọ jeeme otu nye hi nụ avnurnu a daziri nụ ngadna eze a.

31 Ọ whnurnu nụ hne zị nụ ruwhnu, o kwu ọka gbasiri olizọ n'ẹnwu Karaịsi,
Chiokike jéesigbasi a n'ilili, anọ-ẹhni a jóoro oro.

32 Chiokike mernu Jizọsi ka hi n'ẹnwu lizọ. A bụ ele akebne ezi ọka ka.

33 Be gwelizọru a olu n'akarikwnunga Chiokike, ọ nahjaru n'aka Nda a
mkwna ke Enine Nsọ bụ ke ọ wụkwasiri aị, ke anụ whnurnu, nurnu masi.

34 Devidi lágé olu nụ rime oligwe, kọvụ o kwuru,
'Nyenwe aị kannụ Nyenwe m,

Daziri ẹli n'akarikwnunga m,

35 tem dụ nga me jaabita ele irno i
lele nhne ị jootukwasi ọchi ị lawuru.'

36 "Kam kpayarụ, kpakara ele Izireli, anụ mahia n'ezi ọka nụ ọ bụ Jizọsi ka,
nye anụ kpogidnenu n'ogba bụ nye Chiokike mernu Nyenwe aị nụ Karaịsi."

37 Nga be nurnu ka, o gburu be igbugbu k'agịda nụ mkpoma, be kanụ Pita
nụ ele izi berere, "Rumu nda aị, kini bụ nhne a jeeme?"

38 Pita kanụ be, "Nye obula hi nụ mmehie a tughnasna, ma be wụ anụ mini nụ
rẹwhna Jizọsi Karaịsi, ma Chiokike gbarunu anụ mmehie anụ. Ige wam anụ
jeenwehia nkesi Chiokike ke bụ Enine Nsọ.

39 Kwnornu nụ mkwna Chiokike ka zinu anụ, nụ rumu anụ, nụ kpakara ele
zị ikere, ele Nyenwe aị Chiokike joosukwu."

40 Pita ji agịda ikwu-ọnu berere dọ be aka nụ nsni, kaa, "Anụ gweme ẹhni
anụ awhnwhnu ke ebiri ọjo ka."

41 Be wuru ele kweru izi ọma ka mini. Be tükwasinu be pokwu badnụ ẹto
n'otu ọbochi.

Mmekota ke ele kweru ekwe

42 Be dazigidne nụ iznizni ele izi, snornu be mekota nhne, ri wiri nụ neekpe
okpukpe.

43 Ele izi wam rnurnu agịda ẹnụ ndu-ẹhni nụ elekema ke mernu ogwnu tų
ele badnụ.

44 Kpakara ele kweru ekwe dazikota n'otu, neekeri nhne n'otu.

45 Be re ẹkwu be nụ ẹkwu be nwernu, keme iwai n'esilawuru be lele kpa
mkpa kparụ nye obula.

46 Be dazigidne n'otu n'Oro Nsọ Chiokike kpakara ọbochi. Be neezne n'oro nụ
oro, gweru mkpoma zị rịchna neeri wiri n'otu nụ ovu ọso n'ọnu.

⁴⁷ Be naaznarni Chiokike, neenwe ruwhnu oma nu hne ele badnu zi. Nyenwe aji notukwasinu be ele badnu n'obochi n'obochi ele be jooznohia.

3

Pita gworo nye mgworo

¹ Otu obochi, Pita nu Joni znernu Oro Nso Chiokike n'otnu-ige ke eto niwhnehnie,* ke bu ige okpukpe.

² Otu nyerukna ke dnarnu mgworo hite nga be muru a, ele badnu nookwuru a zne n'Ogodo Onuhna Marnu Mma ke Oro Nso Chiokike kpakara obochi, ma o rijo nhne n'aka ele naabna Oro Nso Chiokike.

³ Nga o whnurnu Pita nu Joni hne be naabna Oro Nso Chiokike, o rijo be nhne.

⁴ Pita nu Joni legidne a anya, Pita kaa, "Le aji anya."

⁵ Nyerukna wam legidne be anya ma o jaanahia nhne n'aka be.

⁶ Pita kaa, "M nwée m siliva mōbu golu, kovu m jeenye i nhne me nwernu, nu rewhna Jizosi Karaishi nye Nazarėti, lizo, zne izne."

⁷ O nwugwuru a n'akarikwnunga a, dolizo a olu, ngangam, ochi nyerukna wam nu ekenkele-ochi a lawuru nwehia rikne.

⁸ O wulizo olu, gwuzoru, bete neezne izne. O snornu be bna n'Oro Nso Chiokike, neezne izne, notowulizo olu, naaznarni Chiokike.

⁹ Kpakara igbudu ele badnu wam whnurnu a hne o neezne izne, naaznarni Chiokike.

¹⁰ Be mahia nu o bu nye orio wam naadaji n'Ogodo Onuhna Marnu Mma. O duru be ehni, tu be n'anya k'agida nu nhne mernu.

Pita znirni izi oma n'Oro Nso Chiokike

¹¹ Kpa nye mgworo wam nwugwuru Pita nu Joni n'aka, ogwnu turu kpakara ele badnu wam, be gbako nu mgbemgbe oro Solomoni.

¹² Nga Pita whnurnu be, o kanu be, "Ele Izireli, ndaa kpa nhne ka noodu anu ehni, anu neele aji anya lele nu a jiri rikne aka aji mōbu ozi nso aji mee nyerukna ka zne izne.

¹³ Chiokike ke Ebereham, nu ke Aziki, nu ke Jekoru, Chiokike ke ele nda aji oknani, nyernu Nnwō a Jizosi igwugwu. Ya bu nye anu reru, anu gonahoru a nu ruwhnu Paileti, o bu n'ezi nu Paileti kweru o sigbasi a.

¹⁴ Anu gonahoru nye nso nu nye mee mma, gweru nye noogbu badnu.

¹⁵ Anu gburu nye nwe budnu. Kovu Chiokike mernu o hi n'enwu lizo, a bu ele akebe a.

¹⁶ Anu ke nwerukna ka anu magwu, o bu okwnata ovu nu rewhna Jizosi nyernu a rikne. O bu rewhna Jizosi nu okwnata ovu nu rewhna a nyernu nwerukna ka ogwugwo zuru ozu, kpa anu whnurnu.

¹⁷ "Kitna, rumu nda m, m maam nu nhne anu nu ele risi anu mernu Jizosi bu nu anu ma ama.

¹⁸ Kovu nu Chiokike hiri n'onu kpakara ele owhnurninya agida ige wheru ewhe kwu nu Karaishi jaata awhnuwhnu, o mezuru nhne o kwuru.

¹⁹ Anu tuhhasna, kete ruwhnu hne Chiokike zi, ma o kwnosnama kpakara mmehie anu,

²⁰ ma anu nwehia rikne ikne hite nu ruwhnu Chiokike, ma o ziyanu anu Jizosi bu Karaishi nye o hohiannu anu.

* **3:1** otu-ige ke eto niwhnehnie: okwukwo ke mōm kwuru ige awa ke tolu

²¹ O jaadazi n'oligwe tem ige Chiokike jeeme kpakara nhne ziri ikne, lele kpa o kweru mkwna agida ige wheru ewhe hite n'onu ele owhnurninya a zi nsọ.

²² Kwnornu nu Mozizi karu, 'Nyenwe a Chiokike anu jeeziyanu anu nye owhnurninya lele me, hite nu ele ke anu, anu joojno nsni nu kpakara nhne o jaakanu anu.

²³ Nye obula ke joojno nsni nu nhne nye owhnurninya wam kwuru, be jeekewahala a n'esilawuru ele ke Chiokike.'

²⁴ "N'ezi oka, kpakara ele owhnurninya hite nu Sameli nu ele sno a n'aznu kwuru nhne gbasiri obochi ele ka.

²⁵ Kpakara mkwna Chiokike hite n'onu ele owhnurninya a zinu anu, anu nwernu igwe nu ogba-njo-ehni Chiokike gbaru ya nu ele nda anu, lele kpa o kannu Ebereham, 'M joozozo kpakara ele zi n'owa hite avnurnu i.'

²⁶ Nga Chiokike gwelizoru Nnwọ a Jizosi, o beru osno zianu anu ya, ma o gozi anu, ma anu hi nu rime apna ojo anu yahna."

4

Pita nu Joni zi nu ruwhnu ele eze-ikpe

¹ Kpa Pita nu Joni zi nookwunu ele badnu oka n'Oro Nso Chiokike, ele arjohna nu nye risi ele neese Oro Nso Chiokike nu ele Sadusi vakwnusiri be.

² Ovu weru be ehni nu ele izi lawuru wam neezni ele badnu nu Jizosi hiri n'enwu lizo, ke neegesi nu ele nwurnu onwu jeehi n'enwu lizo berere.

³ Be nwudne be, yisi be ikelu tem chi bo, kwnornu nu obochi zneminem.

⁴ Kovu agida ele nurnu izi oma be kweruru, onu ogwnugwnu be bu pokwu badnu isne.

⁵ N'ekile a, ele risi ele Ju nu ele okno badnu nu ele zni iwu ele Ju gbakoru nu Jeruselem,

⁶ be nu nye risi arjohna Anasi, nu Kayafasi, nu Joni nu Alekizanda, nu ele oro nye risi arjohna.

⁷ Be kwuya Pita nu Joni gwuzote be nu ruwhnu be, be sikwa be, "Ndaa rikne mubu rewhna nyele hne anu jiri neeme nhne ka?"

⁸ Enine Nso jipiharuru nu rime Pita, o kaa, "Ele risi nu ele okno badnu Izireli,

⁹ anu nesikwa a ajiji tna kwnornu nu nhne oma ke be mennu nye mgworo ka nu kpa be jiri gwọ a.

¹⁰ Kpakara anu ma kpakara ele Izireli mahia, nu nyerukna ka gwuzo hna nu ruwhnu anu n'ehni zuru ozu, bu nye be gworu hite nu rikne ke zi nu rewhna Jizosi Karaisi nye Nazareti. Anu kpogidnerneru a n'ogba, kovu Chiokike mernu o hi n'enwu lizo.

¹¹ Ya bu

'akaworugwu ke anu ele noowu oro juru, kiyam gholam risi nsukala oro.'

¹² "Oznohia zi nu rewhna a kpoi. Kwnornu nu o za rewhna berere nu mkpururu oligwe be nyernu ke badnu jeenwe oznohia."

¹³ Onu rikne Pita nu Joni duru ele risi ikpe ehni. Be mahiaru nu be bu ele o za nhne be bu, ele muge okwukwo. Be mahiaru kwno nu be nu Jizosi ziri.

¹⁴ O za nhne be nwernu rikne kwu kwnornu nu be whnurnu nyerukna wam be gworu gwuzo nu ngeri Pita nu Joni.

¹⁵ Be kanu be whoga n'oro ikpe, be gba iznuznu n'esilawuru be.

16 Be kaa, “Ndaa nhne a jeeme ele rukna ka. Kpakara ele wu nū Jeruselem magwū nū be nrūnu okne ɛrnu ndu-ɛhni ka, a nwée rikne ɔnahoru a.

17 Kɔvu a jéekwe be gbasá ɔnutnu ka n'esilawūru ele badnū, a dɔ be aka nū nsnj be kwú ɔka berere nū rɛwhna Jizɔsi.”

18 Be sukwu ele rukna wam, kanū be, be kwúma ɔka rja rja mɔbu zni nhne nū rɛwhna Jizɔsi.

19 Kɔvu Pita nū Jɔni sarū be, “Anū tule a ma ɔ bŭru ɔma nū anya Chiokike, a bnonu anū nsnj sɔbu a bnonu Chiokike nsnj.

20 Kwnornu nū a nwée rikne gharū o kwu nhne a whnūru nū nhne a nūru.”

21 Ele ikpe wam dɔsi be aka nū nsnj rikne, sigbasi be la. Be nwée nhne be jeeji ta be awhnūwhnu kwnornu nū ele badnū naaznarnj Chiokike nū nhne mernu.

22 Nyerukna be gwɔru ɛrnu ndu-ɛhni ka wheru nri awha ɛno.

Ele Karaɔsi kperu okpukpe

23 Nga be sigbasiri be, Pita nū Jɔni lakwnusi ele ke be, kanū be nhne ele risi ariohna nū ele okno badnū kwuru.

24 Nga be nūru a, be yisi ɔnu n'otu kwnakwu Chiokike n'okpukpe, kaa, “Nyenwe aɔ Chiokike, nye keru oligwe nū ɔwa, nū okne osimini, nū kpakara nhne zj nū rime be.

25 I jiri Enine Nsɔ kwu ɔka hite n'ɔnu ɔhi j Devidi, nda aɔ ɔknani, kaa, ‘Kini vuteru ele búo ele Ju ɔnuma
kini mernu ele badnū naagba iznuznu etekne?’

26 Ele eze k'ɔwa ka gwuzoru
be nū ele nɛchi ɛchi, gba iznuznu
megidne Nyenwe aɔ

megidne nye ke a o teru mɔno.*

27 N'ezi ɔka, Erɔdu nū Pɔntiosi Paɔleti gbakɔru n'otu n'eli ka, be nū ele búo ele Ju nū ele Izireɔi, megidne Nnwɔ nsɔ j Jizɔsi, nye i teru mɔno.

28 Be gbakɔru ma be mee nhne i jiri rikne i nū echiche i kaa nū ɔ bŭ nhne be jeeme.

29 Nyenwe aɔ, bikno, le be naakpasj aɔ ogwnu, nyega aɔ ele izi j, ɔnu rikne a jeeji zni izi ɔma j.

30 Dɔsnihala aka j nū ɔgwo ɛhni igbugbu nū ɔrnu elekema nū ɛrnu ndu-ɛhni hite nū rɛwhna ɔhi i zj nsɔ Jizɔsi.”

31 Nga be kperu okpukpe, hne be zj neekpe okpukpe znūru biri biri. Enine Nsɔ dnakwasj kpakara be, be bete nookwu ikwu-ɔnu Chiokike n'ɔnu rikne.

Ele kweru neekeri

kpakara nhne n'otu

32 Kpakara ele kweru ekwe bŭ otu nū echiche be ma nū mkpɔma be. ɔ zá nye kanū nhne o nwernu bŭ ke a, kɔvu be neekeri kpakara nhne be nwernu.

33 Ele izi wam ji ɔnu rikne naagba akebe olizɔ n'ɛnwu Nyenwe aɔ Jizɔsi. Chiokike tŭkwasinu be aɔida oru.

34 ɔ zá nye ɔbula n'esilawūru be nhne kɔgwu. Ele nwernu ɛli mɔbu ɔro re be, gweya iwai be reru a,

35 be nyee a ele izi, ele izi keme iwai wam lele kpa mkpa kparū nye ɔbula.

36 Josefú, nye Livaj be mŭru nū Saiporosi, nye ele izi jiri Banabasi, ke bŭ “Nnwɔ ɔsnuta mkpɔma,”

37 o re ɛli o nwernu, gweya iwai a bŭta a n'ɔchi ele izi.

* 4:26 nye ke a o teru mɔno: Ke bŭ Mezaya, Karaɔsi.

5

Ananayasị nụ Safira

¹ Kọvu otu nyerukna ọwhna a bụ Ananayasị, ya nụ nnwerne a Safira, reru ẹkwu be.

² Ya nụ nnwerne a kwekọtaru ọ bita agwna iwai, o gweya ke gwnarnu bita n'ochi ele izi.

³ Pita kanu a, "Ananayasị, ndaa kpa Ekwensu jihjaru mkpoma i, mee i i ghanu Enine Nso aghalaghala, i bitaru agwna iwai i reru ẹkwu.

⁴ Jiwa nwe ẹkwu su i reru a. Nga i reru a, iwai wam zi n'aka i o mee kpa o jiri masi i. Ndaa kpa i jiri ri ori o mee nhne nu kpa? I ghanu Chiokike aghalaghala, ọ buo badnu."

⁵ Nga Ananayasị nurnu oka ka, ọ dna n'eli, nwuma. Ogwnu turu kpakara ele nurnu nhne mernu.

⁶ Rumu ikoro ele rukna va whu a n'ikpe, vuru iznu a zne, lite a.

⁷ Nga nhne nu lele awa eto wheru, nnwerne a varu, kovu ọ ma nhne mernu.

⁸ Pita sika a, "Kanụ m, ka ọ bu onu iwai anu reru eli wam?"

Ọ kaa, "Owe, ọ bu onu ahia a."

⁹ Pita kanu a, "Kini mernu ji nu nzi i kwekọtaru ọ rna Enine Chiokike onurna? Ele rukna ele liri nzi i gwuzo n'onu-mgbo kina, be joovuru i zne."

¹⁰ Ngangam, ọ dna n'eli n'ochi a, nwuma. Be vuru a whoga, lite a nu ngeri nzi a.

¹¹ Kpakara ogbako Chiokike nu ele berere ke nurnu a turu ogwnu k'agida.

Ele izi wam gworu

ele nriria

¹² Ele izi rnurnu agida ernu ndu-ehni nu ernu elekema n'esilawuru ele badnu. Kpakara ele kweru naagbakọ nu mgbemgbe ọro Solomoni.

¹³ Ọ za nye berere nwernu rikne sno be, ọ bu n'ezi nu ele badnu naakaa be oka oma.

¹⁴ Kovu agida ele badnu snornu ele kweru ekwe, ele rukna nu ele rinya.

¹⁵ Ka mernu be kwuya ele naaria ehni igbugbu, dnanyita be nu ngeri apna n'olu okpata be nu etere be, ma kpa Pita naagawhe enine a metu agwna be.

¹⁶ Igudu ele badnu hi n'eli gharu Jeruselem gburugburu va kwuya ele ke be naari ehni igbugbu, ma ele renwu ojo nwugwu, be gworu kpakara be.

Be kpakarnu ele izi ehni

¹⁷ Ige wam okwno-awuwa jihjaru nye risi ariohna nu ele nu ya sno, bu ele otu Sadusi, mkpoma.

¹⁸ Be nwudne ele izi, yisi be ikelu nu ruwhnu ohna.

¹⁹ Kovu enine izi Nyenwe ai varu n'abalj, gbamanu be onuhna ikelu, kwuhia be.

²⁰ Ọ kanu be, "Anu zne gwuzoru n'Oro Nso Chiokike, kanu ele badnu kpakara izi ke budnu ikne ka."

²¹ Ele izi wam zne n'Oro Nso Chiokike ke chi boru neezni ele badnu nhne.

Nga nye risi ariohna nu ele nu ya sno varu, be sukwukota ele eze-ikpe nu kpakara ele risi Izireli, zizne izi ma be kwuhianu be ele izi wam.

²² Ele be ziznenu ọro ikelu, whnuge be n'oro ikelu. Be lahna kanu ele dusiri be,

²³ "Nga a duru ọro ikelu, ọro turu ọtu, kpakara ele nse neese onuhna, kovu nga a gbamarnu ọro, ọ za nye zi nu rime ọro."

²⁴ Nga nye risi ele neese Ọro Nso Chiokike nu ele risi ariohna nurnu a, ọ gbagwojiri be anya.

²⁵ Ige wam otu badnu va, kanu be. “Anu le, ele rukna wam anu yisiri n'ikelu zi n'Oro Nso Chiokike neezni ele badnu nhne.”

²⁶ Nye risi ele neese Oro Nso Chiokike nu ele ya nu be neese Oro Nso zne kwuya ele izi wam, be mene be nhne rikne kwnornu nu be notu ogwnu ele badnu jotu be akaworugwu.

²⁷ Be kwuya ele izi wam gwuzote be nu ruwhnu ele eze-ikpe. Nye risi ariohna sikwa be,

²⁸ kaa, “A doru anu aka nu nsni anu zni nhne nu rewhna Jizosi. Anu mernu kpakara eli Jeruselem jihia n'iznizni anu, anu noovukwasi ai enwu onarna Nyerukna ka.”

²⁹ Pita nu ele izi saru be, “A kwesiri o bnonu Chiokike nsni karu badnu.

³⁰ Chiokike ke ele nda ai mernu Jizosi hi n'enwu lizo, bu nye anu gburu, kpoigidne a n'olu ogba.

³¹ Chiokike gwelozoru a olu n'akarikwnunga a ma o buru Nye Risi nu Nye Onohia, ma ele Izireli tuhnasna, ma Chiokike gbarunu be mmehie be.

³² A bu ele akebne nhne ele ka, ma Enine Nso, ke bu nkesi Chiokike nyernu ele noobnonu a nsni.”

³³ Nga be nuru oka ka, ovu weru be ehni k'agida, be kpebi o gbu ele izi wam.

³⁴ Kovu otu nye Farisi rewhna a bu Gamalieli, nye zni iwu ele Ju, nye ele badnu noso anya, gwuzoru n'esilawuru ele ikpe, kaa ele izi wam whoga n'ederezi.

³⁵ O kanu ele ikpe wam, “Ele Izireli, anya du anu eli nhne anu noopio o mee ele rukna ka.

³⁶ N'ige wheru ewhe, Tadiyosi whuyaru neeme ehni a nu o bu nye zi rikne, riwu badnu eno snornu a. Be gburu a, kpakara ele snornu a gbasaru, otu a nwurnu.

³⁷ Omekwo, Judasi nye Galili whuyaru n'ige be gwnurnu ele badnu, o doru agida ele badnu, be gburu a masi, kpakara ele snornu a gbasaru.

³⁸ Kitna me kanu anu, anu mee nhne obula megidne ele rukna ka. Anu sigbasi be. O buru nu nhne ka bu enu aka ke badnu, o joowhu.

³⁹ Kovu o buru nu o hi n'aka Chiokike, anu nwee rikne megbu be. Anu joowhnu nu anu nolusi Chiokike ogwnu.”

Be kweru nhne o kwuru bu ezi oka.

⁴⁰ Be sukwa ele izi wam, pnia be nhne, kanu be kwuma oka berere nu rewhna Jizosi, be sigbasi be, be la.

⁴¹ Ele izi wam whoga nu ruwhnu ele ikpe, ovu noso be n'onu kwnornu nu Chiokike gwnusiri be ele kwesiri o ta awhnuwhnu kwnornu nu rewhna Jizosi.

⁴² Kpakara obochi be zi n'Oro Nso Chiokike, neezne n'oro n'oro ele badnu nokpo okwo izi oma nu Jizosi bu Karaisi.

6

Ele ernu esau

¹ N'ige wam, nga onu ogwnugwnu ele kweru ekwe zi naaba aba, odogbuta whuyaru n'esilawuru ele Ju nookwu Giriki nu ele Ju nookwu Hiburu. Ele Ju Giriki kanu be lewhuru ele rinya be nzi be nwurnu anya nu wiri be neeke n'obochi n'obochi.

² Ele izi nri nu ebo wam sukwa kpakara ele sno apna Jizosi n'otu, kaa, “O buo oma a gharu nhne gbasiri ikwu-onu Chiokike neeke wiri.

³ Kitna, rumu nda ai, anu hohia ele rukna esau n'esilawuru anu ele nwernu agwa oma, ele Enine Chiokike nu akoniche jihiaru, ma a yisi be nu nhne gbasiri nhne ka.

4 Kọvu aila jeegweru ẹhni aì yisi n'okpukpe nù ọkpo okwo ikwu-ọnu Chiokike."

5 Kpakara be kweru nhne ele izi wam kwuru. Be hõhia Sitivini, nyerukna ke ọkwnata ovu nù Enine Nso jihiaru, nù Filipu nù Porokorosi, Nikanọ, Timoni, Pamenasi nù Nikolasi, nye Antiọku nye bñarnù okpukpe ele Ju.

6 Be gwuzote be nù ruwhnu ele izi, be kpe okpukpe tũkwasi be aka.

7 Ikwu-ọnu Chiokike neezne nù ruwhnu. Ọnu ọgwnugwnu ele sno apna Jizọsi nù rime Jerusẹlem zì kọriri naaba aba. Agìda ele ọkwa ariọhna kwnata Chiokike mkpọma.

Be nwudneru Sitivini

8 Sitivini bụ nwerukna Chiokike gọziri ke nwernu rikne ọ rnu ẹrnu ndu-ẹhni nù nhne elekema n'esilawuru ele badnu.

9 Kọvu nù agwna ele zì n'oro ọgbako ele Ju, ele be kwu Ele Nwernu Ẹhni be, nu ele Ju hiri nù Sirini nù Alẹkizandaria, lizọru megidne a. Be nù ele Ju hi nù Silisia nù Esia nù Sitivini bete neesigha ọka.

10 Kọvu nù be nwée rikne megidne Enine nù akọnichi ke Sitivini ji nookwu ọka.

11 Be gno ele badnu be kaa, "A nurnu hne ọ nookwulu Mozizi nù Chiokike."

12 Ele ka kpakne ele badnu, be lizọ, be nù ele okno badnu nù ele zni iwu, vakwnusi Sitivini, nwudne a, kwuzne a nù ruwhnu ele eze-ikpe.

13 Be kwuya agwna ele jaagba akebne aghalaghala megidne a. Be kaa, "Nwerukna ka zìko nookwu ọka megidne Oro Nso nù Iwu Mozizi.

14 A nurnu hne ọ naakaa nù Jizọsi nye Nazareti ka jaakwnadna Oro Nso Chiokike ka, gbanwu kpakara omen'ẹli aì ke Mozizi nyernu aì."

15 Kpakara ele eze-ikpe legidne Sitivini anya, be whnu nù ruwhnu a nù lele ruwhnu enine izi.

7

Ikwu-ọnu Sitivini

1 Nye risi ariọhna sịkwa Sitivini, "Nhne ka be nookwu megidne i, ọ bụ n'ezi?"

2 Sitivini saru be, "Rumu nda m, nù ele nda, anu bnote nsni. Chiokike ke zì igwugwu mernu Eberham, nda aì ọknani, whnu a anya nga ọ zì n'ẹli Mesopotemia, sù o zneru wuru nù Harani.

3 Ọ kanu a, 'Sigbasi ezi-nu-oro i nù ẹli i, zne n'ẹli ke me jeegesi i.'

4 "Ọ sigbasi ẹli Kalidia zne wuru nù Harani. Nga nda Eberham nwurnu, Chiokike mernu o bnanya n'ẹli ka, hne anu wu kina.

5 N'ige wam Chiokike nyene Eberham agwna ẹli ka ma ọ buru ke a, ọ bụbedi otu renu ọchi, kọvu Chiokike kweru a mkwna nù o jeenye a ẹli ka, ma ọ buru ke a nù ẹbnurnu ele joosno a n'aznu. Nga Chiokike kweru mkwna ka, Eberham nwée rumu.

6 Ka bụ nhne Chiokike kannu a, 'Rumu i joowu n'ẹli berere, hne be jọoburu ele ọhi, be jeeme be nhne ojo riwhu awha ẹno.'

7 Kọvu Chiokike karu, 'M jeekpe ele wam be jọobunu ọhi ikpe, omekwo, be jeehi n'ẹli wam whuya, be jọokponu m risi ẹli nù hna.'

8 Chiokike mernu ọgba-njo-ẹhni ọkpa nka ziri n'esilawuru ya nù Eberham. Eberham kparu Aziki nnwo a nka nga ọ gbaru ọbochi ẹsato kpa be muru a, Aziki kpa Jekọpu nka, Jekọpu kpa nri nù rumu a lawuru ele nda aì ọknani nka.

9 "Ele nda aì ọknani kwnosiri nwene be Josefu awuwa, be rezne a Ijipiti lele ọhi, kọvu Chiokike dagwunu a,

10 dōhia a nū kpakara mkpa a. Nga Josefu gwuzo nū ruwhnu Fero, eze Ijipiti, Chiokike nyernu a ruwhnu ọma nū akōniche. Fero mernu a nye risi ọchichi kpakara Ijipiti nū kpakara ọro eze.

11 “N’ige wam ọknunyo dnarnū nū kpakara ẹli Ijipiti nū Kenanị, ke vuyarū agida awhnūwhnu. Ele nda aị ọknani nwée wiri.

12 Nga Jekọpu nūrnu nū wiri zị nū Ijipiti, o zizne ele nda aị ọknani pji nū mbom.

13 Nga be znernu ke mgba lawūru, Josefu mernu rumu nne a mahia a, Fero mahia masị ezi-nū-oro Josefu.

14 Nga ka mekworu, Josefu ziznenu Jekọpu nda a izi, kanū a, o kwuru kpakara ezi-nū-oro a va Ijipiti, be bụ nri badnū ẹsau nū isne.

15 Jekọpu zne Ijipiti hne ya nū ele nda aị ọknani zị nwū.

16 Be vuru iznu be zne Sẹkem hne be liri be n’ilili ke Ebereham zūnahoru avnūru Hamọ n’iwai.

17 “Nga ige Chiokike jeemezu mkwna o kweru Ebereham dūru, ọnu ọgwngwnu ele ke aị zị nū Ijipiti zilam agida.

18 N’ipne-aznū, eze berere ke maa Josefu bete ngechi Ijipiti.

19 Ọ mernu ele nda aị ọknani nhne rikne, ghọ be aghigho, mee be tuwhu rumu be, ma be nwūma.

20 “Ọ bu n’ige ke nū kpa bụ nga be mūrnu Mozizi, nnwọ marnū mma nū ole anya, be legidne anya n’oro nda a ẹnwa ẹto.

21 Nga be ghasarū a n’ederezi, adna Fero kwuru a, znūlizo a lele nnwọ a rukna.

22 Be znirni a kpakara nhne ọmumu nū akọ ele Ijipiti, Mozizi būru dikne n’ikwu-ọnu nū dimkpa nū rikne.

23 “Nga Mozizi gbarū nri awha ẹno, o kpebi o zne lekasi rumu nda a, ele Izireli.

24 O whnū hne otu nye Ijipiti neemegbu nye Izireli, o zne megwnahianu nye Izireli, gbu nye Ijipiti.

25 O che nū ele ke a jọoghohia nū Chiokike jeehi n’aka a dōhia be, kọvu be ghohiage.

26 Ke chi a bọru, ọ whnūrnu rumu Izireli lawūru nọolu ọgwnu, o zne bno be, ọ kaa, ‘Le, anū bụ rumu nwene, kịni mernu anū nọolu ọgwnu?’

27 “Kọvu nye ke mejoru nwene a kwnahala Mozizi, sịkwa a, ‘Nyele mernu i nye risi nū nye ikpe aị?’

28 I noopio o gbu m lele kpa i gburu nye Ijipiti n’ekile sa?’

29 Nga Mozizi nūrnu ka, ọ gbawhu, zne wuru nū Midia lele nye izne, hne ọ mūrnu rumu rukna lawūru.

30 “Nga nri awha ẹno whemernu, enine izi Chiokike mernu ọ whnū a anya nū riro bẹkwnu isisi matị n’ẹli-ikpa zị Rugwu Sajna ndundu.

31 Nhne Mozizi whnūrnu a jiri anya, o znedu isisi matị wam ndundu, ọ nūrnu nkọli Nyenwe aị,

32 ‘Mawa bụ Chiokike ele nda i ọknani, Chiokike ke Ebereham, nū Aziki nū Jekọpu.’ Mozizi tūru ogwnu k’agida, o nwée rikne legidne anya.

33 Nyenwe aị kanū a, ‘Tuma okoro-ochi i, kwnornu nū hne i gwuzo bụ ẹli nsọ.

34 M leru m anya, whnū awhnūwhnu ele ke m n’Ijipiti. M nūrnu m ọsnu-idne be, m hiednana m ma m znōhia m be. Kịtna, va, m jeezizne i Ijipiti.’

35 “Ka bụ Mozizi wam be juru kaa, ‘Nyele mernu i nye risi nū nye ikpe aị?’ Ya bụ nye Chiokike ziznenu lele nye risi nū nye ọznōhia, hite nū oyi aka enine izi wam ke mernu ọ whnū a anya n’isisi matị wam neerne bẹkwnu.

36 O duhja be hite nu Ijipiti hne o nrurnu ernu ndu-ehni nu nhne elekema, ma n'Okne Osimini Ihie, ma nu eli-ikpa nri awha eno.

37 "O bu Mozizi kannu ele Izireli, 'Chiokike jeeziyanu anu nye owhnurninya lele me, hite nu ele ke anu.'

38 O bu Mozizi ka bu nye zi n'esilawuru agida ele wam n'eli-ikpa, ya nu ele nda ai oknani, ma enine izi wam nye kwunnu a oka nu Rugwu Saina. O nahjaru ikwu-onu ke zi budnu ke Chiokike, ma o nyewhete ai ya n'aka.

39 "Kovu ele nda ai oknani bnogele a nsni, be kwnahala a n'otu nkọ, nu be jaalahna Ijipiti.

40 Be kanu Eroni, 'Menu ai rumu chi berere ke joodu ai. A ma nhne mernu Mozizi wam nye kwuhjaru ai n'Ijipiti.'

41 Nga wam be mee chi lele nnwo ehni, kwanu a arjohna, kwu ikwu iriri, kwnornu nu nhne be jiri aka be kpu.

42 Kovu Chiokike dasinnu be aznu, nyewhete be ma be kpenu mbọ ke oligwe, lele kpa be gbaru a n'okwukwo ele owhnurninya, 'Ele Izireli, anu kwannu m arjohna nu nhne nkesi nri awha eno n'eli-ikpa?

43 Anu vulizoru oro Moloku
anu vulizo mbọ Refani,
ke bu chi anu kpuru, kponu be risi eli.
M jeezihala anu whe Babiloni.'

44 "Ele nda ai oknani vu Oro-Eka ruwhnu Chiokike n'eli-ikpa. Be wuru a lele kpa Chiokike kannu Mozizi wu a, lele odi ke be gesiri Mozizi.

45 Omekwo, ele nda ai oknani ele nahoru Oro-Eka wam n'aka ele nda be, wuru a zne be nu Josua, nahoru ele mba wam eli be, bu ele Chiokike chihalaru nu ruwhnu be. Oro-Eka wam zi tem du ige Devidi.

46 Devidi nahjaru ruwhnu oma n'aka Chiokike, o rjo Chiokike o gharu a ma o wutenu Chiokike Jekpu oro.

47 Kovu Solomoni bu nye wunnu a oro wam.

48 "Kovu Nye Kakwo Nhne Dum Olu za noowu n'oro badnu wuru, lele kpa nye owhnurninya kwuru,

49 'Ka bu nhne Nyenwe ai kwuru,
Oligwe bu ngadna eze m,
owa bu nhne otukwasi ochi m lawuru,
Ndaa okpa oro ke anu joowunu m?
Ndaa hne me jeezukwa inwe?

50 O buo me keru kpakara nhne ka?'

51 "Anu ele risi rikne nu ele ke be kpage nka nu mkpoma, anu mesirni nsni anu. Anu noogwuzigidne Enine Nso, lele kpa ele nda anu oknani mernu.

52 Ndaa nyenum n'esilawuru ele owhnurninya ke ele nda anu kpaknana ehni? Be gburu ele izi Chiokike ele kwuru n'ige wheru ewhe nu nye mee mma jaava, kovu anu reru a, gbu a.

53 Anu nahoru iwu Chiokike hite n'aka ele enine izi, kovu anu bitagele a."

Be turu Sitivini akaworugwu

54 Kpa ele eze-ikpe bnornu nsni nhne Sitivini nookwu, onuma jihjaru be mkpoma, be ta rukwnurnu-ize megidne a n'ovu owe ehni.

55 Enine Nso jipiyaru Sitivini, o lelizọ anya n'oligwe whnu igwugwu Chiokike, nu Jizosi hne o gwuzo n'akarikwnunga Chiokike.

56 O kaa, "Anu le, m whnurnu m hne oligwe kpumernu, nu Nnwọ ke Badnu hne o gwuzo n'akarikwnunga Chiokike."

⁵⁷ Be siwama lulo, gweru aka kpusnime nsnị be, kpakara be gbagidne a.

⁵⁸ Be tọhala a n'aznụ ẹli-ọhna, gweru akaworugwu ọgbu a. Ele akebne chibita iwo be n'ochi otu nnwọ ikoro ọwhna bụ Sọlu.

⁵⁹ Be ọgbu Sitivini, ọ kwnakwu Nyenwe aị, kaa, “Nyenwe aị Jizọsi, narnụ enine m.”

⁶⁰ O gwute mpnerne ọchi, gweru okne nkọli siwama lulo, “Nyenwe aị, bikno, ị gwnụ mmehie ka nụ risi be.” Nga o kwuru kpa, ọ nwụma.

8

¹ Sọlu bniasiri aka n'ẹnwu Sitivini.

Sọlu kpaknarnụ

Ọgbako Chiokike ẹhni

N'ọbochi wam, be bete naakpakna ọgbako Chiokike ke zị nụ Jeruselem ẹhni, kpakara ele kweru ekwe gbas a nụ rime kpakara ẹli Judiya nụ Sameria, okwolem ele izi bụ ele gwnarnụ nụ Jeruselem.

² Agwna ele ọnotu ogwnu Chiokike zne vuru iznu Sitivini lite, be kwnanụ a ẹkwna k'agida.

³ Kọvu Sọlu gbalị o lulu ọgbako Chiokike, o neezne hite n'oro dū n'oro, pnụhia ele rukna nū ele rinya bū ele kweru ekwe tūbna be n'oro ikelu.

Filipu znirni izi ọma

nụ Sameria.

⁴ Kpa kpakara ele kweru nū Nyenwe aị gbasarū, be zne neezni izi ọma kpa be neezne.

⁵ Filipu zne n'ẹli Sameria kpọ okwo izi ọma Karaịsi pji.

⁶ Nga ele badnū nurnu nhne Filipu nookwu ya nū ẹrnu ndu-ẹhni ọ nọrnu, be bnotenu a nsnị.

⁷ Rẹnwu ojo hiri nū rime agida ele badnū neesi okokoba, be gwọru agida ele ngeri ẹhni be dọnwurnu ọdonwu nū ele mgworo.

⁸ Okne snarnima dnarnū nū rime Sameria.

⁹ Otu nwerukna ọwhna a bụ Sajmoni wu nū ẹli wam, nye mernu anya ji ele Sameria hite n'ẹrnu aghigho. Ọ karū nū ọ bụ nye siri rikne.

¹⁰ Kpakara ele wu n'ẹli wam nọsobisinu a, hite nū nye matị dū nū nye zị n'olu. Be naakaa, “Nwerukna ka bụ okne iknernema Chiokike.”

¹¹ Ẹrnu aghigho a bụ nhne o jiri mee anya ji be gbu ọkwnu.

¹² Kọvu nga be kweru izi ọma Filipu znirni gbasiri ẹli-eze Chiokike nū ọwhna Jizọsi Karaịsi, be wū be mini, ma ele rukna ma ele rinya.

¹³ Sajmoni masị kweruru, nga be wuru a mini, ọ dazitasị Filipu ndundu, ẹrnu elekema nū ẹrnu ndu-ẹhni ọ whnurnu jiri a anya.

¹⁴ Ele izi ele zị nū Jeruselem nurnu nū ele Sameria kweruru ikwu-ọnu Chiokike, be zizne Pita nū Jōni pji.

¹⁵ Nga be vaduru, be kpenu be okpukpe ma be nahoru Enine Nso.

¹⁶ Kwnornu nū Enine Nso yaadnakwasila nye ọbula n'esilawuru be. Be wuru be mini nū ọwhna Nyenwe aị Jizọsi kpọi.

¹⁷ Pita nū Jōni tükwasi be aka nū risi, be nahia Enine Nso.

¹⁸ Nga Sajmoni whnurnu nū be nyernu be Enine Nso hite n'otukwasi be aka, o nyee Pita nū Jōni iwai,

¹⁹ kaa, “Anū nyee m rikne ka masị ma nye ọbula ke me tükwasiri aka m lawuru, ọ nahia Enine Nso.”

²⁰ Pita kanū a, “Ji nū iwai ị whu n'ohia, kwnornu nū i cheru nū ị jọzuhiali nkesi Chiokike n'iwai.

²¹ Inwée igwe nū ẹrnu aị, kwnornu nū mkpọma ị zila snam n'anya Chiokike.

²² Tuhnasna hite nū mmūma ojo i, kpe okpukpe, ma Nyenwe aị gbarūnu i.

²³ Kwnornu nū m whnūru nū agida okwno-awūwa jiri nū rime mkpōma i, i bụ nye ikelu ke mmehie.”

²⁴ Saijmoni kanū Pita nū Jōni, “Anū kpenu m okpukpe nū ruwhnu Nyenwe aị ma nhne anū kwuru gharū a dnakwasị m.”

²⁵ Nga be gbarū ama, kpō okwo izi oma Nyenwe aị, Pita nū Jōni lahna Jeruselem. Nū apna kpa be naala be zni izi oma nū ẹli-ohna zị nū Sameria.

Filipu nū nye chi-ịwai

²⁶ Enine izi Nyenwe aị kanū Filipu, “Lizō, zne apna ke zị nū ẹli ẹli ke larū Jeruselem zne Gaza apna ẹli chna chna chna.”

²⁷ Filipu lizō, zne. Otu nwerukna Itiopia bụ okiri badnū lazne ẹli a. Nwerukna ka bụ nye zị mkpa n'ẹli Itiopia, ọ bụ ochi-ịwai eze nyerinya Itiopia nye rẹwhna bụ Kandasị. O znernu o kpenu Chiokike nū Jeruselem.

²⁸ Ọ dazị nū rime ogbo-ẹli a, nọogwnu ọkwukwo Azaya nye ọwhnurninya.

²⁹ Enine Nsọ kanū Filipu, “Zne ndundu daziri n'ehni ogbo-ẹli wam.”

³⁰ Filipu gba ẹso zne, nū kpa ọ nọogwnu hite n'ọkwukwo Azaya nye ọwhnurninya, ọ sịkwa a, “Ị nọoghohia nhne i nọogwnu?”

³¹ Ọ kaa, “Ndaa kpa me jeeji nọoghohia, okwolem ma o nwernu nye jọkowanu m?” O sukwu Filipu, o pnekwnusi a, daziri ẹli nū rime ogbo-ẹli a.

³² Nhne be gbarū n'ọkwukwo nsọ ọ nọogwnu bụ ka,

“Ọ nū lele atnūru be duru zne o gbu ogbu

lele nnwọ atnūru ke dnarnū mgbu nū ruwhnu ele nọoko a rijini,
o kwúle ọka.

³³ Be gwednarnū a n'ẹli, be gōnahoru a n'ikpe zị snam,

Ọ zá nye jookwuli nhne gbasiri rumu a,
kwnornu nū be gwemernu bũdnu a n'owa.”

³⁴ Nwerukna wam sịkwa Filipu, “Bikno, kanū m, ndaa nye nye ọwhnurninya ka nookwu nhne gbasiri a? Ọ bụ ehni a sọbu nye berere?”

³⁵ Filipu bete nookwu ọka, hite nū nhne be gbarū n'ọkwukwo nsọ ka, zni izi oma gbasiri Jizōsi.

³⁶ Kpa be neezne, be vadu hne mini zị, okiri badnū wam kaa, “Le mini, kịni jeeme be gharū ọ wụ m mini?”

[
³⁷ Filipu kaa, “Be nwernu rikne wụ i mini, ọ bũru nū i jiri kpakara mkpōma i kweru.” Ọ kaa, “M kweru m nū Jizōsi Karaịsi bụ Nnwọ Chiokike.”]

³⁸ Nwerukna wam kanū ogbo-ẹli a kwnusi, Filipu nū okiri badnū wam bna nū rime mini, ọ wụ a mini.

³⁹ Nga be hiri nū mini whūya, Enine Nyenwe aị vuhala Filipu. Okiri badnū wam whnūna a berere, kovu, ọ la n'ẹli a nū ovu oso n'onu.

⁴⁰ Filipu whnū ehni a nū Azōtosi. O zne nū kpakara ẹli nọokpo okwo izi oma tem ọ vadu Sizaria.

9

Otuhnasna mkpōma Sọlu

(Ernu 22:6-16; 26:12-18)

¹ Sọlu zị kọriri neemegidine ele noosno apna Nyenwe aị, naakpasị be ogwnu o gbu be. O znekwnusi nye risi arịohna,

² nahoru a okwukwo o jeeny kpakara oro ogbako ele Ju zị nū Damasikosi, ọ bũru nū ọ jọowhnu nye ọbula ke noosno apna Nyenwe aị pịi, ma ọ nwudne be, rukna nū rinya, ma ọ pnūru be va Jeruselem.

³ Kpa o neezne, o gwnarnu matị o dụ Damasịkosi, ngangam, okne iwhe hiri n'oligwe mukwasi a gburugburu.

⁴ O dna n'eli, o nurnu otu akpịri naakanu a, "Solu, Solu, kịni mernu i naakpakna m eñni."

⁵ O sịkwa, "Ị bụ nyele, Nyenwe a?"

Akpịri wam kaa, "Mawa bụ Jizọsi, nye i naakpakna eñni.

⁶ Kọvu lizọ, bna nụ rime eli-ohna, hne be jaakanu nhne i jeemeriri."

⁷ Ele rukna be nụ Solu sno nwée rikne kwu oka, be nurnu akpịri wam, kọvu o zá nye be whnurnu.

⁸ Solu lizọ n'eli, kpume anya a, kọvu o nwée rikne whnụ nhne obula. Be duru a n'aka bna nụ rime Damasịkosi.

⁹ O whnuna osno obochi eto, o ríle wiri, o nwóna mini.

¹⁰ Otu nye sno apna Nyenwe aị zị nụ Damasịkosi, nye rewhna a bụ Ananayasị, o whnurnu owhnurninya, hne Nyenwe aị sukwuru a, "Ananayasị." O naakwe, "Le m, Nyenwe aị."

¹¹ Nyenwe aị kanu a, "Jiknenu, zne n'apna be kwu Zirikwem, nụ ọro Judasị, sịkwa otu nye be kwu Solu, nye Tasọsi. O neekpe okpukpe.

¹² O whnurnu owhnurninya otu nwerukna rewhna a bụ Ananayasị, varu tukwasi a aka a lawuru nụ risi ma o whnurnu osno berere."

¹³ Ananayasị kaa, "Nyenwe aị, agida ele badnu kannu m nhne gbasiri nwerukna ka, nụ kpakara nhne ojo o mernu ele ke i nụ Jeruselem.

¹⁴ O jiri rikne ele risi arịohna va Damasịkosi ma o nwudne kpakara ele naakwnakwu rewhna i."

¹⁵ Nyenwe aị kanu a, "Zne, kwnornu nụ m hōhiaru m a ma o znenu m izi, o jeeme ele bụo ele Ju nụ ele eze mahija rewhna m ma ele Izireli.

¹⁶ M jeegesi a kpakara awhnwhnu o jaata kwnornu rewhna m."

¹⁷ Ananayasị zne, bna n'oro wam, tukwasi aka a lawuru nụ risi Solu, kaa, "Nwene rukna Solu, Nyenwe aị Jizọsi, nye mernu ma i whnu a anya n'apna nga i naava, ziyaru m ma i whnurnu osno berere, ma Enine Nso jihia nụ rime i."

¹⁸ Ngangam, nhne nụ lele rukporo aznu dnahnala n'anya a, o bete o whnu osno, o lizọ, be wu a mini.

¹⁹ Nga o riri wiri, rikne bna a n'ehni.

Solu znirni izi oma nụ Damasịkosi

O daziri obochi ele nụ ele ya nụ ele sno apna Jizọsi nụ rime Damasịkosi.

²⁰ O bna kpakara ọro ogbako ele Ju bete neezni izi oma gbasiri Jizọsi, nụ o bụ Nnwọ Chiokike.

²¹ O jiri kpakara ele nurnu a anya, be neesikwa, "Ka o bụo nwerukna wam noogbu kpakara ele naakwnakwu rewhna ka nụ Jeruselem? O bụo ma o pnurnu be zne nyee ele risi arịohna bụ nhne o kwnornu va hna?"

²² Kọvu Solu gwuzosiri rikne neezni izi oma, neegesi nụ Jizọsi bụ Karaisi n'ezi oka, ke gbagwojiri ele Ju zị nụ Damasịkosi anya.

²³ Nga agida obochi whemernu, ele Ju gba iznuznu o gbu a.

²⁴ Kọvu Solu mahjaru mmuma be. Ele Ju zị neese onu-mgbo iwhehnie nụ abali ma be gbu a.

²⁵ Kọvu ele noosno a jiri abali znuhala a nụ rime nkita n'iketa mkpo.

Solu nụ rime Jeruselem

²⁶ Solu zne Jeruselem, o gbalị ma o snornu ele sno apna Jizọsi, kọvu ogwnu turu be, kwnornu nụ be kwéhiala nụ o bụ nye sno apna Jizọsi.

²⁷ Banabasi varu kwuru a kwuznenu ele sno apna Jizosi, o kowanu be kpa Solu whnurnu Nyenwe ai n'apna, nu Nyenwe ai kwunnu a oka. O kanu be kpa Solu znirni izi oma n'anya rikne nu Damasi^{kosi}.

²⁸ Be nu Solu daziri, o zne nu rime kpakara Jeruselem, gweru anya rikne nookpo okwo izi oma nu rewhna Nyenwe ai.

²⁹ Ya nu ele Ju nookwu Giriki noodogbuta, be pio o gbu a.

³⁰ Nga rumu nda nurnu nhne gbasiri a, be kwuru Solu zne Sizaria, zizne a Tasosi.

³¹ Kpakara ogbako Chiokike ke zi nu Judiya nu Galili nu Sameria zukwaru inwe n'udno. Enine Nso mernu be gwuzosi rikne, ba aba, kpa be noowu budnu notu ogwnu Nyenwe ai.

Pita nu rime Lida nu Jopa

³² Kpa Pita neezneghari kpakara ohna neelekasi rumu Chiokike, o zne lekasi ele zi nu Lida.

³³ O whnu otu nwerukna rewhna a bu Eniasi, nye ngeri ehni a donwurnu odonwu, nye zi n'olu okpata awha esato.

³⁴ Pita kanu a, "Eniasi, Jizosi Kara^{isi} mernu i ehni si rikne, lizo, gbakwata okpata i." Ngangam, o lizo.

³⁵ Kpakara ele wu nu Lida nu Saroni whnurnu a, tuhnasna hne Nyenwe ai zi.

³⁶ Otu nwerinya rewhna a bu Tabita (ke bu Dokasi), nye sno apna Jizosi, zi nu Jopa. O bu nye neeme nhne oma ige obula, neeyinu ele mboni aka.

³⁷ N'ige wam o rja ehni igbugbu, nwuma. Be hnia ehni a dobita n'oro olu.

³⁸ Nga ele sno apna Jizosi nurnu nu Pita zi nu Lida, Jopa zila ikere nu Lida, be zizne ele rukna lawuru, rjasno a, kaa, "Bikno, va wara wara."

³⁹ Pita jiknurnu, snornu be zne. Nga o vaduru be kwuzne a n'oro olu. Kpakara ele rinya nzi be nwurnu zi naakwna ekwna, neegesi a kpakara iwo Dokasi dunnu be nga ya nu be zi.

⁴⁰ Pita chihala kpakara be ederezi, gwu mkpnerne-ochi n'eli, kpe okpukpe, o tuhnasna hne iznu wam zi, kaa, "Tabita, lizo." O sama anya a, nga o whnurnu Pita, o daziri eli.

⁴¹ Pita yisinu a aka, o gwuzoru. O sukwu ele kweru ekwe nu ele rinya nzi be nwurnu, gesi be ya nu budnu.

⁴² Otutnu gbasiri nhne ka gbasia nu kpakara Jopa, agida ele badnu kweru nu Nyenwe ai.

⁴³ Pita daziri agida obochi nu rime Jopa n'oro otu nye notu ernu akpukpo ano be kwu Sa^{imoni}.

10

Pita nu Koneliosi

¹ Otu nwerukna rewhna a bu Koneliosi zi nu Sizaria, nye risi ele ogwnu Rom be kwu Otu ele Itali.

² O bu nye notu ogwnu Chiokike, ya nu kpakara ele oro a neekpenu Chiokike. O neeyinu ele mboni Ju aka, neekpe okpukpe nyee Chiokike kpakara ige.

³ Otu obochi, n'otnu-ige ke eto n'iwnehnie* o whnurnu enine izi Chiokike n'owhnurninya hne o vakwnusiri a, kaa, "Koneliosi."

⁴ Nga o leru anya, ogwnu turu a, o kaa, "O kini, Nyenwe ai?"

* 10:3 otnu-ige ke eto n'iwnehnie: okwukwo ke mbom kwuru ige awa ke tolu

Enine izi kaa, “Chiokike nurnu okpukpe i, o chenwanyarnu ernu oyinu ele mboni aka i.

⁵ Kitna, zizne ele badnu be zne Jopa, be sukwu otu nwerukna rewhna a bu Saimoni Pita.

⁶ O zi n'oro otu nwerukna rewhna a bu Saimoni nye ernu akpukpo anọ, nye oro a zi nu ngeri osimini.”

⁷ Nga enine izi wam ya nu a nookwu oka lahnarnu, Koneliosi sukwu ele izi a lawuru, nu otu nye ogwnu ke bu otu nu rime ele izi a, nye nootu ogwnu Chiokike.

⁸ O kanu be nhne mernu, zizne be Jopa.

⁹ N'ekile a, kpa be naavadu Jopa ndundu, Pita zne n'olu oro n'iwhehnie† zne kpe okpukpe.

¹⁰ Nga wiri gwnurnu a, o pio nhne o jeeri, be zi neesi wiri, o whnurnu owhnurninya.

¹¹ O whnurnu hne oligwe kpumernu, nu nhne nu lele etere be dođnarnu nu nkala eno a du eli.

¹² Kpakara anohia obula ma agwo, ma onunu oligwe zi nu rime a.

¹³ Otu akpiri kanu a, “Pita, lizo, gbu, ri.”

¹⁴ Kovu Pita saru, “Oza, Nyenwe ai, kwnornu nu m rilele m nhne obula ruru oro, mọbu ke zila richna.”

¹⁵ Akpiri wam kwu ke mgba lawuru, “Nhne obula Chiokike karu nu o zi richna, i kwula nhne zila richna.”

¹⁶ Nhne ka mernu mgba eto, kpakara be lahna nu rime oligwe.

¹⁷ Kpa Pita zi naagbadi risi owhnurninya ka, ele rukna wam Koneliosi ziyaru mahiaru oro Saimoni, be gwuzoru n'ogodo onuhna.

¹⁸ Be jikwa, “O bu hna hne Saimoni Pita zi?”

¹⁹ Nga Pita zi koriri naagbadi risi owhnurninya ka, Enine Nso kanu a, “Le, ele rukna eto noopio i.

²⁰ Jiknernu ehni i, snornu be zne, i sgha oka o sno be zne, kwnornu mawa ziyaru be.”

²¹ Pita hiedna n'olu oro, kanu be, “Me bu nye anu noopio. Ndaa nhne anu kwnornu va?”

²² Be kaa, “Koneliosi nye risi neechi ele ogwnu ziyaru ai, o bu nye mee mma nu nye nootu ogwnu Chiokike. Kpakara ele Ju nooso a anya k'agida. Otu enine izi Chiokike kannu a o sukwu i n'oro a, ma o nurnu nhne i jookwu.”

²³ Pita kwubnanya be oro, be dnanyi chi bo. N'osisi a, Pita nu agwna rumu nda ele zi nu Jopa snornu be zne.

Pita zi n'oro Koneliosi

²⁴ N'ekile a, o vadu Sizaria, hne Koneliosi nu rumu nwene a nu ele enyi a o sukwuru zi neese a.

²⁵ Kpa Pita naabna n'oro, Koneliosi kwnusi a, dna n'eli n'ochi a, kpou a risi eli.

²⁶ Kovu Pita tolizo a, kanu a, “Lizo, kwnornu nu m bu m badnu etekne.”

²⁷ Pita nookwunu Koneliosi oka, be bna nu rime oro, o owhnu agida ele badnu gbakoru.

²⁸ O kanu be, “Hite n'iwu ai, anu magwu nu nye Ju nwee rikne meko nhne ya nu nye buo nye Ju mọbu zne oro be. Kovu nu Chiokike karu me kwu badnu nhne zila richna mọbu nhne ruru oru.

† 10:9 *iwhehnie*: okwukwo ke mbom kwuru ige awa isunu

29 Nga anụ sukwuru m, m nwée m rikne sịkwa ajiji. Kịtna, ndaa nhne mernu anụ jiri sukwu m.”

30 Kọneliosi kaa, “Ọbochi ẹno wheru ewhe, m zị m neekpe okpukpe n'otnu-ige ke ẹto n'iwhehnie.‡ Ngangam, otu nwerukna wogwu iwo naacha va-a-a, gwuzoru nụ ruwhnu m.

31 O kaa, ‘Kọneliosi, Chiokike nurnu okpukpe i, o chenwanyarnu ernalu oyinu ele mboni aka i.

32 Zizne ele badnu Jopa be sukwu otu nyerukna rewhna a bu Sajmoni Pita, o bu nye izne n'oro Sajmoni nye ernalu akpukpo anọ, nye wu nụ ngeri osimini.’

33 M ziyannu ji izi wara wara, i mekaru nkarị va. Kịtna, kpakara aji zị nū ruwhnu Chiokike, neese o nurnu kpakara nhne Nyenwe aji nyernu n'iwu ji kanu aji.”

Ikwu-ernalu Pita n'oro Kọneliosi

34 Pita bete o kwu oka, kaa, “M maharu m kịtna n'ezi oka nū Chiokike za neele badnu anya nū ruwhnu.

35 Kọvu Chiokike nookwubnanya nye obula ke notu ogwnu a, nye neeme mma hite nū mba obula.

36 Anu magwu izi Chiokike ziznenu ele Izireli, nookpo okwo izi oma udno hite nū Jizosi Karaịsi, nye bu Nyenwe kpakara badnu.

37 Anu magwu nhne mernu nū kpakara Judiya hite nū Galili, kpa Joni znikworu izi oma owu mini.

38 Anu magwu masi nhne gbasiri Jizosi nye Nazareti, kpa Chiokike nyernu a Enine Nso nū rikne. O zneghariri nū rime kpakara eli neeme nhne oma, noogwo kpakara ele renwu ojo nwhugwu, kwnornu nū Chiokike dagwunu a.

39 “A bu ele akebne kpakara nhne o mernu n'eli ele Ju ma nū rime Jeruselem. Be kpogidne a n'ogba, gbu a.

40 Kọvu Chiokike mernu ma o hi n'enwu lizo n'obochi ke ẹto, mee ma o whuya iwhe.

41 O buo kpakara ele badnu whnurnu a, kọvu o bu aija ele akebne Chiokike hohiaru. Aji nū a snornu ri wiri, nwọ mini nga o hiri n'enwu lizo.

42 O nyee aji iwu a zne zni izi oma ka nyee ele badnu, a gba akebne nū o bu ya nye Chiokike hohiaru o buru nye ikpe kpakara ele zị budnu nū ele nwurnu onwu.

43 Kpakara ele owhnurninya gbaru nhne gbasiri a, nū kpakara ele jeekweru nū ya, be jaagbaru be mmehie be hite nū rikne ke zị nū rewhna a.”

Ele buo ele Ju naharu Enine Nso

44 Kpa Pita zị nookwu oka, Enine Nso dnakwasiri kpakara ele noobno nsni nū izi oma.

45 O gbagwojiri ele Ju kweru ekwe ele snornu Pita hi nū Jopa va anya, nū Chiokike wukwasiri ele buo ele Ju Enine Nso.

46 Be nurnu kpa be naaznarni Chiokike n'ikwu-ernalu zị odo n'odo.

Pita kaa,

47 “Ele ka naharu Enine Nso lele aji, o zị nye joobnosni o wu be mini?”

48 O nyee iwu be wu be mini nū rewhna Jizosi Karaịsi. Be riasno Pita ma ya nū be daziri obochi ele nū ele.

‡ 10:30 otnu-ige ke ẹto n'iwhehnie: okwukwo ke mbom kwuru ige awa ke tolu

11

Pita kɔwaru nhne o mernu

¹ Ele izi nū rumu nda zī nū kpakara Judiya nurnu nū ele b̄o ele Ju nah̄iaru ikwu-ɔnu Chiokike.

² Nga Pita znernu Jeruselem, ele be kparū nka liz̄o kwugidne Pita,

³ kaa, “I znernu n'oro ele be kp̄age nka, jī nū be rik̄o wiri.”

⁴ Pita kanū be nhne mernu hite n'oziri dū okwukwo,

⁵ “Kpa me zī neekpe okpukpe nū ɛli J̄opa, m whn̄urnu m ɔwhnurninya, m whn̄urnu nhne nū lele etere be d̄odnarnu nū ngeri ɛno a hite n'oligwe, ɔ kw̄usi hne me zī.

⁶ M lebna anya n'olu a, m whn̄u nū rime a an̄ohia, nū okne an̄ohia ojo, nū agw̄o nū ɔnunu oligwe.

⁷ M nurnu m otu akp̄iri naakanū m, ‘Liz̄o, Pita, gbu, ri.’

⁸ “Kovu m karū m, ‘Oza, Nyenwe aī, ɔ zá nhne ɔbula r̄uru ɔru m̄obu ke z̄ila r̄ichna bnaleru m ɔnu.’

⁹ “Akp̄iri wam kwu ke mgba law̄uru, kaa, ‘Nhne ɔbula Chiokike karū nū ɔ zī r̄ichna, i kw̄ula nhne z̄ila r̄ichna.’

¹⁰ Nhne ka mernu mgba ɛto, omekwo, kpakara be lahnarnū oligwe.

¹¹ “N'ige wam, ele rukna ɛto ele be ziyannu m hite nū Sizaria vaduru nū ɔro wam me zī.

¹² Enine Ns̄o kanū m me sígha ɔka, kovu me snornu be zne. Rumu nda m isunu ka hiri nū J̄opa snornu m zne Sizaria, kpakara aī bna n'oro K̄oneliōsi.

¹³ ɔ kanū aī kpa ɔ whn̄urnu enine izi gwuzo n'oro a, ke kannu a, ‘Zizne ele badnū zne J̄opa, be sukwu otu nwerukna r̄ewhna a b̄u Saīmoni Pita.

¹⁴ ɔ jaakanū i ɔka ke be j̄oznohia jī nū ezi-nū-oro i.’

¹⁵ Kpa me pan̄izornu nookwunu be ɔka, Enine Ns̄o dnakwas̄iri be lele kpa ɔ dnakwas̄iri aī n'oziri.

¹⁶ M chenwanya ikwu-ɔnu Nyenwe aī kwuru, ‘J̄oni jiri mini wū ele badnū mini, kovu be jeeji Enine Ns̄o n̄owu anū mini.’

¹⁷ Chiokike nyernu be nkesi wam ɔ nyernu aī kpa a kweru nū Nyenwe aī Jiz̄osi Karaīsi. M b̄u nyele ke me j̄obnosnili Chiokike?”

¹⁸ Nga be nurnu nhne ka, be kpusni ɔnu be, be znarn̄i Chiokike, kaa, “Chiokike nyernu ele b̄o ele Ju obirizi ɔtuhnasna mkp̄oma ma be z̄iri b̄udnu.”

ɔgbako ke zī n'Ant̄ioku

¹⁹ K̄itna, okne ɔkpakna ɛhni wam ke wh̄uyaru kwnornu ɛnwu Sitivini mernu ele kweru ekwe gbasa dū Fonisia nū Saīporosi nū Ant̄ioku. Be neezni ele Ju kp̄oi izi ɔma.

²⁰ Kovu agwna ele kweru ekwe, ele rukna hiri nū Saīporosi nū Sirini znernu Ant̄ioku, be nū ele b̄o ele Ju nookwu ɔka, n̄okpo okwo izi ɔma gbas̄iri Nyenwe aī Jiz̄osi.

²¹ Iknernema Nyenwe aī sno be, aḡida ele badnū kweru, t̄uhnasna hne Nyenwe aī zī.

²² ɔtnutnu ka d̄uru ɔgbako ke zī nū Jeruselem nsn̄i, be zizne Banabas̄i Ant̄ioku.

²³ Nga ɔ varū, whn̄u ɛnu Chiokike n'esilaw̄uru ele ke a, mkp̄oma s̄oru a n'ɔnu, ɔ kanū be yisi ɛhni gweru kpakara mkp̄oma be t̄ukwasi nū Nyenwe aī.

²⁴ Banabas̄i b̄u ɔmamarna badnū ke nwernu Enine Ns̄o nū ɔtukwasi ovu. Aḡida ele badnū kweruru nū Nyenwe aī.

²⁵ Banabas̄i zne ɔ pio S̄olu nū Tas̄osi.

²⁶ Nga o piohjaru a, o kwuya a Antiokoku. Be lawuru zi neezni agida ele badnu nhne nu Antiokoku otu awaha. Be sukwuru ele sno apna Jizosi "Kirisiteni" oziri n'Antiokoku.

²⁷ N'ige wam, agwna ele owhnurninya hiri nu Jeruselem zne Antiokoku.

²⁸ Otu nyenum nu rime be nye rewhna a bu Agabosi, gwuzoru nu rikne Enine Nso whnu owhnurninya nu okne oknuno jaazi nu kpakara owa. (Oknuno ka dnarnu nga Kalaudiosi neechi.)

²⁹ Ele sno apna Jizosi kpebi nu nye obula jeezizne nhne kpa o nwernu rikne yisinu rumu nda ele zi nu Judiya aka.

³⁰ Ka bu nhne be mernu, be bita iwai gweznenu ele risi ogbako hite n'aka Banabasi nu Solu.

12

Erödu gburu Jemisi,

tü Pita ikelu

¹ N'ige ka Eze Erödu panizoru o kpakna agwna ele zi n'ogbako Chiokike ehni.

² O gweru ama-ogwnu gbu Jemisi nwene rukna Jöni.

³ Nga o whnurnu nu o sörü ele Ju ovu n'önu, o zne nu ruwhnu nwudne Pita. (Ka mernu n'ige Iriri Brödi Whüge Öwhu.)

⁴ Nga o nwudnernu Pita, o yisi a n'oro ikelu, o gweru a nyewhete n'aka otu ele ogwnu eno eno. Erödu neese o gwehja a n'ikpe ohna nga Iriri Ögawhe whemernu.

⁵ Pita zi n'oro ikelu, kovu ogbako Chiokike neekpesi okpukpe rikne gbasiri a nu ruwhnu Chiokike.

Pita whüyarü n'oro ikelu

⁶ N'abali ke joobo obochi Erödu jeegweya nu ruwhnu ele ohna, Pita zi neezni anyarna n'esilawuru ele ogwnu lawuru ele neese a. Be türu a ijigba lawuru, ele neese nhne gwuzo n'önu-mgbo.

⁷ Ngangam, enine izi Nyenwe ai varu gwuzoru, iwhe mukwasi nu rime oro ikelu. Enine izi wam kpatu Pita aka nu ngeri ehni, o kanu a, "Lizo wara wara." Ijigba dnahnala n'aka Pita.

⁸ Enine izi wam kaa, "Suru ajni i, woru okoro-ochi i." Pita mee kpam, enine izi wam kanu a, "Woru iwo i, snornu m."

⁹ Pita snornu a whöga n'oro ikelu. O maá nu hne enine izi wam neeme bu nhne zi ire. O che nu o nowhnu owhnurninya.

¹⁰ Be whe ele nse ke mbom, nu ke ebo, be va nu ke ipne-aznu ke bu önu-mgbo rugwe bnarnu nu rime eli-ohna. Önu-mgbo wam gbama n'aka a. Be whöga, be neezne n'otu apna, ngangam, enine izi wam ghasa Pita.

¹¹ Pita mahja ehni a, o kaa, "Kitna, m maam nu o bu n'ezi nu Nyenwe ai ziyaru enine izi a, döhia m n'aka Erödu, döhia m nu kpakara nhne ele Ju neele anya a."

¹² Nga o mahjaru nhne ka, o zne nu oro Meri nne Jöni Makü. Agida ele badnu gbakoru pii neekpe okpukpe.

¹³ Pita znu aka nu önu-mgbo, otu nnwö rinya rewhna a bu Roda zne o nakwe a.

¹⁴ Nga o mahjaru nköli a, ovu oso n'önu mernu o nwée rikne gbama oro, o gba eso zne kanu be nu Pita gwuzogwu nu onuhna.

¹⁵ Be kanu a, "Anyá búo i öma." Kovu o kwusi a rikne, be kanu a, "Ö bu enine a."

16 Kọvu Pita zị ọriri nooznu aka n'ọnu-mgbo. Nga be gbamarnu ọro, whnu a, o gbagwojiri be anya.

17 O whenu be aka be kpusnime ọnu be. O kanu be kpa Nyenwe aị gwehjaru a n'oro ikelu. O kanu be, "Anu kanu Jemisi nu rumu nda m ele berere." O whoza zne hne berere.

18 N'osisi, o mernu ele neese nhne anya aghari k'agida nhne mernu Pita.

19 Erudu kaa be pio a, kovu be nwée rikne piohia a, o kaa be sikwa ele neese nhne ajiji, o nyee iwu be gbu kpakara be. Omekwo, Erudu hiri nu Judiya zne nu Sizaria daziri ige mati.

Enwu Erudu

20 Ele Taya nu Sajdoni mernu Erudu ovu owe ehni, be ziri n'otu zne o whnu a, be mee ma Bilatosi nye neelekwa ọro eze gbagwasinu be. Be zne riasno Erudu ma udno ziri, kwnornu nu eli be neenwehia nhne oriri hite n'eli a.

21 N'obochi be hohiaru, Erudu woru iwo eze a daziri nu ngadna eze a, kwunu ele badnu wam oka.

22 Be siwama lulo, kaa, "O buo badnu nookwu oka ka, kovu o bu otu chi."

23 Ngangam, enine izi Nyenwe aị lidna Erudu kwnornu nu o nyene Chiokike igwugwu. Rukpurukpuru ri a, o nwuma.

24 Ikwu-ọnu Chiokike neezne nu ruwhnu, naagbasa, nooso oso.

25 Nga Banabasi nu Solu rnukworu ọnu be, be hi nu Jeruselem hiehna kwuru Joni Maki.*

13

Be zihalaru Banabasi

nu Solu

1 N'ogbako Chiokike ke zị nu Antioke, ele neezni nhne nu ele ọwhnurninya zị, Banabasi, Simioni nye be kwu Naija, Lusosi nye Sirini nu Mane, nye ya nu Eze Erudu soru, nu Solu.

2 Kpa be zị neekpeni Nyenwe aị, noovu ọnu, Enine Nso kaa, "Anu kewamanu m Banabasi nu Solu, ma be zne rnu ọnu me kwnornu sukwu be."

3 Nga be vukworu ọnu, kpe okpukpe, be tukwasi be aka nu risi, zihala be.

Nu rime Saipurosi

4 Kpa Enine Nso zihalaru Banabasi nu Solu, be zne Selusia, hite nu pii zne Saiporosi.

5 Nga be duru Salamisi, be kpo okwo ikwu-ọnu Chiokike nu rime ọro ogbako ele Ju, be nu Joni Maki nye izi be.

6 Be zne n'eli ohia esilawuru tem be du eli-ohna Pafosi, be whnu otu nye ọnu aghigho rewhna a bu Ba-jizosi, nye Ju kwuru ehni a nye ọwhnurninya.

7 O bu enyi nye neechi eli ohia esilawuru wam nye rewhna a bu Sajosi Pulosi, nye nweru akoniche. Nye ochichi wam sukwuru Banabasi nu Solu nu ruwhnu a ma o nurnu ikwu-ọnu Chiokike.

8 Kovu nye ọnu aghigho ka, Elimasi (ke bu rewhna a nu ikwu-ọnu Giriki), pioro o kwnama nye neechi eli wam ma o gharu o kweru nu Jizosi.

9 Solu, nye rewhna bu Polu, nye Enine Nso jiharu a nu rime, lekwasiri a anya,

10 kaa, "Ji nnwo Ekwensu, nye irno kpakara nhne buru oma. Ji nye kpakara ọnu aghigho nu aruru-eli jiri nu rime. I jeesigbasi o gbanwo apna ziri ezi ke Nyenwe aị?

* 12:25 be hi nu Jeruselem hiehna kwuru Joni Maki Okwukwo berere kwuru, be lahna Jeruselem, be nu Joni Maki.

11 Kĩna, le, aka Chiokike zì n'olu risi megidne i, i jookpu isni, i jòowhnu iwhne ke ọbochi ige matì.”

Ngangam, Ẹlimasi whnũrnu nhne nũ lele rijiriji nũ ọchichiri n'anya a, ọ wọga noopio ñi joodu a n'aka.

12 Nye ghechi ẹli wam kweru nga ọ whnũrnu nhne mernu, iznizni ikwu-ọnu Chiokike jiri a anya.

*Nu rime Antiọku
ke Pesidia*

13 Pọlu nũ ele nũ ya sno kwọru ọgbo hiri nũ Pafọsi zne Pega nũ rime Pamfilia, kọvu Jọni Makì gharuru be, lahna Jeruselem.

14 Be hi nũ Pega va nũ Antiọku ke Pesidia nũ Ọbochi Ozukwa Inwe, be bna nũ rime ọro ọgbako ele Ju daziri ẹli.

15 Nga be gwnũrnu hite n'Iwu Mozizi nũ nhne ele ọwhnurninya gbarũ, ele risi ọro ọgbako zi be izi, “Rũmu nda aì, ọ jaamasì aì ọ bũru nũ anũ ji izi ọkwnata ovu anũ jeezni ele ka.”

16 Pọlu gwuzoru, whenu be aka, bete nookwu ọka, “Ele Izireli ibne m, nũ kpakara ele ẹli berere neekpenu Chiokike, anũ bnote m nsnì.

17 Chiokike ke ele Izireli hohiaru ele nda aì ọknani, mee be okne mba nũ ige be zì n'ẹli Ijipiti, Chiokike hiri n'ẹli Ijipiti kwuhia be n'aka rikne.

18 Ọ nagidnernu be nri awha ẹno n'ẹli-ikpa.

19 O luluru mba ẹsau ke ẹli Kenanì, gweru ẹli be nyee ele ke a ma ọ bũru ke be.

20 Kpakara nhne ka mernu nhne nũ lele riwhu awha ẹno nũ nri isne.

“Omekwo, o nyee be ele ikpe, tem ọ dũ ige Sameli nye ọwhnurninya.

21 Nga be piuru eze, Chiokike nyernu be Sọlu nnwọ Kisi, ke hi n'avnũrnu Benjamini, bũru eze nri awha ẹno.

22 Nga o gwemernu a, Chiokike mernu Devidi eze be, ka bũ nhne Chiokike kwuru gbasiri a, 'M whnũrnu m Devidi nnwọ Jesi, nye nũ lele mkpọma m, nye jeeme kpakara nhne me piuru o mee.'

23 “Hite n'avnũrnu nwerukna ka, Chiokike gwelizọru Nye Ọznohia Jizọsi, nyee Izireli lele kpa o kweru mkwna.

24 Si Jizọsi panizoru ẹrnu a, Jọni beru ọsno kọ okwo ma kpakara ele Izireli tũhnasna mkpọma ma be wũ be mini.

25 Kpa Jọni nọornukpa ẹrnu a, ọ kaa, 'Anũ neeche nũ m bũ m nyele? M búo m nye wam anũ neele anya a. Kọvu ọ naava n'aznũ m, m kwésige m owhudnahie tọma eriri okoro-ọchi a lawuru.'

26 “Rũmu nda m, ele avnũrnu Eberham nũ kpakara ele ẹli berere ele neekpenu Chiokike, izi ọznohia ka bũ nhne be neezni aì.

27 Ele wu nũ Jeruselem nũ ele risi be máa nũ ya bũ Nye Ọznohia, be ghóhiage ikwu-ọnu ele ọwhnurninya be nọogwnu kpakara Ọbochi Ozukwa Inwe. Kọvu be mernu nhne ele ọwhnurninya kwuru mezu nga be kperu a ikpe ẹnwu.

28 Ọ bũ ezi nũ be nwée nhne be ji ma a ikpe ẹnwu, be kaa Pailetì gbu a.

29 Nga be mezuru kpakara nhne be kwuru n'ọkwukwo nsọ gbasiri a, be vudna n'olu ọgba, lite a.

30 Kọvu Chiokike mernu o hi n'ẹnwu lizọ.

31 O mernu ele snornu a hi nũ Galili va Jeruselem whnũ a anya. Be bũ ele akebne nyee ele Izireli.

32 “A neezni anũ izi ọma Chiokike kweru ele nda aì ọknani mkwna.

33 Chiokike mezunnu aì rũmu be mkwna wam, hite nũ ome Jizọsi hi n'ẹnwu lizọ. Lele kpa be gbarũ Eri Ọma ke ẹbo, 'Jiwa bũ Nnwọ m,

m m̄rnu m j̄i tna.’

34 “Nhne Chiokike kwuru gbas̄iri ome ma o hi n’̄enwu liz̄o, o j̄oro oro, b̄u ka,

‘M̄ jeenye i ngozi z̄i ns̄o ke kwesiri ̄okwnata ovu me kweru Devidi mkwna.’

35 O kwuru n̄u hne berere,

‘I j̄eekwe ma nye ns̄o ke i ro oro.’

36 “Devidi mernu nhne Chiokike pioru o mee n’ige ke a, ̄o nw̄u, be lite a n̄u ngeri lilili ele ke a, o ro.

37 K̄ovu nye wam Chiokike mernu o hi n’̄enwu liz̄o r̄oge oro.

38 “R̄umu nda m, an̄u mah̄ia n̄u ̄o b̄u hite n̄u Jiz̄osi hne a n̄okpo okwo ̄ogbaru mmehie.

39 Hite n̄u ya, kpakara ele kweru jeenwernu ̄ehni be hite n̄u kpakara mmehie. Ka b̄u nhne Iwu Mozizi nw̄ee rikne mee.

40 Anya d̄u an̄u ̄eli, ̄o z̄i nhne ele ̄owhnurninya kwuru be mezu n’̄ehni an̄u,

41 ‘Le, an̄u ele ̄onu ̄ojo,

o j̄i an̄u anya, an̄u nw̄u ̄enwu,

kwnornu n̄u nhne me j̄ornu n’̄obochi an̄u,

b̄u nhne an̄u j̄eekweru,

̄o b̄ubedi n̄u nye berere kan̄u an̄u.’ ”

42 Kpa P̄olu n̄u Banabas̄i n̄oowhoga n’̄oro ̄ogbako, be kan̄u be va n’̄obochi Ozukwa Inwe berere kwunu be ̄oka.

43 Nga ̄ogbako gbasar̄u, agida ele Ju n̄u ele bnarn̄u okpukpe ele Ju snornu P̄olu n̄u Banabas̄i. Be nookwunu be ̄oka ma be daz̄igidne n’oru ke Chiokike.

44 N’̄obochi Ozukwa Inwe berere, kpakara ele z̄i n’̄eli wam znernu ̄o n̄urnu ikwu-̄onu Nyenwe āj.

45 Nga ele Ju wh̄urnu igbudu badn̄u wam, ̄owho-anya jih̄ia n’ovu be, be kwu ̄oka megidne nhne P̄olu kwuru, kpas̄i a iwhnerne.

46 K̄ovu P̄olu n̄u Banabas̄i jiri anya rikne kwu ̄oka, kaa, “O z̄i mkpa n̄u a znernu ebe ̄osno kwunu an̄u ikwu-̄onu Chiokike, k̄ovu hne an̄u juru a, gwn̄u ̄ehni an̄u ele kw̄esile b̄udnu kw̄o okwo, a jaaghar̄u an̄u, znekwnusi ele b̄uo ele Ju.

47 Kwnornu n̄u ka b̄u nhne Nyenwe āj nyernu n’iwu,

‘M̄ ziznernu m an̄u ma an̄u b̄uru iwhne ke ele b̄uo ele Ju,

ma an̄u b̄uru apna ̄oznohia mmehie ke kpakara ̄owa.’ ”

48 Nga ele b̄uo ele Ju n̄urnu nhne ka, mkp̄oma s̄oru be n’̄onu k’aḡida, be znarn̄i izi ̄oma Nyenwe āj, ele be h̄ohiaru kwnornu b̄udnu kw̄o okwo kweru.

49 Ikwu-̄onu Nyenwe āj gbasar̄u n̄u kpakara ̄eli.

50 K̄ovu ele Ju kpasu ele risi n̄u rime ̄eli n̄u ele rinya kwu ele ̄eli berere ele neekpenu Chiokike, be bete ̄o kpakna P̄olu n̄u Banabas̄i ̄ehni, be ch̄ihala be n’̄eli be.

51 Ele izi wam l̄isnama r̄izna ̄ochi be megidne be, zne Āikoniom.

52 Ele sno apna Jiz̄osi z̄i n̄u Ant̄joku nw̄udna k’aḡida, Enine Nso jih̄ia be.

14

Nu rime Āikoniom

1 Nu rime Āikoniom, P̄olu n̄u Banabas̄i znernu n̄u rime ̄oro ̄ogbako ele Ju lele kpa be mesi, be kwu ikwu-̄onu Chiokike n̄u rikne ke mernu agida ele Ju n̄u ele b̄uo ele Ju gh̄o ele kweru ekwe.

2 K̄ovu ele Ju ele kw̄e ekwe kpasuru ovu owe ̄ehni ele b̄uo ele Ju megidne r̄umu nda āj.

³ Pọlu nọ Banabasị daziri pji gbu okwuu, be kwusi nhne gbasiri oru Nyenwe aị rikne. Nyenwe aị mesiri ernali ọma be rikne hite n'ernali ndu-ehni nọ ernali elekema ke be n'ernali.

⁴ Kọvu ele ẹli wam kewaru, agwna be danu ele Ju, ele berere dagwunu ele izi wam.

⁵ Ele Ju nọ ele buo ele Ju gba izuznu, be nọ ele risi be mee be nhne rikne, o tu be akaworugwu nọ o gbu ele izi wam.

⁶ Kpa ele izi wam nurnu a, be gbazne Lisitira nọ Dẹbi, ẹli ele Laikonía, nọ ẹli ke gbaru a gburugburu,

⁷ hne be zi neezni izi ọma.

Nu rime Lisitira nu Dẹbi

⁸ Otu nwerukna zi nọ Lisitira nye dnarnu mgworo n'ochi lawuru, o bu nye mgworo kpa be murnu a, o znokolele izne.

⁹ O dazi noobno nsi nhne Pọlu nookwu, Pọlu le a anya whnu nọ o nwernu otukwasi ovu be ji o gwọ a.

¹⁰ Pọlu gweru okne nkoli si okokoba kaa, "Lizo n'ochi i lawuru." Nwerukna wam gbụ ewuru, bete neezni izne.

¹¹ Nga agida ele badnu wam whurnu nhne Pọlu mernu, be bete esi okokoba n'ikwu-onu ele Laikonía, kaa, "Chi aị gholam badnu va lekasi aị."

¹² Be jita Banabasị Zusi, be jita Pọlu Hemisi kwnornu nọ o bu onu nookwu oka.

¹³ Nye naakwa arịohna Zusi ke oro a zi nọ ruwhnu ẹli-ohna gweya ehni nọ igwugwere n'ohna. Ya nọ agida ele badnu wam noopio o kwanu ele izi wam arịohna.

¹⁴ Nga Pọlu nọ Banabasị nurnu nhne be noopio o mee, be dọwa iwo be, gba eso bna n'esilawuru agida ele badnu wam, neesi okokoba,

¹⁵ "Ele nwe m, ndaa nhne anu kwno neeme nhne ka? A bu badnu etekne lele anu. A varu o kpo okwo izi ọma ma anu hi nọ kpakara nhne ka bna iru whya, tūnasnakwnusi ke Chiokike zi budnu, nye mernu oligwe nọ ọwa nọ okne osimini nọ kpakara nhne zi nọ rime be.

¹⁶ N'ige wheru ewhe, Chiokike gharu kpakara ele badnu ma be zne n'apna ke be,

¹⁷ kovu, Chiokike mernu ehni a whya iwhe hite nọ nhne ọma o neeme, o neenye anu mini ozuzo hite n'oligwe, nọ mkpuru n'ige o kwesiri, o neenye anu wiri, mee snarima jihia mkpoma anu."

¹⁸ O bu n'ezi nọ ele izi wam kwuru oka kpa, o bu nhne rarụ ehni o mee be gharu o kwanu be arịohna.

¹⁹ Agwna ele Ju hiri nọ Antjoku ke Pisidia nọ Aikoniom va, be doro igbudu ele badnu wam yisi n'ehni be, be tu Pọlu akaworugwu, dghala a nọ rime ẹli be, be neeche nọ o nwunam.

²⁰ Kovu kpa rumu nda gharu a gburugburu, o lizo lahna nọ rime ẹli-ohna, ke chi boru ya nọ Banabasị zne Dẹbi.

Be lahna Antjoku nu rime Siriya

²¹ Pọlu nọ Banabasị zne zni izi ọma nọ Dẹbi, be nwehia agida ele sno apna Jizos. Be lahna Lisitira, hite pji zne Aikoniom, zne Antjoku nu rime Pisidia.

²² Be mee ele kwero ekwe gwuzosi rikne, kasi be mkpoma ma be dazigidne n'okwnata ovu, be kaa, "A jeehi nọ rime agida awhnuwhnu bna n'eli-eze Chiokike."

²³ Nụ rime ọgbako Chiokike ọbula, Pọlu nụ Banabasị ọhọia ele okno badnụ, hite nụ okpukpe nụ ovu ọnu chete be nụ ruwhnu Nyenwe aị, nye be kwnataru mkpọma.

²⁴ Nga be znezuru ẹli Pisidia, be va nụ Pamfilia.

²⁵ Be kpọ okwo izi ọma nụ rime Pega, hite pji zne Atalja.

²⁶ Be hite n'Atalja kwọru ọgbo lahna Antiọku, hne be gweru be nyewhete n'oru ke Chiokike nụ ẹrnu be rnukworu* kịtna.

²⁷ Nga be vaduru nụ rime Antiọku, be sukwukọta ele ọgbako Chiokike kanu be kpakara nhne Chiokike jiri be rnụ, nụ kpa ọ gbamanu ele buo ele Ju ọnuhna ma be kweru.

²⁸ Be nụ ele kweru ekwe daziri pji gbu ọkwnu.

15

Ọgbako ke zi nụ Jeruselem

¹ Agwna ele rukna hiri nụ Judiya va Antiọku bete neezni ọmu nda, kaa, “Be nwée rikne znọhia anu okwolem ma be kparu anu nka, lele kpa Iwu Mozizi kwuru.”

² Pọlu nụ Banabasị nụ be ọodogbuta gbasiri nhne ka, be kwekota nụ Pọlu nụ Banabasị nụ agwna ele zi nụ Antiọku jeezne Jeruselem whnu ele izi Karaisi nụ ele okno badnụ gbasiri nhne ka.

³ Ele ọgbako Chiokike zizne be, be zne nụ rime Fonisia nụ Sameria, be kwuhia kpa ele buo ele Ju tuhnasnakwnsiri Chiokike. Ọtutnu ka mernu kpakara ọmu nda nwudna k'agida.

⁴ Nga be vaduru Jeruselem, ọgbako Chiokike, nụ ele izi nụ ele okno badnụ nabnanyarnu be, be kanu be kpakara nhne Chiokike jiri be mee.

⁵ Kọvu agwna ele kweru ekwe ele otu ele Farisi gwuzoru, kaa, “Be jaakpariri be nka, kanu be bita Iwu Mozizi.”

⁶ Ele izi nụ ele okno badnụ zne iznuznu ma be lebna anya nhne gbasiri oka ka.

⁷ Nga be kwuru agida oka gbu ọkwnu, Pita gwuzoru, kaa, “Ọmu nda m, anu magwu kpa n'ige wheru ewhe kpa Chiokike ọhiaru m n'esilawuru anu, zne zni ele buo ele Ju izi ọma ma be nurnu, kweru masi.

⁸ Chiokike nye marnu mkpoma kpakara badnụ, gbaru akebne gbasiri be. O nyernu be Enine Nso lele kpa o nyernu aị.

⁹ O kpáge ike n'esilawuru aị nụ be, o snusnarnu ovu be kwnornu nụ be kweruru.

¹⁰ Kini kpararu anu jaakpa Chiokike iru kịtna hite n'otukwasi ele kweru ekwe ivu ke aị nụ ele nda aị ọknani nwée rikne vuli.

¹¹ Ọza, a kweruru, be znọhia aị hite n'oru Nyenwe aị Jizosi lele be masi.”

¹² Kpakara be daziri bii kpa be noobno nsnj nhne Banabasị nụ Pọlu nookwu gbasiri kpakara ẹrnu ndu-ẹhni Chiokike hiri n'aka be rnụ n'esilawuru ele buo ele Ju.

¹³ Nga be kwukworu, Jemisi gwelizo ọnu kaa, “Ọmu nda m, anu bnote m nsnj n'ọnu.

¹⁴ Saịmoni karu kpa Chiokike hiri nụ mbom gesi ele buo ele Ju ruwhnu ọma a, o mernu agwna be buru ele ke a.

¹⁵ Ikwu-ọnu ele ọwhnurninya nụ nhne ka dnakotaru n'otu, lele kpa ọkwukwo nsọ kwuru,

¹⁶ Nyenwe aị karu, Omekwo, m jaalahna,

* 14:26 Gwnu Ernu Ele Izi 13:1,2.

m jeegwulizọ ọro Devidi dnarnụ adna,
m jeegweme mkpomkpo ọro a, wulizo a,
m jeeme a o gwuzosi rikne berere.

¹⁷ M jeeme ka ma kpakara ele badnụ pio Nyenwe aị,
kpakara ele bụo ele Ju ele me sukwuru ma be bụru ke m.

Ka bụ nhne Nyenwe aị nye mernu kpakara nhne kwuru.

¹⁸ O bụ nye mernu ele badnụ mahia kpakara nhne hite nụ mbom.' "

¹⁹ Jemisi nookwuzne, "Echiche m bụ ka, a kpákna ele bụo ele Ju ẹhni, bụ ele tughnasnakwnusiri Chiokike.

²⁰ Kọvu a gbanụ be ọkwukwo, kanụ be, be rí wiri ọbula zila richna be kwaru ariohna nyee renwu, be mékọ ọyi, be ríkọ anọ ọbula be hìgburu ẹhigbu, be ríkọ ọvnarna.

²¹ Kwnornu nụ be nọogwnu Iwu Mozizi agida ige wheru ewhe n'oro ọgbako be nụ kpakara Ọbochi Ozukwa Inwe, be nọokpo okwo ikwu-ọnu Mozizi nụ kpakara ẹli."

Ele izi gbanụ ele bụo

ele Ju ele ọkwukwo

²² Ele izi nụ ele okno badnụ, be nụ kpakara ọgbako Chiokike, kpebi ọ hohia agwna ele badnụ n'esilawuru be zizne be Antiọku, be nụ Pọlu nụ Banabasi. Be hohia Judasi, nye be kwu Basabasi, nụ Saịlasi, ele rukna lawuru berere ele rumu nda nọso anya.

²³ Be gba ọkwukwo izi ka zizne be,

"Aịwa ele izi Karaịsi nụ ele okno badnụ, rumu nda anụ, neebekwu kpakara rumu nda ele bụo ele Ju wu nụ rime Antiọku, Siriya nụ Silisia. A bekwulem anụ.

²⁴ A nurnu nụ agwna ele rukna n'esilawuru aị varu kpakna anụ ẹhni, mee ovu la anụ mini hite nụ nhne be kwuru, be nuna nhne ka n'onu aị gbasiri a.

²⁵ A gbaru iznuznu n'otu, a kwekọrita o ziyanu anụ ele izi a hohiaru, be nụ ele enyi aị a whurnu n'anya, Banabasi nụ Pọlu,

²⁶ ele gweru budnu be nyee nụ nhne oze budnu kwnornu nụ n'ernu Nyenwe aị Jizọsi Karaịsi.

²⁷ A ziyannu anụ Judasi nụ Saịlasi, ele jaakanu anụ nụ ruwhnu nụ ruwhnu nhne a gbaru n'ọkwukwo.

²⁸ Aị nụ Enine Nso kwekọtaru, a tükwasi ivu berere, be gweme kpakara nhne ka zị mkpa.

²⁹ Anụ ríkọ wiri ọbula be kwaru ariohna nyee renwu, anụ ríkọ ọvnarna, anụ ríkọ anọ ọbula be hìgburu ẹhigbu, anụ mékọ ọyi. O jọburunu anụ ọma ọ bụru anụ mee kpm. Anụ dazikwaru nkari."

³⁰ Be zizne ele izi wam Antiọku, nga be duru Antiọku, be sukwukọta kpakara ele kweru ekwe nyega be ọkwukwo izi wam.

³¹ Nga ele badnụ wam gwnurnu ọkwukwo izi wam, ovu sọru be n'onu k'agida kwnornu nụ izi ọkwnagidne wam.

³² Judasi nụ Saịlasi, ele bụ masi ele ọwhnurninya, kwu ọka gbu ọkwnu naagba be inwe.

³³ Be daziri ige mati, be zihnalá be n'udno znekwnusi ele ziyaru be. [

³⁴ Kọvu ọ masiri Saịlasi ọ daziri pịi.]

³⁵ Pọlu nụ Banabasi daziri ige mati nụ Antiọku be nụ agida ele berere, be zne kpọ okwo ikwu-ọnu Nyenwe aị.

Pọlu nụ Banabasi kwaru

³⁶ Omekwo, Pọlu kanu Banabasi, “Ngwa ma a lahna, lekasi rumu nda ai nu kpakara eli-ohna hne a znirni izi oma Nyenwe ai, whnu kpa be naagbali.”

³⁷ Banabasi pioru ma be nu Joni Makị snornu zne.

³⁸ Kọvu Pọlu kwége o snornu be, kwnornu a dazigidnege n'ernu wam, kọvu o ghasaru be nu Pamfilia.

³⁹ Be dogbuta ka k'agida, be kewa ehni be. Banabasi kwuru Makị kwowhe mini zne Saiporosi.

⁴⁰ Pọlu horu Saịlasi, rumu nda gweru be yisi n'oru ke Nyenwe ai, be whoga.

⁴¹ O gawhe Siriya nu Silisia naagba kpakara ogbako Chiokike inwe.

16

Timoti snornu Pọlu nu Saịlasi zne

¹ Pọlu zne Debi nu Lisitira. Otu nye sno apna Jizosi zi pii, nye rewhna a bu Timoti, nne a bu nyerinya Ju ke kweru ekwe, kọvu nda a bu nye Giriki.

² Kpakara rumu nda ele zi nu Lisitira nu Aikoniom nookwu Timoti oka oma.

³ Pọlu pioru o kwuru Timoti zne, o kpa a nka. O mernu ka kwnornu nu kpakara ele Ju wu n'eli ka maam nu nda a buo nye Ju.

⁴ Kpa be neeze hite n'otu eli-ohna du n'eli-ohna berere, be nyee ele kweru ekwe iwu ke ele izi nu ele okno badnu zi nu Jeruselem nyernu, kanu be be bita kpakara iwu ka.

⁵ Kpakara ogbako Chiokike gwuzosi rikne n'okwnata ovu, naabahnasi n'obochi n'obochi.

Pọlu whnurnu owhnurninya nu Torasi

⁶ Be gawhe n'esilawuru eli Firigia nu Galasia, kwnornu nu Enine Nso kwéle be kpọ okwo izi oma nu eli Esia.

⁷ Nga be duru n'ike eli Misia, be pio o zne eli Bitinia, kọvu Enine Jizosi kwéle be.

⁸ Kam kpayaru be jiri zne Misia nu Torasi.

⁹ Pọlu whnu owhnurninya n'abali hne o whnurnu otu nwerukna Masidonia, gwuzo nu ruwhnu a naariaso a, “Bikno, va Masidonia yisinu ai aka.”

¹⁰ Kpa Pọlu whnurnu owhnurninya ka, ngangam a jiknenu o zne Masidonia, kwnornu nu a kweru nu Chiokike sukwuru ai kpọ okwo izi oma pii.

Lidiya nu ele oro a

¹¹ A kworu ogbo hite nu Torasi otu ngam zne Samotirasi, n'ekile a zne Niapolisi.

¹² A hite nu pii zne Filipai, eli ele Rom neechi ke bu risi ochichi eli Masidonia. A daziri obochi ele nu ele n'eli wam.

¹³ N'Obochi Ozukwa Inwe a whoga n'eli-ohna zne ngeri osimini, hne a leru anya nu a jowhnu hne be kpe okpukpe. A daziri eli bete o kwunu ele rinya ele gbakoru pii oka.

¹⁴ Otu nye bnoteru nsni bu Lidiya nye hi nu Taıtira, nye neere iwo odno odno. O bu nwerinya neekpenu Chiokike, Nyenwe ai kpume mkpoma a, o bno nsni nhne Pọlu nookwu.

¹⁵ Nga be wuru a mini ya nu kpakara ele oro a, o sukwu ai, kaa, “O buru nu anu kweru nu m bu m nye kweru nu Nyenwe ai, anu va daziri n'oro m.” O kwnagidne ai.

Pọlu nu Saịlasi n'oro ikelu

16 Otu ọbuchi kpa a neezne hne okpukpe, otu ọhi rinya nye renwu ojo nwugwu zuru aị, nye nookwu nhne jeeme n'ige zị nụ ruwhnu. Ọ naakpanụ ele nwe a agịda ịwai hite n'ọwhnurninya.

17 Nnwọ rinya ka snornu aị nụ Pọlu neesi okokoba, kaa, “Ele rukna ka bu ele izi Chiokike ke Kakwo Nhne Dum Olu. Be neegesi anụ apna anụ jeenwe ọznohia.”

18 Ka bu nhne o neeme agịda ọbuchi, tem ovu we Pọlu ẹhni, ọ tūnasna kanụ renwu ojo wam, “M ji m rewhna Jizọsi Karaịsi nyee i iwu, hi nụ rime a whụya.” Renwu ojo wam hi nụ rime a whụya ngangam.

19 Nga ele nwe a whnurnu nụ apna be neeji naakpa ịwai mesnirni, be nurnu Pọlu nụ Saịlasi zne n'esilawuru ahia n'aka ele nechedi ẹli-ọhna.

20 Be gwuzote be nụ ruwhnu ele risi, kaa, “Ele rukna ka bu ele Ju, be neegweya mkpakpo nụ rime ẹli-ọhna aị.

21 Be neezni omen'ẹli ke megidnenu iwu aị ele Rom, ke a nwée rikne bitali mọbu mee nhne be neezni.”

22 Agida badnụ wam yisi aka megidne be, ele risi ọwa iwo Pọlu nụ Saịlasi, nyee iwu be pnja be nhne.

23 Nga be pnjakworu be nhne k'agida, be tūbna be nụ rime ọro ikelu, kanụ nye risi ọro ikelu o legidne be anya nkari.

24 Nga nye risi ọro ikelu nurnu iwu ka, ọ tūbna be nụ rime rime ọro ikelu, tusi ọchi be nụ rime igwe isisi.

25 N'esilawuru abali Pọlu nụ Saịlasi bete neekpe okpukpe, nọogwnunu Chiokike eri ọznarni, ele ikelu berere noobnonu be nsni.

26 Ngangam, ẹli tneru enye, ke mernu ntụ-ẹli ọro ikelu mernu imerne. Ngangam, kpakara ọnuhna gbamarnụ, ijigba dnahnala n'ẹhni kpakara ele ikelu.

27 Nye risi ọro ikelu wam tnenyarnụ n'anyarna, nga ọ whnurnu kpakara ọro ikelu gbamarnụ, o che nụ kpakara ele ikelu gbawhulem, ọ mniornu amaogwu a ma o gbu ẹhni a.

28 Kọvu Pọlu siwama okokoba, kaa, “I mékasi ẹhni i nhne, kpakara aị zị hna.”

29 Nye nye risi ọro ikelu wam kaa be nyee a tọnji, ọ gbabna rime ọro ikelu, ọ marnụ rururu dna n'ẹli n'ọchi Pọlu nụ Saịlasi.

30 O kwuhia be, sịkwa be, “Ele nwe m, kịni bu nhne me jeeme ma be znọhia m?”

31 Be kaa, “Kweru nụ Nyenwe aị Jizọsi, be jọoznohia ji nụ ele ọro i.”

32 Be kwunu a izi ọma Nyenwe aị, ya nụ kpakara ele zị n'ọro a.

33 N'ige abali wam, nye risi ọro ikelu wam kwuru be, snụ ẹnya be, otu ngam be wu ya nụ ele ọro a mini.

34 Nye risi ọro ikelu wam kwuru Pọlu nụ Saịlasi la n'ọro a, nyee be wiri, mkpọma sọru a n'ọnu, ya nụ ele ọro a, kwnornu nụ be kweruru nụ Chiokike.

35 N'ọsisi, ele risi ẹli-ọhna zizne ele badnụ be sigbasi ele rukna wam la.

36 Nye risi ọro ikelu wam kanụ Pọlu, “Ele risi nyernu iwu ji nụ Saịlasi la. Anụ la n'udno.”

37 Kọvu Pọlu kanụ ele wam be duyaru, “Be mágele aị ikpe nhne ojo ọbula, be pnja aị nhne n'ahia, hne a bu ele Rom. Be tūbna aị n'ọro ikelu. Kịtna, be neesigbasi aị nū mgwugwa? Ọza! Ele ọchichi ele risi ẹli-ọhna jaava hna, gbahia aị n'ọro ikelu.”

38 Ele wam znernu kanụ ele risi ẹli-ọhna nhne Pọlu kwuru. Nga be nurnu nụ be bu ele Rom, ogwnu turu be.

39 Be zne riasno be, gbahia be n'ọro ikelu, kanụ be whoga nụ rime ẹli be.

40 Pọlu nọ Sạilasi whọga n'ọro ikelu, zne n'ọro Lidiya. Be nọ rọmu nda whnọ, be kwunu be ikwu-ọnu ọsnuta mkpọma, gharọ be, la.

17

Nọ rime Tẹsalonika

1 Be gawhe nọ rime Amfipolisi nọ Apolonia, be vadu Tẹsalonika, hne be whnọrnu ọro ọgbako ele Ju.

2 Lele kpa omen'ẹli Pọlu zị, o zne n'ọro ọgbako ele Ju, n'Ọbochi Ozukwa Inwe ọbochi ẹto, ya nọ ele badnọ kwurita ọka nhne zị n'ọkwukwo nsọ.

3 Ọ kọwanu be, gesi be nọ Karaịsi jaata awhnọwhnu, omekwo, o hi n'ẹnwu lizọ. Pọlu kanọ be, "Jizọsi nye me nọokpo okwo a, bọ Karaịsi wam."

4 Agwna be kweru, snornu Pọlu nọ Sạilasi, ma agida ele bọo ele Ju neekpenu Chiokike nọ agida ele rinya be marnọ rẹwhna be.

5 Kọvu ele Ju kwnornu awọwa, chikota agwna ele ojo zị n'ahia, be lizọ megidne be. Okne mkpakpọ dna n'ẹli wam. Be zne n'ọro Jasoni ma be pnọhia Pọlu nọ Sạilasi nyee ele wam.

6 Kọvu kpa be whnọge be, be pnọrnu Jasoni nọ rọmu nda berere zne nọ ruwhnu ele risi ẹli, neesi okokoba, kaa, "Ele rukna ka noovuya mkpaghasi kpakara ọhna valẹm ẹli aị.

7 Jasoni bikwataru be n'ọro a. Be zą naabita iwu Siza, be naakaa eze berere zị, nye be nookwu Jizọsi."

8 Be ji ikwu-ọnu nọ kpa mee okne mkpakpọ dna n'ẹli-ọhna ma n'esilawuru ele risi ẹli.

9 Ele risi ẹli mee Jasoni nọ ele ya nọ be sno kwọ iwu, be sigbasi be la.

Nọ rime Beria

10 Nga chi jiri, rọmu nda zihala Pọlu nọ Sạilasi zne Beria. Nga be dọru, be zne n'ọro ọgbako ele Ju.

11 Ele zị nọ Beria nwernu ovu ọma karọ ele zị nọ Tẹsalonika. Mkpọma be jiknernu o bno nsnị n'ikwu-ọnu ka, be nyosna rime ọkwukwo nsọ kpakara ọbochi ma be whnọ nhne Pọlu nookwu ọ bọ ezi ọka.

12 Agida ele Ju kweru, ma agida ele bọo ele Ju, ka bọ ele rinya be marnọ rẹwhna be, nọ ele rukna, kweru masi.

13 Kọvu nga ele Ju ele zị nọ Tẹsalonika nurnu nọ Pọlu nọokpo okwo izi ọma Chiokike nọ rime Beria, be va kpakne ovu ele badnọ megidne Pọlu.

14 Ngangam, rọmu nda zihala Pọlu zne ngeri osimini, kọvu Sạilasi nọ Timoti dazigidne nọ Beria.

15 Ele rukna sno Pọlu snornu a dọ Atẹnsi. Pọlu kanọ be, be kanọ Sạilasi nọ Timoti kwnusi a wara wara. Ele rukna lahna Beria.

Nọ rime Atẹnsi

16 Kpa Pọlu neese ma Sạilasi nọ Timoti vakwnusi a n'Atẹnsi, o gburu a igbugbu kpa ọ whnọrnu nọ kpakara ele ẹli wam neekpenu rẹnwu zị ọdo n'odo.

17 Ya nọ be kwurita ọka n'ọro ọgbako ele Ju, ma ele Ju ma ele bọo Ju ele neekpenu Chiokike. Ya nọ kpakara ele ọ whnọrnu nọ rime ahia kpakara ọbochi nookwurita ọka.

18 Agwna ele zni nhne be kwu ele Epikuri nọ ele Sitoiki nọ Pọlu nọodogbuta, ele ka kaa, "Ndaa nhne nye iwhnirniwhno ka nookwu?" Ele berere kaa, "O nookwu nhne gbasiri chi ikne." Be kwuru ka kwnornu nọ Pọlu nọokpo okwo izi ọma gbasiri Jizọsi nọ kpa o hiri n'ẹnwu lizọ.

19 Be kwuru Pọlu zne n'ogbo ele Ariopagosi, kaa, "A piuru ọ mahia nhne gbasiri iznizni ikne i nookwu.

²⁰ Agwna nhne i nookwu bu nhne ikne nu nsni ai, a pioru o mahia risi oka ka.”

²¹ (Kpakara ele Atensi nu ele eli berere wu nu Atensi nootuwu ige be noobno nsni nu otutnu ikne obula varu.)

²² Polu gwuzoru nu ruwuhu ogbako ele Ariopagosi, kaa, “Ele rukna Atensi, m whuru m nu anu nwernu ovu okpukpe n'apna obula.

²³ Kpa me neezne izne nu rime eli anu, m whuru m nhne zi odo n'odo anu neekpenu, m whuru m masi otu ojo ariohna be gbasiri nhne n'olu a, 'Nye Chi ke a maa.' Nye wam anu neekpenu, o bu n'ezi nu anu maa, bu nye me nookwu oka gbasiri a.

²⁴ Chiokike ke keru owa nu kpakara nhne zi nu rime a, bu Nyenwe oligwe nu owa, o wu n'oro okpukpe ke ele badnu jiri aka be wu.

²⁵ Nhne badnu mernu nyee a zila mkpa, hne o bu ya neenye badnu budnu nu inwe nu kpakara nhne.

²⁶ Hite nu otu badnu o keru kpakara mba zi n'owa, mee be wuru nu kpakara owa. O jiri aka a kpa ike ige kwesiri nu hne ele badnu joowu n'owa.

²⁷ O mernu ka ma ele badnu pio a, dna ndina gbasiri, pohia a. Kovu Chiokike zila ikere hne a zi.

²⁸ Lele kpa otu badnu kwuru, 'A zi budnu, neezne izne nu rime a.' Agwna ele nkarị okwukwo anu karu, 'A bu rumu a masi.'

²⁹ “Hne a bu rumu Chiokike, a cheko nu Chiokike nu lele nhne obula be pnjoru onio lele golu mgbu siliva, mgbu akaworugwu ke badnu jiri nkarị aka a nu akoniche a pnjo.

³⁰ Chiokike lewhuru ige badnu maa nhne anya, kovu, kitna, o nyernu iwu kpakara ele badnu hi nu nhne ojo be whuya.

³¹ Kwnornu nu o bitaru otu obochi o jeeji ikpe zi snam kpe kpakara owa ikpe, hite n'aka otu badnu o hohiaru. O mernu ka whuya iwhne kwnornu nu o mernu o hi n'enwu lizo.”

³² Nga be nurnu Polu kwuru nhne gbasiri olizo n'enwu, agwna be mee a nhne rumu, kovu agwna be kaa, “A pioru o nurnu nhne ka n'onu i berere.”

³³ Polu whoga nu rime ogbako be.

³⁴ Agwna ele rukna snornu Polu kweru, n'esilawuru be bu Dionisiosi nye otu ele Ariopagosi. Otu nwerinya rehna a bu Damarisi nu ele berere kweru masi.

18

Nu rime Korinti

¹ Nga ka wheru, Polu whoga nu Atensi zne Korinti.

² O whuru otu nye Ju, rehna a bu Akwila, nye be muru nu Pontosi, nye hiri n'Itali va, ya nu nnwerne a Prisila, kwnornu Kalaudiōsi nye neechi nyernu iwu kpakara ele Ju whoga nu rime Rom. Polu zne o whnu be.

³ Ya nu be wuru, o snornu be rnu ernu ome tenti, kwnornu nu be nwernu otu aka ernu.

⁴ O nookwu oka n'oro ogbako ele Ju kpakara Obochi Ozukwa Inwe, naakanu ele Ju nu ele Giriki oka.

⁵ Nga Sailasi nu Timoti hiri nu Masidonia va, Polu gweru kpakara ige yisi nu oko okwo izi oma, naagba ama nu Jizosi bu Karaisi nyee ele Ju.

⁶ Nga be lizoru megidne Polu, kpari a, o lishama iwo a kanu be, “Ovnarna anu dazim nu risi anu, aka m zi richna. Hite kitna, m jeeznekwnusi eli ele buo ele Ju.”

⁷ O gharu be, zne wuru n'oro otu nye buo nye Ju neekpenu Chiokike, rewhna a bu Taiṭosi Joṣitosi, nye oro a n'oro oḡbako ele Ju gba.

⁸ Nye risi oro oḡbako ele Ju wam, nye rewhna a bu Kirisiposi, kweru nu Nyenwe ai, ya nu ele oro a, nu agida ele berere nu rime Korinti nuru izi oma, kweru, be wu be mini.

⁹ Polu whnurru owhnurninya n'otu abali, Nyenwe ai kanu a, "Ogwu tuko i, nookpo okwo, i kpusi onu i.

¹⁰ M dagwunu m ji, o za nye jeenwe rikne mekasi i nhne, m nwernu m agida ele badnu n'eli ka."

¹¹ Polu daziri n'eli wam otu awha n'enwa isunu, neezni ele badnu ikwu-onu Chiokike.

¹² Nga Galio bu nye neechi Akaya, ele Ju gbakoru n'otu mee mkpakpo megidne Polu, be kwuru a zne n'oro ikpe.

¹³ Be kaa, "Nwerukna ka neezni ele badnu kpa be jeekpenu Chiokike ke megidneru iwu ai."

¹⁴ Polu noopio o kwu oka nga Galio kanu ele Ju, "O buru nu ka bu nhne ojo ke megidneru iwu eli, m joobnonu anu nsni.

¹⁵ Kovu hne o bu nhne gbasiri rewhna, n'oka ke iwu anu, anu lebna anya nu rime a, m jeenwe rikne kpe ikpe gbasiri a."

¹⁶ O chihala be n'oro ikpe.

¹⁷ Be nwudne Sositenisi, nye risi oro oḡbako ele Ju, li a nhne nu ruwhnu oro ikpe. Kovu o gbasiḷa Galio rja rja.

Polu lahnaru Antioku nu rime Siriya

¹⁸ Polu nu rumu nda daziri nu Korinti agida obochi, o whoga, Prisila nu Akwila snoru a zne Siriya. O ko rukeri-ize a nu Kenkiria, kwnornu mkwina o kweru ige wheru ewhe.

¹⁹ Be du Efesosi, Polu ghasa Prisila nu Akwila. O bna nu rime oro oḡbako ele Ju, ya nu ele Ju kwurita oka.

²⁰ Be kanu a, o daziri gbu okwuu, kovu o kwéle.

²¹ Nga o naala, o kanu be, "O buru o masi Chiokike, m jeehiehnakwnusi anu." O kworu oḡbo whoga nu Efesosi.

²² Nga o duru Sizaria, o zne Jeruselem bekwu oḡbako Karaṣi, hite pii zne Antioku.

²³ O daziri ige mati pii, o whoga zne nu rime Galasia nu Firigia, naagba kpakara ele kweru ekwe inwe.

Polu nu rime Efesosi

²⁴ Otu nye Ju rewhna a bu Apolosi, nye be muru nu Alekizandaria varu Efesosi, o bu nye nkari oka, nye marnu nhne be gbaru n'okwukwo nsu nkari.

²⁵ Be znuru a n'apna ke Nyenwe ai. O ji onwunwu bekwnu mkpoma zni nhne gbasiri Jizosi nu kpa o kwesiri, kovu o magwu nhne gbasiri owu mini Joni kpai.

²⁶ O bete nookwu oka n'anya rikne n'oro oḡbako ele Ju. Nga Prisila nu Akwila nuru a, be kwuru a la n'oro be, znikwata a n'apna Chiokike nkari.

²⁷ Apolosi kpebi o zne Akaya, rumu nda ele zi n'Efesosi gba okwukwo ma rumu nda ele zi n'Akaya nabnanya a. Nga o duru, o znekwnusi ele kwehjaru hite n'oru Chiokike, o yinu be aka.

²⁸ Hite n'anya rikne ke oka a, o mernu ele Ju kpusi onu n'ohna, o mernu be mahia hite n'okwukwo nsu nu Jizosi bu Karaṣi.

19

Pọlu nọ rime Efesọsi

1 Kpa Apọlosi zị nọ Kọrinti, Pọlu gawheru nọ rime ẹli vadu Efesọsi. O whnrnu agwna ele sno apna Jizọsi pị.

2 O sịkwa be, “Anọ nahịala Enine Nsọ kpa anọ kweruru?”

Be kaa, “A nuna ria ria ma o zị nhne be nookwu Enine Nsọ.”

3 Pọlu sịkwa be, “Nda kpa be wuru anọ mini?”

Be kaa, “Hite n’ọwuwu mini Jọni.”

4 Pọlu kaa, “Jọni wuru ele tūhnasarnu nọ nhne ojo be mini, o kanu ele Izireli be kweru nọ nye naava n’aznọ a, nye wam bu Jizọsi.”

5 Nga be nrnu a, be wu be mini nọ rewhna Nyenwe aị Jizọsi.

6 Pọlu tūkwasị be aka nọ risi, Enine Nsọ dnakwasị be, be kwu ọka nọ riro ikne, kwusa izi oma Chiokike.

7 Be hna lele ele nri ele rukna lawuru.

8 Pọlu zne n’oro ọgbako ele Ju, ẹnwa ẹto ya nọ be nọdogbuta, o jiri anya rikne kwu ọka gbalị o kanu ele Ju nhne gbasiri ẹli-eze Chiokike.

9 Kọvu agwna be mernu risi rikne, be kwéle o kweru, be kwu ọka ojo megidne apna Nyenwe aị nọ ruwhnu agida ele badnu. Pọlu gharu be, kwuru ele sno apna Jizọsi, ya nọ be nookwurita ọka kpakara ọbochi n’oro omumu ọkwukwo Tairanosi.

10 Be mernu nhne ka awha lawuru ke mernu kpakara ele wu n’eli Esia nrnu ikwu-ọnu Nyenwe aị, ma ele Ju nọ ele búo ele Ju.

11 Chiokike nrnu ọnu elekema zị n’ichne hite n’aka Pọlu.

12 Hite n’ehni a be neegwepiya wepe nọ nkịti nhne gweznenu ele nriria zị odo n’odo ji, be gwọ be, renwu ojo hi n’ehni be whọga.

13 Agwna ele Ju ele naagaghari n’echihala renwu ojo pio o ji rewhna Jizọsi mee kpa. Be kanu renwu ojo, “M neenye i iwu nọ rewhna Jizọsi nye Pọlu nọokpo okwo a.”

14 Rumu rukna ẹsau otu nye Ju, nye risi ariohna rewhna a bu Sikeva, mernu kpa.

15 Kọvu renwu ojo wam kanu be, “M maam Jizọsi, m maam Pọlu, kọvu anọ bu ele kele?”

16 Nwerukna wam renwu ojo wam wu nọ rime a bna be, megbu kpakara be, mekasi be ẹhni. Be hi nọ rime ọro wam vuru ọru, gbaru ẹto gbawhu.

17 Kpakara ele Ju nọ ele búo ele Ju wu nọ Efesosi nrnu nhne ka, ogwnu tu kpakara be. Be sọbisinu rewhna Nyenwe aị Jizọsi k’agida.

18 Agida ele kweru ekwe varu kwuhia nhne be mernu nọ ruwhnu ele badnu.

19 Agida ele amusu vuyaru kpakara ọkwukwo be, kpo be bekwnu nọ ruwhnu ele badnu. Be gwnukota ọnu ahia be, pokwu mkpuru iwai siliva isne.

20 Kpa ikwu-ọnu Chiokike gbasaru, ji iknerna gwuzosi rikne.

21 Nga nhne ka mekworu, Pọlu kpebi o gawhe Masidonia nọ Akaya zne Juselem. O kaa, “Me znekwo, m jeezne Rom.”

22 O zizne ele neeyinu a aka izi, Timoti nọ Erasitosi, zne Masidonia. O daziri ige matị n’eli Esia.

Eli ghara ghara n’Efesọsi

23 Okne ẹli ghara ghara dnarnu n’Efesosi kwnornu n’apna Nyenwe aị.

24 Otu nye nọokpu siliva, nye rewhna a bu Demetirisi, nye nọokpu ọro igbudu Dịana, chi ele Efesọsi, nye mernu ele ọnu a nwe mbnarna k’agida.

²⁵ O sukwukọta ele ernal a nu kpakara ele nu ya nweru otu aka ernal, o kanu be, "Anu magwu nu a neenwehia agida iwai hite n'ernal ai.

²⁶ Anu nqowhnu, nqonu nhne badnu ka be kwu Polu neeme. O karu nu chi be jiri aka kpu buo chi rja rja. O mernu agida ele badnu kweru oka a, nu hna n'Efesosi ma nu kpakara eli Asia.

²⁷ O buo nu ernal ai joowhu dai, kovu ogwnu nqotu ai nu oro okne chi ai Diana jooburu nhne etekne, igwugwu a whu, bu chi ke kpakara ele Asia nu kpakara owa nqokponu risi eli."

²⁸ Nga agida ele badnu wam nuru a, onuma jihja be mkpoma, be bete neesi okokoba, "Diana ele Efesosi bu dikne."

²⁹ Mkpakpo wam gbsa kpakara eli-ohna. Agida ele badnu wam nwudne Gayosi nu Arisitakosi, ele rukna Masidonia be nu Polu sno neezne izi, pnuru be zne ogbakoro eli-ohna.

³⁰ Polu pioru ma o zne nu ruwhnu ele badnu wam, kovu ele kweru ekwe kwela a.

³¹ Agwna ele nechi echi ele enyi Polu zi izi, naariasno a, o gesiko ehni a n'ogbakoro.

³² Kovu nu mkpakpo zi nu rime oro ogbako wam, agwna badnu neesi otu nhne, ele berere neesi nhne berere, ele kakwo n'esilawuru be ma nhne be kwnornu gbako.

³³ Agwna be kaa nu Alekizanda bu nye risi mkpakpo wam, ele Ju gwuzote a nu ruwhnu ohna. Alekizanda whenu be aka ma o nweru rikne kwu oka, ma o gohoru onu nu ruwhnu ele badnu.

³⁴ Kovu nga be mahiaru nu o bu nye Ju, be si okokoba n'otu onu lele awa lawuru, kaa, "Diana ele Efesosi bu dikne."

³⁵ N'ipne-aznu, nye gba okwukwo eli-ohna mee be daziri bii, o kaa, "Ele rukna Efesosi, ele badnu magwu nu eli Efesosi bitaru oro Diana nu igbudu a ke hiri n'olu dna.

³⁶ Badnu nwee rikne gonahoru nhne ka. Anu daziri bii, anu mee nhne buo oma.

³⁷ Anu kwuyaru ele rukna ka hna, o bu n'ezi nu be znuge buznu n'oro Diana, mibu kpari chi ai.

³⁸ O buru nu Demetirisi nu ele ernal a noobno nye obula nhne, obochi ikpe zi, ele risi ikpe zimako, be kpe ehni be ikpe nu ruwhnu ele ikpe.

³⁹ O zi nhne berere anu pioru, be jookwu a n'oro ogbako ikpe lele kpa iwu kwuru.

⁴⁰ Kwnornu nu ogwnu nqotu ai nu be jaakaa nu a mernu mkpakpo nu nhne mernu tna. A nwee rikne kwali risi mkpakpo ka mibu kaa nhne vuyaru a."

⁴¹ Nga o kwukworu kpa, o gbsa ogbako wam.

20

Polu zneru Masidonia nu Giris

¹ Nga mkpakpo wam biri, Polu sukwukota ele kweru ekwe n'otu, kwunu be oka osnuta mkpoma, o kanu be, be dazikwaru nkari, o whoga zne Masidonia.

² O zne nu rime kpakara eli wam nookwu agida ikwu-onu osnuta mkpoma tem o vadu Giris.

³ O daziri pii enwa eto. Ele Ju naagba iznuznu nhne be jeeme a kpa o pioru o zne Siriya, o kpebi o lahna hite nu Masidonia.

⁴ Sopata nnwọ Pirọsi nye Beria snornu a zne, ma Arịsitakosi nụ Sekundosi hi nụ Teshalonika, Gayọsi hi nụ Dẹbi, Taijikosi nụ Tirofimoịsi ele hi n'Esia, nụ Timoti.

⁵ Ele ka beru ọsno neese aị nụ Torasi.

⁶ Nga Iriri Brẹdi Whùge Ọwhu whemernu, a hi nụ Filipaị kwọru ọgbo zne ke ọbochi isne wheru dụ Torasi. A daziri otu ikwezu.

Pọlu zneru Torasi

⁷ N'ọbochi mbọm n'ikwezu, kpakara aị gbakọru ma a ri wiri n'otu, Pọlu bete nookwunu ele badnụ ọka tem dụ n'esilawuru abali, hne ọ bu nụ ọ naala n'ọsisi.

⁸ Agida tọnji noonwu n'oro olu hne a zị n'ọgbako.

⁹ Otu nnwọ ikoro rukna rẹwhna a bu Yutikọsi dazigwu ẹli n'olu mgbo-wekpeke. O bete neezni anyarna kpa Pọlu zị kọriri nookwu ọka, o hi n'olu ọro ke ikwnu ẹto dna n'ẹli n'anyarna. Be vulizọ a, kọvu ọ nwunam.

¹⁰ Pọlu gbadna ẹli, dnagidne a, bnagidne a, ọ kaa, "Ogwnu tũko anụ, ọ zị bụdnu."

¹¹ Ọ lahna nụ rime ọro olu, nyawa brẹdi, ri, kpa o kwukworu ọka gbu ọkwnu tem ẹhnam wasị, ọ la.

¹² Be kwula nnwọ ikoro rukna wam ọro nụ bụdnu, be snuta be ovu k'agida.

Hite nụ Torasi zne Miletọsi

¹³ A bna ọgbo kwọru zne Asọsi, hne a jookwuru Pọlu n'ọgbo. Ọ kannụ aị a mee kpa, o jeeji ọchi zne pji.

¹⁴ Kpa o kwnusiri aị nụ Asọsi, a vuru a n'ọgbo zne Mitelini.

¹⁵ N'ekile a, a hi nụ pji kwọru ọgbo zne nhne zị Kịosi ndundu. N'ọbochi ke sno a, a dụ Samọsi n'ọbochi ke berere, a dụ Miletọsi.

¹⁶ Pọlu kpebiri ọ kwọru ọgbo whe Efesọsi ma ọ gharu o tuwhu ige n'Esia. Ọ zị a wara wara ọ dụ Jeruselem, ọ buri nụ o jeekwe o mee n'ọbochi Pẹntikosi.

Pọlu kwunnu ele okno badnụ Efesọsi ọka

¹⁷ Pọlu zizne izi hite nụ Miletọsi zne Efesọsi kanụ ele okno badnụ ọgbako whnụ a.

¹⁸ Nga be vaduru, ọ kanụ be, "Anụ magwụ kpa me tuwhuru ige me nụ anụ zị, hite n'ọbochi me varu ẹli Esia.

¹⁹ M ji m ovu hieru ẹli nụ anya-mini ẹkwana rnụ ẹrnu lele nnwọ izi Chiokike, ọ bu n'ezi nụ ele Ju ji mmuma ojo be kpakna m ẹhni.

²⁰ Anụ magwụ nụ ọ zá nhne ke jaabnanụ anụ iru ke me tugwannu anụ kpa me neezni anụ izi ọma, kọvu m znirni m nhne nụ ruwhnu ọhna nụ hite n'oro anụ zị ichne ichne.

²¹ Ma ele Ju ma ele bụo ele Ju, m dọru m anụ aka nụ nsni, ma anụ hi nụ nhne ojo anụ tũhnasnakwnusi Chiokike, kweru nụ Nyenwe aị Jizọsi.

²² Hite n'obno nsni nhne Enine Nsọ kwuru, m jeezne Jeruselem, m máam nhne jaadnakwasị m pji.

²³ Kọvu m magwụ m nụ rime kpakara ẹli-ọhna, Enine Nsọ dọru m aka nụ nsni, nụ ikelu nụ ọkpagbu neese m.

²⁴ Kọvu nụ kpakara nhne ka zá naakpa m, m zá m nọogwnu bụdnu m nụ nhne zị mkpa, ma m rnukwo m ẹrnu Nyenwe aị Jizọsi nyernu m me rnụ. Ẹrnu wam bụ ọ kpo okwo izi ọma oru Chiokike.

²⁵ "M zneghariri m n'esilawuru anụ zni izi ọma ẹli-eze Chiokike. M magwụ m nụ anụ jọowhnu m anya berere.

²⁶ Me kanụ anụ tna, nụ ọ zá nye ikpe ọvnarna a jaama m.

²⁷ Kwnornu nū ọ zá nhne bụ echiche Chiokike ke me bítaru, gharū ọ kanū anu.

²⁸ Anya dū anū ẹli n'ẹhni anū, anū legidne rụmu atnūrnu Chiokike ke Enine Nsọ yisiri n'aka anū. Anū znū rụmu atnūrnu ọgbako Chiokike jiri ọvnarna Nnwọ a zuru.

²⁹ M magwū m nū me la, edu wanọhia jaava n'esilawūru anū, be jọdonu rụmu atnūrnu wam obirizi.

³⁰ Ige wawa nga ele zị n'esilawūru anū joolulu ezi ọka wam ma be duwhu ele kweru ekwe, mee be snornu be.

³¹ Anya dū anū ẹli, anū chenwanya nū m ji m agida anya-mini ẹkwna iwhnehnie nū abalị neezni anū nhne awha ẹto.

³² “Kítna, m neeyisi anū n'aka Chiokike nū ezi ọka ke ikwu-ọnu oru a, ke nwernu rikne o wulizọ anū olu lele ọro, nyee anū ngọzi nhne okehia ke a n'esilawūru ele ọ bítaru nsọ.

³³ M nwége m ọwho-anya nū hne siliva mọbu golu mọbu iwo nye ọbula zị.

³⁴ Anū magwū nū aka m lawūru nrūhiaru kpakara nhne ke zị m mkpa, nū ke me nū ele sno m.

³⁵ M gesiri m anū nū hite n'ernu aka aị, a jeeyisinu ele zá rikne aka. Anū chenwanya ikwu-ọnu Nyenwe aị, ‘Ọwa ọma zīnu nye neekesi nhne kakwo nye nanahọru nhne.’”

³⁶ Nga Pọlu kwukworu ọka ka, ya nū be gwute mpnerne ọchi n'ẹli kpe okpukpe.

³⁷ Kpakara be naakwna ẹkwna kpa be bnakwnusiri a, snutu a ọnu ipne-aznu.

³⁸ Ẹhni nwūrnu be n'ikwu-ọnu wam o kwuru nū be jọowhnu a anya berere, Kpakara be snornu a zne, ọ bna n'ọgbo.

21

Pọlu znernu Jeruselem

¹ Nga aị nū be gbasarū, a kwọru ọgbo zne Kọsi otu ruwhnu, n'ekile a, a dū Rodisi, hite pịi a zne Patara.

² A whnūrnu otu ọgbo neezne Fonisia, a bna ọgbo kwọru whọga.

³ Nga a dūru hne a nọowhnu Saiporosi, a gharū a n'akarita zne Siriya. A hiedna nū Taya hne ọgbo wam noovume ivu a.

⁴ A whnūrnu agwna ele kweru ekwe pịi, aị nū be daziri otu ikwezu. Hite nū rikne Enine Chiokike, be kanū Pọlu o znéko Jeruselem.

⁵ Kọvu nga ige aị zuru, a whọga. Kpakara be nū nnwerne be, nū rụmu be snornu aị whọga n'ẹli-ọhna. Kpakara aị gwute mpnerne ọchi nū ngeri osimini kpe okpukpe.

⁶ A bekwurita ẹhni aị, a bna n'ọgbo, be lahna ọro.

⁷ A kwọru ọgbo aị hite nū Taya zne Pitolimasi, a zne bekwu rụmu nda aị, aị nū be daziri otu ọbochi.

⁸ N'ọbochi ke sno a, a vadu Sizaria. A bna n'ọro otu nye nọokpo okwo izi ọma Chiokike, nye rẹwhna a bụ Filipu, a daziri n'ọro a. Filipu bụ otu nū rime ele izi ẹsau wam be hōhiaru nū Jeruselem. *

⁹ Filipu nwernu rụmu oknornokno ẹno yọogbola izi ele nọokpo okwo izi ọma Chiokike.

¹⁰ Kpa a dazị n'ọro a agida ọbochi, otu nye ọwhnurninya be kwu Agabọsi hiri nū Judiya va.

* 21:8 Ernu Ele Izi 6:1-6

11 O vakwnusi aị, gweru aịni Pọlu, kne ẹhni a ọchi n'aka, ọ kaa, "Ka bụ nhne Enine Nsọ kwuru, 'Ọ bụ kpa be ele Ju jeekne nye nwe aịni ka nụ Jeruselem, gweru a nyewhete a n'aka ele bụo ele Ju.' "

12 Nga a nurnu a, aị nụ ele ẹli wam riasno Pọlu o znékwadia Jeruselem.

13 Pọlu kaa, "Ndaa kpa anụ naakwna ẹkwana neeme ma inwe gwụ mkpọma m? Be jéekne m eriri kpọi nụ Jeruselem, kọvu m kwelem ọ nwụ ẹnwu kwnornu rẹwhna Nyenwe aị Jizọsi."

14 Kpa a nwée rikne mee ọ gbanwo ovu a, a gweme aka aị, kaa, "Chiokike mee nhne bụ echiche a."

15 Nga a daziri ige matị pịi, a jiknenu o zne Jeruselem.

16 Agwna ele sno apna Jizọsi ele zị nụ Sizaria snornu aị, be duru aị zne n'oro otu nyerukna nye be kwu Masoni, nye Saiporosi, nye sno apna Jizọsi gbu ọkwnu, a daziri nụ n'oro a.

Pọlu vaduru Jeruselem

17 Nga a vaduru Jeruselem, rụmu nda aị kwubnanya aị nkari nkari.

18 Ke chi bọru, aị nụ Pọlu snornu zne ọ whnụ Jemisi, kpakara ele okno badnụ ọgbako Chiokike zị masị pịi.

19 Pọlu bekwu be, kanụ be otu otu kpakara nhne Chiokike mernu n'esilawuru ele bụo ele Ju hite n'ernu izi ọma a.

20 Kpa be nurnu a, be znarni Chiokike. Be kanụ Pọlu, "Nwene aị, agida pokwu ele Ju kweru ekwe, be zị kọriri neerne bẹkwnu nụ mkpọma be, naabita Iwu Mozizi.

21 Agwna ele badnụ kannu be nụ i neezni kpakara Ju ele wu n'eli ele berere be sigbasi Iwu Mozizi, nụ i neezni be kpá rụmu be nka, be snó omen'eli ele Ju.

22 Be jọonu nụ i varu, ndaa kpa a jeeme?

23 Bikno mee nhne a kanu jị mee. Ele rukna ẹno zị n'esilawuru aị, ele kweru mkwna,

24 snornu be zne mee mmemem ọbita ẹhni be rịchna, kwu ọgwo nhne be mewhuru, ma be nwernu rikne kọma risi be. Kpakara badnụ jeeji ka mahia nụ nhne be kwuru gbasiri i bụo ezi ọka, nụ jị n'iwuhuru i naabita Iwu Mozizi.

25 Kọvu ele bụo ele Ju ele kweru ekwe, a ziznenu be ọkwukwo izi, kanu be nhne a kpebiri, be rikọ wiri be kwaru ariohna nyee renwu, mọbu ọvnarna, mọbu anọ ọbula be hịgburu ẹhigbu, be mékọ oyi."

26 Pọlu kwuru ele rukna wam, n'ekile a, ya nụ be mernu mmemem ọbita ẹhni be rịchna. O bna n'Oro Nsọ Chiokike, kanu ele badnụ ọbochi be jeemezu ọ bita ẹhni be rịchna, kwa masị ariohna nụ risi kpakara be.

Be nwudnenu Pọlu

n'Oro Nsọ

27 O gwnarnu matị ọbochi ẹsau ọbita ẹhni be rịchna zute, agwna ele Ju hiri n'Asia whnurnu Pọlu n'Oro Nsọ. Be kpakne igbudu badnụ wam, be nwudne Pọlu.

28 Be siwama okokoba, "Ele Izireli, anu yisi aka, ka bụ nwerukna wam naagahari kpakara ọhna neezni ele badnụ nhne megidne ele Izireli, megidne Iwu Mozizi, ma Oro Nsọ ka. Kịtna, o kwubnarnu ele bụo ele Ju n'Oro Nsọ, meru hna zị nsọ."

29 Ka bụ kwnornu nụ be whnurnu Tirofimosi nye Efesosi hne ya nụ Pọlu sno nụ rime ẹli-ọhna, be che nụ Pọlu kwubnarnu a Oro Nsọ.

30 Okne mkpakpo dna nụ kpakara ẹli-ọhna, ele badnụ gbakota n'otu, nwudne Pọlu, dọhala a nụ rime Oro Nsọ, gbasni mgbo.

31 Igbudu badnụ wam pioru o gbu Pọlu, kọvu izi duru nye risi ele ọgwnu Rom nsi nụ kpakara Jeruselem neeme mkpakpo.

³² Ngangam, nye risi ọgwu ele Rom chiri ele neechi otu riwhu ele ọgwu nu ele ọgwu be, gbazne n'esilawuru igbudu badnu wam. Nga be whuru a, ya nu ele ọgwu a, be sigbasi o li Polu nhne.

³³ Nye risi ọgwu wam znekwnusi Polu nwudne a, nyee iwu be tu a ijigba lawuru. O sika be, "Nyele bu nwerukna ka, kini bu nhne o mernu?"

³⁴ Agwna ele zi n'igbudu badnu wam neesi otu nhne, ele berere neesi nhne berere. Okne mkpakpo dnarnu ke mernu nye risi ọgwu wam nwee rikne mahia risi nhne mernu. O kanu ele ọgwu be kwubna Polu rime hne ele ọgwu wu.

³⁵ Ya nu be snornu du mgbamgba ochi oro,[†] ele ọgwu wam kwuru a, o zi ele badnu wam mekasi nhne kwnornu ọvnarna chnarnu be n'anya.

³⁶ Be gbasornu a, neesi okokoba, "Gbu nwerukna ka."

Polu goruru onu a

³⁷ Kpa be nookwubna Polu nu rime hne ele ọgwu wu, o kanu nye risi ọgwu, "Me kanu i oka sa?"

Nye risi ọgwu wam sika a, "I jeenwe rikne kwu Giriki?"

³⁸ I buo nye Ijipiti wam nye n'ige wheru ewhe vuyaru omegidne, nye duru pokwu badnu eno ele ogbu badnu bna n'eli-ikpa?"

³⁹ Polu kaa, "M bu m nye Ju, be murnu m nu Tasosi nu eli Silisia, m bu m nye eli ke zi okne mkpa. Bikno, me kwunu ele badnu ka oka."

⁴⁰ Nye risi ọgwu wam nyee a rikne, Polu gwuzoru nu olu mgbamgba ochi oro, whenu ele badnu wam aka. Nga be daziri bii, Polu kwunu be oka ikwu-onu ele Hiburu.

22

¹ O kaa, "Ele rukna, rumu nda, nu ele nda, bikno, anu bno nsi kpa me ọogoru onu m nu ruwhnu anu."

² Nga be nurnu kpa o nookwu oka n'onu ele Hiburu, be daziri bii k'agida, Polu zne nu ruwhnu kaa,

³ "M bu m nye Ju, be murnu m nu Tasosi n'eli Silisia, kovu m soru m hna nu rime Jeruselem, lele nnwo okwukwo ke Gamalieli znukwaru nkari n'iwu ele nda ai, m ji m mkpoma orne bekwnu rnunu Chiokike ernu lele kpa anu zi tna.

⁴ M kpaknarnu m ele sno apna ka ehni du n'enwu. M nwudnernu m ele rukna nu ele rinya tubna be n'oro ikelu.

⁵ Nye risi aruhna nu kpakara ele eze-ikpe magwu nu m nookwu ezi oka. M naahiaru m n'aka be okwukwo izi be gbaznennu rumu nda ele Ju zi nu Damasikosi, m neezne pii ma m nwudne m ele badnu, tu be ijigba, pnurnu be va Jeruselem ma be ta be awnhuwhnu.

Polu kwuru nhne

gbasiri otuhasna a

(Ernu 9:1-19; 26:12-18)

⁶ "Kpa me neezne, o gwnarnu mati m du Damasikosi, n'iwnehnie, nu ibiri, okne iwhe hiri n'oligwe mukwasi m.

⁷ M dna n'eli, otu akpiri kannu m, 'Solu, Solu, kini mernu i naakpakna m ehni?"

⁸ "M sika, 'I bu nyele, Nyenwe ai?"

"O kaa, 'M bu m Jizosi nye Nazareti, nye i naakpakna ehni."

⁹ Ele rukna me nu be sno whurnu iwhe wam, kovu be nuge akpiri nye nookwunu m oka.

[†] 21:35 *mgbamgba ochi oro*: Ka bu hne be pne neezne oro olu.

¹⁰ M sịkwa, 'Ndaa nhne me jeeme, Nyenwe aị?'

"Nyenwe aị kaa, 'Lizọ, zne nụ rime Damasịkosi, be jaakanụ ị kpakara nhne Chiokike karụ jị mee.'

¹¹ Isni kpuru m kwnornu okne iwhne wam, ele me nụ be sno tọru m n'aka, duru m zne Damasịkosi.

¹² "Otu nye rẹwhna a bụ Ananayasị, nye nọotu ogwnu Chiokike lele kpa iwu aị kwuru, nye kpakara ele Ju wu nụ Damasịkosi nọoso anya,

¹³ ọ vakwnusi m, gwuzoru n'ehni m, kaa, 'Nnwọ nda Sọlu, whnurnu ọsno,' ngangam, m whnurnu m ọsno, le a anya.

¹⁴ "O kaa, 'Chiokike ke ele nda aị, hōhiaru ị ma ị mahia echiche a, ma ị whnụ Nye Izi a ke mee mma, ma ị nurnu kpa o nookwunu ị ọka n'akpịri ke a.

¹⁵ Ị jọobu nye akebne a, ma ị kanụ ele badnụ nhne i whnurnu nụ nhne ị nurnu.

¹⁶ Kịtna, i dázịma, lizọ, ma be wụ ị mini, ma be snusnama mmehie i hite n'ọkpokwu rẹwhna a.'

Pọlu, nye izi ele bụo ele Ju

¹⁷ "M lahna nụ rime Jeruselem, kpa me neekpe okpukpe n'Ọro Nsọ, m whnurnu m ọwhnurninya.

¹⁸ M whnurnu m Nyenwe aị, ọ kaa, 'Lizọ, wara wara, whọga nụ rime Jeruselem, kwnornu be jéekwe akebne i gbasịri m.'

¹⁹ "M kaa, 'Nyenwe aị, be magwụ nụ m znernu m n'otu ọro ọgbako ele Ju dū n'ọro ọgbako, nwudne ele kweru nụ rẹwhna ị, lị be nhne yisi be n'ikelu.

²⁰ Nga be gburu Sitivini nye akebne i, m gwuzo m yisi aka n'ẹnwu a, m legidnernu m iwo ele gburu a.'

²¹ "O kaa, 'Whọga, kwnornu m jeezizne i hne zị ikere, nụ ẹli ele bụo ele Ju.'

Pọlu bụ nye Rom

²² Ele badnụ wam bnonu a nsnị tem Pọlu kwu ka, be bete neesi okokoba n'okne nkoli, kaa, "Gweme nwerukna ka n'owa, o kwésile ọ zị bụdnu."

²³ Be neesi okokoba, neewhe iwo be n'olu risi be, nọobolizo ruznurnuznu.

²⁴ Nye risi ogwnu wam nyee ele ogwnu a iwu be kwubna Pọlu rime hne ele ogwnu wu, be pñia a nhne ma be mahia nhne ele Ju kwno neesi okokoba megidne a.

²⁵ Kpa be knernụ a eriri ma be pñia nhne, Pọlu kanụ nye wam nęechi otu riwhu ele ogwnu gwuzo pñi, "O kwesiri n'iwu ọ pñia nye Rom nhne, nye be kpége ikpe nhne ojo o mernu?"

²⁶ Nga nye ogwnu wam nurnu a, ọ znekwnusi nye risi ogwnu kanụ a, "Any a dū ẹli nhne i neeme, nwerukna ka bụ nye Rom."

²⁷ Nye risi ogwnu wam znekwnusi Pọlu sịkwa a, "Kanụ m, ị bụ nye Rom?"

Pọlu kaa, "Owe."

²⁸ Nye risi ogwnu wam kaa, "M kwurū m agịda ịwai sị me ghọru nye Rom."

Pọlu kaa, "M bụ m nye be murnu lele nye Rom."

²⁹ Ngangam, ele rukna wam noopio ọ sịkwa Pọlu ajiji sigbasi a, ogwnu tūru nye risi ogwnu nga ọ nurnu nụ Pọlu bụ nye Rom, nụ ọ tūru a ijigba.

Pọlu nū ruwhnu ele eze-ikpe

³⁰ Nye risi ogwnu pioru ọ mahia nhne bụ ezi ọka ele Ju kwno noobno Pọlu nhne, ke chi bọru, ọ tọma Pọlu ijigba, kanụ ele risi arịohna nụ kpakara ele eze-ikpe be gbako. O kwupiya Pọlu, gwuzote a nū ruwhnu be.

23

¹ Pọlu lebna anya n'esilawuru ele eze-ikpe wam, kaa, "Rumu nda m, ovu m zi snam nu ruwhnu Chiokike kpakara budnu m du tna."

² Nye risi arìohna be kwu Ananayasi kanu ele gwuzo Pọlu ndundu be gbo Pọlu aka n'onu.

³ Pọlu kanu a, "Chiokike jogbo i aka, ji mkpo be teru nznu. I dazi eli neekpe m ikpe lele kpa iwu kwuru, i noolulu iwu naakaa be gbo m aka."

⁴ Ele rukna gwuzo Pọlu ndundu kaa, "I naakaja nye risi arìohna Chiokike?"

⁵ Pọlu saru be, "Rumu nda m, m maam nu o bu nye risi arìohna Chiokike. Be gbaru a n'okwukwo nsọ, kaa, 'I kwu nhne ojo megidne nye risi ele ke i.' "

⁶ Nga Pọlu whnurnu nu agwna ele eze-ikpe wam bu ele Sadusi, ele berere bu ele Farisi, o siwama, "Rumu nda m, m bu m nye Farisi, ele nda m oknani bu ele Farisi. Be kwuyaru m n'ikpe hna kwnornu okwnata mkpoma me nwernu n'olizo n'enwu ke budnu."

⁷ Kpa o kwuru ka, ele Farisi nu ele Sadusi bete nodugbuta, ogbako iznuznu ikpe wam kewa.

⁸ (Kwnornu nu ele Sadusi karu nu ele nwurnu onwu jelizọ n'enwu, enine izi zila, nu enine zila masi, kovu ele Farisi kweru nu eto wam zi.)

⁹ Ogbugbo naala olu k'agida, agwna ele zni iwu ele otu Farisi gwuzoru kwusi oka rikne, kaa, "O za nhne ojo a whnurnu nu rime nwerukna ka, o buru nu enine mọbu enine izi kwunu a oka."

¹⁰ Odogbuta wam laru olu k'agida ke mernu ogwnu turu nye risi ogwnu nu be jodogbu Pọlu. O yee ele ogwnu a iwu be zne n'esilawuru be gweme Pọlu, kwubna a nu rime hne ele ogwnu wu.

¹¹ N'abalị ke sno a, Nyenwe a gwuzoru n'ehni Pọlu, kaa, "Ogwun tuko i, kpa i gbaru akebne m hna nu Jeruselem, bu kpa i jaagba akebne m nu Rom masi."

Be gbaru iznuznu o gbu Pọlu

¹² N'osisi, ele Ju gbakoru n'otu gba iznuznu. Be duru risi nu be jeri wiri mọbu nwọ nhne obula tem be gbu Pọlu.

¹³ Be kakwo nri ele rukna eno ele snornu gba iznuznu be gbu Pọlu.

¹⁴ Be znekwnusi ele risi arìohna nu ele okno badnu, kaa, "A duru risi n'otu nu a jeri nhne obula tem a gbu Pọlu.

¹⁵ Kitna, bikno, ji nu ele eze-ikpe ziznenu nye risi ogwnu ele Rom izi, ma o kwuhia Pọlu, anu mee lele nu anu jaasikwahia nhne bu risi oka. A joogbu a su o vadu hna."

¹⁶ Nnwọ rukna nwene rinya Pọlu nurnu iznuznu wam, o zne bna nu rime hne be bitaru Pọlu, kanu a.

¹⁷ Pọlu sukwu otu nye ogwnu neechi otu riwhu ele ogwnu, kanu a, "Kwuru nnwọ ikoro ka znekwnusi nye risi ogwnu, o nwernu nhne o jaakanu a."

¹⁸ Nye ogwnu wam kwuru a, duzne a nu hne nye risi ogwnu zi, kaa, "Pọlu nye ikelu sukwuru m, kaa me kwuya nnwọ ikoro ka hne i zi, kwnornu nu o nwernu nhne o jaakanu i."

¹⁹ Nye risi ogwnu wam toru a n'aka whoga, sika a, "Kini bu nhne i jaakanu m?"

²⁰ O kaa, "Ele risi ele Ju kwekotaru nu be jaakanu i kwuhianu be Pọlu nu ruwhnu ele eze-ikpe ekile, be nogho aghigho, nu ele ikpe jaasikwahia nhne bu risi oka gbasiri a.

²¹ Kovu i bnọ be sni, kwnornu nu nhne nu lele nri ele rukna eno jootugwa neese a. Be duru risi nu be jeri wiri mọbu nwọ mini tem be gbu Pọlu. Be jiknenu o mee kpa, be neese nhne i jeekpebi."

²² Nye risi ọgwụ wam kaa, “Ọ zà nye ị kanụ nụ ị tñsinu m.” O zihala nnwọ ikoro wam.

*Be zizneru Pọlu
znekwnusi Felikisi*

²³ Nye risi ọgwụ wam sukwu ele ọgwụ a lawwuru nęechi otu riwhu ele ọgwụ, kanụ be, “Anụ jikneru riwhu ele ọgwụ lawwuru o zne Sizaria, nụ ele gba ịyinya nri ęsau, ele ama-ọgwụ riwhu lawwuru, be jikneru o zne n'ọtnu-ige ke tolu n'abalị.*

²⁴ Anụ gweya ịyinya Pọlu jaagba, anụ kwuzena a n'udno ke nye ọchichi Felikisi.”

²⁵ Nye risi ọgwụ wam gba ọkwukwo izi nụ kpa,

²⁶ Hite n'aka Kalaudiọsi Lisiasi, nyee Nye zị Ogwụ, nye ọchichi Felikisi, m bekwulem jị.

²⁷ Ele Ju nwudneru nwerukna ka noopio o gbu a, m nurnu m nụ ọ bụ nye Rom, m chiri ele ọgwụ ọhia a n'aka be.

²⁸ M pioru m ọ mahia nhne be noobno a, m kwuru a zne nụ ruwhnu ele eze-ikpe be.

²⁹ M whnurnu m nụ ọ zà nhne o mernu be jeeji noogbu a mọbu tų a ikelu, nhne be noobno a bụ nhne gbasiri iwu be.

³⁰ Nga be kannu m nụ agwa ele Ju naagba iznuznu megidne a, m kpebi o zıyanu ị ya. M kanụ ele noobno a nhne be va gwnu iwu be megidne a nụ ruwhnu i.

³¹ Ele ọgwụ wam mee kpa be nyernu be iwu. Be kwuru Pọlu n'abalị wam zne Antipatirisi.

³² N'ekile a, ele ọgwụ jı ọchi hiehna ọro, be sigbasi ele gba ịyinya ma be kwuru Pọlu zne.

³³ Be kwuru a zne Sizaria, nyee nye ọchichi ọkwukwo izi wam, nyewhete a Pọlu masi.

³⁴ Nye ọchichi wam gwnu ọkwukwo izi wam, ọ sika Pọlu ęli o hi. Nga ọ whnurnu nụ ọ hi nụ Silisia,

³⁵ ọ kaa, “M ọonu ọnu ị nga ele noobno i nhne varu.” O nyee iwu be bita Pọlu n'ọbna Erọdu hne be jeese a nse.

24

Pọlu nụ ruwhnu Felikisi

¹ Nga ọbochi isne whemernu, nye risi ariohna Ananayası nụ agwna ele okno badnu nụ otu nye noogwnu iwu be kwu Tętulasi znernu Sizaria. Be gwuzo nụ ruwhnu Felikisi, gwnuhia nhne be noobno Pọlu.

² Be sukwu Pọlu, Tętulasi bete noobno Pọlu nhne nụ ruwhnu Felikisi, kaa, “Nye zị Ogwụ, hite n'ọchichi ị nụ akoniche i, a nwernu udno gbu ọkwu, i mernu agida nhne ọma n'ęli aı.

³ A nakweru ka, n'ige ọbula nụ kpakara ọhna aı hite n'otu mmamma a nootunu ı.

⁴ M chioęe m o tuwhu ige i, m naariasno i, i gweru ovu ọma ı bno nsni nụ nhne a nookwu ige matı.

⁵ “A whnurnu nwerukna ka nụ ọ bụ nye naakpakna ele badnu ęhni, o noovuya mkpakpo n'esilawuru ele Ju nụ kpakara ọwa, ọ bụ nye risi otu nye Nazareti.

* 23:23 ọtnu-ige tolu n'abalı: ọkwukwo ke mbom kwuru ige awa ke ęto n'abalı

⁶ O pioru o meru Oro Nso aị, a nwudne a. [A pioru o kpe a ikpe lele kpa iwu aị kwuru.

⁷ Kọvu nye risi ọgwu Lisiasi varu gweru anya rikne dọhoru a n'esilawuru aị.

⁸ Lisiasi nyee iwu ele noobno nhne va nu ruwhnu i.] O buru nu i sika wa aiji, i jaamahia hite n'onu a kpakara nhne a noobno a."

⁹ Kpakara ele Ju yisi onu noobno Pọlu nhne nu o bu ezi oka nhne Lisiasi kwuru.

Pọlu gọru onu a nu ruwhnu Felikisi

¹⁰ Nye ọchichi wam whenu Pọlu aka, o kwu oka. Pọlu kaa, "M magwu m nu i bu nye ikpe eli ka agida awaha. Mkpoma nsoo m n'onu o gọru onu m nu ruwhnu i.

¹¹ I jeenwe rikne pohia nu o kawkole nri ọbochi nu ebo me znenu nu Jeruselem o kpo risi eli.

¹² Ele Ju whnuge me nu nye ọbula nọdogbuta nu rime Oro Nso, be whnuge hne me naakpakne mkpoma ele badnu mọbu n'oro ọgbako mọbu nu hne berere nu rime eli-ohna.

¹³ Be nwée rikne kahia nhne be kwno noobno m nhne.

¹⁴ Kọvu m nookwu ka nu ruwhnu i, m neekpenu Chiokike ke ele nda aị hite nu osno apna be karu nu o buo ezi apna. M kweru m nu kpakara nhne be gbaru n'Iwu Mozizi nu ọkwukwo ele ọwhnurninya.

¹⁵ M nwernu m otu olile anya nu Chiokike kpa ele ka nwernu, nu ele mee mma ma ele ojo jeehi n'enwu lizo.

¹⁶ Kwnornu nu m nwernu m olile anya ka, m naakpakna ehni m ehni ma m nwernu m ovu zi snam nu ruwhnu Chiokike ma nu ruwhnu badnu ige ọbula.

¹⁷ "Agida awaha m zila m nu Jeruselem, m va gweyanu ele ke m iwai, kwa masi ariohna.

¹⁸ Kpa me neeme ka n'Oro Nso, be whnurnu m kpa me mezuru mmemem ọbita ehni m richna, be whnuge m hne me nu ele badnu zi, o za mkpakpo me naakpakne.

¹⁹ Kọvu agwna ele Ju hi n'Esia va zi pji, be n'iwuru be kwesiri o zi hna nu ruwhnu i bno m nhne o buru nu o nwernu nhne be ji megidne m.

²⁰ Mọbu ele rukna ka zi hna kahia nhne ojo be piohiaru nu rime m nga me gwuzoru nu ruwhnu ele eze-ikpe,

²¹ okwolem otu nhne me kwuru nga me gwuzoru nu ruwhnu be, 'Anu neekpe m ikpe tna nu ruwhnu anu kwnornu nu m kweru m nu ele nwurnu onwu jeelizo n'enwu bna nu budnu.'

²² Felikisi nye magwu nhne gbasiri apna ka, mesni ikpe, kaa, "M jaawa ikpe nga nye risi ọgwu Lisiasi varu."

²³ O kanu nye ọgwu wam nechi otu riwhu ele ọgwu o legidne Pọlu anya, kọvu o nyee a oghere, kweru ele enyi a znenu a izi.

Pọlu nu ruwhnu Felikisi nu Durusila

²⁴ Nga ọbochi ele wheru, Felikisi nu nnwerne a Durusila nyerinya Ju varu. O dusi be sukwu Pọlu ma o bno nsnị kpa o jookwu nhne gbasiri ọkwnata ovu nu Karaịsi Jizosi.

²⁵ Kpa Pọlu nookwu nhne gbasiri ome mma, badnu ojikwaru ehni a, nu ikpe ke jaava, ọgwu turu Felikisi, o kaa, "Bikno, la kitna, m joosukwu i nga me nwernu oghere."

²⁶ O leru anya nù Pòlu jeenye a ìwai, o noosukwu a ige òbula ya nù a nookwurita òka.

²⁷ Kpa awha lawùru whemernu, Pokìosi Fesitòsi gweru ònodi Felikisi lele nye òchichi. Felikisi mernu ma mkpòma sọ ele Ju n'ònu, ò sịgbasi kòriri Pòlu n'òro ikelu.

25

Pòlu kweru o zne nù ruwhnu Siza

¹ Kpa Fesitòsi varù, ke òbochi èto whemernu, o hi nù Sizaria zne Jeruselem.

² Ele risi arìohna nù ele risi ele Ju bno Pòlu nhne nù ruwhnu Fesitòsi. Be riasno a

³ o menu be nhne òma, o mee ma Pòlu va Jeruselem. Be kwuru kpa kwnornu nù be gbalam iznuznu o gbu a n'apna.

⁴ Fesitòsi kaa, “Pòlu zì n'ikelu nù Sizaria, m jaalalna pìi ige matì.

⁵ Ele risi anù snornu m zne Sizaria bno nwerukna ka nhne ò büru nù o mernu nhne ojo.”

⁶ Fesitòsi dazì òbochi èsato mòbu nri berere, lahna Sizaria. N'òbochi ke sno a, ò dazìri nù ngadna ikpe, kaa be kwuya Pòlu.

⁷ Nga Pòlu varù, ele Ju hi nù Jeruselem varù gwuzoru a ndundu, bete noobno a agìda nhne tù ogwnu be nwée rikne gwuzote nkari.

⁸ Pòlu gòru ònu a, “Ò zá nhne ojo me mernu megidne iwu ele Ju, mòbu Òro Nso Chiokike mòbu Siza.”

⁹ Fesitòsi ma o mee nhne jòoso ele Ju n'ònu, ò sịkwa Pòlu, “Ò jaamasì ì o zne Jeruselem ma m kpe jì ikpe nù nhne be noobno ì nù ruwhnu m pìi?”

¹⁰ Pòlu kaa, “M gwuzo m nù ruwhnu òro ikpe Siza, hne be kwesiri o kpe m ikpe. Ò zá nhne ojo me mernu ele Ju ke jì n'iwuhuru ì magwu.

¹¹ Ò büru nù m luluru m iwu, mòbu mee nhne me kwesiri ènwu, m kwerulem ò nwù ènwu. Kòvu nù nhne be noobno m búo ezi òka, ò zá nye jeenwe rikne kwuru m nyee be, m jeezne nù ruwhnu Siza.”

¹² Fesitòsi nù ele neezni a ezni gba iznuznu, ò kaa, “Ì karù nù ì jeezne nù ruwhnu Siza, ì jeezne nù ruwhnu Siza.”

Pòlu nù ruwhnu

Agìripa nù Bènsi

¹³ Kpa òbochi ele nù ele wheru, Eze Agìripa nù nwene a rinya Bènsi varù Sizaria va o bekwu Fesitòsi.

¹⁴ Kpa be dazìri agìda òbochi, Fesitòsi kanù eze nhne gbasìri Pòlu, “Ò zì otu nwerukna Felikisi sịgbasiri n'ikelu hna.

¹⁵ Nga me znernu Jeruselem, ele risi arìohna ele Ju nù ele okno badnù bnornu Pòlu nhne, kaa, me kpe a ikpe ènwu.

¹⁶ Kòvu m kannù m be nù ele Rom zá neekpe nye òbula ikpe ènwu hna be béle òsno mee ya nù ele noobno a nhne whnùta ruwhnu nù ruwhnu, ma o nwernu oghere gòru ònu a.

¹⁷ Nga be varù hna, m gbúgele m òkwnu, ke chi bòru m dazìri nù òro ikpe, kaa be kwuya nwerukna wam.

¹⁸ Ele noobno a nhne nwée rikne bno a nhne ojo òbula me neeche be joobno a.

¹⁹ Kòvu be nù Pòlu nòdogbuta nhne gbasìri òkwa Chiokike be, nù otu nwerukna rẹwhna a bù Jizòsi, nye nwùrnù ònwu, kòvu Pòlu naakaa nù ò zì bñdu.

²⁰ M máam nhne me jeeme dna ndịdna gbasiri oka ka, m sika Pọlu ma o jaamasị a o zne Jeruselem, ma m kpe m a ikpe kwnornu nhne be noobno a.

²¹ Kọvu Pọlu karu be bita a n'ikelu ma Siza kpe a ikpe. M nyee iwu be bita a n'ikelu tem m zizne a ke Siza."

²² Agiripa kanu Fesitosi, "M jeeji nsnị m nurnu nwerukna ka." Fesitosi kaa, "I jonu a n'ekile."

Pọlu nu ruwhnu

Eze Agiripa

²³ N'ekile a, Agiripa nu Benisi jiri okne tne eri nu dudugna bnanya oro ogbako, ma ele risi ele ogwnu nu ele risi eli. Fesitosi kaa be kwuya Pọlu, be kwuya Pọlu.

²⁴ Fesitosi kaa, "Eze Agiripa, nu kpakara ele ai nu be zi hna, anu whnurnu nwerukna ka nye kpakara ele Ju zi hna nu Jeruselem dnarnu ikpo gbasiri a nu ruwhnu m. Be siwama okokoba nu o kwesile o zi budnu neezne nu ruwhnu.

²⁵ Kọvu nu m piohala m nhne o mernu ke kwesiri be ji kpe a ikpe enwu. O kaa nu o jeeznu nu ruwhnu Siza, m kaa nu m jeezizne a.

²⁶ Kọvu m nwee m risi nhne me jaagbaznenu Siza okwukwo gbasiri a. O bu nhne mernu me kwuharu a nu ruwhnu anu, ke kakwo nu ruwhnu i, Eze Agiripa, ma a dna ndịdna oka ka, m jeenwe risi nhne me jaagba n'okwukwo.

²⁷ Kwnornu nu m kwesile m o zizne nye ikelu hne me nwee rikne kahia risi nhne be noobno a."

26

Pọlu nọogoru onu

nu ruwhnu Agiripa

¹ Agiripa kanu Pọlu, "Ka bu oghere i nwernu i jookwu onu i."

Pọlu dnosnima aka a, goru onu a,

² "Eze Agiripa, m gwnurnu m ehni m nye ruwhnu oma nu m jogoru onu m nu ruwhnu i tna, hite nu kpakara nhne ele Ju noobno m.

³ Ke kakwo, kwnornu nu i magwu kpakara omen'eli ele Ju nu nhne a kwno noodogbuta, m naariasno, bikno, nwe ndidi, bnote m nsnị n'onu.

⁴ Kpakara ele Ju magwu kpa budnu m zi hite nga me bu nnwo ikoro. Be magwu hite nu mbom kpa me wuru kpakara budnu m nu rime eli m ma nu Jeruselem.

⁵ Be magwu, o buru be jeekwe agba akebne, nu hite nu mbom m bu m nye otu siri rikne nu okpukpe ai, m bu m nye Farisi.

⁶ Kitna, m gwuzogwu m n'ikpe kwnornu nu m nwernu m olile anya nu mkwna Chiokike kweru ele nda ai.

⁷ Ka bu mkwna ke Chiokike kweru kpakara nri avnurnu nu ebo ke ai, kpa be neekpenu Chiokike iwhnehnie nu abali. O bu kwnornu okwnata ovu ka, Eze Agiripa, nhne ele Ju kwno noobno m nhne.

⁸ Ndaa kpa anu nwee rikne kwe nu Chiokike neeme ele nwurnu onwu hi n'enwu lizo?

⁹ "Me n'whuru m cheru nu m jeenwe rikne mee nhne megidne rewhna Jizosi nye Nazareti.

¹⁰ O bu nhne me mernu nu Jeruselem. M naharu m rikne n'aka ele risi arjohna yisi agida ele Chiokike n'ikelu, nga be noogbu be, m yisiri m aka m megidne be.

¹¹ Agida ige m znernu m hite n'otu oro ogbako ele Ju du berere ta be awhnuwhnu, mee ma be gonahoru rewhna Jizosi, m vuru okne onuma ke mernu m zne n'eli ele berere kpakna be ehni.

Otuhnasna mkpoma Pọlu
(Ernu 9:1-19; 22:6-16)

12 “Ka bụ nhne me kwno neezne Damasịkosi nụ rikne nụ iwu ele risi ariohna.

13 N'apna n'esilawuru iwhehnie, Eze, m whnurnu m okne iwhe kpakpa iwhe ẹnam hiri n'oligwe mukwasi me nụ ele nụ me sno.

14 Kpakara aị dna n'ẹli, m nurnu m otu nkoli kanu m n'onu ele Hiburu, 'Sọlu, Sọlu, ndaa nhne i kwno naakpakna m ẹhni, i nwée rikne gba ọchi n'igwnu.'

15 “M sịkwa, Ị bụ nyele, Nyenwe aị?”

“Nyenwe aị kaa, 'M bụ m Jizọsi nye ị naakpakna ẹhni.

16 Lizo, gwuzoru n'ochi ị lawuru. M mernu m ma ị whnu m anya, ma m hohia m jị buru nye izi m, ị jaakanu ele berere nhne i whnurnu tna, nụ nhne me jeegesi i nụ ruwhnu.

17 M jodohia ị n'aka ele Izireli ma n'aka ele Ju ele me jeezine i.

18 M jeezine i ma i kpume anya be, mee be hi n'ochichiri bna n'iwhe, hite nụ rikne Kpewensu tuhnasna hne Chiokike zi. Ngam, Chiokike jaagbarunu be mmehie be, ma be nwehia oghere n'esilawuru ele Chiokike bitaru nsọ hite n'okwnata ovu nụ me.’

Pọlu tnurnu otnutnu ernal

19 “Eze Agiripa, m mēne m risi rikne n'owhnurninya wam hiri n'oligwe va.

20 Hite nụ rime Damasịkosi, Jeruselem nụ kpakara Judiya, du ele buo ele Ju, m kpuru m okwo be hi nụ nhne ojo be tuhnasna, vakwnusi Chiokike, mee nhne neegesi nụ be hiri nụ mmehie be whuya.

21 Ka bụ nhne mernu ele Ju nwugwuru m n'Oro Nso, ma be gbu m.

22 Kọvu Chiokike yinu m aka du tna, m gwuzo m hna naagba akebe nyee ele ezi nụ ele matị. Nhne me nookwu bụ nhne ele owhnurninya nụ Mozizi kwuru jeeme.

23 Be karu nụ Karaisi jaatariri awhnuwhnu, kovu o jobu nye mbom jeehi n'enwu lizo, gesi ele Ju iwhe ke oznohia ma ele buo ele Ju.”

24 Kpa Pọlu zi noogoru onu a kpa, Fesitosi gweru okne nkoli si okokoba, kaa, “Pọlu, ẹra naachna ị, okne omumu okwukwo ị neeme ẹra naagba ị.”

25 Pọlu kaa, “O zá ẹra naagba m, Fesitosi Nye zi Ogwnu. Nhne me nookwu bụ ezi oka nụ oka nye anya dnornu.

26 Eze, ị magwu kpakara nhne me ji m onu nookwu. M magwu m nụ ị magwu kpakara be, kwnornu nụ o zá nhne be mernu nụ hne zi mgwuga.

27 Eze Agiripa, i kwegwu nụ nhne ele owhnurninya kwuru? M magwu m nụ i kwegwu.”

28 Agiripa kanu Pọlu, “N'ige matị ka, i nwernu rikne mee m buru nye kweru nụ Karaisi?”

29 Pọlu saru a, “N'ige matị mọbu ke kwu, okpukpe m hne Chiokike zi bụ ma jị nụ kpakara ele noobno m nsnị tna buru nhne me bụ, o buo n'ijigba ka.”

30 Eze nụ nye ochichi nụ Benisi nụ kpakara ele nụ be dazị lizo.

31 Be whoga, zne nookwu n'esilawuru be, be kaa, “O zá nhne ojo nwerukna ka mernu be jeeji gbu a mọbu tu a ikelu.”

32 Agiripa kanu Fesitosi, “O buru nụ nwerukna ka kwüle nụ o jeezne nụ ruwhnu Siza, be znernu sigbasi a, o la.”

¹ Nga be kpebiri nū a jeezne Itali, be gweru Pōlu nū agwna ele ikelu berere yisi n'aka otu nye nēchi otu riwhu ele ogwnu rēwhna a bụ Jiljosi, nye ogwnu ele otu Ogositosi.

² A bna ogbo hite n'Adiramitium ma a zne n'apna ẹli Esia, a kwōru ogbo zne. Arisitakosi nye Tēsalonika n'ẹli Masidonia snornu aị.

³ Ke chi bōru, a dū Sajdoni. Hite n'ovu ọma, Jiljosi sigbasi Pōlu o zne whnū ele enyi a, be nyee nhne zị a mkpa.

⁴ A hite nū pji zne, kōvu ruwhere neewhegidne aị, a kwōru ogbo whe aznū ẹli ọhia esilawūru Saiporosi.

⁵ A kwōwhe osimini Silisia nū Pamflia, vadu Mira nū rime Lisia.

⁶ Nye nēchi ele ogwnu whnūrnū otu ogbo hi nū Alēkizandaria ke neezne Itali, o yisi aị n'ogbo wam.

⁷ A kwōru wōhnernerne agida ọbochi, hite nū nhne osi rikne a vadu n'ẹli Sinidusi, ruwhere kwéle a zne nū ruwhnu, a kwōru ogbo whe aznū ẹli Kiriti whe Salimone.

⁸ A nọkwo ogbo nū ngeri ẹli. Hite nū nhne osi rikne a dū hne be kwu “Ọnu Mini Udno,” ke zā ikere nū ẹli-ọhna Lasia.

⁹ Kpa a tuwhuru agida ige, a whnūrnū nū ọ kwō ogbo kịtna nū lele nhne aghom, kwnornu nū Ọbochi Okpusni Mmehie* gawhelem. Pōlu zni be ezni,

¹⁰ “Ele nwe m, m whnūrnū m nū izne mini aị ka hite kịtna jọburu nhne aghom, ivu nū ogbo joolulu, ma bụdnu ele badnu.”

¹¹ Kōvu nye nēchi ele ogwnu gnernū nsnī nhne nye nọkwo ogbo nū nye nwe ogbo kwuru karū nhne Pōlu kwuru.

¹² Ẹli ngeri osimini wam bụo ọma ọ daziri n'ige okirika, agida ele kakwo kweru be kwōma ogbo bna osimini ma be zne Fonikisi. Hna bụ ọnu mini n'ẹli Kiriti ke keteru ruwhnu nū nkala lawūru nū ọdidna ẹhnam.

Abaka-mini osimini

¹³ Ruwhere matị hite nū ẹli ẹli bete neewhe, ele rukna wam neeche nū be jeeme kpa be kwuru, be dọlizo nkno ogbo kwōru ogbo neezne nū ngeri Kiriti.

¹⁴ O gbúle ọkwnu ruwhere siri rikne be kwu rugwu ọbosi ẹhnam bete ewhe hite n'ẹli ọhia esilawūru wam.

¹⁵ O whekwasị ogbo wam, a nwéle rikne knekwali ogbo wam, a sigbasi a ma ruwhere vuru a neezne.

¹⁶ A kwōru ogba whe aznū ẹli ọhia esilawūru matị be kwu Kauda. Ọ rarū ẹhni o vubna ogbo matị aị nū rime ogbo aị.

¹⁷ Nga be vuru ogbo matị wam, be gweru eriri knegidne ogbo aị gburugburu. Be nọotu ogwnu ọ zị be dnabna nū rime rịzna rọto nū ngeri Libiya, be gwedna bala ogbo, sigbasi ogbo ma ruwhere vuru a neezne.

¹⁸ Okne abaka-mini bete ewhe, ke chi bōru be bete nootuwhu ivu zị n'ogbo nū rime mini.

¹⁹ N'ogbochi ke sno a, be gweru aka be túbna nhne be ji nọkwo ogbo osimini.

²⁰ Agida ọbochi, a whnūna ẹhnam mọbu mbọ, ruwhere zị kọriri neewhesi rikne. A nwéma ntúkwasị ovu nū o nwernu nye be jọoznohia.

²¹ Ele rukna wam dazị agida ọbochi, ríle wiri, Pōlu gwuzoru nū ruwhnu be, kaa, “Ele nwe m, anū bnóné nsnī nhne me kwuru, a znékele ọkwohala ogbo hite nū Kiriti, a znékele owhu mwūhu kpakara nhne ka.

²² Kịtna, anū nwe ovu siri rikne, ọ zā nye ọbula n'esilawūru anū jootuwhu bụdnu a, okwolem ogbo jooowhu.

* **27:9** Ọbochi Okpusni Mmehie mọbu ọwhaji-ẹli Ọkwukwo ke mbom kwuru ọbochi ovu ọnu

23 Kwnornu nū enine izi Chiokike nye nwe m, nū nye me neekpenu gwuzoru nū ngeri m abali tna.

24 O kaa, 'Polu, ogwnu tū i, i joogwuzoriri nū ruwhnu Siza, Chiokike hite n'oru a nyenem ji kpakara bɔɔndu ele ji nū be zi n'ogbo.'

25 Ele nwe m, anū nwe ovu siri rikne, kwnornu nū m kwnatarnū m Chiokike mkpɔma nū o jeeme kpa o kanū m.

26 Kɔvu a jaakpotasi n'otu ɛli ɔhia esilawuru n'osimini."

Ogbo wam kpuru

27 N'obochi ke nri nū ɛno n'abali, abaka-mini noovughari aī nū osimini Adiratiki. N'esilawuru abali ele nɔokwo ogbo neeche nū a zi ndundu ngeri ɛli.

28 Be gwedna eriri whnū nū mini zi otu riwhu nū nri lawuru rula ɛli ɛli, ige matī be tū kwno a berere whnū nū o bū nri tolu.

29 Be nɔotu ogwnu n'ogbo aī jɔokpotasi nū rugwu, be gwedna nkno ɛno hite n'aznū ogbo, neeke okpukpe ma iwhe whuya.

30 Ele nɔokwo ogbo noopio ma be gbawhu n'ogbo, be gwedna ogbo matī nū mini nɔogho aghigho lele be neezne bīta nkno nū ruwhnu ogbo.

31 Kɔvu Polu kanū nye nēchi ele ogwnu nū ele ogwnu, "O buru ele nɔokwo ogbo dāzila nū rime ogbo, be jɔoznohia anū."

32 Ele ogwnu wam gbubi eriri knegwu ogbo matī wam, sigbasi a, o wheru zne.

33 Kpa chi nɔobo, Polu riasno be ri wiri, "Anū neese ka bū nri ɔbochi nū ɛno, anū rīle nhne ɔbula kpakara ige ka.

34 Bikno, anū ri wiri, o zi mkpa ma anū ziri bɔɔndu, otu rukeri-ize anū jāadnahala nū risi anū."

35 Kpa o kwukworu ka, Polu gweru brēdi, tūnu Chiokike mmamma nū ruwhnu kpakara be, nyawa a, bete neeri.

36 Be yisi ɛhni, nye ɔbula n'esilawuru be ri wiri.

37 A zi riwhu badnū lawuru nū nri ɛsau nū isunu nū rime ogbo.

38 Kpa be rikworu wiri, be tūbna kpakara ikpa zi n'ogbo ma ogbo ziri ewheke n'olu mini.

39 Nga chi bɔru, ele nɔokwo ogbo máa ɛli ka, kɔvu be whnurnu otu ɔnu mini rīzna rīzna, be kaa, o buru o jeekwe omume be jɔokwo ogbo n'olu rīzna.

40 Be gbuhala nkno, sigbasi o dnabna nū rime osimini, be kneme eriri kne nhne be jeji o kwɔ ogbo. Be gwelizo bala nū ruwhnu ogbo, ma ruwhere whekwasī a nū ruwhnu, be neezne nū mkpomkpo ɛli.

41 Ogbo dnakwasī olu rīzna, mii nū rīzna, ruwhnu ogbo takwnūsi nwéé rikne whuya, aznū a gbaja mpekele mpekele hite n'abaka-mini.

42 Ele ogwnu pioru ma be gbu kpakara ele ikelu, o zi otu badnū gwu mini gbawhu.

43 Kɔvu nye nēchi ele ogwnu pioru o bīta Polu bɔɔndu, kwéle be mee kpam. Kɔvu o kanū kpakara ele rukna wam ele marnū o gwu mini be dnabna mini, beru ɔsno gwuru mini zne mkpomkpo ɛli.

44 O kanū ele berere snornu be, knernū aka n'isisi mɔbu mpekele ogbo, kpakara aī mernu kpa dū olu ɛli.

² Ele nwe ẹli wam gesiri aị ovu oma k'agịda, kpa mini noozo, iyi nọtou, be kpawhụsi bẹkwnu kwnornu aị.

³ Pọlu chikota nkala isisi nọtubna be nụ rime bẹkwnu, otu okpu-ẹli bẹkwnu chihiaru gbakwnusi Pọlu n'aka.

⁴ Ele nwe ẹli whnurnu hne agwo wam gbakwnusiri Pọlu n'aka, be kwu n'ehni be, “Nwerukna ka bu nye noogbu badnu, o bu n'ezi nu o whuyaru nu rime ogbo, nhne ojo a noosno a.”

⁵ Kọvu Pọlu kpabna agwo wam nụ rime bẹkwnu. O za nhne mernu a.

⁶ Be neese, neele anya nu o jaaza, mọbu dna n'eli nwuma. Be se gbu okwnu, o za nhne buo oma be whnurnu, be gbanwo mkpoma be kaa, “O bu chi.”

⁷ Hne zila ikere bu agida ẹli nye risi ẹli wam be kwu Pubiliosi. O kwubnan-yarnu aị nkari, obochi eto a zi n'oro lele ele izne.

⁸ Nda Pubiliosi dnanj ẹli naaria ehni igbugbu ogori nu ruwho owuwu. Pọlu zne nu rime oro hne o zi, kpenu a okpukpe, tukwasi a aka a lawuru, gwọ a.

⁹ Nga ka mernu, kpakara ele berere n'eli wam naaria ehni igbugbu varu, Pọlu gwọ kpakara be.

¹⁰ Be nyee aị agida nkesi, nga a bnarnu ogbo panizo izne mini aị, be nyee aị agida nhne zi aị mkpa.

Hite nu Malita du Rom

¹¹ Ke enwa eto wheru, a kworu ogbo hi nu Alekizandaria be kwu “Rumu Ejima.” Ogbo ka daziri hna n'okirika.

¹² A vadu ẹli Sirakosi daziri pji obochi eto.

¹³ Hite nu pji, a kworu ogbo zne ẹli Regium, ke chi a boru, ruwhere bete newhe hite nu ẹli ẹli, n'obochi lawuru a vadu ẹli Puteoli.

¹⁴ A whnurnu agwana rumu nda, be riasno aị daziri otu ikwezu pji. Ka bu kpa a jiri vadu Rom.

¹⁵ Rumu nda ele zi nu Rom nurnu nhne gbasiri aị, be va hne zi ikere lele Ahia Apisi nu Oro Eto Ele Izne, kwnusi aị. Nga Pọlu whnurnu be, o tunu Chiokike mmamma, mesi mkpoma rikne.

Pọlu nu rime Rom

¹⁶ Nga a vaduru Rom, be kweru Pọlu wuru ke a ichne ya nu nye ogwnu neese a.

¹⁷ Kpa obochi eto wheru, Pọlu sukwukota ele risi Ju ikwu. Nga be gbakoru, o kanu be, “Rumu nda m, o bu n'ezi nu o za nhne ojo me mernu megidne ele ke aị mọbu omen'eli a nahiaru n'aka ele nda aị, be mernu m nye ikelu nu rime Jeruselem, gweru m nyewhete n'aka ele Rom.

¹⁸ Be sikwaru m ajiji, be piuru o sigbasi m kwnornu nu o za nhne ojo me mernu ke kwesiri enwu.

¹⁹ Nga ele Ju kwéle, be mernu m, m kaa nu m jeezne nu ruwhnu Siza, o bu n'ezi nu o za nhne me noobno ele ke m.

²⁰ O bu nhne me kwno pio ma me nu anu kwurita oka, kwnornu be turu m ijigba ka kwnornu nu nhne wam kpakara ele Izireli neele anya a.”

²¹ Be saru Pọlu, “O za okwukwo izi obula a whnurnu hite nu Judiya gbasiri i, o za rumu nda aị vuyaru otnutnu mọbu oka ojo obula gbasiri i.

²² Kọvu a joonu nhne i jookwu, kwnornu nu kpakara ele badnu nookwu oka megidne otu wam i noosno.”

²³ Be nu Pọlu yi igba, agida be varu n'obochi wam hne Pọlu zi. Hite n'osisi du abali o znirni be izi oma ẹli-eze Chiokike. O gbalị ma be jeekweru nhne gbasiri Jizosi. Pọlu kanu be kpakara nhne be gbaru n'Iwu Mozizi nu nhne ele owhnurninya gbaru n'okwukwo nsọ.

²⁴ Agwna be kweru ikwu-ọnu a, kọvu ele berere kwéle.

²⁵ Kpa be naala, okewa zịri n'esilawuru be, Pọlu kwuru otu nhne ka, "Enine Nsọ kwuru nkarị hite n'ọnu Azaya nye ọwhnurninya nyee ele nda anụ,

²⁶ 'Zne kanụ ele ka,
Anụ jaazị nọonu kpọi, kọvu anụ jọoghohia.
Anụ jaazị neele anya, kọvu anụ jọowhnu ọsno.

²⁷ Kwnornu ovu ele ka zị rịnya,
nsnị nynọnu be,
anya be kpuru isni,
ọ zị be whnụ n'anya be,
nsnị be nurnu,
echiche be ghọhia, be tūhnasna mkpọma,
m gwọ ẹhni igbugbu be.' "

²⁸ Pọlu kwukwo ọka a, kaa, "Anụ mahia nū ọznohia Chiokike bụ nhne be gweznenu ele bụo ele Ju. Be joo bno nsnị." [

²⁹ Kpa Pọlu kwukworu ọka, ele Ju la, nọdogbuta n'anya rikne n'esilawuru ẹhni be.]

³⁰ Awaha lawuru Pọlu wuru n'oro ke a, nọokwu ọgwo ọro, nanabnanya kpakara ele naavakwnusi a.

³¹ Ọ kpọ okwo izi ọma ẹli-eze Chiokike, zni nhne gbasiri Nyenwe aị Jizọsi Karaịsi hite n'ọnu rikne, ọ zā nye noobnosni a.

**Ọkwukwo izi Ọpọlu
gbaznenu
Ele Rom
Nhne gbasiri ọkwukwo izi ka**

Ọkwukwo izi Ọpọlu gbaznenu ele Rom bụ ma be jiknenu ọ nabnanya Ọpọlu nọ Rom. Echiche a bụ ma ọ nọ ọrụ n'esiawuru be ige matị, hite n'oyi aka be, o zne Sipi. Ọkwukwo izi ele Rom neegesi kpa Chiokike n'ogwu ele badnụ ele ikpe mána, mee ya nọ be ziri n'udno. Chiokike mernu ele badnụ nọ a ziri n'udno hite n'okwnata mkpọma ke zị nọ Jizọsi Karaịsi. Nye Karaịsi ọbula nwernu udno kwnornu nọ Chiokike mernu badnụ nwernu ẹni a, whoga nọ rikne ke mmehie nọ ẹnwu. Ọpọlu kwuru nọ ele Ju nọ ele bụo ele Ju nwernu igwe n'oru Chiokike hite nọ Jizọsi Karaịsi.

Nhne zị n'ọkwukwo ka

Ọpanizo (1:1-17)

Oznohia hite nọ mmehie zị mkpa (1:18--3:20)

Apna Chiokike kwnornu ọznohia (3:21--4:25)

Budno ikne nọ rime Karaịsi (5:1--8:39)

Izireli zị nọ mmụma Chiokike (9:1--11:36)

Agwa nye Karaịsi (12:1--15:13)

Ọkwukwo nọ obekwu ikwu (15:14--16:27)

¹ Mawa Ọpọlu, nye izi Karaịsi Jizọsi, nye Chiokike sukwuru, ma m bụru m nye izi Jizọsi, hōhia masị a ma m bụru m nye zni izi ọma a, naagba ọkwukwo izi ka.

² Ka bụ izi ọma Chiokike kweru mkwna ogologo ige wheru ewhe hite n'ọnu ele ọwhnurninya, lele kpa be gbarụ a n'ọkwukwo nsọ.

³ Izi ọma ka gbasiri Nnwọ a, Nyenwe aị Jizọsi Karaịsi, nye ghoru badnụ, be mụ a n'avnrnu Devidi.

⁴ Chiokike gesiri nọ Jizọsi Karaịsi bụ Nnwọ a, nga o mernu o hi n'ẹnwu lizọ hite nọ rikne ke Enine Nso.

⁵ Hite n'aka a, Chiokike nyernu aị oru ọ bụru ele izi kwnornu Karaịsi, ma a sukwu kpakara mba ma be kweru nọ ya, bno a masị nsni.

⁶ Kpakara anụ ele zị nọ Rom, zị n'esiawuru ele Chiokike sukwuru ma be bụru ke Jizọsi Karaịsi.

⁷ M naagbanụ anụ ele zị nọ Rom ọkwukwo, ele Chiokike whnrnu n'anya, sukwu ma be bụru ele ke a,

Oru nọ udno ke Chiokike Nda aị nọ Nyenwe aị Jizọsi Karaịsi dazinu anụ.

Okpukpe ọtu mmamma

⁸ Ke mbom, m nọtunu Chiokike mmamma hite nọ Jizọsi Karaịsi kwnornu anụ, nọ ọkwnata mkpọma anụ gazuru ọwa.

⁹ Chiokike, nye me ji kpakara mkpọma m naakwanụ, hite n'okpo okwo izi ọma Nnwọ a, bụ nye akebe m, nọ m neechenwanya anụ ige ọbula.

¹⁰ Ige ọbula me neekpe okpukpe, m nọorio Chiokike ma hite n'echiche ọma a, o nyee m oghere me va lekasi anụ.

¹¹ Kwnornu nọ m pioru m ọ whnụ anụ anya ma me nọ anụ kerị ngozi ke enine, ke jeeme anụ gwuzosi rikne.

¹² Ke bụ me va, a kasirita ẹni aị ovu, ọkwnata ovu m jaakasi anụ ovu, ọkwnata anụ jaakasi m ovu.

¹³ Rumu nda m, m pioru anụ mahia nụ agida ige, m pioru m ọ va lekasi anụ, kọvu m nwée m rikne dị kịtna. M pioru m o rihia mkpuru ovu n'esilawuru anụ lele kpa me rihiaru mkpuru ovu n'esilawuru ele buo ele Ju.

¹⁴ Kwnornu nụ m ji m kpakara ele badnụ ogwo okpo okwo izi oma, ma ele Giriki, ma ele buo ele Giriki, ele nwernu akọ, ma ele nwée akọ.

¹⁵ Ke bu nụ ọ zị m mkpa o zni anụ ele zị nụ Rom izi oma.

Iknerne ma ke izi oma

¹⁶ Iwhnerne izi oma ka zá nọtụ m, ọ bu rikne Chiokike dị ọznohia kpakara ele kweru, ele Ju ke mbom, nụ ele buo ele Ju.

¹⁷ Kwnornu nụ ome mma ke Chiokike whuyaru iwhne n'izi oma, hite n'okwnata ovu dị okwnata ovu, lele kpa be gbarụ a n'okwukwo nsọ, “Nye mee mma jeehi nụ okwnata ovu a ziri budnu.”

Onuma Chiokike megidne badnụ

¹⁸ Kwnornu nụ ovu owe ẹhni Chiokike hiri n'oligwe whuya iwhne megidne kpakara ele máa Chiokike, ele hi nụ risi rikne aruru-eli be naakpagidne ezi oka.

¹⁹ Chiokike neewe ẹhni megidne be, kwnornu nụ nhne be kwesiri ọ mahia gbasiri Chiokike whuyaru iwhne. Ọ bu Chiokike n'iwhuru a gesiri be ẹhni a.

²⁰ Hite n'okike owa, nhne be whnụ anya gbasiri Chiokike, nụ rikne a zị okwnukokwnu, nụ oyiyi a zị nsọ bu ke badnụ whnuru anya, be whnuru be nụ kpakara nhne Chiokike keru, ke bu nụ badnụ nwée nhne o ji gọnahoru ẹhni a.

²¹ Be marnụ Chiokike, kọvu be nyéne a igwugwu kwesiri a, be tị mmamma, kọvu echiche be bu nhne etekne, mkpoma iwhnirniwhno be jihiaru n'ochichiri.

²² Be kaa nụ be bu ele nwernu akoniche, be bu ele iwhnirniwhno.

²³ Tnụnuma be jaakwanụ Chiokike ke nwụ onwu, be nọkpo risi eli nyee nhne be pnjornu ọpni lele badnụ ke nọonwu onwu, nụ onunu, nụ anohia nụ agwo.

²⁴ Chiokike gweru be nyewhete n'aka nhne zila richna hite nụ ome nhne ovu ojo be pioru, be gweru ẹhni be mee nhne tị iwhnerne n'esilawuru ẹhni be.

²⁵ Be gweru aghalaghala gbanwo ezi oka Chiokike, be nọkpo risi eli nyee nhne be keru eke tnụnuma nye keru nhne n'iwhuru a, nye nwe ọzarni okwnukokwnu. Amim.

²⁶ Kam kpararụ, Chiokike nyernu be n'aka ome nhne tị iwhnerne. Ele rinya gharụ o mee nhne lele kpa omen'eli omekorita nyerukna nụ nyerinya zị, be be neemekorita.

²⁷ Kpam masi, ele rukna sigbasiri ọ dnanị ele rinya, be naadnanyitaru ẹhni be. Be neeme nhne tị iwhnerne n'esilawuru be, be naata awhnụwhnu nhne ojo be mernu.

²⁸ Kpa be kwéle ọ marnụ Chiokike nụ mkpoma be, Chiokike nyewhete be n'aka ovu ruru ọru, ma be mee nhne be kwésile o mee.

²⁹ Aruru-eli zị ọdo nụ ọdo jihiaru mkpoma be, mmehie, ọwho-anya, okne nhne ojo, ntaknarnama ovu, ogbu badnụ, ọlu ogwnu, aghigho, nụ osno irno, ozno izno.

³⁰ Ele naakaja ẹhni be, be snornu Chiokike irno, ele só anya, ele noolu onu, ele neechehia apna ikne kpa be jeeme nhne ojo, ele zá noobnonu ele murnu be nsnị,

³¹ ele nwée ọghohia, ele zá naabita ogba-njo-ẹhni, ele nwée ovu oma, ele zá nọdonu ele berere obirizi.

32 Be magwụ nụ iwu Chiokike kwuru nụ ele neeme nhne ojo ka jọonwu ẹnwu, ọ bụo nụ be neeme nhne ele ka kpọi, kọvu be naadasịnu ele neeme nhne ele ka n'ikwnu.

2

Ikpe zị snam ke Chiokike

1 Jị badnụ, i nwée rikne gónahoru ẹhni i, jị nye neekpe nye berere ikpe, kwnornu nụ hne i zị neekpe nye berere ikpe bụ hne ikpe zị naama i, kwnornu nụ i neeme otu nhne wam.

2 A magwụ nụ Chiokike neekpe ikpe zị snam nụ risi ele neeme kpakara nhne ka.

3 Jị badnụ etekne ke neeme nhne ke i kwno neekpe ele berere ikpe, i che nụ i jaagbanahọru ikpe Chiokike sa?

4 Mọbu i neeledna okne ovu ọma Chiokike anya, nụ ọnabnanya a, nụ ogologo ọsnuta ovu a? N'ezi, Chiokike neemenu i nhne ọma ka ma o dubna i nụ ọtuhnasna ovu.

5 Kọvu hite nụ ovu rikne nụ ovu kwé ọbniaji i, i naabitanu ẹhni i awhnụwhnu ke kakwo n'ọbochi ovu owe ẹhni Chiokike nụ okpume ikpe a zị snam.

6 Chiokike jọkwu nye ọbula ọgwo lele kpa ẹrnu a jiri zị.

7 Ele gwuzosi rikne neeme nhne ọma, noopio igwugwu nụ ọsobisi, nụ nkọli bụdnu, Chiokike jeenye be bụdnu kwó okwo.

8 Kọvu, ele noopio nhne ke aka be, ele kwéle ezi ọka, ele noosno nhne ojo, Chiokike jọowukwasi be ovu owe ẹhni a nụ ọnuma a.

9 Okne awhnụwhnu nụ nhne igbugbu jaazịnu kpakara ele neeme nhne ojo, ke mbom ele Ju, ma ele bụo ele Ju.

10 Kọvu igwugwu, ọsobisnu nụ udno jaazịnu nye ọbula neeme nhne ọma, ke mbom ele Ju, nụ ele bụo ele Ju.

11 Kwnornu nụ Chiokike zá neele badnụ anya nụ ruwhnu.

12 Kpakara ele mernu mmehie hne be nwée Iwu Mozizi jọonwu hne Iwu zịla, ele mehieru hne Iwu zị, Iwu jeekpe be ikpe.

13 O bụo ele nọonu Iwu bụ ele zị snam nụ ruwhnu Chiokike, kọvu ele neeme nhne Iwu kwuru.

14 Nga ele bụo ele Ju ele nwée Iwu hiri n'ovu be mee nhne Iwu kwuru, kam bunu be Iwu, ọ bụ n'ezi nụ be nwée Iwu.

15 Bụdnu be neegesi nụ be gbagwụ Iwu n'ovu be, ovu be naagbanụ be akebne, noobno be nhne, mọbu nọogomanu be.

16 Ka jọobu n'ọbochi Chiokike jeekpe nhne tugwaru otugwa ke badnụ ikpe, hite n'aka Karaisi Jizọsi lele kpa izi ọma me neezni kwuru.

Ele Ju nụ Iwu

17 I noosukwu ẹhni i nye Ju, nọotukwasi ovu n'Iwu, neeji Chiokike naanya risi.

18 I magwụ echiche a, i nahọru nhne ke kakwo mma, kwnornu nụ i mụhiaru a n'iwu.

19 I kwnataru ovu nụ i bụ nye noodu nye isni, iwhne ele zị n'ọchichiri,

20 nye neezni ele iwhnirniwhno nhne, nye neezni rụmu takiri nhne, nye nwegwu akoniche zuru ozu, nụ ezi ọka.

21 Jị nye neezni ele berere nhne, i zní ẹhni i nhne sa? I neezni ọ zá nye znu buznu, jị n'iwuhuru i znú buznu sa?

22 I kaa, "Ọ zá nye mee ọyi," jịwa, i méé ọyi sa? I snornu chi berere irno, kọvu i znú buznu nụ ruwhnu ẹnwu?

²³ Jì nye jì iwu Chiokike noolu ọnu, ọ bụ i zá neeme Chiokike nhne iwhnerne hite n'olulu iwu a?

²⁴ Lele kpa be gbarụ a n'ọkwukwo nsọ, "Ele búo ele Ju naakaja rẹwhna Chiokike kwnornu anụ ele Ju."

²⁵ Ọ bụru nụ i b́ta iwu, ọkpa nka i b́tu nhne, kọvu ọ b́ru nụ i b́tage iwu, ọkpa nka i b́tu nhne etekne.

²⁶ Ọ b́ru nụ ele búo ele Ju be kpáge nka, b́ta Iwu, be jeegweru be lele ele be kparụ nka.

²⁷ Nye be kpáge nka n'anọ-ẹhni kọvu ọ b́taru Iwu jaama i ikpe, jì nye nwegwu Iwu be gbarụ n'ọkwukwo nụ nye be kparụ nka, kọvu i zá naab́ta Iwu.

²⁸ Badnụ búo nye Ju n'anọ-ẹhni kpọi, ọkpa nka búo masị ke anọ-ẹhni kpọi.

²⁹ Nye Ju n'ezi b́tu nye Ju n'ovu. Ọkpa nka b́tu ke be kparụ n'ovu hite n'enine Chiokike, ọ búo n'Iwu be gbarụ n'ọkwukwo. Ọznarni badnụ wam híge n'aka badnụ, kọvu n'aka Chiokike.

3

Chiokike kwesiri

ọ kwnata ovu

¹ Kìni b́tu nhne ele Ju nwernu kakwo ele búo ele Ju? Ọ zì mbnarna zì nụ ọkpa nka?

² Owe! K'agída n'apna ọbula. Ke mbọm, Chiokike nyernu ele Ju ikwu-ọnu a.

³ Ọ b́ru nụ agwna be nwée ọkwnata ovu? O jeeme Chiokike b́ru nye kwésile ọ túkwasị ovu?

⁴ Óza ríja ríja! Chiokike jọburiri nye ezi ọka, ọ b́bedi nụ kpakara badnụ jọburu ele aghalaghala. Lele kpa ọkwukwo nsọ kwuru, "Ma i gesi nụ i b́tu nye nookwu ezi ọka,

Ikpe jáama i nga be neekpe i ikpe."

⁵ Ọ b́ru nụ a mernu nhne búo ọma, ke jeegesi ome mma Chiokike ke zì snam, kìni b́tu nhne a jookwu? Nụ Chiokike mernu nhne ọjo nụ ọ ta aị awhnụwhnu nụ ovu owe ẹhni sa? (M nookwu lele badnụ etekne.)

⁶ Óza ríja ríja! Ọ b́ru nụ Chiokike búo nye mee mma, ndaa kpa o jeeji kpe ọwa ikpe?

⁷ Ọ b́ru nụ aghalaghala m jeenye Chiokike igwugwu hite nụ ome ezi ọka a whụya iwhne, ndaa kpa be jaama m ikpe lele nye mmehie?

⁸ Ọ b́ru nụ anụ neeche kpam, anụ jaakaa, "Ngwa ma a mee nhne ọjo ma nhne b́ru ọma va"? Agwna ele badnụ nyernu m mkpari, noobno m nụ ka b́tu nhne me neezni ele badnụ. Be jaama be ikpe lele kpa o kwesiri.

Nye mee mma zá

⁹ Ndaa, a ka ele búo ele Ju mma? Óza ríja ríja. M karụ m nụ ele Ju ma ele búo ele Ju n'otu zì nụ mkpururu mmehie.

¹⁰ Lele kpa ọkwukwo nsọ kwuru,

"Ọ zá nye b́tu nye mee mma, ọ b́bedi otu.

¹¹ Ọ zá nye nwernu akọniche,

ọ zá nye noopio Chiokike.

¹² Kpakara ele badnụ dasịnnu Chiokike aznụ,

ọ zá iru be bnarnụ,

ọ zá nye neeme nhne ọma

ọ b́bedi otu.

¹³ Ọnu be nụ lele ilili gberu anya, riro be nookwu ọka aghigho,

ọka ọjọ lele njulu agwọ neehi nù mgbele-ọnu be whýya.

14 Ọvu ọnu nù okne ọnu ọjọ jihíaru be nù mkpọma.

15 Ọchi be zì snarna snarna n'ọwusa ọvnarna.

16 Olulu nhne nù nhne anya-mini noosno be n'apna be.

17 Be máa apna udno.

18 Ogwu Chiokike zá be n'anya."

19 Kítna a magwù nù kpakara nhne Iwu kwuru zínu ele zì nù mkpururu Iwu, ma be kpusni kpakara ọnu ele badnù, ma kpakara ọwa bna n'ikpe Chiokike.

20 Kwnornu nù ọ zá nye mee mma n'anya Chiokike hite nù ome nhne Iwu kwuru, kọvu Iwu neeme ele badnù mahíja nù be mehieru.

Ome mma hite n'ọkwnata mkpọma

21 Kọvu ome mma Chiokike whýyaru iwhne hne Iwu zíla, ọ bụ ezi ọka nù Iwu nù ele ọwhnurninya naagbanù a akebne.

22 Ome mma Chiokike ka hiri n'ọkwnata ovu nù Jizọsi Karaísi zínu kpakara ele kwehíaru, kwnornu nù ọkpa ike zíla nù rime a ríja ríja.

23 Kwnornu nù kpakara ele badnù mehieru, be nwée rikne dù igwugwu Chiokike.

24 Kọvu nkesi ke oru Chiokike mernu kpakara badnù bụru ele ikpe mámana hite n'ogbahia aì ke hi n'aka Karaísi Jizọsi.

25 Chiokike nyernu a lele nkesi ọwhaji-ẹli hite n'ọkwnata ovu, ka bụ ma Chiokike gesi ome mma a. N'ige wheru ewhe Chiokike jiri ogologo ọsnuta ovu lewhuru mmehie ke badnù anya.

26 O mernu kam ma o gesi ikpe a zì snam n'ige ka, ma ọ bụru nye mee mma nga ọ neegweru badnù lele nye ikpe mámana hite n'ọkwnata ovu nù Jizọsi.

27 Ọ bụru kpam, ndaa hne mpako zì? Ọ zíla! Kíni kpararù a? Ọ bụ nù hite n'ọbita nhne Iwu kwuru? Óza! Kọvu a kwnatarù ovu.

28 A nookwusi a rikne nù be neegweru badnù lele nye ikpe mámana hite n'ọkwnata ovu, ọ búo hite n'ẹnu ke Iwu.

29 Chiokike, ọ bụ Chiokike ke ele Ju kọi? Ọ búo Chiokike ke ele búo ele Ju sa? Owe! Ọ bụ ya.

30 Hne ọ bụ otu Chiokike, ọ ọogwunu ele be kparù nka lele ele ikpe mámana hite n'ọkwnata ovu be, nù ele be kpála nka hite n'ọkwnata ovu be.

31 A jaakaa nù ka neegesi n'Iwu bnáge nù nhne hite n'ọkwnata ovu ka? Óza ríja ríja, kọvu a neeme Iwu gwuzosi rikne.

4

Ọkwnata ovu Ebereham

1 Ndaa nhne a jaakaa gbasíri Ebereham nda aì? Kíni bụ nhne o piohíaru?

2 Ọ bụru nù be hiri n'ẹnu Ebereham gwnùsi a nù nye mee mma, o zneru anyaa risi nù ka. Kọvu o nwée rikne mee oknomokno nù ruwhnu Chiokike.

3 Ọkwukwo nsọ kwuru kíni? "Ebereham kwerruru Chiokike, Chiokike gwnùsinu a nù ọ bụ nye mee mma."

4 Nye be kwuru ọgwo ẹnu a, ọgwo ẹnu a búla nkesi, kọvu nhne ọ rnùhiaru n'ẹnu.

5 Kọvu nye rnúge ẹnu, ke kwnatarù Chiokike, nye nọogwunu ele ọjọ lele ele ikpe mána ovu, Chiokike jí ọkwnata ovu a gwnù a nye mee mma.

6 Ka bụ nhne Devidi kwuru gbasíri nye ọwa ọma, nye Chiokike híge n'ẹnu a gwnù nù nye mee mma,

7 “Nye ọwa ọma bụ nye Chiokike gbarụnu mmehie, nye be kpusunrni aruru-ẹli a.

8 Nye ọwa ọma bụ nye Chiokike zá nọogwnu mmehie a megidne a.”

9 Ngọzi ka, ọ zịnu ele be kparụ nka kpọi sa? Óza, ma ele be kpála nka. Kwnornu nụ a karụ nụ Ebereham kweruru Chiokike, Chiokike gwnụsinu a nụ ọ bụ nye mee mma.

10 Ndaa hne nhne ka mernu? Ọ nga be kparụ a nka, sụ ọ bụ nga be kpála a nka? Ọ bụ nga be kpála nka.

11 Be kparụ a nka ma ọ bụru nhne elekema ke ome mma nụ ọ kwnataru Chiokike ovu nga be kpála a nka, ma ọ bụru nda kpakara ele kweru, ma be gwunisi be n'ele mee mma, ọ bụ n'ezị nụ be kpála be nka.

12 Ọ bụ masị nda ele be kparụ nka, ọ búla nụ be kparụ be nka kpọi, kọvu nụ be noowu bụndu ọkwnata ovu lele nda aị Ebereham wuru sụ be kparụ a nka.

Mkwna Chiokike

13 Mkwna Chiokike kweru Ebereham nụ avnurnu a nụ be jeekehia ọwa búo hite n'ọbita Iwu, kọvu ome mma ke hiri n'ọkwnata.

14 Ọ bụru nụ ele zị nụ mkpururu Iwu jeekehia mkwna wam, ọkwnata ovu bụ nhne etekne, mkwna Chiokike kweru bnána iru.

15 Iwu neegweya ovu owe ẹhni Chiokike. Hne Iwu zila, ọ zá nye jaadna Iwu.

16 Mkwna wam hiri n'ọkwnata mkpọma. O mernu o hite n'oru gwuzoru kwem nụ rime kpakara rumu Ebereham. Ọ búo ele zị n'Iwu kpọi, kọvu ma ele sno ọkwnata ovu Ebereham, kwnornu nụ ọ bụ nda kpakara aị.

17 Lele kpa be gbarụ a n'ọkwukwo nsọ, “M mernu m jì nda agida mba.” Ọ bụ nda aị n'anya Chiokike, nye ọ kwnataru ovu, Chiokike ke naakpatne nye nwurnu ọnwu, nye neeme nhne zigele a whuya iwihne.

18 Nga olile anya zila a, Ebereham kwnataru ovu, ọ bụru nda agida mba, lele kpa ọkwukwo nsọ kwuru, “Mkpuru i jaazi agida kpa.”

19 Ọkwnata ovu a dnáge adna, nga ọ whnurnu nụ anọ-ẹhni a bụ nhne nwurnu ọnwu, hne ọ bụ otu riwhu awha, nụ rekpá-nnwọ Sera nwurnu ọnwu.

20 Kọvu ọkwnata ovu a dnáge adna hite nụ ókwe ekwe mọbu onwe mkpọma lawuru gbasiri nhne Chiokike kweru a mkwna, ọkwnata ovu a mernu o gwuzosi rikne naaznarni Chiokike.

21 Ovu siri a rikne nụ Chiokike nwernu rikne o mezu nhne o kweru mkwna.

22 Kam kpararu, “Chiokike gwnụsinu a nụ ọ bụ nye mee mma.”

23 Nụ be gwnụsiri a nụ nye mee mma, búo nhne ke zịnu a kpọi.

24 Ọ zị masinu aị ele be jọogwnusi n'ele mee mma, ele kweru nụ nye wam mernu Jizọsi Nyenwe aị hi n'ẹnwu lizọ.

25 Be nyernu a ma ọ nwụ kwnornu mmehie aị, o hiri n'ẹnwu lizọ ma Chiokike gwunisi aị lele ele ikpe mámana.

5

Snarnjma nụ udno

1 Kịtna, hne Chiokike gwnurnu aị lele ele ikpe mána hite n'ọkwnata ovu, a nwernu udno nụ Chiokike hite n'aka Nyenwe aị Jizọsi Karajisi.

2 Jizọsi bụ nye a hiri n'aka a, hite n'ọkwnata ovu gwuzoru n'oru Chiokike. A nọonwudna ọnwudna nụ a nwernu olile anya nụ a jeekehia igwugwu Chiokike.

3 Ọ búo kam kpọi, a nọonwudna nụ rime awhnụwhnu, kwnornu nụ awhnụwhnu neegweya ọsnuta ovu,

4 ọsnuta ovu neegweya agwa ọma, agwa ọma gweya olile anya.

⁵ Olile anya aị jọbu nhne etekne, kwnornu nụ Chiokike wụkwasiri aị ọwhnun'anya a n'ovu aị hite n'Enine Nso, ke o kesiri aị.

⁶ Kwnornu nụ nga a nwée rikne, Karaịsi nwurnu kwnornu aị ele ojo máa Chiokike.

⁷ O bụ nhne siri rikne nụ badnụ jookwno nye ọma nwụ ẹnwu. Kọvu badnụ eleghi anya jeenwe rikne kwnornu nye mee mma nwụ.

⁸ Kọvu Chiokike gesiri aị ọwhnun'anya a ke bụ nụ Karaịsi kwnornu aị nwụma kpa a zị kọriri nụ rime mmehie.

⁹ Be hiri n'ọvnarna a gwnụ aị lele ele ikpe mána, ọ jọoznohia aị n'ovu owe ẹhni Chiokike.

¹⁰ Kwnornu nụ a bụ ele irno Chiokike nụ mbom, kọvu aị nụ Chiokike mernu udno hite n'ẹnwu Nnwọ a. Kịtna, a bụ ele enyi Chiokike, ọ jọoznohia a hite nụ bụdnụ Nnwọ a.

¹¹ O bụo kam kpọi, kọvu a nọonwudna ọnwudna nụ rime Chiokike hite nụ Nyenwe aị Jizọsi Karaịsi, nye mernu aị nụ Chiokike ziri n'udno.

Adam nụ Karaịsi

¹² Lele kpa mmehie hiri n'aka otu badnụ bna nụ rime ọwa, mmehie vuyarụ ẹnwu, ẹnwu wam zuru kpakara ọwa, kwnornu nụ kpakara badnụ mehieru.

¹³ Mmehie zị n'ọwa sụ be nyernu Iwu, kọvu mmehie zịla ire nga Iwu zịla a.

¹⁴ Ẹnwu hiteru n'Adam dụ n'ige Mozizi nẹchi kpakara badnụ, ma ele mēhie lele kpa Adam mehieru. Adam bụ nye bítala nhne Chiokike nyernu n'iwu.

Adam bụ oyiyi nye wam jaava.

¹⁵ Kọvu nkesi wam nuna lele mmehie. Kwnornu ọ bụru nụ agida badnụ nwurnu hite nụ mmehie otu badnụ, oru nụ nkesi Chiokike zị agida kakwo, ke gazuru kpakara ele badnụ hite n'oru otu nye wam bụ Jizọsi Karaịsi.

¹⁶ Nkesi Chiokike zị ichne nụ hne mmehie otu badnụ zị. Ikpe snornu otu mmehie wam ke vuyarụ ọmuma ikpe, kọvu nkesi wam sno agida mmehie ke vuyarụ ọgwnusi badnụ lele nye ikpe mámana.

¹⁷ Mmehie otu badnụ ka, Adam, mernu ẹnwu nẹchi ọwa, kọvu kpakara ele nahjaru nkesi oru zị agida ke Chiokike nụ ome mma a, jeemegbu mmehie nụ ẹnwu hite nụ otu badnụ wam ke bụ Jizọsi Karaịsi.

¹⁸ Owe! Otu mmehie Adam vuyarụ ọmuma ikpe nụ risi kpakara ele badnụ, kọvu, otu ẹnu ome mma Karaịsi mernu ele badnụ bụru ele ikpe mámana n'anya Chiokike, ke nyernu be bụdnụ.

¹⁹ Hite nụ risi rikne otu badnụ kpakara ele badnụ ghoru ele mmehie, otu aka wam masi, obno nsị otu badnụ jeeme kpakara ele badnụ bụru ele mee mma.

²⁰ Iwu varu ma nhne ojo zị agida, kọvu hne mmehie zị agida, oru Chiokike baru aba k'agida.

²¹ Hne mmehie nẹchi hite n'ẹnwu, oru Chiokike nẹchi hite n'ome mma ke noodubna nụ bụdnụ kwó okwo hite nụ Jizọsi Karaịsi Nyenwe aị.

6

Nwu nụ mmehie, ziri bụdnụ nụ Karaịsi

¹ Kịni bụ nhne a jaakaa? O bụ ma a zị kọriri nụ neeme mmehie ma oru Chiokike ba ọba?

² Óza rịa rịa! Ndaa kpa aị ele nwurnu ọnwu nụ rime mmehie jaazị kọriri bụdnụ nụ rime a?

³ Ọ bụ nụ anụ máa sa, be wụru aị mini ma aị nụ Karaịsi Jizọsi bụru otu, nụ be wuru aị mini ma aị nụ Karaịsi bụru masị otu n'ẹnwu a?

⁴ Hite nụ mini be wuru aị, be likọtaru aị nụ Karaịsi n'ẹnwu a, ma a nụ lele Karaịsi n'ga o hiri n'ẹnwu lizọ hite n'igwugwu ke Nda, a joowu bụdnu ikne.

⁵ Kwnornu nụ ọ bụru nụ aị nụ a bụ otu n'ẹnwu a, kpam masị, aị nụ a jọburu otu n'olizọ n'ẹnwu a.

⁶ A magwụ nụ ẹhni ọknani aị bụ ke be kpogidnenu ya nụ Karaịsi n'olu ọgba a, ma be lulu ẹhni mmehie, ma a gharu ọ bụru ọhi ke mmehie.

⁷ Kwnornu n'ga badnụ nwurru, mmehie nwéma iknernema n'ẹhni a berere.

⁸ Ọ bụru a snornu Karaịsi nwụ ẹnwu, a kweru nụ a jooosno a ziri bụdnu.

⁹ A magwụ nụ Chiokike mernu Karaịsi hi n'ẹnwu lizọ, ọ jónwu kwno berere, ẹnwu nwéma iknernema hne ọ zị berere.

¹⁰ Ẹnwu ọ nwurru, ọ nwurru kwnornu mmehie otu mgba, ọ zị bụdnu kịtna, ọ zinu Chiokike bụdnu.

¹¹ Kpam masị, anụ gwnụ ẹhni anụ lele ele nwurru ọnwu kwnornu mmehie, kọvu ele zị bụdnu nyee Chiokike hite nụ Karaịsi Jizọsi.

¹² Anụ kwé mmehie nẹchi anọ-ẹhni anụ, neeme anụ noobno nsnị nhne ojo anọ-ẹhni noopio.

¹³ Anụ kwéko ọ gweru ẹhni anụ nyee mmehie ma ọ bụru nhne ẹru ke risi rikne. Kọvu anụ gweru ẹhni anụ nyee Chiokike, lele ele hiri n'ẹnwu bna nụ bụdnu, anụ gweru kpakara ẹhni anụ nyee ma be bụru nhne ẹru ke nhne ọma.

¹⁴ Kwnornu nụ mmehie zá nẹchi anụ, anụ zila nụ mkpururu Iwu, kọvu nụ mkpururu oru ke Chiokike.

Ele ọhi ke ome mma

¹⁵ Kịni bụ ka? A jaazị neeme mmehie kwnornu nụ a zá nụ mkpururu Iwu, kọvu mkpururu oru ke Chiokike? Ọza rịa rịa.

¹⁶ Anụ magwụ nụ nye anụ noobno nsnị nhne o nookwu, anụ bụ ele ọhi nye anụ noobno nsnị. Anụ bụ ọhi ke mmehie ke noodubna n'ẹnwu, mọbu ọhi obno nsnị ke noodubna n'ome mma.

¹⁷ Kọvu ọznarni zinu Chiokike, kwnornu nụ mbom anụ bụ ọhi ke mmehie, kọvu anụ bnornu nsnị hite nụ mkpoma anụ bna n'ezị ọka wam anụ nahjaru.

¹⁸ Be dọhiaru anụ nụ mmehie anụ, ma anụ bụru ọhi ke ome mma.

¹⁹ M nookwu lele badnụ, kwnornu nụ anụ zá rikne. Nụ mbom, anụ gweru ẹhni anụ nyee nhne zila rịchna nụ risi rikne o mee nhne ojo, kpam masị, anụ gweru ẹhni anụ bụru ọhi ome mma bna n'ẹru zị nsọ.

²⁰ Nga anụ bụ ọhi ke mmehie, anụ nwé igwe n'ome mma.

²¹ Ndaa mbnarna anụ nwehjaru hite nhne kam nọtu iwhnerne? Risi kpakara nhne kam, bụ ẹnwu.

²² Kọvu kịtna, be dọhiaru anụ nụ rime mmehie, anụ bụru ele ọhi ke Chiokike, mbnarna anụ jeenwehja jeeme anụ ziri nsọ ke joodubna nụ bụdnu kwó okwo.

²³ Kwnornu nụ ọgwo ẹru mmehie bụ ẹnwu, kọvu nkesi ke Chiokike bụ bụdnu kwó okwo hite nụ Karaịsi Jizọsi Nyenwe aị.

7

Nhne atụ ke ọlulu nzi nụ nnwerne

¹ Rumu nda m, m nookwunu anụ ọka lele ele magwụ Iwu, anụ magwụ nụ Iwu jigwu badnụ hne nye wam zị bụdnu.

² Nyerinya nwernu nzi zị n'iwu n'ga nzi a zị bụdnu, kọvu ọ bụru nzi a nwụ, ọ zima iwu jigwu a lele nye zị nụ nzi.

³ Ka neegesi, ọ bụru nụ nzi a zị bụdnu, nyerinya wam gbọ nzi berere, be jookwu a nye neeme ọyi. Kọvu ọ bụru nụ nzi a nwurru ọnwu, iwu jígele a, ọ bụru nụ ọ gbọru nzi berere. O méne ọyi.

⁴ Rumu nda m, otu aka wam, bụ kpa ọ zinu anụ. Anụ nwurru ọnwu n'Iwu hite n'ehni Karaịsi. Anụ bụ ke nye wam hiri n'ẹnwu lizọ, ma anụ bụru mgwna ẹnu ke bnarụ iru n'aka Chiokike.

⁵ Nga a zị bụdnu n'anọ-ẹhni, nhne ojo ke Iwu Mozizi vuyarụ bụ nhne a noosno, kpakara nhne a mernu dubnarụ aị n'ẹnwu.

⁶ Kọvu kịtna, a nwernunem ẹhni aị n'Iwu, kwnornu nụ a agburulam n'iwu wam jigwu aị, a kpenu Chiokike n'apna ikne ke Enine, ọ bụo n'apna ọknani ke Iwu be gbarụ n'ọkwukwo.

Iwu nụ mmehie

⁷ Kịni bụ nhne a jookwu? Iwu wam ọ bụ mmehie sa? Ọza rịa rịa. Kọvu iwu mernu m mahịa mmehie. M znégele m amahịa nhne bụ a ọwho-anya ọ bụru n'Iwu kwúle, "I nwéko ọwho-anya."

⁸ Kọvu mmehie hite nụ nhne be nyernu n'iwu nwehịaru oghere ọ kpakne ọwho-anya zị ichne ichne. Kwnornu nụ mmehie nwurru ọnwu hne iwu zịla.

⁹ M zị m bụdnu hne iwu zịla, kọvu nga nhne be nyernu n'iwu varụ, mmehie ziri bụdnu nụ rime m, m nwuma.

¹⁰ Nhne be nyernu n'iwu ke kwesiri o gweya bụdnu, vuyanu m ẹnwu.

¹¹ Mmehie hite nụ nhne be nyernu n'iwu duwhuru m, hite nhne be nyernu n'iwu, gbu m.

¹² Iwu wam zị nsọ, nhne be nyernu n'Iwu zị masị nsọ, ọ zị kwem, ọ bụru ọma.

¹³ Ka o neegesi nụ nhne bụru ọma vuyanu m ẹnwu? Ọza rịa rịa. Ọ bụ mmehie ke kpararụ a. Mmehie gweruru nhne bụru ọma mee a o vuyanu m ẹnwu, ma mmehie whụya iwhne nụ ọ bụ mmehie n'ezì. Hite nụ nhne be nyernu n'iwu be jeegesi nụ mmehie bụo ọma rịa rịa.

¹⁴ A magwụ nụ Iwu bụ nhne enine. Kọvu m bụ m badnụ etekne, nye be reru lele ọhi ke mmehie.

¹⁵ M máam nhne me neeme, kwnornu nụ nhne me noopio o mee, m nwée m rikne mee a, kọvu nhne me píole o mee, bụ nhne me neeme.

¹⁶ Nga me neeme nhne me píole o mee, ka neegesi nụ Iwu wam bụru ọma.

¹⁷ Kọvu ọ bụo me neeme nhne ka, kọvu ọ bụ mmehie ke wu nụ rime m.

¹⁸ M magwụ m nụ ọ zá nhne ọma ọbula zị nụ rime m (ke bụ n'anọ-ẹhni m). Kwnornu nụ ọ naamasị m o mee nhne bụru ọma, kọvu m nwée m rikne o mee a.

¹⁹ M mée m nhne ọma me pioru o mee, kọvu nhne bụo ọma me píole o mee, bụ nhne me neeme.

²⁰ Ọ bụru nụ me mee nhne me píole o mee, ka neegesi nụ ọ bụo me bụ nye neeme a, kọvu ọ bụ mmehie wam ke wu nụ rime m.

²¹ M magwụ m nụ iwu nọornu ẹnu, nga me pioru o mee nhne bụru ọma, nhne ojo zị nụ ruwhnu m.

²² Nụ rime enine m, m noopio iwu Chiokike.

²³ Kọvu m nọowhnu iwu berere nọornu ẹnu nụ rime m, iwu ke nọolusi iwu ke ovu ọgwnu. O neeme m bụru ọhi iwu ke mmehie ke nọornu ẹnu nụ anọ-ẹhni m.

²⁴ M bụ m badnụ ke nọowhnuji anya. Nyele jọdohia m n'anọ-ẹhni ke ẹnwu ka?

²⁵ A nọotunu Chiokike mmamma hite nụ Nyenwe aị Jizọsi Karaịsi.

Hite n'echiche m, m bụ m ọhi ke iwu ke Chiokike, kọvu, anọ-ẹhni m bụ ọhi iwu ke mmehie.

8

Budnu hite n'Enine

¹ Kịta, ọ zá ikpe naama ele zị nụ rime Karaịsi Jizọsi. *

² Kwnornu nụ iwu ke Enine ke neegweya budnu nụ Karaịsi Jizọsi, mernu m whọga n'ọhi iwu ke mmehie nụ ẹnwu.

³ Nhne Iwu nwée rikne meli kwnornu nụ anọ-ẹhni badnụ zịla rikne, Chiokike mernu a, o ziyaru Nnwọ a lele badnụ ke mmehie ma ọ bụru ariọhna mmehie. Hite nụ ya ọ ma budnu mmehie ke badnụ ikpe.

⁴ Chiokike mernu ka ma nhne ziri ezi ke Iwu zu ozu nụ rime aị ele noowu budnu lele kpa Enine noopio, ọ bụo kpa anọ-ẹhni noopio.

⁵ Ele noowu budnu n'anọ-ẹhni neeme nhne anọ-ẹhni noopio, ele noowu budnu n'Enine neeme nhne Enine noopio.

⁶ Nye anọ-ẹhni nẹchi nwurnu ọnwu, kọvu nye Enine nẹchi nwernu budnu nụ udno.

⁷ Kwnornu nụ nye anọ-ẹhni nẹchi bụ nye irno Chiokike, o nwée rikne bīta iwu Chiokike, n'ezị, o jéenwe rikne bīta a.

⁸ Ele anọ-ẹhni nẹchi jéenwe rikne mee nhne jọso Chiokike n'ọnu.

⁹ Anọ-ẹhni zá nẹchi anụ, kọvu Enine, ọ bụru nụ Enine Chiokike wu nụ rime anụ. Nye ọbula ke nwée Enine Karaịsi, bụo ke Karaịsi.

¹⁰ Ọ bụru nụ Karaịsi zị nụ rime anụ, ọ bụ n'ezị nụ anọ-ẹhni anụ nwurnu ọnwu kwnornu mmehie, kọvu enine anụ zị budnu kwnornu ome mma.

¹¹ Ọ bụru nụ Enine Chiokike ke mernu Jizọsi hi n'ẹnwu lizọ wuru nụ rime anụ, nye wam ke mernu Karaịsi hi n'ẹnwu lizọ jeeme anọ-ẹhni anụ ziri budnu hite n'Enine a ke wu nụ rime anụ.

¹² Kam kpayarụ, rụmu nda m, a jigwu ọgwo o wu budnu aị, ọ bụo kpa anọ-ẹhni noopio.

¹³ Kwnornu nụ ọ bụru nụ anụ wu lele kpa anọ-ẹhni anụ noopio, anụ jọonwu ẹnwu, kọvu ọ bụru nụ anụ jeehi n'enine gbu kpakara ẹrnu ojo ke anọ-ẹhni, anụ jaazị budnu.

¹⁴ Kpakara ele Enine Nsọ Chiokike nẹchi bụ rụmu Chiokike.

¹⁵ Kwnornu nụ Enine Chiokike nyernu anụ méné anụ ele ọhi, ke neeme anụ bụru ele ogwnu. Kọvu Enine neeme anụ bụru rụmu Chiokike, anụ jeenwe rikne kwnakwu a, "Papa, Nda m."

¹⁶ Enine Nsọ Chiokike naagbanụ enine aị akebne nụ a bụ rụmu Chiokike.

¹⁷ Ọ bụru nụ a bụ rụmu Chiokike, a bụ ele neekhejia mkpe, ele neekhejia mkpe Chiokike, ele be nụ Karaịsi neekerikọta mkpe. Ọ bụru a snornu a ta awhnụwhnu, a jooosno a kehjia igwugwu a masị.

Igwugwu ke zị nụ ruwhnu

¹⁸ M whnurnu m nụ awhnụwhnu ke ige ka bụ nhne a jéeji tūsinu igwugwu ke be jookpumenụ aị.

¹⁹ Kpakara nhne be keru eke ji olile anya siri rikne neese nga be jeegesị rụmu Chiokike.

²⁰ Kwnornu nụ nhne be keru eke ghoru nhne etekne, ọ bụo nụ rikne aka ke be, kọvu kpa Chiokike mernu be, be zị kọriri neele anya,

²¹ nụ nhne be keru eke jeenwernu ẹhni be whọga n'ẹhni oro oro, kehjia igwe nụ o nwernu ẹhni zị igwugwu ke be bītannu rụmu Chiokike.

* **8:1** Agwna ọkwukwo ọknani kwuru: ele zá noowu budnu lele kpa mmehie piuru, kọvu lele kpa enine noopio.

22 A magwụ dị kịtna nụ kpakara nhne be keru eke nọsnu idne lele nye rime omumu nnwọ neeme.

23 Kọvu ọ bụo nhne be keru eke kọi, ma aị masị ele nwernu Enine ke bụ nkesi mbom ke Chiokike, a nọsnu idne nụ rime ovu aị, neese nga Chiokike jeeme a bụru rụmu a, ma ọ gbahia anọ-ehni aị.

24 Kwnornu be znọhiaru aị hite n'olile anya, kọvu ọ bụru a whnụ nhne a neele anya a, ọ bụma olile anya n'ezị. Ọ zà nye neele anya nhne ke ọ whnụgwu anya.

25 Kọvu ọ bụru a neele anya nhne a zà nọowhnu anya, a jeeji nkasi ovu neese a.

26 Kpam masị, Enine Nsọ neeyinu aị aka, ọ bụ ezi nụ a zà rikne. Kwnornu nụ a máa kpa a jeekpe okpukpe, kọvu Enine Nsọ Chiokike neekpẹhianu aị, hite n'osnu idne ke ọnu jókwuli.

27 Kwnornu nụ Chiokike nye noonyosna mkpọma badnụ magwụ echiche Enine, ọ bụ Enine Nsọ nọorio arịrio nụ risi ele nsọ lele kpa echiche Chiokike jiri zị.

A kakwo ele mmeri

28 A magwụ nụ Chiokike neeme kpakara nhne nọornuko ọnu ọma n'otu kwnornu ele whnurnu Chiokike n'anya, ele o sukwuru ma be mee echiche a.

29 Kwnornu nụ ele Chiokike mahjamarnu, ọ bítaru be ichne, ma be nụ lele Nnwọ a, ma Nnwọ wam bụru Ọpnarna n'esilawuru agịda rụmu nda.

30 Ele Chiokike bítaru ichne, o sukwuru be, ele o sukwuru, o mee be ele ikpe mámana, ele o mernu ikpe ele mámana, o mernu be kehia igwugwu a.

31 Ndaa nhne a jookwu nụ kpakara nhne ka? Ọ bụru nụ Chiokike dasị aị n'ikwnu, nyele jeemegidne aị?

32 Nye wam ke bítala Nnwọ a, kọvu kesi aị ya, ndaa kpa o jéenyé aị kpakara nhne?

33 Nyele jobno ele Chiokike hohiaru nhne? Ọ bụ Chiokike bụ nye neeme ele badnụ ele ikpe mámana.

34 Nyele bụ nye naama aị ikpe? Ọ bụo Karaisi Jizosi, nye nwurnu ẹnwu, nye hiri n'ẹnwu lizo, daziri n'akarikwnunga Chiokike nọorionu aị arịrio.

35 Nyele jeekewa aị n'owhnun'anya ke Karaisi? Ọ bụ mkpa, sọbu nhne osi rikne sa, sọbu okne okpagbu, sọbu oknunyọ, sọbu ọgba-eto, sọbu aghom, sọbu ama-ogwnu?

36 Lele kpa be gbarụ a n'okwukwo nsọ,
“Kwnornu anụ, ẹnwu neeche aị aka nụ ruwhnu kpakara ọbochi,
be nọopnughari aị lele atnurnu be noogbu ogbu.”

37 Ọza! A nwernu omeri nụ kpakara nhne ka hite nụ nye wam ke whnurnu aị n'anya.

38 Kwnornu nụ m magwụ m nụ ẹnwu mọbu budnu, mọbu enine izi, mọbu renwu ojo, mọbu nhne ke zị kịtna, mọbu nhne ke jaava, mọbu rikne ọbula,

39 mọbu olu mọbu nhne zị nụ rime ẹli, mọbu nhne berere be keru eke, jéenwe rikne kewama aị n'owhnun'anya ke Chiokike ke zị nụ rime Karaisi Jizosi.

9

Chiokike nụ ele ke

ọ hohoruru

1 M nookwu ezi ọka nụ rime Karaisi, ọ bụo aghalaghala, Enine Nsọ naagbanụ ovu m akebne nụ m zà m naagha aghalaghala.

2 Anya-mini zị m nụ mkpọma, nhne igbugbu zị m nụ mkpọma kpakara ige.

³ O jaamasị m, o bụru nụ Chiokike vuru m onu, kewama m nụ hne Karaịsi zị, kwnornu rumu nda m, ele ẹli m,

⁴ ele Izireli. Chiokike mernu be bụru rumu a, o okpumennu be igwugwu a, ya nụ be gbaru njo-ehni, o nyernu be Iwu, be nwernu okpukpe oma, nụ kpakara mkwna Chiokike,

⁵ be bụ avnurnu kwu ele nda oknani, Karaịsi hiri n'avnurnu be va n'anọ-ehni. Ozarni zinu Chiokike ke neechi kpakara nhne okwnukokwuu. Amim.

⁶ O bụo nụ Chiokike mézule ikwu-onu a, kwnornu nụ o bụo kpakara ele hi n'avnurnu Izireli bụ rumu Izireli n'ezi.

⁷ Kpakara be bụo rumu Eberham n'ezi, o bụbedi nụ be hi n'avnurnu Eberham. Kwnornu nụ okwukwo nsọ kwuru, “Kovu be jogwuu rumu i hite n'Aziki.”

⁸ Ka bụ nụ o bụo rumu be murnu n'anọ-ehni bụ rumu Chiokike, kovu ele be murnu lele kpa Chiokike kweru Eberham nụ mkwna bụ rumu a n'ezi.

⁹ Kwnornu nụ ka bụ nhne mkwna wam kwuru, “N'ige be karu aka, m jeehiehna, Sera joomu nnwo rukna.”

¹⁰ O bụo ka kpọi, rumu Ribeka nwernu otu nda, ke bụ nda oknani aị Aziki.

¹¹ Sụ o murnu rumu ejima rukna lawuru wam, nga be mége nhne oma mọbu ke ojo, ma nhne Chiokike kwuru gwuzosi rikne,

¹² o bụo hite n'ernu kovu kwnornu nụ o sukwu ikwu a, Chiokike kannu Ribeka, “Nye ke okno badnu jeeznenu nye ke matị izi.”

¹³ Lele kpa be gbaru a n'okwukwo nsọ, “M whnurnu m Jekopu n'anya, sno Iso irno.”

¹⁴ Ndaa nhne a jookwu? O bụ nụ Chiokike bụ nye ndala sa? Oza rịa rịa.

¹⁵ Kwnornu nụ o kannu Mozizi,

“M joodonu nye me joodonu obirizi, obirizi,
mee masinu nye masiri m oru.”

¹⁶ Ka neegesi nụ o bụo hite nụ nhne badnu noopio mọbu nhne be nornu, kovu o bụ obirizi Chiokike.

¹⁷ Kwnornu nụ okwukwo nsọ kannu Fero, “Ka bụ nhne me kwno gwuzote i, ma m gesi m iknernema m n'ehni i, ma kpakara owa mahia rewhna m.”

¹⁸ Chiokike nōodonu nye masiri a obirizi, neemenu nye o pioru ma o knesni mkpoma, knesni mkpoma a.

Ikpe nū obirizi Chiokike

¹⁹ Otu badnu jaakanu m, “Ndaa kpa Chiokike naama aị ikpe? Nyele nwernu rikne o gwuzogidne echiche a?”

²⁰ Ji badnu etekne, i bụ nyele naasa Chiokike oka? Nhne be kpuru okpu o jaasikwa nye kpuru a ajiji, “I kwno kini kpu m kpa?”

²¹ O bụ nye nokpu ite o nwée rikne n'ehni otu orura wam kpu ite lawuru, otu bna n'ernu zị okne mkpa, ke berere be ji a rnu ernu kpakara ige?

²² O zị Chiokike n'aka o gesi ikpe nū iknernema a, kovu, o zị kwno a n'aka o gesi ogologo osnuta ovu n'ehni ele o neekpe ikpe, bụ ele o bitaru ma o la be n'iyi.

²³ O zị masi n'aka a o wukwasi okwnamarna igwugwu a nū budsonu ele o bitannu obirizi a.

²⁴ Kwnornu nū a bụ ele o sukwuru, o bụo hite n'avnurnu ele Ju kpọi, kovu ma hite n'eli ele bụo ele Ju.

²⁵ Ka bụ nhne o kwuru n'okwukwo Hosiya,

“M jookwu be ele ke m, ele wam bụo ele ke m,
ele wam me whnuge n'anya, m jookwu be ele me whnurnu n'anya.

²⁶ O jọobu nū hne be zị kaa,

nụ be búo ele ke m,
jọobu hne be jookwu be rụmu Chiokike ke zị bụdnu.”

²⁷ “Azaya siri okokoba gbasiri rụmu Izireli, kaa,
Ọ bụ n'ezị nụ rụmu Izireli nụ lele rịzna ke ngeri osimini,
ele be jọoznohia jaazị matị k'agịda.

²⁸ Kwnornu nụ Jihova jeekpebi ikpe ọwa wara wara n'ome mma.”

²⁹ Lele kpa Azaya kwuru nụ mbom,
“Ọ bụrụ nụ Chiokike ke Meli Nhne Dum
dónu aị obirizi ghasanụ aị agwna rụmu,
a zneru ọnu lele Sodom,
a zneru ọnu lele Gomora.”

Ele Izireli kwéle

ọ nabnarnụ izi oma

³⁰ Ndaa nhne a jookwu? Ọ bụ nụ ele búo ele Ju ele zá noosno ome mma
Chiokike, nwehịaru ome mma ke hi n'okwnata mkpoma?

³¹ Kọvu ele Izireli, noosno iwu ome mma nwée nhne iwu ome mma karụ,
be pìohịala a.

³² Kịni kpayaru ka? Kwnornu nụ be jíge ọtukwasi ovu pio a, kọvu lele nụ ọ
bụ n'ernu. Be dna n'olu rugwu nọokpobi ọchi.

³³ Lele kpa be gbarụ a n'okwukwo nsọ, kaa,
“Le, m bítaru m otu akaworugwu nụ rime Zayoni
ke jeeme ele badnụ kpọbi ọchi,
rugwu ke jeeme be dna.

Kọvu nye ọbula ke tụtwasiri a mkpoma,
be jéekwe iwghnerne tị a.”

10

¹ Rụmu nda m, nhne nọogwnu m nụ mkpoma, m neekpe masịnu Chiokike
gbasiri ele ke m bụ Izireli, bụ ma be znohia be.

² M jaagbanụ be akebne nụ be nwegwu mkpoma o kpenu Chiokike, kọvu
be nwée ọghohia.

³ Kwnornu nụ be máa ome mma ke Chiokike, be bete noogwuzote ome
mma ke be, be bítala ẹhni be nụ mkpururu ome mma Chiokike.

⁴ Karaịsi bụ mbimambi Iwu, nye ọbula ke tụtwasiri a mkpoma, jeenwehịa
ome mma.

*Oznohia zinu
kpakara badnụ*

⁵ Ka bụ nhne Mozizi kwuru gbasiri ome mma ke hi n'Iwu, “Nye ọbula ke
bítaru Iwu jaazị bụdnu nụ rime be.”

⁶ Kọvu ome mma ke hiri n'ọtukwasi mkpoma karụ kpa, “I kwúko nụ mkpoma
ị, ‘Nyele jeezne oligwe?’ (zne gwedna Karaịsi).

⁷ Mọbu, ‘Nyele jeezne nụ rime ẹli?’ (zne gwelizo Karaịsi n'ẹnwu).”

⁸ Kọvu ndaa nhne o kwuru? “Ikwu-ọnu wam zị ị ndundu, ọ zị n'ọnu ị ma
n'ovu ị.” Kam bụ ikwu-ọnu ọtukwasi ovu ke a nọokpo okwo.

⁹ Ọ bụrụ nụ ị jeeji ọnu ị kwuhịa nụ Jizọsi bụ Nyenwe aị, gweru mkpoma ị
kweru nụ Chiokike mernu o hi n'ẹnwu lizọ, be jọoznohia ị.

¹⁰ Kwnornu nụ badnụ ji ovu a kweru, be gwnụsi a nụ nye ikpe mána, o ji
ọnu a kwuhịa, o nwehịa ọznohia.

¹¹ Okwukwo nsọ kwuru kpa, “Iwghnerne zá nọotu ele kwnatarụ a ovu.”

¹² Ọ zá nhne zị ichne hne nye Ju nụ nye búo nye Ju zị. Chiokike bụ Nyenwe
kpakara badnụ, nọowukwasi ngọzi a nụ risi ele naakwnakwu a.

13 Kwnornu nù be jòoznohia kpakara ele noosukwu rẹwhna Nyenwe aị.

14 Kọvu ndaa kpa be joosukwu a, ọ bụru nù be kwéle nù ya? Ndaa kpa be jeekweru, ọ bụru nù be nùna nhne gbasịri a sa? Mọbu ndaa kpa be jọonu, hne ọ zá nye nọokpo okwo izi ọma?

15 Ndaa kpa be jọokpo okwo hne ọ zá nye ziznenu be? Lele kpa be gbarụ a n'okwukwo nsọ, kaa, "Le kpa ọchi be marnu mma bụ ele neezni izi ọma."

16 Kọvu, ọ búo kpakara be kweru izi ọma wam, kwnornu nù Azaya karụ, "Nyenwe aị, nyele kweru izi a ziri?"

17 Ka neegesi nù ọkwnata mkpọma jeehi nù ọnurnu izi ọma va, ọnurnu jeehi n'okpo okwo izi ọma Karaịsi.

18 Kọvu m nẹsikwa, ọ bụ ezi nù be nùna izi ọma wam? Be nurnu a. Lele kpa okwukwo nsọ kwuru,

"Nkọli be gazuru kpakara ọwa,
ikwu-ọnu be duru hne ọwa sọturu."

19 M nẹsikwa kwno, ọ bụ nù ele Izireli máa? Mozizi n'iwuhuru a beru ọsno kaa,

"M jeeji ele mba ọ zá nhne be bụ mee anụ nwe anya-kwu,
m jeeji mba ke nwé akoniche kpasu anụ iwe."

20 Azaya kwusiri a rikne kaa,

"Ele zá noopio m, piohiaru m,
m mernu m ele zá nẹsikwa ajiji gbasịri m whnù m anya."

21 Ka bụ nhne o kwuru gbasịri Izireli,

"Kpakara ọbochi, m gbasarụ m aka m lawuru o kwubnanya
ele risi rikne nù ele zá noobno nsị."

11

Chiokike ghásala ele ke a

1 M sịkwa kwno, ọ bụ nù Chiokike ghasarụ ele ke a sa? Óza! Ma n'iwuhuru m bụ nye Izireli, ke avnurnu Eberham, eriri ruwho Bẹnjamini.

2 Chiokike ghásala ele ke a ọ mahiamarnu nù mbom. Anụ magwu nhne okwukwo nsọ kwuru nù hne Ịlajia naariasno Chiokike megidne Izireli,

3 "Nyenwe aị, be gburu ele ọwhnurninya i, be kwnadna ojo arịohna i, me nù nsnunu m gwnarnu, be noopio o gbu m."

4 Kịni bụ nhne Chiokike kannu a? "M bítannu m ẹhni m pokwu ele rukna ẹsau, ele kpónna Balị risi ẹli."

5 Kpam masị, n'ige ka, Chiokike, hite n'oru a hohiaru ele ke gwnarnu.

6 Kwnornu nù ọ bụ oru a, ọ búo n'ernu, ọ bụru nù ọ bụ hite n'ernu, oru búma oru.

7 Kịni kwno? Ele Izireli píohtala nhne be noopio, kọvu ele wam ọ hohiaru piohiaru a, ovu kporu ele berere bẹkwnu.

8 Lele kpa be gbarụ n'okwukwo nsọ, kaa,
"Chiokike nyernu be enine iwahnirniwhno

be nwernu anya, kọvu be whnú ọsno,
be nwernu nsị, kọvu be nù nhne,

dụ tna."

9 Devidi karụ,

"Irii be ghọ mbịta nù nhne joogbu be,
be dna n'olu a, ta awhnụwhnu.

10 Isni kpu be, be whnú ọsno,
ivu rinya nyigbu be okwukokwnu."

Ọznohia ele búo ele Ju

¹¹ M n̄esikwa, ele Izirèli be dnarnu ma be la n'iyi sa? Ọza r̄ia r̄ia. Kwnornu nu mmehie be, ele búo ele Ju nweh̄iaru ọznohia, ke jeeme ele Izirèli nwe anyakwu.

¹² Ọ búru nu mmehie be mernu kpakara ọwa nwe ngozi, be dnarnu mboni ma ele búo ele Ju nweh̄ia ngozi, kpakara ọwa jeenwe aḡida ngozi nga be jeekweru nu Karaisi.

¹³ M nookwunu anu ọka k̄itna ele búo ele Ju. Hne me bu nye izi ele búo ele Ju, m jeeji ̄ernu m kpa nganḡa.

¹⁴ Nyele ma, m nwernu rikne mee ele ̄eli m nwe anyakwu, ma m nwernu m rikne z̄nohia agwna be.

¹⁵ Kwnornu nu nga Chiokike ghasaru be, kpakara ọwa nu Chiokike mernu udno. K̄ini jeeme nga Chiokike jookwubnanya be? Ọ joobu nu ele nw̄urnu ọnwu jaazi būdnu.

¹⁶ Ọ búru nu mpekele br̄edi mbom be nyernu Chiokike zi ns̄o, kpakara ke gwnarnu zi ns̄o. Ọ búru nu ̄egwnugwnu isisi zi ns̄o, kpakara nkala a zi masi ns̄o.

¹⁷ Ọ búru nu be o gbukwahalaru agwna nkala olivu, be gweru anu bu nkala olivu ọhia nyakwnusi a, anu neeri nhne ọma ke hi n'isisi olivu wam.

¹⁸ Anu m̄enu nkala wam oknomoko, chenwanya nu ọ búo anu vu ̄egwnugwnu, k̄ovu ̄egwnugwnu vugwu anu.

¹⁹ K̄ovu kwu kpa, “Be gbukwahalaru nkala isisi gweru āi nyakwnusi.”

²⁰ Owe! Be gbukwahalaru be kwnornu nu be kw̄e ekwe, k̄ovu, anu gwuzo kwnornu nu anu tukwasiri ovu. Anu v̄ulizo ̄ehni anu olu, tn̄unuma, anu tu ogwnu.

²¹ Kwnornu nu ọ búru nu Chiokike gharu ọ ta nkala isisi olivu ke ruh̄iaru awhnuwhnu, ọ jaagharu ọ ta anu awhnuwhnu.

²² Le mkpoma ọma nu nhne rikne ke Chiokike, nu o mesiri ele dnarnu adna rikne, k̄ovu ọ donu anu obirizi, ọ búru nu anu jaadazigidne nu mkpoma ọma a. Ọ búru nu anu jaadazigidne nu mkpoma a, o joogbukwahala anu.

²³ Ọ búru nu ele Ju jeehi n'ókwe ekwe be wh̄uya, Chiokike jaanyakwnusi be berere, kwnornu nu Chiokike nwernu rikne ọ nyakwnusi be.

²⁴ Anu bu nkala isisi olivu ọhia, ke Chiokike nyakwnusiri n'̄ehni isisi olivu be zn̄urnu ọznu, lele kpa o kw̄ésile. Ọ búru nu Chiokike mernu kpa, anu mah̄ia nu o nwernu rikne nyakwnuhnasi nkala isisi olivu be zn̄urnu ọznu n'̄ehni isisi olivu kam be zi.

Obirizi Chiokike z̄inu kpakara badnu

²⁵ R̄umu nda m, o nwernu nhne omimi me noopio anu mah̄ia, ma anu gharu eche nu anu bu ele ak̄o n'anya anu. Nhne omimi kam bu nu risi rikne r̄umu Izirèli jaazi ọkwnukokwnu. K̄ovu ọ jaazi tem ọnu ọgwnugwnu ele búo ele Ju ele jaavakwnusi Chiokike zute.

²⁶ Kpam masi, be jooznohia kpakara ele Izirèli, lele kpa be gbaru a n'okwukwo ns̄o,

“Nye Ọznohia jeehi nu Zayoni va,
o joovume kpakara mmehie r̄umu Jek̄opu.

²⁷ Me nu be jaagba n̄jo-̄ehni,
nga me vumernu mmehie be.”

²⁸ Ele Ju bu ele irno izi ọma. Ka bu mbnarna ke anu ele búo ele Ju. K̄ovu be bu ele ọ h̄oh̄iaru, whnu be n'anya kwnornu ele nda be ọknani.

²⁹ Chiokike zá naagbanwo echiche a n'̄ehni ele ọ h̄oh̄iaru, gozi masi.

³⁰ Hne anụ ele bụo ele Ju zị, anụ bnóge Chiokike nsnị nụ mbòm, kọvu kịtna, anụ nwernu obirizi Chiokike kwnornu ele Ju ele bnóge nsnị.

³¹ Kpam masị, anụ nwehịaru obirizi Chiokike mernu ele Ju bnóge Chiokike nsnị ma be nwehịa masị obirizi Chiokike.

³² Kwnornu nụ Chiokike mernu kpakara ele badnụ bụru ele risi rikne ma be nwehịa obirizi a.

Oznarni zīnu Chiokike

³³ A! Le kpa ẹkwnu nụ akoniche nụ nhne omuma Chiokike hna omimi. Kpa a nwée rikne nyosna a echiche a,

badnụ nwée rikne piohjali apna a.

³⁴ “Nyele magwụ mkpọma Nyenwe a?”

Nyele nwernu rikne zni a ezni?”

³⁵ “Nyele nyeleru Chiokike nhne, ma Chiokike kwụ a ogwo?”

³⁶ Ya keru kpakara nhne, kpakara nhne ke zị bụ ke a, ya nwe kpakara nhne. Oznarni zīnu a ọkwnukokwnu. Amīm.

12

Būdnu nye ẹrnu Chiokike

¹ Rụmu nda m, kam kpayarụ, m ji m obirizi Chiokike naariasno anụ, anụ gweru ẹhni anụ yisi n'aka Chiokike lele arjohna zị būdnu, zị nsọ, ke nọso Chiokike n'ọnu, bụ ke anụ kwannụ Chiokike n'ezin.

² Anụ nūko lele ele ọwa ka, kọvu Chiokike gbanwo echiche anụ ma ọ ziri ikne ikne, ma anụ mahia nhne bụ echiche Chiokike, echiche oma a, ke nọso a n'ọnu, ke zuru ozu.

³ Kwnornu nụ oru Chiokike nyernu m, me kanụ anụ, ọ zá nye vulizọ ẹhni a olu n'oriri a karụ kpa o kwesiri, kọvu anya dno anụ nụ risi n'okpe ẹhni anụ ikpe. Anụ gweru ọkwnata ovu Chiokike tūsinnu anụ kpe ẹhni anụ ikpe.

⁴ Lele kpa a nwernu agida nhne ke zị ẹhni, ke ọbula nwernu ẹrnu ke a.

⁵ Kpam masị, ọ bụ n'ezin nụ a zị agida, a bụ otu nụ rime Karaịsi, be knekotaru a n'otu lele nhne zị ọdo nụ ọdo n'otu anọ-ẹhni.

⁶ Nye ọbula nwernu nkesi ke a lele kpa oru Chiokike nyernu a. Ọ bụru nụ nkesi otu badnụ bụ whnụ ọwhnurninya, nye wam gweru ọtukwasi ovu mee a.

⁷ Ọ bụru nụ nkesi a bụ o zne izi, o zne a, ọ bụru o zni nhne, o zni nhne.

⁸ Ọ bụru ọ gba ele badnụ inwe, o mee kpam. Nye neekesi ele berere nhne, o mee a nụ mkpọma oma, nye noodu ele badnụ, ọ rnūsi ẹrnu a rikne. Nye nọodo obirizi, o gweru mkpọma oma mee a.

Iznizni gbasiru

Ọwhnun'anya

⁹ Ọwhnun'anya kwesiri ọ zị snam. Anụ sno nhne ojo irno, anụ knekwaru nhne oma aka rikne.

¹⁰ Anụ gweru ọwhnun'anya rụmu nda whnụ ibne anụ n'anya nụ rime Karaịsi, anụ sobisinu ibne anụ karụ ẹhni anụ.

¹¹ Anụ bụo ele ime mgwụ, anụ rnūsi ẹrnu rikne, anụ gweru mkpọma zị snam nēeznenu Nyenwe a izi.

¹² Anụ nwudna n'olile anya, anụ snūta mkpọma nụ rime ọkpagbu, neekpe okpukpe kpakara ige.

¹³ Anụ nụ ele nwée nhne kerita ẹkwnu anụ, anụ lekota ele izne.

¹⁴ Anụ nọgozi ele naakpagbu anụ, anụ nọgozi, anụ vūko be ọnu.

¹⁵ Anụ snornu ele nnonwudna onwudna, nwūdnahoru, anụ snornu ele naagba mkpe, gba mkpe.

16 Nhne gbasiri ele berere metu anu nu mkpoma. Anu buko ele oknomono, anu snornu ele ovu duru eli meko nhne. Anu buo ele ako n'anya anu.

17 Anu jiko nhne ojo kwu nye mernu anu nhne ojo ogwo. Anu mee nhne buru oma n'anya ele badnu.

18 Anu nu kpakara ele badnu ziri n'udno, o buru nu o kwe omume, kpa anu nwernu rikne.

19 Ele me whuru n'anya, anu megwnanu, kovu gharu onuma Chiokike nru eru a, kwnornu nu okwukwo nsu kwuru, nu Nyenwe ai kwuru, "Mawa nwe mmegwnahia, m jeemegwnanu."

20 Kovu lele nhne okwukwo nsu kwuru,

"O buru nu wiri n'ogwnu nye irno i, nyee a wiri,

o buru nu akpiri nookpo a bekwnu, kwute a mini, o nwornu, kpa, i naaghakwasị esekere bekwnu n'olu risi a."

21 Anu kwé nhne ojo megbu anu, kovu anu gweru nhne oma megbu nhne ojo.

13

Mkpuru ele ochichi

1 Nye obula bita ehni a nu mkpuru ochichi, kwnornu nu o za ele nechi ochichi ke Chiokike bitala, Chiokike bitaru kpakara ele nechi ochichi.

2 Nye obula ke neemegidne ochichi neemegidne nhne Chiokike bitaru, nye mernu kpa jeegweyanu ehni a ikpe.

3 Ele neeme nhne oma za notu ogwnu ele ochichi, kovu ele neeme nhne ojo jootu ogwnu. I piuru ogwnu ele nechi ehni gharu o tu i? Mee nhne buru oma, be jaazarni i.

4 Kwnornu nu o bu nnwo izi Chiokike neeme nhne oma. Kovu o buru nu i mee nhne ojo, ogwnu a tu i, kwnornu nu o vule ama-ogwnu a etekne. O bu nnwo izi Chiokike, neemegwnahianu a ovu owe ehni a n'ehni ele neeme nhne ojo.

5 Kam kpararu, i jobno nsni ele ochichi, o buo kwnornu nu ovu owe ehni Chiokike kpoi, kovu kwnornu nu mkpoma i.

6 Ke bu anu jootu ntu-eli, kwnornu nu ele ochichi bu rumu izi Chiokike noturu eru zinu be, ele ji kpakara ige be nechi ochichi.

7 Anu kwu ogwo anu ji be, tu ntu-eli o buru anu ji ogwo ntu-eli, tu ntu ahia o buru nu anu ji ogwo ntu ahia, so nye kwesiri anya, bisinu nye kwesiri.

Whnu ibne anu n'anya

8 Anu ji nye obula ogwo, kovu anu whnura ehni anu n'anya. Nye obula ke notwhnu badnu ibne a n'anya mezuru Iwu.

9 Iwu wam, "I meko oyi, i gbuko badnu, i znuko buznu, i nweko owho-anya." Ka nu kpakara iwu berere jikogwu aka notu iwu ka, "Whnu nye agbatibi i n'anya lele ehni i."

10 Nye obula ke whuru nye agbatibi a n'anya jeeme a nhne ojo. Owhnu n'anya bu o mezu kpakara Iwu.

11 Anu mee kpa, anu magwu nhne ige ka bu. Ka bu ige anu jeetnnya n'anyarna, kwnornu nu oznohia ai zi ndundu kitna karu nga a kweru nu mbom.

12 Chi jiminem, chi obubo zi masi ndundu, a gharu eru ochichiri, woru mgwna ogwnu ke iwhe.

13 Ngwa ma a kpa agwa lele ele zi n'iwhe ke obochi, o buo ele okne iriri nu ele era manya naagba, o buo nu nhne rune nu nhne tu iwheerne, o buo olu ogwnu, nu anya-kwu.

14 Kòvu anụ woru Nyenwe aị Jizọsi Karaịsi lele iwo, anụ nyée anọ-ẹhni anụ oghere o mee nhne ojo ke nọogwunu a.

14

Anụ kpé rụmu nda anụ

ikpe

1 Anụ kwubnanya nye zá rikne nụ ọkwnata ovu, kòvu anụ nụ a dógbuta kwnornu nhne o kweru.

2 Ọkwnata ovu otu badnụ kweru a, o ri kpakara nhne, kòvu nye berere, ọkwnata ovu a zá rikne, neeri ọkwukwo ọhia kpọi.

3 Nye ke neeri kpakara nhne lédna nye zá neeri anya, nye zá neeri kpakara nhne kpé nye neeri kpakara nhne ikpe kwnornu nụ Chiokike nakweruru a.

4 I bú nyele ke neekpe ọhi nye berere ikpe? Ọ bú nyenwe a jaakaa ma ọ mekwahjaru mọbu o mékwahjịala. O jeemekwahjịa, kwnornu nụ Nyenwe aị jeeme a o gwzọru kwem.

5 Otu badnụ kanụ otu ọbochi zị mkpa k'agịda n'esilawuru ọbochi berere, nye berere jaakaa nụ kpakara ọbochi bú otu. Echiche nye ọbula jị a rụwho.

6 Nye karụ nụ otu ọbochi zị mkpa k'agịda neeme a nọsobisinu Nyenwe aị, nye neeri nhne ọbula nọsobisinu Nyenwe aị, kwnornu nụ ọ nọotunu Chiokike mmamma nụ wiri wam. Nye zá neeri agwna nhne nọsobisinu Nyenwe aị, nọotunu Chiokike mmamma.

7 Ọ zá nye zịnu ẹhni a bụdnụ kpọi, ọ zá nye nọonwunu ẹhni a ẹnwu.

8 Ọ bụru nụ a zị bụdnụ, a zịnu Nyenwe aị bụdnụ, a nwurnu ẹnwu, a nwunu Nyenwe aị, ma a zị bụdnụ ma a nwurnu ẹnwu, a bú ke Nyenwe aị.

9 Kwnornu nụ Karaịsi nwurnu, hi n'ẹnwu lizọ ma ọ bụru Nyenwe ele zị bụdnụ nụ ele nwurnu ẹnwu.

10 Jịwa, i kwno kịni neekpe nnwọ nda i ikpe? I kwno kịni neeledna nnwọ nda i anya? Kpakara aị joogwuzo nụ ruwhnu ngadna ikpe Chiokike.

11 Lele kpa be gbarụ a n'ọkwukwo nsọ,

“Nyenwe aị kwuru kpa, ‘Kpa me zị bụdnụ
kpakara mpnerne ọchi joogbunu m n'eli,
kpakara riro jookwupịya nụ mawa bú Chiokike.’ ”

12 Kpakara aị n'otu n'otu jaakahjịa nhne a mernu nụ ruwhnu Chiokike.

13 A gharụ o kpe ẹhni aị ikpe, tñunuma, i bíta nhne jọokpo nnwọ nda i ọchi, mọbu nhne jeeme ọ dna.

14 M magwụ m nụ hite nụ mmekọrita ke me nụ Nyenwe aị Jizọsi, ọ zá nhne ke zịla rịchna, ọ bụru nụ badnụ kaa nụ otu wiri zịla rịchna, ọ zịla rịchna hne ọ zị.

15 Ọ bụru nụ nhne i riri jeemekasi nnwọ nda i ẹhni, i zá neezne izne n'ọwhnun'anya. I kwéko nhne i riri lulu nye Karaịsi kwnornu nwụ ẹnwu.

16 I kwéko be kaa nụ nhne ọma i bú nhne ojo.

17 Kwnornu nụ ẹli-eze Chiokike búo nhne oriri nụ ọnwunwo, kòvu ọ bú ome mma, udno nụ snarnjima nụ rime Enine Nso.

18 Kwnornu nụ nye neeznenu Karaịsi izi kpa neeme nhne nọoso Chiokike n'ọnu ma nụ ruwhnu ele badnụ.

19 Ngwa ma a neeme nhne jeegweya udno, nụ ke joowuli aị olu lele ọro.

20 I kwno wiri lulu ẹnụ aka Chiokike. Kpakara wiri zị rịchna, kòvu ọ búo ọma o ri nhne jeeme badnụ dna.

21 Ọ bụru ọma i gharụ o ri wiri, mọbu nwọ manya, mọbu mee nhne ọbula ke jeeme nnwọ nda i dna.

²² Kpakara nhne i kweru nụ rime nhne ele ka, dazinum ji nụ Chiokike. Nye ikpe máge nụ nhne o kweru bụ nye ọwa ọma.

²³ Kọvu ọ bụru nụ mkpọma badnụ marnụ a ikpe nụ nhne o riri, Chiokike jaama a ikpe ma o ri a, kwnornu nụ ọ kwnátala mkpọma nụ nhne o neeme. Nhne ọbula ke híge n'ọkwnata mkpọma bụ mmehie.

15

Mee nhne jọoso ele berere

n'ọnu

¹ Aị ele zị rikne nụ ọkwnata mkpọma kwesiri o vuru ekperi ele zá rikne. Ọ búo neeme nhne nọoso aị n'ọnu.

² Nye ọbula menu badnụ ibne a nhne bụru ọma, ke jọoso a n'ọnu, ma o wulizọ a olu lele ọro.

³ Kwnornu nụ Karaịsi méne nhne jọoso ẹhni a n'ọnu, lele kpa be gbarụ a n'ọkwukwo nsọ, “Nhne iwchnerne ele naakpasị i iwchnerne dnakwasịri m.”

⁴ Kpakara nhne be gbarụ n'ọkwukwo nsọ n'ọbochi wheru ewhe zinu aị, neezni aị nhne, ma a nwernu olile anya hite n'ndidi nụ ọgba inwe ke ọkwukwo nsọ nyernu aị.

⁵ Chiokike ke neenye ndidi nụ ọgba inwe mee anụ nwernu enine ọziri n'otu kpa anụ noosno Karaịsi Jizọsi,

⁶ ma kpakara anụ n'otu jeegweru otu ọnu znarnị Chiokike nụ Nda Nyenwe aị Jizọsi Karaịsi.

⁷ Anụ kwubnanya ibne anụ lele kpa Karaịsi kwubnanyarnụ anụ ma anụ znarnị Chiokike.

⁸ M naakanụ nụ Karaịsi ghoru nnwọ izi ele Ju ma o gesi ezi ọka Chiokike, mezu mkwna o kweru nda be ọknani,

⁹ ma ele búo ele Ju nyee Chiokike igwugwu kwnornu obirizi a, lele kpa be gbarụ a n'ọkwukwo nsọ,

“Ka bụ nhne me kwno znarnị i n'esilawuru ele búo ele Ju,
m jọogwnunu rẹwhna i eri.”

¹⁰ Ọ kaa, berere,

“Anụ snornu rumu Chiokike nwudna, anụ ele búo ele Ju.”

¹¹ Ọ kaa, berere,

“Anụ ja Nyenwe aị, kpakara ele búo ele Ju,
kpakara ele badnụ gwnunu a eri ọznarni.”

¹² Berere kwno, Azaya karụ,

“Otu Badnụ jeehi n'ebnurnu Jesi va,
o jeelizọ chị kpakara mbam,
ele búo ele Ju jeelekwasị a anya.”

¹³ Kịtna, Chiokike ke olile anya gweru ovu ọso nụ udno mejite ọkwnata mkpọma anụ nụ rime a, ma olile anya anụ nooso oso hite nụ rikne Enine Nsọ.

Polu nye izi ele búo ele Ju

¹⁴ Rumu nda m, m magwụ m nụ nhne ọma zị nụ mkpọma anụ. Anụ magwụ kpakara nhne ka nkarị nkarị, ke jeeme anụ nwernu rikne neeznitaru ẹhni anụ nhne.

¹⁵ M ji m anya siri rikne gbanụ anụ ọkwukwo, ma anụ chenwanya agwna nhne, kwnornu nụ ọru Chiokike nyernu m.

¹⁶ Chiokike mernu m nye izi Karaịsi Jizọsi, nye nọornunu ele búo ele Ju ẹnu, nye naakwa arịohna, nọokpo okwo izi ọma Chiokike, ma ele búo ele Ju bụru nhne arịohna Chiokike jeegweru, ke Enine Nsọ bitaru nsọ.

17 Kam kpayarụ, m ji m ẹrnu m naanya risi nụ rime Karaịsi Jizọsi nhne gbasiri Chiokike.

18 M jóokwu nhne berere karụ nhne Karaịsi mernu hite n'aka m, o duru ele búo ele Ju be búo ele noobnonu Chiokike nsni hite n'ikwu-ọnu m nụ ẹrnu m.

19 Hite nụ rikne nhne ọgba akebne nụ ẹrnu ndu-ẹhni ke Enine Chiokike hite nụ Jeruselem du Ilirikom, m nọkpo okwo izi ọma gbasiri Karaịsi n'apna zuru ozu.

20 Ọ bú nhne zị nụ mkpọma m o zni izi ọma hne be nuna nhne gbasiri Karaịsi, ma m gharụ m o wu ọro n'olu ntụ-ẹli ọro nye berere.

21 Lele kpa be gbarụ a n'ọkwukwo nsọ,
 “Ele be kánnụ be nhne gbasiri a jọowhurnu,
 ele nuna nhne gbasiri a jọoghohia.”

22 Kam kpayarụ, be kwéle me vakwnusi anụ.

Pọlu marnụ mmụma

o zne Rom

23 Kọvu kịtna, ọ zá nhne me jọornu nụ kpakara ẹli ka, ọ nọogwu m ọ whnu anụ anya agida awha ka.

24 M jeeme kpm kịtna, m jọowhnu anụ kpa me neezne Sipeni. Anụ jeeyinu m aka n'izne m, ma me nụ anụ dazikwole ige matị.

25 Kọvu kịtna, m neezne Jeruselem kwnornu ele ke Chiokike zị pji.

26 Kwnornu nụ ọ masiri ọgbako Chiokike ke zị nụ Masidonia nụ Akaya o gweya nhne be jeekesi ele mboni zị n'esilawuru rụmu Chiokike ke zị nụ Jeruselem.

27 Ọ masiri be o yinu be aka, kọvu ezi ọka zị a bú ka, ọ bú ẹrnu zinu be o yinu ele mboni wam aka, kwnornu nụ ele Ju nụ ele búo ele Ju neekerita ngozi ke enine, ele búo ele Ju kwesiri o kesi ele Ju ngozi ke ẹkwu be.

28 Nga me rnụkparu ẹrnu ka, nyega be nhne be tuiaru, m jọowhnu anụ nga me neezne Sipeni.

29 M magwụ m nụ nga me jaava, m jeeji agida ngozi Karaịsi va.

30 M naariasno anụ, rụmu nda m, hite nụ Nyenwe aị Jizọsi Karaịsi nụ ọwhnun'anya ke Enine Nsọ, anụ snornu m kpesi okpukpe rikne nụ ruwhnu Chiokike kwnornu nhne me nọowhnu.

31 Anụ kpe okpukpe ma be dọhia m n'aka ele kwé ekwe zị nụ Judiya, ma ele Chiokike zị nụ Jeruselem nabnarnụ ẹrnu m n'esilawuru be,

32 ma hite n'echiche Chiokike, m jeeji snarni ma vakwnusi anụ, ma me nụ anụ dazirikota nụ mkpọma ọma.

33 Chiokike ke udno dazinu kpakara anụ. Amim.

16

Obekwu ikwu Pọlu

1 M neegesi anụ nwene aị rinya Febi, ke nọornu ọgbako Chiokike ke zị nụ Kenkiria ẹrnu.

2 Anụ bikno nabnanya a nụ rẹwhna Nyenwe aị lele kpa rụmu Chiokike kwesiri, anụ yisinu a aka nụ nhne ọbula zị mkpa, kwnornu nụ ọ bú nye ovu ọma neeyinu agida ele berere aka ma me masi.

3 Anụ bekwu Prisila nụ Akwila, ele ẹrnu ibne m, ele me nụ be sno nọornunu Karaịsi Jizọsi ẹrnu.

4 Be gweru búdnu be bita nụ nhne oze búdnu nụ risi m, m nọtnu be mmamma, ọ búo me nụ nsnunu m kpọi, kọvu kpakara ọgbako Chiokike zị n'ẹli ele búo ele Ju nọtnu masinu be mmamma.

⁵ Anụ bekwu ọgbako Chiokike zị n'oro be. Anụ bekwu enyi m me whnuru n'anya Epenetusi, nye mbom ke hi n'Esia kweru nụ Karaịsi.

⁶ Anụ bekwu Meri nye ruru anụ agida ọru.

⁷ Anụ bekwu Andronikusi nụ Junias, ele Ju ibne m me nụ be zị n'ikelu, be bu ele badnu marnu nkarị nkarị n'esilawuru ele izi, be beru m osno mahia Karaịsi.

⁸ Anụ bekwu Ampilatusi, nye me whnuru n'anya nụ rime Nyenwe aị.

⁹ Anụ bekwu Urbanusi nye ọru ibne aị n'ọru Karaịsi, nụ Sitakisi enyi oma m.

¹⁰ Anụ bekwu Apelesi nye be kparu iru, o whe nụ Karaịsi.

Anụ bekwu ezi-nu-oro Arisitobulosi.

¹¹ Anụ bekwu Erodioni nye Ju ibne m. Anụ bekwu ele ezi-nu-oro Nakisosi, ele zị nụ rime Nyenwe aị.

¹² Anụ bekwu Terifosa nụ Terifosa ele ọru nụ rime Nyenwe aị, nụ nye me whnuru n'anya bu Pesis nye ọru nụ rime Nyenwe aị.

¹³ Anụ bekwu Rufosi, nye ọru Nyenwe aị hohiaru. Anụ bekwu nne a, nye bu masi nne m.

¹⁴ Anụ bekwu Asikiritosi, Filegoni, Hemisi, Patirobasi, Hemasi nụ kpakara ọru nda anụ be zị.

¹⁵ Anụ bekwu Filologosi nụ Julia, nụ Nerusi nụ nwene a rinya, nụ Olimpasi nụ kpakara ọru Chiokike be nụ be zị.

¹⁶ Anụ gweru obekwu ikwu nsọ ke ọru nda bekwurita ọni anụ. Kpakara ọgbako Chiokike neebekwu anụ.

Ezni ipne-aznu Pọlu

¹⁷ Ọru nda m, anụ bikno, anya du anụ ẹli gbasiri ele neegweya okewa nū naakpahie okwnata ovu ele badnu anya, ele neezni nhne ke neemegidne iznizni anū nahiaru. Anū neeze be.

¹⁸ Kwnornu nū ele nū kpam zā nọornu Karaịsi ọru, kovu ruwho be. Hite n'onu biri biri be nū oka sọ n'onu, be nooduwhu ele zị snam nū mkpoma.

¹⁹ Kpakara ọna nuru obno nsni anū, ke mernu mkpoma sọ m n'onu k'agida kwnornu anū. Kovu m pioru m anū buru ele nwernu akoniche hne nhne oma zị, ele ikpe mana hne nhne ojo zị.

²⁰ N'ige matị Chiokike ke udno jozogbu Ekwensu nū mkpururu ọchi anū. Oru ke Nyenwe aị Jizosi dazinu anū.

²¹ Timoti nye ọru ibne m neebekwu anū, ya nū Lusosi, nū Jasoni nū Sosipata ele Ju ibne m.

²² Mawa, Tetiosi, nye gbaru okwukwo ka neebekwu anū nū rime Nyenwe aị.

²³ Gayosi nye me zị n'oro a, nye ọgbako Chiokike zị n'oro a, neebekwu anū. Ochi-ıwai ọna bu Erasitosi nū nwene aị rukna Kwatusi neebekwu anū. [

²⁴ Oru ke Nyenwe aị Jizosi Karaịsi dazinu kpakara anū. Amim.]

²⁵ Ozarni zinu Chiokike nye nwernu rikne mee anū gwuzoru lele kpa izi oma me neezni kwuru, nū okpo okwo Jizosi Karaịsi, lele kpa okpume nhne gwnaru agwna ke zị omimi ogologo ige wheru ewhe.

²⁶ Kovu be kpumernu a hite nū nhne ele ọwhnurninya gbaru n'okwukwo hite n'iwu Chiokike zị okwnukokwunu. O mernu kpakara mbam mahia, ma be kweru bnonu a nsni.

²⁷ Ozarni zinu Chiokike nye nū nsunu a bu nye akọ hite nū Jizosi Karaịsi okwnukokwunu. Amim.

**Ọkwukwo izi
ke Mbọm
Pọlu gbaznenu
Ele Kọrinti**

Nhne gbasiri ọkwukwo izi ka

Ọkwukwo izi Pọlu gbaznenu ele Kọrinti ke mbọm neelebna anya nù bụdnu nù ọkwunata mkpọma ke nye Karaịsi. O nookwu ọka gbasiri mkpa ke zị nù ọgbako Chiokike ke zị nù Kọrinti ke Pọlu miteru. Nù ige wam, Kọrinti bụ ẹli-ọhna ke zị mkpa n'ẹli Giriṣi, ke bụ risi ọchichi ẹli Rom n'ọdoru-ẹli wam. Ele ẹli ka bụ ele be marnụ rẹwhna be n'ahia, ele mkpako, nù ele agwa ojo, ele nọkponu chi zị ichne ichne risi ẹli.

Pọlu nookwu gbasiri okewa nù agwa ojo ke zị nù rime ọgbako Chiokike pji. O kwuru nhne gbasiri bụdnu ọgbako Chiokike nù okpukpe, olizọ n'ẹnwu, ọlulu nzi nù nnwerne. O kwuru nù Izi Ọma nwernu ọsisa kpakara ajiji ele ka.

Nù risi 13, Pọlu gesiri nù ọwhnun'anya bụ ngozi ke kakwo mma Chiokike nyernu ele badnụ.

Nhne zị n'ọkwukwo izi ka

Opanizo (1:1-9)

Okewa nù rime ọgbako (1:10--4:21)

Agwa ọma nù bụdnu ezi-nụ-oro (5:1--7:40)

Ele Karaịsi nù ele naakwa rẹnwu (8:1--11:1)

Bụdnu ọgbako nù okpukpe Chiokike (11:2--14:40)

Olizọ n'ẹnwu Karaịsi nù ke ele kweru ekwe (15:1-58)

Nkesi ele Karaịsi nye ele zị nù Judiya (16:1-4)

Mmụma Pọlu nù ọkwukwo (16:5-24)

¹ Mawa, Pọlu, nye Chiokike sukwuru hite n'echiche ma ọ bụru nye izi Karaịsi Jizọsi nù nnwọ nda aị Sọsitenisi,

² naagbaznenu anụ, ọgbako Chiokike ke zị nù Kọrinti ọkwukwo. Anụ bụ ele Chiokike sukwuru ma anụ be bụru ele ke a zị nsọ nù Karaịsi Jizọsi, anụ nù kpakara ele zị nù hne ọbula be nọkpokwu rẹwhna Nyenwe aị Jizọsi Karaịsi, Nyenwe be nù Nyenwe aị.

³ Oru nù udno ke Chiokike Nda aị nù Nyenwe aị Jizọsi Karaịsi dazinu anụ.

Ọtu mmamma

⁴ M nọotunu Chiokike m mmamma ige ọbula nù risi anụ, o nyernu anụ oru hite nù Karaịsi Jizọsi.

⁵ O mernu anụ ba aba nù rime Karaịsi nù kpakara nhne, ma nù ikwu-ọnu nù nhne ọmuma anụ.

⁶ Izi gbasiri Karaịsi gwuzosiri rikne nù rime anụ.

⁷ Kam kpayarụ, ọ zá nkesi ke enine kọgwu anụ kpa anụ neese ige be joo kpume Nyenwe aị Jizọsi Karaịsi.

⁸ O jeeme anụ gwuzoru kwem dū ọsoto, ma anụ bụru ele nwée ọru n'ọbochi Nyenwe aị Jizọsi Karaịsi.

⁹ Chiokike, nye sukwuru anụ ma anụ nù Nnwọ a Jizọsi Karaịsi Nyenwe aị nwekọta nhne, bụ nye kwesiri ọkwunata ovu.

*Okewa nù rime
ọgbako Chiokike*

¹⁰ Rũmu nda m, m ji m rewhna Nyenwe aĩ Jizõsi Karaĩsi naarijasno anũ, anũ bikno, anũ kwekõrita n'otu nhne anũ nookwu, okewa zõma n'esilawũru anũ. Anũ zĩri n'otu n'echiche ma nũ nhne anũ neeme.

¹¹ Rũmu nda m, agwna ele hi n'ezi-nũ-õro Kilo kannũ m kpa o dnornu m anya, nũ okno õka zĩ n'esilawũru anũ.

¹² Ka bũ nhne me naakaa, otu badnũ naakaa, “M bũ m ke Põlu,” nye berere kaa, “M bũ m ke Apõlosi,” nye berere kwno kaa, “M bũ m ke Pita,” nye berere masĩ kaa, “M bũ m ke Karaĩsi.”

¹³ Be kewarũ Karaĩsi sa? Be kpõgidnernu Põlu n'olu õgba kwnornu anũ? Be wũru anũ mini nũ rewhna Põlu sa?

¹⁴ M nõotunu Chiokike mmamma nũ ọ zã nye me wũru mini kwekõlam Kirisipõsi nũ Gayõsi.

¹⁵ Ọ zã nye jaakaa sũ nũ me wũru a mini nũ rewhna m.

¹⁶ (Owe, m wũru m ezi-nũ-õro Stefanasi mini, be gweme kpam, m máam ma m wũru m nye berere mini.)

¹⁷ Karaĩsi zĩyage m me wũ mini, kõvu o zni izi ọma. Ọ bũo hite n'ikwu-õnu ke akõniche badnũ, ọ zi ẹnwu Karaĩsi n'olu õgba bũru nhne etekne.

Karaĩsi bũ akõniche nũ iknernema Chiokike

¹⁸ Kwnornu nũ izi gbasĩri õgba bũ nhne etekne hne ele nõonwu ọnwu zĩ, kõvu hne ele be nõoznohia zĩ, ọ bũ iknernema Chiokike.

¹⁹ Be gbarũ a n'õkwukwo nsõ, kaa, “M joolulu akõniche ke ele akõ, tuwhu õghohia ke ele marnũ nhne.”

²⁰ Ndaa hne nye akõ zĩ? Ndaa hne nye okne ọkwukwo zĩ? Ndaa hne nye agĩrigo ke ọwa ka zĩ? Chiokike mernu akõniche ke ọwa bũru nhne iwhnirniwhno.

²¹ Kwnornu nũ hite n'akõniche Chiokike o kwéle ọwa mahĩa nye ọ bũ hite n'akõniche ke ọwa. Ọ sõru Chiokike n'õnu o hite n'iwhnirniwhno ke ọkpo okwo izi ọma znõhia ele kweru ekwe.

²² Ele Ju noopio nhne elekema, ele Giriki noopio akõniche.

²³ Kõvu a nõokpo okwo nũ be kpõgidnernu Karaĩsi n'olu õgba, ke bũnu ele Ju rugwu ọkpobi ọchi, hne ele bũo ele Ju zĩ, ọ bũ nhne iwhnirniwhno.

²⁴ Kõvu hne ele Chiokike sukwuru zĩ, ele Ju ma ele bũo ele Ju, Karaĩsi bũ iknernema Chiokike nũ akõniche Chiokike.

²⁵ Kwnornu nũ iwhnirniwhno Chiokike kakwo akõniche ke badnũ, rikne ọgwugwu Chiokike kakwo iknernema ke badnũ.

²⁶ Rũmu nda m, anũ chenwanya nhne anũ bũ sũ Chiokike sukwuru anũ. Agĩda anũ bũ ele ọwa karũ nũ be nwéé akõniche, agĩda anũ bũ ele ọwa máa, agĩda anũ bũ ele híge ezi-nũ-õro eze whũya.

²⁷ Kõvu Chiokike hõhiaru nhne iwhnirniwhno ke ọwa ma iwhnerne tũ ele akõ. Chiokike hõhiaru nhne ele ọwa karũ nũ ọ zĩla rikne ma iwhnerne tũ ele zĩ rikne.

²⁸ Chiokike hõhiaru nhne ele ọwa lednarnũ anya nũ nhne zã nhne ọ bũ, mee nhne ke be kwuru nhne bũru nhne etekne.

²⁹ O mernu ka ma badnũ ọbula gharũ o mee oknomokno nũ ruwhnu Chiokike.

³⁰ Chiokike mernu anũ nũ Karaĩsi Jizõsi bũru otu, nye bũrunu aĩ akõniche nũ rime Chiokike. Ya bũ ome mma aĩ nũ ọzi nsõ aĩ nũ õgbahia aĩ.

³¹ Lele kpa be gbarũ a n'õkwukwo nsõ, “Nye ọbula ke jeeme oknomokno, o mee oknomokno nũ nhne Nyenwe aĩ rnũru.”

2

*Izi ọma gbasịri Karaịsi
nụ ọgba a*

¹ Rụmu nda m, nga me vakwnusiri anụ, m jile m okne ọka mọbu akoniche ke badnụ va kpọ okwo nhne tugwaru otugwa ke Chiokike.

² Kwnornu nụ m piọle m ọ marnụ nhne ọbula kpa me nụ anụ zị, kwekọlam nhne gbasịri Jizọsi Karaịsi, nye be kpogidnenu n'ọgba.

³ M ji m ọza rikne nụ ogwnu nụ ẹhni ọznu biri biri va.

⁴ Nhne me znirni nụ izi m bụo hite nụ nkarị ọka ke akoniche ke badnụ, kọvu o gesi Enine nụ iknerna a n'esilawuru anụ,

⁵ ma anụ buru ele kweru ekwe, ọ bụo kwnornu nụ akoniche ke badnụ, kọvu n'iknerna Chiokike.

Akoniche Chiokike

⁶ Kọvu n'esilawuru ele sozuru osozu bụ hne a nookwu ọka akoniche, ọ bụo akoniche ke ọwa ka, mọbu ke ele nẹchi ọwa ka. Ige matị, ọ zá nhne be ọjọbu.

⁷ A nookwu nhne gbasịri akoniche Chiokike ke tugwaru otugwa, ke Chiokike hōhiaru kwnornu igwugwu aị tụtụ sụ ọwa panizoru.

⁸ Ele ọchichi ke ọwa ka máa akoniche ka. Kwnornu nụ ọ buru nụ be marnụ a, be bọ kpogidene Nyenwe igwugwu n'olu ọgba.

⁹ Kọvu kpa be gbarụ a n'okwukwo nsọ,

“Anya whnúlele,

nsnị núlele,

ọ bnána n'ovu badnụ rịa rịa,

nhne Chiokike bítannu ele whnúrnu a n'anya.”

¹⁰ Kọvu Chiokike hiri n'Enine a kpumenu aị nhne o tugwaru otugwa, kwnornu nụ Enine noonyosna kpakara nhne, ma nhne miri emi ke Chiokike.

¹¹ Ọ zá nye magwụ echiche ke mkpọma badnụ, o kwolem enine ke zị nụ rime badnụ. Kpam masị, ọ zá badnụ ke magwụ echiche Chiokike, okwolem Enine Chiokike magwụ kpakara nhne gbasịri Chiokike.

¹² A náhịage enine ke ọwa ka, kọvu a nahịaru Enine Chiokike ziyaru ma a mahịa kpakara nhne Chiokike hiri n'ovu ọma a kesi aị.

¹³ Ka bụ nhne a nookwu, ọ bụo hite nụ nhne ke badnụ znirni aị nụ akoniche ke badnụ, kọvu nhne Enine znirni aị. A nọkowa ezi ọka ke enine hne ele nwernu Enine Chiokike zị.

¹⁴ Badnụ ke nwée Enine Chiokike nwée rikne kweru nhne hi n'Enine Chiokike va, kwnornu nụ be bụnu a nhne iwahnirniwhno, o nwée rikne nahịa be kwnornu nụ Enine Chiokike nọkowanu ele nwernu Enine.

¹⁵ Badnụ ke nwernu Enine Chiokike neekpe kpakara nhne ikpe, kọvu ọ zá nye jeeke a ikpe.

¹⁶ Lele kpa be gbarụ a n'okwukwo nsọ,

“Nyele magwụ echiche Nyenwe aị,

ma nye wam zni a ezni?”

Kọvu a nwernu echiche ke Karaịsi.

3

Ele ọnu Chiokike

¹ Rụmu nda m, m nwée m rikne kwunu anụ ọka lele ele nwernu Enine, kọvu m nookwunu anụ ọka lele badnụ etekne, lele rụmu takịri nụ rime Karaịsi.

² M jeeji mini-rẹma nọoznu anụ, ọ bụo wiri siri rikne, kwnornu nụ anụ jéenwe rikne ri be. Tem dụ kịta, anụ nwée rikne ri wiri siri rikne.

³ Anụ zị kọriri n'anọ-ẹhni, kwnornu nụ okwno-awụwa nụ okno ọka zị n'esilawuru anụ, ka ọ zà neegesi nụ anụ zị n'anọ-ẹhni? Anụ neeme lele badnụ etekne.

⁴ Otu badnụ naakaa, "M bụ m ke Pọlu." Nye berere kaa, "M bụ m ke Apọlosi." Anụ zà neeme lele badnụ etekne?

⁵ Nyele bụ Pọlu? Nyele bụ Apọlosi? A bụ ele ọrnu, ele anụ hiri n'aka be kweru. Nye ọbula nọornu ọrnu ke Nyenwe aị nyernu a.

⁶ Mawa kpasiri mkpuru, Apọlosi wụsi a mini. Kọvu Chiokike mernu mkpuru wam so oso.

⁷ Nye wam kpasiri mkpuru nụ nye wam wụsiri a mini bụ nhne etekne. Chiokike zị mkpa kwnornu nụ ọ bụ ya mernu mkpuru wam so oso.

⁸ Nye wam kpasiri mkpuru nụ nye wam wụsiri a mini bụ otu. Nye ọbula jaanarnụ ọgwo ọrnu a lele kpa ọrnu a hna.

⁹ Kwnornu nụ aị nụ Chiokike nọornuko ọrnu n'otu, anụ bụ ẹkwu Chiokike. Anụ bụ ọro Chiokike noowu.

¹⁰ Hite nụ oru Chiokike nyernu m, m nọornu ọrnu lele nye nka-owu ọro. M turu m ntụ-ẹli ọro, nye berere noowukwasị ọro n'olu a. Kọvu anya dū nye noowu ọro n'olu a ẹli.

¹¹ Kwnornu nụ ọ zà ntụ-ẹli berere badnụ jeenwe rikne tū, kakwo ke Chiokike turu, ke bụ Jizọsi Karaịsi.

¹² Ọ bụru nụ badnụ ọbula jeeji golu, mọbu siliva, mọbu akaworugwu zị okne onu ahia, mọbu isisi, mọbu ruhiara, mọbu isisi ikpa wukwasị ọro n'olu ntụ-ẹli ka,

¹³ ọrnu a jowhuya iwhe, kwnornu nụ ọbochi Karaịsi jookpume a. Be jeeji bẹkwu kpa ọrnu nye ọbula iru, bẹkwu jeegesi nhne nye ọbula jiri wu ọro a.

¹⁴ Ọ bụru nhne badnụ jiri wu ọro n'olu ntụ-ẹli wam gwuzogidne bẹkwu, ọ jaanahia ọgwo ọrnu.

¹⁵ Kọvu ọ bụru nụ bẹkwu rne ọrnu a, nhne whuru a, kọvu be jọoznohia a, kọvu lele nye hi nū bẹkwu whuya.

¹⁶ Anụ máa nū anụ bụ Ọro Nsọ Chiokike, nū Enine Chiokike wu nū rime anụ?

¹⁷ Ọ bụru nye ọbula lulu Ọro Nsọ Chiokike, Chiokike joolulu a. Ọro Nsọ Chiokike zị nsọ, anụ bụ Ọro Nsọ a.

¹⁸ Ọ zà nye duhie ẹhni a, ọ bụru nū nye ọbula neechi nū o nwernu akọ nū nhne ke ọwa ka, ọ ghọ nye iwahnirniwhno ma ọ bụru nye nwernu akoniche.

¹⁹ Kwnornu nū akoniche ke ọwa ka bụ nhne iwahnirniwhno n'anya Chiokike. Lele kpa be gbarụ a n'okwukwo nsọ, "O jidnenu ele akọ n'aghigbo be."

²⁰ Be gba kwno a n'okwukwo nsọ, kaa, "Nyenwe aị magwụ echiche ele akọ nū ọ bụ nhne etekne."

²¹ Ọ zị badnụ ke ji nhne badnụ etekne nwernu rikne mee nyaa risi. Kwnornu nū kpakara nhne bụ ke anụ,

²² Pọlu mọbu Apọlosi, mọbu Pita, ọwa ka, bụdnū nū ẹnwu, nhne zị kịtna mọbu ke zị nū ruwhnu, kpakara be bụ ke anụ,

²³ anụ bụ ke Karaịsi, Karaịsi bụ ke Chiokike.

4

Ele izi Karaịsi

¹ Ele badnụ kwesiri ọ gwnụ aị lele ele izi Karaịsi, ele Chiokike nyernu nhne tugwaru otugwa ke ezi ọka a n'aka.

² Nhne be pioru n'aka nye neelegidne nhne ọbula bụ be whnū a nū ọ bụ nye kwesiri okwnata ovu.

³ Nhne anụ nookwu gbasiri m zà m mkpa, mọbu ikpe nye berere neekpe m, m jéekpe ẹhni m ikpe.

⁴ Ovu m zì snam, kọvu ka zá neegesi nù m bụ m nye ikpe mána. Nyenwe aị bụ nye neekpe m ikpe.

⁵ Kam kpayarụ, anụ kpé nhne ọbula ikpe hne ige yóoduge, seru tem Nyenwe aị va, o jeeme kpakara nhne tugwaru otugwa n'ọchichiri whụya iwhe. Ọ jaakahia kpakara nhne zì n'ovu badnụ. Ige wam nye ọbula jaanahia ọznarni a n'aka Chiokike.

⁶ Rụmu nda m, m gweru m kpakara nhne ka tūsinu ẹhni m nù ẹhni Apọlosi kwnornu anụ, ma anụ jiri aị mụhia nhne ele badnụ nookwu, “Ọ zá nye mee nhne be gbáge n'ọkwukwo.” Ọ zá nye ji otu badnụ nyaa risi megidne ibne a.

⁷ Nyele mernu i, ị zìri ichne hne ele berere zì? Kìni bụ nhne i nwernu ke be késige i? Ọ bụru nù nhne i nwernu bụ nkesi, ndaa kpa i jeeji a nyaa risi lele nù ọ búo nkesi?

⁸ Kítina, rụwho jihjaru anụ. Anụ balam aba. Anụ gholam eze, ọ bụ n'ezi a búo ele eze. Ọ jaama mma ọ bụru nù anụ bụ ele eze, ma a snornu anụ bụru masị eze.

⁹ M che m nù Chiokike beteru aị ele izi aznụ, lele ele be joogbu ogbu, nhne olekiri nyee ọwa, ma hne ele enine izi nù hne ele badnụ zì.

¹⁰ A bụ ele iwhe n'iwhe kwnornu Karaịsi, kọvu anụ bụ ele nwernu akọ nù Karaịsi. A nwéé rikne, kọvu anụ nwernu rikne. Be lednarnụ aị anya, kọvu anụ nwernu igwugwu.

¹¹ Tem dụ kítina, wiri nọogwnu aị, akpìri nọokpo aị bẹkwnu, a gba ẹto, be mejuru aị, a nwéé hne a bíta risi.

¹² A nọdogbu ẹhni aị n'ernu, a ji aka aị nọornu nhne a neeri. Be nọovu aị ọnu, a nọogozì, nga be kpagburu aị, a snuta ovu.

¹³ Nga be kpajarụ aị, a ji ovu ọma sa ọka. A nù lele nhne mkpomkpo ke ọwa ka, tem dụ kítina, ele ọwa kwúge aị nhne ọbula.

¹⁴ M zá m naagba ọkwukwo ka ma iwheerne tū anụ, kọvu ma m zni m anụ ezni lele rụmu ke m me whnurnu n'anya.

¹⁵ Kwnornu nù ọ bụru nù anụ nwernu nri pokwu ele noodu anụ nù rime Karaịsi, anụ nwernu otu nda. M bụ m nda anụ nù rime Karaịsi Jizọsi kwnornu nù m gweyanụ m anụ izi ọma.

¹⁶ M naariasno anụ snornu ọnu ọchi m.

¹⁷ Kam kpayarụ, me neeziyanu anụ Timoti. Ọ bụ nnwọ m me whnurnu n'anya ke kwesiri be kwnata a ovu nù rime Nyenwe aị. Ọ jeechenwanyanu anụ kpa me noowu budnu m nù rime Karaịsi Jizọsi, kpa me neezni nù rime kpakara ọgbako Chiokike ke zì nù hne ọbula.

¹⁸ Agwna anụ bụ ele oknomokno, anụ neeche nù m jáava lekwa anụ.

¹⁹ Ọ bụru nù Nyenwe aị kweru, m jaava kwnusi anụ wara wara, m jaamahia nhne ele oknomokno wam jeeme. Ọ búo nhne be jookwu kpọi, ma rikne be nwernu masị.

²⁰ Kwnornu nù ẹli-eze Chiokike búo n'agida ikwu-ọnu kpọi, kọvu iknernema.

²¹ Ndaa nhne anụ pioru? Me gweru mbịnibini va, sụ ọ bụ ovu ọwhnun'anya nù enine zì wọhnerne?

5

*Anụ gweme nnwọ nda
ke zila rịchna*

¹ M nọonu nù ome ọyi zì n'esilawuru anụ, ke zila n'esilawuru ele máa Chiokike, nù badnụ nookwuru nnwerne nda a.

² Ndaa kpa anụ neeme oknomokno nụ kpa? Anụ kwesiri ọ kwna ẹkwna, nwe ovu ojo, anụ kwesiri ọ chihala nyerukna ke mernu nhne ka n'esilawuru anụ.

³ Ọ bụ n'ezị m zị m ikere hne anụ zị n'anọ-ẹhni, kovu me nụ anụ zị n'enine, m marnụ m nye mernu nhne ojo ka ikpe lele nụ me nụ anụ zị.

⁴ Kpa anụ gbako nụ rẹwhna Nyenwe aị Jizọsi, m joosno anụ gbako n'enine, rikne Nyenwe aị Jizọsi jaadazinu aị masi.

⁵ Anụ gweru nye wam yisi n'aka Ekwensu ma o lulu anọ-ẹhni a, ma be znohia enine a n'ọbochi Nyenwe aị.

⁶ Anụ méma oknomokno, kwnornu nụ nhne whụ brẹdi matị neeme kpakara brẹdi whụ ọwhu.

⁷ Anụ gweme mmehie ke nụ lele nhne whụ brẹdi ọknani ma anụ ziri richna. Nga wam, anụ jonu lele brẹdi ikne ke nwée nhne whụ brẹdi, lele kpa anụ kwesiri. Kwnornu nụ be jiri Karaịsi Nnwọ Atnurnu Ọgawhe aị kwanụ aị ariohna.

⁸ Ngwa ma a bita Iriri ka, ọ búo hite nụ nhne whụ brẹdi ke mmehie ọknani nụ risi rikne, kovu brẹdi ke nwée nhne whụ brẹdi nụ rime a, brẹdi ke zị richna ke nwernu ezi ọka nụ rime a.

⁹ M gbannu m anụ ọkwukwo, anụ nụ ele neeme ọyi mékọta nhne.

¹⁰ M zá m nookwu gbasiri ele neeme ọyi k'owa, ele ọwho-anya nụ ele buznu nụ ele naakwa renwu. Ọ bụru kpam, anụ jowhoga n'owa.

¹¹ Kovu m naagbanu anụ kịtna, naakaa, anụ nụ nye ọbula ke kwuru ẹhni a nnwọ nda, kovu o neeme ọyi, ke nwernu ọwho-anya, nye naakwa renwu, mọbu nye naakaja badnu, nye okne manya, mọbu nye buznu mékọta nhne. Anụ nụ nye wam dázikota ẹli ri wiri.

¹² Ọ zá m mkpa me kpe ele zị n'ederezi ikpe. Ọ búo anụ kwesiri o kpe ele zị n'esilawuru anụ ikpe?

¹³ Chiokike jeekpe ele zị n'ederezi ikpe. Lele kpa ọkwukwo nsọ kwuru, "Anụ chihala badnu ojo wam n'esilawuru anụ."

6

O kwuru badnu zne

oro ikpe

¹ Ọ bụru nụ otu badnu nwernu nhne megidne nnwọ nda, i ga ọla gba nnwọ nda i ọkwukwo n'oro ikpe, ele máa Chiokike kpe be ikpe, tnunuma, o jookwuru a zne n'esilawuru rumu Chiokike?

² Anụ máa nụ rumu Chiokike jeekpe ọwa ikpe sa? Ọ bụru nụ anụ jeekpe ọwa ikpe, anụ nwée rikne kpe ikpe ọka matị n'esilawuru anụ?

³ Ọ bụ nụ anụ máa nụ a jeekpe ele enine izi ikpe? Ọ kọ bụru nhne ke budnu ka.

⁴ Ọ bụru nụ ọka dnarnu ke gbasiri budnu ka, kịni mernu anụ neekwe ele zị n'ederezi kpe anụ ikpe? Ele ikpe ka bụ ele nwée ọso anya n'ogbako Chiokike.

⁵ Iwhnerne tu anụ. M kweru m nụ otu badnu ke nwernu akoniche zị n'esilawuru anụ, nye jeenwe rikne kpe ikpe n'esilawuru rumu nda.

⁶ Tnunuma, otu nnwọ nda jookwuru nnwọ nda berere zne n'oro ikpe ma ele kwé ekwe kpe be ikpe.

⁷ Anụ naagbarita ẹhni anụ ọkwukwo n'oro ikpe, ka neegesi nụ anụ dnarnu adna. O jáaka mma nụ i bụ nye be mejoru? Ọ jáaka mma nụ nhne whunahoru i?

⁸ Tnunuma, anụ neeme ibne nhne ojo, anụ znunahoru nnwọ nda anụ nhne.

⁹ Ọ bụ nụ anụ máa nụ ele ojo jéekèhija ẹli-eze Chiokike? Anụ dúwhu ẹhni anụ, ele naagba ewhere, mọbu ele naakwa rẹnwu, mọbu ele neeme ọyi, ele rukna naadnanyi ele rukna ibne be,

¹⁰ mọbu ele buznu, mọbu ele ọwho-anya, mọbu ele okne manya, mọbu ele naakaja badnụ, mọbu ele nọghogbu ele badnụ jéekèhija ẹli-eze Chiokike.

¹¹ Agwna anụ nụ kpm nụ mbom. Kọvu be snumarnu mmehie anụ, be gweru anụ nyewhete n'aka Chiokike. Be mernu anụ nụ Chiokike ziri n'udno hite nụ rẹwhna Nyenwe aị Jizosi Karaisi nụ Enine ke Chiokike aị.

Kwasinu Chiokike igwugwu

¹² “M nwernu m rikne mee kpakara nhne.” Kọvu ọ bụo kpakara nhne naabna mbnarna. “M nwernu m rikne mee kpakara nhne.” Kọvu m jọbu ọhi nhne ọbula.

¹³ “Wiri zinu rụwho, rụwho zi masinu wiri.” Kọvu Chiokike joolulu kpakara be. Be jéji ẹhni badnụ neeme ọyi, kọvu kpenu Nyenwe aị, Nyenwe aị jeeme ẹhni badnụ nwehija nhne zi mkpa.

¹⁴ Chiokike nye mernu Nyenwe aị hi n'ẹnwu lizo, o jeeme masi anọ-ẹhni aị hi n'ẹnwu lizo hite n'iknerna a.

¹⁵ Ọ bụ nụ anụ máa nụ ẹhni anụ bụ nhne zi n'ẹhni Karaisi? M jeegweru nhne zi n'ẹhni Karaisi mee be ọbu nhne zi n'ẹhni nyerinya ewhere? Óza rija rija.

¹⁶ Ọ bụ nụ anụ máa nụ nye gweru ẹhni a yisi n'ẹhni nye ewhere, ya nụ a gholam otu anọ-ẹhni? Kwnornu nụ ọkwukwo nsọ kwuru, “Be lawuru jọburu otu anọ-ẹhni.”

¹⁷ Kọvu nye gweru ẹhni a yisi nụ Nyenwe aị, ya nụ Nyenwe aị gholam otu n'enine.

¹⁸ Anụ gbanahoru ome ọyi. Kpakara mmehie berere badnụ mernu zi n'olu ẹhni, kọvu nye neeme ọyi megidnenu ẹhni a mmehie.

¹⁹ Ọ bụ nụ anụ máa nụ ẹhni anụ bụ Oro Nso ke Enine Nso, nye wu nụ rime anụ, ke Chiokike nyernu anụ? Anụ nwée ẹhni anụ, Chiokike nwe anụ.

²⁰ O jiri ọnu ahija gbahija anụ. Anụ gweru ẹhni anụ kwasinu Chiokike igwugwu.

7

Ajji gbasiri ọlulu nzi nụ nnwerne

¹ Nhne gbasiri nhne anụ gbarụ n'ọkwukwo, “Ọ bụru ọma nụ nyerukna nụ nyerinya dnanyi lele nzi nụ nnwerne.”

² Kọvu kwnornu nụ agida ele neeme ọyi zi n'esilawuru anụ, ọ bụru ọma nyerukna ọbula luru nnwerne ke aka a, nụ nyerinya gboru nzi ke aka a.

³ Nyerukna ọbula mee nhne kwesiri a lele nzi hne nnwerne a zi, nyerinya ọbula mee nhne kwesiri a lele nnwerne hne nzi a zi.

⁴ Nnwerne nwée rikne hne ẹhni a zi, kọvu nzi nwernu, kpm masi nzi nwée rikne hne ẹhni a zi, kọvu nnwerne a nwernu.

⁵ Anụ gónahoru ẹhni anụ ẹhni anụ, okwolem ma ọ bụ ige matị kpa anụ kwekotaru, ma anụ vu ọnu nụ kpe okpukpe. Omekwo, anụ ziri n'otu berere ma Ekwensu gharu ọ rna anụ ọrnarna, kwnornu nụ anụ nwée rikne jikwaru ẹhni anụ.

⁶ Ka bụ rikne me neenye anụ, ọ bụo iwu.

⁷ N'ezi ọka, ọ jaamasị m nụ kpakara badnụ jaadazi lele me. Kọvu nye ọbula nwernu nkesi ke Chiokike kesiri, otu nyenum kpa, nye berere nkesi berere.

⁸ Kítina, m naakanu ele lúge nnwerne mọbu ele gbóge nzi, mọbu ele rinya nzi be nwurmu, o jaaka mma anu daziri etekne, lele kpa me daziri.

⁹ Kọvu o buru nu anu jeenwe rikne jikwaru eñni anu, anu luru nnwerne mọbu gbọru nzi. O ka mma o luru nnwerne mọbu gbọru nzi, tñnuma eñni anu jeerne bekwuu.

¹⁰ Ele nwernu nzi mọbu nnwerne, m neenye anu iwu Nyenwe ai, o buo ke m. Nnwerne gbákwadia nzi a nnam.

¹¹ Kọvu, o mee kpa, o jaadaziri etekne mọbu o lahna ke nzi a, nzi gbákwadia nnwerne a nnam.

¹² M naakanu ele ke gwnarnu, o buo Nyenwe ai, o buru nu nye Karaishi obula nwernu nnwerne ke kwé ekwe, kọvu o kweru ya nu a wugidne, o gbála a nnam.

¹³ O buru nu nyerinya Karaishi obula nwernu nzi ke kwé ekwe, kọvu nzi a kweru ma be wugidne n'otu, o gbála a nnam.

¹⁴ Kwnornu nu Chiokike nabnanyarnu nzi ke kwé ekwe kwnornu nnwerne a ke kweru ekwe. Chiokike naabanyarnu nnwerne ke kwé ekwe kwnornu nzi a ke kweru ekwe. O buru nu o buo kpa, rumu takiri anu jọburu ele zila richna, kọvu be zi nsọ kítina.

¹⁵ Kọvu o buru nu o masiri nye ke kwé ekwe o gba nnam, o mee kpa. O zá iwu ke ji nye Karaishi, nzi mọbu nnwerne, n'onodi nu kpa. Chiokike sukwuru ai ma a wuru n'udno.

¹⁶ Ndaa kpa i jiri mahia, ji nnwerne ke kweru ekwe, nu i jọoznohia nzi i? Mọbu ji nzi ke kweru ekwe, ndaa kpa i jiri mahia nu i jọoznohia nnwerne i?

Daziri n'onodi

Chiokike sukwuru i

¹⁷ Kọvu nye obula daziri n'onodi o zi nga Chiokike sukwuru a, bu ke Chiokike nyernu a. Ka bu nhne me neezni nu rime kpakara ogbako Chiokike.

¹⁸ O buru nu nye be kparu nka nuru ikwu Chiokike, o gwépuke nhne atu okpa nka a. O buru masi nu nye be kpáge nka nuru ikwu Chiokike, be kpála a nka.

¹⁹ Okpa nka nu be kpáge nka zá nhne o bu, nhne zi mkpa bu obita iwu Chiokike.

²⁰ Badnu obula daziri n'onodi o zi nga Chiokike sukwuru a.

²¹ I zi n'ohi nga Chiokike sukwuru i? O mékpa i eñni, kọvu o buru nu i nwernu oghere o whoga n'ohi, mee kpa.

²² Kwnornu nu nye bu ohi nga Nyenwe ai sukwuru a bu nye nwernu eñni a nu rime Nyenwe ai. Kpa masi, badnu ke nwernu eñni a nga Nyenwe ai sukwuru bu ohi Karaishi.

²³ Chiokike ji onu ahia gbahia anu, anu ghoko ohi ke badnu.

²⁴ Rumu nda m, badnu obula daziri n'anya Chiokike n'onodi o zi nga Chiokike sukwuru a.

Ele nwé nzi

mọbu nnwerne

²⁵ Nhne gbasiri ele rinya máa nyerukna, mọbu ele rukna máa nyerinya, m nwé m nhne Nyenwe ai nyernu n'iwu, kọvu m neenye anu nhne bu echiche m, nye hite n'obirizi ke Nyenwe ai m kwesiri m otukwasi ovu.

²⁶ Mkpa karilam n'owa kítina, m che m nu o buru oma o buru nu badnu daziri kpa o zi.

²⁷ O buru nu i nwernu nnwerne? I ghásala a. I nwé nnwerne sa? I lúko nnwerne.

²⁸ O bụru nụ ị luru nnwerne o zá mmehie i mernu. O bụru nyerinya máa nyerukna gbọ nzi, o zá nhne ojo o bụ. Kọvu ele nwernu nnwerne mọbu nzi jeenwe agida mkpa n'owa ka, m noopio o dọhia anụ nụ nhne ka.

²⁹ Rụmu nda m, nhne me nookwu bụ ka, ige wam zị ndundu, hite kịtna ele nwernu nnwerne zịri lele nụ be nwée nnwerne,

³⁰ ele naakwna ekwna lele nụ be zá n'anya-mini, ele nọomu rụmu lele nụ ovu zá nọoso be n'ọnu, ele nọozu ahịa lele nụ o zá nhne be zụhiaru,

³¹ ele ji nhne ọwa ka lele nụ o zá be mkpa. Kwnornu nụ ọwa ka n'ọnodi a jaagawhe.

³² M noopio ma nhne ọbula gharu o kpakna anụ ẹhni. Nyerukna ọbula ke nwée nnwerne neeche echiche gbasiri ẹrnu Nyenwe aị, kwnornu nụ o pioru o mee nhne jaamasị Nyenwe aị.

³³ Kọvu nyerukna ke nwernu nnwerne neeche echiche gbasiri nhne ke ọwa ka, kwnornu nụ o pioru o mee nhne jaamasị nnwerne a,

³⁴ ke nọdoghari a n'apna lawuru. Nyerinya ke nwée nzi mọbu ke máa nyerukna neeche echiche gbasiri ẹrnu Nyenwe aị, kwnornu nụ o pioru o gweru ẹhni a nụ enine a nye Nyenwe aị. Kọvu nyerinya ke nwernu nzi neeche echiche gbasiri nhne ke ọwa ka, kpa o jeeme nhne jaamasị nzi a.

³⁵ M nookwu nhne ka ma o bnanu anụ iru. M zá m noobnosni anụ. Kọvu m pioru m ma anụ mee nhne bụru ọma nụ ke kwesiri ekwesị, ma anụ gweru kpakara ẹhni anụ yisi n'ẹrnu Nyenwe aị, gharu o le anya n'aznụ.

³⁶ Nhne ke gbasiri ele kwekọtaru ọlulu, o bụru nụ badnụ ọbula whnurnu nụ o zá naakpakwa agwa nkari hne nyerinya o kweru o lụ zị, o bụru n'awha neezne, o luru a, be mége mmehie.

³⁷ Kọvu hne badnụ kpebiri n'ovu a, o zá nye naamagidne a nụ o jọlu nnwerne, o nwernu rikne gharu o lụ nnwerne wam, o mernu nhne kwesiri.

³⁸ Nye ke luru nnwerne mernu nhne ọma, kọvu nye ke luge rịa rịa mekakworu nụ nhne ọma.

³⁹ Nyerinya gbọru nzi zị n'iwu kpa nzi a zị bụdnụ, kọvu hne nzi a nwurnu, o zá iwu ji a ma o gbọru nzi berere. Kọvu o jọbu nye magwu Nyenwe aị.

⁴⁰ Kọvu n'echiche m, ovu jọoso a n'ọnu o bụru o daziri etekne. M che m nụ m nwernu m Enine Chiokike.

8

Wiri be jiri kwanu

renwu arịohna

¹ Nhne ke gbasiri wiri be jiri kwanu renwu arịohna, o bu n'ezi nụ, “Kpakara aị nwernu nhne ọmuma.” Kọvu nhne ọmuma neegweya badnụ vulizọ ẹhni a olu. Owhnun'anya noowulizọ badnụ olu lele ọro.

² O bụru nụ badnụ ọbula neeche nụ o magwu nhne, o máa kpa o kwesiri o mahja.

³ Kọvu Chiokike magwu ele whnurnu a n'anya.

⁴ Nhne gbasiri wiri be jiri kwanu renwu arịohna, a magwu nụ o zá nhne renwu ke ọwa ka bụ, kwnornu nụ chi berere zá, okwolem Chiokike kpoi.

⁵ O bụbedi nụ agida nhne be nookwu “chi” zị n'oligwe mọbu n'owa, o bu n'ezi nụ be zị agida “chi” nụ “nyenwe,”

⁶ kọvu hne a zị, otu Chiokike kpoi nye bụ Nda. O keru kpakara nhne, a zinu a bụdnụ. Otu Nyenwe aị Jizọsi Karaịsi zị, nye be hiri n'aka a ke kpakara nhne, nye a zị bụdnụ n'aka a.

⁷ Kõvu ọ bũo kpakara badnu magwu ezi oka ka. Agwna badnu yiri risi nu renwu du kitta, nga be riri wiri ki, be neeche nu be ji a kwanu renwu arjohna. Echiche ovu be za rikne, wiri be riri kparu be.

⁸ Kõvu wiri jeeme ai nu Chiokike ziri ndundu. A rila wiri, ọ za nhne o neegweme n'ehni ai, a ri wiri ọ za nhne o neeyisi ehni ai.

⁹ Kam kpararu, anya du anu eli, i kwekwadia oghere i nwernu nu ome kpa ọ masiri i mee ele za rikne n'okwnata ovu dnabna nu mmehie.

¹⁰ Ọ buru nu otu badnu ke mkpoma sile rikne whnurnu i hne i dazi eli neeri wiri n'oro renwu, kwnornu nu i nwernu "nhne omuma," o jeenye a mkpoma siri rikne o ri nhne be jiri kwanu renwu arjohna?

¹¹ Nnwọ nda wam za rikne, nye Karaisi kwnornu nu a nwuma, joowhu etekne kwnornu nu nhne omuma i.

¹² Kpam, anu mehieu nnwọ nda anu wam za rikne, lulu ovu a, anu mehielem Karaisi masi.

¹³ Ọ buru nu wiri me jeeri jeeme nnwọ nda m mmehie, m jeeri okpna rja rja kpa me zi budnu, ọ zi me mee nnwọ nda m dnabna nu rime mmehie.

9

Rikne nu ọnu ke nye izi

¹ Ọ bu nu m nwée m ehni sa? Me bũo nye izi sa? Me whnuge Jizosi Nyenwe ai anya? Anu bũo nhne me rnuhiaru n'ọnu Nyenwe ai?

² Ọ buru nu ele berere whnuge m lele nye izi, anu magwu nu m bu m nye izi. Anu bu nhne atu ke neegesi nu m bu m nye izi Nyenwe ai.

³ Nhne me naakanu ele nookwulu m bu ka,

⁴ a nwée rikne ri wiri mọbu nwọ mini n'ọnu ai sa?

⁵ A nwée rikne mee nhne ele izi berere neeme? A nwée rikne luru otu nnwọ rinya Karaisi lele nnwerne, o snornu ai zne izi lele ele izi ele berere nu rumu nne Nyenwe ai nu Pita?

⁶ Okwokola me nu Banabasi kwesiri ọ rnu ọnu si a ri wiri?

⁷ Ndaa nye ogwnu ke ọolu ogwnu hite n'iwai ke hi nu rekpa a whuya? Ndaa nye jorunu ekwu, ma o jeeri mkpuru hi nu rime ekwu a? Ndaa nye ọoznu aturnu ma ọ za ọonwo mini-rema aturnu a?

⁸ Me nookwu lele badnu etekne sa? Ọ bũo nhne Iwu ai kwuru sa?

⁹ Kwnornu nu be gbaru n'okwukwo Iwu Mozizi, "I knesni ọnu ehni ke ọozosna ikpa." Chiokike o nookwu nhne gbasiri ehni kpoi?

¹⁰ O kwuru nhne ka kwnornu ai. Be gbaru a n'okwukwo kwnornu ai, nu nye ọotu ọnu-eli nu nye ọozosna mkpuru nwernu okwnata ovu nu be jeeri mkpuru hiri n'ekwu.

¹¹ A kpasiri mkpuru ke enine nu rime anu, ọ bũo nhne kwesiri nu a joghuru mkpuru etekne n'ehni anu?

¹² Ọ buru nu ele berere nwernu rikne kpa hne anu zi, ọ bu ayila jeenwe rikne karukwo hne anu zi?

Kõvu a mege kpam, a nwernu ndidi nu kpakara nhne, ọ zi a bita nhne okpobi ọchi n'apna izi oma Karaisi.

¹³ Ọ bu nu anu ma nu ele ọornu ọnu n'oro Nso neeri nhne hi n'oro Nso whuya? Ọ bu nu anu ma masi nu ele ọornu ọnu n'oro arjohna neeri agwna nhne be jiri kwa arjohna?

¹⁴ Kpam masi, Chiokike nyernu iwu nu ele neezni izi oma be ri wiri hiri n'izi oma whuya.

¹⁵ Kọvu m mége m kpm. M zá m naagba ọkwukwo ka ma m nwernu rikne mee kpm. Kwnornu nù ọ jaakanù m mma me beru ọsno nwùma ẹnwu tna, ọ zá nye mee igwugwu m nhne etekne.

¹⁶ M nwée m rikne nyaa risi nù m neezni izi ọma. Mkpa naakpa m bụ o zni izi ọma. Owe! Ọvu ọnu zịnu m ọ bụru nù m znige m izi ọma.

¹⁷ Ọ bụ me gweru mkpọma m zni izi ọma ka, m nwernu m ọgwo ẹnwu, kọvu ọ bụru nù jíge m mkpọma m zni izi ọma, m nọornu ẹnwu Chiokike yisiri m n'aka.

¹⁸ Ọ bụru kpm, kịni bụ ọgwo ẹnwu m? Ọ bụ oghere o zni izi ọma gharu ọ whnu ọnu ahia, gharu ọ gweru rikne me nwernu n'izi ọma mee nhne.

¹⁹ Ọ bụ n'ezi nù m búo m ọhi nye ọbula, m nwernu m ẹnhi, kọvu m mernu m ẹnhi ọhi kpakara badnu ma m rihia m agida badnu n'iru.

²⁰ Hne ele Ju zi, m bụ m nye Ju ma m rihia m ele Ju. Hne ele zị nù mkpururu iwu zi, m ziri lele nù m zị m nù mkpururu iwu (ọ bụ n'ezi nù m zá m nù mkpururu iwu), ma m rihia m be n'iru.

²¹ Hne ele zá nù mkpururu iwu, m ziri lele nye zá nù mkpururu iwu (ọ bụ n'ezi nù m léwhule m iwu Chiokike anya, m zị nù mkpururu iwu Karaịsi), ma m rihia m be n'iru.

²² N'esilawuru ele zá rikne n'ọkwnata ovu, m nù m lele be, ma m rihia m be n'iru. M bụ m kpakara nhne hne ele badnu zi, m neeme kpa me nwernu rikne, ma m rihia m agwna be n'iru.

²³ M neeme kpakara nhne ka kwnornu izi ọma, ma m kehia m igwe nù ngọzi a.

²⁴ N'ezi ọka, anu magwu nù ele naagba ẹso naagba ẹso n'otu, kọvu otu badnu kpọi naagbahia nhne ẹso. Anu gba ẹso, ma anu gbahia nhne n'ẹso.

²⁵ Nye ọbula ke naagba ẹso jooknekwaru ẹnhi a nkarị, ma be kpusi a okpu ọ gbahiaru n'ẹso ke jáazị ọkwnukokwnu, kọvu a naagba ẹso ma a nwehia okpu-eze ke jaazị ọkwnukokwnu.

²⁶ Ka kpahiaru m zá m naagba ẹso lele nye ọ zá nhne o vu nù mkpọma, m zá m nọolo igbakwu lele nye nọolo ruwhere igbakwu.

²⁷ M naata ẹnhi m awhnwhnu ma m nwernu m rikne nęechi a, ọ zị me znikpa ele berere izi ọma, m bụru nye kwésile okpu-eze wam.

10

Ọ dọ aka nù nsñi gbasiri

okwa renwu

¹ Rumu nda m, m pioru m anu mahia, nhne mernu ele nda aị ọknani ele snornu Mozizi kpa be zị nù mkpururu erumeru, kpakara be gawheru Osimini Ihie.

² Be wuru be mini nù rime erumeru nù osimini ke neegesi nù be sno Mozizi.

³ Kpakara be riri otu wiri enine wam.

⁴ Kpakara be nwornu otu mini enine wam, kwnornu nù be nwornu mini enine ke hiri nù rugwu wam snornu be, rugwu wam bụ Karaịsi.

⁵ Kọvu nhne gbasiri agwna be soge Chiokike ovu n'onu, iznu be wusaru n'eli-ikpa wam.

⁶ Kpakara nhne ka bunnu aị nhne atụ ke nọodo aị aka nù nsñi. Nhne ojo gwnuko aị lele kpa ọ gwnuru be.

⁷ Anu kwakọ renwu lele kpa agwna be kwaru, lele kpa ọkwukwo nsọ kwuru, "Ele wam daziri eli ri nhne, nwọ nhne onwunwo, be lizo tne eri."

⁸ A mékọ ọyi, lele kpa agwna be mernu, nri pokwu lawuru nù pokwu ẹto nwu otu ọbochi.

⁹ A kpakọ Nyenwe aị iru, lele kpa agwna be mernu, agwọ tagbu be.

10 Anụ támu, lele kpa agwna be tamurnu, enine izi ke ẹnwu gbu be.

11 Kpakara nhne ka mernu be nụ lele nhne atụ, be gba be n'okwukwo nsọ, ma be buru nhne jeezni aị ezni, aị ele zị budnu n'okwukwo ọwa ka.

12 Nye ọbula ke neeche nụ o gwuzogwu kwem, ledu anya, ọ zị ọ dna.

13 Ọ zá ọrnurna ke vakwnusiri anụ ke vákwnusilele badnụ. Kọvu Chiokike kwesiri be kwnata a ovu, o jéekwe ọrnurna ke anụ nwée rikne gwuzoli vakwnusi anụ. Kọvu nga be naarna anụ ọrnurna, Chiokike jeenye anụ rikne o gwuzo, gbamanụ anụ apna anụ jeeji whụya nụ rime a.

14 Nhne atụ ele ka neegesi, ele me whnurnu n'anya, ma anụ ghanahoru ọkwa ẹnwu.

15 M nookwunu anụ ọka lele ele nwernu akoniche, anụ tulekọm nhne me nookwu.

16 Okiko Iriri Nsọ wam ke a nọtunu Chiokike mmamma, ọ bụo ọvnarna Karaisi nhne a neekeri nga a nọnwo nhne hi n'okiko wam? Brẹdi wam a naanyawa, a zá neekeri anọ-ẹhni Karaisi nga a neeri brẹdi wam?

17 Kwnornu nụ otu brẹdi zinu kpakara aị. Ọ bụ n'ezi nụ a zị agịda, kọvu a bụ otu anọ-ẹhni, a neeri otu brẹdi wam.

18 Anụ tule ele Izireli, ele neeri nhne be jiri kwa arịohna, neekerikọta nhne n'otu n'ọjo arịohna Chiokike.

19 Ndaa nhne me nookwu? Ọ bụ nụ ẹnwu mọbu wiri be kwanụ ẹnwu arịohna bụ nhne ọbula?

20 Ọza! Nhne me naakaa bụ nụ nhne ele naakwanụ ẹnwu kwaru arịohna bụ nhne be kwannu ele ẹnwu ojo. Ọ bụo Chiokike. M chịoge m anụ nụ ele ẹnwu ojo neekeri nhne n'otu.

21 Anụ jéenwe rikne nwọ okiko Nyenwe aị, nwọ kwno okiko ele ẹnwu ojo. Anụ jéenwe rikne ri wiri n'ikpechi Nyenwe aị, ri kwno n'ikpechi ẹnwu ojo.

22 Anụ noopio o mee Nyenwe aị kwno awụwa? A nwernu iknernema karu a sa?

23 “A nwernu rikne mee kpakara nhne,” kọvu ọ bụo kpakara nhne buru ọma. “A nwernu rikne mee kpakara nhne,” kọvu ọ bụo kpakara nhne nọwulizo badnụ olu lele ọro.

24 Ọ zá nye lebna anya nụ nhne ke a, kọvu nụ nhne ọma ke jeenyinu ele berere aka.

25 Anụ ri nhne ọbula be neere n'ahia, anụ sịkwa ajiji kwnornu mkpuru ovu anụ.

26 Ọkwukwo nsọ kwuru, “Chiokike nwe ọwa nụ kpakara nhne zị nụ rime a.”

27 Ọ buru nụ nye kwé ekwe sukwuru anụ ma anụ ri wiri, ọ masị anụ o zne, anụ ri nhne ọbula ọ bítaru nụ ruwhnu anụ, anụ sịkwa ajiji ọbula kwnornu mkpuru ovu anụ.

28 Kọvu ọ buru nụ otu badnụ kanu anụ, “Be jiri wiri ka kwanụ ẹnwu arịohna,” anụ riko wiri wam kwnornu nụ nye wam kannu anụ kpm, ma kwnornu masị mkpuru ovu.

29 Ọ bụo kwnornu mkpuru ovu anụ, kọvu mkpuru ovu nye berere wam. Ndaa kpa rikne me nwernu o mee nhne jiri gbasị mkpuru ovu nye berere?

30 Ọ buru nụ me ri wiri tūnu Chiokike mmamma, kịni mernu nye berere jaama m ikpe nụ wiri me tūnu mmamma?

31 Kọvu, nhne ọbula anụ neeme, anụ neeri wiri mọbu anụ nọnwo mini, anụ mee kpakara nhne kwnornu igwugwu Chiokike.

32 Anụ mékọ nye ọbula dna, mọbu nye Ju mọbu nye bụo nye Ju, mọbu ọgbako Chiokike,

³³ lele kpa me naagbalì o mee kpakara nhne jaamasì kpakara badnu. M zá m neeche nhne gbasìri nhne òma ke m, kòvu nhne òma agìda badnu ma be znòhia be.

11

¹ Anù snornu m lele kpa me noosno Karaìsi.

Okpukpe nù ogbako

Chiokike

² M naaja anù mma kwnornu nù anù neechenwanya m, naabìta kpakara nhne me znìrni anù.

³ Kìtina, m pioru m anù ghòhia nù Karaìsi bù risi nyerukna òbula, nzi bù risi nnwerne, Chiokike bù risi Karaìsi.

⁴ Nyerukna òbula ke neekpe okpukpe mòbu nòokpo okwo izi òma Chiokike kpusnime risi a, bù nhne iwhnerne nyee Karaìsi.

⁵ Nyerinya òbula ke neekpe okpukpe mòbu nòokpo okwo izi òma Chiokike, gbesa risi a anya, neeme risi a nhne iwhnerne, ò nù lele ò kòpuru rukeri-ize risi a.

⁶ Ò bùru nù nyerinya kpùsnìge risi a, ò kòma rukeri-ize a. Kòvu ò bù nhne iwhnerne nù nyerinya jòoko rukeri-ize a, o kpusi risi a.

⁷ Nyerukna kpùsni risi a kwnornu nù ò bù oyiyi ke neegesi igwugwu Chiokike. Kòvu nyerinya neegesi igwugwu ke nyerukna.

⁸ Kwnornu nù Chiokike híge nù nyerinya kpù nyerukna, kòvu hiri nù nyerukna kpù nyerinya.

⁹ Ò kpùge nyerukna kwnornu nyerinya, kòvu ò kpùru nyerinya kwnornu nyerukna.

¹⁰ Kam kpayarù, kwnornu ele enine izi, nyerinya kwesiri o kpusni risi a, ke neegesi ò zì nù mkpururu nzi a.

¹¹ Lele kpa bùdnu nù rime Nyenwe aì zì, nyerinya zì nyerukna mkpa, nyerukna zì masì nyerinya mkpa.

¹² Kwnornu kpa be kpùru nyerinya hite nù nyerukna, kpm masì, nyerinya mùrnù nyerukna. Kpakara nhne hí n'aka Chiokike va.

¹³ Anù kpekòm ma ò bùru òma nù nyerinya jeekpe okpukpe gbesa risi a anya.

¹⁴ Iwu okike kwuru nù nyerukna ke nwernu ogologo rukeri-ize bùnu a nhne iwhnerne.

¹⁵ Kòvu ò bùru nù nyerinya ke nwernu ogologo rukeri-ize, ò bù igwugwu a, kwnornu nù rukeri-ize a bù nhne Chiokike nyernu, o jeeji nookpusni risi a.

¹⁶ Kòvu ò bùru nù nye òbula kwége kpm, nhne me jaakaa bù, aì mòbu ogbako Chiokike nwéé omen'èli berere karù kpm.

Wiri Anyasnu Nyenwe aì

(Mat 26:26-29; Mak 14:22-25; Luk 22:14-20)

¹⁷ Gbasìri nhne ke a nookwu kìtina, m jáaja anù mma. Nhne anù neeme nù rime ogbako anù bù nhne ojo, ò bùò òma rìja rìja.

¹⁸ Ke mbòm, be kannù m nù agìda okewa zì n'esilawùru anù, m neekweru agwna a.

¹⁹ O dnornu m anya nù okewa jaazìri n'esilawùru anù ma nye zì snam whùya iwhne.

²⁰ Nga anù vakòtaru n'otu, anù váge o ri Wiri Anyasnu Nyenwe aì.

²¹ Kpa anù neeri, nye òbula neeri, ò zá nye neese ibne a. Kam kpayarù wiri nòogwnu agwna badnu nga manya noogbu ele berere.

²² Anụ nwée ọro, hne anụ jeeri wiri, nwọ manya? Anụ neeledna ọgbako Chiokike anya, kpasị ele nwée nhne iwhnerne? Ndaa nhne anụ pioru me kwu gbasiri nhne ka? Me ja anụ mma sa? Ọza! M jáaja anụ mma rịa rịa.

²³ M nahjaru m nhne me znirni anụ n'aka Nyenwe aị Jizọsi. N'abalị wam be reru a, Nyenwe aị Jizọsi gweruru brẹdi,

²⁴ tūnu Chiokike mmamma, nyawa a, kaa, “Ka bụ anọ-ẹhni m ke zīnu anụ, anụ neeme ka neechenwanya m.”

²⁵ Kpam masị, nga wiri anyasnu whemernu, o gweru okiko, kaa, “Ka bụ okiko ọgba-njọ-ẹhni ikne ke ọvnarna m. Nga ọbula anụ nọonwo a, anụ neeme ka neechenwanya m.”

²⁶ Kpa anụ neeri brẹdi ka, nọonwo okiko ka, anụ nookwusa ẹnwu Nyenwe aị tem ọ va.

²⁷ Ka neegesi nụ ọ bụru nụ nye ọbula ri brẹdi Nyenwe aị mọbu nwọ nhne hi n'okiko, kpa o kwésige, ikpe anọ-ẹhni Nyenwe aị nụ ọvnarna a naama a.

²⁸ Nye ọbula beru ọsno nyosnama ẹhni a sụ o ri brẹdi wam mọbu nwọ nhne hi n'okiko wam.

²⁹ Kwnornu nụ nye ọbula ke jeeri mọbu nwọ nhne hi n'okiko wam hne ọ máa anọ-ẹhni Nyenwe aị, neeri, nọonwo ikpe nụ risi a.

³⁰ Kam kpayarụ, agịda anụ zị nụ nrịria, agida anụ zá rikne, ele berere nwunam.

³¹ Ọ bụru a beru ọsno nyosnama ẹhni aị, Chiokike jéekpe aị ikpe.

³² Kọvu Nyenwe aị neekpe aị ikpe, naata aị awhnụwhnu, ma a gharụ o sno ele zị n'owa bụru ele ikpe marnụ.

³³ Rụmu nda m, nga anụ gbakọru n'otu neeri wiri Nyenwe aị, anụ sete ibne anụ.

³⁴ Ọ bụru nụ wiri nọogwnu nye ọbula, o ri wiri n'oro a, ọ zị ikpe Chiokike ma anụ kpa anụ gbakọru n'otu.

M jeemekwata nhne ke berere nga me varụ.

12

Nkesi ke Enine Nso

¹ Rụmu nda m, nhne gbasiri nkesi zị ọdo n'odo ke Enine Nso, m pioru m anụ mahia nhne gbasiri be.

² Anụ magwụ nụ nga anụ bụ ele naakwa rẹnwu ke dnarnụ mgbu, be duru anụ hie apna.

³ M neeme ma anụ mahia nụ ọ zá nye Enine Nso Chiokike noodu jeenwe rikne kaa, “Kọsna Jizọsi.” Ọ zá nye jeenwe rikne kaa nū, “Jizọsi bụ Nyenwe aị,” okwokọlam ma Enine Nso hiri n'ọnu a kwu kpam.

⁴ Agịda nkesi enine zị ọdo n'odo, kọvu otu Enine Nso.

⁵ Agịda apna be jeezne izi, kọvu otu Nyenwe aị.

⁶ Agida ẹrnu zị ọdo n'odo, kọvu otu Chiokike wam neenye rikne be jeeji nọornu ẹrnu.

⁷ Enine Nso nyernu badnụ ọbula nkesi ma ọ bụru mbnarna kpakara badnụ.

⁸ O nyernu otu badnụ izi akoniche, nyee nye berere izi ọghohia nhne hite n'otu Enine wam.

⁹ Otu Enine wam nyee nye berere ọkwata ovu, o nyee nye berere rikne ọ gwọ nrịria.

¹⁰ Enine wam masị nyee otu badnụ rikne ọ rnu ẹrnu ndu-ẹhni, nyee nye berere rikne ọ kpọ okwo izi oma, nyee nye berere rikne ọ mahia nhne zị ichne nū hne enine zị ichne ichne, nyee nye berere rikne o kwu ọka nū riro zị ichne ichne, nyee nye berere rikne ọ tūhnasna ikwu-ọnu.

11 Kọvu o bụ otu Enine wam nọornu kpakara nhne, o neenye badnụ ọbula nkesi zị ọdo n'ọdo lele kpa o jiri masị a.

12 Ełni badnụ bụ otu. Kọvu o nwernu agịda nhne zị ọdo n'ọdo ke knekọtaru a n'otu. O bụ masị kpa o zị n'anọ-ẹłni Karaịsi.

13 Kwnornu nụ be jiri otu Enine wụ aị mini bna n'otu anọ-ẹłni. A bụ ele Ju, ma a bụ ele bụo ele Ju, ọhi mọbu nye bụo ọhi, be mernu a nwọ otu Enine wam.

14 O bụo otu nhne zị n'ẹłni badnụ, be zị agịda.

15 O bụru nụ ọchi jaakaa, “Kwnornu nụ m bụla m aka, m bụla m nhne zị n'ẹłni,” kị jéeme a o gharụ o bụru nhne zị n'ẹłni badnụ.

16 O bụru nụ nsñi kaa, “Kwnornu nụ m bụla m anya, m bụla m nhne zị n'ẹłni,” kị jéeme a o gharụ o bụru nhne zị n'ẹłni badnụ.

17 O bụru nụ kpakara ẹłni bụ anya anya, ndaa kpa o jọonu nhne? O bụru nụ kpakara ẹłni bụ nsñi nsñi, ndaa kpa o jọonu ẹknarna nhne?

18 Kọvu Chiokike yisiri kpakara nhne zị n'ẹłni badnụ lele kpa o jiri masị a.

19 O bụru nụ kpakara be bụ otu nhne, ndaa hne ẹłni jaazị?

20 Kịtna, agịda nhne zị n'otu ẹłni badnụ.

21 Kam kpayarụ, anya jáakanụ aka, “I zá m mkpa.” Mọbu risi kanụ ọchi, “I zá m mkpa.”

22 N'ezị, a jéenwe rikne gwuzoli o bụru nụ nhne ke zị n'ẹłni ke a neeche nụ be zá rikne zıla.

23 Nhne ke zị n'ẹłni aị ke a neeche nụ be nwée igwugwu, bụ ke a neeledu anya gbasịri be, ele ke tų iwłnerne bụ ele ke a jı iwo nookpusni.

24 Ngeri ẹłni aị ke marnụ mma a zá neeledu a anya. Chiokike n'iwłuru a yisiri ẹłni aị n'otu, o nyernu nhne zị n'ẹłni ke nwée igwugwu, igwugwu ke kakwo.

25 Okewa kwésile o zị n'ẹłni, kọvu kpakara nhne zị ọdo n'ọdo n'ẹłni magwu nhne gbasịri ibne be.

26 O bụru n'otu nhne zị n'ẹłni nọowłnu awhnųwhnu, kpakara ele ke berere sno a whnų awhnųwhnu. O bụru be znarni otu, kpakara be sno a nwe ovu ọso n'ọnu.

27 Kpakara anụ bụ ẹłni Karaịsi, anụ n'otu n'otu bụ nhne zị n'ẹłni Karaịsi.

28 Chiokike bítaru kpakara nhne kpa o kwesiri n'ogbako a. O bítaru ke mbọm, ele izi, ke ẹbo, ele nọokpo okwo, ke ẹto, ele zni nhne, ele nọornu ẹrnu ndu-ẹłni sno be, nụ ele nwernu nkesi ọgwo nrịria, mọbu ele neeyinu ele berere aka, ele neechi ẹchi, nụ ele nookwu ọka nụ riro zị ọdo n'ọdo.

29 Kpakara be bụo ele izi, kpakara be bụo ele nọokpo okwo, mọbu ele neezni nhne. O bụo kpakara be nwernu rikne rnų ẹrnu ndu-ẹłni,

30 mọbu gwọ nrịria zị ọdo n'ọdo, mọbu kwu ọka nụ riro zị ọdo n'ọdo, mọbu o tųhnasna ikwu-ọnu.

31 Kọvu nkesi ke kakwo mma gwnų anụ lele wiri.

Kọvu me gesi anụ apna ke kakwo mma.

13

Ọwhnun'anya

1 O bụru m nwernu m rikne kwu ọka nụ riro ele badnụ nụ ke enine izi, kọvu m nwée m ọwhnun'anya, ọka m jọoburu ọgbugbo etekne mọbu igele warụ-awa.

2 O bụru m nwernu m nkesi ke ọkpo okwo izi ọma, nụ ọghohia kpakara nhne zị omimi, nụ kpakara nhne ọmuma, o bụru nụ m nwernu m kpakara ọkwnata ovu ke joovume rugwu, kọvu m nwée m ọwhnun'anya, o zá nhne me bụ.

³ Ọ bụru me nyee ele mboni kpakara nhne me nwernu, mọbu nyee ẹhni m be gba ẹkwunu, kọvu m nwée m ọwhnun'anya, ọ zá ọgwọ ẹrnu me jeekehia.

⁴ Ọwhnun'anya nwernu ọsnuta ovu, nụ ovu ọma. Ọwhnun'anya kwnó awuwa, o mée oknomokno, ọ kpá nganga.

⁵ Ọwhnun'anya mée nhne bụo ọma n'anya. O pío nhne ke aka ke a, o nwée ovu owe ẹhni. Ọwhnun'anya zá nọogwnu nhne ojo be mernu a.

⁶ Ọwhnun'anya zá nọonwudna nụ nhne ojo, kọvu ezi ọka neeme ovu ọso a n'ọnu.

⁷ Inwe zá nọogwu ọwhnun'anya. O neekweru kpakara nhne, o nwernu olile anya nụ kpakara nhne, o needi kpakara nhne.

⁸ Ọwhnun'anya zị ọkwukokwunu. Ọkpo okwo jeebi, riro zị ọdo n'ọdo jọokwusi. Ọ bụru ọghohia, be jaagawhe.

⁹ Ọghohia aị nụ ọkpo okwo aị zú ozu.

¹⁰ Nga nhne ke zuru ozu varu, nhne ke zúge ozu jaagawhe.

¹¹ Nga me bụ watakiri, m nookwu ọka lele watakiri, m naari ọriri lele watakiri, m ghohiaru m nhne lele watakiri, kọvu nga me sozuru nụ badnụ, m gweme kpakara agwa watakiri n'ẹhni m.

¹² Kwnornu nụ kịtna, a nọwhnu nhne nụ nyno ke nọotu ewheke, kọvu nga wam a jọwhnu ruwhnu nụ ruwhnu. Kịtna, m maam agwna nhne, nga wam m jaamakwo kpakara nhne lele kpa Chiokike magwụ m.

¹³ Kịtna, nhne ẹto ka zị, ọkwunata ovu, olile anya, nụ ọwhnun'anya. Kọvu ọwhnun'anya kakwo kpakara be.

14

Ọkpo okwo nụ riro ikne

¹ Anụ snornu apna ọwhnun'anya, nkesi ke Enine nọogwnu anụ lele wiri, ke kakwo ibne a, nkesi ke ọkpo okwo izi ọma.

² Nye nookwu ọka nụ riro zị ichne ichne zá nookwunu badnụ, kọvu Chiokike. Kwnornu nụ ọ zá nye nọoghohia nhne o nookwu, nhne o nookwu bụ nhne tugwaru otugwa hite nụ rikne Enine.

³ Kọvu nye nọokpo okwo izi ọma nookwunu ele badnụ ọka, noowulizọ ele badnụ olu lele ọro, neezni nhne, naakasi mkpọma.

⁴ Badnụ ke nookwu ọka nụ riro zị ichne ichne noowulizọ ẹhni a olu lele ọro, kọvu nye nọokpo okwo izi ọma noowulizọ ọgbako Chiokike olu lele ọro.

⁵ Ọ jaamasị m ọ bụru nụ kpakara anụ jookwu ọka nụ riro zị ichne ichne. Kọvu ọ ka mma, ọ bụru nụ kpakara anụ kpo okwo izi ọma Chiokike. Kwnornu nụ nye nọokpo okwo izi ọma Chiokike zị okne ọnu ahia kakwo nye nookwu ọka nụ riro ichne ichne, okwolem ma ọ zị nye jọotuhnasnanu ọgbako Chiokike nhne o nookwu, ma be wulizọ ọgbako Chiokike olu lele ọro.

⁶ Ọ bụru me vakwnusi anụ nookwu ọka nụ riro ichne ichne, mbnarna kịni nhne anụ jeenwe n'aka m, okwolem ma m nookwu nhne Chiokike kpumennu m mọbu nhne ọmuma mọbu ọkpo okwo izi ọma mọbu zni nhne?

⁷ Nhne ke nwée bụdnu lele opi mọbu ọbo, ọ zá nye jaamahia nhne ọ nọogwnu n'eri ọ bụru nụ be gbúgele a kpa ọ bụru ọma.

⁸ Ọ bụru nụ nye nọogbu ọkwodu gbúgele a nkarị, ọ zá nye jeejiknernu o zne ọgwunu.

⁹ Kpam masị, ọ bụru nụ i kwúkwala ọka nkarị, ọ zá nye jọoghohia nhne i nookwu, ọ bụru nụ i kwu ọka nụ riro zị ichne ichne. Ruwhere joovu ọka i.

¹⁰ Ọ bụ n'ezị n'agida ikwu-ọnu zị n'ọwa. Ọ zá ke nwée nhne ọ naakasi.

11 O bũru nũ m ghõhiage m nhne badnũ nookwu, m bũnu m nye wam nye ẽli berere, nye wam masĩ bũnu m nye ẽli berere.

12 O bũ masĩ kpa ọ zĩnu anũ. Hne nkesi ke Enine nõogwnu anũ, anũ gbalĩ nwehĩa masĩ nkesi ke jeewulizọ ọgbako Chiokike olu lele ọro.

13 Nye nookwu ọka nũ riro zĩ ichne ichne, kpe okpukpe ma ọ tũhnasna ikwu-ọnu a.

14 O bũru me kpe okpukpe kpa nũ riro zĩ ichne ichne, enine m neekpe, kọvu echiche m nwéẽ igwe nũ rime a.

15 Ndaa nhne me jeeme? M jeeji enine m nũ echiche m kpe okpukpe, m jeeji masĩ enine m nũ echiche m gwnũ eri.

16 Kpa ị naaznarnĩ Chiokike nũ rime enine, nye izne ke zĩ nũ rime ọgbako jéenwe rikne kwe Anĩm, kwnornu nũ o máa nhne i nookwu.

17 Ị nõotunu Chiokike mmamma nkari nkari, kọvu nhne i neeme zá noowulizọ nye wam olu lele ọro.

18 M nõotunu Chiokike mmamma kwnornu nũ m nookwu ọka nũ riro zĩ ichne ichne kakwo kpakara anũ.

19 Kọvu nũ rime ọgbako Chiokike, ọ bũru ọma me kwu mkpũru ọka isne ke ele badnũ jọoghohia, zni be nhne, karũ o kwu nri pokwu ọka ọ zá nye jọoghohia.

20 Rũmu nda m, anũ ghó rũmu takĩri nũ n'ọri anũ, kọvu anũ bũru rũmu takĩri nũ hne mmehie zĩ, anũ bũru dimkpa nũ ọghohia anũ.

21 Be gbarũ a n'ọkwukwo nsọ, kaa,

“M jeeji ikwu-ọnu ele ẽli berere,
kwunu ele ka ọka,
m jeeji masĩ mgbele-ọnu ele ẽli berere
kwunu ele ka ọka,

kọvu be kwéle o bnonu m nsnĩ.”

Ka bũ nhne Nyenwe aĩ kwuru.

22 Riro zĩ ichne ichne bũ nhne elekema ele kwé ekwe, ọ búo ke ele kweru ekwe. Okpo okwo izi ọma Chiokike bũ ke ele kweru ekwe, ọ búo ke ele kwé ekwe.

23 O bũru nũ kpakara ọgbako Chiokike gbakọ n'otu, kpakara anũ nookwu ọka nũ riro zĩ ichne ichne, ọ bũru ele izne mọbu ele kwé ekwe va n'esilawũru anũ, be jáakaa nũ kpakara anũ bũ ele ẹra?

24 Kọvu ọ bũru kpakara anũ nõokpo okwo izi ọma Chiokike, nye kwé ekwe mọbu nye izne va n'esilawũru anũ, be jọotu a mmehie a n'anya, kpakara nhne ọ nũru jaama a ikpe.

25 Nhne tugwaru otugwa ke zĩ n'ovu a jọowhnuya iwhe. O jaadna kpọ risi ẽli nyee Chiokike, kwuhĩa, “N'ezi ọka nũ Chiokike zĩ n'esilawũru anũ.”

Okpenu Chiokike

n'ahĩri n'ahĩri

26 Rũmu nda m, nhne me nookwu bũ ka, nga anũ gbakọru n'otu, anũ ji ọgwnu eri, anũ ji iznizni, nye berere jigwu nhne be kpumennu a, nye berere ji riro zĩ ichne ichne, nye berere nõotuhnasna nhne be nookwu. Kpakara nhne bũ ma be wũlizo ọgbako Chiokike olu lele ọro.

27 O bũru nye ọbula kwu ọka nũ riro zĩ ichne ichne, be jaazĩ badnũ lawũru, mọbu ke kakwo ẹto. Otu kwukwo, ibne a kwu, otu badnũ tũhnasna nhne be nookwu.

28 O bũru nũ ọ zá nye jọotuhnasna nhne be nookwu, nye wam nookwu nũ riro zĩ ichne ichne dazĩri bii, nye wam kwunu ẹhni a ọka, kwu masĩnu Chiokike ọka.

²⁹ Badnụ lawuru mọbu ẹto kpọ okwo izi ọma Chiokike, ele berere tule nhne be neezni.

³⁰ Kọvu ọ bụru nụ otu dazịgwu ẹli nụ rime ọgbako nwehjaru izi n'aka Chiokike, nye nookwu ọka daziri bii.

³¹ Kpakara anụ jeenwe rikne kpọ okwo izi ọma Chiokike otu n'otu, ma kpakara anụ mụhia nhne, kpakara anụ nwehja nkasi ovu.

³² Enine nye nọokpo okwo noobnonu nye nọokpo okwo nsni.

³³ Kwnornu nụ Chiokike bụo nye ẹyiriya, kọvu nye udno.

Lele kpa ọ zị nụ kpakara ọgbako Chiokike,

³⁴ ele rinya daziri bii nụ rime ọgbako Chiokike. Be kwú ọka, be bụo ele risi lele kpa Iwu kwuru.

³⁵ Ọ bụru nụ be pioru ọ mahia nhne ọbula, be sika nzi be n'oro. Ọ bụ nhne iwhnerne nụ nyerinya jookwu ọka nụ rime ọgbako Chiokike.

³⁶ Kini masi? Ikwu-ọnu Chiokike ọpanizoru nhne anụ zị sa? Mọbu ọ bụ anụ kpọi bụ ele ọ vakwnusiri?

³⁷ Ọ bụru nụ nye ọbula neeche nụ ọ bụ nye nọokpo okwo izi ọma, mọbu nye nwernu nkesi enine, nye wam marnu nụ nhne me naagbanu anụ n'okwukwo bụ nhne Nyenwe aị nyernu n'iwu.

³⁸ Nye bnóge nsni nụ nhne ka, anụ bnónu a nsni.

³⁹ Rụmu nda m, kam kpayaru, ọkpo okwo izi ọma Chiokike nọogwnu anụ lele wiri, anụ bnósi ele nookwu ọka nụ riro ichne ichne.

⁴⁰ Anụ gweru ovu duru ẹli mee kpakara nhne kwesiri n'apna bụru ọma, ma n'ahiri n'ahiri.

15

Olizọ n'ẹnwu Karaisi

¹ Kitna, rụmu nda m, m neechenwanyanụ anụ izi ọma wam me znirni anụ, ke anụ nahjaru, bụ ke anụ gwuzogwu n'olu a.

² Chiokike znohiaru anụ hite n'izi ọma ka, ọ bụru nụ anụ bita nhne me znirni anụ, okwolem ma anụ kweru n'etekne.

³ M nyernu m anụ nhne me nahjaru, ke zị okne mkpa, nụ Karaisi nwurnu kwnornu mmehie aị, lele kpa be gbaru a n'okwukwo nsọ.

⁴ Be liri a, Chiokike mernu o hi n'ẹnwu lizọ n'ọbochi ke ẹto, lele kpa be gbaru a n'okwukwo nsọ.

⁵ Ọ mernu Pita whnụ a anya, omekwo, ele izi nri nụ ẹbo wam whnụ a anya.

⁶ Omekwo, o mernu nhne nụ lele ele kakwo riwhu badnụ isne whnụ a anya otu mgba, ele bụ rụmu nda aị. Agwna be zị budsonu dū tna, kọvu agwna be dnarnu n'anyarna ẹnwu.

⁷ Omekwo, Jemisi whnụ a anya, nụ kpakara ele izi.

⁸ N'ipne-aznụ, o mernu m m whnụ a anya, me nye be murnu lele nnwọ ká aka.

⁹ M bụ m nye zikakworu matị n'esilawuru ele izi, m kwésile m be sukwu m nye izi, kwnornu nụ m mekparu m ọgbako Chiokike ẹhni.

¹⁰ Kọvu hite n'oru Chiokike, m bụ m nhne me bụ. Oru o nyernu m bụo n'etekne. Kọvu m doligburu m ẹhni m n'ernu kakwo kpakara ele izi, ọ bụ n'ezi nụ ọ bụo me nọornu, kọvu oru Chiokike nọornu ẹnru nụ rime m.

¹¹ Kam kpayaru, ọ bụ me, mọbu be, a znirni izi ọma, kam bụ nhne anụ kweru.

Olizọ n'ẹnwu ele

nwurnu ẹnwu

12 Ọ bụrụ n'ụzị ọma aị bụ n'ụzị Karaisi hiri n'ẹnwu lizọ, ndaa kpa agwna anụ naakaa n'ụzị ele nwururu ọnwu z'á neelizọ n'ẹnwu?

13 Ọ bụrụ n'ụzị ele nwururu ọnwu z'á neelizọ n'ẹnwu, o neegesi n'ụzị Karaisi híge n'ẹnwu lizọ.

14 Ọ bụrụ n'ụzị Karaisi híge n'ẹnwu lizọ, ịzị ọma a z'nirni an'ụzị b'ụzị nhne etekne, ọkwnata ovu an'ụzị b'ụzị masi nhne etekne.

15 T'ukwasi n'olu a, a b'ụzị ele akebe aghalaghala megidne Chiokike, a naagba akebe megidne Chiokike n'ụzị o mernu Karaisi hi n'ẹnwu lizọ, nye o méne o hi n'ẹnwu lizọ, ọ b'ụzị ele nwururu ọnwu jéelizọ n'ẹnwu.

16 Kwnornu n'ụzị ọ b'ụzị ele nwururu ọnwu jéelizọ n'ẹnwu, Karaisi híge n'ẹnwu lizọ.

17 Ọ bụrụ n'ụzị Karaisi híge n'ẹnwu lizọ, ọkwnata ovu an'ụzị b'ụzị nhne etekne, an'ụzị z'ị koriri n'ụzị mmehie an'ụzị.

18 Kam neegesi n'ụzị ele dnarn'ụzị n'anyarna ẹnwu b'ụzị ele kweru n'ụzị Karaisi whuru etekne.

19 Ọ b'ụzị n'ụzị okwok'lam n'ụzị b'udnu ka a z'ị b'ụzị hne a nwernu ọkwnata ovu n'ụzị Karaisi, a b'ụzị ele be kwesiri ọ d'onu obirizi kakwo kpakara ele wu n'ọwa.

20 N'ezị ọka, Chiokike mernu Karaisi hi n'ẹnwu lizọ, b'ụzị mkpuru mb'om ke ele nwururu ọnwu.

21 Kpa ẹnwu hiri n'aka badn'ụzị va, k'pam masi, olizọ n'ẹnwu hiri n'aka badn'ụzị va.

22 Kwnornu n'ụzị kpakara badn'ụzị nwururu ẹnwu n'ụzị rime Adam, k'pam masi, Chiokike jeeme kpakara badn'ụzị z'iri b'udnu n'ụzị rime Karaisi.

23 K'ovu nye ọbula n'ige ke a, Karaisi b'ụzị mkpuru mb'om, omekwo, kpakara ele kweru n'ụzị Karaisi nga ọ jaava.

24 Omekwo, okwukwo kpakara nhne jaava, nga Karaisi l'ugburu kpakara rikne, n'ụzị ele n'ẹchi ẹchi, n'ụzị kpakara iknerna, o jeenyewhete Chiokike Nda ẹli-eze a.

25 Kwnornu o jaachi tem ọ b'ita kpakara ele irno n'ụzị mkpururu ọchi a.

26 Nye irno ipne-azn'ụzị o joolulu b'ụzị ẹnwu.

27 Kwnornu n'ụzị okwukwo nsọ kwuru, “Chiokike b'itaru kpakara nhne n'ụzị mkpururu ọchi a.” A magw'ụzị Chiokike z'á n'esiawuru kpakara nhne ka, nye b'itaru kpakara nhne n'ụzị mkpururu Karaisi.

28 Nga kpakara nhne daz'iri n'ụzị mkpururu Karaisi, Karaisi jaadazi n'ụzị mkpururu nye wam b'itaru kpakara nhne n'ụzị mkpururu a, ma Chiokike b'uru nye n'ẹchi kpakara nhne.

29 Ọ b'uru n'ụzị ele nwururu ọnwu z'á neelizọ n'ẹnwu, mb'narna k'ini b'ụzị nhne ele be n'owu mini kwnornu ele nwururu ọnwu jeenwe? K'ini k'payaru be n'owu be mini kwnornu ele nwururu ọnwu?

30 Ndaa nhne mernu a neeze b'udnu ige ọbula?

31 M z'ị m n'onu ẹnwu kpakara ọbuchi. R'umu nda m, m nookwu ka kwnornu n'ụzị m j'i m an'ụzị naanya risi, an'ụzị z'ị n'ụzị rime Karaisi Jiz'osi Nyenwe aị.

32 Ọ b'uru lele badn'ụzị etekne me n'ụzị an'ohia ọjo luru ogw'ni n'Efes'osi, ndaa nhne me jeenweh'ia? Ọ b'uru n'ụzị ele nwururu ọnwu z'á neelizọ n'ẹnwu,

“Ngwa ma a ri, nw'ọ tna,
kwnornu ekile a j'onwu.”

33 An'ụzị kwé be duwhu an'ụzị. “Ele enyi ojo noolulu agwa ọma.”

34 Anya dno an'ụzị n'ụzị risi, an'ụzị mée mmehie. Agwna an'ụzị máa Chiokike. M nookwu ka ma iw'herne t'ụ an'ụzị.

35 Kọvu agwna anụ jaakaa, “Ndaa kpa ele nwurnu ọnwu jeelizo? Ndaa anọ-ẹhni be jeenwe?”

36 Jị nye iwahnirniwhno. Nga ị kpasiri mkpuru n'eli, o jóofu okwolem ma ọ beru ọsno nwụ.

37 Nhne ị kpasiri n'eli bụ mkpuru etekne, mkpuru ịkpa, mọbu mkpuru berere, ọ bụo isisi.

38 Chiokike jeenye mkpuru wam ẹhni ke masiri a. O neenye mkpuru ọbula ẹhni ke a.

39 Kpakara anọ-ẹhni bụo otu, badnụ nwernu anọ-ẹhni, anọhia nwernu anọ-ẹhni ke berere, ọnwu nwernu anọ-ẹhni ke berere, aznụ anọ-ẹhni berere.

40 Anọ-ẹhni ke oligwe zi, anọ-ẹhni ke ọwa zi masi, ọma mma ke oligwe zi, ọma mma ke ọwa zi masi.

41 Mma ke ẹhnam zi ichne, ẹnwa nwernu ọma mma ke a, mma ke mbọ zi ichne, mma ke mbọ zi ọdo n'ọdo.

42 Kpam masi bụ kpa olizo n'ẹnwu zi, anọ-ẹhni ke be kpasiri n'ẹnwu nwernu rikne ro oro, nga Chiokike gwelizo a, o jóoro oro.

43 Be kpasiri a n'iwhnerne, Chiokike gwelizo a n'igwugwu, be kpasiri a n'inwe ọgwugwu, Chiokike gwelizo a n'iknerna.

44 Be kpasiri a anọ-ẹhni etekne, Chiokike gwelizo a n'anọ-ẹhni ke enine. Anọ-ẹhni ke etekne zi, anọ-ẹhni ke enine zi masi.

45 Kwnornu be gbarụ n'okwukwo nsọ, “Adam badnụ mbom bụ badnụ ke zi budnu.” Kọvu Adam ke ipne-aznụ bụ Enine ke neenye budnu.

46 Anọ-ẹhni ke enine bége ọsno, kọvu anọ-ẹhni etekne, omekwo, ke enine sno a.

47 Adam ke mbom bụ rịzna ke ọwa, Adam ke ẹbo hi n'oligwe va.

48 Lele badnụ be jiri rịzna kpụ, bụ kpa ele ke rịzna bụ, ele ke oligwe nụ lele nye wam hi n'oligwe va.

49 Lele kpa a vuru oyiyi ke badnụ ke rịzna, kpam masi bụ kpa a joovuru ke oligwe lele badnụ wam hi n'oligwe va.

50 Rumu nda m, ka bụ nhne me nookwu, kwnornu anọ-ẹhni nụ ọvnarna jékehia ẹli-eze Chiokike. Nhne jọnwu ọnwu jékehia nhne jọnwu ọnwu.

51 Le, me kanụ anụ nhne miri emi, ọ bụo kpakara a jọnwu ẹnwu, kọvu be jaagbanwo kpakara a j,

52 n'ige matị, n'otu nsnabi anya, nga okwodu ipne-aznụ dnarnụ. Kwnornu nụ be jọgbu okwodu, ele nwurnu ọnwu jeelizo róge oro, be jaagbanwo a j.

53 Kwnornu nụ anọ-ẹhni ke jooro oro jooworu anọ-ẹhni ke jóoro oro, anọ-ẹhni ke jọnwu ẹnwu jooworu anọ-ẹhni ke jọnwu ẹnwu.

54 Nga anọ-ẹhni ke jooro oro wokparu anọ-ẹhni ke jóoro oro, anọ-ẹhni ke jọnwu ọnwu woru anọ-ẹhni ke jọnwu ọnwu, nhne be gbarụ n'okwukwo nsọ jeemezu, “Be megburu ẹnwu.”

55 “Enwu, ndaa hne mmeri ị zi?

Enwu, ndaa hne nhne ọgbugba ị zi?”

56 Nhne ọgbugba ẹnwu bụ mmehie, iknerna mmehie bụ iwu.

57 Kọvu a nọotunu Chiokike mmamma nye neenye a j mmeri hite nụ Nyenwe a j Jizọsi Karaịsi.

58 Rumu nda m, ele me whnurnu n'anya, anụ gwuzosi rikne, anụ kwéko be whome anụ, anụ gweru kpakara mkpoma anụ nọornu ẹnwu Nyenwe a j ige ọbula, hne anụ magwụ nụ ẹnwu anụ nụ rime Nyenwe a j jóowhu etekne.

16

*Otu iwai ke
rumu Chiokike*

¹ Gbasiri iwai be jootunu rumu Chiokike ke zi nu Judiya, anu mee kpa me kannu ogbako Chiokike ke zi nu Galasia.

² N'obochi mbom ke ikwezu, nye obula bita iwai ichne lele kpa o nwernu, o bitakwata a nkari ma anu zoma o tu iwai nga me jaava.

³ Nga me varu m jaagba okwukwo izi nyee ele anu hohiaru, m zizne be gwezne nkesi anu nu Jeruselem.

⁴ O buru nu o buru oma, me nu be joosno zne.

Oriasno Polu

⁵ Nga me zne zuru Masidonia, m jaavakwnusi anu, kwnornu m jeezne Masidonia.

⁶ Me nu anu jaadazi ige mati mobu tem okirika whe, ma anu yinu m aka m zne hne obula me jeezne.

⁷ M piole m o whnu anu ige mati, kovu m pioru m me nu anu daziri gbu okwnu, o buru nu Chiokike kwe.

⁸ Kovu m jaadazi hna nu Efesosi du obochi Pentikosi.

⁹ Kwnornu nu be gbamannu m okne onuhna ernu izi oma hna, kovu agida ele neemegidne m zi masi.

¹⁰ O buru nu Timoti va, anu kweko ogwnu tu a kpa o zi n'esilawuru anu, kwnornu nu o nornu ernu Nyenwe ai lele me.

¹¹ O za nye ledna a anya, anu yinu a aka ma o lizo izne a n'udno, vakwnusi m. M neele anya ya nu rumu nda ai.

¹² Nhne gbasiri nwene ai rukna Apolosi, m riasnornu m a agida ige ma ya nu rumu nda ai va lekasi anu, kovu o jiknene o va kitna. O jaava nga o nwehiaru oghere.

¹³ Anu sama anya anu, anu gwuzosi rikne n'okwnata ovu, ovu si anu rikne, anu gho ele dikne.

¹⁴ Anu gweru owhnun'anya nu kpakara ernu anu.

¹⁵ Anu magwu nu ele oro Stefanasi bu ele mbom ghoru ele Karaishi nu Akaya. Be ji kpakara nhne be nwernu nornu ele Chiokike ernu. M naariasno anu,

¹⁶ anu bita ehni anu nu mkpururu ele nu kpa nu nye obula ke ji mkpoma be snornu be nornu ernu.

¹⁷ Ovu sori m n'onu nga Stefanasi nu Fotunatosi nu Akaikeosi varu, be mesirni owu anu ke koru m.

¹⁸ Be vulizoru ovu m nu ovu anu masi. Ele nu kpa kwesiri be hnata be ama.

¹⁹ Ogbako Chiokike ke zi nu Esia neebekwu anu. Akwila nu Prisila nu ogbako Chiokike zi n'oro be ji rehna Nyenwe ai neebekwu anu k'agida.

²⁰ Kpakara rumu nda ele zi hna neebekwu anu. Anu bekwurita ibne anu lele rumu nda.

²¹ Mawa, Polu, ji aka m naagba obekwu ikwu ka.

²² Be vu nye obula ke whnuge Nyenwe ai n'anya onu. Nyenwe ai, vaa.

²³ Oru ke Nyenwe ai Jizosi dazinu anu.

²⁴ Owhnun'anya m nu rime Karaishi Jizosi dazinu kpakara anu.

**Ọkwukwo izi
ke Ẹbo
Pọlu gbaznenu
Ele Kọrinti
Nhne gbasiri ọkwukwo izi ka**

Ọkwukwo izi Pọlu gbaznenu ele Kọrinti ke ẹbo bụ ke Pọlu gbarụ nga ogbako Chiokike ke zị nụ Kọrinti nụ Pọlu zị nụ mkpa. Agwa ele zị nụ rime ogbako wam bnornu Pọlu nhne, kọvu Pọlu noopio ma ya nụ be mee udno.

Nụ rime nhne mbom Pọlu gbarụ n'ọkwukwo, o nookwu ọka nhne gbasiri ogbako Chiokike ke zị nụ Kọrinti, nọkowa nụ mkpoma nọso a n'ọnu k'agida kwnornu nụ be tũhnasarnu mkpoma. Ọ naariasno ogbako Chiokike gbalị gweru mkpoma be gweya nhne be jeekesi ele Karaịsi zị nụ Judiya. Nụ ipne-aznụ, Pọlu nọogoru ọnu a lele ọmama nye izi Karaịsi, megidne agwa ele kwuru ẹhni be ọmama ele izi. Be naakaa nụ Pọlu bụ nye izi aghalaghala.

Nhne zị n'ọkwukwo ka

Ọpanizo (1:1-11)

Pọlu nụ ogbako Chiokike zị nụ Kọrinti (1:12--7:16)

Nkesi be nyernu ogbako Chiokike zị nụ Judiya (8:1--9:15)

Pọlu gọru ọnu a lele nye izi (10:1--13:10)

Obekwu ikwu ipne-aznụ (13:11-14)

¹ Mawa Pọlu, nye izi Jizọsi Karaịsi lele kpa ọ masiri Chiokike, nụ nnwọ nda aị Timoti, gbaznenu ogbako Karaịsi ke zị nụ Kọrinti nụ kpakara ele ke Chiokike zị nụ kpakara Akaya ọkwukwo.

² Oru nụ udno ke Chiokike Nda aị nụ Nyenwe aị Jizọsi Karaịsi dazịnu anụ.

Pọlu nọotunu Chiokike

mmamma

³ Ọznarni zịnu Chiokike bụ Nda Nyenwe aị Jizọsi Karaịsi, Nda ke obirizi, Chiokike ke nkasi ovu,

⁴ nye naakasi aị ovu nụ rime kpakara awnhụwhnu aị, ma a nwernu rikne kasi ele berere zị n'awnhụwhnu ọbula ovu hite n'okasi ovu a nwehịaru n'aka Chiokike.

⁵ Lele kpa a snornu Karaịsi takọ agida awnhụwhnu a, ọ bụ masị kpa Karaịsi naakasi aị ovu k'agida.

⁶ Ọ buru nụ a zị nụ mkpa, ọ bụ ma be snuta ovu anụ, znọhia masị anụ. Ọkasi aị ovu bụ nkasi ovu anụ masị, ọkasi ovu wam nọornusi ẹrnu rikne neegwehịa ndidi nụ rime awnhụwhnu wam a nọowhnuzu.

⁷ Olile anya aị nū hne anụ zị, zị chīm chīm, kwnornu nū a maam nū kpa anū sno aị ta awnhụwhnu anū joosno masị aị nwe nkasi ovu.

⁸ A pioru anụ mahia nhne dnakwasiri aị n'Esia, nhne zị ogwnu ke dnakwasiri aị kakwo aị rikne, a nwéma olile anya budsonu.

⁹ A neeche nū be joogbu aị. Kọvu ka gesiri aị nū a kwésile ọ tũkwasi ẹhni aị mkpoma, kọvu a tũkwasi Chiokike ovu, nye neeme nye nwurnu ọnwu hi n'enuw lizo.

¹⁰ Ọ dọhiaru aị n'aka ẹnwu tũ ogwnu, nọdohia aị kọriri, a kwnataru ovu nū hne ọ zị nū ọ jaazi kọriri nọdohia aị,

11 kpa anụ zị neekpenu aị okpukpe. Agida ele badnụ jootunu Chiokike mmamma kwnornu nụ ruwhnu ọma o jeenye aị, ọ jaaza okpukpe agida ele badnụ.

Pọlu gbanwornu mmụma a

12 Ka bụ nhne a ji naanya risi, nhne mkpọma aị naagba akebne, a wuru bụdnu zị snam, zị masi nso ke hi n'aka Chiokike. Ọ bụo kpa akọniche ke badnụ piuru, kọvu hite n'oru ke Chiokike, a wuru bụdnu aị nụ rime ọwa, ke kakwo nụ hne anụ zị.

13 A gbála okwukwo nhne anụ jógwnuli mọbu jógghohiali, kọvu nhne anụ jógghohiali. M neele anya nụ anụ jógghohiazu a,

14 lele kpa anụ ghọhiaru aị matị, ma a kpa nganga kwnornu anụ, anụ kpa masi nganga kwnornu aị n'ọbochi Nyenwe aị.

15 Ka bụ olile anya me vu nụ mkpọma nụ mbom kpa me marnụ mmụma ọ va, ma anụ nwehịa ngọzi okpukpu lawuru.

16 M marnụ m mmụma ọ vakwnusi anụ kpa me neezne Masidonia nụ nga me jeehi Masidonia hiehna. Anụ znernu eyinu m aka m zne Judiya.

17 Nga me neeme ka, m mernu m a ewheke ewheke sa? M marnụ m mmụma kwnornu nhne anọ-ehni m piuru, ọ kaa, “Owe, owe” nụ “Óza, óza”?

18 Kọvu kpa Chiokike bụ nye ezi ọka, izi me znirni anụ bụo izi “Owe” nụ “Óza.”

19 Kwnornu nụ Jizọsi Karaịsi Nnwọ Chiokike nye Saịlasi nụ Timoti nụ me gbasaru n'esilawuru anụ bụo nye “Owe” nụ “Óza.” Kọvu kpakara nhne bụ “Owe” hne ọ zị.

20 Jizọsi neeji “Owe” neemezu kpakara mkwna Chiokike kweru. Hite nụ rime Jizọsi a naakaa, “Amim” neenye Chiokike igwugwu.

21 Ọ bụ Chiokike nye neeme aị nụ anụ gwuzosi rikne nụ rime Karaịsi, Chiokike jiri aka a hohia aị,

22 nye bniasiri aka nyenwe nụ risi aị, nye kesiri aị Enine Nso nụ rime mkpọma aị neemesi nhne ọ bitannu aị rikne.

23 M noosukwu Chiokike nye akebne m, ọ magwu mkpọma m, nhne mernu me vála Kōrinti bụ m gharu ọ bigbo anụ.

24 A zá neeme ehni aị lele nụ ọ bụ aị nwe anụ, ele naakanu anụ nhne anụ jeekweru. Tnụnuna, aị nụ anụ nọrnuko ọnu ma ovu so anụ n'ọnu. Anụ gwuzoru kwem n'okwnata mkpọma anụ.

2

1 Ka bụ nhne me kpebiri nụ mkpọma m, m jáavakwnusi anụ berere mee nhne joogbu anụ igbugbu.

2 Ọ bụru me mee nhne gbu anụ igbugbu, nyele jeeme ovu so m n'ọnu? Okwolem nye wam me mernu nhne gbu a igbugbu.

3 Kam kpayaru, me gbannu anụ okwukwo nụ mbom, ọ zị nga me varu, ele wam kwesiri o mee ovu so m n'ọnu mee m nhne gbu m igbugbu. Kwnornu nụ m maam nụ anụ joosno m nwudna.

4 M zị m n'awhnuwhnu k'agida kpa me ji igbugbu mkpọma nụ agida anyamini gbanu anụ okwukwo, ọ bụo ma o gbu anụ igbugbu, kọvu o gesi nụ m whnurnu m anụ n'anya k'agida.

Ogbarunu nye mmehie

5 Ọ bụru nụ nye ọbula mernu nhne igbugbu, o méne me kpọi, kọvu nhne gburu kpakara anụ igbugbu matị, me kwú k'agida.

6 Awhnuwhnu nye wam taru n'aka agida ele badnụ zulem.

⁷ Bikno, anụ gbarụnu a, kasi a mkpọma, ọ zị igbugbu a nyigbu a, mee mkpọma dna mba.

⁸ Anụ mee a ma ọ mahia nụ anụ whnuru a n'anya n'ezị.

⁹ Ka bụ nhne me kwno gbarụ anụ ọkwukwo, ma m mahia m ma anụ gwuzosiri rikne, noobno nsnị kpakara nhne me kannụ anụ.

¹⁰ Ọ bụru nụ anụ gbarụnu badnụ nhne o mernu, m gbarulam masị. M gbarulam, ọ bụru nụ ọ zị nhne ọbula ke zị nụ ọ gbarụnu, ka bụ nhne me mennu anụ nụ ruwhnu Karaịsi,

¹¹ ma Ekwensu gharu o megbu aị, kwnornu nụ a magwu kpakara aghigho a.

Mkpọma ọla mini Pọlu nụ Torasi

¹² Nga me vaduru Torasi o zni izi ọma Karaịsi, Nyenwe aị gbamannụ m ọnu-mgbo izi ọma.

¹³ Kọvu nụ enine m kwé ozukwa inwe kwnornu nụ m whnuna m nnwọ nda m Taịtosi, m ghasaru m be zne Masidonia.

Omegbu hite nụ Karaịsi

¹⁴ Kọvu Chiokike nwe kpakara mmamma, nye mernu a snornu Karaịsi tne eri omeri a. O ji aị mee ele badnụ mahia Karaịsi, nhne ke nụ lele ẹknarna ọma ke noozute penupe ọbula.

¹⁵ Kwnornu nụ a bụ nhne ẹknarna ọma Karaịsi ke neeznekwnusi Chiokike n'esilawuru ele be nọoznohia nụ ele noowhu owhu.

¹⁶ Nụ hne ele noowhu owhu zị, a bụ ẹknarna ẹnwu, hne ele be nọoznohia zị, a bụ ẹknarna bụdnu. Nyele jọrnuli ẹrnu ka hna rikne kpa?

¹⁷ A bụo ele ji izi ọma Chiokike nọozu ahia lele agida ele berere, kọvu a bụ ele ezi, nookwu ezi ọka Karaịsi nụ ruwhnu Chiokike lele ele Chiokike ziyaru.

3

Ele ẹrnu ọgba-njọ-ẹhni

ikne

¹ A naanya risi nụ rime ẹhni aị berere sa? A neeme lele ele berere, noopio ọkwukwo ọ kahia nhne a bụ ke a jeenye anụ, mọbu ke hi n'aka anụ?

² Anụ n'iwhuru anụ bụ ọkwukwo izi aị, be gbaru anụ nụ mkpọma aị ke ele badnụ magwu, nọogwnu masi.

³ Ka neegesi nụ anụ bụ ọkwukwo izi ke Karaịsi ke hi n'aka aị. Be jíle nki gba a n'olu rugwu, kọvu be ji Enine Chiokike zị bụdnu gbasị anụ n'anọ-ẹhni ke mkpọma.

⁴ Ka bụ okne ọtukwasi ovu aị nụ Chiokike hite nụ Karaịsi.

⁵ Ọ bụo nụ a nwernu rikne nụ rime aị ke a kwesiri ọ rnu ẹrnu ka, kọvu ozu ozu aị hi n'aka Chiokike va.

⁶ Chiokike mernu aị a bụru ele zuru ozu n'ẹrnu ọgba-njọ-ẹhni ikne, ọ bụo ke mkpuru ọkwukwo, kọvu ke enine, kwnornu nụ mkpuru ọkwukwo neegweya ẹnwu, kọvu enine neenye bụdnu.

Igwugwu ke ọgba-njọ-ẹhni

ikne

⁷ Ọ bụru nụ ẹrnu ke ẹnwu be gbakwasiri n'olu rugwu vuru igwugwu va, ke mernu rumu Izireli nwée rikne legidne Mozizi anya nụ ruwhnu, ọ bụ n'ezị nụ igwugwu a jaagawhe,

⁸ ndaa kpa igwugwu ke ẹrnu Enine jaahna?

⁹ Ọ bụrụ nū ẹrnu ke noovuya ẹnwu nwernu igwugwu, le kpa ẹrnu ke neegweya ome mma jaahna n'igwugwu karukwo.

¹⁰ N'ezì, nhne ke nwernu igwugwu nwéma igwugwu kwnornu nū nhne ke kakwo n'igwugwu whýaru iwhe.

¹¹ Ọ bụrụ nū nhne ke jaazì ige matì vu igwugwu, le kpa nhne ke jaazì ọkwnukokwnu jaahna n'igwugwu karukwo.

¹² Kwnornu nū a nwernu olile anya ke nū kpa, a nwernu ọnu rikne nookwu ọka.

¹³ A nū lele Mozizi nye jiri ikpe kpusni ruwgnu a ma ele Izirelì gharu ọ whnù okwukwo ogbu marna marna ke naagawhe agawhe.

¹⁴ Mkpọma be zì kọriri n'ọchichiri, tem dù tna. Ikpe wam be jiri kpusni zì kọriri nga be nọogwnu ogba-njọ-ẹhni ọknani. Be kpumene ikpe wam, Karaịsi kpọi nwernu rikne o kpume a.

¹⁵ Dù tna, ige ọbula be nọogwnu Iwu Mozizi, ikpe wam nookpusni mkpọma be.

¹⁶ Kọvu ige ọbula nye ọbula znekwnusiri Nyenwe aì, be jeegweme ikpe wam.

¹⁷ Nyenwe aì bụ Enine, hne ọbula Enine Nyenwe aì zì, badnù jeenwernu ẹhni a.

¹⁸ Kọvu kpakara aì, jì ruwgnu be jìle ikpe kpusni neele igwugwu ke Nyenwe aì lele nhne a nọowhnu nū nyno, a naagbanwo hite n'otu igwugwu bna n'igwugwu berere. Enine Nyenwe aì neeme nhne ka.

4

Ekwnu ke zì nū rime

ite rìzna

¹ Kam kpayarù, hne Chiokike nyernu aì ẹrnu ka hite n'obirizi a, a jéekwe inwe gwù aì.

² Tnùnuma, a sigbasiri kpakara nhne ke tugwaru otugwa ke tų iwheerne. A zá nọogho aghigho mọbu mee ikwu-ọnu Chiokike aghalaghala. A gwuzo nū ruwgnu Chiokike nookwu ezi ọka, neegesi ele badnù nū a bụ ele ezi ọka.

³ Ọ bụrụ nū be tugwaru izi ọma a nọokpo okwo a otugwa, ọ bụ n'anya ele noowhu owhu.

⁴ Chi ke ọwa ka mernu mkpọma ele ke kwé ekwe gba ọchichiri. O mernu be whnùna iwhe ke izi ọma nọomukwasi be, bụ izi ọma igwugwu Karaịsi, nye bụ oiyi ke Chiokike n'ezì.

⁵ Kwnornu nū a zá nọokponu ẹhni aì okwo, kọvu a nọokpo okwo Jizọsi Karaịsi bụ Nyenwe aì, aì n'iwheuru aì bụ ele izi anụ kwnornu Karaịsi.

⁶ Chiokike wam ke karù, "Iwhe mụ n'ọchichiri," bụ otu Chiokike wam ke mernu iwhe a mụkwasi nū mkpọma aì, ma a mụhia igwugwu Chiokike ke a nọowhnu nū ruwgnu Karaịsi.

⁷ A nwernu ẹkwnu ka nū rime ite rìzna, ke neegesi nū rikne ke kakwo rikne hi nū Chiokike, ọ búo nū rime aì.

⁸ Be naakpakna aì ẹhni n'apna ọbula, kọvu inwe zá nọogwu aì, a neenwe mkpọma lawuru, kọvu inwe zá nọogwu aì.

⁹ Ele irno naakpakna aì ẹhni, kọvu Chiokike ghásala aì etekne. Be mekasi aì ẹhni, kọvu a nwùna.

¹⁰ A vu n'ẹhni aì ẹnwu Jizọsi ige ọbula, ma bụdnù Jizọsi whýa iwhe nū rime aì.

¹¹ Aì ele zì bụdnù zì n'ọnu ẹnwu ige ọbula kwnornu Jizọsi, ma bụdnù a whýa iwhe n'anọ-ẹhni aì ke nọonwu ọnwu.

¹² Kam kpayarù, ẹnwu nọornu ẹrnu nū rime aì, kọvu bụdnù zì nū rime anụ.

¹³ Be gbarū n'òkwukwo nsò, kaa, "M kwuru m òka kwnornu nù m kweru m." A jì otu enine òkwunata oву wam kwu òka kwnornu nù a kweru ekwe.

¹⁴ A magwù nù Chiokike wam ke mernu Jizòsi hi n'ènwu lizò, jeeme a snornu Jizòsi hi n'ènwu lizò masì, mee aì nù anù gwuzoru nù ruwhnu a.

¹⁵ Kpakara nhne ka bù kwnornu anù, ma oru ke naabanù anù òba ònu agìda ele badnù, ma be tũnu Chiokike mmamma k'agìda, neenye a igwugwu.

¹⁶ Kam kpayarù, inwe zá nòogwu aì, ò bù n'èzi nù a naata èhni n'anò-èhni aì, kòvu badnù ke enine aì zì ikne ikne hite n'òbochi ò n'òbochi.

¹⁷ Awhnùwhnu matì ka a naata neegweyanù aì okne igwugwu ke zì òkwukokwnu ke kakwo kpakara awhnùwhnu.

¹⁸ A zá neele anya nhne a nòowhnu anya, kòvu nhne a whnù anya. Kwnornu nù nhne a nòowhnu anya zì ige matì, kòvu nhne a zá nòowhnu anya zì òkwukokwnu.

5

Oro aì n'oligwe

¹ A magwù nù ò bùru nù òro-èka ke òwa ka, ke bù èhni aì dnarnù, Chiokike wunnu aì òro berere n'oligwe ke jaadazigidne, ke be jìle aka badnù wu, ke jaazì tim tòm.

² Kam kpayarù, a nòosnu idne k'agìda, ò nòogwu aì ma a wuru nù rime òro aì ke zì n'oligwe,

³ ma a woru a lele iwo, a jóobu ele gba èto.

⁴ Hne a zì kòriri n'anò-èhni ka, a zì nòosnu idne nù rime awhnùwhnu, ò búo nù a piuru ò whòga n'anò-èhni ka, kòvu ma be wosi aì anò-èhni ke oligwe, ma Chiokike gbanwo anò-èhni aì ke nòonwu onwu nù anò-èhni ke zì òkwukokwnu.

⁵ Chiokike n'ìwhuru a kpùru aì ma a jìknernu ò gbanwo ka, o nyernu aì Enine a ma ò bùru nhne neemesi kpakara nhne jaava rikne.

⁶ Kam kpayarù, mkpòma siri aì rikne ige òbula. A mahìaru nù nga a zì n'òro aì n'anò-èhni, a zìla hne Chiokike zì.

⁷ Kwnornu nù a noowu búdnù hite n'òkwunata mkpòma, ò búo nù nhne anya nòowhnu.

⁸ Mkpòma siri aì rikne, ò jaamasì aì a whòga n'anò-èhni ka, wuru hne Nyenwe aì zì.

⁹ Ke kakwo, a piuru o mee nhne jaamasì Chiokike, ma a wu hne Nyenwe aì zì, mòbu a zì n'òwa ka.

¹⁰ Kwnornu nù kpakara aì joogwuzo nù ruwhnu ngadna ikpe Karaisì, ma nye òbula nahòru ògwo èrnu kpakara nhne a rnùru nga a zì búdnù, mòbu nhne òma mòbu nhne búo òma.

Badnù nù Chiokike

zìri n'udno

¹¹ Hne a mahìaru ò tũ ogwnu Chiokike, a naarjasno ele badnù be vakwnusi Chiokike. Chiokike mazuru aì, m neele anya nù anù mazuru aì masì n'èchiche anù.

¹² A zá naaja èhni aì n'anya anù berere, kòvu a neenye anù oghere ma anù gweru aì nyaa risi, ma anù mahìja nhne anù jaasa ele jì nhne be nòowhnu nù ruwhnu badnù naanya risi kakwo nhne zì nù mkpòma badnù.

¹³ Anù neeche nù a bù ele era naagba? Ò bù kwnornu Chiokike. Kòvu ò bùru nù a bù ele anya dnornu, ò bù kwnornu anù.

¹⁴ Òwhnun'anya Karaisì neeme a mee kpa a neeme. A magwù nù otu badnù nwùhianu kpakara badnù ènwu, ka gesirì nù kpakara badnù snornu a n'ènwu.

¹⁵ Ọ nwụhianu kpakara badnụ ẹnwu, ma ele zị bụdnụ gharu o wunu ẹhni be bụdnụ, kọvu wunu Nyenwe aị nye nwụhianu be ẹnwu, ke hiri n'ẹnwu lizọ masị.

¹⁶ A zá neele badnụ anya nụ ruwhnu lele kpa ele berere neele, ọ bụ n'ezi nụ ọ bụ kpa a leru Karaịsi nụ mbọm. Kọvu a zá neeme kpam kịtna.

¹⁷ Ọ bụru nụ nye ọbula zị nụ rime Karaịsi, ọ bụ nye be kpughariri ikne, nhne ọknani whelem, be gholam nhne ikne.

¹⁸ Kpakara nhne ka hi n'aka Chiokike va, nye hiteru nụ Karaịsi mee ma aị nụ ya ziri n'udno, nyee masị aị ẹrnu ma a mee ya nụ ele badnụ ziri n'udno.

¹⁹ Chiokike hiteru nụ Karaịsi neeme ma ya nụ kpakara ele badnụ ziri n'udno. Chiokike zá nọogwnu mmehie be megidne be. O nyernu aị ẹrnu a mee ya nụ ele badnụ ziri n'udno.

²⁰ A bụ ele naadnasni anya Karaịsi, Chiokike zị nụ rime aị naarijasno. A ji Karaịsi naarijasno anụ, anụ mee ma anụ nụ Chiokike ziri n'udno.

²¹ Karaịsi méne mmehie, kọvu Chiokike mernu a o bụru mmehie kwnornu aị, ma a hite nụ rime a kehia igwe nụ ome mma ke Chiokike.

6

¹ Lele ele be nụ Chiokike sno nọornu ẹrnu, a naarijasno anụ kwé oru Chiokike anụ nahjaru bụru nhne etekne.

² Ka bụ nhne Chiokike kwuru,
 “M nurnu m anụ n'ige o gesi anụ ruwhnu ọma,
 m yinu m anụ aka n'ọbochi ọznohia.”

Anụ bno nsni, kịtna bụ ige ọ nahọru ruwhnu ọma Chiokike, kịtna bụ ọbochi ọznohia.

³ A pióle badnụ ọbula piohia nhne ojo n'ẹrnu aị, kpayarụ a kwéle ọ bita nhne jọkọpobi badnụ ọchi n'ogodo apna.

⁴ Kọvu nụ kpakara nhne a neeme, a neegesi ẹhni aị lele ele ẹrnu Chiokike hite n'ọsnuta mkpọma nụ rime awhnụwhnu, nụ nhne siri rikne, nụ nhne igbugbu,

⁵ ma ọli nhne, ma nụ ọro ikelu, nụ mkpakpo, nụ ẹrnu rikne, ma nụ ọka anyarna abali, ma nụ ọgwnu wiri,

⁶ ma nụ ọzi rịchna, ma nụ nhne ọmuma, nụ ndidi, ma nụ ovu ọma, hite n'Enine Nso, n'ezi ọka ọwhnun'anya,

⁷ hite n'okwu ezi ọka nụ rikne Chiokike, ya nụ mgwna ọgwnu ke ome mma nụ akarikwnunga ma nụ akarita.

⁸ A nwernu ọson'anya agwna ige, agwna ige be ledna aị anya, agwna ige ele badnụ kpari aị, agwna ige be znarni aị. Be neeme aị ele aghalaghala, kọvu a bụ ele kwu ezi ọka.

⁹ A bụ ele be máa, kọvu kpakara ele badnụ magwụ aị. A nụ lele ele nọowu ọnwu, kọvu a zị kọriri bụdnụ, awhnụwhnu a naata nwée rikne gbu aị.

¹⁰ A bụ ele mkpọma só n'ọnu, kọvu a nwernu snarni, ele mboni, kọvu neeme ele berere ele eze. Ọ zá nhne a nwernu, kọvu kpakara nhne bụ ke aị.

¹¹ Anụ ele Kọrinti, a kpumernu mkpọma aị kwunu anụ ezi ọka.

¹² Anụ kpusnirni mkpọma anụ megidne aị, ọ bụo aị megidne anụ.

¹³ Anụ menu aị kpa a mennu anụ, m nookwu lele nụ anụ bụ rụmu m, anụ kpume mkpọma anụ.

*Ọdo aka nụ nsni
 gbasiri ele kwé ekwe*

¹⁴ Anụ nụ ele kwé ekwe knéọta ẹhni anụ n'otu. Kini bụ nhne ome mma nụ aruru-ẹli nwekọru? Ndaa ọzi n'otu ke iwhe n'ọchichiri nwekọru?

15 Mọbu ndaa nhne Karaịsi nụ Ekwensu neekeko? Kịni bụ nhne nye Karaịsi nụ nye kwé ekwe nwekoru n'otu?

16 Ndaa okwerikota ke Oro Nso Chiokike nụ renwu nwernu? Kwnornu nụ a bụ Oro Nso Chiokike ke zị bụdnu, lele kpa Chiokike kwuru,
“M joo bu be wuru, zne izne n'esilawuru be.

M joo bu Chiokike be,
be joo bu ele ke m.”

17 Kam kpayaru, “Anụ hi nụ rime be whuya, ziri ichne,
anụ kpátụ nhne zila richna aka,
m jaanabnanya anụ,” ka bụ nhne Nyenwe aị kwuru.

18 “M joo buru Nda anụ,
anụ joo buru rumu m rukna nụ rumu m rinya.
Ka bụ nhne Nyenwe aị ke Meli Nhne Dum kwuru.”

7

1 Ele me whnurnu n'anya, hne a nwernu kpakara mkwna ka, a mee ełni aị ma a ziri richna ma n'ano-ełni ma nụ rime enine, whoga nụ kpakara nhne ke neemeru emeru, ma a ziri nso kpm kpm noowu bụdnu ke nootu ogwnu Chiokike.

Ovu oso n'onu Pọlu

2 Anụ gweru aị kwnornu nụ o zá badnụ obula a mejoru, mọbu lulu, mọbu megbu n'apna obula.

3 Nhne me kwno nookwu ka bụo ma ikpe ma anụ, lele kpa me kwuru nụ mbom, anụ zị aị mkpa nụ mkpoma, ma a snornu anụ ziri bụdnu mọbu a snornu anụ nwụ enwu.

4 M tükwasiri m anụ mkpoma k'agida, m ji m anụ noolu onu. Anụ mernu mkpoma neesi m rikne, mkpoma nso m n'onu nụ rime awhnwhnu.

5 Nga a vaduru Masidonia, a nwée ozukwa inwe n'ano-ełni, be kpaknarnu aị ełni n'apna obula, ogwnu n'ederezi, ogwnu nụ mkpoma.

6 Kọvu Chiokike ke naakasi ele inwe gwuru mkpoma kasiri aị mkpoma nga Tajosi varu.

7 O bụo kwnornu nụ Tajosi varu kpọi, kọvu nkasi mkpoma anụ nyernu a. O kannu aị nhne gbasiri obirizi anụ, nụ nhne igbugbu nụ nhne gbasiri m meturu anụ nụ mkpoma. Ka mernu mkpoma so m n'onu k'agida.

8 O bụrubedi nụ okwukwo izi me gbaru vuteru anụ nhne igbugbu, m nwée m mkpoma lawuru nụ me gbaru a. Nụ mbom, o mernu m mkpoma lawuru, nga me whnurnu nụ okwukwo me gbaru vuteru anụ nhne igbugbu ige maị.

9 Kịna, mkpoma nso m n'onu, o bụo nụ m vuteru anụ nhne igbugbu, kọvu kwnornu nụ nhne igbugbu anụ mernu anụ tūmasna mkpoma. Chiokike jiri nhne igbugbu anụ rñu enu, ka neegesi nụ o zá nhne ojo a mernu anụ.

10 Kwnornu nụ nhne igbugbu ke Chiokike noodubna badnụ o tūmasna mkpoma dū oznohia, ka nwée mkpoma lawuru. Kọvu nhne igbugbu ke owa noodubna n'enwu.

11 Anụ le kpa nhne igbugbu ke Chiokike kpahjaru anụ jiknernu o goru onu anụ. Nhne ka kpahjaru ovu owe ełni, o ji anụ anya, o neerne anụ lele bekwu, o meturu anụ nụ mkpoma, anụ jiknernu o ta nye mmehie awhnwhnu. Anụ gesiri ełni anụ lele ele ikpe maña.

12 O bụ n'ezi nū me gbaru okwukwo izi wam, o bụo kwnornu nye mernu nhne o mọbu nye o mejoru. Kọvu m gbaru m ma anụ mahia nū ruwhnu Chiokike kpa anụ noobnonu aị nsñi.

13 Ka mernu mkpoma si aị rikne.

Ọ búo nù mkpọma siri aị rikne kpọi, Taịtosi mernu mkpọma sọ aị n'ọnu, kpa anụ mernu a ọ nwụdna nga ọ vakwnusiri anụ.

¹⁴ M ji m anụ noolu ọnu nù ruwħnu a. Anụ kpásìla m iwhnerne. A nookwunu anụ ezi ọka ige ọbula, kpam masị, a jiri Taịtosi luu ọnu nù ruwħnu anụ, anụ whnũrnu nù ọ bú ezi ọka.

¹⁵ Ka mernu ọwhnũn'anya o nwernu hne anụ zị si rikne, nga o neechenwanya anụ noobno nsnị, kpa anụ jiri ogwnu nù ọznu biri biri nabnanya a.

¹⁶ Mkpọma nọsọ m n'ọnu nù m nwernu rikne tũkwasi anụ mkpọma.

8

Nkesi ke nye Karaịsi

¹ Rũmu nda m, a piору ma anụ mahịa nhne Chiokike jiri oru a rnụ n'ogbako Chiokike ke zị nù Masidonia.

² Ọ bú n'ezì nù be gawheru agịda ọkpagbu, kọvu okne mkpọma ọsọ n'ọnu mernu be gweya agịda nkesi, ọ bú n'ezì nù be bú ele ọwa nyĩrni.

³ M naagbanụ be akebe nù be nyernu kpa be nwernu rikne, n'ezì, kakwo kpa be nwernu rikne, hite nù mkpọma be.

⁴ Be riasnosì aị rikne ma be nwernu oghere yisi aka be n'oyinu ele Chiokike ke zị nù Judiya aka.

⁵ Be mernu nhne a túla anya a, be beru ọsno gweru ẹhni be nyega Nyenwe aị, nyee kwno aị hite n'echiche Chiokike.

⁶ Kam kpayarụ, a riasno Taịtosi nye panịzoru ẹrnu ka, rnũrnu a zne nù ruwħnu mee anụ rnũzu ẹrnu ọwhnũn'anya ka.

⁷ Anụ nwernu kpakara nhne, ọkwnta oву, nù ikwu-ọnu, nù nhne ọmuma, nù ezi ọka zuru oзу nù ọwhnũn'anya anụ nwernu hne a zị. Anụ búru masị ele zuru oзу nù oru ke nkesi.

⁸ M zá m neenye anụ iwu. Kọvu m kannụ m anụ kpa ele berere nwernu mkpọma o kesi be nhne, ma m mahịa m ezi ọka ke ọwhnũn'anya anụ hite nù nhne anụ jeenye be.

⁹ Anụ magwụ oru ke Nyenwe aị Jizọsi Karaịsi, ọ bú n'ezì nù ọ bú nye eze, kọvu o mernu ẹhni a wọmboni kwnornu anụ, ma o mee anụ búru ele eze hite n'ọdna mboni a.

¹⁰ Ka bú ezni me neezni anụ, ọ jọoburu ọma ọ búru nù anụ rnũzne ẹrnu anụ panịzoru otu awħa wheru ewħe. Anụ bú ele mbọm panịzoru ẹrnu wam, ma ele mbọm jiknernu ọ rnụ a.

¹¹ Anụ zne nù ruwħnu nọornu a, rnũkwo a masị. Anụ zịri gnarnagnarna nù ọ rnũkwo ẹrnu wam hite nù nhne anụ nwernu, lele kpa ọ zị nga anụ marnụ mmụma a.

¹² Ọ búru nù anụ nwernu mkpọma nkesi, Chiokike jaanarnụ nkesi anụ hite nù nhne anụ nwernu, ọ búo hite nù nhne anụ nwée.

¹³ A zá nookwu ma ele berere nwedna inwe ozukwa inwe, anụ búru ele zị nù mkpa, kọvu ma nye ọbula hnata n'otu.

¹⁴ Kịtna, agịda nhne anụ nwernu anụ jeenye be nù mkpa be. Ige berere, be jeenwe nhne be jeenye anụ nù mkpa anụ, ma nye ọbula hnata n'otu.

¹⁵ Lele kpa be gbarụ a n'ọkwukwo nsọ,

“Nye chikataru agịda nwée kakwo nye wam ke chikataru matị, ke ọ chikataru zunnu a.”

Be ziznernu Taịtosi

Kọrinti

¹⁶ M nọotunu Chiokike mmamma nye yisiri nù mkpọma Taịtosi, nhne gbasịri anụ lele kpa ọ zị nù mkpọma m.

¹⁷ O kweruru, ọ b́o kwnornu ń a kanń a, kọvu o jiknenu hite ń mkpọma a ọ va.

¹⁸ A neeziya ya ń otu nnwọ nda ke nwernu igwugwu ń kpakara ọgbako Chiokike n'ọkpo okwo izi ọma.

¹⁹ Tụkwasi ń ka, ọgbako Chiokike hōhiaru a ma o snornu á vuru nkesi ka zne Judiya. Ernu ka neeny Nyenwe á igwugwu, neegesi ń a nwernu mkpọma o yisi aka n'ernu ka.

²⁰ A neeze ẹhni á ọ zị badń ọbula ma á ikpe kpa a neeke agida nkesi.

²¹ A naagbalí o mee nhne kwesiri ekwesi, ọ b́o n'anya Chiokike kpọi, kọvu ma n'anya ele badń.

²² A neeziya otu nnwọ nda berere yisinu be, b́ nye a kparú iru agida ige, whń ń a nwernu rikne kwnata a mkpọma. Ń olu ka, kítna, o jiknenu o yinu ań aka, ke kakwo kpa ọ tųkwasiri ań mkpọma.

²³ Nhne gbasiri Taiťosi, ọ b́ nye me ń a nọornu ẹrnu, neenyinu ań aka. Ŕumu nda ele ya ń be sno b́ ele dnasni anya ọgbako Chiokike, be b́ igwugwu Karaísi.

²⁴ Ań gesi be ọwhnun'anya ań ma kpakara ọgbako Chiokike whń nhne kpayarú a jiri ań luu ọnu n'ezi.

9

O yinu ele Karaísi aka

¹ Ọ ź mkpa ń me jaagbań ań ọkwukwo gbasiri o yinu ele Chiokike ele ź ń Judiya aka.

² M maam ń ań jiknenu o yinu be aka, m ji m ań lunu ele ź ń Masidonia ọnu. M kań m be ń ŕumu nda á ele ź ń Akaya jiknenu o yi aka hite n'awha ke wheru ewhe. Nga be ńrnu ń ań jiknenu o kesi nhne, mkpọma be kwnalizọru o mee kpam.

³ Kọvu m neeziya ŕumu nda ka, ma ọnu a jiri ań luu gharú ọ b́ nhne etekne. Lele kpa me kwuru, ań b́ta nhne nkesi ań,

⁴ Ọ ź ele Masidonia snornu m va whń ń ań jiknennune, ọ jọobunu á nhne iwhnerne, ke kakwo iwhnerne jọotu ań k'agida.

⁵ Kam kpayarú, me ŕasno ŕumu nda ele ka be beru ọsno va, ma be whń ań jaab́ta nkesi ań kweru mkwna ś me va. Ka jeegesi ń ań nyernu hite ń mkpọma ań, ọ b́o ń be kwnagidnenu ań.

⁶ Ań chenwanya ń nye kpasiri mkpuru matí jọoghohia mkpuru matí, nye wam ke kpasiri agida mkpuru jọoghohia agida mkpuru.

⁷ Nye ọbula nyee lele kpa o kpebiri ń mkpọma a, ọ b́o ń mkpọma lawuru kwnornu ń be karú be nyee. Chiokike whńrnu nye wam jiri mkpọma ọma a nyee n'anya.

⁸ Chiokike nwernu rikne o nyee ań karúkwọ kpa ọ ź ań mkpa, ma ań nwernu nhne kpakara ige, ń karúkwọ kpa ań jeeji o mee nhne b́ru ọma.

⁹ Lele kpa be gbarú a n'ọkwukwo nsọ, kaa,
 “O neenye ele mboni k'agida,
 ome mma a jaazi ọkwnukokwnu.”

¹⁰ Chiokike, nye neenye nye ẹrnu ẹkwu mkpuru ọkpukpa ń wiri ele badń jeeri, jeeme kpakara mkpuru ań so oso, ḿnya agida mkpuru hite ń nkesi ań nyernu hite ń mkpọma ọma ań.

¹¹ O jeeme ań ba agida ń kpakara nhne, ma ań b́ru ele jeekesi ele badń nhne ige ọbula, ke jeeme ele badń t́nu Chiokike mmamma kwnornu ań.

¹² Ẹrnu ọma ka anụ nọornu zá neeme ele Chiokike riji ruwho kpọi, kọvu o neeme ele badnụ nọotunu Chiokike mmamma k'agịda.

¹³ Lele kpa ẹrnu ọma ka neegesi nụ anụ bụ ele ezi ọka, ele badnụ jaaznarni Chiokike kwnornu nụ anụ noobno nsnị izi ọma Karaịsi ke anụ kwuhjaru, anụ neeji mkpọma ọma neekesi be nụ ele berere nhne.

¹⁴ Be jeeji mkpọma ọwhnun'anya be kpenu anụ okpukpe kwnornu oru Chiokike ke zị agịda hne anụ zị.

¹⁵ Ngwa ma a tũnu Chiokike mmamma kwnornu nkesi a ke ọnu jọkowali.

10

Pọlu ghoru ọnu ẹrnu a

¹ Mawa Pọlu, naarjasno anụ, me nye be karu nụ m bụ m nye mési rikne nga me zị nụ ruwhnu anụ, kọvu nye nwernu anya rikne hne anụ zịla. M ji m ọzi wọhnerne nụ mkpọma ọma Karaịsi, naarjasno anụ, anụ bikno,

² anụ méé m, m bụru nye anya rikne hne anụ zị nga me varu, kwnornu nụ m nwernu m rikne nwe anya rikne n'ẹhni ele nookwu nụ a noowu bũdnu lele kpa ele ọwa noowu.

³ Ọ bụ n'ezi nụ a zị n'ọwa, kọvu a zá nọolu ọgwnu lele kpa ele ọwa nọolu.

⁴ Kwnornu nụ mgwna ọgwnu aị bũo ke badnụ, kọvu ọ zị rikne nụ Chiokike ke naakwnadna hne be wusiri rikne. A naakwnadna kpakara agirigo

⁵ nụ kpakara nhne ke noovulizo ẹhni a olu megidne ọmahia Chiokike, a nọodoru kpakara echiche n'ọgwnu mee be bnonu Karaịsi nsnị.

⁶ Nga anụ ghoru ele bnozuru nsnị, a jeejiknenu ọ ta kpakara nye ọbula ke zá noobno nsnị awhnũwhnu.

⁷ Anụ neele kpakara nhne anya n'olu kpọi. Ọ zị nye ọbula n'esilawuru anụ ke neeche nụ ọ bụ nye Karaịsi? Nye wam che kwno echiche, kwnornu nụ a bụ ele Karaịsi lele nye wam.

⁸ Ọ bũrubi nụ me gweru rikne Nyenwe aị nyernu aị mee oknomokno k'agịda, iwħnerne jọotu m. Nyenwe aị nyernu aị rikne o wulizo anụ olu lele ọro, ọ bũo rikne ọ kwnadna anụ akwnadna.

⁹ M pıole m o ji ọkwukwo izi me gbannu anụ kpasị anụ ọgwnu.

¹⁰ Otu badnụ jaakaa, “Ọkwukwo Pọlu naagba siri rikne, nọotu ọgwnu, kọvu, nga aị nụ a ziri, o nwée rikne, ikwu-ọnu a bụ nhne etekne.”

¹¹ Nye wam mahja nụ ọ zá nhne zị ichne nụ nhne a gbaru n'ọkwukwo nga a zị ikere nụ nhne a jeeme nga aị nụ anụ zị.

¹² Kwnornu nụ a zá nọogwnu ẹhni aị n'esilawuru ele ji ẹhni be nọotu nhne zị olu k'agịda. Ele ji ẹhni be nọotunu n'ẹhni be, neekpe ẹhni be ikpe n'iwu ke be nyernu, bụ ele nwée akoniche.

¹³ Kọvu nụ oknomokno aị zá neewhe hne a nwernu rikne, oknomokno aị bụ n'ẹrnu Chiokike nyernu aị, bụ ke dũru nụ hne anụ zị.

¹⁴ Hne ọ bụ nụ ẹrnu aị zị n'esilawuru anụ, a gáwhele a. A vuru izi ọma Karaịsi vakwnusi anụ.

¹⁵ A zá neeji ẹrnu ele berere rnũrnu naanya risi. Ẹrnu kam wheru hne Chiokike nyernu. Kọvu a neele anya nụ ọkwnata mkpọma anụ joooso oso, ma a nwe rikne rnũ agịda ẹrnu n'esilawuru anụ dũ hne Chiokike nyernu aị.

¹⁶ Nga wam, a jeenwe rikne kpọ okwo izi ọma nụ mba berere whe anụ. Kọvu a jéji ẹrnu ele berere rnũrnu nyaa risi.

¹⁷ Lele kpa ọkwukwo nsọ kwuru, “Nye ọbula ke jeeme oknomokno, o mee oknomokno nụ nhne Nyenwe aị rnũrnu.”

¹⁸ Kwnornu nū nye naaja ẹhni a mma bụ nhne etekne, kọvu nye wam Nyenwe aị naaja mma bụ nhne.

11

Polu nū ele izi aghalaghala

¹ Ọ jaamasị m ọ bụru nū anụ jeenwe rikne nagidne iwahnirniwhno m, bikno, anụ gweru m.

² Mkpọma m zị nū hne anụ zị lele Chiokike, anụ nū lele nyerinya máa nyerukna zị snam me kwere ọ nịsi otu badnụ, ke bụ Karaịsi.

³ Kọvu ogwnu nọotu m nū be joolulu mkpọma anụ, lele kpa agwọ wam jiri aghigho rnawhu Ivu, mee anụ gharu o gweru kpakara mkpọma anụ kpenu Karaịsi.

⁴ Kwnornu nū anụ jiri ẹso nahọru nye wam ke znirni anụ Jizọsi berere bụo Jizọsi ke a znirni anụ, nū enine berere nū izi ọma berere ke bụo ke a znirni anụ.

⁵ Kọvu ọ bụo nū m zị m matị kakwo ele izi ka anụ kaa nū be ka m mma.

⁶ Nyele má, m máam kpa be kwu ọka sọ n'ọnu, kọvu m magwụ m nhne, a mernu ka whuya iwhe hne anụ zị ige ọbula ma nū ọnodi ọbula.

⁷ M náge m anụ nhne ọbula nga me znirni anụ izi ọma Chiokike, m gwednarnū m ẹhni m ẹli ma anụ bụru ele be gwelizọru olu. Kị ọ bụ nhne ojo me mernu sa?

⁸ M nahịaru m ọgbako Chiokike berere nhne me jiri nọornu ẹrnu n'esilawuru anụ.

⁹ Ige me nū anụ zị, m kpáknage m anụ ẹhni nū iwai nga me zị nū mkpa, rụmu nda ele hi nū Masidonia va gweyaru kpakara nhne zị m mkpa. Lele kpa me neeme, m jọbu ivu nyee anụ tna mọbu ekile.

¹⁰ Hite n'ezi ọka Karaịsi ke zị nū rime m, ọ zá badnụ ọbula ke zị n'Akaya jeenwe rikne kpusni ọnu m, kpa me naanya risi.

¹¹ Ndaa nhne me jiri kwu kpa? Me whnúge anụ n'anya sa? Chiokike magwụ nū m whnurnu m anụ n'anya.

¹² M jaazi kọriri neeme kpa me neeme, ma ele izi ka gharu o nwe oghere be noopio gweru luu ọnu, kaa nū be nū aị neeme otu nhne.

¹³ Be bụ ele izi aghalaghala, be bụo ezi, be ji ẹrnu be naagha ọgha, ma be nū lele ele izi Karaịsi n'ezi.

¹⁴ O jí anụ anya, Setani n'iwuru a gbanwornu ẹhni a lele enine izi ke iwhe.

¹⁵ Ọ bụo okne nhne ọ bụru nū ele ẹrnu a gbanwornu ẹhni be ma be nū lele ele ẹrnu ọme mma. Be jeeji aka ẹrnu be kwu be ọgwo ẹrnu.

Awhnūwhnu Polu lele nye izi Karaịsi

¹⁶ M nookwu kwno a berere, ọ zá nye kwu m nye iwahnirniwhno. Ọ bụru nū ọ bụ nhne me bụ, anụ gweru m kpa, ma m gweru m nhne matị luu ọnu.

¹⁷ Nhne me nookwu kịna bụo nhne Nyenwe aị piuru me kwu, ke gbasiri olu ọnu ka, m nookwu lele nye iwahnirniwhno.

¹⁸ Agịda ele badnụ noolu ọnu lele kpa ele badnụ noolu, m jeeme kpa.

¹⁹ Anụ bụ ele ji ọvu ọso n'ọnu nagidne ele iwahnirniwhno, ọ bụ n'ezi nū anụ bụ ele nwernu akoniche.

²⁰ Anụ nagidneru ele mernu anụ lele ọhi, nahọru anụ nhne, kwnaghari anụ, gwuzote ẹhni a, gbọ anụ aka nū nti.

²¹ Ka nọotu m iwernerne nū a nwée rikne mee anụ kpa.

Kovu o buri nu nye obula luu onu nhne obula, m jeeme masi kpm. M nookwu lele nye iwhnirniwhno.

²² Be bu ele Hiburu? M bu m masi. Be bu ele Izireli? M bu m masi. Be bu ele hi n'avnrnu Eberham? M bu m masi.

²³ Be bu ele ernu Karaisi? Era naagba m sa? M bu m nye ernu Karaisi kakwo be. M nornu ernu kakwo be. M lala m ikelu agida ige kakwo be, be pnjarnu m nhne k'agida kakwo be, agida ige o gwarnu mati m nwu.

²⁴ Mgba isne ele Ju pnjarnu m nri eto nu tolu onu mbinibini.

²⁵ Ele Rom liri m isisi mgba eto, be turu m akaworugwu otu mgba, ogbo me zi nu rime a kpuru mgba eto, m daziri m nu rime mini iwhnehnne nu abali.

²⁶ Kpa me neeze izne ige obula, m neeze budnu nu rime mini, ma n'aka ele buznu, m neeze budnu n'aka ele Ju ma n'aka ele buo ele Ju. Nhne oze budnu nu rime eli-ohna, ma nu rime eli-ikpa, neeze budnu n'okne abaji, neeze budnu n'aka rumu nda aghalaghala.

²⁷ M nornu ernu, nodoli ndoli, ma n'oka anyarna abali, ma wiri ogwnugwu nu akpiri okpo bekwnu, m dazila m agida ige nwée wiri o riri, ma nu iyi otutu, m nwée m iwo o kpusni eto.

²⁸ Be gweme kpakara nhne ka, nhne naakpa m kpakara obochi bu nhne gbasiri ogbako Chiokike.

²⁹ Ndaa nye rikne gwuru ke rikne gwulam? Ndaa nye dnabnarnu nu mmehie ke mkpoma lala m mini, neerne m bekwnu?

³⁰ O buri nhne be luu onu, m jeeji kpakara nhne neegesi nu m bu nye nwée rikne noolu onu.

³¹ Chiokike nu Nda Nyenwe ai Jizosi, nye nwe onzarni okwnukokwnu, magwu nu m nookwu ezi oka.

³² Nga me zi nu Damasikosi, nye neechi eli, nye zi nu mkpururu Eze Aratasi, bitaru ele neese onu-mgbo eli-ohna, be nwudne m.

³³ Kovu be yisiri m nu rime nkita garu n'onunu zi nu mkpo eli-ohna kwuhala m n'eli a, o bu kpa me jiri gbawhunahoru a.

12

Owhnurninya Polu

¹ M joolu onu, o bu n'ezi nu o za nhne zi nu rime a. Kovu m jookwu oka gbasiri nhne me whnrnu nu nhne Nyenwe ai kpumennu m.

² M maam otu nye Karaisi nri nu awha eno wheru ewhe, nye be gwelizoru zne oligwe k'eto. (O buri nu o bu n'anog-ehni mibu o buo n'anog-ehni, m maam, Chiokike kpai ma.

³ Berere, m maam ma o bu n'anog-ehni ma o buo n'anog-ehni, Chiokike kpai ma.) Nhne me magwu bu nu

⁴ be gwelizoru badnu ka zne Paradasi. O nrnu nhne ke be jagbali n'okwukwo, nhne onu badnu jeenwe rikne kwu.

⁵ M jeeji nyerukna ka noolu onu, m jeeji ehni m noolu onu, okwolem nhne neegesi nu m bu m nye nwée rikne.

⁶ O buri nu me luu onu m jobu nye iwhnirniwhno, kwnornu nu m nookwu ezi oka. Kovu m joolu onu, o jaamasai m badnu obula gweru m kakwo kpa o gweruru m hite nu nhne o whnrnu me mernu nu ke o nrnu me kwuru.

⁷ Lele kpa o buo oma me vulizo ehni m olu kwnornu okne nhne me whnrnu, be nyernu m nhne igbugbu n'ehni m. O bu nye izi ke Setani, ma o kpakna m ehni ma m gharu m o luu onu.

⁸ M rioru m Nyenwe ai nhne gbasiri a mgba eto, ma o gweme a n'ehni m.

⁹ Ka bụ nhne ọ saru m, “Oru m zunnem ji, iknernema m zuru ozu nga i nwée rikne.” Kam kpayaru, mkpoma nṅoso m n’onu me luu onu nu m nwée m rikne, ma rikne Karaịsi whuya iwhe nu rime m.

¹⁰ Kam kpayaru, m bụ m nye nwée rikne. Ele badnu naakpasị m iwheerne, be ta m awhnuwhnu, be kpagburu m. Kpakara nhne igbugbu me gawheru kwnornu Karaịsi jiri m ruwho. Nga me nwée rikne, iknernema zi m n’ehni.

Ele Kōrinti meturu Polu nu mkpoma

¹¹ Anu mernu m mee lele nye iwheirniwhno. Anu bụ ele kwesiri o kwu nhne oma gbasiri m, kwnornu nu ele izi anu wam, ke anu kaa nu be ka m mma, béle m osno. O bụ n’ezi nu ọ zá nhne me bụ.

¹² Kwnornu n’ezi, nhne neegesi nhne nye izi whuyaru iwhe n’esilawuru anu. Be bụ ọnu elekema, nu ọnu ndu-ehni nu ọnu rikne zi ọdo nu ọdo me jiri ndidi nru.

¹³ Ndaa nhne me mernu ọgbako Chiokike ele berere ke me méne hne anu zi? O bụ nu m kwéle m ọ buru nhne ivu rinya hne anu zi? Anu gbarunu m nhne ojo ka.

¹⁴ Ka jọobu mgba ọto me jiknernu ọ vakwnusi anu. M jọoburu ivu rinya hne anu zi. Anu zi m mkpa, ọ búo nhne anu nwernu. O búo rumu naakpabitanu ele murnu be ọkwu, kovu ele nda nu nne naakpabitanu rumu be ọkwu.

¹⁵ O jaamasị m o nyega anu nhne me nwernu. Owe! M jeenye iwheuru m nu risi anu ma m yisinu m anu aka. Ka o jeeme anu bó whnu m n’anya, lele kpa me whnurnu anu n’anya k’agida?

¹⁶ Anu jeekweru, nu m búo m ivu rinya nyee anu. Hne me bụ nye aghigho, m ji m aghigho nwudne anu.

¹⁷ Ndaa? Ele me ziyannu anu, m jiri be nahoru anu nhne sa?

¹⁸ M riasornu m Taịtosi ọ va, ya nu nye Karaịsi berere, anu jaakaa nu Taịtosi nahoru anu nhne? Me nu ya a jile otu enine mee nhne lele nu a bụ otu badnu?

¹⁹ Anu neche nu a noopio ọ goru ehni ai nu hne anu zi? Óza! A nookwu oka nu ruwhnu Chiokike lele ele Karaịsi, kpakara nhne a neeme bụ ma anu buru ele zi kwem lele ele a whnurnu n’anya.

²⁰ Ogwnu ọotu m nu me vadu n’esilawuru anu, m jọowhnu nu anu zi ichne, ke búo nhne me leru anya a. Anu jọowhnu masi nu m zi m ichne, ke búo nhne anu leru anya a. Ogwnu ọotu m nu m jọowhnu oknorno nu okwno-awuwa, mkpoma bekwu nu okewa, onu-ojo, izno, oknomokno nu mkpakpo.

²¹ Ogwnu ọotu m nu me va berere nu Chiokike m jeegwedna m eli nu ruwhnu anu, m jaakwa ọkwu kwnornu agida ele mernu mmehie ke kwéle ọ tūhnasna, hite nu nhne zá rịchna be mernu, ke bụ ome ọyi n’apna tu iwheerne.

13

Ọdo aka nu nsni ipne-aznu

¹ Ka jọobu mgba ọto me naava lekasi anu. “Kpakara nhne be bnornu badnu, jeenweriri ele akebe lawuru mọbu ọto,” lele kpa ọkwukwo nsọ kwuru.

² Lele kpa me kannu anu nga me varu ke mgba lawuru, ele mehieru n’ige wheru ewhe, nu kpakara ele berere, m nookwu a berere kpa me zi ikere, me va kwno, kpakara be jaata awhnuwhnu mmehie be.

³ Hne anu noopio nhne ke neegesi nu Karaịsi ji m nookwu oka, ọ búo nye nwée rikne n’esilawuru anu kovu o jeegesi iknernema a hne anu zi.

⁴ Ọ bụ n'ezị nụ be gburu a n'énwe rikne, kọvu ọ zị bụdnu hite nụ iknerna Chiokike. A bụ ele nwée rikne nụ rime Karaịsi, kọvu hne anụ zị a joosno a ziri bụdnu n'iknerna Chiokike.

⁵ Anụ nyosnama ẹhni anụ lekasi ma anụ zị kọriri bụdnu n'okwnata mkpoma. Ọ bụ nụ anụ máa Karaịsi Jizọsi wu nụ rime anụ? Okwolem ma anụ dnarnụ adna.

⁶ M kweru m nụ anụ jaamahia nụ a bụo ele dnarnụ adna.

⁷ A naarjasno Chiokike, anụ mée nhne ojo. Ọ bụo ma ele badnụ kaa nụ a bụ ele oma, kọvu ma anụ mee nhne ke kwesiri, ọ bụbedi nụ a nụ lele ele dnarnụ adna.

⁸ A jéenwe rikne mee nhne megidne ezi oka, kọvu dasinu ezi oka n'ikwnu.

⁹ Mkpoma nọoso aị n'ọnu nga a nwée rikne, kọvu nụ anụ nwernu rikne. A neekpe ma anụ bụru ele zuru ozu.

¹⁰ Kam kpayarụ, me naagbanụ anụ okwukwo ka kpa me zị ikere, ma ọ bụru me va, m jéeme anụ nhne rikne hite n'iknerna Nyenwe aị nyernu m, rikne o wulizọ anụ olu lele ọro, ọ bụo ọ kwnadna anụ akwnadna.

Obekwu ikwu ipne-aznụ

¹¹ N'ipne-aznụ, rụmu nda m, anụ dazikwaru nkari. Anụ gbalị dū ozuzu. Anụ bno nsni nụ nhne me nọorio anụ, anụ bụru ele nwernu otu mkpoma, anụ wuru n'udno. Chiokike ke ọwhnun'anya nụ udno dazigidnenu anụ.

¹² Anụ bekwurita ibne anụ lele rụmu nda.

¹³ Kpakara ele nsọ Chiokike neebekwu anụ.

¹⁴ Oru ke Nyenwe aị Jizọsi Karaịsi, ọwhnun'anya ke Chiokike, nụ owugidne ke Enine Nsọ dazinu kpakara anụ.

**Ọkwukwo izi Ọọlu
gbaznenu
Ele Galasia
Nhne gbasiri ọkwukwo izi ka**

Hite n'ọpanizo ọkwukwo izi Ọọlu gbaznenu ọgbako Chiokike ke zị nọ Galasia, o mernu be mahia nhne lawuru ke zị mkpa. Ke mbom, bu ma be mahia nọ ọ bu ezi nye izi Karaịsi, ke ẹbo bu nọ izi ọma ọ nọokpo okwo a bu ezi ọka. Ka bu kwnornu nọ agida ele badnu naakaa nọ Ọọlu bu nye izi aghalaghala nọ nye nọokpo okwo izi ọma aghalaghala.

Ọọlu bu nye izi Karaịsi n'ezi ọka, nye Nyenwe aị nyernu ẹrnu o zni ele buo ele Ju izi ọma. Ọọlu kannu Pita nọ ọ bu nye ruwhnu lawuru, kwnornu nọ o kwemana o snornu ele buo ele Ju ele za naabita Iwu Mozizi ri wiri nga ọ whnurnu ele hi nọ Jeruselem va.

Ọọlu kwusiri a rikne nọ okwolem hite n'okwnata mkpoma nhne Chiokike jeeji znohia badnu. Ka whuyaru iwhne nọ budnu Ebereham, nye nahiaru mkwna Chiokike hite n'okwnata mkpoma.

Nhne zị n'okwukwo izi ka

Ezi nye izi nọ ezi izi ọma (1:1-10)

Chiokike hohiaru Ọọlu lele nye izi Karaịsi (1:11-24)

Ọọlu naagbanu izi ọma akebne (2:1-21)

Oznohia kwolem hite n'okwnata mkpoma (3:1---4:31)

Ele Enine Nso nọ ọwhnun'anya noodu (5:1---6:10)

Ọdo aka nọ nsnị ipne-aznu (6:11-18)

¹ Mawa, Ọọlu, nye izi Karaịsi ke híge n'aka badnu mọbu nọ rikne ke badnu, kovu hite nọ Jizosi Karaịsi nọ Chiokike Nda, nye mernu Jizosi hi n'ẹnwu lizo,

² nọ kpakara rumu nda ele me nọ be zị naagbaznenu kpakara ọgbako Chiokike ke zị nọ Galasia ọkwukwo.

³ Oru nọ udno ke Chiokike Nda aị nọ ke hi n'aka Nyenwe aị Jizosi Karaịsi dazinu anu.

⁴ Karaịsi gweru budnu a nyee kwnornu mmehie aị ma ọ dohia aị n'ige ojo ka lele kpa echiche Chiokike Nda aị pioru.

⁵ Ọznarni zinu a ọkwunukokwnu. Amim.

Izi ọma berere zila

⁶ Ọ gbagwojiri m'anya nọ anu ghasaru nye wam sukwuru anu bna n'oru ke Karaịsi, zne izi ọma berere.

⁷ N'ezi, izi ọma berere zila, kovu agwna ele badnu naakpahie anu anya, noopio ọ gbanwo izi ọma Karaịsi.

⁸ Kovu ọ buru aị mọbu enine izi hi n'oligwe va zni anu izi ọma berere ke buo ke a zirniri anu, Chiokike vu a ọnu ọkwunukokwnu.

⁹ Lele kpa a kwuru nọ mbom, m nookwu kwno a berere, ọ buru nọ nye ọbula zni anu izi ọma ke zị ichne nọ ke anu nahiaru, Chiokike vu a ọnu ọkwunukokwnu.

¹⁰ Ka o neegesi nọ m noopio ruwhnu ọma ke badnu, buo ke Chiokike? M noopio nhne jaamasị badnu sa? Ọ buru nọ m noopio ruwhnu ọma ke badnu, m jobu nye izi Karaịsi.

Chiokike sukwuru Ọọlu

¹¹ Me kanu anu, rumu nda m, izi ọma me nọokpo okwo a buo nhne hi n'aka badnu.

¹² M náhìage m a n'aka badnụ, ọ bụo badnụ znirni m a, kọvu Jizọsi Karaịsi kpumernu a nyee m.

¹³ Anụ nurnu kpa me wuru bụdnu nụ mbọm n'okpukpe ele Ju, nụ kpa me kpaknarnụ ọgbako Chiokike ẹhni k'agịda, gbalị ma o whu.

¹⁴ M be m ele Ju ibne m ọsno ele me nụ be bụ ebiri n'okpukpe ele Ju, m ji m kpakara mkpọma yisi n'omen'eli ele nda aị ọknani.

¹⁵ Kọvu Chiokike bítaru m ichne hite nụ rụwho nne m, o sukwuru m hite n'oru a. Nga ọ masịri a,

¹⁶ ọ kpumennu m Nnwọ a, ma m nwernu m rikne zni ele bụo ele Ju izi ọma gbasiri a. Ige wam, m znége ma me nụ badnụ ọbula tñ ọtnutnu gbasiri a.

¹⁷ M znége m Jeruselem zne ọ whnụ ele be m ọsno bụru ele izi, kọvu m znernu m Arebja, m lahna Damasikosi.

¹⁸ Nga awha ẹto whemernu, m znernu m Jeruselem zne mahia Pita, me nụ a daziri nri nụ ọbochi isne.

¹⁹ M whnúge m nye izi berere okwolem Jemisi nwene Nyenwe aị Jizọsi.

²⁰ Nhne me gbannụ anụ n'okwukwo bụ ezi ọka, Chiokike magwụ nụ ọ bụo aghalaghala.

²¹ Omekwo, m zne n'eli ke zị nụ rime Siriya nụ Silisia.

²² Ọ zá nye Karaịsi ke zị nụ ọgbako Chiokike ke zị nụ Judiya magwụ nye me bụ ruwhnu nụ ruwhnu.

²³ Kọvu nụ be nurnu ọtnutnu, “Nye wam ke naakpakna aị ẹhni neezni izi ọma ọkwnata mkpọma wam ọ gbaliri o mee ma o whu nụ mbọm.”

²⁴ Be znarni Chiokike kwnornu m.

2

Ele izi berere nabnanyarnụ Pọlu

¹ Nga nri nụ awha ẹno whemernu, m lahna m Jeruselem, me nụ Banabasi, m kwuru Tajitosi zne.

² M znernu m kwnornu nụ Chiokike kpumennu m me zne. N'iznuznu ke me nụ ele risi gbarụ ichne, m kọwaru m izi ọma me znirni ele bụo ele Ju, ọ zị ẹrnu me nrurnu mọbu ke me nọornu kịtna bọ bụ nhne etekne.

³ Tajitosi nye me nụ a sno, ọ bụ n'ezi nụ ọ bụ nye Giriki, be kwnágidnene a ọ kpa nka.

⁴ Agwna rụmu nda aghalaghala gbebnarnụ va o nyosna kpa a jiri nwernu ẹhni aị nụ rime Karaịsi Jizọsi, be piuru ma a bụru ọhi iwu ele Ju.

⁵ A nyége be oghere rja rja ma a bítannu anụ ezi ọka ke izi ọma chim chim.

⁶ Agwna ele nụ lele be bụ ele risi. Nhne ọbula be bụ zá m mkpa, kwnornu nụ Chiokike lé badnụ anya nụ ruwhnu n'ikpe. Ọ zá nhne ele ka tükwasiri nụ izi me znirni.

⁷ Kọvu be whnurnu nụ Chiokike nyernu m izi ọma me zni ele bụo ele Ju, lele kpa o nyernu Pita ẹrnu o zni ele Ju izi ọma.

⁸ Chiokike wam ke nọornu ẹrnu n'izi ọma Pita znirni ele Ju lele nye izi, bụ masị nye nọornu ẹrnu n'izi ọma me znirni ele bụo ele Ju lele nye izi.

⁹ Nga Jemisi nụ Pita nụ Jóni, ele nụ lele ele risi whnurnu nụ Chiokike nyernu m ẹrnu ka zị ichne, be gbasiri me nụ Banabasi akarikwnunga ke neegesi nụ a bụ otu. Be kweru a zne zni ele bụo ele Ju izi ọma, be zne zni ele Ju izi ọma.

¹⁰ Nhne be nọorio kpọi bụ, a chenwanya ele mboni, kị bụ nhne me mernu wara wara.

*Pɔlu bigbɔru Pita**n'Antioku*

¹¹ Nga Pita vaduru Antioku, m bigbɔru m a nɔ ruwɛnu ɔhna kwnornu nɔ ɔ dnahieru.

¹² Sɔ ele Jemisi ziyaru va, Pita nɔ ele bɔo ele Ju neerikɔ wiri. Kɔvu nga be vaduru, o kwɛle o sno be ri wiri, kwnornu nɔ ogwnu ele be kparɔ nka tɔru a.

¹³ Ele Ju ke gwnarnɔ snornu a kpa ichne ichne kwnornu nɔ ruwɛnu lawɔru a, ke kpayarɔ Banabasɔ sno be nɔ ruwɛnu lawɔru be.

¹⁴ Nga me whnɔrnu nɔ be mɛne lele ezi ɔka ke izi ɔma, m kanɔ Pita nɔ ruwɛnu kpakara be, “I bɔ nye Ju, kɔvu i noowu bɔɔnu lele ele bɔo ele Ju, ɔ bɔo lele nye Ju. Ndaa kpa i naakwnagidne ele bɔo ele Ju be snornu omen'ɛli ele Ju?”

Oznohia bɔ hite n'oru

¹⁵ N'ezi, a bɔ ele Ju hite n'omumu aɔ, a bɔo ele mmehie lele kpa be nookwu ele bɔo ele Ju.

¹⁶ Kɔvu a magwɔ nɔ badnɔ nɔ Chiokike mernu udno hite n'ɔkwnata mkpɔma nɔ Jizɔsi Karaɔsi, ɔ bɔo n'ome nhne iwu kwuru. A kweru nɔ Karaɔsi Jizɔsi ma aɔ nɔ Chiokike ziri n'udno hite n'ɔkwnata mkpɔma nɔ Karaɔsi. ɔ bɔo n'ome nhne iwu kwuru, kwnornu nɔ ɔ zɔ nye ɔbula bɔ nye ɔma hite n'ome nhne iwu kwuru.

¹⁷ ɔ bɔru nɔ nga a noopio ma aɔ nɔ Karaɔsi ziri n'udno, a whnɔ ɛhni aɔ nɔ a bɔ ele mmehie lele ele berere, ka o neegesi nɔ Karaɔsi naadasɔ mmehie n'ikwnu? Chiokike kwɛ.

¹⁸ ɔ bɔru nɔ me panizɔ noowu nhne me kwnadarnɔ akwnadna, ka neegesi nɔ m bɔ m nye noolulu iwu.

¹⁹ Kwnornu nɔ hite n'iwu m nwɔrnu ɛnwu hne iwu zɔ, ma m ziri m bɔɔnu nɔ rime Chiokike.

²⁰ Be gweru m yisinu Karaɔsi kpɔgidne aɔ n'olu ɔgba a, m zɔ m bɔɔnu ke m, kɔvu Karaɔsi wu nɔ rime m. Bɔɔnu ke me zɔ n'anɔ-ɛhni bɔ ke me zɔ n'ɔkwnata mkpɔma ke Nnwɔ Chiokike, nye whnɔrnu m n'anya gweru bɔɔnu a nyee kwnornu m.

²¹ M zɔ m neelewhu oru Chiokike anya, kwnornu nɔ ɔ bɔru nɔ ome mma bɔ hite n'iwu, ɛnwu Karaɔsi nwɔrnu bɔ nhne etekne.

3*Iwu mɔbu ɔkwnata**mkpɔma*

¹ Anɔ ele Galasia iwhnirniwhno, nyele kpahieru anɔ anya? Nɔ ruwɛnu anɔ bɔ hne me gesiri anɔ nɔ be kpɔgburu Jizɔsi Karaɔsi n'ɔgba.

² M pioru m ɔ mahɔa otu nhne n'aka anɔ. Anɔ nahɔaru Enine Nsɔ hite n'ome nhne iwu kwuru, sɔbu hite n'okweru nhne anɔ nɔrnu?

³ Anɔ bɔ ele iwhnirniwhno kpa? Anɔ panizɔru n'Enine ke Chiokike, anɔ naagbalɔ ɔ wu bɔɔnu kɔtna hite nɔ rikne ke aka anɔ?

⁴ Kpakara awhnɔwhnu anɔ tarɔ ɔ bɔ nhne etekne? N'ezi, ɔ bɔ kwnornu nɔ nhne etekne?

⁵ Chiokike nyernu anɔ Enine a, rnɔ ɛrnu ndu-ɛhni n'esilawɔru anɔ. ɔ bɔ kwnornu nɔ anɔ mernu nhne iwu kwuru sɔbu nɔ anɔ kweru nhne anɔ nɔrnu?

⁶ Lele kpa Ebereham “kweruru Chiokike, Chiokike gwnɔsinu a nɔ ɔ bɔ nye mee mma.”

⁷ Anɔ mahɔa nɔ kpakara ele nwernu ɔkwnata mkpɔma bɔ rɔmu Ebereham.

⁸ Ọkwukwo nsọ kwuru nù hne zị nù ruwhnu nù Chiokike jeeme ma ya nù ele búo ele Ju ziri n'udno hite n'ọkwnata mkpọma, znirni Ebereham izi oma, kaa, "Hite nù rime i, m ịọgozi kpakara mba ke ọwa."

⁹ A whnrnu nù Chiokike nọgozi kpakara ele ke jeekweru lele kpa Chiokike ọziri Ebereham, nye kweru nù ya.

¹⁰ Ọvu ọnu zinu kpakara ele neeche nù Chiokike ịọgwnu be lele ele ikpe mána kwnornu nù be naabita Iwu. Be gbarụ a n'ọkwukwo nsọ, kaa, "Ọvu ọnu zinu kpakara ele zá naabita kpakara nhne be gbarụ n'Iwu, neeme masi be."

¹¹ O dnornu aị anya nù ọ zá nye ya nù Chiokike zị n'udno hite n'Iwu, kwnornu nù ọkwukwo nsọ kwuru, "Nye mee mma jeehi n'ọkwnata mkpọma a ziri búdnu."

¹² Kọvu Iwu knóge aka n'ọkwnata mkpọma, lele kpa ọkwukwo nsọ kwuru, "Nye neeme kpakara nhne ka jaazi búdnu nù rime be."

¹³ Karaịsi gbaharu aị hite n'aka ọvu ọnu ke iwu, ọ ghọnu aị ọvu ọnu. Ọkwukwo nsọ kwuru, "Be vuru nye ọbula be kpọkwnusiri n'olu isisi ọnu."

¹⁴ Karaịsi mernu ka ma ngọzi wam Chiokike kweru Ebereham mkwna búru ke ele búo ele Ju hite nù Karaịsi Jizọsi, ma a hite n'ọkwnata mkpọma nahọru mkwna Ẹnine Chiokike.

Iwu nù mkwna

¹⁵ Rụmu nda m, m jeeji nhne anya nọwhnu noogbu esni. Ọ zá nye nwernu rikne o lulu njo-ẹhni badnụ lawuru gbarụ, mọbu tükwasị nhne n'olu a.

¹⁶ Kịtna, Chiokike kweru Ebereham nù nnwọ a mkwna wam. Ọkwukwo nsọ kwúge agida rụmu, kọvu "nnwọ ị," ke bú otu badnụ, nye bú Karaịsi.

¹⁷ Nhne me nookwu bú ka, iwu wam ke be nyernu riwhu awha ẹno nù nri ẹto kpa mkwna Chiokike kweru Ebereham whemernu, nwée rikne lulu mkwna Chiokike kweru mọbu mee a ọ gharụ ọ zị ire.

¹⁸ Kwnornu nù ọ búru nù nhne okehia ka kno aka n'iwu, ọ búma mkwna, kọvu Chiokike kwnornu n'oru a, o nyernu a Ebereham hite nù mkwna.

¹⁹ Kịni bú nhne be kwno nyee iwu? Be nyernu a kwnornu ọdnahie ke badnụ tem dụ nga Nnwọ wam jaava bú nye mkwna wam nọotu aka. Chiokike nyernu iwu hite n'aka ele enine izi, o nyee a nye ibno.

²⁰ Nye ibno zá mkpa hne otu badnụ zị, Chiokike bú otu.

²¹ Ka o neegesi nù iwu megidnernu mkwna Chiokike? Óza rịa rịa! Kwnornu nù ọ búru nù be nyernu iwu ke jeenye búdnu, ome mma jọburu hite n'iwu.

²² Kọvu ọkwukwo nsọ kwuru nù kpakara ọwa bú ọhi mmehie, ma nhne Chiokike kweru mkwna o nyee hite n'ọkwnata mkpọma nù Jizọsi Karaịsi búru ke ele kweru ekwe.

²³ Tụtụ sụ ọkwnata mkpọma varụ, a bú ele ikelu ke iwu, be gbagidnernu aị ọnuhna dụ nga be kpumernu ọkwnata mkpọma.

²⁴ Iwu wam bú nye neelegidne aị anya, kwuru aị vakwnusi Karaịsi, ma aị nù Chiokike ziri n'udno hite n'ọkwnata mkpọma.

²⁵ Kpa ọkwnata mkpọma varụ, a zịma nù mkpururu nye neelegidne aị anya, ke bú iwu.

A bú rụmu Chiokike

²⁶ Kpakara anụ bú rụmu Chiokike hite n'ọkwnata mkpọma nù Karaịsi Jizọsi.

²⁷ Kpakara anụ ele be wụru mini bna nù Karaịsi jooworu búdnu ikne Karaịsi lele iwo.

²⁸ Ọ zá nhne zị ichne nù hne nye Ju nù nye Giriki zị, mọbu hne ọhi nù nye búo ọhi zị, mọbu hne nyerukna nù nyerinya zị. Kpakara anụ bú otu nù rime Karaịsi Jizọsi.

29 O bụru nụ anụ bụ ele Karaịsi, anụ bụ rụmu Ebereham, ele jeekehia mkwna wam Chiokike kweru Ebereham.

4

1 Nhne me nookwu bụ koriri ka, nye obula ke jeeri mkpe nda a hne o bụ watakiri, o zá nhne zị ichne hne ya nụ nye ohi zị, o bụ n'ezi nụ ya nwe kpakara nhne.

2 Ele berere jaazị neelegidne a anya, neezni a nhne, tem dū ige nda a karū.

3 Kpam masị, nga a bụ rụmu takiri, a bụ ohi renwu ojo matị matị ke owa.

4 Kovu nga ige duru, Chiokike ziyaru Nnwọ a, nye nyerinya murnu nū mkpururu Iwu Mozizi,

5 ma o gbahia ele zị nū mkpururu iwu, ma a bụru rụmu Chiokike.

6 Kwnornu nū anụ bụ rụmu a, Chiokike ziyaru Enine Nnwọ a nū rime mkpoma aị, Enine ke naakwna, "Papa, Nda m."

7 Kam kpayarū i buma ohi, kovu nnwọ, hne i bụ nnwọ, Chiokike mernu i bụru nye jeeri mkpe a.

Nhne meturu Pọlu nū mkpoma

8 Nū mbom, nga anū máa Chiokike, anū bụ ohi nhne búo chi.

9 Kovu kịtna, anū magwū Chiokike, mọbu Chiokike magwū anū. Ndaa kpa anū jaalahnakwnusi renwu ojo matị matị ke nwée rikne, o zá nhne be ji be neeme? Kini kpayarū anū jọoburu kwno ohi be berere?

10 Kini kpayarū anū naabita obochi zị ichne, ma enwa, ma ige nū awaha?

11 Ogwnu anū nọtou m. O jọobu nū enu m nū risi anū bụ nhne etekne sa?

12 Rụmu nda m, m naariasno anū, anū nū lele me, m nū m lele anū ele búo ele ju. O zá nhne ojo obula anū mernu m nga me znirni anū izi oma nū mbom.

13 Anū chenwanya o bụ ehi igbugbu mernu me daziri zni anū izi oma nū mbom.

14 O bụ n'ezi nū ehi igbugbu m bunnu anū nhne ornurna, anū lédnage m anya mọbu zusa m. Kovu anū kwubnanyarnū m lele nū m bụ m enine izi Chiokike, lele nū m bụ m Karaịsi Jizosi n'iwuhuru a.

15 Kini mernu ovu oso n'onu ke anū nwernu nū mbom? M jaagbanū anū akebne, o bụru nū o kweru o mee, anū znernu ahnahia mkpuru anya anū lawuru chita m be.

16 M ghola nye irno anū kwnornu nū m kannū m anū ezi oka sa?

17 Kpakara ele neegesi nū nhne gbasiri anū neemetū be nū mkpoma, be zá neeme a kwnornu nhne oma anū. Nhne be noopio bụ ma be gweme anū hne a zị, ma anū menu be kpa be neemenu anū.

18 O bụru oma o gweru mkpoma anū neeme nhne bụru oma ige obula, o búo nga me nū anū zị kpoi.

19 Rụmu takiri m, ele rime neeme m kwnornu be lele kpa rime neeme nyerinya nọomu nnwọ. M zị m nū nhne igbugbu ka tem oyiyi Karaịsi ziri nū rime anū.

20 O kanū m mma o bụru nū me nū anū zị kịtna, m znernu m amahia kpa me znernu obita onu kwunu anū oka. Kwnornu nū mkpoma naala m mini hne anū zị.

Haga nū Sera

21 Anū kanū m, anū ele noopio o zị nū mkpururu iwu, anū máa nhne iwu wam kwuru?

22 Kwnornu nū be gbarū a n'okwukwo nsọ, kaa nū Ebereham nwernu rụmu rukna lawuru, nnwerne ohi murnu otu, nnwerne ke búo ohi murnu ke berere.

²³ Nnwọ ke nnwerne ọhi mụrnu bu ke ọ mụrnu kpa be mụrnu ele berere. Kọvu nnwọ ke nnwerne ke bụo ọhi mụrnu bu nnwọ Chiokike kweru mkwna a.

²⁴ Ka bu nhne ọma atụ, ele rinya lawuru ka bu ọgba-njọ-ẹhni lawuru. Otu bu Haga, ke hi nụ rugwu Saina, nye rumu a bu ele ọhi.

²⁵ Haga nū lele rugwu Saina ke zị nū Arebia, ọ nū kwno lele ẹli Jeruselem tna, ke ya nū kpakara rumu a bu ọhi nū mkpururu iwu.

²⁶ Kọvu Jeruselem ke zị n'olu bụo ọhi, ọ bu nne aị.

²⁷ Kwnornu nū be gbarụ a n'okwukwo nsọ, kaa, “Nwudna, jị nyerinya ke nwée nnwọ, jị nye muge nnwọ, gweru okne nkọli siwama lulo, mkpoma sọ i n'onu, jị nye rime nnwọ mélele, kwnornu nū nyerinya ke be ghasarụ jeenwe agida rumu, kakwo nyerinya ke nwernu nzi.”

²⁸ Kĩtna, rumu nda m, lele Aziki, anụ bu rumu Chiokike kweru nū mkwna.

²⁹ N'ige wam, nnwọ wam be mụrnu lele kpa be mụrnu ele berere kpak-narnu nnwọ wam be mụrnu hite nū rikne Enine ẹhni. Ọ zị koriri kpa m Kĩtna.

³⁰ Kọvu kịni bu nhne okwukwo nsọ kwuru? “Chihala ọhi nyerinya wam nū nnwọ a, kwnornu nū nnwọ nnwerne ọhi nū nnwọ nnwerne ke bụo ọhi jéeri otu mkpe.”

³¹ Ke bu nū, rumu nda m, a bụo rumu nnwerne ọhi, kọvu a bu rumu nnwerne ke bụo ọhi.

5

A nwernu ẹhni aị nū rime Karaịsi

¹ Karaịsi mernu a nwernu ẹhni aị. Kam kpararụ, anụ gwuzosi rikne, anụ kwé anụ bụru kwno ọhi berere.

² Anụ bnote nsni, mawa Pọlu naakanu anụ, anụ kwé be kpa anụ nka, kwnornu nū anụ mee kpa, ọ zá mbnarna Karaịsi bnannu anụ rịa rịa.

³ Me kwu kwno a berere, nye ọbula ke kweru be kpa a nka jaabitariri kpakara iwu.

⁴ Anụ ele noopio be nū Chiokike ziri n'udno hite n'iwu, anụ kewahalaru ẹhni anụ hne Karaịsi zị. Anụ zima n'oru Chiokike.

⁵ Kọvu a neele anya nū aị nū Chiokike jaazị n'udno hite n'okwnata ovu. Ka bu nhne a neese hite n'Enine.

⁶ Kwnornu nū rime Karaịsi Jizọsi, ọ zá nhne zị ichne nū ọkpa nka nū ọkpáge nka, kọvu okwnata ovu aị ke nọornu ẹrnu n'owhnnun'anya bu nhne zị mkpa.

⁷ Anụ neemekwa nkari nū mbom, nyele kpahieru anụ anya, kaa, anụ bnó nsni nhne ezi ọka nookwu?

⁸ Nhne nū kpa híge n'aka nye wam sukuru anụ.

⁹ “Nhne whu brẹdi matị neeme kpakara brẹdi whu ọwhu.”

¹⁰ M tükwasiri m Nyenwe aị mkpoma nū anụ jéekwe anya hie anụ, anụ mee nhne berere. Kọvu nye ọbula ke naakpakna anụ ẹhni jeeri nhne ọ kpasiri, nye ọ masiri a ọ bụru.

¹¹ Rumu nda m, ọ bụru nū m zị koriri m neezni nū ọkpa nka zị mkpa, kịni kpararụ be naakpakna m ẹhni? Ọ bụru nū m zị m nookwu nū ọkpa nka zị mkpa, izi gbasiri ọgba Karaịsi jọoburu rugwu okpobi ọchi.

¹² Ọ jaamasị m ọ bụru nū ele wam naakpakna anụ ẹhni jọowhoga, mee ẹhni be okiri badnụ.

¹³ Rumu nda m, Chiokike sukwuru anụ bụru ele nwernu ẹhni be. Kọvu anụ kwékwadia o nwernu ẹhni anụ mee, anụ mee nhne anọ-ẹhni anụ noopio. Kọvu anụ gweru ọwhnun'anya znenu ibne anụ izi.

¹⁴ Kpakara nhne be nyernu n'iwu chikotarị risi n'otu nhne ka, "I jọowhnu nye agbatibi i n'anya, lele ẹhni i."

¹⁵ O bụru nụ anụ jaazị naatagbu, nọdoka ibne anụ, anya dụ anụ ẹli o zị anụ gbukwo ẹhni anụ.

Anụ kweru Enine

nẹchi anụ

¹⁶ Nhne me naakaa bụ ka, anụ wuru bụdnu n'Enine, anụ jéemezu nhne anọ-ẹhni noopio.

¹⁷ Kwnornu nụ nhne anọ-ẹhni noopio neemegidne nhne Enine Chiokike noopio. Nhne Enine Chiokike noopio neemegidne nhne anọ-ẹhni noopio. Be neemegidne ibne be, anụ gharu o mee nhne anụ noopio.

¹⁸ Kọvu, o bụru nụ Enine noodu anụ, anụ zá nụ mkpururu iwu.

¹⁹ Ẹrnu ke anọ-ẹhni whụyaru iwhe, ke bụ, ome ọyi, ọgba ikoro, nhne zila richna,

²⁰ ọkwa renwu nụ amusu, irno, ọlu ọgwnu, ọkpa ichne ichne, okwno-awụwa, ọnuma, aka-nchni, ọbna otu,

²¹ ọwho-anya, okne manya, okne otne eri, nụ nhne nụ kpa. Ka bụ nhne me nọdọ anụ aka nụ nsnị kịta, lele kpa me dọru anụ nụ mbom, kaa nụ ele neeme nhne nụ kpa, jéekheja igwe n'ẹli-eze Chiokike.

²² Kọvu mkpuru ke Enine neegweya bụ ọwhnun'anya, snarnjima, udno, ndidi, ovu ọma, ọburu ọma, okwesi ọkwnata mkpoma,

²³ ọzi wọhnerne, badnụ nwụkwaru ẹhni a, o zá iwu ke megidnenu nhne nụ kpa.

²⁴ Ele ke Karaịsi Jizọsi bụ ele gweru anọ-ẹhni be nụ nhne nọogwnu be kpogidne n'olu ọgba.

²⁵ O bụru nụ a zị bụdnu nụ rime Enine, ngwa ma a zne izne nụ rime Enine.

²⁶ Ngwa ma a gharu oknomokno, gharu naakpasu ibne aị ovu owe ẹhni, gharu enwe ọwho-anya hne ibne aị zị.

6

A vurita ivu ibne aị

¹ Rumu nda m, o bụru nụ badnụ ọbula mee mmehie, anụ ele gwuzosiri rikne nụ rime enine gweru wọhnerne znikwata a nkari. Anya dụ masi anụ ẹli, o zị anụ dnabna n'ornurna.

² Anụ vurita ivu ibne anụ. O bụru nụ anụ neeme kpam, anụ jeemezu iwu Karaịsi.

³ O bụru nụ badnụ ọbula neechi nụ o bụ nhne nga o zá nhne o bụ, o nooduwu ẹhni a.

⁴ Nye ọbula tule ẹrnu a, ige wam, o jeenwe rikne mee oknomokno n'ẹrnu a. O zá nye ji ẹrnu a tū n'ẹrnu nye berere,

⁵ kwnornu nụ nye ọbula jọornu ẹrnu zinu a.

⁶ Nye ọbula be znirni izi ọma ke Karaịsi whnụ nụ ya nụ nye znirni a nhne kehjaru nhne bụru ọma.

⁷ Anụ dúwuh ẹhni anụ. Kwnornu nụ o zá nye jọokpoli Chiokike mgbaị. Mkpuru ọbula badnụ kpasiri bụ nhne o jọoghoru.

⁸ Nye ọbula ke kparu mkpuru n'anọ-ẹhni a, jeehite n'anọ-ẹhni a ghọru ẹnwu, kọvu nye kparu mkpuru n'Enine, jeehi n'Enine a ghọru bụdnu kwó okwo lele mkpuru.

⁹ Anụ kwéko rikne gwụ anụ n'ome nhne bụru ọma, kwnornu nụ ige wawa nga a jọghoru mkpuru, ọ bụru nụ rikne gwúge aị.

¹⁰ Kam kpayarụ, lele kpa a nwernu oghere, a ziri neemenu kpakara ele badnu nhne bụru ọma, ke kakwo, ele zị n'ezi-nụ-oro ke ọkwnata mkpọma.

Ọdo aka nụ nsị ipne-aznụ

¹¹ Kịtna, m ji m aka m naagba ọkwukwo izi. Le kpa mkpuru ọkwukwo me naagba hna ezi.

¹² Ele neeme oknomokno n'anọ-ẹhni bụ ele naakaa be kpa anụ nka. Ka bụ ma be gharụ ọ kpakna be ẹhni kwnornu ẹnwu n'ogba Karaịsi.

¹³ Ọ bụbedi be ele be kparụ nka zá naabita iwu. Be noopio be kpa anụ nka ma be mee oknomokno nụ nhne zị n'anọ-ẹhni anụ.

¹⁴ Chiokike kwéko me mee oknomokno hne ọ bụo n'ogba Nyenwe aị Jizọsi Karaịsi, nye be kwnornu ẹhni a kpogidne ọwa n'ogba hne me zị, kpogidne masị m n'ogba hne ọwa zị.

¹⁵ Kwnornu nụ ọkpa nka nụ ọkpáge nka bụo nhne. Nhne bụ nhne bụ bụdnu ikne.

¹⁶ Udno nụ obirizi zinu kpakara ele noosno iwu ka nụ bụdnu be, be nụ kpakara ele bụ Izirẹli ke Chiokike.

¹⁷ Hite kịtna zne ruwhnu, ọ zá nye kpakna m ẹhni berere, kwnornu nụ m vu m n'ẹhni m ẹnya ke neegesi nụ m bụ m nye izi Jizọsi.

¹⁸ Rụmu nda m, oru ke Nyenwe aị Jizọsi Karaịsi dazinu enine anụ. Amịm.

Ọkwukwo **izi Pọlu** **gbaznenu** **Ele Efesōsi**

Nhne gbasiri ọkwukwo izi ka

Nụ Ọkwukwo izi Pọlu gbaznenu ele Efesōsi, ọ naakanụ ọgbako Chiokike nhne gbasiri olile anya be nwernu. Risi ikwu-ọnu Pọlu bụ nụ Karaịsi nwurnu ẹnwu n'olu ọgba ma ọ znọhia aị hite nụ mmehie. Kọvu nụ Chiokike mernu o hi n'ẹnwu lizọ, ọ daziri eli n'akarikwnunga Chiokike n'oligwe, hne ọ zị nęechi ọwa. Ọ jęechi masị ọwa ke vazne nụ ruwhnu.

Karaịsi mernu ele Ju nụ ele búo ele Ju bụru otu, kwnornu nụ ọ kwnadarnụ mkpọ irno ke kewarụ be (2:14). Ka neegesi nụ Chiokike jeehite n'Enine a mee mkpọma ele Karaịsi bụru otu, mee be ziri n'udno n'esilawuru be, (4:3), ma ele Karaịsi bụru otu. Ka bụ nhne zị mkpa n'ọkwukwo izi, ka mernu Pọlu gbarụ a k'agida neegesi nụ ọ bụru ọma ma ele Karaịsi ziri n'otu. A nwernu otu Nyenwe aị, ọkwnata mkpọma aị bụ otu, ọwuwu mini aị bụ otu, ke neeme ele Karaịsi ghọ otu anọ-ęhni.

Nhne zị n'ọkwukwo izi ka

Obekwu ikwu (1:1-2)

Karaịsi nụ ọgbako a (1:3--3:21)

Bụdnu ikne hite nụ Karaịsi (4:1--6:20)

Ibekwu ipne-aznụ (6:21-24)

Obekwu ikwu

¹ Mawa, Pọlu, nye izi Karaịsi Jizōsi hite n'echiche Chiokike, naagbaznenu ele Chiokike ke zị n'Efesōsi ọkwukwo, ele kwnagwụ mkpọma nụ Karaịsi Jizōsi.

² Oru nụ udno ke hi n'aka Chiokike Nda aị nụ Nyenwe aị Jizōsi Karaịsi dazjnu anụ.

Ngọzi ke enine

³ A nọotunu Chiokike nụ Nda Nyenwe aị Jizōsi Karaịsi mmamma, nye jiri kpakara ngọzi ke oligwe kesi aị n'enine nụ rime Karaịsi.

⁴ Chiokike beru ọsno hrukwo aị ma a bụru ele ke a kwnornu Karaịsi, sụ ọ kpuru ọwa, ma a bụru ele zị nsọ, ele nwée ọru nụ ruwhnu a kwnornu ọwhnun'anya a.

⁵ O beru ọsno hōru aị, o kwubnanya aị lele rụmu a hite nụ Jizōsi Karaịsi lele kpa o jiri masị a.

⁶ Ngwa ma a ja Chiokike kwnornu agida oru a ke o nyernu aị etekne hite nụ Nnwọ a ọ whnurnu n'anya.

⁷ Chiokike gbahiaru aị hite n'ọvnarna Karaịsi wusiri, nụ ọ gbarụ mmehie aị kwnornu n'oru a zị agida,

⁸ bụ ke o nyernu aị n'okwnamarna, ya nụ akoniche nụ ọghohia a.

⁹ Chiokike mernu a mahia nhne miri emi ke echiche a lele kpa o jiri masị a hite nụ Karaịsi. Ọ marnụ mmuma

¹⁰ o mezu echiche a ka nga ige a duru. Ka bụ ma o gwebnanya kpakara nhne zị n'oligwe n'ọwa n'otu nụ mkpururu risi Karaịsi.

¹¹ Chiokike hrukwo aị ma a bụru ele ke a nụ rime Karaịsi, hne o beru ọsno kpebi kpakara nhne lele kpa echiche a jiri zị.

¹² Chiokike mernu ka ma a znarni a kwnornu igwugwu a. A bụ ele mbom neele anya Karaịsi.

13 Anụ bụ masị ele Karaịsi nga anụ nūrnụ ezi ọka wam, ke bụ izi ọma ke ọznohia anụ. Anụ kweru nhne anụ nūrnụ, Chiokike hñjasiri anụ iri Enine Nso nū anụ bụ ke a lele kpa o kweru mkwna.

14 Enine Nso wam zị nū rime aị, a maam nū Chiokike jeenyeriri aị kpakara nhne buru ọma nga Chiokike jaagbahajakwo ele ke a. N'ige wam, a jaaznarni Chiokike kwnornu igwugwu a.

Okpukpe Pọlu

15 Kam kpayarū, nga me nūrnụ nhne gbasiri ọkwnata mkpọma anū nū Nyenwe aị Jizōsi, ya nū ọwhnūn'anya anū nwernu hne rụmụ Chiokike zị,

16 m gwépuḡam aka nū ọ tūnū Chiokike mmamma nū risi anū. M zị m neekpenū anū okpukpe kpakara ige.

17 M naariasno Chiokike ke Nyenwe aị Jizōsi Karaịsi, Nda ke igwugwu, o mee anū nwehia enine akoniche, kpumenu anū ẹhni a ma anū mahia a nkarị nkarị.

18 M nọorio masị ma Chiokike kpume anya ke oву anū, ma anū ghoḡhia olile anya o nyernu ele o sukwuru, nū ẹkwu ngozi zị igwugwu o kweru ele ke a nū mkwna.

19 M nọorio masị ma anū mahia iknernema a ke nwée atụ bụ ke o nyernu aị ele kweru nū Karaịsi. O bụ okne iknernema ka

20 ke Chiokike jiri mee Karaịsi hi n'ẹnwu lizo, mee ọ daziri ẹli n'akarikwunga Chiokike n'oligwe,

21 hne kakwo kpakara ọchichi nū rikne nū iknernema nū ele nwe. Rẹwhna a kakwo kpakara nhne ke nwernu rẹwhna, ọ bụo n'ige ka kpoi, kovu n'ige ke jaava.

22 Chiokike bitaru kpakara nhne nū mkpururu ọchi Karaịsi, mee a ọ buru risi kpakara nhne ma ọgbako Chiokike naahia ngozi.

23 Ọgbako Chiokike bụ ẹhni Karaịsi, Karaịsi jihiaru n'ọgbako Chiokike. Karaịsi bụ nye mezuru kpakara nhne n'apna ọbula.

2

Hite n'ẹnwu bna nū bụdnū

1 Nū mbom, anū nū lele ele nwurnu ọnwu, ele be kewamarnū hne Chiokike zị kwnornu nū anū bnóne nsni, mee nhne ojo.

2 N'ige wam anū wuru bụdnū ojo lele ele zị n'ọwa. Anū snornu badnū ojo wam ke neechi kpakara rẹnwu ojo n'ọwa. Setani bụ rẹnwu ojo wam ke nọornu ẹrnū nū mkpọma ele zá noobnonu Chiokike nsni kịtna.

3 Kpakara aị wuru bụdnū n'esilawuru be n'ige wheru ewhe lele kpa nhne nọogwnu anọ-ẹhni aị. A snornu ele berere mezu nhne echiche ojo aị piuru, kam kpayarū, a buru ele ke oву owe ẹhni Chiokike dnakwasiri.

4 Kovu Chiokike bụ nye obirizi k'agida. Ọwhnūn'anya a zị agida hne a zị.

5 O bụ n'ezi nū a bụ ele nwurnu ọnwu nū rime mmehie, kovu Chiokike mernu aị nū Karaịsi ziri bụdnū nga o mernu Karaịsi hi n'ẹnwu lizo. Chiokike znohiaru anū kwnornu nū oru a.

6 Chiokike mernu a snornu Karaịsi hi n'ẹnwu lizo. O mee aị nū Karaịsi Jizōsi daziri ẹli nū hne kakwo n'oligwe.

7 Chiokike mernu ka ma kpakara ele badnū mahia n'ige vazne nū ruwhnu ẹkwu ke oru a ke nwée atụ ke o jiri oву ọma a gesi aị nū rime Karaịsi Jizōsi.

8 Kwnornu nū Chiokike jiri oru a znohia anū hite n'okwnata mkpọma nū Karaịsi. O bụo kwnornu nhne ọbula ke anū mernu. Ọznohia anū bụ nkesi hi n'aka Chiokike.

9 O bụo ẹrnū ọma ọbula anū rnurnu, ọ zá nye ji a mee oknomokno.

¹⁰ A bụ ẹrnu aka Chiokike. O kpuru aị ma aị nụ Karaịsi Jizōsi ziri n'otu rnu ẹrnu oma Chiokike beru osno kwabitanu aị.

A bụ otu nụ Karaịsi

¹¹ Anụ chenwanya nụ mbom anụ ele bụo ele Ju hite nụ omumu anụ. Anụ bụ ele ke ele Ju be kparu nka neeledna anya, nookwu anụ ele be kpáge nka. Okpa nka bụ ke be jiri aka kpa n'anọ-ẹhni.

¹² N'ige wam, be kewamarnu anụ hne Karaịsi zi, anụ bụo ele Izireli, ke kpararu, anụ nwée igwe nụ mkwna Chiokike kweru o znohia Izireli. Anụ wuru budnu n'owa ka lele ele nwée olile anya, anụ máa Chiokike nụ mbom.

¹³ Anụ bụ ele be kewamarnu hne Chiokike zi nụ mbom, kovu kitna, Chiokike mernu anụ nụ Karaịsi ziri n'otu, mee masi anụ va nụ ruwhnu a hite n'ovnarna Karaịsi wusiri kwnornu anụ.

¹⁴ Karaịsi mernu udno ziri n'esilawuru ele Ju nụ ele bụo ele Ju nga o mernu ele Ju nụ ele bụo ele Ju otu badnu. O mernu ka nga o jiri anọ-ẹhni a kwnadna mkpo irno ke kewamarnu ele Ju nụ ele bụo ele Ju.

¹⁵ Karaịsi luluru iwu ele Ju hite n'enwu a ma o gweru ele Ju nụ ele bụo Ju ele kweru mee otu badnu ikne, mee ma udno ziri n'esilawuru be.

¹⁶ Karaịsi mernu ele Ju nụ ele bụo ele Ju nụ Chiokike ziri n'udno hite n'enwu o nwurru n'olu ogba, mee be buru otu badnu. Ka gwemernu irno n'esilawuru ele Ju nụ ele bụo ele Ju.

¹⁷ Karaịsi varu zni anụ izi oma udno, anụ ele bụo ele Ju nụ aị ele Ju masi.

¹⁸ Hite nụ Karaịsi, kpakara aị nwernu oghere o znekwnusi Chiokike Nda aị hite n'otu Enine.

¹⁹ Kam kpararu, anụ ele bụo ele Ju buma ele izne, kovu anụ gholam rumu Chiokike nụ ele ezi-nu-oro Chiokike.

²⁰ O wukwasiri anụ lele oro n'olu ntụ-eli ele izi nụ ele owhnurninya, hne Karaịsi Jizōsi n'iwghuru a bụ risi nsukala oro.

²¹ Ya bụ ngalaba jigwu oro n'otu, oro wam noosopiya buru Oro Nso be bitaru nsọ nyee Nyenwe aị.

²² Be wukotaru anụ n'otu nụ rime Karaịsi, ma anụ buru Oro Nso hne Enine Chiokike wu.

3

Polu nye ẹrnu ele bụo ele Ju

¹ Kam kpararu, mawa Polu, m bụ m nye ikelu kwnornu Karaịsi Jizōsi nụ kwnornu risi anụ ele bụo ele Ju neekpenu Chiokike.

² N'ezi, anụ nuru nhne gbasiri kpa Chiokike nyernu m ẹrnu o mee anụ ele bụo ele Ju mahia oru a.

³ Chiokike mernu m mahia nhne miri emi ke badnu máa nụ mbom, lele kpa me gbaru a n'okwukwo matị nụ mbom.

⁴ Nga anụ gwnurru na anụ jowhnu nụ Chiokike mernu m ghohia nhne miri emi gbasiri Karaịsi.

⁵ N'ige wheru ewhe, Chiokike kpumene ele badnu nhne ka, kovu kitna Enine Chiokike kpumennu a ele izi nụ ele owhnurninya ele o hohiaru.

⁶ Nhne miri emi wam bụ anụ ele bụo ele Ju ele kweru nụ ele Ju ele kweru ghuru otu anọ-ẹhni. Anụ joosno masi ele Ju kehia nhne Chiokike kweru be nụ mkwna hite nụ Karaịsi Jizōsi kwnornu nụ izi oma.

⁷ Chiokike nyernu m ẹrnu ke o zni izi oma ka kwnornu ovu oma a. O mernu ka hite nụ rikne a nornu ẹrnu nụ rime m.

⁸ Ọ bụ n'ezị nụ m kwésile m, kọvu Chiokike nyernu m oru a n'esilawuru ele ke a, o zni anụ ele búo ele Ju izi ọma ke okne nhne gbasiri Karaịsi ke ele badnụ nwée rikne ghọhiali.

⁹ O nyee kwno m ọrnu o mee kpa ele badnụ jaamahia kpa o jeeme nhne miri emi ka. Chiokike nye keru kpakara nhne kpusnirni nhne miri emi ka n'anya ele badnụ agida ige wheru ewhe.

¹⁰ Echiche a bụ ma kpakara rikne ke nęechi ęchi n'oligwe mahia akoniche Chiokike ke hna ezi hite n'ogbako a.

¹¹ Ka bụ nhne Chiokike vu nụ mkpoma sụ ọ kpuru ọwa. Kịtna, o mezuru a hite nụ Karaịsi Jizōsi Nyenwe aị.

¹² Aị nụ Karaịsi bụ otu, a kweru nụ ya, kam kpayarụ, a nwernu mkpoma siri rikne o zne nụ ruwhnu Chiokike, ẹnwe ogwnu.

¹³ M naariasno anụ, anụ bikno kwé rikne gwụ anụ kwnornu awhnụwhnu me naatanụ anụ, ke jeegweyanụ anụ igwugwu.

Karaịsi whnurnu aị n'anya

¹⁴ Kam kpayarụ, me gwu mpnerne ọchi kpenu Chiokike Nda,

¹⁵ nye jiri kpakara ezi-nụ-oro ke zị n'oligwe nụ ọwa ẹwhna be.

¹⁶ M nọorio Chiokike ma o hite n'ekwnu ke ngozi a, nyee anụ iknernema hite n'Enine a ma mkpoma anụ si rikne,

¹⁷ ma Karaịsi hite n'okwnata ovu wuru nụ rime mkpoma anụ, ma anụ gba ẹgwngwnu, gwuzoru chim chim n'owhnun'anya a.

¹⁸ M nọorio masị ma anụ nụ kpakara ele Chiokike mahia ọwhnun'anya Karaịsi nwernu hne a zị, kpa ọ hna nụ rude, nụ ogologo a, nụ kpa ọ hna n'olu, nụ omimi a,

¹⁹ ma anụ mahia ọwhnun'anya ka ke kakwo nhne badnụ etekne nwernu rikne ghọhiali. M nọorio ma Chiokike mejihia anụ nụ kpakara nhne Chiokike bụ.

²⁰ A ja Chiokike, nye nwernu rikne o mee kakwo kpa a nwernu rikne rịo mọb rị hite nụ iknernema a ke nọornu ọrnu nụ rime aị.

²¹ Ngwa ma aị ọgbako Chiokike ele o mernu aị nụ Karaịsi Jizōsi bụru otu, ja Chiokike hite n'otu ebiri dụ n'ebiri berere, ọwa kwnurnu ọwa. Amim.

4

A bụ otu nụ rime Karaịsi

¹ Mawa, nye ikelu kwnornu Nyenwe aị, naariasno anụ, anụ wu bụdnụ kwesiri ikwu Chiokike sukwuru anụ.

² Nhne ọbula anụ neeme, anụ gweru ovu hieru ẹli nụ ọzi wọhnernerne nụ ndidi naabnanya ibne anụ kwnornu anụ whnurnu ẹhni anụ n'anya.

³ Anụ gbalị ọ bita ọzi n'otu ke Enine hite noowu n'udno n'esilawuru anụ.

⁴ Ele Chiokike bụ otu anọ-ẹhni, a nahiaru otu Enine, lele kpa Chiokike sukwuru anụ n'otu olile anya.

⁵ A nwernu otu Nyenwe aị, ọkwnata mkpoma aị bụ otu, ọwuwu mini aị bụ otu.

⁶ A neekpenu otu Chiokike bụ Nda kpakara badnụ, nye nęechi kpakara badnụ, ọ nọornu ọrnu hite nụ kpakara badnụ, nye zị nụ rime kpakara badnụ.

⁷ Karaịsi nyernu nye ọbula nụ rime aị rikne ọ rnụ ọrnu lele kpa o kpebiri a.

⁸ Lele kpa be gbarụ a n'okwukwo nsọ,

“Nga ọ larụ olu,

o dọru agida ele irno a n'ohi, be snornu a n'aznụ,
o nyee ele badnụ nkesi.”

⁹ Kɪni bɔ n'ɔkwukwo nsɔ kwuru nɔ ɔ larɔ n'olu? Ɔ bɔ nɔ Karaisi beru ɔsno hiedna n'ɔwa ka.

¹⁰ Nye wam hiednarnɔ n'ɔwa bɔ masɪ nye larɔ hne kakwo n'olu n'oligwe, ma o jihɪa kpakara nhne.

¹¹ Karaisi bɔ nye wam, nye nyernu ele badnɔ rikne ɔ rnɔ ɛrnɔ, mernu agwna badnɔ ele izi, ele berere ele ɔwhnurninya, ele berere ele naagagharɪ nɔokpo okwo izi ɔma, ele berere ele nɔoznu atɔrnɔ nɔ ele neezni nhne.

¹² O mernu ka ma o jiknɔrnɔ ele Chiokike ma be rnɔnu a ɛrnɔ, ma ɔgbako Chiokike nooso, gwuzosi rikne,

¹³ Tem a dɔ n'ɔzi n'otu ke ɔkwɔnata ovu, nɔ ɔ maɪa Nnwɔ Chiokike, ma a bɔru ele sozuru nɔ badnɔ, ele dɔru nɔ nhne ɔtutu ke zuru ozu nɔ rime Karaisi.

¹⁴ Ige wam a jɔɔbɔma rɔmu takiri. Ele aghigho nɔ ele nooduwɔhu ele badnɔ jɛgweru izinzi aghalaghala ɔbula ruwhere noovughari duwɔhu aɪ, lele kpa abaka-mini nɔ ruwhere noovughari ɔgbo n'olu mini.

¹⁵ Tnɔnuma, a gweru ɔwhnɔn'anya nookwɔ ezi ɔka, ma a nooso lele Karaisi Nyenwe aɪ nɔ nhne ɔbula.

¹⁶ Karaisi neeknekɔta ele ke a n'otu, lele kpa rɔknani jikɔtaru kpakara nhne zɪ n'ɛhni badnɔ n'otu. O bɔru nhne ɔbula zɪ n'ɛhni nɔornu ɛrnɔ a, kpakara ɛhni jɔɔburu nhne gwuzosiri rikne n'ɔwhnɔn'anya.

Bɔdnu ikne nɔ rime

Karaisi

¹⁷ Kam kpayarɔ, m ji m rɛwhna Nyenwe aɪ nɔodo anɔ aka nɔ nsɪ, anɔ wɔma bɔdnu lele ele maa Chiokike, hite n'ɔri ɔriri ke nwɛe mbnarna.

¹⁸ Ele ka nwɛe rikne ɔ ghɔhia nhne gbasiri Chiokike. Be kewamarnɔ be hne Chiokike zɪ kwnornu nɔ be maa Chiokike, be bɔ ele risi rikne.

¹⁹ Iwhnerne o mee nhne bɔo ɔma tɔ be. Be bɔ ele neeme nhne ɔjo ke gwnɔrnɔ be, ma be neeme nhne sɔ ize n'anya lele kpa ɔ nɔogwnusi be rikne.

²⁰ Kɔvu kɪ bɔo nhne anɔ mɔhiaru gbasiri Karaisi.

²¹ N'ezɪ, anɔ nɔrnɔ nhne gbasiri a, be znirni anɔ ezi ɔka zɪ nɔ Jizɔsi.

²² Be znirni anɔ sigbasi bɔdnu ɔknani wam anɔ noowu. Badnɔ ɔknani wam neeji kpakara nhne nɔogwnu anɔ nooduwɔhu anɔ, noolulu masɪ bɔdnu anɔ.

²³ Kɪtna, anɔ gharɔ Chiokike ma ɔ gbanwo echiche anɔ.

²⁴ Anɔ wuru bɔdnu ikne ke Chiokike nyernu anɔ, ma anɔ bɔru ele ke Chiokike, ele mee mma, ele zɪ masɪ nsɔ n'ezɪ.

²⁵ Kam kpayarɔ, anɔ ghama aghalaghala, nye ɔbula kwunu ibne a ezi ɔka, kwnornu nɔ a nɔ lele nhne zɪ n'otu ɛhni.

²⁶ Ɔ bɔru nɔ ovu we anɔ ɛhni, anɔ mɛkɔ mmehie, anɔ kwɛkɔ ovu owe ɛhni anɔ daziri tem ɛhnam dna.

²⁷ Anɔ nyɛkɔ Ekwensu oghere nɔ bɔdnu anɔ ɔ rnawɔhu anɔ.

²⁸ Nye buznu znɔma buznu, o gweru aka a rnɔ ɛrnɔ kwesiri ma o yinu ele zɪ nɔ mkpa aka.

²⁹ Anɔ kwɛ ɔka bɔo ɔma hi n'ɔnu anɔ whɔya, kɔvu anɔ kwu ɔka bɔru ɔma ke jeeme badnɔ gwuzosi rikne n'ɔkwɔnata mkpɔma a. Ige ɔbula, anɔ kwu nhne bɔru ɔma nɔ nsɪ ele badnɔ ma be wulizɔ be olu lele ɔro.

³⁰ Anɔ mɛe Enine Nsɔ Chiokike ovu owe ɛhni, bɔ ke Chiokike jiri hnɪasi anɔ iri nɔ anɔ bɔ ke a tem dɔ n'ige anɔ jeenwernukwo ɛhni anɔ.

³¹ Anɔ gweme kpakara mkpɔma nlulu, nɔ ɔnuma, nɔ ovu owe ɛhni, ya nɔ ɔlu ɔgwɔnu nɔ ɔkaja nɔ irno mkpɔma.

³² Kɔvu anɔ nwe ovu ɔma, whnɔ ibne anɔ n'anya, naagbarɔnu ibne anɔ lele kpa Chiokike gbarɔnu anɔ kwnornu Karaisi.

5

¹ Lele r̄umu Chiokike whn̄urnu n'anya, an̄u wu b̄udnu lele Chiokike.

² An̄u wuru b̄udnu ɔwhn̄un'anya, lele kpa Karāisi whn̄urnu āi n'anya, gweru b̄udnu a kwan̄u Chiokike arīohna ke nwernu ɛknarna ɔma kwnornu āi.

³ An̄u kw̄e be whn̄u ewhere, m̄ɔbu nhne z̄ila rīchna, m̄ɔbu anya-kwu n'esilawuru an̄u. Nhne ele ka kw̄esile ele Chiokike z̄i ns̄o.

⁴ An̄u kw̄u ɔka t̄u iwhnerne, m̄ɔbu ɔka iwhnirniwhn̄o, m̄ɔbu ɔka bn̄ána n̄u nhne, ke kw̄esile, tn̄unuma, an̄u t̄unu Chiokike mmamma.

⁵ Kwnornu n̄u an̄u magw̄u n̄u ɔ z̄a nye naagba ewhere, m̄ɔbu nye z̄ila rīchna, m̄ɔbu nye anya-kwu, ke n̄u lele ɔkwa r̄enwu, nwernu igwe n̄u nhne ɔma ke ɛli-eze Karāisi n̄u Chiokike.

⁶ An̄u kw̄ek̄o badn̄u ɔbula gweru ɔka etekne rnawhu an̄u. Chiokike jaata ele z̄a noobnonu a ns̄ni awhn̄uwhn̄u kwnornu n̄u nhne n̄u kpa.

⁷ Kam kp̄ayar̄u, an̄u n̄u ele n̄u kpa m̄ek̄o nhne.

⁸ An̄u z̄i n'ɔchichiri n̄u mb̄om, k̄ovu k̄itna an̄u bnarn̄u n'iwhne Nyenwe āi, an̄u wu b̄udnu kwesiri ele z̄i n'iwhne.

⁹ Ele z̄i n'iwhne naam̄i mkp̄uru ɔma ke ovu ɔma, ome mma n̄u ezi ɔka.

¹⁰ An̄u pioh̄ia, neeme mas̄i nhne jaakpasu Nyenwe āi ovu ɔso n'ɔnu.

¹¹ An̄u sn̄o ɛrnu ɔchichiri ke nwernu mkp̄uru bn̄áge n̄u nhne kek̄o nhne, k̄ovu an̄u bigb̄o be, ma nhne ɔjo be mernu wh̄uya iwhne.

¹² Kwnornu n̄u ɔ n̄ot̄u iwhnerne o kwu nhne ele z̄a noobnonu Chiokike ns̄ni neeme n̄u mgw̄ugwa.

¹³ K̄ovu iwhne jeeme kpakara nhne wh̄uya iwhne.

¹⁴ Kwnornu nhne ɔbula ke iwhne kpumernu b̄uma nhne z̄i n̄u mgw̄ugwa. Kam kp̄ayar̄u, be kar̄u,

“Tn̄enya, j̄i nye neezni anyarna,
j̄i nye n̄u lele nye nw̄urnu ɔnwu, lizo,
Karāisi j̄oomukwasi j̄i iwhne a.”

¹⁵ Anya d̄u an̄u ɛli kpa an̄u noowu b̄udnu an̄u. An̄u w̄u b̄udnu lele ele iwhnirniwhn̄o, k̄ovu lele ele nwernu ak̄oniche.

¹⁶ An̄u gweru oghere ɔbula an̄u nwernu rn̄u ɛrnu ɔma, kwnornu n̄u ele badn̄u n̄oornu ɛrnu ɔjo k'aḡida n'ige ka.

¹⁷ An̄u b̄uo ele iwhnirniwhn̄o, tn̄unuma, an̄u yisi ɛhni pioh̄ia, neeme mas̄i nhne Nyenwe āi pioru.

¹⁸ An̄u nw̄o manya ke naabna n'anya, ke joolulu b̄udnu an̄u. Tn̄unuma, an̄u ghar̄u Enine Chiokike ma o mejh̄ia ovu an̄u.

¹⁹ An̄u gweru eri ɔma, eri ɔznarni n̄u eri mkp̄oma ɔso n'ɔnu kan̄u ibne an̄u ɔka, gweru kpakara mkp̄oma an̄u gwn̄unu Nyenwe āi eri,

²⁰ n̄ot̄unu Chiokike b̄u Nda mmamma ige ɔbula kwnornu kpakara nhne n̄u r̄whna Nyenwe āi Jiz̄osi Karāisi.

²¹ Ele Chiokike b̄ita ɛhni be n̄u mkpururu ibne an̄u kwnornu n̄u an̄u n̄osobisinu Nyenwe āi Karāisi.

Nzi n̄u nnwerne

²² Ele b̄u nnwerne an̄u b̄ita ɛhni an̄u n̄u mkpururu nzi an̄u lele n̄u an̄u b̄itaru ɛhni an̄u n̄u mkpururu Nyenwe āi.

²³ Kwnornu n̄u nzi b̄u risi nnwerne lele kpa Karāisi b̄u risi ɔgbako Chiokike. ɔgbako Chiokike n̄u lele an̄o-ɛhni Karāisi. Karāisi b̄u Nye ɔznohia ɔgbako a.

²⁴ Lele kpa ɔgbako Chiokike z̄i n̄u mkpururu Karāisi, k̄pam mas̄i, nnwerne ɔbula b̄ita ɛhni a n̄u mkpururu nzi a n̄u kpakara nhne.

²⁵ Ele b̄u nzi, an̄u whn̄u nnwerne an̄u n'anya lele kpa Karāisi whn̄urnu ɔgbako a n'anya nw̄u kwnornu a,

²⁶ ma o mee a ọ ziri nsọ, o gweruru ikwu-ọnu Chiokike nụ mini snụ a, mee a, ọ ziri richna.

²⁷ Karaịsi mernu ka ma o chetenu ọgbako wam n'ehni a, lele nhne zi igwugwu, nwée rune, mọbu ruwhnu ọliri ọdili, mọbu nhne ojo berere, tñnuma, ọgbako ke zi nsọ, ke nwée ọtna.

²⁸ Kpam masị, nzi kwesiri ọ whnụ nnwerne a n'anya lele kpa ọ whnurnu ẹhni a. Nye ọbula ke whnurnu nnwerne a n'anya whnurnu ẹhni a n'anya.

²⁹ Ọ zá badnụ ọbula ke snornu ẹhni a irno, kọvu o nọoznu, neelekwa ẹhni a anya nkari. Ọ bụ masị kpa Karaịsi neelekwa ọgbako Chiokike,

³⁰ a bụ nhne zi n'ehni Karaịsi.

³¹ Kam kpayarụ, nyerukna jaagharụ nda a nụ nne a, takwnụsi n'ehni nnwerne a, be lawuru gho otu badnụ.

³² Ka bụ nhne miri emi k'agida, kọvu m nookwu gbasiri Karaịsi nụ ọgbako Chiokike.

³³ Nyerukna ọbula n'esilawuru anụ, whnụ nụ o whnurnu nnwerne a n'anya lele kpa ọ whnurnu ẹhni a, nnwerne masị, whnụ nụ ọ nọoso nzi a anya.

6

Rumu takiri nụ ele murnu be

¹ Rumu takiri, anụ noobnonu ele murnu anụ nsni lele kpa Nyenwe aị piuru, kwnornu nụ ọ bụru ọma o mee kpam.

² Lele kpa be gbarụ a n'okwukwo nsọ, “Sobisinu nda i nụ nne i.” Ke bụ nhne mbom ke Chiokike nyernu n'iwu ke nwernu mkwna.

³ I mee kpam, nhne jaagakwanụ i nkari, ma i ziri bụdu ogologo n'owa.

⁴ Ele bụ nda, anụ mee nhne jaakpasu rumu anụ ovu owe ẹhni. Tñnuma, anụ gweru ikwu-ọnu Chiokike nọoznu, neezni be.

Ele ọhi nụ ele nwe be

⁵ Ele ọhi, anụ noobnonu ele nwe anụ nsni, anụ sọ be anya, nọotu ọgwu be. Anụ gweru mkpoma anụ neeme a lele anụ neemenu a Karaịsi.

⁶ Anụ bnonu be nsni, ọ bụo ke anya nọowhnu kpọi lele ele neeme nhne naamasị badnụ, kọvu noobnonu be nsni lele ele ọhi Karaịsi, ele neeme nhne Chiokike piuru hite nụ mkpoma anụ.

⁷ Anụ gweru ovu ọma nọornu ẹrnu lele nụ anụ bụ ọhi Nyenwe aị, bụo ke badnụ.

⁸ Kwnornu nụ anụ magwụ nụ Nyenwe aị jọokwu nye ọbula ọgwo ẹrnu ọma a, ma ọhi mọbu nye bụo ọhi.

⁹ Kpam masị, anụ ele nwe ọhi, anụ mee masị ele ọhi anụ kpam. Anụ kpási be ọgwu, hne anụ mahiaru nụ Nyenwe anụ nụ be zi n'oligwe. Ọ zá neele badnụ anya nụ ruwhnu.

Mgwna ọgwu Chiokike

¹⁰ Ka bụ ọka ipne-aznụ m, anụ gbasị rikne nụ Nyenwe aị nụ okne iknema ke a.

¹¹ Anụ woru kpakara mgwna ọgwu Chiokike nyernu anụ, ma anụ nwernu rikne o gwuzogidne kpakara nhne ke Ekwensu neeziya.

¹² Kwnornu nụ a zá nọolu ọgwu megidne ele badnụ etekne. Kọvu a nọolu ọgwu megidne kpakara ele ọchichi, megidne kpakara rikne, megidne kpakara ele nwe ọwa ke ọchichiri ka, megidne ele renwu ojo ke zi n'olu.

¹³ Kam kpayaru, anu woru kpakara mgwna ogwnu Chiokike nyernu anu ma anu nwernu rikne o gwuzo n'obochi ojo, nga anu mezuru kpakara nhne, o gwuzoru chim chim.

¹⁴ Anu jiknenu o lu ogwnu, anu suru ezi oka n'ikwnu anu ke nu lele ajni. Anu woru ome mma ke nu lele mbno nu mkpoma anu.

¹⁵ Anu gweru masi ojiknenu o kpo okwo izi oma ke udno woru n'ochi lele okoro-ochi.

¹⁶ Tukwasi n'olu ka, anu gweru okwnata mkpoma nu Chiokike ke nu lele ekpeke anu jeeji mesni kpakara mkpakwu bekwnu ke Ekwensu naagba megidne anu.

¹⁷ Anu kpuru oznohia nu risi anu ke nu lele okpu-ogwnu. Anu gweru ama-ogwnu ke Enine neenye, ama-ogwnu wam bu ikwu-onu Chiokike.

¹⁸ Anu neekpe okpukpe lele kpa Enine noodu anu ige obula n'onodi obula. Anu neese nse kpa anu neekpe okpukpe, anu gwuzosi rikne kpa anu neekpenu kpakara ele Chiokike okpukpe.

¹⁹ Anu neekpenu m okpukpe masi ma Chiokike nyee m ikwu-onu ke me kwesiri o kwu ige obula me kpumernu onu m, ma m gweru onu rikne mee ele badnu mahia nhne miri emi ke izi oma,

²⁰ ke me bu nye izi a n'oro ikelu. Anu kpenu m okpukpe ma m kpo m okwo izi oma enwe ogwnu lele kpa me kwesiri.

Obekwu ikwu ipne-aznu

²¹ Taijikosi bu nnwo nda ai a whnurnu n'anya nye be kwesiri o kwnata mkpoma n'ernu Nyenwe ai jaakanu anu kpakara nhne gbasiri m, ma anu mahia kpa me nu, nu nhne me neeme.

²² Ka bu nhne me kwno neeziyanu anu ya, ma anu mahia kpa a nu, ma o kasi anu mkpoma.

²³ Udno ke Chiokike Nda ai nu Nyenwe ai Jizosi Karaisi dazinu ele kweru nu Karaisi, o mee anu whnu ibne anu n'anya kpa anu naakwnata mkpoma nu Karaisi.

²⁴ Oru ke Chiokike dazinu kpakara ele whnurnu Nyenwe ai Jizosi Karaisi n'anya n'ez.

**Okwukwo izi Pölu
gbaznenu
Ele Filipaj
Nhne gbasiri okwukwo izi ka**

Pölu gbarü okwukwo izi ka nga o zi n'ikelu n'ootunu ogbako Chiokike ke zi nü Filipaj mmamma kwnornu nkesi nü okpukpe be. Ogbako Chiokike ke zi nü Filipaj bü ogbako mbom Pölu miteru n'eli ele Iropu. O kannu ele Karaïsi zi nü Filipaj nü be kwesiri o ta awññwhnu lele kpa Karaïsi taru, nü kpa Pölu naata awññwhnu ige wam. O buru kpa, ele Filipaj gweru a lele ngözi be nahjaru hite n'okwnata mkpoma be nwernu nü Karaïsi.

Agwna ele zi nü Filipaj nookwu nü ele badnu kwesiri o bita Iwu Mozizi, o buo kpa, nü be nwée ozhohia. Pölu kanu be neeze ele nü lele nkita (3:2-11). Snarnima nü ovu oso n'önu jihjaru okwukwo izi ka, kwnornu nü Pölu muhiaru kpa o gweru onodi obula o whññru ehni a mee nhne buru oma. Ovu sora a n'önu k'agida kpa o chenwanyarnu ovu oma ogbako Chiokike zi nü Filipaj gesiri a. Pölu kaa nü ele ke Chiokike kwesiri o wu n'udno, neeche echiche lele kpa Karaïsi neeche.

Nhne zi n'okwukwo izi ka

Obekwu ikwu nü okpukpe (1:1-11)

Nhne budnu bunu Pölu (1:12-30)

Nhne atu ke Karaïsi (2:1-18)

Nhne gbasiri Timoti nü Epafroditusi (2:19-30)

Ele Chiokike nabnanyarnu (3:1--4:9)

Pölu n'ootnu ele Filipaj mmamma (4:10-20)

Obekwu ikwu ipne-aznu (4:21-23)

¹ Pölu nü Timoti, ele izi Jizosi Karaïsi, naagbaznenu kpakara rümu Chiokike ke zi nü Karaïsi Jizosi ele wu nü Filipaj, be nü ele neelekota be, nü ele ernu okwukwo.

² Oru nü udno ke hi n'aka Chiokike Nda aï nü Nyenwe aï Jizosi Karaïsi dazinu anu.

Okpukpe nü ötu mmamma

³ M n'ootnu Chiokike mmamma ige obula me chenwanyarnu anu.

⁴ M ji m snarnima neekpenu kpakara anu okpukpe ige obula

⁵ kwnornu nü me nü anu bü ele ernu n'izi oma hite n'obochi mbom tem du kitna.

⁶ M kwnataru m ovu nü ka, nü nye wam ke panizoru ernu oma nü rime anu, joronzu ernu wam tem du n'obochi Karaïsi Jizosi jaava.

⁷ O kwesiri me vuru nhne ka nü mkpoma gbasiri anu, hne anu zi nü ovu m, ma m zi m n'ikelu, ma m zi naagbanu izi oma akebne, möbu naakwnagidne a, kpakara anu neekheja igwe n'oru Chiokike nyernu m.

⁸ Chiokike bü nye akebne m, kpa o n'ogwnu m o whnu anu anya hite n'owhñun'anya Karaïsi Jizosi.

⁹ Ka bü okpukpe m, ma owhñun'anya anu n'ehni ibne anu naaba aba, hite nhne omuma nü oghohia,

¹⁰ ma anu nwernu rikne o mahja nhne ke kakwo mma, ma anu ziri snam, nwée ötna tem du n'obochi Karaïsi jaava.

11 Mkpuru ke ome mma ke hi nu Jizosi Karaïsi va jihia nu rime anu, ma igwugwu nu oznarni buru ke Chiokike.

*Ikelu Polu mernu izi oma
gbasa*

12 Rumu nda m, m pioru ma anu mahia nu nhne obula ke dnakwasiri m, mernu izi oma gbasas.

13 Kpakara ele nse zi n'oro eze nu kpakara ele berere mahiaru nu m zi m n'ikelu kwnornu Karaïsi.

14 Ikelu be turu m mernu ele kakwo n'esilawuru rumu nda ai nu Nyenwe ai nwe onu rikne o kwu ikwu-onu Chiokike n'ovu siri rikne, be nwée ogwnu.

15 O bu n'ezi nu agwna be nookpo okwo izi oma n'owho-anya nu omegidne, kovu ele berere nookpo okwo izi oma Karaïsi kwnornu ovu oma.

16 Ele ipne-aznu neeme kparam n'owhnnun'anya, kwnornu nu be magwu nu m zi m hna kwnornu izi oma.

17 Ele ke mbom nookpo okwo Karaïsi kwnornu nhne be jeerihia nu rime a, o buo n'ezi oka, ma be mee nhne joogbu m igbugbu kpa me zi n'ikelu.

18 Kini mee? Ma be kpuru okwo izi oma n'ezi oka mabu n'aghigho, nhne zi mkpa bu be nookpo okwo Karaïsi. Ka bu risi nhne me kwno nonwodna.

M jaazikoriri nonwodna.

19 M maam nu kpa anu neekpenu m okpukpe, hite n'oyi aka ke Enine Jizosi Karaïsi, kpakara nhne dnakwasiri m joburu nhne jeeme m whuya n'ikelu.

20 Ka bu nu olile anya m siri rikne, nu iwhnerne jootu m n'apna obula, kovu m jeenwe ovu siri rikne ma kitna ma ige obula nu be jeegwelizo Karaïsi olu n'ehni m, hite nu budnu mabu n'ewnu.

21 Kwnornu nu kpa me zi budnu, m bu m ke Karaïsi, me nwu, o bu mbnarna.

22 O buru me ziri budnu n'anogehni, o joburu ernu ke jaami mkpuru. Ndaa ke me jeegweru? M maam ke ka mma.

23 Nhne lawuru ka zi nodoka m, o noogwnu m me la ma me nu Karaïsi daziri, bu ke kakwo mma.

24 Kovu o zi mkpa me daziri budnu kwnornu anu.

25 Ka dnornu m anya, m magwu m nu m jaadaziri, me nu anu jaazigidne, ma anu so oso, nwe snarnima n'okwnata ovu anu.

26 Ka bu me nu anu ziri, ovu oso n'onu anu nu rime Karaïsi jaazi agida kwnornu m.

27 Nhne nu nhne obula mene, anu wu budnu ke kwesiri izi oma Karaïsi. Me va o whnu anu mabu m vage m, mabu m nurnu m nhne gbasiri anu hne me zi, m jaamahia nu anu gwuzosiri rikne n'otu enine, nolu ogwnu lele otu badnu kwnornu okwnata ovu ke izi oma.

28 Anu kwe ele neemegidne anu kpasu anu ogwnu n'apna obula. Ka jobu nhne jeegesi be nu Chiokike joolulu be, kovu Chiokike jooznohia anu.

29 Kwnornu nu Chiokike nyernu anu oghere, o buo o kweru nu Karaïsi kpou, kovu o tanu a awhnuwhnu.

30 Me nu anu nolu otu ogwnu. Anu whnurnu kpa me luru ogwnu wam n'ige wheru ewhe, kitna anu nonu nu m zi koriri m naagba otna.

2

Badnu ogwedna ehni a eli

1 O buru nu ogba inwe zinu ai nu Karaïsi, o buru nu onuta mkpoma hite n'owhnnun'anya a, o buru nu omekorita zi n'Enine Nso, o buru nu ovu oma obula nu obirizi,

2 anụ mee ma ovu ọso n'ọnu m zu ozu, anụ nwe otu echiche, otu ọwhnun'anya, anụ ịrị n'otu enine nụ echiche.

3 Ọ zà nye ọbula mee nhne kwnornu nhne o jeenwehija mọbu ovu ọjo, kọvu hite nụ badnụ ogwedna ẹhni ẹli, nye ọbula kweru nụ nye berere ka a mma.

4 Ọ zà nye ọbula ke lebna anya nụ nhne ke a kpọi, kọvu nụ nhne gbasiri ele berere.

5 Nye ọbula nwe ovu ke Karaịsi Jizọsi.

6 Nye, ọ bụ n'ezị nụ ọ bụ Chiokike
méne a lele nhne anya rikne nụ ya nụ Chiokike hna.

7 Ọ sigbasiri kpakara nhne o nwernu,
o gweru ọnodi ke nnwọ izi,
be mee a lele badnụ etekne.

8 Ọ whụya iwhne lele badnụ etekne,
o gwedna ẹhni a ẹli,
o bno nsnị dū n'ẹnwu,
bụ ẹnwu ke olu ọgba.

9 Kam kpayarū, Chiokike jiri gwelizo a olu kakwo kpakara nhne,
nyega a rẹwhna ke kakwo kpakara rẹwhna,

10 ke bụ nụ rẹwhna Jizọsi kpakara mpnerne ọchi joogbu,
nhne ke zị n'oligwe, ma n'ọwa, ma nụ mkpururu ọwa,

11 kpakara riro jookwuhija nụ Jizọsi Karaịsi bụ Nyenwe aị,
ma be nyee Chiokike Nda igwugwu.

Noonwu lele mbọ

12 Kam kpayarū, ele me whnurnu n'anya, anụ noobno nsnị lele kpa anụ neeme, ọ bụo nụ ruwhnu m kpọi, ke kakwo, nga me zila ndundu. Anụ gweru ogwnu nụ ọznu biri biri rnuhia ọznohia anụ.

13 Kwnornu nụ ọ bụ Chiokike nye nọornu ẹrnu nụ rime anụ, nye neeme anụ kweru hite nụ mkpọma anụ, neeme nhne lele kpa echiche a jiri zị.

14 Kpa anụ neeme kpakara nhne, anụ gweme ọtamu nụ aگیرigo,

15 ma anụ bụru ele nwée ọtna, ele zị snam, rumu Chiokike ele nwée ọru nụ rime ebiri ele ọjo ka Һiri aghị, hne anụ noonwu lele mbọ n'ọwa.

16 Anụ jikwaru ikwu-ọnu ke bụdnu ka aka rikne, ma m gweru m anụ mee oknomokno n'ọbochi Karaịsi, ke jegesi nụ m gbáge m ẹso etekne, mọbu ọ dọgbu ẹhni m n'ẹrnu bụo nhne etekne.

17 Ọ bụbedi nụ be ịowusi ọvnarna bụdnu m lele ariohna manya n'omezu ariohna, lele kpa ẹrnu ọkwnata ovu anụ bụ ariohna anụ kwannụ Chiokike, ovu nọoso m n'ọnu, m sno m anụ ọnonwudna.

18 Anụ n'iwhuru anụ snornu m nwe ovu ọso n'ọnu nụ ọnwudna.

Nhne gbasiri Timoti

nụ Epafroditusi

19 M neele anya nụ Nyenwe aị jeekwe me zianu anụ Timoti ige matị, ma ovu sọ m n'ọnu nga me ịonu izi gbasiri anụ.

20 M nwée m nye berere nụ lele ya, nye nhne gbasiri anụ neemetu nụ mkpọma n'ezị.

21 Kwnornu nụ nye ọbula neele anya nụ nhne ke a, ọ bụo ke Karaịsi Jizọsi.

22 Kọvu anụ magwū nụ Timoti gesiri ẹhni a lele nnwọ nụ nda a, o znenu m izi, snornu m rnụ ẹrnu izi ọma.

23 M neele anya nụ m jeeziya a ige matị kpa nhne jaaganu hna me zị.

24 M kwnatarū m Chiokike ovu nụ me n'iwhuru m jaava whnū anụ ige matị.

²⁵ Kòvụ m whnụrnu m nụ ọ bụrụ ọma me zihnahie Epafroditusi, nnwọ nda m, nụ nye ọrnu nụ nye ọgwụ ibne m, nye bụ masị nye izi anụ, nye anụ ziyannu m o lebna anya nụ mkpa naakpa m.

²⁶ Ọ nọogwnusi a rikne ọ whnụ anụ anya, kwnornu nụ anụ nurnu nụ ọ rjaru ẹhni igbugbu.

²⁷ N'ezị, ọ rjaru ẹhni igbugbu, ọ gwnarnụ matị ọ nwụ. Kòvụ Chiokike dọnnu a obirizi, ọ bụo ya kpọi, kòvụ ma me, ọ zị me nwe nhne igbugbu n'olu nhne igbugbu.

²⁸ Kam kpararụ, ovu nọoso m n'ọnu k'agịda o ziya a. Nga anụ jọowhnu a, ovu jọoso anụ n'ọnu, mkpọma jáala m mini berere.

²⁹ Anụ gweru okne ovu ọso n'ọnu nabnanya a nụ rẹwhna Nyenwe aị, anụ sọ ele nụ lele ya anya k'agịda.

³⁰ Kwnornu nụ ọ gwnarnụ matị ọ nwụ nụ ọrnu Karaịsi. O gweruru bụdnu a n'aka a nọornu ọrnu kpa anụ nwée rikne rnụ.

3

Ezi ome mma

¹ N'ipne-aznụ, rụmu nda m, anụ nwudna ọnwudna nụ Nyenwe aị. Ọ zá noogbu m igbugbu ọ gbanụ anụ otu nhne ka berere, ka bụ ma ọ bụnu anụ ọma.

² Anụ neezeru ẹhni anụ kwnornu rụmu nkịta, ele aruru-ẹli wam, ele noogbuja anọ-ẹhni.

³ Kwnornu nụ aị ele be kparụ nka n'ezị, bụ ele neekpenu Chiokike hite n'Enine a, ele ji Karaịsi Jizọsi naanya risi, ele zá nọotukwasi anọ-ẹhni mkpọma.

⁴ Ọ bụ n'ezị nụ m nwernu m nhne nụ lele ka me ji nọotukwasi mkpọma. Ọ bụrụ nụ badnụ ọbula nwernu nhne o jiri tükwasi mkpọma n'anọ-ẹhni, m nwernu m karukwo.

⁵ Be kparụ m nka nga me gbarụ n'ọbochi ọsato, nye Izireli, nye avnurnu Benjamini, m bụ m nye Hiburu n'ezị. Nụ nhne gbasiri iwu, m bụ m nye Farisi,

⁶ nye nwernu bekwnu nụ mkpọma, naakpakna ọgbako Chiokike ẹhni. Nụ nhne gbasiri ome mma ke hi n'iwu, m nwée m ọtna.

⁷ Kòvụ kpakara nhne ke bnannụ m iru, bụ nhne me gwnurnu nụ nhne etekne kwnornu Karaịsi.

⁸ Owe! M gwnurnu m kpakara nhne lele nhne etekne ma m mahia m nhne ke kakwo bụ ọ mahia Karaịsi Jizọsi Nyenwe m, nye me kwnornu nụ a whu mwhu kpakara nhne. M gwnurnu m be lele nhne bnana nụ nhne ma m rihia m Karaịsi nụ iru,

⁹ ma me nụ ya bụrụ otu, hne me nwée ome mma ke aka m ke hiri n'iwu, kòvụ ome mma ke hiri n'okwnata ovu nụ Karaịsi, ka bụ ome mma ke hi n'aka Chiokike hite n'okwnata ovu.

¹⁰ M pioru m ọ mahia Karaịsi nụ iknernema olizọ n'ẹnwu a, ma m kehia m igwe n'awhnụwhnu a, nụ lele ya n'ẹnwu a,

¹¹ ọ bụrụ nụ o jeekwe omume, ma m dụ m n'olizọ n'ẹnwu ke ele nwurnu ọnwu.

Ọgbazne nụ ruwhnu

¹² Ka zá neegesi nụ m nwehiala m kpakara nhne ka, mọbu nụ m dula m ozu ozu. Kòvụ m naagbalị ma m nwudne m nhne wam, ke bụ nhne Karaịsi kwno nwudne m.

¹³ Rụmu nda aị, m zá m nọogwnu ẹhni m nụ m ji m a n'aka. Kòvụ ka bụ nhne me neeme, m neechezu kpakara nhne ke zị m n'aznụ, nọodosni aka m nụ nhne ke zị m nụ ruwhnu.

¹⁴ M naagbalí neezne nù ruwħnu, ma m gbahĩa m nhne n'eso, ke bụ nhne Chiokike kwno sukwu m zne oligwe kwnornu Karaĩsi Jizọsi.

¹⁵ Kam kpayarụ, kpakara aị ele sozuru lele ele Karaĩsi nwernu mkpọma ka. O bụru nù nye ọbula n'esilawuru anụ rị nhne zị ichne, Chiokike jeemé a o dno anụ anya nkari nkari.

¹⁶ Ngwa ma a yisi ẹhni jikwaru kpakara nhne a nwernu nkari.

¹⁷ Rụmu nda m, anụ snornu ele sno nhne atụ m, anụ hnata ele noowu bụdnu lele kpa a znirni anụ ama.

¹⁸ Lele kpa me kannụ anụ agida ige, kpa me ji anya-mini ẹkwna naakanụ anụ kịna, agida ele badnụ noowu bụdnu lele ele irno ke ọgba Karaĩsi.

¹⁹ Okwukwo bụdnu be bụ mwħu, chi be bụ rụwho be, nhne iwħnerne bụ igwugwu be. Kpakara mkpọma be tükwasiri nù nhne zị n'owa.

²⁰ Kọvu a bụ rụmu oligwe. A zị neese Nye Ọznohia aị ke jeehi n'oligwe va, nye bụ Karaĩsi Jizọsi.

²¹ O jeegweru iknernema wam o jiri megbu kpakara nhne, bĩa be nù mkpururu ọchi a, gbanwo anọ-ẹhni aị ka ke nwée rikne, mee a ọ nù lele ke a n'igwugwu.

4

¹ Rụmu nda m, anụ bụ ele me whnurnu n'anya, ele ọ nọogwnu m ọ whnụ anya, anụ bụ ovu ọso n'ọnu m nù ọgwo ẹrnu m. Anụ gwuzosi rikne nù Nyenwe aị, ele me whnurnu n'anya.

Ezni

² M naariასno Udia nù Sintike, be ziri n'udno, kwnornu nù anụ ele ke Nyenwe aị.

³ M naariასno masị i, nye ẹrnu ibne m, yinu ele rinya ka aka ma be ziri n'udno. Kwnornu nù be sno m dogbu ẹhni be n'ẹrnu ọkpo okwo izi oma, be nù kilementi nù ele ẹrnu ibne m ele berere, ele be gbarụ rẹwhna be n'okwukwo ke bụdnu.

⁴ Anụ nwudna ọnwudna nù Nyenwe aị ige ọbula. M kwu kwno a berere, anụ nwudna ọnwudna.

⁵ Anụ mee ma kpakara ele badnụ mahĩa ovu oma anụ. Nyenwe aị zị ndundu.

⁶ Mkpọma lá anụ mini kwnornu nhne ọbula, kọvu anụ gweru okpukpe nù ọtu mmamma chete kpakara nhne naakpa anụ nù ruwħnu Chiokike.

⁷ Udno Chiokike ke kakwo kpakara ọghohia chekwata ovu anụ nù echiche anụ nù rime Karaĩsi Jizọsi.

⁸ N'ipne-aznụ, rụmu nda aị, anụ naari ọriri nhne bụ ezi ọka, nhne ọbula bụ nhne nwernu igwugwu, nhne ọbula ke bụru oma, nhne ọbula ke zị rịchna, nhne ọbula ke be whnurnu n'anya, nhne ọbula ke nwernu ọntutnu oma, ọ bụru nhne ọbula ke ka mma, ke kwesiri ọznarni.

⁹ Kpakara nhne anụ mụhiaru, ke anụ nahiaru nù ke anụ nurnu n'ọnu m, mọbu ke anụ whnurnu nù rime m, anụ neeme be. Chiokike ke udno jaadazinu anụ.

Polu tũnu ele Filipaj

mmamma

¹⁰ M nọonwudna ọnwudna nù Nyenwe aị kwnornu nù anụ gwnaknernụ ẹrnu anụ ke gbasiri m. Nhne gbasiri m neemetụ anụ nù mkpọma, kọvu anụ nwée oghere o gesi a.

¹¹ M zá m nookwu ka kwnornu nù mkpa naakpa m, kọvu nù m maam kpa ọ daziri nù rụwho ojiji n'ọnodi ọbula me whnurnu ẹhni m.

¹² M magwu m kpa o zi nu mkpa, m magwu m kpa o zi nu ige me nwejiri nhne. M muiharu m nhne tugwaru otugwa ke ruwho ojiji n'onodi obula, mibu agwnu wiri mibu nu ruwho jiri eji, o nwernu agida nhne mibu lele nye nhne kogwu.

¹³ M jeemeli kpakara nhne hite nye wam ke neeme m gbasiri rikne.

¹⁴ O buru oma nu anu snornu m kehia igwe n'awhnuwhnu m.

¹⁵ N'ezi, okwolem anu ele Filipaj bu ele yinnu m aka nga me panizoru neezni izi oma. Nga me hi nu Masidonia n'owhuya, o za ogbako Chiokike obula ke snornu m nu nhne gbasiri okesi nu onahoru nhne, okwolem anu.

¹⁶ O bubedi nga me zi nu Tesalonika, anu gweyanu m nkesi ige obula me zi nu mkpa.

¹⁷ Ka za neegesi nu m noopio nkesi, kovu m noopio nhne jeeme anu nwehia nhne buru oma.

¹⁸ M nahjaru m kpakara nhne anu ziyaru, tukwasi kwno n'olu a. Anu gweyanu m kpakara nhne ke zi m mkpa, ke me nahjaru m n'aka Epafroditi. Kpakara be bu nhne nwernu eknarna oma, arjohna ke n'oso Chiokike ovu n'onu ke o nahoru.

¹⁹ Chiokike m jeenye anu kpakara nhne ke zi anu mkpa, hite n'agida ekwnu a ke zi igwugwu nu Karaisi Jizosi.

²⁰ Chiokike Nda a nwe igwugwu du okwnukokwnu. Amim.

Obekwu ipne-aznu

²¹ Anu bekwu kpakara ele ke Chiokike ke zi nu Karaisi Jizosi. Rumu nda ele me nu be zi neebekwu anu.

²² Kpakara ele Chiokike zi ns'o neebekwu anu, ke kakwo ele zi n'ezi-nu-oro Siza.

²³ Oru ke Nyenwe a Jizosi Karaisi dazinu enine anu. Amim.

**Ọkwukwo izi Pọlu
gbaznenu
Ele Kọlosi
Nhne gbasiri ọkwukwo izi ka**

Kọlosi bụ ẹli-ọhna ke zị mkpa nù rime Esia Matị. Pọlu nye gbarụ ọkwukwo izi ka znélele Kọlosi, kọvu ọ nurnu nù ele Karaịsi zị pji gwuzosiri rikne n'ọkwata ovu be (1:3-7; 2:6,7). Be nurnu izi ọma hite n'ọnu otu nye be kwu Epafarasi nye wu pji (1:7; 4:12,13), kọvu ya nù Pọlu zị nù ikelu (Failemoni 23) n'ige Pọlu gbarụ ọkwukwo izi ka (1:14; 4:3,10,18).

Agida ele zị nù ọgbako Chiokike ke zị nù Kọlosi bụo ele Ju (1:27), ke kpayarụ agida okpukpe zị ichne ichne nù omen'ẹli noopio o megbu be. Pọlu pioru be mahia nù Karaịsi zị n'oligwe nẹchi kpakara rikne ke zị n'ọwa (3:1). Ka neegesi nù be jeekpenu Karaịsi kpọi.

Karaịsi bụ oiyi ke Chiokike, nye be whnú anya.

Karaịsi bụ nye risi kpakara nhne Chiokike keru.

Ọ masiri Chiokike o mee kpakara nhne wuru nù rime Karaịsi.

Ọ mernu ka ma ya nù kpakara nhne ziri n'udno (1:15,19,20a).

Nhne zị n'ọkwukwo izi ka

Obekwu ikwu (1:1,2)

Ọtu mmamma (1:3-14)

Badnù nù ẹrnu Karaịsi (1:15---2:19)

Budnu ikne nù rime Karaịsi (2:20---4:6)

Obekwu ikwu ipne-aznù (4:7-18)

¹ Mawa, Pọlu, nye izi Karaịsi Jizọsi lele kpa echiche Chiokike jiri zị, nù nnwọ nda aị Timoti,

² naagbaznenu ru mu Nda aị ele zị nsọ, ele kwesiri ọkwata mkpọma nù Karaịsi, ele ke zị nù Kọlosi ọkwukwo. Oru nù udno ke Chiokike Nda aị dazinu anụ.

Pọlu turu mmamma

³ A nọotunu Chiokike mmamma, Nda Nyenwe aị Jizọsi Karaịsi, neekpenu anụ okpukpe ige ọbula.

⁴ Kwnornu nù a nurnu nhne gbasiri ọkwata mkpọma anụ nù Karaịsi Jizọsi nù ọwhnun'anya anụ nwernu hne kpakara ele nsọ Chiokike zị.

⁵ Olile anya ke be bitannu anụ n'oligwe neenye anụ ọkwata mkpọma nù ọwhnun'anya ka. Anụ nurnu nhne gbasiri olile anya ka n'ezi ọka ke izi ọma,

⁶ bụ izi ọma ke vakwnusiri anụ. Izi ọma ka naamịya mkpuru, nooso masi nù kpakara ọwa, lele kpa o neeme n'esilawuru anụ hite n'ọbochi anụ nurnu a, ghohia masi oru Chiokike n'ezi.

⁷ Anụ nurnu izi ọma ka n'ọnu Epafarasi nye izi ibne aị a whnurnu n'anya, nye bụ nye ẹrnu Karaịsi nye kwesiri ọkwata mkpọma n'ọnodi aị.

⁸ Ọ kannu aị nhne gbasiri ọwhnun'anya anụ ke Enine Chiokike nyernu anụ.

⁹ Kam kpayarụ, hite n'ọbochi a nurnu nhne gbasiri anụ, a zị neekpenu anụ okpukpe, nọorio Chiokike ma anụ mahia echiche a nkarị nkarị hite nù kpakara akoniche nù ọghohia ke Enine Chiokike neenye.

¹⁰ A nọorio ma anụ wuru budnu ke jeegweyanu Nyenwe aị igwugwu, neeme nhne jaamasị Nyenwe aị n'apna ọbula, naamị mkpuru ọma zị ọdo n'odo. Ka jeeme anụ nooso, naamahia Chiokike nkarị nkarị.

11 Anụ bụrụ ele gbasiri rikne hite nụ kpakara rikne nụ iknernema ke zị igwugwu Nyenwe aị ma anụ nwehịa ọsnuta mkpọma nụ ndidi. Anụ gweru ovu ọso n'ọnu

12 nọotunu Nda aị mmamma, nye mernu anụ nwernu igwe n'esilawuru rụmụ Chiokike zị nsọ n'eli-eze ke iwhe.

13 Kwnornu nụ Chiokike dọhiaru aị n'aka nye wam nęechi nụ rime ọchichiri, kwubnanya aị n'eli-eze ke Nnwọ a, nye ọ whnurnu n'anya.

14 O nyernu aị ọgbahia ke bụ ọgbaru mmehie.

Karaịsi kakwo kpakara nhne

15 Karaịsi bụ oyiya ke Chiokike, nye be whnụ anya. Karaịsi bụ nye risi kpakara nhne Chiokike keru.

16 Chiokike keru kpakara nhne hite n'aka a, kpakara nhne ke zị n'oligwe nụ ọwa, nhne anya nọowhnu nụ nhne anya zá nọowhnu, be bụ ele dazị nụ ngadna eze, nọbu ele nwernu rikne nụ ele nęechi ęchi nọbu ele nwernu iknernema. Chiokike keru kpakara nhne hite n'aka a, ma kpakara nhne nyee a igwugwu.

17 Ọ zị tụtụ nhne ọbula, kpakara nhne jikọtaru n'otu nụ rime a.

18 Ya bụ risi ęhni a, ke bụ ọgbako Chiokike. Ya bụ ọpanizo nụ mkpuru mbom ke ele hiri n'ęnwu lizọ, ma ọ bụrụ nye risi kpakara nhne.

19 Kwnornu nụ ọ masiri Chiokike o mee ma kpakara nhne ọ bụ, wuru nū rime Karaịsi.

20 O mernu ka ma ya nụ kpakara nhne ziri n'udno, ma nhne ke zị n'ọwa ma nhne ke zị n'oligwe, ma ya nū be mee udno hite n'ọvnarna a ke ọ wusaru n'olu ọgba.

21 Nū mbom, anụ bụ ele zị ikere hne Chiokike zị nū ele irno n'ovu anụ kwnornu n'ęnu ọjo anụ.

22 Kọvu kịtna, o mernu anụ nū ya ziri n'udno hite n'ęnwu Karaịsi nwurnu n'anọ-ęhni, ma o gweru anụ chete nū ruwhnu a, ele zị nsọ, nwée ọru mọbu nhne be bnornu be,

23 ọ bụrụ nū anụ gwuzosi rikne n'okwnata ovu, ele gwuzo kwem, anụ kwé nhne ọbula gweme anụ n'olile anya izi ọma ke anụ kweru. Ka bụ izi ọma ke anụ nurnu, be kpọru okwo a nū kpakara mkpururu oligwe, ke me Pọlu bụ nye izi a.

Ernu Pọlu

24 M nọonwudna ọnwudna kịtna kwnornu awhnụwhnu me taru nū risi anụ, m ji m anọ-ęhni m mezu nhne ke gwnarnu gbasiri awhnụwhnu Karaịsi taru, kwnornu ęhni a, ke bụ ọgbako Chiokike.

25 M ghoru m nye izi ọgbako Chiokike hite n'ęnu Chiokike nyernu m me zni anụ ikwu-ọnu Chiokike n'ozuzu oke a.

26 Ikwu-ọnu Chiokike ka bụ nhne ke tugwaru otugwa agida ige nū agida ebiri, kịtna, o kpumennu a ele nsọ a.

27 Ọ masiri Chiokike o mee ele ke a mahia nhne tugwaru otugwa ke bụ nū ękwu ke zị igwugwu bụ ke ele bụo ele Ju. ękwu ka bụ Karaịsi nū rime anụ, bụ olile anya nū anụ jeekhehịa igwe n'ebube a.

28 A nọokpo okwo gbasiri Karaịsi, nọodo ele badnụ aka nū nsni, neezni nye ọbula hite n'akoniche Chiokike nyernu aị, ma a gweru nye ọbula chete nū ruwhnu Chiokike nū ozu oke kwnornu Karaịsi.

29 Kam kpayaru, m ji m kpakara rikne Karaịsi nyernu m ke nọornusi ęnu rikne, m nọdogbu ęhni m n'ęnu ka.

2

¹ M pioru m anụ mahia kpa me n̄odogbu ẹhni m n'ẹrnu kwnornu anụ nụ ele zị nụ Laodisia, nụ kpakara ele whn̄ulele m anya.

² Ka bụ ma be kwnagidne be n'ovu, ziri masị n'otu n'owhnun'anya, ma be nwehia kpakara ẹkwu ke ọghohia ke zuru ozu, ka jeeme be mahia nhne tugwaru otugwa ke Chiokike, ke bụ Karaịsi.

³ Kpakara nhne ke tugwaru otugwa zị nụ rime a, ke bụ akoniche nụ nhne ọmuma.

⁴ M naakanụ anụ ka, anụ kwé nye ọbula duwhu anụ hite n'ikwu-ọnu ke n̄oso n'ọnu.

⁵ Ọ bụ n'ezị nụ me nụ anụ zila n'anọ-ẹhni, kovu me nụ anụ zị nụ enine. Ọ n̄oso m kpa me n̄owhnu nụ anụ noowu b̄udnu lele kpa o kwesiri, noogwuzo kwem n'okwnata ovu ke zị nụ Karaịsi.

*Karaịsi neegweya**b̄udnu n'ezị*

⁶ Lele kpa anụ nahiaru Karaịsi Jizọsi lele Nyenwe aị, anụ dazigidne noowu b̄udnu nū rime a.

⁷ Anụ gba ẹgwugwunu nū rime a, anụ wulizọ ẹhni anụ lele ọro kpa o bụ ntụ-ẹli ọro, gbasị rikne n'okwnata ovu lele kpa be znirni anụ, ọtu mmamma jihia ovu anụ.

⁸ Anụ kwé badnụ ọbula duwhu anụ hite nū ikwu-ọnu etekne nū aghigho ikwu-ọnu bn̄ana nū nhne, ke knosiri aka n'omen'ẹli ke ele badnū nū r̄enwu ọjo matị matị ke ọwa ka, b̄uo ke Karaịsi.

⁹ Kwnornu nū kpakara nhne Chiokike bụ wu nū rime Karaịsi n'anọ-ẹhni a.

¹⁰ Chiokike mernu anụ sozu nū badnū nū rime Karaịsi, nye bụ risi kpakara ele nwernu rikne nū ele ọchichi.

¹¹ Be kparū anū nka nū rime a, ke bụ ogweme mmehie anū, o b̄uo nka ke be jiri aka ele badnū kpa, kovu nka ke Karaịsi n'iwhuru a kparū.

¹² Hne be likotarū anū nū ya n'owuwu-mini, be gwelizokota anū hite n'okwnata ovu anū n'iknernema Chiokike, nye mernu Karaịsi hi n'ẹnwu lizọ.

¹³ Anū bụ ele nw̄urnu ọnwu nū rime mmehie, anū bụ ele b̄uo ele Ju be kp̄ala nka. Kovu Chiokike mernu anū snornu Karaịsi ziri b̄udnu, kpa o gbarūnu aị kpakara mmehie aị.

¹⁴ O dokarū kpakara okwukwo be gbarū nū kpakara iwu ke megidn̄ernu aị, o gwem̄e be, kp̄ogidne be n'ogba Jizọsi.

¹⁵ Chiokike nah̄oru kpakara ele ọchichi nū ele nwernu rikne iknernema, kpasị be iwhnerne nū ruwhnu ọhna, neegesi nū o megburu be hite n'ogba Jizọsi.

¹⁶ Kam kpararū, anū kwé nye ọbula gweru nhne anū neeri m̄obu nhne anū n̄onwo, m̄obu nū anū zá naabita mmemem okpukpe, m̄obu ẹnwa ikne, m̄obu Ọbochi Ozukwa Inwe, kpe anū ikpe.

¹⁷ Kpakara nhne ka bụ enine nhne ke jaava, kovu risi nhne bụ Karaịsi.

¹⁸ Anū kwé nye ọbula ke o naamasị o gwedna ẹhni a ẹli nū okpenu ele enine izi mee anū b̄uru ele kwésile, o bụ n'ezị nū nye wam ka nū o whn̄urnu ọwhnurninya gbasiri be, ovu ke badnū a mernu a o b̄uru nye nganga n'etekne.

¹⁹ Nye wam bụ nye gwemernu ẹhni a nū Karaịsi, nye bụ risi ẹhni, nye mernu kpakara r̄uknani nū r̄ekpu ọchi nū aka knekota n'otu. Kpa o n̄oznu kpakara ẹhni, o nooso lele kpa Chiokike neeme a nooso.

²⁰ Anū snornu Karaịsi nw̄u ẹnwu, o mernu anū nwernu ẹhni anū wh̄oga nū rikne r̄enwu ọjo matị matị ke ọwa ka. K̄ini mernu anū noowu b̄udnu lele nū anū bụ ke ọwa, naabita iwu be?

²¹ Bù ke karù, “Anù kpá ka aka, anù ráttù a riro, anù kpá kíyari aka.”

²² Kpakara iwu ka gbasìri nhne ke joowhu kpa ele badnù jiri be rnù ẹ̀rnù mọ̀bu rikwo be, iwu ele ka kno aka nù nhne ele badnù nyernu n'iwu nù iznizni be.

²³ Kpakara iznizni nù kpa nù lele nhne nwernu akòniche, ke bù okpenu Chiokike lele kpa badnù karù be kpenu a, ogwedna ẹ̀hni be n'ẹ̀li, nù ome anọ̀-ẹ̀hni nhne rikne, kọ̀vu be nwéé rikne bnosni echiche ojo ke ovu.

3

Owu b̀dnu zì nsọ

¹ Hne ọ̀ bù nù anù nù Karàìsì hiri n'ẹ̀nwu lizọ̀ n'otu, anù b̀ta ovu anù nù nhne zì n'olu, hne Karàìsì dazì n'ẹ̀li n'akarikwnunga Chiokike.

² Anù neche echiche nù nhne zì n'olu, ọ̀ búo nù nhne zì n'owa.

³ Kwnornu nù anù nwurnu ọ̀nwu, b̀dnu anù nù Karàìsì bù nhne tugwaru otugwa nù rime Chiokike.

⁴ Nga Karàìsì nye bù b̀dnu anù jọowhuya iwihne, anù joosno a whùya iwihne, kehìà igwe n'igwugwu a.

⁵ Anù mee ma kpakara nhne ke bù nhne ọ̀wa nwù ẹ̀nwu, kpakara ome ọ̀yi, ọ̀zi rìchna, ẹ̀gwnurnu nhne ojo, echiche ojo nù anya-kwu, ke nù lele ọ̀kwa rẹ̀nwu.

⁶ Kam kpayarù, ovu owe ẹ̀hni Chiokike naadnakwasì kpakara ele zá noobno nsni.

⁷ Ka bù kpa anù wuru b̀dnu nga anù bù ele ke ọ̀wa.

⁸ Kọ̀vu kítna, anù gweme kpakara nhne ka nù rime anù, ovu owe ẹ̀hni, ọ̀numa, irno ovu, ọ̀kaja, nù ikwu-ọ̀nu zìla rìchna nù mgbele-ọ̀nu anù.

⁹ Ọ̀ zá nye ọ̀bula ghanù ibne a aghalaghala, hne anù gwemernu badnù ọ̀knani wam nù kpakara ẹ̀rnù ojo a.

¹⁰ Anù worulem badnù ikne lele iwo. Chiokike neeme anù zìri ikne ma anù muhìà nhne gbasìri nye kpùru anù.

¹¹ Ọ̀ zá nhne zì ichne nù hne nye Giriki mọ̀bu nye Ju zì, nye be kparù nka nù nye be kpáge nka, nye izne, nye nù lele anọ̀hia,* ọ̀hì mọ̀bu nye búo ọ̀hì, kọ̀vu Karàìsì bù kpakara nhne, nye zì masì nù rime kpakara badnù.

¹² Kam kpayarù, lele kpa ele Chiokike hòhiaru, ele nsọ̀ a, ele ọ̀ whnurnu n'anya, anù woru obirizi, ovu ọ̀ma, ogwedna ẹ̀hni anù ẹ̀li, ọ̀zi wọ̀hnernerne nù ọ̀snuta ovu lele iwo.

¹³ Anù naagidne ibne anù, gbarùnu ibne anù nhne ọ̀bula be mehieru anù. Anù gbarùnu ibne anù lele kpa Chiokike n'iwuru a gbarùnu anù.

¹⁴ Tùkwasi n'olu kpakara nhne ka ọ̀whnun'anya, bù nhne ke neeknegidne kpakara be n'otu n'apna ke zuru ozu.

¹⁵ Anù kweru ma udno ke Karàìsì nẹ̀chi ovu anù, lele ele bù otu badnù, ele Chiokike sukwuru bna n'udno. Anù nọ̀otu mmamma.

¹⁶ Anù kweru ma ikwu-ọ̀nu Karàìsì gweru ẹ̀kwu a wuru nù rime anù, kpa anù jì akòniche neezni ibne anù nhne, neezni be ezni. Anù nọ̀ogwnu eri ọ̀ma, eri ọ̀znarni, nù eri mkpọ̀ma ọ̀so n'ọ̀nu, gweru ovu anù nọ̀otunu Chiokike mmamma.

¹⁷ Nhne ọ̀bula anù neeme, ọ̀ bù n'ikwu-ọ̀nu mọ̀bu nhne aka neeme, anù mee kpakara nhne nù rẹ̀whna Nyenwe aì Jizọ̀sì, nọ̀otunu Chiokike Nda mmamma hite nù a.

Ezi-nù-ọ̀ro nye Karàìsì

* 3:11 nye nù lele anọ̀hia ọ̀kwukwo ke mbọ̀m kwuru: nye Sikitia

18 Ele bụ nnwerne, anụ b́ta ẹhni anụ nụ mkpururu nzi anụ, kpa o kwesiri ele noosno Nyenwe aị.

19 Ele bụ nzi, anụ whnụ nnwerne anụ n'anya, anụ mée be nhne rikne.

20 Ele bụ rụmu, anụ noobnonu ele mụrnu anụ nsnị nụ kpakara nhne, ka bụ nhne Nyenwe aị noopio.

21 Ele nda, anụ mékọ rụmu anụ ovu owe ẹhni, ọ zị inwe gwụ be.

22 Ele ọhi, anụ noobnonu ele nwe anụ n'ọwa nsnị nụ kpakara nhne, anụ neeme be, ọ búo nga be neele anụ anya ma anụ b́ru ele ọma be, kọvu ma nga be zá neele anụ anya. Anụ gweru ovu anụ nọoso be anya n'ezi, nọotu ogwnu Nyenwe aị.

23 Nhne ọbula anụ neeme, anụ gweru kpakara ovu anụ mee be lele ele nọornunu Nyenwe aị ẹrnu, ọ búo lele ele nọornunu ele badnụ ẹrnu.

24 Anụ magwụ nụ anụ jeekheja mkpe n'aka Nyenwe aị lele ọgwo ẹrnu, hne ọ bụ Karaịsi bụ nye anụ nọornunu ẹrnu.

25 Nye ọbula ke nọornu ẹrnu ojo jaanahia ọgwo ẹrnu ojo n'aka Chiokike. Chiokike zá neele badnụ anụ nụ ruwhnu.

4

1 Ele nwe ele ọhi, anụ mee ọhi anụ nhne b́ru ọma nụ nhne kwesiri, kwnornu nụ anụ nwernu Nyenwe anụ ke zị n'oligwe.

Agida ezni

2 Anụ gwéme aka n'okpe okpukpe, neese nse, nọotu mmamma.

3 Anụ kpenu aị okpukpe masị, ma Chiokike gbamanụ aị ọnuhna o zni izi ọma, ma a kpọ okwo nhne tugwaru otugwa ke Karaịsi. Ka bụ nhne mernu me zị n'ikelu.

4 Anụ kpe okpukpe ma m kpọ m okwo izi ọma ka kpa ele badnụ jọoghohia a, ka bụ ẹrnu me kwesiri ọ rnụ.

5 Anụ gweru akọ kpa agwa ọma n'esilawuru ele búo ele Karaịsi. Anụ gweru oghere ọbula anụ nwernu mee nhne.

6 Anụ mee ma ọtnurita ọtnutnu anụ b́ru nhne nwernu ovu ọma, ke nọoso n'ọnu lele arụ, ma anụ mahia nhne anụ jaasa nye ọbula.

Obekwu ikwu ipne-aznụ

7 Taikikosi, nnwọ nda a whnurnu n'anya nụ nye ẹrnu Nyenwe aị ke kwesiri ọkwnata ovu, nye izi ibne aị, jaakanụ anụ kpakara nhne gbasiri m.

8 M neeziyanu anụ ya ma anụ mahia kpa a zị, ma o mee ovu si anụ rikne.

9 Ya nụ Ọnesimosi sno naava, nye bụ nnwọ nda a whnurnu n'anya kwesiri ọkwnata ovu, nye bụ masị otu nụ rime anụ. Be jaakanụ anụ kpakara nhne ke neeme hna.

10 Arisitakosi, nye me nụ a zị n'ikelu neebekwu anụ, ma Makị, nnwọ nwene Banabasi. Anụ nurnu nhne gbasiri a, anụ nabnanya a nga ọ varu.

11 Jizosi, nye be kwu Jositosi neebekwu anụ. Ka kwolem ele Ju ibne m me nụ be sno nọornu ẹrnu ẹli-eze Chiokike, be neeme ovu si m rikne.

12 Epafarasi, nye bụ otu nụ rime anụ nụ nye izi Karaịsi Jizosi neebekwu anụ. Ọ zị naagba ọtna n'okpukpe nụ risi anụ, naariasno Chiokike ma anụ gwuzosi rikne n'ome nhne bụ echiche a, b́ru masị ele sozuru nụ badnụ.

13 M naagbanụ a akebne nụ ọ nọornusi ẹrnu rikne kwnornu anụ nụ ele zị nụ Laodisia nụ Hīrapolisi.

14 Enyi aị Lukwu wọdibia a whnurnu n'anya, nụ Demasi neebekwu anụ.

15 Anụ bekwunu m rụmu nda ele zị nụ Laodisia, nụ Nimfa, ma ọgbako Chiokike zị n'oro a.

¹⁶ Kpa anụ gwnụrnu ọkwukwo izi ka, anụ whnụ nụ be gwnụrnu a n'ogbako Chiokike ke zị nụ Laodisia. Anụ gwnụ masị ọkwukwo izi me gbannụ ele Laodisia.

¹⁷ Anụ kanụ Akịposi, “Whnụ nụ ị rnụkworu ọrnu ị naahjaru n'aka Nyenwe aị.”

¹⁸ Mawa, Pọlu, ji aka m gba obekwu ikwu ka. Anụ chenwanya nụ m zị m n'ikelu. Oru Chiokike dazinu anụ.

**Okwukwo izi
ke Mbom
Polu gbaznenu
Ele Teshalonika
Nhne gbasiri okwukwo izi ka**

Polu panizoru ogbako Chiokike ke zi nu Teshalonika (2:13,14) nga o nornu ernu o ji nooznu ehni a. Nu rime eli-ohna ka zi mkpa nu rime Giriisi bu hne agida ele naakwa renwu ghoru ele Karaisi (1:9). Be bu ele kwesiri okwnata mkpoma, ke mernu izi oma Nyenwe ai gbasaru nu kpakara eli wam (1:8). Eleghi anya okwukwo izi ka jjoburu okwukwo izi mbom Polu gbaru, mabu okwukwo mbom be gbaru nu Tesitamenti Ikne.

Nga agida ele badnu lizoru megidne Polu, o gbazne Atensi. Omekwo, o zizne Timoti zne lekwa kpa ele Karaisi nooso (3:6-10). Nga Timoti hiehnarnu, o nyernu Polu onutnu buru oma gbasiri ele Karaisi zi nu Teshalonika.

Kpa be zi neese ovuva Nyenwe ai, agwna be zima nornu ernu. Mkpoma naala ele berere mini kwnornu nu agwna be nwurnu, kovu Nyenwe ai yavage. Polu gbalj o mee ma be mahja nhne jeeme nga Nyenwe ai jaava (4:13-15), nu kpa be kwesiri o wu budnu be (5:1-11).

Nhne zi n'okwukwo izi ka

Obekwu ikwu (1:1-3)

Nhne atu ke okwnata mkpoma ele Teshalonika (1:4--3:13)

Budnu ke nooso Chiokike ovu n'onu (4:1-12)

Nhne be jeele anya a nga Nyenwe ai jaava (4:13--5:11)

Ezni ipne-aznu nu obekwu ikwu (5:12-28)

¹ Mawa, Polu nu Saɓlasi nu Timoti naagba okwukwo gbaznenu ogbako Chiokike ke zi nu Teshalonika nu rewhna ke Chiokike Nda nu Nyenwe ai Jizosi Karaisi.

Udno nu oru dazinu anu.

² A nootunu Chiokike mmamma nu risi kpakara anu ige obula, neekpenu anu okpukpe.

³ A neechenwanya ernu anu ige obula nu okwnata ovu anu nu ruwhnu Chiokike Nda ai, nu ernu owhnun'anya anu, nu osuta mkpoma anu ke hi nu olile anya anu nwernu nu Jizosi Karaisi.

Nhne atu ke okwnata ovu

⁴ Ele me whnurnu n'anya, Chiokike whnurnu anu n'anya, ka kpayarū o jiri horu anu buru ele ke a.

⁵ Kwnornu nu izi oma a znirni anu vage n'ikwu-onu etekne, kovu o ji iknernema nu okwnagidne ke Enine Nso mee anu mahja ezi oka. Anu magwu kpa a wuru budnu ai n'esilawuru anu.

⁶ Anu ghoru ele muhiaru nhne hite n'ole ai nu Nyenwe ai anya. O bu n'ezi nu anu taru agida awhnuwhnu, kovu anu jiri ovu oso n'onu nabnanya izi a znirni anu hite n'Enine Nso.

⁷ Kam kpayarū, anu jiri buru ele be ji gbu atu n'esilawuru ele kweru ekwe nu kpakara Masidonia nu Akaya.

⁸ Ikwu-onu Chiokike hiri n'onu anu gazu kpakara ohna, o buo nu Masidonia nu Akaya kpoi. Okwnata ovu anu nu Chiokike zuru kpakara owa, o za nhne berere a jookwu gbasiri a.

⁹ Be nookwu nū anū nabnanyarnū aī nkari, nū kpa anū sīgbasiri ọ kwanū rɛnwu neekpenu Chiokike ke zī bụdnu nū ezi ọka.

¹⁰ Anū zī neese Nnwọ a ke hi n'oligwe, nye o mernu o hi n'ɛnwu lizọ, Jizọsi nye dọhiaru aī n'ovu owe ɛhni Chiokike ke naava.

2

Ernu Pọlu nū Tɛsalonika

¹ Rụmu nda aī, anū magwū nū ige aī nū anū dazikotaru n'otu bụo nhne etekne.

² Ọ bụ n'ezi nū a tarū awnhūwhnu nū nhne iwghnerne nū Filipaī kpa anū magwū, kọvu Chiokike yinu aī aka o zni izi ọma a megidne okne ọkpagbu.

³ Nhne a nọorio anū bụo hite nū nhne ojo mọbu echiche ojo, a zá noopio ọ ghonu anū aghigho.

⁴ Tnụnuma, a nookwu ọka lele ele Chiokike kwnatarū ovu yisi izi ọma n'aka aī. A zá noopio o mee nhne jaamasī ele badnū, kọvu a neeme nhne jọso Chiokike ovu n'onu, nye magwū nhne zī n'ovu aī.

⁵ Anū magwū nū a jile ikwu-onu ke jeeme badnū tne eri, a kpúsnine ruwhnu aī n'aghigho, ma a rigbu ele badnū, Chiokike bụ nye akebne aī.

⁶ A zá noopio ele badnū znarnī aī, mọbu anūwa mọbu ele berere.

Ọ bụ n'ezi nū a bụ ele izi Karaīsi, kọvu a kwéle ọ bụru ivu rinya nyee anū.

⁷ Kọvu a nū lele nyerinya neechi nnwọ rẹma n'esilawuru anū, nye anya dūru ẹli, ji wọghnerne nọoznu rụmu a.

⁸ Qwhnun'anya a nwernu hne anū zī kpayarū, ọ masiri aī anū snornu aī kehia igwe, ọ bụo n'izi ọma Chiokike kpọi, kọvu ọ bụru nū o kwe omume, nū bụdnu aī masi kwnornu nū anū zī aī mkpa.

⁹ Rụmu nda m, m magwū m nū anū jeechenwanya, kpa a jiri aka aī lawuru nū ɛnu iwghnehnē nū abalī, ma a gharū ọ bụru ivu rinya hne anū zī kpa a nọkpo okwo izi ọma Chiokike n'esilawuru anū.

¹⁰ Chiokike bụ nye akebne aī ma anūwa masi, kpa a wuru bụdnu zī nsọ, nū ome mma ke nwéle ọru n'esilawuru anū ele kweru ekwe.

¹¹ Anū magwū nū a mesnornu anū lele kpa nda neemesno rụmu a.

¹² A zī naakwnagidne anū, nọosnuta anū ovu ma anū noowu bụdnu lele kpa ele Chiokike sukwuru, ma anū bna n'ẹli-eze a nū igwugwu a.

¹³ Kam kpayarū, a nọotunu Chiokike mmamma ige ọbula kwnornu nū anū nahoru ikwu-onu Chiokike ke anū nurnu n'onu aī. Anū gwérule a lele nū ọ bụ ikwu-onu ke badnū, kọvu ọ bụ ikwu-onu Chiokike ke nọornu ɛnu nū rime anū ele kweru ekwe.

¹⁴ Anū bụru ele sno ọchi ọgbako Chiokike ke zī nū Judiya, ele ke Karaīsi Jizọsi. Anū tarū awnhūwhnu n'aka ele ẹli anū lele kpa ọgbako Chiokike tarū awnhūwhnu n'aka ele Ju.

¹⁵ Ka bụ ele gburu Nyenwe aī Jizọsi nū ele ọwhnurninya, chihala aī. Be mejoru Chiokike mee masi ele badnū nhne rikne.

¹⁶ Ka bụ ma a gharū o kwunu ele bụo ele Ju ikwu-onu Chiokike, ma Chiokike znọhia be. Be zī nọotukwasi mmehie nū risi be, tem ovu owe ɛhni Chiokike dnakwasī be.

Ọ nọogwnu Pọlu

o zne Tɛsalonika

¹⁷ Kọvu rụmu nda aī, nga a whọgaru hne anū zī ige matī n'anọ-ɛhni, ọ bụo nū echiche, ọ nọogwnusi aī rikne ọ whnū anū anya.

¹⁸ Ọ masiri aī ọ vakwnusi anū, agida ige, mawa Pọlu pioru ọ va, kọvu Ekwensu bnosnirni aī.

¹⁹ Anụ bụ olile anya nụ igwugwu nụ ovu oso n'ọnu a nwernu nga Nyenwe aị Jizọsi jaava,

²⁰ N'ezị, anụ bụ igwugwu nụ ovu oso n'ọnu aị.

3

¹ Kpa a nwée rikne naagidne a berere, a kpebi ọ daziri nụ Atensi n'iwhuru aị.

² Kam kpayaru, a ziyaru Timoti nnwọ nda aị nụ nye sno aị nọornu ọnu Chiokike naagbasa izi ọma Karaịsi, ma ọ kwnagidne anụ, mee masi ma ọkwnata ovu anụ si rikne.

³ Anụ kwé nhne ọrnurna mee nye ọbula whọga n'ọnodi a. Anụ magwu nhne ọrnurna jọodonu nye Karaịsi ọbula.

⁴ Nga aị nụ anụ zị, a kannu anụ nụ be jaakpakna aị ẹhni. Anụ whnurnu nụ ka mezuru.

⁵ Kam kpayaru, kpa me nwée rikne gwuzoli nụ mkpoma m nụ nhne gbasiri anụ, m ziya Timoti ma m mahja m kpa anụ nụ n'okwnata ovu. Ovu laru m mini ma nye ọrnurna wam ọ kwnamana anụ n'okwnata ovu, ma ọnu aị nụ risi anụ bụru nhne etekne.

*Izi nkasi ovu Timoti
gweyaru*

⁶ Nga Timoti hi hne anụ zị hiehna, gweyannu aị ọtutnu ọma gbasiri ọkwnata ovu nụ ọwhnun'anya anụ, ọ kannu aị nụ anụ neechenwanya nhne bụru ọma gbasiri aị ige ọbula, nụ ọ nọogwu anụ ọ whnu aị anya lele kpa ọ nọogwu masi aị ọ whnu anụ anya.

⁷ Kam kpayaru, ọnu nda aị, a nwernu ọkasi ovu nụ rime awhnuwhnu aị kwnornu ọkwnata ovu anụ.

⁸ N'ezị ọka, a nwernu bụdnu ikne kwnornu nụ anụ gwuzo kwem nụ rime Nyenwe aị.

⁹ A jéenwe rikne tūnu Chiokike mmamma kpa o kwesiri kwnornu nụ ovu oso n'ọnu a nwernu nū ruwhnu Chiokike nū risi anụ.

¹⁰ A zị neekpe okpukpe iwhehnie nū abal ma a nwe rikne whnu anụ anya ma a nyee anụ nhne ke zị anụ mkpa n'okwnata ovu.

¹¹ Kiti, a neekpe Chiokike Nda aị n'iwhuru a nū Nyenwe aị Jizọsi gbamanu aị apna ma a vakwnusi anụ.

¹² Nyenwe aị mee ma ọwhnun'anya anụ ba aba k'agida nū risi nye ọbula, lele kpa ọwhnun'anya aị zị nū risi anụ.

¹³ Chiokike gba anụ inwe ma anụ ziri snam, ziri masi nsọ nū ruwhnu Chiokike Nda aị nga Nyenwe aị Jizọsi nū ele nsọ a jaava.

4

*Budnu ke jọoso Chiokike
ovu n'ọnu*

¹ Ke ipne-aznu, ọnu nda aị, a riasno anụ wuru budnu ke jọoso Chiokike ovu n'ọnu, lele kpa a noowu. Bikno, anụ neeme kpm neeze nū ruwhnu kwnornu Nyenwe aị Jizọsi.

² Anụ magwu nhne a znirni anụ bụ hite nū rẹwhna Nyenwe aị Jizọsi.

³ Ka bụ nhne Nyenwe aị noopio ma ọ bita anụ nsọ, ma anụ whọga nū nhne ọbula ke zila richna lele ome ọyi,

⁴ ma nye ọbula mụhia kpa o jeejikwaru ẹhni a* nū apna ke zị nsọ nū igwugwu,

* 4:4 kpa o jeejikwaru ẹhni a mọbu, kpa ya nū nnwerne a joowu

⁵ Ɔ bɔ́o ome nhne tɔ iwɛhnerne ke nɔɔgwɛnu be lele kpá ele máa Chiokike neeme.

⁶ Ɔ zá nye mejɔ nwene a nɔ́ nhne nɔ́ kpá mɔ́bu ghɔgbu a. Nyenwe aɔ́ jaata kpkakara ele neeme nhne ojo ka awɛnɔ́wɛnɔ́ lele kpá a kannɔ́ anɔ́, ɔ́ masi anɔ́ aka nɔ́ nsɛi.

⁷ Anɔ́ magwɔ́ nɔ́ Chiokike súkwule aɔ́ ma a bɔ́ru ele zɛ́la rɛ́chna, kɔ́vu ma a wuru bɔ́ɛnu zɛ́ nsɔ́.

⁸ Kam kpayarɔ́, nye ɔ́bula ke juru ɔ́do aka nɔ́ nsɛi ka jɔ́la badnɔ́, kɔ́vu Chiokike nye nyernu anɔ́ Enine Nsɔ́ a.

⁹ Nɔ́ nhne gbasɛ́ri ɔ́whnɔ́n'anya ke rɔ́mu nda, ɔ́ zɛ́la mkpa a gbanɔ́ anɔ́ ɔ́kwukwo, kwnornu nɔ́ anɔ́ magwɔ́ nɔ́ Chiokike znirni anɔ́ whnɔ́ ibne anɔ́ n'anya.

¹⁰ N'ezɛ́, anɔ́ whnɔ́rnɔ́ kpkakara rɔ́mu nda ele zɛ́ nɔ́ Masidonia n'anya. A naarijasno anɔ́ neemekɔ́ kpm neezne nɔ́ ruwɛnɔ́.

¹¹ Anɔ́ gbalɔ́ noowu bɔ́ɛnu zɛ́ wɔ́hɛnnerne, neeme nhne ke gbasɛ́ri anɔ́, anɔ́ nrɔ́si ɛ́rnɔ́ rikne lele kpá a znirni anɔ́,

¹² ma ele bɔ́o ele ke Chiokike nɔ́oso anɔ́ anya, anɔ́ gharɔ́ ɔ́ dnakwarɔ́ n'ɛ́hni nye ɔ́bula.

Nyenwe aɔ́ vava

¹³ Rɔ́mu nda aɔ́, ɔ́ bɔ́o ɔ́ma anɔ́ zɛ́ri nɔ́ ɔ́ma ama nɔ́ nhne gbasɛ́ri ele nwɔ́rnɔ́ ɔ́nwu, ma ɔ́ gharɔ́ gbu anɔ́ igbugbu lele ele nwéé olile anya.

¹⁴ A kweru nɔ́ Jizɔ́si nwɔ́rnɔ́ ɛ́nwu, hi masi n'ɛ́nwu lizɔ́, kpm masi, a kweru nɔ́ Chiokike jeeme ele nwɔ́rnɔ́ ɔ́nwu nɔ́ rime Jizɔ́si jooosno a va.

¹⁵ Lele kpá ikwu-ɔ́nu Nyenwe aɔ́ kwuru, nɔ́ aɔ́ ele zɛ́ bɔ́ɛnu, tem dɔ́ ige Nyenwe aɔ́ jaava, jéenwe rikne beru ele nwɔ́rnɔ́ ɔ́nwu ɔ́sno.

¹⁶ Kwnornu nɔ́ Nyenwe aɔ́ n'iwɛhuru a jeegweru okne nkɔ́li hi n'oligwe hiedna, nɔ́ nkɔ́li nye risi enine izi, nɔ́ ɔ́didna ɔ́kwodu Chiokike. Ele nwɔ́rnɔ́ nɔ́ rime Karaɔ́si jeebe ɔ́so lizɔ́.

¹⁷ Omekwo, be jeegwelizɔ́ aɔ́ ele zɛ́ bɔ́ɛnu neese a nɔ́ be nɔ́ rime erumeru zneknwusi Nyenwe aɔ́ n'olu. Aɔ́ nɔ́ Nyenwe aɔ́ jaazi kpm ɔ́kwɛnɔ́kwɛnu.

¹⁸ Kam kpayarɔ́, anɔ́ gweru ikwu-ɔ́nu ka naakasitaru ibne anɔ́ mkpɔ́ma.

5

Jiknɛ́rnɔ́ kwnornu ɔ́bochi

Nyenwe aɔ́

¹ Kɛ́tɛna, rɔ́mu nda aɔ́, ɔ́ zɛ́la mkpa ɔ́ gbanɔ́ anɔ́ ɔ́kwukwo gbasɛ́ri ige nɔ́ ɔ́bochi nga nhne ele ka jeeme,

² kwnornu nɔ́ anɔ́ magwɔ́ nkari nkari nɔ́ ɔ́bochi Nyenwe aɔ́ jaava lele nye buznu n'abalɔ́.

³ Nga ele badnɔ́ neeche “Udno nɔ́ ɛ́li-ɔ́ji-iyi,” aghɔ́m jaavakwnusi be n'ibiri, lele kpá rime neeme nnwerne zɛ́ rime, be jéenwe rikne gbanahɔ́ru a.

⁴ Kɔ́vu anɔ́ zɛ́la nɔ́ rime ɔ́chichiri rɔ́mu nda aɔ́, ke jeeme ɔ́bochi wam vakwnusi anɔ́ n'ibiri lele nye buznu.

⁵ Hne anɔ́ bɔ́ rɔ́mu ke iwɛhne nɔ́ rɔ́mu ke ɔ́bochi, a wú bɔ́ɛnu ke abalɔ́ mɔ́bu ke ɔ́chichiri.

⁶ Kam kpayarɔ́, a nú lele ele berere, ele neezni anyarna, kɔ́vu a bɔ́ ele tnegwɔ́ etne nɔ́ ele anya dɔ́ru ɛ́li.

⁷ Kwnornu nɔ́ ele anyarna neezni anyarna n'abalɔ́, ele manya, manya noogbu be n'abalɔ́.

⁸ Kpa a bu rumu ke iwhe, a buru ele anya duru eli, ele wogwu okwnata ovu nu owhnun'anya lele mbno mkpoma, a gweru olile anya oznohia kpuru nu risi lele okpu-ogwuu.

⁹ Kwnornu Chiokike sukwule ai ma a ta awnhnuwhnu ke ovu owe ehni a, kovu ma a nwehia oznohia hite Nyenwe ai Jizosi Karaishi.

¹⁰ Jizosi Karaishi nwurnu enwu nu risi ai, ma a snornu a ziri budnu, a tne etne mobu a zi n'anyarna.

¹¹ Kam kpayaru, anu naakasi ibne anu ovu, noowu ibne anu lele oro lele kpa anu neeme nezi.

Ezni ipne-aznu ke Polu

¹² Kitna rumu nda ai, a naariasno anu, anu sobisinu kpakara ele noronu ernu nesilawuru anu, bu ele nooznu anu nu rime Nyenwe ai.

¹³ Anu nyee be igwugwu ke agida, anu whnu be n'anya kwnornu ernu be. Anu wuru n'udno nesilawuru ehni anu.

¹⁴ Rumu nda ai, anu gbalị do ele ime mgwu aka nu nsni, anu kwnagidne ele notu iwheerne, anu yinu ele nwee rikne aka, anu gweru enwerne ovu mesno kpakara badnu nhne.

¹⁵ O za nye ji nhne ojo kwuhnata nhne ojo. Kovu anu gbalị ma anu nwe mkpoma oma n'ehni ibne anu ma kpakara ele badnu ige obula.

¹⁶ Anu nwudna ige obula.

¹⁷ Anu kpe okpukpe ige obula.

¹⁸ Anu notu mmamma n'onodi obula, kwnornu nu ka bu nhne Chiokike noopio n'aka anu nu rime Karaishi Jizosi.

¹⁹ Anu mesni bekwnu ke Enine Nso.

²⁰ Anu ledna izi owhnurninya anya.

²¹ Anu tule kpakara nhne, anu nwukwaru nhne ke buru oma aka rikne,

²² kovu zeru kpakara nhne ke buo oma.

²³ Chiokike ke udno n'iwuru a jaabita anu nsọ n'apna ke zuru ozu. Chiokike bita enine anu, nu mkpuru ovu nu no-ehni anu n'apna nwee oru tem du ige Nyenwe ai Jizosi Karaishi jaava.

²⁴ Nye wam sukwuru anu bu nye kwesiri okwnata ovu, o jeeme nhne ka.

²⁵ Rumu nda ai, anu bikno, kpenu ai okpukpe.

²⁶ Anu bekwutaru ehni anu lele ele sno Karaishi.

²⁷ M ji m rewhna Nyenwe ai naakaa anu gwnu okwukwo izi ka nu nsni kpakara rumu nda.

²⁸ Oru ke Nyenwe ai Jizosi Karaishi dazigidnenu anu.

**Okwukwo izi
ke Ebo
Polu gbaznenu
Ele Teshalonika
Nhne gbasiri okwukwo izi ka**

Polu panizoru nootunu Chiokike mmamma kwnornu okwnata mkpoma nu owhnun'anya ele Teshalonika ke nooso oso ige obula (1:3). O bu n'ezi nu be naagawhe agida mmekpehni, Polu naakanu be nu Chiokike nootule okwnata mkpoma be nwernu nu hne o zi, o za naata be awhnwuhnu (1:4,5).

Be whnurnu okwukwo izi ke otu badnu karu nu Polu gbaru, ke nookwu nu Nyenwe aji valen (2:2). Kovu Polu nododo be aka nu nsnj be kwekwe nye obula duwhu be, kwnornu nu Nyenwe aji javaa tem "nye ojo wam" whuya iwhe (2:3).

Polu jiri okpukpe mesni okwukwo izi ka (3:16).

Nhne ziji n'okwukwo izi ka

Obekwu ikwu (1:1,2)

Otu mmamma nu okpukpe (1:3-12)

Nyenwe aji yaavage (2:1-12)

Buru nye be kwesiri okwnata mkpoma (2:13-17)

Kpe okpukpe, rnu masi ernu (3:1-15)

Okpukpe ipne-aznu (3:16-18)

¹ Mawa, Polu, nu Saikasi nu Timoti naagba okwukwo gbaznenu ogbako Chiokike ke ziji nu Teshalonika, anu ele Chiokike Nda aji nu Nyenwe aji Jizosi Karaishi.

² Oru nu udno ke hi n'aka Chiokike Nda aji nu Nyenwe aji Jizosi Karaishi dazigidhenu anu.

Otu mmamma nu okpukpe

³ A kwesiri nootunu Chiokike mmamma nu risi anu ige obula, ke kakwo kwnornu nu okwnata ovu anu nooso oso kpakara obochi lele kpa owhnun'anya anu nooso masi oso n'ehni ibne anu.

⁴ A jiji anu noolu onu n'esilawuru ogbako Chiokike kwnornu nu okwnata ovu anu gwuzo kwem nu ruwhnu okpakna ehni nu nhne ornurna anu naagawhe.

⁵ Ka neegesi nu ikpe Chiokike ziji snam, ke kpayaru, be jogwnusi anu nu ele kwesiri o bna eli-eze Chiokike ke anu kwno naata awhnwuhnu.

⁶ Chiokike bu nye ziji snam. O jaakpakna ele naakpakna anu ehni.

⁷ O jeeme anu ele be naakpakna ehni zukwaru inwe, ma aila masi. Ka jobu nga Nyenwe aji Jizosi javaa hite n'oligwe, ya nu ele enine izi a ziji rikne nu lele bekwnu noowu va-a-a.

⁸ O jaata kpakara ele ma Chiokike awhnwuhnu nu ele za noobno nsnj izi oma gbasiri Nyenwe aji Jizosi.

⁹ O jaata be awhnwuhnu okwnukokwnu, chimba be nu ruwhnu Nyenwe aji nu igwugwu ke iknerna a.

¹⁰ N'obochi o javaa, ele ke a ziji nsu nu kpakara ele kweru nu ya jeenye a igwugwu, jaa a mma. Anu joosno ele kweru ekwe kwnornu nu anu kweru izi oma a znirni anu.

¹¹ Ka bu nhne a vu n'ovu neekpeni anu okpukpe ige obula, ma Chiokike aji gwnusi anu ele kwesiri osukwu ikwu a, hite n'iknerna a mee kpakara

nhne ɔma anu vu n'echiche mezu nu kpakara nhne anu neeme buru nhne hi n'okwnata ovu.

¹² Ka bu ma be znarni rewhna Nyenwe aɔ Jizosi kwnornu nu anu, ma anu kwnornu ya, hite n'oru Chiokike aɔ nu Nyenwe aɔ Jizosi Karaɔsi.

2

Badnu wam ke noolulu Iwu

¹ Nhne gbasiri ovuva ke Nyenwe aɔ Jizosi Karaɔsi nu kpa a jeezneknwusi a, a naarjasno anu rumu nda aɔ,

² mkpoma lakɔ anu mini, ogwnu tuko anu kwnornu agwna izi owhnurninya, mɔbu izi berere, mɔbu okwukwo izi be naakaa nu a gbaru, ke naakaa n'obochi Nyenwe aɔ jeehieha whelem.

³ Anu kwɛ nye obula duwhu anu n'apna obula, kwnornu nu obochi Nyenwe aɔ jeehieha jaava tem okne olulu wam nu nye wam noolulu iwu va. Nye wam bu nye Chiokike jaata awhnuwhnu okwnukokwnu,

⁴ O joovulizo ehni a olu megidne kpakara chi ele badnu neekpenu. O joogwuzote ehni a n'Oro Nso Chiokike kaa nu o bu Chiokike.

⁵ Anu chenwanya nu m kannu m anu nhne ka nga me nu anu zi.

⁶ Anu magwu nhne noobnosni a ma o gharu o whuya iwhe kɔtna, kovu be jeegesi nye ojo wam n'ige kwesiri.

⁷ Kwnornu nu rikne nye wam noolulu iwu noornu ernu nu mgwugwa kɔtna, kovu nye wam ke noobnosni a jaazi koriri noobnosni a tem be gweme a n'apna.

⁸ Ige wam be jookpume nye wam noolulu iwu, nye Nyenwe aɔ Jizosi jeeji inwe ke onu a gbu nu hite n'onwu va-a-a ke ovuva a.

⁹ Nga nye wam noolulu iwu jaava, Ekwensu jeegesi ernu ndu-ehni o kphie anya zi odo n'odo nu nhne elekema nu ernu tu n'anya,

¹⁰ nu kpakara ernu ojo o jeeji nooduwhu ele noonwu onwu. Be whu etekne kwnornu nu be kwɛle o kweru ezi oka ma Chiokike znɔhia be.

¹¹ Kam kpayaru, Chiokike ziznenu be rikne o mee nhne buo ɔma ma be kweru aghalaghala,

¹² ka bu ma kpakara ele kwɛle o kweru ezi oka, ele whnurnu aruru-eli n'anya buru ele ikpe Chiokike marnu.

Gwuzosi rikne

¹³ Kovu a nootunu Chiokike mmamma ige obula kwnornu anu rumu nda aɔ, ele Nyenwe aɔ whnurnu n'anya. Hite n'opanizo, Chiokike hɔhiaru anu ma o znɔhia anu hite n'ernu Enine Nso ke neeme anu ziri nso, kwnornu nu anu kweruru ezi oka.

¹⁴ Kam kpayaru, o sukwuru anu hite n'izi ɔma aɔ, ma anu kehia igwe n'igwugwu Nyenwe aɔ Jizosi Karaɔsi.

¹⁵ Rumu nda aɔ, anu gwuzoru kwem, anu jikwasi nhne a znirni anu rikne, hite n'ikwu-onu mɔbu okwukwo izi a gbaru.

¹⁶ Kɔtna, Nyenwe aɔ Jizosi Karaɔsi n'iwuru a nu Chiokike Nda aɔ, nye whnurnu aɔ n'anya, hite n'oru o nyernu aɔ nu olile anya buru ɔma, mee a gwuzosi rikne,

¹⁷ gba anu inwe, mee anu gbasirikne nu kpakara ernu ɔma nu ikwu-onu.

3

Anu kpenu aɔ okpukpe

¹ Ke ipne-aznu, rumu nda ai, anu kpenu ai okpukpe ma izi Nyenwe ai gbasia k'agida, nwernu masi igwugwu a lele kpa o zi n'esilawuru anu.

² Kpe masi ma Chiokike d'ohia ai n'aka ele ojo nu ele aruru-eli, kwnornu nu o buo kpakara badnu nwernu okwnata ovu.

³ Kovu Chiokike bu nye kwesiri okwnata ovu, o jeenye anu rikne, kpusni anu hite n'aka nye ojo wam.

⁴ A tukwasiri Nyenwe ai mkpoma nu anu zi koriri neeme neezne nu ruwhnu kpakara nhne a nyernu anu n'iwu.

⁵ Nyenwe ai duru mkpoma anu du n'owhnnun'anya Chiokike nu osnuta mkpoma ke zi nu rime Karaisi.

O do aka nu nsi

gbasiri ime mgwu

⁶ Rumu nda ai, a ji rehna Nyenwe ai Jizosi Karaisi neenye anu iwu, anu zeru nnwo nda obula ke bu nye ime-mgwu, nye za noowu budnu lele kpa nhne a znirni anu.

⁷ Kwnornu nu anu magwu kpa anu kwesiri o snornu nhne atu ai. A buo ele ime-mgwu nga ai nu anu zi.

⁸ A rige wiri nye obula ke a kwula ogwo. Tnunuma, a dogburu ehni ai n'ernu iwhnehnie nu abali, noornu ernu ma a gharu o buru ivu rinya nyee anu.

⁹ Ka buo nu a nwee rikne nahoru anu nhne, kovu ma a buru ele anu joomuhia nhne n'aka be.

¹⁰ Nga ai nu anu zi, a znirni anu nhne ka, "O buru nu nye obula j'ornu ernu, o ri wiri."

¹¹ A nonu nu agwna ele badnu dazi etekne, be mee nhne obula, ele nookwu oka gbasi be.

¹² A ji rehna Nyenwe ai Jizosi Karaisi neenye be iwu, be gbasiri rikne, rnhia nhne be jeeri.

¹³ Rikne gwu anu rumu nda ai n'ome nhne buru oma.

¹⁴ Nye obula ke za naabita nhne a gbaru n'okwukwo izi ka, anu hnata nye wam ama. Anu nu nye wam meko nhne obula, ma iwhnerne tu a.

¹⁵ Kovu anu mee be ele irno anu, anu zni be ezni lele rumu nda.

Obekwu ikwu ipne-aznu

¹⁶ Kitna, Nyenwe ai ke udno n'whuru a nyee anu udno ige obula n'apna obula. Nyenwe ai dazigidnenu kpakara anu.

¹⁷ Mawa, Polu, ji aka m gba obekwu ikwu ipne-aznu ka. Ka bu nhne neegesi nu mawa gbaru obekwu ikwu ipne-aznu ke me gbaru.

¹⁸ Oru Nyenwe ai Jizosi Karaisi dazigidnenu kpakara anu.

**Ọkwukwo izi
ke Mbom
Pọlu gbaznenu
Timoti
Nhne gbasiri ọkwukwo izi ka**

Timoti snornu Pọlu zne izne, rnụ masị ẹrnu izi oma Karaịsi. Timoti nọ Pọlu nwernu otu ọkwnata mkpọma, kam kpayarụ, Timoti nọ lele nnwọ ke Pọlu murnu (1:2). Timoti bụ nye ẹrnu ke Pọlu kwnataru mkpọma k'agịda.

Ọ bụ n'ezi nọ Pọlu gbaznenu Timoti ọkwukwo izi ka, kọvu o kwuru agịda nhne ke gbasiri kpakara ọgbako Chiokike. Pọlu kahjuru kpa be jeeji nọohoru ele risi ọgbako Chiokike. Ọ kaa nọ ele Karaịsi kwesiri neekpenu ibne be okpukpe. A nwernu otu Chiokike nọ Karaịsi Jizọsi, nye nwernu rikne o kwuru aị znekwusi Chiokike.

Nhne zị n'ọkwukwo izi ka

Obekwu ikwu (1:1,2)

Budnu ọgbako Chiokike (1:3---3:13)

Nhne tugwaru otugwa ke okpukpe aị (3:14-16)

Pọlu znirni Timoti ezni (4:1---6:21)

¹ Mawa, Pọlu, nye izi Karaịsi Jizọsi lele kpa Chiokike Nye Ọznohia aị nyernu n'iwu nọ ke Jizọsi Karaịsi nye bụ oilie anya aị.

² M naagbaznenu Timoti nnwọ m n'ezi n'ọkwnata ovu ọkwukwo.

Chiokike Nda aị, nọ Nyenwe aị Jizọsi Karaịsi nyee i oru, obirizi nọ udno.

*Anụ zeru iznizni
aghalaghala*

³ Lele kpa me kannu i nga me neezne Masidonia, daziri n'Efesọsi ma i bosnosi ele zni iwu aghalaghala ma be kwusi o zni nhne nọ kpam.

⁴ Be túwhuma ige o zni ọtutnu ruwhere nọ osnusno omumu kwó okwo. Kpakara nhne ka, tnunuma be jeeme ẹrnu Chiokike ke hi n'ọkwnata ovu neezne nọ ruwhnu, be noovuya okewa.

⁵ Ka bụ ma i zni ele badnu be whnruta n'anya hite nọ mkpọma zị snam nọ ovu buru oma nọ ezi ọkwnata ovu.

⁶ Agwna ele badnu kpawhulem, snornu ikwu-ọnu etekne.

⁷ Be noopio o buru ele zni iwu, kọvu be máa nhne be nookwu, o bụ n'ezi be nookwusi a rikne.

⁸ A magwu nọ iwu buru oma, o buru badnu mekwa a nkari.

⁹ A magwu nọ be kwnóge ele mee mma bíta iwu, kọvu ele noolulu iwu nọ ele risi rikne, ma ele máa Chiokike, nọ ele mmehie, ele zila rịchna, ele tú ogwnu Chiokike, ma ele noogbu badnu, ele noogbu nne nọ nda be,

¹⁰ ele neeme ọyi, nọ omekorita nyerukna nọ ibne a, nọ omekorita nyerinya nọ ibne a, ele neerne ọhi, ele aghalaghala, ele kwú ezi oka n'ikpe, nọ kpakara nhne ọbula ke neemegidne iznizni ka zị snam.

¹¹ Iznizni ka bụ izi oma wam ke zị igwugwu ke hi n'aka Chiokike nye nwe ngozi. Chiokike nyernu m izi oma ka n'aka me bíta.

*Oru Nyenwe aị
nyernu Pọlu*

¹² M nọotunu Karaịsi Jizọsi Nyenwe aị mmamma nye nyernu m rikne, nye gwnusiri m nye kwesiri ọkwnata ovu, mee m buru nye nọonu a ẹrnu.

¹³ O bu n'ezì nù m bu m nye nookwulu a nù mbòm nù nye kpaknarnù ele ke a ẹhni, nù nye mee nhne rikne, kòvù ọ ònù m obirizi kwnornu nù m mernu m kpakara nhne ka nù óma ama nù ókwe ekwe.

¹⁴ Nyenwe aì wùkwasiri m oru a zì agìda nù ọkwnata ovu nù ọwhnun'anya a ke zì nù rime Karaìsi Jizòsi.

¹⁵ Ka bu ikwu-ònu ke kwesiri ọkwnata ovu, ke nye ọbula kwesiri o kweru, Karaìsi Jizòsi varù n'òwa ọ znòhia ele mmehie, me bu nye risi ele mmehie.

¹⁶ Ka bu nhne kpahàru Chiokike jiri ònù m obirizi, me nye risi ele mmehie ma Karaìsi Jizòsi gesi ọsnuta ovu a zì ogologo ma m bùru m nhne atù nyee ele jeekweru nù ya ma be nwehìja bùdnu kwó okwo.

¹⁷ Kìtna, eze ke zì ọkwnukokwnu, nye nwù ọnwu, nye be whnú anya, nye ya nù nsnùnu a bu Chiokike, ya nù nsnùnu a nwe igwugwu nù ọson'anya tim tòm. Amìm.

¹⁸ Timoti nnwọ m, m neenye i iwu ka lele kpa ọwhnurninya be whnúru nù gbasìri ì n'ìge wheru ewhe, snornu nhne be kwuru gbasìri ì, ma i nwernu rikne lù ọgwnu óma lele nye Karaìsi.

¹⁹ Jikwasi ọkwnata ovu i rikne nù ovu zì snam. Agwna ele badnù ghasarù be, ke kpahàru ọgbo ọkwnata ovu be kpuru.

²⁰ N'esilawùru be bu Haijmenousi nù Alẹkizanda ele me sìgbasiri n'aka Setani ma be mụhia gharù o kwulu Chiokike.

2

Kpa be kpe okpukpe

¹ Ke mbòm, m naakaa, anù kpe okpukpe nù risi kpakara ele badnù, nọorio aririo, nọotunu Chiokike mmamma.

² Anù kpenu ele eze nù kpakara ele zì n'ọchichi okpukpe, ma a wuru bùdnu udno nù bùdnu bùru óma, nọotu ọgwnu Chiokike.

³ Ka bu nhne bùru óma, ke nọoso Chiokike Nye Ọznohia aì mkpọma n'ònu,

⁴ kwnornu nù Chiokike noopio ma ọ znòhia kpakara ele badnù, ma be mahìja ezi ọka.

⁵ Otu Chiokike zì, otu nye ibno zì n'esilawùru Chiokike nù badnù. Nye ibno wam bu Karaìsi Jizòsi,

⁶ nye gweru ẹhni a nyega ma ọ bùru nhne ọgbahia ke kpakara badnù. Chiokike gesiri aì ka n'ìge kwesiri.

⁷ Ka bu nhne mernu Chiokike hòhiaru m ma m bùru nye nọokpo okwo nù nye izi. Ka bu ezi ọka, ọ búo aghalaghala, Chiokike hòhiaru m ma m bùru m nye zni nhne ke ezi ọka ọkwnata ovu ke ele búo ele ju.

⁸ M noopio nù rime ọgbako ọbula ele rukna chìlizo aka lawùru zì nsọ n'okpukpe ẹnwè ovu owe ẹhni nù agìgo.

⁹ M noopio ele rinya masì yìri ẹyi lele kpa o kwesiri, ke bùru óma n'anya. Ele rinya kpá risi gburu okne ọnu, mọbu tùru golu mọbu palì, mọbu woru iwo gburu okne ọnu,

¹⁰ kòvù rnù ẹrnu óma, bu ke kwesiri ele rinya ele ka nù be neekpenu Chiokike.

¹¹ Ele rinya kwesiri ọ dazìri bii, mụhia nhne hite n'orube risi.

¹² M kwéle m nyerinya zni nhne mọbu zìri nù risi nyerukna, o kwesiri ọ dazìri bii.

¹³ Kwnornu nù Chiokike beru ọsno kpù Adam, omekwo, ọ kpù Ivu.

¹⁴ Setani dúhiele Adam, kòvù o duhieru nyerinya wam, ọ ghọ nye mmehie.

¹⁵ Kọvu Chiokike jọoznohia ele rinya hite n'omumu nnwọ* ọ bụru nụ be jeenwe ọkwnata ovu, nụ ọwhnun'anya, nụ ọzi nsọ nụ anya udno.

3

Ele risi ọgbako Chiokike

¹ Ka bụ ikwu-ọnu ke kwesiri be kwnata ovu. Ọ bụru nụ nye ọbula ke pioru ọ bụru nye risi ọgbako Chiokike, o noopio nhne bụru ọma.

² Kịtna, nye risi ọgbako Chiokike jọoburu nye nwée ọtna, nye nwernu otu nnwerne, nye anya udno, nye mkpọma ọdu ẹli, nye be nọosonu anya, nye nookwubna ele izne, nye nwernu rikne o zni nhne,

³ nye nwọ okne manya, nye mée nhne rikne, enwerne badnụ, nye zá nookno ọka, nye whnuge iwai n'anya.

⁴ Nye risi ọgbako Chiokike jọoburiri nye nwernu rikne chikwa ezi-nụ-oro a nkari, ọmu a jọoburu ele noobnonu a nsni, nọoso a anya.

⁵ (Ọ bụru nụ nye ọbula nwée rikne chikwa ọro a nkari, ndaa kpa o jeenwe rikne legidne ọgbako Chiokike anya?)

⁶ Ọ jọoburu nye varu ikne n'ọgbako Chiokike, ọ zị o mee oknomokno, dnabna n'otu ikpe omuma wam lele Ekwensu.

⁷ Ọ jọoburu nye nwernu rẹwhna ọma n'ederezi, ọ zị ọ dnabna nụ nhne iwhnerne nụ mbita Ekwensu.

⁸ Ele dikneni masi jọoburu ele be nọosonu anya, ele ezi ọka, ele nwọ okne manya, ele zá noopio iru zile ezi.

⁹ Be jeeji mkpọma bụru ọma jidnesi ezi ọka be Chiokike nyernu aji rikne gbasiri ọkwnata ovu.

¹⁰ Be jeebe osno kpa be iru, ọ bụru nụ ọ zá nhne ke megidnenu be, be bụru dikneni ọgbako Chiokike.

¹¹ Ele nnwerne be masi jọoburu ele nwernu oson'anya, ele zá nookwu ọka etekne, kọvu ele ovu ọma, ele be kwesiri ọ tükwasi ovu nụ kpakara nhne.

¹² Nye dikneni jọoburiri nye nwernu otu nnwerne, nye nẹchikwa ọmu a nụ ezi-nụ-oro a nkari.

¹³ Ele nọornu ọnu be nkari jeenwehia ovulizọ n'olu bụru ọma, be joogwuzosi rikne n'okwnata ovu ke zị nụ rime Karaisi Jizosi.

Nhne tugwaru otugwa

ke okpukpe ai

¹⁴ M naagbanu i ọkwukwo ka, ọ bụ n'ezi nụ m neele anya nụ m jaava wara wara.

¹⁵ Kọvu ọ bụru me gbu ọkwnu, m naagba ma i mahia kpa ele badnụ jaabita ẹhni be nụ ezi-nụ-oro Chiokike ke bụ ọgbako Chiokike ke zị bụdu, ke bụ nsnusnu ọro nụ ntụ-eli ezi ọka.

¹⁶ A zá neesigha ọka, nhne tugwaru otugwa ke okpenu Chiokike zị agida, Jizosi whuyaru iwhne n'anọ-ẹhni,

Enine Nsọ gbaru akebne a,

ele enine izi whnurnu a,

be kporu okwo a n'esilawuru kpakara mba,

ele badnụ kweru a n'owa,

Chiokike kwuru a la n'oligwe n'igwugwu.

4

Pọlu znirni Timoti ezni

* 2:15 hite n'omumu nnwọ mọbu nụ omumu nnwọ

¹ Enine Nsọ kwuru kpa o dnornu anya nū ige ipne-aznū nū ele badnū j̄owhoga n'okwnata ovu snornu enine ke nooduwhu nū nhne ele r̄enwu ojo neezni.

² Ka b̄u iznizni ke ele ruwhnu law̄uru neezni n'aghalaghala, ele jiri rugwe b̄ekwnu da ak̄oniche be.

³ Be kw̄ele ele badnū lū nnwerne m̄obu gb̄o nzi, be kanū ele badnū be r̄i agwna wiri, ke Chiokike keru ma ele kweru ekwe gweru ̄otu mmamma r̄i, b̄u ele mah̄iaru ezi ̄oka.

⁴ Kwnornu nū kpakara nhne Chiokike keru b̄uru ̄oma, ̄o z̄a ke badnū j̄eri, ̄o b̄uru nū o gweru a, t̄u mmamma.

⁵ Be ji ikwu-̄onu nū okpukpe Chiokike b̄ita wiri ns̄o.

⁶ ̄O b̄uru nū i kanū r̄umu nda kpakara nhne ka, i j̄oburu nye izi Karāisi Jiz̄osi ̄oma, nye be jiri ezi ̄oka ke ̄okwnata ovu nū iznizni ̄oma ke i snornu zn̄u.

⁷ ̄O z̄a nhne i ji ̄otnutnu ruwhere etekne nū ̄oka ele nnwerne okno badnū mee, zn̄uhia ̄ehni i ma i b̄uru nye n̄ootu ogwnu Chiokike.

⁸ Kwnornu nū ̄oznuznu ke an̄o-̄ehni nwernu iru mat̄i, k̄ovu ̄omahia Chiokike bnarnū iru nū kpakara nhne, o vugwu mkwna ke b̄udnu ka nū b̄udnu ke jaava.

⁹ Ka b̄u ikwu-̄onu ke be kwesiri ̄o t̄ukwasi ovu, ke badnū kwesiri o kweru.

¹⁰ Ka b̄u risi nhne a kwno n̄oodoli n'ernu, naagba ̄otna, nū olile anya āi z̄i nū Chiokike ke z̄i b̄udnu, Nye ̄Oznohia ke kpakara badnū, ke kakwo ke ele kweru ekwe.

¹¹ Zni kpakara nhne ka, nyee iwu ma ele badnū mee nhne i neezni.

¹² I kw̄e nye ̄obula ledna i anya kwnornu nū i b̄u nnw̄o ikoro. K̄ovu b̄uru nhne at̄u ke ele kweru ekwe, ma n'ikwu-̄onu, nū b̄udnu, nū ̄owhnun'anya, nū ̄okwnata ovu, nū ̄ozi snam.

¹³ Tem m va, gweru ̄ehni i yisi nū ogwnu nhne be gbarū n'okwukwo ns̄o nū rime ̄ogbako Chiokike, n̄ookpo okwo, neezni nhne.

¹⁴ I l̄éwhu nkesi i anya, ke be nyernu hite n'izi ̄owhnurninya wam nga ele okno badnū t̄ukwasiri i aka nū risi.

¹⁵ Anya d̄u i ̄eli gbas̄iri kpakara nhne ka, gweru ̄ehni i yisi neeme be ma kpakara ele badnū whnū nū i nooso oso.

¹⁶ Ledu anya nū b̄udnu i nū kpakara nhne i neezni. Gbal̄i neeme kpakara nhne ka, kwnornu nū i mee kpam, i j̄oznohia ̄ehni i ma ele n̄onu nhne i neezni.

5

Kpa a jeemesno ele badnū

¹ I b̄igb̄o nye okno badnū rikne, k̄ovu kwunu a ̄oka lele nū ̄o b̄u nda i. Mesno r̄umu ikoro lele r̄umu nwene.

² Mesno ele rinya okno badnū lele nū be b̄u nne i, gweru ̄ozi r̄ichna s̄o r̄umu oknornokno anya lele r̄umu nwene i rinya.

³ Lek̄ota ele rinya nzi be nw̄urnu ele z̄i nū mkpa anya nkari.

⁴ K̄ovu ̄o b̄uru nū nyerinya nzi a nw̄urnu nwernu r̄umu m̄obu r̄umu r̄umu a, r̄umu be beru ̄osno m̄uhia kpa be kpenu Chiokike, hite n'olekasi ele m̄urnu be anya, lele kpa ele m̄urnu be jiri lekasi be. Ka b̄u nhne n̄ooso Chiokike ovu n'onu.

⁵ Nyerinya nzi a nw̄urnu ke nw̄ee badnū ̄obula neelekwasi Chiokike anya, neeke okpukpe iwnehnie nū abal̄i ma Chiokike yisinu a aka.

⁶ K̄ovu nyerinya nzi a nw̄urnu ke noowu b̄udnu ke n̄oso a n'onu nw̄urnu ̄onwu kpa ̄o z̄i b̄udnu.

⁷ Kanū be mee kpakara nhne ka, ma be mee nhne b̄uru ̄oma.

⁸ Ọ bụru nụ nye ọbula nwée rikne legidne ele ọro a, ke kakwo ele ezi-nụ-ọro a, nye wam gọnahorulam ọkwnata ovu, nye máa Chiokike ka nye wam mma.

⁹ Nyerinya ke nzi a nwụrnu ke gbarụ nri awha isunu, be gwnụsi a n'esilawuru ele nzi be nwụrnu, nye kwesiri nzi a kwnata a ovu,*

¹⁰ nye be jiri ẹrnu ọma a mahia, nye nọoznu rumu a nkari, neelekota ele izne nkari, snornu ele nsọ snụ ọchi be, nye neeyinu ele zị nụ mkpa aka, nọornu agida ẹrnu ọma.

¹¹ Kọvu ị gbási rẹwhna oknornokno nye nzi a nwụrnu n'okwukwo. Kwnornu nụ nga anọ-ẹhni kpalizọru be, be jéenwe rikne gwuzonu Karaịsi, be pio ọ gbọru nzi berere.

¹² Be bụru ele ikpe marnụ, kwnornu nụ be luluru mkwna be kweru nụ mbom.

¹³ Tụkwasi n'olu ka, be bụru ele nwée nhne be mee, be neezne n'oro n'oro noozno izno, nookwu nhne gbásila be, nookwu nhne be kwésile o kwu.

¹⁴ Kam kpayarụ, m neeznikwa ele oknornokno ele nzi be nwụrnu, be gbọru nzi berere, mụhia rumu, legidne ọro be anya ọ zị be nyee nye irno wam oghere ọ kaja be nụ ọgbako Chiokike.

¹⁵ Agwna ele rinya wam snornulem Setani.

¹⁶ Ọ bụru nụ nyerinya ọbula nwernu nnwerne nzi a nwụrnu n'oro a, o yinu be aka, o kwé ọgbako Chiokike vuru ivu nye wam, kọvu ma ọgbako Chiokike lebna anya n'oyinu ele rinya nzi be nwụrnu ele zị nụ mkpa aka.

¹⁷ Ele okno badnụ, ele neelegidne ọgbako Chiokike anya kwesiri be sọnu be anya okpukpu lawuru, ke kakwo ele nọokpo okwo izi ọma, neezni nhne.

¹⁸ Kwnornu nụ ọkwukwo nsọ kwuru kpa, “Ị knésni ọnu ehni ke nọozosna ịkpa,” nụ “Nye ẹrnu kwesiri ọgwo ẹrnu a.”

¹⁹ Ị kwéko nhne ọbula be bnornu nye okno badnụ, okwolem ma be nwernu ele akebne lawuru mọbu ẹto.

²⁰ Bigbo nye okno badnụ ọbula mernu mmehie nụ ruwhnu ọhna, ma ele berere mụhia nhne.

²¹ M noogwuzo nụ ruwhnu Chiokike nụ Karaịsi Jizọsi nụ ele enine izi Chiokike hōhiaru neenye i iwu ka, bita kpakara nhne ka me nyernu ị, i lé badnụ anya nụ ruwhnu kpa ị neeme be.

²² I mée wara wara nọotukwasi ele badnụ aka, i snó ele berere nụ mmehie be. Kọvu bita ẹhni ị nsọ.

²³ Ị nwọma mini kpọi, kọvu nwọ manya matị kwnornu nụ rụwho i nụ ẹhni igbugbu ị naaria ige ọbula.

²⁴ Mmehie agwna ele badnụ kpumernu, beru be ọsno neezne n'ikpe, kọvu mmehie agwna ele berere sno be n'aznụ.

²⁵ Kpam masị, ẹrnu ọma whụyaru iwihne, ọ bụru nụ be whóge iwihne, be nwée rikne kpusni be.

6

¹ Nye ọbula ke bụ ọhi whnụ nụ ọ nọoso nye nwe a anya lele kpa o kwesiri, ma be gharu ọ kaja rẹwhna Chiokike nụ iznizni a.

² Ele ọhi ke ele nwe be kweru nụ Chiokike lédna be anya, kwnornu nụ be bụ rumu nda. Tnụnuma, be rnunu be ẹrnu ka mma kwnornu nụ ele neerihia mbarna n'ẹrnu be bụ ele kweru ekwe, ele be whnurnu n'anya. Ka bụ nhne i kwesiri neezni, ma be neeme masị be.

Ọwhnu ịwai n'anya

* 5:9 mọbu nye nwernu otu nzi

³ O bụru nụ nye obula neezni iznizni aghalaghala, ke kwéle nụ n'iznizni ke nọtụ ogwnu Chiokike nụ iznizni ke zị snam ke Nyenwe aị Jizọsi Karaịsi,

⁴ nye wam bụ nye oknomokno. Kọvu o máa nhne obula. Echiche a bụo ọma, ka noodubna nụ okno ọka, nụ ọwho-anya, ọlu ogwnu, ọka ojo, anya ojo,

⁵ ọdogbuta zị n'esilawuru ele ovu ojo, ele tuwuru ezi ọka. Be neeche nụ okpenu Chiokike bụ apna be jeeji neenwehia iru ke be.

⁶ Kọvu okpenu Chiokike nụ ruwho ojiji bnarnụ mbnarna k'agida.

⁷ Kwnornu nụ o zá nhne a vuru va n'owa, a nwée masị rikne vuru nhne obula whọga nụ rime a.

⁸ Kọvu o bụru nụ a nwernu wiri oriri nụ iwo o kpusni ẹto aị, ka kwesiri o jị aị ruwho.

⁹ Ele noopio o bụru ele eze naadnabna nụ rime ọrnurna nụ mbịta, nụ agida nhne iwahnirniwhno ke naakpakna be ẹhni, ke noodubna ele badnụ nụ mwu.

¹⁰ Kwnornu nụ ọwhnun'anya iwai bụ mgbaregwnugwnu kpakara nhne ojo zị odo nụ odo. Agwna ele noopio iwai k'agida kpawhuru n'okwnata ovu, gweru agida nhne igbugbu mekasi ẹhni be ẹhni.

Lụ ọgwnu ọma

ke ọkwnata ovu

¹¹ Kọvu, jị badnụ ke Chiokike, gbanahọru kpakara nhne ka. Tnụnuma, snornu ome mma, ọtu ogwnu Chiokike, ọkwnata ovu, ọwhnun'anya, ndidi nụ ozi wọhnerne.

¹² Lụ ọgwnu ọma ke ọkwnata ovu. Jikwasi bụdnu kwó okwo aka ke Chiokike nyernu i nga i kwuhjaru ọkwnata ovu i nkarị nụ ruwhnu agida ele akebne.

¹³ Nụ ruwhnu Chiokike nye neenye kpakara nhne bụdnu, nụ Karaịsi Jizọsi, nye gbarụ akebne ọma nụ ruwhnu Pọtiosia Paịleti, m neenye i iwu,

¹⁴ bita nhne ka ma i gharu o nwe ntụpo nụ ọtna tem Nyenwe aị Jizọsi Karaịsi va,

¹⁵ nye Chiokike jeegweya n'ige ke a, nye nwe ngọzi, nye neechi kpọi, Eze kakwo ele eze, nụ Nyenwe kakwo ele nwe.

¹⁶ Chiokike ke zị bụdnu ọkwnukokwnu, nye wu n'iwhe ke o zá nye nwernu rikne vadu ndundu, nye o zá nye whnuleru anya, mọbu whnuli a anya, ọson'anya nụ rikne bụru ke a tim tọm. Amim.

¹⁷ Dọ ele eze ke owa ka aka nụ nsnj be bụo ele oknomokno, be tükwasi ẹkwnu be ovu, ke jáazị tim tọm, kọvu be tükwasi Chiokike ovu nye naasama aka a neenye aị kpakara nhne bụru ọma ke a neeri.

¹⁸ Dọ be aka nụ nsnj, be mee nhne bụru ọma, be bụru ele barụ aba n'ome nhne bụru ọma, ele ovu ọma ke neekesi ele badnụ nhne be nwernu.

¹⁹ Be mee kpam, be nọtụ ntu-eli bụru ọma ke zị kwem n'ige naava, ma be wehia bụdnu ke bụ ezi.

²⁰ Timoti, legidne nhne be yisiri i n'aka anya nkarị. Whọga nụ nhne obula ke neegweya ikwu-ọnu ke neemegidne ogwnu Chiokike nụ ọka iwahnirniwhno ke nụ lele nụ o nwernu akoniche, kọvu o nwée.

²¹ Agwna ele badnụ snornu a kpawhu n'okwnata ovu.

Oru Chiokike dazinu anụ.

**Okwukwo izi
ke Ebo
Pọlu gbaznenu
Timoti
Nhne gbasiri okwukwo izi ka**

Nu *Okwukwo izi ke Ebo ka ke Pọlu gbaznenu Timoti*, bu ke o gbarụ lele okwukwo izi nda naagbanu nnwo o whuru n'anya (1:2,3), Pọlu pioru ma Timoti buru nye ogwu oma ke Karaisi, o nwe ndidi nga o naata awhnuwhnu lele nye Karaisi (2:1,3). Pọlu gbadiyaru nne Timoti nu nne nne a, ele nweru okwnata mkpoma nu Karaisi. Pọlu karu Timoti chenwanya nu ya Pọlu tukwasiri a aka a lawuru nu risi, ke neegesi nu Enine Chiokike noodu a nu eru a.

Agwa ele kweru nu Nyenwe a dnabarnu nu mbita nye irno, kovu Pọlu duru Timoti aka nu nsu o gbanahoru kpakara orurna ke nooduwhu rumu ikoro (2:20-26; 3:1-9). O kanu Timoti o ziri kwem neezni izi oma, o bu n'ezi nu agida ele badnu jekweru (4:2).

Pọlu magwu nu ige ma o jonu enwu kwnornu okwnata ovu a, kovu o nweru ogwo eru (4:6-8). O buru nu a sno Karaisi nwu enwu, a jooosno a ziri budnu, o buru nu a nwe ndidi, a jooosno a chi lele eze (2:11,12a).

Nhne zi n'okwukwo ka

Obekwu ikwu nu okpukpe o kpenu Timoti (1:1,2)

Iwhnerne Nyenwe a tuko i (1:3-18)

Buru nye ogwu oma Karaisi (2:1-26)

Kpa ele badnu joowu budnu be n'ige ipne-aznu (3:1-9)

Buru nye be kwesiri okwnata mkpoma (3:10—4:8)

Ezi ke aka Pọlu nu obekwu ikwu ipne-aznu (4:9-22)

¹ Mawa, Pọlu, nye izi Karaisi Jizosi hite n'echiche Chiokike, o ziyaru m me zni ele badnu gbasiri mkwna budnu ke zi nu Karaisi Jizosi.

² M naagbaznenu Timoti nnwo m me whuru n'anya okwukwo.

Oru, obirizi nu udno ke hi n'aka Chiokike Nda a nu Nyenwe a nu Jizosi Karaisi dazinu i.

Iwhnerne Nyenwe a tuko i

³ M notunu Chiokike mmamma, nye me neekpenu hite n'ovu zi snam lele kpa ele nda m kpennu a, neekpe okpukpe iwhnehnie nu abali, nechenwanya i n'okpukpe m.

⁴ Me chenwanya anya-mini ekwa i, o nwegwu m o whuru i anya ma ovu so m n'onu.

⁵ M nechenwanya okwnata ovu i n'ezi, ke beru osno ziri nu rime nne nne i, Lois, nu nne i Unisi, m kweru m nu o zi masi kpa nu rime i.

⁶ Kam kpararu, gwakne bekwu ke nkesi Chiokike, ke o nyernu i nga me tukwasiri i aka m nu risi.

⁷ Kwnornu nu Chiokike nyege a enine ke ogwu, kovu enine ke iknerna nu owhnun'anya nu anya udno.

⁸ Bikno, iwhnerne okpo okwo nhne gbasiri Nyenwe a tuko i, moku iwhnerne me nye ikelu a. Kovu snornu m ta awhnuwhnu n'izi oma hite n'iknerna Chiokike nyernu i.

⁹ Chiokike zohiaru a, sukwu a ma a wuru budnu zi nsu. Ka buo hite nu nhne obula ke a mernu, kovu o bu mmuma a hite n'oru a. Ka bu oru ke o nyernu a nu Karaisi Jizosi su owa panizoru.

¹⁰ Kìtna, o mernu ka whùya iwhe nga Nye Oznohia aì Karaìsi Jizòsi whùyaru iwhe, nye megburu ẹnwu gweyanù aì bụdnu ke kwó okwo, ke noonwu n'iwhe ke izi oma.

¹¹ Me jiri bụru nye nọokpo okwo izi oma ka, nù nye izi nù nye zni nhne.

¹² Kam kpayarù, me naata awnhùwhnu nù rime ikelu. Kọvu iwheerne zà nọtụ m, kwnornu nù m magwù m nye me kweru nù ya, m magwù m masị nù o nwernu rikne ọ b́ta nhne me yisiri a n'aka* d́ ọbochi wam.

¹³ Hite n'okwnata ovu nù ọwhnun'anya Karaìsi Jizòsi, b́ta kpakara nhne ì nurnu n'ọnu m, ma be b́ru nhne atù ke iznizni zì snam.

¹⁴ Enine Nso yinu ì aka b́ta nhne oma wam be yisiri ì n'aka.

¹⁵ Ì magwù nù kpakara ele zì nù Esia ghasarù m, ma Figelusi nù Hamogenisi.

¹⁶ Nyenwe aì dónu ezi-nù-oro Onesiforosi obirizi kwnornu nù o mesiri m ovu rikne, ijigba be t́ru m zà nọtụ a iwheerne.

¹⁷ Nga ọ zì nù Rom, o piosiri m rikne tem o piohia m.

¹⁸ Nyenwe aì dónu a obirizi n'ọbochi ikpe. Ì magwù nkarì nkarì kpa o yinu m aka n'apna zì ọdo n'ọdo n'Efesòsi.

2

Nye ọgwu oma ke Jizòsi

¹ Timoti nnwọ m, gbasì rikne n'oru ke Karaìsi Jizòsi.

² Kpakara nhne ì nurnu me kwuru nù ruwhnu agida ele akebne, zni ele kwesiri be kwnata be ovu, ele jeenwe rikne zni masị ele berere.

³ Nwe ọkasi ovu n'awnhùwhnu lele nye ọgwu oma ke Karaìsi Jizòsi.

⁴ Ọ zà nye ọbula ke b́ru nye ọgwu ke neeme nhne nye b́o nye ọgwu neeme, ma o mee nhne jọosno nye risi a ovu n'ọnu.

⁵ Kpam masị, ọ zà nye naagba ẹso ke jeenwe rikne kpuru okpu mmeri ọ b́ru nù ọ gbáge ẹso lele kpa iwu ẹso kwuru.

⁶ Nye ẹnu ẹkwnu ke nọornu ẹnu nkarì kwesiri o beru ọso ri mkpuru mbọm ke hi n'ekwnu a whùya.

⁷ Tule nhne me nookwu, Nyenwe aì jeenye ì ọghohia nù kpakara nhne.

⁸ Chenwanya nù ka b́ru izi oma m, Jizòsi Karaìsi nye hiri n'avnurnu Devidi, hiri n'ẹnwu lizọ.

⁹ Kwnornu nù izi oma ka, m naata awnhùwhnu d́ kpa be t́ru m ijigba lele nye noolulu iwu, kọvu be t́ge ikwu-ọnu Chiokike ijigba.

¹⁰ Ka b́ru nhne mernu me neenwe nkasi ovu kwnornu ele wam Chiokike h́hiaru, ma be nwehia oznohia ke zì nù Jizòsi Karaìsi nù igwugwu kwó okwo.

¹¹ Ka b́ru ikwu-ọnu ke kwesiri ọkwnata ovu,

Ọ b́ru nù a snornu a nwù,
a jọosno a zìri b́dnu.

¹² Ọ b́ru nù a nwe ndidi,
a jọosno a ch́ lele eze.

Ọ b́ru nù a gónahoru a,
ọ jọogónahoru aì.

¹³ Ọ b́ru nù a nwée ọkwnata ovu,
o jeekwesi kọriri ọkwnata ovu,
kwnornu nù ọ jọogónahoru ẹhni a.

* **1:12** nhne me yisiri a n'aka mọbu nhne Chiokike yisiri n'aka m

*Nye ernalu ke Chiokike
naakweru*

¹⁴ Chenwanyanu be kpakara nhne ka. Do be aka nu nsni nu ruwhnu Chiokike gbasiri odogbuta n'ikwu-onu, o za mbnarna obula zi a, o noolulu ele noobno nsni.

¹⁵ Gbali gweru ehni i gesi nu ruwhnu Chiokike lele nye ernalu Chiokike nakweru, nye iwhnerne za notu, nye nwernu rikne zni ikwu-onu ke ezi oka nkari.

¹⁶ Zeru oka iwhnirniwhno nu oka etekne, kwnornu nu ele nookwu a neegweme ehni be hne Chiokike zi.

¹⁷ Iznizni be naagbasa lele bekwnu okochi, * ke Haijmenousi nu Filetusi zi n'esilawuru ele neezni a.

¹⁸ Ka bu ele kpawhuru n'ezi oka. Be nookwu nu olizo n'enwu ele nwurnu onwu whelem, be naakwnadna okwnata ovu agwna ele badnu.

¹⁹ Kpa o zi, ntu-eli Chiokike gwuzo kwem, ke nwernu akara ka, "Chiokike magwu ele ke a," nu "Nye obula ke noosukwu rewhna Nyenwe ai, hi nu nhne ojo whuya."

²⁰ N'oro hna okpotokpo, o buo agbugba wiri golu nu agbugba wiri siliva bu nhne zi a kpai, kovu okiko isisi nu rizna, agwna be ji notornu ernalu zi mkpa, agwna be ji notornu ernalu zila okne mkpa.

²¹ Kovu o buru nu badnu obula snusnama ehni a nkari, be jeeji a notornu ernalu zi mkpa, ke zi nso, be jikneru a, Nyenwe a jeeji notornu ernalu oma obula.

²² Gbanahoru kpakara nhne ojo ke notogwnu ele ikoro. Gbasornu ome mma, nu okwnata ovu, nu owhnun'anya nu udno, ji nu kpakara ele neekpenu Nyenwe ai nu mkpoma zi richna.

²³ I kwu oka obula ke iwhnirniwhno nu agirigo nwee risi, kwnornu nu be noovuya okno oka.

²⁴ Nye izi Nyenwe ai joburu nye nookno oka, tnuma, o joburiri nye neegesi nye obula ovu oma, nye nwernu rikne zni nhne, nye nwernu ndidi.

²⁵ O jeegweru whnerne neezni ele neemegidne a nhne, neele anya nu Chiokike jeeme be tumasna, o dubna be n'ezi oka,

²⁶ ma be mahia nhne, gbanahoru mbija Ekwenu sninu be, kpa o gidneru be ma be mee nhne o piuru be mee.

3

Obochi ipne-aznu

¹ Kovu hnata ka ama, ige tu ogwnu k'agida vawa n'obochi ipne-aznu.

² Ele badnu joburu ele whurnu ehni be n'anya, ele whurnu iwai n'anya, ele oknomokno, ele nganga, ele noolulu ele badnu, ele za noobnonu ele muru be nsni, ele nwee ovu otu mmamma, ele za nso,

³ ele nwee owhnun'anya, ele za naagbarunu ele badnu nhne be mernu be, ele nookwulu, ele nwee rikne jikwaru ehni be, ele nu lele anohia, ele nhne buru oma za naamasii,

⁴ ele neere ele badnu, ele risi rikne, ele notowhu nu nganga, ele whurnu nhne so notu n'anya karu o whnu Chiokike n'anya,

⁵ ele nwernu odi ogwnu Chiokike kovu be gonahoru rikne a. Ji nu be nweko nhne obula.

⁶ Be bu ele ji aghigho nooduwhu ezi-nu-oro, duwhu ele rinya nwee rikne, ele rinya mmehie noovughari lele ele notornu manya nu egwnurnu nhne ojo.

* 2:17 mabu lele mbam mbam

⁷ Ele rinya nù kpa zì nòomu nhne, kòvu be nwée rikne mụhia ezi ọka.

⁸ Lele kpa Janisi nù Jambirisi gwuzogidnernu Mozizi, ele ka neemegidne ezi ọka, ele mkpọma be nwurnu ọnwu, ele ọkwnata ovu be bụ nhne etekne.

⁹ Kòvu be jéenwe rikne zne nù ruwhnu, lele kpa iwhnirniwhno ele wam whýaru iwhe, ọ bụ masị kpa iwahnirniwhno ele ka jọowhuya iwhe.

Pọlu znirni Timoti ezi ipne-aznù

¹⁰ Kítna, Timoti, ì magwù kpakara nhne me znirni nù kpa me wuru bụdnu m. Ì magwù nhne me neeme nù nhne me kweru nù ya, nkasi ovu m, nù ọwhnun'anya m, nù ndidi,

¹¹ nù kpa me nagidnernu ọkpagbu, nù awhnùwhnu. Ì magwù kpakara nhne me whnurnu n'Antiọku, nù Aìkoniom, nù Lisitira, kpa me nagidnernu ọkpagbu. Kòvu Nyenwe aì dọhiaru m nù rime kpakara be.

¹² Me kanù ì ezi ọka, nye ọbula ke joowu bụdnu ke nọotu ogwnu Chiokike nù rime Karaìsi Jizọsi jaata awhnùwhnu.

¹³ Kòvu ele ojo nù ele ka nù be bụ nhne be bụla, jaazì nọojokari bụjo, nooduwu ele badnù, be nooduwu masị be.

¹⁴ Kòvu dazigidne nù nhne me znirni ì nù nhne ì kweru, hne ì magwù nye ì mụhiaru nhne n'aka a.

¹⁵ Hite n'ige ì bụ nnwọ matì, ì magwù nhne ọkwukwo nsọ kwuru, ke nwernu rikne mee ì ì bụru nye nwernu akoniche. Ka joodubna ì n'ọznohia hite n'ọkwnata ovu ke zì nù Karaìsi Jizọsi.

¹⁶ Kpakara nhne be gbarù n'ọkwukwo nsọ hi n'echiche Chiokike whýa, be bụru ọma n'ogweru znì nhne, bigbọ, dọ aka nù nsnì nù ọznuznu ke ome mma,

¹⁷ ma badnù ke Chiokike bụru nye zuru ozu, nye be jiknernu nọornu kpakara ọnu ọma.

4

¹ M gwuzo m nù ruwhnu Chiokike nù Karaìsi Jizọsi nye jeekpe ele zì bụdnu nù ele nwurnu ọnwu ikpe nga ọ jaava lele eze, neenye ì iwu ka.

² Kpọ okwo ìzi ọma, zìri gnarnagnarna n'ige kwesiri nù ige kwésige, bna mbna, bigbọ, kwnalìzọ mkpọma, gweru agida ndidi nù anya duru ẹli neezni nhne.

³ Kwnornu nù ige jaava nga ele badnù jéekweru iznizni bụru ọma. Tnụnuma, be jaachikota ele neezni nhne, ele jeezni be nhne ke nsnì nọko be ẹko noopio.

⁴ Be jéekwe o bno nsnì n'ezì ọka, kòvu snornu ọtutnu ruwhere.

⁵ Kòvu bụru nye anya duru ẹli ige ọbula, naagidne awhnùwhnu, rnù ọnu nye nọkpo okwo ìzi ọma, rnù kpakara ọnu ke kwesiri nye ìzi Chiokike.

⁶ Kítna, ige be jọowusi bụdnu m lele ariọhna manya dulum, ige me jọonwu ẹnwu valẹm.

⁷ M lukwolem ọgwnu ọma wam, m gbazulem ẹso wam, m bitala m ọkwnata ovu wam.

⁸ Kítna, Nyenwe aì bitannu m okpu-eze ke ome mma, ke nye ikpe ziri ezi jeenye m n'ọbochi wam, o jéenye me nù nsnunnu m, kòvu o jeenye kpakara ele noopio ọ whnù a anya nga ọ jọowhuya iwhe.

Iznuznu Pọlu nù Timoti

⁹ Me wara wara va.

¹⁰ Demasì whnurnu nhne ọwa n'anya, ọ ghasa m zne Tẹsalonika. Kirẹskensi znernu Galasia, Taitosi zne Dalimatia.

¹¹ Me nù Lukwu kpọi zì. Nga ì jaava kwuru Makì va, kwnornu nù o jeenyinu m aka n'ọnu me nọornu.

¹² M ziznenu m Taijikosi Efesosi.

¹³ Nga i jaava chiyanu m iwo me chisaru n'oro Kaposi nu Torasi, nu okwukwo, ke kakwo mkpa okwukwo.

¹⁴ Alekizanda nye enu rugwe mernu m nhne ojo k'agida. Nyenwe ai jookwu a ogwo enu a.

¹⁵ Anya du eli hne o zi, kwnornu nu o bu nye neemegidne izi ai.

¹⁶ Nga me gwuzo n'ikpe n'oziri noogoru onu m, o za nye obula ke sno m, kpakara ele badnu gbanahoru m. Chiokike bikno, gwnuko nhne ka megidne be.

¹⁷ Kovu Nyenwe ai dagwunu m, nyee masi m rikne, me jiri kpo okwo izi oma nu nsi kpakara ele buo ele Ju. Be dhiaru m n'onu odum.

¹⁸ Nyenwe ai joodohia m nu kpakara nhne ojo, duru m n'udno bna n'ochichi eli-eze oligwe. Ya nwe igwugwu okwnukokwnu. Amin.

Obekwu ipne-aznu ke Polu

¹⁹ Bekwu Prisila nu Akwila nu ezi-nu-oro Onesiforosi.

²⁰ Erasitosi daziri nu Korinti, Tirofimosi naaria ehni igbugbu, m ghasa a nu Miletosi.

²¹ Gbalj va su okirika du. Ebulusi neebekwu i, ma Pudesi, Lainosi, nu Kalaudia nu kpakara rumu nda.

²² Nyenwe ai dazinu i. Oru Chiokike dazinu anu.

**Okwukwo izi
Pọlu gbaznenu
Tajitosi**

Nhne gbasiri okwukwo izi ka

Pọlu kwuru nhne gbasiri Tajitosi nọ hne zị ichne ichne nọ rime okwukwo izi o gbarụ. O karu nọ ya nọ Tajitosi sno rnu ernalu izi oma nọ Esia Matị nọ Giriisi (2 Korinti 2; Galasia 2:3). Pọlu kannu a, o hohia ele risi nọ ele jeelekota ogbako Chiokike anya nọ Kiriti.

Pọlu kannu Tajitosi o whnu ele risi nọ ele neelekota ogbako Chiokike bu ele, ele badnu nookwu oka oma (1:5-9). Kpakara ele sno Nyenwe a jọbu ele bitaru ehni be snam, ele za neesigha oka (1:10-2:9).

Pọlu kwuru oka gbasiri ele zị ichne ichne nọ rime ogbako Chiokike ke zị nọ Kiriti. O karu nọ a nwernu rikne o wu budnu ikne kwnornu nọ Chiokike ziyaru Jizosi Karaịsi, Chiokike znohiaru a, snuma a hite nọ rikne Enine Nso, mee a a panizo budnu ikne ke nwernu olile anya budnu kwó okwo. Chiokike znohiaru a kwnornu nọ o bu nye obirizi, o buo kwnornu nhne oma obula a mernu.

Nhne zị n'okwukwo izi ka

Obekwu ikwu nọ okpukpe Pọlu kpenu Tajitosi (1:1-4)

Ezni ele risi ogbako Chiokike (1:5-16)

Ezni ke Ogbako Chiokike (2:1---3:11)

Ezni ke o znirni Tajitosi nọ obekwu ikwu ipne-aznu (3:12-15)

¹ Mawa, Pọlu nye izi ke Chiokike nọ nye izi Jizosi Karaịsi. Ennu m bu o mee ele Chiokike hohiaru nwe okwnata ovu, ma be mahia ezi oka ke noodubna n'otu ogwnu Chiokike,

² ma be nwehia olile anya budnu kwó okwo, hne Chiokike za naagha aghalaghalala, bu ke o kweru mkwna su owa panjzoru.

³ O mernu ikwu-onu a whuya iwhe n'ige ke a hite nọ ogbasa izi oma, bu ke o yisiri n'aka m lele nhne Chiokike Nye Oznohia a nyernu n'iwu.

⁴ M naagbanu i Tajitosi nnwo m n'ezini okwnata ovu ke a kwekotaru okwukwo. Oru, nu udno ke hi n'aka Chiokike Nda a nọ Jizosi Karaịsi, Nye Oznohia a.

Ennu Tajitosi nu rime

Kiriti

⁵ Nhne mernu me gharuru i nu Kiriti bu ma i bikwata nhne ke kwesiri obikwa, hohia ele okno badnu nu rime eli-ohna obula, lele kpa me kannu i.

⁶ Nye okno badnu kwesiri o bu nye nwée otna, nye lu otu nnwerne, nye nwernu rumu be tukwasiri mkpoma, nye kpahie agwa, ele mee risi rikne.

⁷ Kwnornu nọ nye risi jọbu nye nwée otna lele nye izi Chiokike, nye mee n'iche ovu a, wé ovu ehni wara wara, nye za nnonwo manya gbu ogbu, nye mee nhne rikne, nye nwée owho-anya.

⁸ O jọbu nye neelekota ele izne, nye whnurnu nhne oma n'anya, nye za neemewhe nhne ike, nye zị snam, ziri nso, nye neejikwaru ehni a.

⁹ O jikwaru oka wam ke kwesiri okwnata ovu rikne lele kpa be znirni a, ma o mesi ele berere ovu rikne hite n'iznizni a zị snam, gesi masị ele neemegidne a nhne ojo be.

¹⁰ Agida ele kwé ekwe nooduwu ele berere hite nu ikwu-onu etekne, ke kakwo ele knesnigwu omen'eli ele Ju aka rikne.

¹¹ Be kwesiri o mee be kpusni ọnu be, ele noolulu agwna ezi-nụ-oro, ele neezni nhne be kwésile o zni, kwnornu iwai.

¹² Otu nye ọwhnurninya be, nye Kiriti, karu kpa, “Ele Kiriti bu ele aghalaghalala, ele ovu ojo lele anohia, ele ime-mgwu, nu ele okne nkoli.”

¹³ Nhne o kwuru bu ezi oka, ka kpayaru bigbosi be rikne, ma be gwuzosi rikne n'okwnata ovu,

¹⁴ ma be gharu iznizni aghalaghalala ele Ju nu iwu ele badnu ke hi n'aka ele whogaru n'ezi oka.

¹⁵ Kpakara nhne zi richna n'anya ele zi richna, kovu nye ru ru nu nye kwé ekwe, o za nhne zi richna, kwnornu nu akoniche be nu echiche be ru ru oru.

¹⁶ Be karu nu be magwu Chiokike, kovu eru be neegesi nu be ọogonahoru a. Ele so ize, ele risi rikne, ele nwé rikne mee nhne oma obula.

2

Iznizni zi snam

¹ Gbali zni iznizni zi snam.

² Ele okno badnu nwernu anya udno, ele nwernu oso n'anya, ele za neemewhe nhne ike, ele zi kwem n'okwnata ovu be, nu ọwhnun'anya nu ndidi.

³ Ele okno badnu ele rinya masi wuru budnu lele zi nsọ, ele za noobno ele berere nhne, ele za ọnonwo manya gbu ogbu, ele neezni nhne buru oma,

⁴ ma be zni ele nnwerne ikne anya udno, whnu nzi be nu ru mu be n'anya.

⁵ Be kwesiri o buru ele za neemewhe nhne ike, ele zi richna, ele rinya neelegidne oro be anya nkari, ele noobnonu nzi be nsni, ma ele badnu gharu o kaja ikwu-ọnu Chiokike.

⁶ Kpam masi, neezni ru mu ikoro ma be buru ele za neemewhe nhne ike.

⁷ Nu kpakara nhne i neeme, gesi ehni i nye oma atu n'eru oma. Nu nhne i neezni gwuzosi rikne nu rime a, nye anya duru eli.

⁸ Ikwu-ọnu buru oma ma nye obula ke neemegidne i tu iw hnerne hne be nwé nhne ojo be jeeji nookwugidne ai.

⁹ Zni ele ohi be bnonu ele nwe be nsni nu kpakara nhne, neeme nhne joso be n'onu, be sa oka nga be nookwunu be oka.

¹⁰ Be znú nhne ele nwe be, kovu be gesi nu be jootukwasi be mkpoma, neegesi nhne oma ke zi nu iznizni Chiokike Nye Ọznohia ai nu kpakara nhne.

¹¹ Oru Chiokike ke neegweya ọznohia whuyaru iw hne hne kpakara ele badnu zi,

¹² neezni ai a sigbasi nhne ọogwnu anọ-ehni ai n'owa, nu budnu ke za ọotu ogwnu Chiokike, a wuru budnu ele za neemewhe nhne ike, ome mma, ọotu ogwnu Chiokike nu rime owa ka.

¹³ A nwernu olile anya zi ngọzi, bu o whuya iw hne igwugwu ke Chiokike hna ezi nu Nye Ọznohia ai Jizosi Karaisi.

¹⁴ O bu nye gweru ehni a nyee n'onodi ai ma o gbahia ai nu rime nhne ojo, bitannu ehni a ele ke a, ele zi richna, ele ovu neerne bekwnu n'eru oma.

¹⁵ Zni kpakara nhne ka, naakwnagidne, bna mbna nu kpakara rikne i nwernu. I kwé badnu obula ledna i anya.

3

Budnu nye Karaisi

¹ Chenwanyanu ele badnu be bita ehni be nu mkpururu ele risi nu ele neechi echi, noobno nsni, jiknenu o ru ru eru oma,

² be kwúko ọka ọjo megidne badnu ọbula, be bụru ele udno, ele agwa ọma, ele ovu hieru ẹli hne kpakara ele badnu zi.

³ N'ige mbom, a bụ ele iwhnirniwhno, ele zá noobno nsni, ele be duwhuru, noosno agida nhne ọjo zi ọdo nu ọdo ke ọogwnu ai, a wuru budnu ọjo, kwno awuwa, be snornu ai irno, aila sno masi be irno.

⁴ Kọvu nga ovu ọma nu ọwhnun'anya Chiokike Nye Oznohia ai whuyaru iwhe,

⁵ ọ znohia ai, ọ buo kwnornu ẹnu ọma a rnurnu, kọvu kwnornu obirizi a. Hite n'osnusnu ke ọmu berere, Enine Nso nyernu ai budnu ikne.

⁶ Chiokike wukwasiri ai Enine Nso k'agida hite nu Jizosi Karaisi Nye Oznohia ai.

⁷ Hne o gwnurnu ai lele ele mee mma hite n'oru, a bụru ele nekehia olile anya budnu kwó okwo.

⁸ Ka bụ ọka kwesiri ọkwnata ovu. M naakaa, ji kwusi a rikne ma ele kweru nu Chiokike bụru ele anya duru ẹli, neeme nhne bụru ọma. Kpakara nhne ka bụru ọma naabna iru hne ele badnu zi.

⁹ Kọvu zeru aiji iwhnirniwhno, nu ọgwnu ẹwhna ẹbnurnu, oknorno, ọlu ọgwnu kwnornu iwu, be bnána iru, be bụ nhne etekne.

¹⁰ Do nye ọbula ke neegweya okewa aka nu nsni mgba lawuru, i mekwo, gharu a.

¹¹ I magwu nu badnu ki bụ nye aghorome, nye mmehie, ọ bụ nye naama ẹhni a ikpe.

Ezni ipne-aznu

¹² Nga me jeeziya Atemasi nu Tai kikosi, hna anu zi, gbalị vakwnusi m nu Nikopolisi, kwnornu nu m jaadazi pi n'ige okirika.

¹³ Gbalị yisinu Zenasi nye ọgwnu iwu nu Apolosi aka n'izne be, whnu nu be nwehjaru nhne ọbula be piuru.

¹⁴ Ele ke ai muhia kpa be jeeji ige be rnụ ẹnu ọma, rnuhia nhne zi mkpa, be wúko badnu bnána nu nhne.

¹⁵ Kpakara ele me nu be zi neebekwu i. Bekwu kpakara ele whurnu ai n'anya nu rime ọkwnata ovu. Oru Chiokike dazinu kpakara anu.

**Ọkwukwo izi
Pọlu gbaznennu
Filemōni
Nhne gbasiri ọkwukwo izi ka**

Filemōni bụ otu nye zị mkpa n'ogbako Chiokike ke zị nụ Kọlosi, nye nwe ọhi ke rewhna a bụ Onesimosi. Ọhi ka hiri n'oro nye nwe a gbawhu. Kpa ọ kpawhuru, ya nū Pọlu nye zị n'ikelu whnataru. Hite n'aka Pọlu, Onesimosi ghọ nye Karaịsi. Pọlu gbaznennu Filemōni ọkwukwo izi ka naariaso a, ọ kwubnahnarnu ọhi a, nye Pọlu neezihnahienu a. Pọlu naariaso a, ọ naabnarnu a lele nnwọ nda nū rime Karaịsi, ọ bụo lele ọhi.

Nhne zị n'okwukwo izi ka

Ọpanizo (1-3)

Ọwhnun'anya Filemōni nū ọkwukwo ovu a (4-7)

Ọriaso nū risi Onesimosi (8-22)

Ọkwukwo (23-25)

¹ Mawa, Pọlu, nye ikelu kwnornu Karaịsi Jizọsi, nū nwene aị rukna Timoti, naagbaznenu enyi aị nū nye ọrnu ibne aị, Filemōni, ọkwukwo izi.

² A naagbaznenu masi nū nwene aị rinya Afia nū nye ọgwu ibne aị Akiposi nū ọgbako ke zị n'oro i.

³ Oru nū udno ke Chiokike Nda aị nū Nyenwe aị Jizọsi Karaịsi dazi nū anu.

Pọlu nọtunu Chiokike

mmamma

⁴ M nọtunu Chiokike mmamma ige ọbula me neechenwanya i n'okpukpe m,

⁵ kwnornu nū m nọnu nhne gbasiri ọwhnun'anya i hne kpakara rumu Chiokike zị nū ọkwukwo ovu i nū Nyenwe aị Jizọsi Karaịsi.

⁶ M neekpe ma ọkwukwo ovu i n'ọrnu ọrnu rikne n'esilawuru rumu nda ma i mahia kpakara nhne ọma ke a nwernu a ji nọrnu ọrnu nū rime Karaịsi.

⁷ Ọwhnun'anya i nyernu m mkpoma ọso n'onu k'agida sū nwene m rukna, bụ ke mernu ovu ele nsọ ziri budi ikne, gbata kwno m inwe.

Pọlu riasnornu

nū risi Onesimosi

⁸ M nwernu m anya rikne nū rime Karaịsi ọ kanu i mee nhne ke kwesiri.

⁹ Kọvu ọwhnun'anya mernu me riasno i, lele ọkpa badnu me bụ, Pọlu nye okno badnu, kọvu kiti, nye ikelu kwnornu Jizọsi Karaịsi.

¹⁰ M nọrio i kwnornu Onesimosi nnwọ m rukna nū rime Karaịsi, nye ghoru nnwọ m kpa me zị n'ikelu.

¹¹ Nū mbom, ọ bnaige nū nhne ọbula nyee i, kọvu kiti ọ bnarnu iru nyee i, ma mawa masi.

¹² M neeziyanu i ya hite n'ovu m, lele nye zị m okne mkpa.

¹³ O znernu amasi m ọ bita a hna me zị ma o yinu m aka n'onodi i kpa me zị n'ikelu kwnornu izi ọma.

¹⁴ Kọvu m jeeme nhne ovu i kwéle, kpa nhne ọma ọbula i jeeme jeehi n'ovu i whya, ọ bụo nhne be kwnagidnernu i mee.

¹⁵ O jọbu nū Onesimosi whogaru ige matị, ma i kwubnanya a n'ehni i ọkwukwokuwu.

¹⁶ Ọ búma lele ọhi, o kakwo ọhi, kọvu lele nnwọ nda be whnuru n'anya. Ọ zị m mkpa k'ezị, kọvu ọ zị ị mkpa kakwo lele badnu nọ lele nnwọ nda nọ rime Nyenwe aị.

¹⁷ Ọ buru nọ i kwuru m nye ọru ibne i, kwubnanya a lele kpa i jeegweru m.

¹⁸ Ọ buru nọ o nwernu nhne ọjọ ọbula mọbu ọgwo ke o ji i, gwnusi a nọ risi m.

¹⁹ Mawa Pọlu, ji aka m naagba nhne ka, m jọkwu ị be. Ị magwu nọ ji n'iwuhuru i jigwu m ọgwo budnu i.

²⁰ Bikno, nwene m rukna, menu m nhne ka kwnornu nọ Nyenwe aị, mee ovu so m n'ọnu lele nwene rukna nọ Karaịsi.

²¹ M tükwasiri m mkpoma nọ ị jooono nsnị kpa me naagba ọkwukwo ka nọ i jeeme kakwo nhne me ọorio ị.

²² Kpam masị, bitanu m otu ọnu ọro, kwnornu m neele anya nọ Chiokike jaaza kpakara okpukpe anọ mee m hiehnakwnusi anọ berere.

Obekwu ikwu ipne-aznu

²³ Epafarasị nye me nọ a zị n'ikelu kwnornu Karaịsi Jizọsi neebekwu i,

²⁴ ma ele ọru ibne m Maki, Arisitakosi, Demasị nọ Lukwu.

²⁵ Oru ke Nyenwe aị Jizọsi Karaịsi dazinu enine anọ.

Okwukwo izi Ele Hiburu Nhne gbasiri okwukwo izi ka

Okwukwo izi Ele Hiburu bu ke be gbaznenu ele Kara isi ele be neemegidne, ele zi nu ogwu nu be jaaghasa okwnata mkpoma nu Kara isi. Nye gbaru okwukwo ka naakanu be nu Jizosi Kara isi bu ezi oyiyi Chiokike n'iwuru a. O neegesi nhne ka, ke mbom, Jizosi bu Nnwọ Chiokike ke zi okwnukokwu, nye muhiaru obno nsni hite n'awhnuwhnu o gawheru. Lele Nnwọ Chiokike, Jizosi kakwo kpakara ele owhnurninya ke Tesitamenti Oknani, ma ele enine izi, ma Mozizi n'iwuru a. Ke ebo, Chiokike karu nu Jizosi bu nye ariohna, nye obula ke kweru nu ya, jeenwehia ozhohia nu mmehie.

Nye gbaru okwukwo izi ka kwuru oka gbasiri ele dikne ke okwnata oву, ele gwuzoru kwem du n'enu. Be lekwasiri Jizosi anya, nu ruwhnu awhnuwhnu nu okpagbu be kpagburu be. O jiri odo aka nu nsni nu ezni mesni okwukwo izi a.

Nhne zi n'okwukwo izi ka

Kara isi bu oyiyi Chiokike zuru ozu (1:1-3)

Kara isi kakwo ele enine izi (1:4--2:18)

Kara isi kakwo Mozizi nu Josua (3:1--4:13)

Kara isi bu nye risi ariohna kakwo (4:14--7:28)

Ogba-njo-ehni Kara isi kakwo (8:1--9:22)

Ariohna Kara isi kakwo (9:23--10:39)

Okwnata mkpoma bu risi nhne (11:1--12:29)

Mee nhne joso Chiokike n'onu (13:1-17)

Okpukpe nu oka ipne-aznu (13:18-25)

Nnwọ a kakwo

ele owhnurninya

¹ N'ige wheru ewhe, Chiokike kwunnu ele nda a oknani oka agida ige hite n'onu ele owhnurninya n'apna zi ichne ichne.

² Kovu kitna, n'obochi ipne-aznu ka, o kwunnu a oknani hite n'onu Nnwọ a Jizosi, bu nye o hohiaru ma o buru nye jeeri kpakara mkpe, nye o hiri n'aka a kpu owa.

³ O nwernu igwugwu Nda a. Nnwọ wam bu nhne Nda a bu. O ji ikwu-onu a ke nwernu iknerna jigidne kpakara nhne. O jiri aka a snusnama mmehie owa. Nga o mekworu ka, o daziri eli n'akarikwununga Chiokike n'oligwe, nye kakwo kpakara nhne n'olu.

Nnwọ Chiokike kakwo

ele enine izi

⁴ Nnwọ wam kakwo ele enine izi lele kpa rehna a "Nnwọ," ke Chiokike nyernu a kakwo rehna be.

⁵ Kwnornu nu o za enine izi obula ke Chiokike kannu, "Ji bu Nnwọ m.

M gholam Nda i tna."

Mobu, o zi masi enine izi ke Chiokike kannu,

"M jjoburunu i Nda,

i jjoburu Nnwọ m."

⁶ Nga Chiokike neeziya Nnwọ a nu rime owa, o kaa, "Kpakara ele enine izi Chiokike kponu a risi eli."

⁷ Ka bu nhne Chiokike kwuru gbasiri ele enine izi,

“Chiokike mernu ele enine izi a lele ruwhere,
ele izi a lele bẹkwnu neerne erne.”

⁸ Kọvu nhne gbasiri Nnwọ wam, Chiokike karu,

“Chiokike, ngadna eze i jaazi tim tom,
Mkpara ẹli-eze i bu ikpe zi snam.

⁹ I whnrnu nhne oma n'anya, sno nhne ojo irno,
kam kpayaru, Chiokike, bu Chiokike i teru i mono ovu oso n'onu,
bita i nu hne kakwo kpakara ele ibne i.”

¹⁰ O kaa,

“Ji Jihova, i turu ntụ-ẹli owa hite nu mbom.
I ji aka i lawuru kpụ oligwe.

¹¹ Kpakara be joowhu, kọvu i jaazi okwnukokwnu.
Be jaaka buka lele iwo.

¹² I jaapiakota be lele iwo olu,
be jaagbanwo be lele ikpe,

kọvu i zi kpa i zi nu mbom,
onu ogwnugwnu awha i jeebi ebi.”

¹³ O za enine izi obula ke Chiokike kannu,

“Daziri ẹli n'akarikwnunga m
tem du nga me jaabita ele irno i
lele nhne i jootukwasi ochi i lawuru.”

¹⁴ Ele enine izi, kpakara be buo ele o ziyaru o yinu ele jeekehia oznohia aka sa?

2

Okne oznohia wam

¹ Kam kpayaru, a jigidne ezi oka wam a nurnu aka rikne, o zi be vume ai lele kpa mini noovume ogbo.

² O buru nu ikwu-onu ele enine izi kwuru gwuzosiri rikne, kpakara mmehie nu risi rikne nahjaru ogwo ẹnu awnhuwhnu kwesiri be,

³ ndaa kpa a jaagbanahoru, o buru nu a lewhuru okne oznohia hna kpa anya? O bu ke Nyenwe ai n'iwuru a beru osno zni, ele nurnu a kannu ai nu o bu ezi oka.

⁴ Chiokike gbannu be akebne hite nu ẹnu elekema zi ichne ichne ke rikne, nu ẹnu ndu-ehni, nu ẹnu rikne zi ichne ichne. O gba masiri akebne nga o nyernu ele badnu nkesi ke Enine Nso lele kpa o masiri a.

Jizosi nu lele rumu nne a

⁵ Berere kwno, Chiokike bitage ele enine izi ele jaachi owa ke java, bu owa ke a nookwu oka a.

⁶ Kọvu be kwuru n'otu hnenum n'okwukwo nso,
“Kini bu nhne badnu etekne bu, ke i naari oriri gbasiri a,
nu nnwo ke badnu ke i neelekota a?”

⁷ I mernu a o hietu ẹli matị karu ele enine izi.
I jiri igwugwu nu onon'anya kpusi a nu risi lele okpu-eze.

⁸ I mernu a nye risi kpakara nhne.”

Ka neegesị nu o za nhne o sigbasiri o bita nu mkpururu ochi a. Kọvu kitna, a whnuge nu kpakara nhne ka zi nu mkpururu ochi a.

⁹ Kọvu a whnrnu Jizosi, nye o mernu hietu ẹli matị karu ele enine izi. O jiri igwugwu nu onon'anya kpusi a nu risi lele okpu-eze kwnornu nu o nwurnu ẹnu. Hite n'oru Chiokike, o raturu ẹnu riro kwnornu kpakara badnu.

¹⁰ Chiokike nwe kpakara nhne, ya ke masiri kpakara nhne hite n'iknerna a. O mernu nhne kwesiri nga o mernu Jizosi zu ozu hite n'awhnuwhnu, ma o znohia agida rumu Chiokike, mee be snornu a kehia igwe n'igwugwu a.

¹¹ Kwnornu nu nye bitaru be nsọ nu ele be bitaru nsọ bu otu ọro. Kam kpayarụ, o sukwu be rumu nda a zá nọotu a iwghnerne.

¹² Ọ karụ,
“M jookwupiya rewhna i n'esilawuru rumu nda m,
m jaaznarni i n'esilawuru ọgbako Chiokike.”

¹³ Berere kwno,
“M jootukwasi a ovu,”
o kwu kwno,

“Le me nu rumu Chiokike nyernu m.”

¹⁴ Lele rumu o sukwuru vugwu anọ-ehni nu ọvnarna, Jizosi ghoru badnu ke vugwu anọ-ehni nu ọvnarna ke nwernu rikne nwu enwu, ma hite n'enwu a, o megbu nye wam bu Ekwensu ke nwernu rikne enwu,

¹⁵ ma o dohia ele zi n'ohi kpakara budnu be n'ogwnu enwu.

¹⁶ Kwnornu n'ezị, Jizosi vage o yinu ele enine izi aka, kovu rumu avnurnu Eberham.

¹⁷ Kam kpayarụ, o zi mkpa Jizosi nu lele rumu nda a nu apna obula, ma o buru nye risi arjohna ke nwernu mkpoma obirizi kwesiri okwnata ovu nu ruwhnu Chiokike, o buru masi nye mernu badnu nu Chiokike ziri n'udno hite nu ogbaru mmehie.

¹⁸ Kwnornu nu o taru awhnuwhnu nga be rnarnu a ornurna, o nwernu rikne yisinu ele be naarna ornurna aka.

3

Jizosi kakwo Mozizi

¹ Kam kpayarụ, rumu nda m, ele zi nsọ, ele vu osukwu ikwu oligwe, anu ri oriri nhne gbasiri Jizosi, nye izi, nu nye risi arjohna ke okwnata ovu ai.

² O bu nye kwesiri okwnata ovu nyee nye hohiaru a, lele kpa Mozizi buri nye be tukwasiri ovu nu kpakara enu a n'oro Chiokike.

³ Jizosi kwesiri o nwe igwugwu ke kakwo igwugwu Mozizi lele kpa nye wuru ọro nwernu igwugwu karu ọro o wuru.

⁴ Kwnornu nu kpakara ọro nwernu nye wuru a, kovu Chiokike wuru kpakara nhne.

⁵ Mozizi, lele nnwo izi be kwesiri o tukwasi ovu nu kpakara ọro a, gbaru akebe nhne be jookwu nu ruwhnu.

⁶ Kovu Karaisi kwesiri okwnata ovu lele nnwo n'oro Nda a. A bu ọro a, o buru a bita mkpoma siri rikne ai, gwuzosi masi rikne nu nhne a neele anya a.

Ozukwa inwe ke rumu

Chiokike

⁷ Lele kpa Enine Nso karu,
“Tna, o buru nu anu nurnu nkoli a,

⁸ anu mee ovu anu si rikne,
lele kpa ele Izireli mernu nga be gwuzogidnenu Chiokike,
ige ornurna n'eli-ikpa.

⁹ Nga ele nda anu oknani kparu m iru, kpahia m,
be whnurnu enu m nri awha eno.

¹⁰ Ovu weru m ehni kwnornu ebiri kam,
m kaa, 'Mkpoma be noowhu apna,

be kwége o bíta iwu m.’

11 Kam kpayarū, m ji m ovu owe ẹhni dū risi, kaa,
‘Be jáabna hne me jeenye be ozukwa inwe.’ ”

12 Rūmu nda m, anya dū anū ẹli, o zá nye ọbula n’esilawūru anū ke jeenwe ovu mmehie ke kwé ekwe ke jeeme a o whọga nū hne Chiokike ke zì bụdnu zì.

13 Kọvu anū kwnagidne ibne anū hnebuko ọbochi be kwuru “Tna.” O zá nye kwe aghigho ke mmehie mee ovu a si rikne megidne Chiokike.

14 Kwnornu nū o buru a jidne ọkwnata mkpọma a nwernu nū mbom dū okwukwo, aì nū Karajisi jeekekọ nhne.

15 Lele kpa be gbarū n’okwukwo nsọ,

“Tna, o bụ nū anū nurnu nkọli a,
anū mékọ ovu anū si rikne

lele kpa ele Izireli mernu nga be gwuzogidnernu Chiokike.”

16 Ndaa ele nurnu nkọli Chiokike mee risi rikne? O bụo ele Mozizi hiri n’ẹli Ijipiti duhja sa?

17 Ndaa ele Chiokike wesanu ovu ẹhni nri awha ẹno? O bụo ele mehieru, bụ ele iznu be dnarnu n’ẹli-ikpa?

18 Ndaa ele Chiokike duru risi nū be jáabna nū hne o jeenye be ozukwa inwe? O bụo ele bnóge nsnì?

19 A whnurnu nū be bnáge hne o jeenye be ozukwa inwe kwnornu nū ókwe ekwe be.

4

1 Chiokike kweru aì mkwna o bna n’ozukwa inwe a, mkwna wam noogwuzo kwem, anū ngwa ma a tū ogwnu, o zì otu nyenum n’esilawūru anū ba adna nū o bna nū rime a.

2 Kwnornu nū be znirni aì izi ọma lele kpa be znirni be. Kọvu izi be znirni be bnágene be nū nhne, kwnornu nū ele nurnu a jile ọkwnata ovu naahọru a.

3 Kìtina aì ele kweru bnarnu n’ozukwa inwe a lele kpa Chiokike kwuru,
“M ji m ovu owe ẹhni dū risi,

be jáabna hne me jeenye be ozukwa inwe.”

O kwuru ka, o bụ n’ezi nū ẹnu wam kwolem kpa o tūru ntụ-ẹli ọwa.

4 O kwuru ọka gbasiri ọbochi ke ẹsau n’otu hnanum, “Chiokike zukwaru inwe n’ọbochi ke ẹsau nū kpakara ẹnu a.”

5 Nū hnam kwno, o kaa, “Be jáabna n’ozukwa inwe m.”

6 A whnurnu nū ozukwa inwe zinu ele ke Chiokike. Kọvu, ele nurnu izi ọma wam nū mbom bnáge n’ozukwa inwe wam kwnornu n’ókwe ekwe be.

7 Chiokike bítaru ọbochi berere ele badnū ji naabna n’ozukwa inwe a, kwu a “Tna.” Nga agida awha whemernu, o hi n’onu Devidi kwu lele kpa o kwuru nū mbom,

“Tna, o buru nū anū nurnu nkọli a,
anū mée ovu anū si rikne.”

8 Kwnornu nū o buru nū Josua duru be bna n’ozukwa inwe, Chiokike bó kwule ọka gbasiri ọbochi ozukwa inwe berere.

9 Ka neegesi nū ozukwa inwe berere zinu rumu Chiokike lele kpa Chiokike zukwaru inwe kpa o kekworu ọwa n’ọbochi ke ẹsau.

10 Nye ọbula ke bnarnu n’ozukwa inwe ke Chiokike, noozukwa inwe nū kpakara ẹnu a lele kpa Chiokike zukwaru inwe n’ernu a.

11 A yisi ẹhni ma a bnazne n’ozukwa inwe a, o zì nye ọbula ba adna kwnornu nū ókwe ekwe lele kpa rumu Izireli dnarnu.

¹² Ikwu-ọnu Chiokike zị bụdnu nọornusi ọnu rikne. Ọ zị bụko kakwo ama-ogwunu ruwhnu lawuru. Ọ nọodubna, neekewa mkpuru ovu nụ enine, ma ọkpukpu nụ ọmio. Ọ nọotupiya echiche ovu nụ agwa ke badnụ.

¹³ Ọ zá nhne be keru eke ke tugwaru otugwa n'anya Chiokike, kpakara nhne gbe anya n'anya nye wam a jaasa ajiji gbasiri ẹhni aị.

Jizosi bu nye risi arịohna

¹⁴ Hne a nwernu nye risi arịohna hna ezi kpa, nye beru ọsno zne nụ ruwhnu Chiokike n'oligwe, Jizosi Karaịsi Nnwọ Chiokike, a jidnesi okwuhia ke ọtukwasi ovu aị aka rikne.

¹⁵ Kwnornu nụ a nwée nye risi arịohna ke nhne gbasiri aị zá neemetu n'ovu, kovu a nwernu nye risi arịohna nye be kparu iru n'apna ọbula lele aị, kovu o méne mmehie.

¹⁶ Ngwa ma a gweru ovu siri rikne vadu ngadna oru ke Chiokike ma a nahia obirizi nụ oru jeeyinu aị aka n'ige mkpa.

5

¹ Nye risi arịohna ọbula bu nye be hohiaru n'esilawuru ele badnụ, be bita a ichne ma ọ dnasni anya badnụ nụ ruwhnu Chiokike, naakwanu be arịohna nụ nkesi kwnornu mmehie.

² O nwernu rikne gweru ovu ọma mesno ele nwée rikne nụ ele máa nhne n'apna ọbula, kwnornu nụ ya n'iwuhuru a zá rikne.

³ Kam kpararu, ọ naakwa arịohna kwnornu mmehie ke a, nụ ke ele berere.

⁴ Ọ zá nye gweru igwugwu o chni ẹhni a nye risi arịohna, kovu nye Chiokike sukwuru lele kpa o sukwuru Erọni.

⁵ Kpam masi, Karaịsi nyége ẹhni a igwugwu ke nye risi arịohna. Kovu Chiokike kwuru nhne gbasiri a,

“Ji bu Nnwọ m,
M gholam Nda i tna.”

⁶ Chiokike kwu kwno nụ hne berere,

“I bu nye arịohna okwnukokwnu,
n'ahiri ke Məkizedeki.”

⁷ Nga Karaịsi zị bụdnu n'owa, o ji okne ẹkwana nụ anya-mini rịo arịrio a n'okpukpe nyee Chiokike, bu nye nwernu rikne ọ dọhia a n'ẹnwu. Ọ nurnu okpukpe a, kwnornu nụ o gwednarnu ẹhni a ẹli.

⁸ Ọ bu n'ezị nụ Jizosi bu Nnwọ Chiokike, kovu, ọ muhiaru obno nsni hite n'awhnuwhnu ọ taru.

⁹ Nga be mernu a ọ ziri snam, ọ ghoru nye risi ọznohia okwnukokwnu ke kpakara ele joobno nsni.

¹⁰ Chiokike mernu a ọ buru nye risi arịohna n'ahiri Məkizedeki.

Ọdnahala aznu

¹¹ A nwernu agida nhne a jookwu gbasiri Karaịsi nye risi arịohna n'ahiri Məkizedeki, kovu a jóokwu a kwnornu nụ anụ jéenwe rikne ghọhia be.

¹² Kịtna, anụ kwesiri ọ buru ele jeezni nhne, kovu ọ zị koriri mkpa be neezni anụ nhne mbom ke ikwu-ọnu Chiokike. Ọ buru nụ mini-remá bu nhne anụ zị koriri nnonwo, ọ bụo wiri siri rikne.

¹³ Kwnornu nụ nye ọbula ke nnonwo mini-remá bu watakiri, o nwée rikne mahia nhne ọma nụ nhne bụo ọma.

¹⁴ Wiri siri rikne bu ke ele soru oso, bu ele be znuonu ọ mahia nhne zị ichne nụ hne nhne ọma nụ nhne ojo zị.

6

1 Ngwa ma a zne ruwhnu, a sigbasi iznizni mbom ke Karaṣi zne nṅ ozu ozu, a zoma o tu ntu-eli otuhnasna nṅ mmehie berere hite n'ome nhne ke neegweya enwu, kweru nṅ Chiokike.

2 Ka bu iznizni ke owu mini nu ke obniakwasi aka nu risi, nu ke ohi n'enwu lizo, nu ke ikpe zi okwnukokwnu.

3 Chiokike kwe, a jeeme nhne ka.

4 O bu nhne kwé omume nu ele mahiaru iwhe ke Chiokike dnahnala, jeehiehna, bu ele raturu nkesi oligwe riro, bu ele kehjaru igwe nu rime Enine Nso.

5 Ele ka bu ke raturu nhne oma ke ikwu-onu Chiokike riro ya nu iknernema ke owa ke jaava,

6 be hi nu ya dnahnala. O bu nhne jéekwe omume o kwuhnaya be, o nu lele be nqokpogidne Nnwọ Chiokike n'olu ogba berere, naakpasị a iwheerne nu ruwhnu ohna.

7 Eli ke nwornu mini ke noozokwasi a, naamipiya mkpuru ke bnannu ele ekwu iru, o nahja ngozi Chiokike.

8 Kovu eli ke nooru igwnu nu akikara bnáge iru obula. Be jovu a onu, n'ipnezazu, bekwnu jeerne a.

9 Kovu ele me whornu n'anya, o bu n'ezi a nookwu kpa, a tukwasiri ovu nu nhne kakwo mma gbasiri anu, bu ngozi ke oznohia nu mmehie.

10 Chiokike za neeme nhne ojo. O jeechezu enu anu ya nu owhnun'anya anu gesiri rewhna a, zi koriri neegesi hne ele ke Chiokike zi.

11 A noopio ma nye obula mee koriri kpm du okwukwo, ma olile anya anu ziri kwem.

12 A piole anu buru ele ime-mgwu, kovu anu nu lele ele kweru ekwe nwe masi ndidi tem du o nahja mkwna Chiokike kweru.

Mkwna Chiokike zi kwem

13 Nga Chiokike kweru Ebereham mkwna, o jiri ehni a du risi kwnornu nu o za nye berere kakwo a.

14 O kaa, "N'ezi oka, m joozoozi i, nyee i obuba masi."

15 Ebereham jiri ogologo nkasi ovu nwehja mkwna wam Chiokike kweru a.

16 Ele badnu neeji nye kakwo be du risi, neemesi oka be rikne, kam buru mbimambi oka nu odogbuta.

17 Chiokike, ma o gesi ele jeekehja mkwna, nu o jaaganwo mkwna wam, jiri rewhna a du risi.

18 Chiokike nyernu ai mkwna a nu o du risi a, nhne lawuru ka gbanwo agbanwo kwnornu nu Chiokike jaagha aghalaghala, ai ele gbaznenu jigidne olile anya ke zi nu ruwhnu ai aka o zi inwe gwu ai.

19 A nwernu olile anya ka lele nkno ke mkpuru ovu, ke zi jji nu kwem, ke dubnarnu ai n'aznu ikpe obnosni nu rime hne zi nso,

20 hne jizosi beru ai osno bnazne, buru nye risi arjohna okwnukokwnu n'ahiri Mekizedeki.

7

Mekizedeki, nye arjohna

1 Mekizedeki ka bu eze Salem, nye arjohna ke Chiokike ke Kakwo Nhne Dum Olu. O zuteru Ebereham nga o hiri ogwnu ke o gburu ele eze neehiehna, o gozi Ebereham.

² Eberham nyee a otu nga nū nri nga kpakara nhne o gweyaru. Rēwhna a ke mbom bu “Eze Ome Mma,” ke ẹbo bu “Eze Salem,” ke bu “Eze Udno.”

³ O zá ọtnutnu gbaka gbasiri nda a mọbu nne a, mọbu avnuru a, omumu a, mọbu ẹnwu a, lele Nnwọ Chiokike, o bu nye arịohna ọkwnukokwu.

⁴ Le nye kwu ka, ke nda aị Eberham nyegarū a otu nga nū nri nga kpakara nhne o luhiaru n'ogwnu.

⁵ N'ezị oka, iwu karū rumu Livai ele arịohna nahoru rumu nda be otu nga nū nri nga. O bu n'ezị nū be bu rumu Eberham.

⁶ Kọvu Mekizedeki híge nū avnuru Livai, kọvu o nahoru Eberham otu nga nū nri nga, gozi masi nye wam nahiaru mkwna Chiokike.

⁷ N'ezị, nye wam ke goziri kakwo nye wam o goziri.

⁸ Hna, badnu etekne ke joonu onwu nanarnu otu nga nū nri nga. Kọvu hne berere, Mekizedeki nye be gbaru akebne nū o jaazi tem nanarnu otu nga nū nri nga.

⁹ A jaaka nū nga Eberham kwuru otu nga nū nri nga, nū Livai nye nanahoru otu nga nū nri nga kwuru ke a masi nū rime Eberham,

¹⁰ kwnornu nū Livai zi nū ruwho Eberham nda a nga Mekizedeki zuteru Eberham.

Jizosi bu nye arịohna lele Mekizedeki

¹¹ Be nyernu ele Izireli iwu hite n'ele arịohna Livai. O buru nū iwu ke mernu rumu Livai buru ele arịohna mernu badnu zu ozu, o zá mkpa nū nye arịohna berere jaava n'ahiri Mekizedeki, buo n'ahiri Eroni.

¹² Kwnornu nū kpa be gbanwornu ele arịohna, kpa masi bu kpa be jiri gbanwo iwu kam.

¹³ Nye a nookwu oka bu Nyenwe ai, nye hiri n'avnuru berere, o zá nye obula ke hiri n'avnuru kam bu nye okwa arịohna.

¹⁴ A magwu nū Nyenwe ai hiri nū avnuru Juda whuya, bu ele Mozizi kwuge nhne okwa arịohna gbasiri be.

¹⁵ Ka dnornu ai anya nkari nkari, kwnornu nū nye arịohna berere whuyaru lele Mekizedeki.

¹⁶ O buo nye arịohna hite n'iwu ke osnusno omumu ke badnu, kọvu o bu nye arịohna hite nū iknerna budnu ke kwó okwo.

¹⁷ Kwnornu nū okwukwo nsọ karu kpa,

“I bu nye arịohna okwnukokwu,
n'ahiri Mekizedeki.”

¹⁸ Be sigbasiri iwu oknani kwnornu nū o zá rikne, o bnaige iru obula,

¹⁹ kwnornu nū o zá nhne ke iwu mernu ozu ozu. Kọvu a nwernu olile anya ke ka mma ke a jeeji vachu Chiokike ndundu.

²⁰ Chiokike duru risi gbasiri a, ele berere buru ele arịohna hne be duge risi.

²¹ Jizosi bu nye arịohna Chiokike dunnu risi, kwu masi nhne gbasiri a,
“Jihova duru risi,

o jaalahna aznu,

‘I bu nye arịohna okwnukokwu.’”

²² Kwnornu odu risi ka, Jizosi bu mbimambi ke ogba-njo-ehni ke kakwo mma.

²³ Ele arịohna wam zi agida kwnornu nū be nwuru onwu ke mernu be nwée rikne dazigidne lele ele arịohna.

²⁴ Kọvu Jizosi zi budnu okwnukokwu, ẹnu ke nye arịohna a zá naaghanwo agbanwo.

²⁵ Kam kpayaru, o nwernu rikne o znohia kparam kparam bu ele hiri n'aka a vakwnusi Chiokike, kwnornu nu o zi budnu okwnukokwnu n'orionu be aririo nu ruwhnu Chiokike.

²⁶ A nwernu nye risi ariohna nu kpa, nye zi nsọ, nwée ntubo, nye mmehie zila nu rime, nye zi ichne hne ele badnu ele mmehie zi, nye be gwelizoru olu kakwo kpakara oligwe.

²⁷ Jizosi nuna lele ele risi ariohna ele berere, o za naakwa ariohna kpakara obochi kwnornu mmehie ke a nu ke ele Izireli. Kovu o kwarnu otu ariohna kpoi ke zuru ohna nga o gweru ehni a kwa ariohna.

²⁸ Kwnornu nu iwu mernu ele badnu ele zuge ozu ele risi ariohna, kovu ikwu-onu wam Chiokike jiri du risi ke sno iwu wam n'aznu mernu Nnwọ wam nye zuru ozu okwnukokwnu.

8

Jizosi bu nye risi

ogba-njo-ehni ikne

¹ Ka bu risi kpakara nhne a nookwu, a nwernu nye risi ariohna nu kpa, nye dazi n'akarikwnunga ngadna eze Chiokike n'oligwe.

² Nye ariohna nu kpa zi noru eru nye ariohna nu Hne Kakwo Nso n'oligwe, bu ezi Oro-Eka Nso ke Nyenwe ai wuru, o bua badnu.

³ Nye risi ariohna obula jaakwa ariohna nu nkesi nu ruwhnu Chiokike, o zi mkpa nu nye ka jeenweri nhne o jeeji kwa ariohna.

⁴ O buru nu o zi n'owa, o jobu nye ariohna ria ria, kwnornu nu agida ele ariohna zi ele naakwa ariohna lele kpa Iwu Mozizi kwuru.

⁵ Be neezne izi n'Oro Nso ke nhne atu lele ke zi n'oligwe. Lele kpa Chiokike kannu Mozizi nga o noowu Oro-Eka Nso, "Whnu nu i mernu kpakara nhne lele kpa be gesiri i be n'olu rugwu."

⁶ Kovu eru okwa ariohna ke Jizosi kakpa ke ele rnurnu eru nu mkpururu iwu oknani. Ogba-njo-ehni ke o gbaru n'esilawuru Chiokike nu ele badnu kakwo mma, kwnornu nu o gwuzogwu n'olu mkwna ke kakwo mma.

⁷ O buru nu ogba-njo-ehni ke mbom zuru ozu, mkpa ke ebo be zene akpa ai.

⁸ Kovu Chiokike whurnu nu ele badnu zuge ozu, o kaa,

"Obochi wawa, bu nhne Jihova kwuru,
nga me nu oro Izireli nu oro Juda,
jaagba njo-ehni ikne.

⁹ O jonu lele njo-ehni,
me nu ele nda be gbaru,

n'obochi me jiri be n'aka m
dohia be n'eli Ijipiti,

be kwnatala ovu nu njo-ehni wam me nu be gbaru,
m lemernu m be anya,
bu nhne Jihova kwuru.

¹⁰ Kitna, ka bu njo-ehni me nu ele Izireli jaagba
nu obochi ke jaava, bu nhne Jihova kwuru.

M jeeyisi iwu m nu rime echiche be,
m jaagbakwasi be n'olu mkpoma be,

m joburu Chiokike be,
be joburu ele ke m.

¹¹ O za nye n'esilawuru be ke jeezni ibne a,
mibu kanu nwene a, 'Mahia Jihova,'
kwnornu nu kpakara be jaamahia m,

hite nū nye zī maṭi dū nye ezi.

¹² M jaagbarūni be oḡahie be,
m jéechenwanya mmehie be berere.”

¹³ Hne o nookwu oka oḡba-njọ-ẹhni ikne, Chiokike mernu ma ke mbọm ziri oḡkani, nhne oḡbula mernu oḡkani jọdoka oḡdoka, whume masi.

9

Okpenu Chiokike n'owa

¹ Oḡba-njọ-ẹhni ke mbọm ke Chiokike nū rumu Izireli gbarū nwernu iwu osnusno okpukpe n'oro nsọ ke owa.

² Be wuru oro okpukpe ke mbọm ke bu hne zi nsọ. Nu rime onu oro ke mbọm, nhne zi nu rime a bu nhne be bita tonji nu ikpechi nu bredi arjohna Chiokike.

³ N'aznu ikpe obnosni ke ebo bu hne be kwu Hne Kakwo Nso.

⁴ Nhne zi nu rime a bu ojo golu ke isensi, nu Igbe Oḡba-Njọ-Ẹhni be wuru golu. Nu rime igbe wam, nhne zi a bu otu ite golu mana, nu mkpara Eroni ke waru okwukwo nu mbadamba akaworugwu lawuru ke be gbakwasiri iwu wam n'olu be.

⁵ N'olu igbe, ele enine izi be wuru owu zi igwugwu be kwu Cherubim gbasaru akankwu be kpusnirni ikpechi oru. A jeeuwe rikne kowa kpa be kitna.

⁶ Nga be bita kworu kpakara nhne, ele arjohna naabna nu hne zi nsọ kpakara obochi nonu enu be.

⁷ Kovu okwolem nye risi arjohna naabna nu Hne Kakwo Nso n'aznu ikpe obnosni wam otu mgba n'awha. O jeeji ovnarna ke o jeeji kpusni mmehie ke a nu mmehie ele Izireli mernu nu oma ama.

⁸ Enine Nso neegesi kpa Oro-Eka Nso ke mbọm nu omen'eli a gwuzo koriri, apna be jeeji naabna nu rime Hne Kakwo Nso mesnirni emesni.

⁹ Ka bu nhne neegesi n'ige ka, nu nkesi nu arjohna be jiri kwanu Chiokike arjohna jeeuwe rikne mee ele neegweya nkesi arjohna zu ozu.

¹⁰ Ka bu wiri nu manya nu mmemem ke osnusna, kpakara omen'eli ele ka bu nhne anya nonwhnu joogwuzo tem du ige Chiokike jaagbanwo be.

Ovnarna Karaṣi

¹¹ Kovu Karaṣi varu lele nye risi arjohna nhne ke ka mma ke zi hna, Oro-Eka Nso ke o nonu enu nu rime a kakpa, zu masi ozu. O buo ke be jiri aka wu, o buo ke be keru eke n'owa ka.

¹² Nga Karaṣi bnaznenu nu rime Hne Kakwo Nso, o bnarnu otu mgba kpai. O jile ovnarna owu mabu ke nnwo ehni kwa arjohna, kovu o ji ovnarna ke a gbahia kpakara ai okwnukokwnu.

¹³ Ovnarna owu nu ehni nu nnwo ehni nu retnu ke be wekwasiri ele zila richna mernu be ziri richna n'olu ehni.

¹⁴ O ko buru ovnarna Karaṣi, nye hiri n'Enine Nso okwnukokwnu gweru ehni a kwa arjohna nwee oru nu ruwhnu Chiokike, josnusnama akoniche ai whoga n'enu ojo ke jaakpaya enwu, ma a kpenu Chiokike ke zi budnu.

¹⁵ Kam kpararu, Karaṣi jiri buru nye agbata ke oḡba-njọ-ẹhni ikne, ma ele Chiokike sukwuru nwehia mkwna o kehia nhne kwokwo. Kwnornu nu o nwurnu enwu ma o zi kpa o gbahia be nu rime awhnuwhnu ke mmehie be mernu nu mkpururu oḡba-njọ-ẹhni ke mbọm.

¹⁶ Hne iwu oke mkpe zi, be jeegesiri nu nye wam gbaru a nwurnu onwu.

¹⁷ Kwnornu nu iwu oke mkpe bu nhne etekne hne nye gbaru a zi budnu, kovu o jaabna n'enu nga nye gbaru a nwurnu enwu.

18 Ka bu nhne kpayaru nu ogba-njo-ehni ke mbom jiri owusi ovnarna gwuzosiri rikne.

19 Kwnornu nu nga Mozizi kannu ele Izireli kpakara nhne iwu wam kwuru, o gweru ovnarna nnwo ehni gwagidne a mini, gweru hisopu nu wuulu ihie whesi n'okwukwo iwu wam nu kpakara ele badnu.

20 O kaa, "Anu bno nsni, ka bu ovnarna ogba-njo-ehni ke anu nu Chiokike gbaru, anu bita a."

21 Kpam masi, o whesiri Oro-Eka Nso ovnarna nu kpakara agbugba nu nhne be ji zne izi.

22 N'ezi oka, o gwnarnu matu ovnarna mee kpakara nhne ziri snam n'iwu, kwnornu nu hne be wusage ovnarna, ogbaru mmehie zila.

Arìohna Karaìsi noovume mmehie

23 Kam kpayaru, Oro-Eka Nso ke owa ka nu kpakara nhne zi nu rime a, bu oiyi nhne zi n'oligwe, bu nhne be jeeji ovnarna nosnu, kovu nhne ke oligwe n'iwuhuru a piuru arìohna ke kakwo mma karu ovnarna anohia.

24 Kwnornu nu Karaìsi bnáge nhne zi nso be jiri aka wu, ke bu oiyi ke okwnamarna nhne. Kovu o bnazernu oligwe hne o gwuzo nu ruwhnu Chiokike nu risi ai.

25 Nye risi arìohna ele Ju naabna Hne Kakwo Nso otu mgba n'awha gweru ovnarna anohia. Kovu Karaìsi znége o ji ehni a kwa arìohna agida ige.

26 O buru kpam, Karaìsi znernu ata awnruwhnu agida ige hite n'opanizo okike owa. Kovu o whuyaru otu mgba kpai kwnornu ai n'okwukwo ige ka, gweru ehni a kwa arìohna ma o vume mmehie.

27 Ka bu ezi oka, badnu jonwuriri otu mgba, omekwo, ikpe Chiokike sno a.

28 Kpam masi, be jiri Karaìsi kwa arìohna otu mgba o vume mmehie agida ele badnu, o jaava ke mgba lawuru znohia ele neele anya a hne mmehie zila a.

10

Karaìsi kwaru arìohna zuru ohna otu mgba

1 Iwu wam bu enine nhne oma ke jaava, o buo nhne wam, kam kpayaru, o nwée rikne hite nu arìohna ke be naakwa ige obula mee ele naava o kpo risi eli zu ozu.

2 O buru nu ele neekpenu Chiokike zi richna nu rime ovu, ikpe mmehie ba mana be. Kpakara okwa arìohna znernu okwome.

3 Kovu kpakara arìohna wam bu nhne ke neechenwanyanu be mmehie be hite n'awha du n'awha.

4 Kwnornu nu ovnarna ehni nu owu nwée rikne vume mmehie.

5 Kam kpayaru nga Karaìsi varu n'owa, o karu,

"Arìohna nu nkesi ruwhnu oma masige i,
kovu i bitannu m ano-ehni o bnonu i nsni.

6 Ovu za noso i n'onu
kwnornu arìohna okporne bekwnu mibu arìohna mmehie.

7 M kaa, 'Chiokike, le, m valen
o mee nhne i piuru me mee,
lele kpa be gbaru nhne gbasiri m n'okwukwo nso.' "

8 Ke mbom, o karu, i piole arìohna nu nkesi ruwhnu oma, mibu arìohna okporne bekwnu mibu arìohna mmehie, o bu n'ezi nu iwu wam karu be mee kpam.

9 O kaa, “Chiokike, le, m valẹm o mee nhne i pioru me mee.” O gwemernu nhne ke mbọm ma o zi kpa o gwuzote nhne ke ẹbo.

10 Kwnornu nu Jizọsi Karaisi mernu nhne Chiokike pioru o mee, o snusnamarnu mmehie ai hite n'ariọhna ke o jiri ẹhni a kwa otu mgba ke zuru ọhna.

11 Nye ọkwa ariọhna ọbula noogwuzo kpakara ọbochi nọornu ẹrnu a, naakwa otu ariọhna agida ige. Kọvu kpakara ariọhna ka nwée rikne noovume mmehie.

12 Kọvu nga nye ariọhna ka kwaru ariọhna ke zi ọkwnukokwnu kwnornu mmehie, o daziri ẹli n'akarikwnunga Chiokike.

13 Hite n'ige wam, o zi neese ige Chiokike jaabita ele irno a lele nhne ọgbakwasi ọchi a.

14 Hite nu otu ariọhna, o mernu ele zi snam hite nu mmehie zu ozu ọkwnukokwnu.

15 Enine Nso naagbanu ai akebne ka hite nu nhne o kwuru nu mbom,

16 “Ka bu njo-ehni ke me nu be jaagba,
n'obochi ke jaava, bu nhne Jihova kwuru,
m jeeyisi iwu m nu rime ovu be,
m jaagbakwasi be n'echiche be.”

17 O kaa kwno berere,

“M jeechenwanya aruru-eli be,
nu mmehie be berere.”

18 Kitna, o gbarunnu be kpakara mmehie be, ariọhna berere za kwnornu mmehie.

19 Kam kpararu, rumu nda m, a nwernu ovu siri rikne o bnazne nu Hne Kakwo Nso hite n'ovnarna Jizọsi.

20 O gbamannu ai apna ikne ke zi budnu hite n'ikpe obnosni wam ke bu ano-ehni a.

21 A nwernu nye risi ariọhna ke kakwo, nye neelegidne oro Chiokike anya.

22 Ngwa ma a gweru mkpoma zi richna nu ezi okwnata ovu, nu ovu ikpe mana vakwnusi Chiokike, ya nu ehni be jiri mini zi richna snusnama.

23 Ngwa ma a knetasi olile anya ke okwnata ovu ai aka rikne, kwnornu nu nye kweru ai mkwna jaabita mkwna o kweru.

24 A gbalị mee nhne joovulizo ọwhnun'anya n'ovu ibne ai hite n'ornu ẹrnu ọma.

25 A ghasa ọgbako rumu nda n'otu lele kpa agwna ele badnu neeme. Kọvu a kwnagidne ibne ai ke kakwo kpa ọbochi wam naava ndundu.

26 O buru nu a jaazi koriri neeme mmehie hne a nurnu ezi oka wam, o za ariọhna berere be jaakwa kwnornu ai.

27 Kọvu nhne ke gwnarnu bu olile anya ke tu ogwnu ke ikpe, ya nu ke okne bekwnu ke jeerne ele neemegidne Chiokike.

28 Nye ọbula ke dnarnu Iwu Mozizi nwurnu ẹnwu hne badnu lawuru mọbu ẹto gbagidnernu a akebne, be donnu a obirizi.

29 Anu le kpa ikpe wam jaazi rikne bu awhnuwhnu nye wam jaata bu nye lednarnu Nnwọ Chiokike anya, nye kpoge ovnarna ogba-njo-ehni ke Chiokike nhne, ke snusnamarnu mmehie a, nye lednarnu Enine Nso ke oru anya.

30 Kwnornu nu a magwu nye karu, “Mawa nwe mmegwnahia, m jeemegwnarnu.” Jihova kwuru berere, “Jihova jeekpe ele ke a ikpe.”

31 O bu nhne tu ogwnu o dnabna n'aka Chiokike ke zi budnu.

32 Anu chenwanya ọbochi ele ke wheru ewhe kpa anu snurnu ovu kpa iwhne Karaisi mukwasiri anu nu rime kpakara awhnuwhnu.

³³ Agwna ige anụ buru ele be kpasiri iwghnerne n'ohna, ige berere anụ dasiri ele berere be neemegbu emegbu n'ikwnu.

³⁴ Anụ dōnnu ele zị n'ikelu obirizi. Nga be nahoru anụ nhne anụ nwernu, ovu sōru anụ n'ōnu kwnornu nū anụ magwū nū anụ nwernu ẹkwnu ke jaazi ọkwukokwnu n'oligwe.

³⁵ Anụ tūwhu ovu osi rikne anụ, o jeenwe ọgwo ẹrnu zị agida.

³⁶ Anụ snūta ovu ma anụ nwernu rikne mee nhne Chiokike pioru, nahia masi nhne o kweru nū mkwna.

³⁷ Kwnornu,
“Ige matị,

nye wam jaava bụ nye jaava, o jooḡbu ọkwnu.

³⁸ Kōvu, nye mee mma ke m jeehi n'okwnata ovu ziri būdnu, ọ buru nū nye ọbula lahna aznū, nhne gbasiri a jōoso m ovu n'ōnu.”

³⁹ Kōvu a būo ele naalahna aznū, whu etekne, a bụ ele kweru dū n'oznohia mkpūru ovu.

11

Ele dikne ke okwnata ovu

¹ Okwnata ovu bụ ọdnabnenu nū nhne a neele anya, nū ọtukwasi ovu nū nhne ke a whnūge anya zị.

² Hite n'okwnata ovu, ele gbaka nahjaru ruwhnu ọma n'aka Chiokike.

³ Hite n'okwnata ovu, a ghōhiaru nū Chiokike jiri ikwu-ōnu a ke ọwa, ke kpayarū, nhne a nōowhnu anya hi nū nhne a whnūge anya whūya.

⁴ Ebeli jiri okwnata ovu kwanū Chiokike arjohna ke ka arjohna Keni nwene a mma. Hite n'okwnata n'ovu a, Chiokike gbarū akebne nū ọ bụ nye mee mma kwnornu nū Chiokike nahōru nkesi a. Hite n'okwnata n'ovu a, ọ zị kōriri nookwu ọka ọ bụ n'ezị nū ọ nwurnu ọnwu.

⁵ Hite n'okwnata ovu, Inoku nwūna ọnwu, kōvu Chiokike kwururu a nū būdnu, be whnūna a, kwnornu nū Chiokike kwururu a. Kōvu sū Chiokike kwururu a, be gbarū akebne a nū o mernu nhne sōru Chiokike ovu n'ōnu.

⁶ Hne okwnata ovu zila, be nwēe rikne mee nhne jōoso Chiokike ovu n'ōnu. Kwnornu nū nye jaavakwnusi Chiokike jeekweriri nū Chiokike zị, nū ọ bụ nye nōokwu ele noopiosi a rikne ọgwo ẹrnu.

⁷ Hite n'okwnata ovu, Noa tūru ọgbo nga Chiokike dōru a aka nū nsnī nhne ke zị nū ruwhnu, ọ whnūna anya, ọ tū ọgbo o jiri znōhia ele ọro a. Ọ marnū ọwa ikpe, kehia ome mma hite n'okwnata ovu.

⁸ Hite n'okwnata ovu, Ebereham bnornu nsnī nga Chiokike sukwuru a zne eli ke o jeekehia nū mkwna, ọ whōga neezne hne ọ maa.

⁹ Hite n'okwnata ovu, o wuru n'eli Chiokike kweru a mkwna lele nye izne. O wuru n'oro-eka, ya nū Aziki nū Jekōpu, ele ya nū be kehjaru otu mkwna wam.

¹⁰ Kwnornu nū Ebereham neele anya eli ke nwernu ntū-eli, ke Chiokike bụ nye nka nū nye wuru a.

¹¹ Hite n'okwnata ovu, Sera nahjaru rikne ọ tū rime nga o wheru ige, ọ bụ n'ezị nū o nwēe nnwō* kwnornu o karū nū ọ bụ nye kwesiri okwnata ovu bụ nye kweru mkwna.

¹² Hite n'otu badnū ka, Ebereham, ọ bụ n'ezị ọ nū lele nye nwurnu ọnwu, hne avnurnu a hna lele mbō ke oligwe nū lele rīzna ke zị nū ngeri osimini hna ke nwēe ọnu ọgwngwgnu.

* **11:11** mōbu hite n'okwnata ovu, Ebereham ghōru nda, ọ bụ n'ezị o mernu okno badnū, Sera n'iwururu a nwēe nnwō

¹³ Kpakara ele ka nwurumu nu rime okwnata ovu. Be nahijage nhne Chiokike kweru mkwna, kovu be whurumu be hite nu hne zi ikere, gweru be, kwuhia nu be bu ele izne nu ele neewhe ewhe n'owa.

¹⁴ Nga ele badnu nookwu kpa, ka neegesi nu be neele anya eli ke aka be.

¹⁵ N'ezi oka, o buru nu be naari oriri gbasiri eli ke be hiri whuya, be znernu alahna aznu.

¹⁶ Kitna, be neele anya eli ke ka mma, eli ke oligwe. Kam kpararu, iwhnerne za neeme Chiokike ma be sukwu a Chiokike be, kwnornu nu o bitannu be otu eli.

¹⁷ Hite n'okwnata ovu, Ebereham gweru Aziki kwa arjohna nga Chiokike kparu a iru. Nye wam nahjaru mkwna wam jiri otu nnwo kpog o nwernu kwa arjohna.

¹⁸ O bu n'ezi nu Chiokike karu, "Hite nu Aziki, i jeenwe agida rumu."

¹⁹ Ebereham kweru nu Chiokike nwernu rikne mee Aziki hi n'enwu lizo, n'ezi oka, o nahoru nnwo a lele nye hi n'enwu lizo.

²⁰ Hite n'okwnata ovu, Aziki goziri Jekopu nu Iso, nookwu oka gbasiri ngozi ke zi nu ruwhnu.

²¹ Hite n'okwnata ovu, Jekopu goziri rumu Josefumu lawuru nga o nonwu enwu. O dnabnenu nu mkpara a kpo risi eli nyee Chiokike.

²² Hite n'okwnata ovu, Josefumu nga o nonwu enwu kwuru nhne gbasiri okwnehala ke rumu Izireli n'eli Ijipiti, nyee be iwu gbasiri okpukpu a.

²³ Hite n'okwnata ovu, ele muru Mozizi tugwaru a enwa eto kwnornu nu o bu nnwo zi ichne, ogwnu iwu eze tula be.

²⁴ Hite n'okwnata ovu, Mozizi, nga o sopiyaru nu badnu, kwela be sukwu a nnwo adna Fero.

²⁵ O snornu rumu Chiokike ta awhnuwhnu kanu a mma kakwo o nwe ovu oso n'onu ke mmehie ige matj.

²⁶ O gwurumu nhne iwhnerne ke Karaisi nhne zi okne onu ahia kakwo kpakara ekwnu ke Ijipiti, kwnornu nu o neele anya ogwo enu ke zi nu ruwhnu.

²⁷ Hite n'okwnata ovu, o sigbasiri eli Ijipiti, o tula ogwnu ovu owe ehni ke eze, kwnornu nu o gwuzoru kwem lele nye whurumu Chiokike wam be whnu anya, anya.

²⁸ Hite n'okwnata ovu, o miteru Iriri Ogawhe nu onarna be wesaru ma enine izi enwu wam ke gburu kpakara nnwo mbom be muru gharu o gbu nnwo mbom ele Izireli.

²⁹ Hite n'okwnata ovu, rumu Izireli wheru Osimini Ihie lele eli etekne, nga ele Ijipiti pioru ma be whe, mini riri be.

³⁰ Hite n'okwnata ovu, oghiri mkpo Jeriko dnarnu, nga ele Izireli gbaru a gburugburu obochi esau.

³¹ Hite n'okwnata ovu, nwerinya ewhere Rehabu ziri budnu, be gbukotala ya nu ele irno Chiokike, kwnornu nu o tugwaru ele znernu o nyokahia eli wam.

³² Ndaa nhne me jookwu, kwnornu nu ige zila me jookwu nhne gbasiri Gidioni, nu Baraki, nu Samsini, nu Jefita, nu Devidi nu Sameli, nu kpakara ele owhnurninya.

³³ Ele hiri n'okwnata ovu lugbu eli-eze, rnu enu oma, nahia mkwna, kpusni onu odum,

³⁴ kpachni bekwnu noonwu onwu, gbanahoru ama-ogwnu, be nwee rikne, kovu be ghuru ele dikne, ele dikne n'ogwnu, chihala ele ogwnu eli berere.

³⁵ Ele rinya nahjaru ele ke be hiri n'enwu lizo. Be taru ele berere awhnuwhnu, kovu be kwela be dokia be, ma be lizo n'enwu ke ka mma.

³⁶ Be mernu ele berere nhne rumu, pnīa be hna, owe, be knernu ele berere eriri, yisi be n'ikelu.

³⁷ Be turu be akaworugwu, be kwobiri be ebo, be jiri ama-ogwnu gbu be, be woru akpukpo owu nu atnurnu gbaghari, be ghọ ele mboni, be kpakna be ēhni, megidne be.

³⁸ Ele owa kwésile ele ka. Be gaghari lele ele nwée ọro n'eli-ikpa nu rugwu matị, be wuru nu rime mkpewu nu onunu eli.

³⁹ Kpakara ele ka nwernu ọtnutnu ọma kwnornu n'okwnata ovu be, kovu be nahịage mkwna wam.

⁴⁰ Chiokike bitannu aị nhne ka mma. Chiokike mernu ma aị nu be zukota, ma a buru ele zuru ozu n'otu.

12

Chiokike naapnīa rumu a

nhne

¹ Kam kpayarū, hne a nwernu agida ele akebne gbarū aị gburugburu, a tuwhu kpakara nhne ke noobnosni aị nu mmehie ke naatakwnusi n'ehni aị, ma a gweru okasi mkpoma gba eso ke zi aị nu ruwhnu.

² A neelegidne Jizosi anya, nye turu ntụ-eli nu nye mekwakworu okwnata ovu aị. Nye kwnornu ovu oso n'onu ke zi a nu ruwhnu li nhne igbugbu ke ogba, gweme iwahnerne, o daziri eli kitna n'akarikwnunga ngadna eze Chiokike.

³ Anu tule nhne gbasiri nye wam ke liri nhne igbugbu ke ogba nu omegidne ke ele mmehie, rikne bo gwu anu, anu dna n'apna.

⁴ Nu rime ogwnu anu nolu megidne mmehie, anu yoluige ogwnu du n'owusa onarna anu n'enwu.

⁵ Anu chezuru ikwu-onu okasi ovu wam ke Chiokike nookwu anu lele rumu, "Nnwọ m, i ledna odo aka nu nsnị ke Jihova anya, ovu lakwadia anu mini nga o bigboru anu.

⁶ Kwnornu nu Jihova naata ele o whnurnu n'anya awhnwhnu, naapnīa nye obula o kwuru nnwọ a nhne."

⁷ Anu nabnarnu awhnwhnu anu naata lele odo aka nu nsnị ke nda nọodo rumu a. Anu whnulele nnwọ ke nda a zá nọodo aka nu nsnị sa?

⁸ O buru nu Chiokike zá nọodo anu aka nu nsnị lele ele berere, anu buo rumu a, kovu anu bu rumu oyi.

⁹ Nda aị k'owa nọodo aị aka nu nsnị, a noobnonu be nsnị. A kwesiri o bnonu Nda aị ke enine aị nsnị karukwo ma a ziri budnu.

¹⁰ Nda aị k'owa naapnīa aị nhne ige matị n'ovu oso n'onu be, kovu Chiokike naapnīa aị nhne kwnornu mbnarna ke aị, ma a snornu a kehia ozi nsọ a.

¹¹ O zá odo aka nu nsnị obula ke nọoso oso n'ige wam, kovu o zi igbugbu. Omekwo, o mịpiya ezi mkpuru ke ome mma nu udno nu rime ele gawheru nu rime a.

¹² Kam kpayarū, anu mee aka ke dnarnu adna lizo nu mkpnerne ochi ke nwée rikne gwuzoru kwem.

¹³ Anu zne izne n'apna ke sniri nsnị o zi ele nwée ochi ba dna n'apna, tnunuma, be gwọ be.

O do aka nu nsnị

¹⁴ Gbalị ma ji nu kpakara ele badnu ziri n'udno, ziri masi nsọ, kwnornu nu o za nye jowhnu Chiokike anya su o zila nsọ.

¹⁵ Anu whnu nu o za nye dnahalaru n'oru ke Chiokike. O zi nye nu lele egwnugwnu luga nlulu n'esilawuru anu ke joovuyanu anu mkpa, hite nu a mejo agida badnu.

16 Anụ whnụ nụ ọ zà nye neeme ọyi mọbu nye zà nọosonu Chiokike anya lele Iso, nye kwnornu otu mgba wiri re ọnodi ọpnarna a.

17 Anụ mahiaru, omekwo, o pioru ọ nahọru ngozi nda a, oghere zila kwnornu nụ o nwée rikne gbanwo nhne o mernu, ọ bu n'ezi nụ o jiri anyamini ẹkwna piosi ngozi wam rikne.

18 Anụ váduge nụ rugwu ke anụ jeemetu aka, lele rugwu Sajna ke neerne bẹkwnu, nụ ọchichiri, okne ogwnu nụ okne ruwhere,

19 nụ ọdidna ke ọkwodu nụ ọdidna nkọli ke ele nurnu a, rjasno nkọli wam kwúma berere.

20 Kwnornu nụ be gwúzolige iwu wam ke karu, “Ọ bụbedi anọhia vadu rugwu wam metu a aka, be gweru ara tugbu a.”

21 Nhne Mozizi whnurnu zi okne ogwnu, ọ kaa, “Ogwnu turu m, ẹhni nọoznu m biri biri.”

22 Kọvu anụ vaduru rugwu Zayoni, bụ Jeruselem ke oligwe, ẹli-ọhna ke Chiokike ke zi bụdnu, nụ ele enine izi, ọ zà nye nọogwnuli ọnu, ele neetne eri ọnwudna.

23 Anụ vadulem ọgbako Chiokike ke rumu be beru ọsno mụ, ele be gbaru ọwhna be n'oligwe, vakwnusi masi Chiokike, nye neekpe kpakara ele badnụ ikpe, nụ enine ke ele ome mma zuru ozu.

24 Anụ vakwnusiri Jizosi, nye ibno ke ọgba-njọ-ẹhni ikne, nụ ọpnarna ke owhesa, ke nookwu nhne ke ka mma kakwo ọpnarna Ebeli.

25 Anya dụ anụ ẹli, anụ whnụ nụ anụ ghárula ọ nurnu nhne nye wam nookwu. Ọ bụru nụ ikpe marnu ele wam bnóne nsnị nhne nye wam zi nọodo be aka nụ nsnị n'ọwa kwuru, ndaa kpa a jaagbanahọru, ọ bụru nụ a bnóne nsnị nhne nye wam zi n'oligwe nọodo aị aka nụ nsnị nookwu?

26 Nkọli a mernu ọwa znu biri biri n'ige wam, kọvu kịtna, o kweru mkwna kaa, “Berere kwno, m jeeme ọ bụo ọwa kpọi znu biri biri, kọvu oligwe masi.”

27 “Berere kwno” neegesi nụ o jeegweme kpakara nhne nọoznu biri biri bụ nhne be keru eke, ma nhne ke zà nọoznu biri biri gwuzosi rikne.

28 Hne a nanahọru ẹli-eze ke zà nọoznu biri biri, a tũnu Chiokike mmamma, kwnakwu a kpa ọ jọso a n'ọnu, nụ ogwnu nụ ọso anya.

29 Kwnornu nụ Chiokike bụ bẹkwnu neerne erne.

13

Kpa be wu bụdnu jaamasị Chiokike

1 Anụ nọowhnu ẹhni anụ n'anya lele rumu nda.

2 Anụ chézu elekọta ele izne, kwnornu nụ agwna badnụ lekọtaru enine izi hne be máa.

3 Anụ chenwanya ele zi n'ikelu lele nụ anụ nụ be zi n'ikelu. Anụ chenwanya ele naata awhnụwhnu lele nụ anụ nụ be sno naata awhnụwhnu.

4 Anụ sọbisinu ọlulu nzi nụ nnwerne. Anụ méru ọkpata nzi nụ nnwerne kwnornu nụ Chiokike jeekpe ele neeme ọyi nụ ele ewhere ikpe.

5 Anụ kwé ọwhnun'anya iwai nẹchi mkpọma anụ, nhne anụ nwernu ji anụ ruwho, kwnornu nụ Chiokike karu,

“M jáaghasa anụ rịa rịa,
m jáasa anụ aka rịa rịa.”

6 Kam kpayarụ, a ji ovu siri rikne kaa,
“Jihova bụ nye neenyinu m aka,

ogwnu zà nọotu m nhne badnụ jeeme m.”

⁷ Anụ chenwanya ele risi anụ wheru ewhe, ele kwunnu anụ ikwu-ọnu Chiokike, kpa be wuru bụdnu be, kpa be nwurnu ẹnwu, anụ snornu ọkwnata ovu be.

⁸ Jizọsi Karaịsi zị kpa ọ zị, ekile, tna, dụ ọkwnukokwnu.

⁹ Anụ kwékwadia iznizni ikne ọbula zị ichne ichne kwnapụ anụ n'apna. Ọ ka mma mkpọma aị gwuzosi rikne n'oru Chiokike, ọ bụo nụ omen'ẹli wiri zị ichne ichne ke zá naabnanụ ele neeri a mbnarna ọbula.

¹⁰ A nwernu ojo ke ele naakwa arịohna n'Ọro-Èka Nso nwée rikne ri nhne zị nụ olu a.

¹¹ Kwnornu nụ nye risi arịohna neegwebna ọvnarna anọhia be gburu lele arịohna mmehie nụ rime Hne Kakwo Nso, kọvu be nọokporne ọkpna anọhia wam békwnu n'aznụ ẹli-ọhna.

¹² Kam kpayarụ, Jizọsi tarụ awhnụwhnu n'aznụ ẹli-ọhna ma o gweru ọvnarna a bīta ele badnụ nso.

¹³ Ngwa ma a znekwnusi a n'aznụ ẹli-ọhna vuru masị iwhtnerne a.

¹⁴ Kwnornu nụ a nwée ẹli-ọhna ke jaadazịgidne hna, kọvu a neele anya ẹli ke naava nụ ruwhnu.

¹⁵ Ngwa ma a znarnị Chiokike ige ọbula, ma ọ bụru arịohna hite nụ Jizọsi, ka bụ nhne nkesi ke hi aị n'ovu, hite n'ọnu nookwuhia nụ ọ bụ Nyenwe aị.

¹⁶ Anụ chenwanya, neeme nhne ọma ya nụ neekesi ele badnụ nhne anụ nwernu, kam bụ arịohna ke nọoso Chiokike ovu n'ọnu.

¹⁷ Anụ bno nsnị, anụ bīta ẹhni anụ nụ mkpururu ele risi anụ, kwnornu nụ be neelegidne anụ anya lele ele jaasa ajiji nụ ruwhnu Chiokike, ma be rnụ ẹrnu be n'ovu ọma, ọ bụo nụ ovu owe ẹhni, ke zá bnanụ anụ mbnarna ọbula.

Obekwu ikwu ipne-aznụ

¹⁸ Anụ kpenu aị okpukpe. A magwụ nụ ovu aị zị rịchna kwnornu nụ a piuru o mee nhne bụru ọma ige ọbula.

¹⁹ M naarjasno anụ kpenu m okpukpe ma m vakwnusi m anụ wara wara.

²⁰ Kītna, Chiokike udno nye mernu Nyenwe aị Jizọsi hi n'ẹnwu lizọ, nye bụ Okne Nye Znụ Atnrnu wam, hite n'ọvnarna ọgba-njọ-ẹhni kwó okwo,

²¹ nyee anụ kpakara nhne bụru ọma o mee echiche a. O gweru masị aị mee nhne masịri a, hite nụ Jizọsi Karaịsi nye nwe igwugwu ọkwnukokwnu. Amim.

²² Rụmu nda m, anụ bno nsnị n'ikwu-ọnu ezni ke me kwuru, kwnornu nụ ọkwukwo me gbarụ zá ogologo.

²³ Anụ mahia nụ nnwọ nda aị Timoti whụyalam n'ikelu. Ọ bụru ọ va ngwa ngwa, me nụ a joosno va lekasi anụ.

²⁴ Anụ bekwu kpakara ele risi anụ nụ kpakara rụmu Chiokike. Ele Itali neebekwu anụ.

²⁵ Oru Chiokike dazinu kpakara anụ.

Okwukwo izi Jemisi Nhne gbasiri okwukwo izi ka

Okwukwo izi Jemisi jihjaru n'agida ezni o nyernu kpakara rumu Chiokike gbasaru nu "rime kpakara owa." Jemisi ji agida nhne anya n'owhnu n'obochi neezni nhne ke enine, neegesi kpa nye Karaisi kwesiri o ji akoniche wu budnu n'owa. Jemisi kwuru oka gbasiri owa eze, owa, ornurna, agwa oma, okewa, okwnata mkpoma, riro, akoniche, okno oka, oknomokno, ozi wohnernerne, okpe ele berere ikpe, nganga, ndidi nu okpukpe.

Okwukwo izi ka nookwu mkpa o zi nu badnu nwernu okwnata mkpoma nu nhne obula o neeme, lele kpa o kwesiri nye neekpenu Chiokike.

Nhne zi n'okwukwo izi ka

Opanizo (1:1)

Okwnata mkpoma nu akoniche (1:2-8)

Odna owa nu eze (1:9-11)

Ornurna (1:12-18)

Onurnu nu omume (1:19-27)

Odo aka nu nsi gbasiri okewa (2:1-13)

Okwnata mkpoma nu ernu (2:14-26)

Nye Karaisi nu riro a (3:1-18)

Nye Karaisi nu owa (4:1--5:6)

Ezni zi odo nu odo (5:7-20)

1 Mawa, Jemisi, nye izi ke Chiokike nu ke Nyenwe aji Jizosi Karaisi, neebkwu kpakara ele ke Chiokike, ke bu avnurnu nri nu obo ele Chiokike zi nu rime kpakara owa.

Okwnata ovu n'ige ornurna

2 Rumu nda m, o buru nhne snarnima ige obula anu dnabnarnu nu nhne ornurna zi odo n'odo.

3 Kwnornu nu o bu okpa okwnata ovu iru jeegweya ndidi.

4 Ndidi rnuzu ernu a, ma anu buru ele zuru ozu, o za nhne kogwu.

5 O buru nu o zi nye nwee akoniche, nye wam rjo n'aka Chiokike, nye neenye kpakara badnu hite nu mkpoma oma a, o za naakpasj iwhnerne. O jeenye a.

6 Nye wam jeeji okwnata ovu noorio, o nweko mkpoma lawuru. Nye nwernu mkpoma lawuru nu lele abaka-mini osimini, nga ruwhere neewhe, o nootulizo a olu.

7 Nye ki cheko nu o jeenwehia nhne obula n'aka Nyenwe aji.

8 O bu nye mkpoma lawuru, o gwuzole kwem nu kpakara apna a.

Odna owa nu eze

9 Nnwõ nda ke bu nye mboni nwudna nga Chiokike gwelizoru a olu.

10 Nnwõ nda ke bu nye kwu nwudna nga Chiokike gwednarnu a eli. Kwnornu nu nye kwu jaagawhe lele igwugwere oha.

11 Nga ehnam wasiri n'orne bekwu a, o chnagbu achara, igwugwere a dnahnala, mma a kwome masi. Kpam masi, nye eze jaagawhe nu kpakara ernu a.

Ornurna

12 Ngozi jaazinu nye wam ovu a siri rikne nu ige ornurna, kwnornu nu o megbu ornurna, o jeenwehia budnu kwõ okwo ke Chiokike kweru ele whurnu a n'anya mkwna.

13 Nga be naarna anụ ọrnurna, nye wam kákwadia, “Chiokike naarna m ọrnurna,” kwnornu nụ ọ zá nye nwernu rikne rna Chiokike ọrnurna, Chiokike rná badnụ ọrnurna.

14 Kọvu be naarna badnụ ọrnurna nga nhne ojo ke mkpọma nọto a, ma o duwhu a.

15 Nga nhne ojo ke mkpọma wam tūru rime, ọ mụhia mmehie, mmehie masị sopiya, ọ mụhia ẹnwu.

16 Rụmu nda m me whnurnu n'anya, anụ kwé be duwhu anụ.

17 Kpakara nkesi ọma nụ nhne bụru ọma neehi n'oligwe naava, n'aka Nda ke keru iwhne, nye zá naagbanwo lele kpa enine naagbanwo.

18 Chiokike pioru o gweru ikwu-ọnu ke ezi ọka a mụhia aị, ma a bụru mkpuru mbom ke kpakara nhne o keru eke.

Onurnu nụ omume

19 Rụmu nda m me whnurnu n'anya, anụ mahia ka, kpakara badnụ ziri gnarnagnarna n'ọrnuru, kọvu ọ búo n'okwu ọka. O wé masị ẹnhi wara wara.

20 Nye ovu owe ẹnhi nwé rikne mee nhne jaamasị Chiokike.

21 Kwnornu nụ ka, anụ gweme kpakara rune nụ kpakara agwa ojo ke jipiharu mkpọma anụ. Anụ gweru ẹnhi anụ bita nụ mkpururu Chiokike, nahoru ọka wam ke nwernu rikne ọ znhia mkpuru mkpọma anụ.

22 Anụ bụru ele neeme nhne ọka wam kwuru, anụ búko ele nọonu ọnu kpọi, needuwhu ẹnhi anụ.

23 Nye ọbula ke nọonu ikwu-ọnu wam kpọi, kọvu ọ zá neeme eme, nụ lele badnụ ke neelekiri ruwhnu a nụ nyno, whnụ ruwhnu a kpa ọ nụ,

24 o lekiriwọ ẹnhi a, ngangam, ọ whoga, chezume ọkpa badnụ ọ bụ.

25 Kọvu nye ọbula ke neelegidne nụ iwu wam zuru ozu ke neeme badnụ nwernu ẹnhi a, ke naadazigidne nụ rime a, ọ búo nye nọonu ọnu nechezu masị, kọvu nye neeme nhne iwu wam kwuru, Chiokike jọgozi nye wam n'ernu a.

26 Ọ bụru nụ nye ọbula bụ nye neekpenu Chiokike, kọvu o knésige riro a eriri, ọ nọghonu mkpọma a aghigho, okpenu Chiokike a bụ nhne etekne.

27 Okpenu Chiokike ke zị snam, ke be mérula emeru nụ ruwhnu Chiokike bụ Nda aị, bụ ka, o chenwanya rụmu nwé nda nụ nne, nụ ele rinya nzi be nwurnu nụ mmekpehni be, nụ badnụ ọ bita ẹnhi a rịchna hite nụ nhne ojo k'owa ka.

2

Ole badnụ anya nụ ruwhnu

1 Rụmu nda m, lele ele kweru nụ Nyenwe aị Jizọsi Karaịsi, nyenwe igwugwu, anụ lékọ badnụ anya nụ ruwhnu hite nụ ya naakpa ike.

2 Ọ bụru nụ nye kwu ke gbagwụ ari mkpaka golu, woru iwo marnu mma va n'ogbako anụ, nye mboni ke wogwu nkukara iwo va masị,

3 ọ bụru nụ anụ sọbisinu nye wam wogwu iwo marnu mma, kanu a, “Daziri nụ ngadna ka,” kọvu kanu womboni wam, “Gwuzoru hna, mọbu daziri n'eli etekne n'ochi m,”

4 anụ kpála ike, bụru masị ele ikpe ọriri ojo marnu?

5 Anụ bnote nsni, rụmu nda m me whnurnu n'anya, Chiokike hōrulam ele mboni ke ọwa ka, mee be bụru ele kwu n'okwnata ovu be, be bụru masị ele o jeenyeli-eze wam o kweru ele whnurnu a n'anya mkwna.

6 Kọvu anụ lednarnu womboni anya. Ọ búo ele kwu wam neemegbu anụ? Ọ búo be nọopnurnu anụ zne ọro ikpe?

⁷ O búo ele kwu noolulu rẹwhna ọma nye wam nwe anụ?

⁸ Ọ búru anụ bíta iwu Eze aị ke oligwe ke be gbarụ n'ọkwukwo nsọ, "Whnụ nye agbatibi i n'anya lele ẹhni i," anụ mekwarụ nkari.

⁹ Kọvu ọ búru nụ anụ le badnụ anya nụ ruwhnu, anụ mehielem. Iwu jeegesi nụ anụ dnarnu iwu.

¹⁰ Nye ọbula ke jaabita kpakara iwu, kọvu dna otu kpọi, ọ dnanam kpakara iwu wam.

¹¹ Kwnornu nụ nye wam karu, "I mékọ ọyi," kamasiri, "I gbúko badnụ." Ọ búru nụ i méne ọyi, kọvu i gburu badnụ, i bú nye dnarnu iwu.

¹² Anụ kwu, mee masi lele ele Chiokike jeeji iwu ke neeme badnụ nwernu ẹhni a kpe ikpe.

¹³ Kwnornu nụ nye nwée mkpọma obirizi, Chiokike jọdonu a obirizi nga o jeekpe a ikpe. Obirizi nnonwudna n'ikpe ọmuma.

Ọkwnata ovu nwée ẹrnu

bụ nhne etekne

¹⁴ Rụmu nda m, ndaa mbnarna ọbnarnu ọ búru nụ nye ọbula kaa, "M nwernu m ọkwnata ovu," kọvu ẹrnu a gésile a? Ọkwnata ovu kpọi ọ jọoznohia a?

¹⁵ Ọ búru nụ rụmu nne rukna mọbu rụmu nne rinya nwée iwo, mọbu wiri oriri,

¹⁶ mbnarna kini bú nhne ọ bnarnu, ọ búru nụ otu badnụ n'esilawuru anụ kanu a, "Lekwaru anya, o nyee i iwo i joowo, chíí iyi, nụ wiri i jeeji riji rụwho," kọvu o nyéne a nhne ke zị anọ-ẹhni mkpa.

¹⁷ Ọ bú masi kpa ọkwnata ovu ke nwée ẹrnu bú nhne nwurnu ọnwu.

¹⁸ Kọvu otu nyenum jaakaa, "Otu badnụ nwernu ọkwnata ovu, nye berere nwernu ẹrnu ọma." Gesi m ọkwnata ovu i ke nwée ẹrnu, m jeegesi i ẹrnu ọma m hite nụ ọkwnata ovu m.

¹⁹ I kweru nụ otu Chiokike, ọ búru ọma. Ele rẹnwu ojo kwe masiri, be naama rururu tọ ogwu.

²⁰ Ji nye iwhnirniwhno! I pioru ọ mahia nụ ọkwnata ovu ke nwée ẹrnu bú nhne etekne?

²¹ Gweru Ebereham nda aị nụ nhne atụ. Be gwnusiri a nụ nye mee mma hite n'ẹrnu ọma a, nga o jiri Aziki nnwọ a rukna kwa arịohna n'olu ojo arịohna.

²² I whnurnu nụ ọkwnata ovu a nụ ẹrnu a rnukotarụ ẹrnu. Ọkwnata ovu a zuru ozu hite n'ẹrnu ọma a.

²³ Nhne be gbaru n'ọkwukwo nsọ mezuru ke kwuru, "Ebereham kwerru Chiokike, Chiokike gwnusinu a nụ ọ bú nye mee mma." Be sukwu a enyi ke Chiokike.

²⁴ Anụ whnurnu nụ be gwnurnu badnụ nụ nye mee mma hite n'ẹrnu ọma a, ọ búo hite nụ ọkwnata ovu kpọi.

²⁵ Kpam masi, gweru Rehabu nwerinya ewhere nụ nhne atụ. Be gwnurnu a nụ nye mee mma hite n'ẹrnu ọma, nga o kwubnanyarnu ele varu ọ dna ndidna hi n'ẹli Izireli, zihala be n'apna berere.

²⁶ Lele kpa anọ-ẹhni bú nhne nwurnu ọnwu hne enine zila, kpam masi, ọkwnata ovu bú nhne nwurnu ọnwu hne ẹrnu zila.

3

Ledu riro i anya

¹ Rụmu nda m, kpakara anụ búko ele zni nhne. Kwnornu nụ anụ magwu nụ ele zni nhne jeenwe agida ikpe kakwo ele berere.

² Kpakara aị naadnahie n'agida nhne. Nye zá naadnahie nụ ikwu-ọnu bú nye zuru ozu, nwe masiri rikne ọ chikota kpakara ẹhni a.

³ A neekne ọnu iyinya eriri ma be mee nhne a pioru be mee, zne masị hne a pioru be zne.

⁴ A gweru ọgbo mini lele nhne atụ, ọ bụ n'ezị nụ o zị okpotokpo, okne ruwhere noovughari a, kọvu nụ nye risi ọgbo ji amarna matị nọtughari ọgbo penupe ọbula nye risi ọgbo pioru.

⁵ Kpam masị, riro bụ nhne matị zị n'ehni aị, ọ nọtụ ọka k'agida. Le kpa igbogo hna ezi bụ ke bẹkwu matị mernu o nwuzọ bẹkwu.

⁶ Riro bụ bẹkwu. O jihiaru nụ agida nhne ojo n'esilawuru nhne zị aị n'ehni. Riro bụ nhne neemeru badnụ, nọmushi bụdnụ bẹkwu hite nụ bẹkwu ẹli renwu.

⁷ Badnụ nwernu rikne znụ, znụ masịlam kpakara nhne be keru eke, mọbu anọhia ke zị ogwnu zị ichne ichne, nụ ọnunụ ọbula, mọbu aznụ zị nụ mini, nhne ọbula nọpnu ọpnu.

⁸ Kọvu nụ ọ zá nye nwernu rikne znụ riro. Ọ bụ nhne ojo ke zá naadazị bidim. Nhne gbu badnụ zị nụ rime a.

⁹ A ji riro naaznarni Nyenwe aị nū Nda aị Chiokike. A ji masị a nọovu badnụ ọnu bụ nye be kpuru n'oyiyi ke Chiokike.

¹⁰ Ọtu mmamma nụ ọvu ọnu neehi nū otu ọnu wam nọowhuya. Rụmu nda m, o búo ọma ọ zị kpam.

¹¹ Be tuchia mini sọ n'ọnu nū mini lu nlulu n'otu ọmi?

¹² Rụmu nda m, isisi figi o nwernu rikne mịnya mkpuru isisi olivu? Mọbu isisi vaịni o nwernu rikne mịnya mkpuru isisi figi? Mini arụa, o nwernu rikne gbahia mini so n'ọnu?

Akọniche zị ichne ichne

¹³ Ọ bụru nū o nwernu nye zị n'esilawuru anụ ke nwernu akọniche nū oghohia, ọ gesi a hite nū bụdnū a, hite masị nū agwa ọma nū ogwedna ẹhni a ẹli ke hi n'akọniche.

¹⁴ Kọvu ọ bụru nū mkpọma anụ jihiaru nū okwno-awụwa, nū ovu nlulu, nū aka-nchni, anụ kpá nganga. Anụ mée ezi ọka ghọ aghalaghala.

¹⁵ Akọniche ke nū kpam híge n'oligwe va, ọ bụ ke ọwa. Enine Chiokike zila nū rime a. Ọ bụ nhne ke renwu ojo neezni.

¹⁶ Hne okwno-awụwa nū okewa zị, ọgba aghara ghara jaaziri.

¹⁷ Kọvu akọniche ke hi n'oligwe va, beru ọsno ziri rịchna, omekwo, o nwe udno, o nwernu mkpọma ọma, naadnakọta n'otu, o nwernu obirizi nū ẹnu ọma, o nwée aghigho, ọ kwu ezi ọka.

¹⁸ Ele neeme udno naakpa mkpuru udno. Be jọoghohia mkpuru ke imerne ọma.

4

Enyi ke ọwa

¹ Ọ bụ kịni noovuya ọlu ogwnu nū ọdogbuta n'esilawuru anụ? Be hi nū nhne ojo ke nọogwnu mkpọma anụ, ke nọolu ogwnu nū rime anụ.

² Anụ pioru nhne, kọvu anụ nwéhiala a, anụ jiknernu o gbu badnụ. Anụ piosi nhne rikne, anụ nwée rikne nwehia be, anụ jiknernu nọdogbuta, nọolu ogwnu. Anụ nwée nhne anụ pioga kwnornu nū anụ rịola n'aka Chiokike.

³ Anụ nọorio, kọvu anụ zá nanahia kwnornu n'ọriri ojo ke mkpọma anụ, ma anụ gweru a mee kpa o jiri masị anụ.

⁴ Anụ ele kwé be tükwasị anụ ovu! Anụ máa nū nye ọbula ke whnurnu nhne ọwa n'anya k'agida nye wam bụ nye irno ke Chiokike? Nye ọbula ke pioru ọ bụ enyi ke ọwa neeme ẹhni a nye irno ke Chiokike.

⁵ Anụ chéko nụ nhne be gbarụ n'okwukwo nsọ bu etekne, “Chiokike neelegidne Enine Nsọ a o yisiri nụ rime anụ anya k'agida.”

⁶ Kọvu Chiokike neenye aị oru k'agida. Lele kpa be gbarụ a n'okwukwo nsọ, “Chiokike noogwuzogidne ele oknomokno, kọvu o neenye rụmu mboni oru.”

⁷ Anụ bīta ẹhni anụ nụ mkpururu Chiokike. Anụ nyigidne Ekwensu, ọ jaagbawhu hne anụ zī.

⁸ Anụ kpayabetụ Chiokike ndundu, ọ jaakpayabetụ anụ ndundu. Anụ kwnosnama aka anụ, anụ ele aruru-ẹli. Anụ snusnama mkpoma anụ, anụ ele mkpoma lawuru.

⁹ O gbu anụ igbugbu, anụ ru ọwa, anụ gba mkpe! Rụmu anụ ghọ ẹkwna. Snarịma anụ ghọ ọ gbarụ ruwhnu.

¹⁰ Anụ gwedna ẹhni anụ nụ ruwhnu Chiokike, o jeegwelizọ anụ olu.

Anụ kpéko ibne anụ ikpe

¹¹ Rụmu nda m, anụ kája ibne anụ. Nye ọbula ke naakaja nnwọ nda a, mọbu neekpe a ikpe, ọ naakaja iwu, neekpe masi iwu ikpe. O buri nụ i bu nye neekpe iwu ikpe, ngam, i buo nye naabita iwu, kovu nye ikpe iwu.

¹² Chiokike kpọi bu nye neenye iwu nụ nye ikpe. Ya nụ nsununu a nwernu rikne znọhia aị mọbu gbumekwo aị. I bu nyele ke neekpe badnu ibne i ikpe?

Anụ lúu ọnu nhne ekile jọbu

¹³ Anụ bnote nsni, anụ ele naakaa, “Tna mọbu ekile, a jeezne mba ka mọbu mba kiyari daziri pii otu awha, gba mgbama ahia, kpa agida iwai.”

¹⁴ Anụ máa nhne jeeme ekile. Ndaa nhne budnu anụ bu? Budnu anụ nụ lele iknorno-mini ke whuyaru, dazi ige mati, omekwo, o whume n'anya.

¹⁵ Ka bu nhne anụ zneru okwu, “O buri ọ masi Nyenwe aị, a jaazi budnu mee ka mọbu mee kiyari.”

¹⁶ Kọvu kịtna, anụ noolu ọnu, neeme oknomokno. Kpakara o luu ọnu ka buo ọma.

¹⁷ Nye mahiaru nhne buri ọma o mee a, o méne a, ọ bunnu a mmehie.

5

Be dọru ele eze aka nụ nsni

¹ Anụ bnote nsni, anụ ele eze. Anụ kwana ẹkwna, si okokoba kwnornu nụ nhne igbugbu ke jaadnakwasị anụ.

² Ekwnu anụ roru oro, akika takwolem iwo anụ.

³ Kpakara golu nụ siliva anụ tulam ajari, ajari a jọbu nhne akebene megidne anụ. O jeerne anọ-ẹhni anụ lele ẹkwnu, anụ ele kpabitaru ẹkwnu n'ọbochi ipne-aznụ ka.

⁴ Anụ bno nsni, anụ kwula ele anụ gnornu ẹnu n'ekwu anụ ọgwo ẹnu be. Ọgwo ẹnu be naakwina, nhne ọ nọokpokwu anụ dulam nsni Nyenwe aị Chiokike ke Meli Nhne Dum.

⁵ Anụ wuru budnu oriri nụ ọnwunwo n'owa, anụ mee lele kpa ọ masiri anụ. Kịtna, ẹhni anụ ke gbarụ ọto jiknernunem, neese ikpe naava ava.

⁶ Ele aka be zi rịchna bu ele anụ marnu ikpe, anụ gbu be. Be méne anụ risi rikne.

Ọsnuta mkpoma nụ mmekpehni

⁷ Rụmu nda m, anụ knata mkpọma tem Nyenwe aị va. Nye ernalu ẹkwu ji naaknata mkpọma nụ mkpuru zi okne onu ahia ke ẹkwu a mi, tem mini ozuzo mbom nū ke ipne-aznū zo.

⁸ Anụwa masi, anụ knata mkpọma, dazisi rikne, kwnornu nū ovuva ke Nyenwe aị zi ndundu.

⁹ Rụmu nda m, anụ nwéma mkpọma ojo n'ehni ibne anụ, ma Chiokike gharu o kpe anụ ikpe. Nye ikpe gwuzogwu n'onu-mgbo jiknenu o va.

¹⁰ Rụmu nda m, anụ chenwanya nhne ele owhnurninya kwuru nū rewhna Nyenwe aị. Anụ gweru be lele nhne atū nū oknata mkpọma nū rime mmekpehni.

¹¹ Anụ maam nū a nookwu ele wam ele owa oma kwnornu nū be knataru mkpọma. Anụ nurnu oknata mkpọma Jobu, anụ maam nū Nyenwe aị donnu a obirizi n'ipne-aznū, kwnornu nū Nyenwe aị bu nye obirizi nū nye imerne oma.

¹² Rụmu nda m, anụ ji oligwe mōbu owa mōbu nhne berere dū risi. Oka anū buru owe, owe, mōbu oza, oza, o zi Chiokike kpe anū ikpe.

Okpukpe be kperu

n'okwnata ovu

¹³ O zi nye obula n'esilawuru anū ke zi nū mmekpehni? O kpe okpukpe. O zi nye ovu nōoso n'onu? O gwnū eri oznarni.

¹⁴ O zi nye obula ke naaria ehni igbugbu? O sukwu ele okno badnū ogbako Chiokike, be kpenu a okpukpe, te a mōno olivu nū rewhna Nyenwe aị.

¹⁵ Okpukpe be jiri okwnata mkpọma kpe joogwo nye nriria wam. Nyenwe aị jeeme ehni si a rikne. O buru nū o mehieru, Chiokike jaagbarūnu a.

¹⁶ Kam kpararū, anū kwuhianu ibne anū mmehie anū, anū kpenu ibne anū okpukpe ma be gwō anū ehni igbugbu anū. Okpukpe nye mee oma nōornusi ernalu rikne.

¹⁷ Elaija bu badnū etekne lele aiwa. O kpesiri okpukpe rikne ma mini gharu o zo, mini zole dū awha eto nū enwa isunu.

¹⁸ O kpe kwno okpukpe, oligwe gweya mini ozuzo, eli minya mkpuru.

¹⁹ Rụmu nda m, o buru nū otu badnū n'esilawuru anū kpahalarū n'apna ezi oka, nye berere kwuhnahie a,

²⁰ anū mahia nū nye mernu nye ojo tuhnasna n'apna ojo a, znohiaru mkpọma a n'enwu. Nye wam kpusnirni agida mmehie.

**Okwukwo izi
ke Mbom
Pita
gbaru
Nhne gbasiri okwukwo izi ka**

Okwukwo izi ke Mbom Pita gbaru bu ke Pita gbaznennu ele Karaṣi naata awhnuwhnu kwnornu be neekpenu Nyenwe aṣ. Pita kannu be nu agida ele ke Karaṣi nṣowhnusni anya n'aka ele Rom ele kwége nu Jizṣi Karaṣi. Be jaazi koriri naata awhnuwhnu ke kakwo. Kṣu, Pita naakanu be nu be nwe ndidi kwnornu nu kpakara ele sno Nyenwe aṣ jaata awhnuwhnu kwnornu okwnata ovu be. O kaa nu ka jeeme okwnata ovu be si rikne, ke jeenye Nyenwe aṣ igwugwu n'obochi Jizṣi jaava.

Kṣu kwnornu nhne Chiokike mernu hite n'ome Karaṣi hi n'enwu lizo, kpakara ele Karaṣi nwernu olile anya. Lele kpa Karaṣi beru osno ta awhnuwhnu, omekwo, be nyee a igwugwu, o bu masi kpa nye Karaṣi obula jeenwe igwugwu nga Jizṣi jaava.

Nhne zi n'okwukwo izi ka

Obekwu ikwu nu okpukpe (1:1,2)

Risi olile anya aṣ (1:3-12)

Owu budnu zi nsṣ lele ele ke Chiokike (1:13---2:17)

Nhne atṣ awhnuwhnu Karaṣi (2:18-25)

Awhnuwhnu nyé Karaṣi (3:1---4:19)

Ezni ele risi ogbako Chiokike (5:1-11)

Obekwu ikwu ipne-aznu (5:12-14)

¹ Mawa, Pita, nye izi Jizṣi Karaṣi, naagbaznenu ele Chiokike hṣiaru ke gbasaru kpakara eli Pontosi, Galasia, Kapadosia, Esia nu Bitinia okwukwo izi ka.

² Chiokike Nda mahiaru anṣ, gweru aka a hṣu anṣ, bita anṣ nsṣ hite n'Enine Nsṣ, ma anṣ noobnonu Jizṣi Karaṣi nsni, ma onarna a snṣnama anṣ.

Oru nu udno banṣ anṣ aba.

Olile anya ke zi budnu

³ Onarni zinu Chiokike nu Nda Nyenwe aṣ Jizṣi Karaṣi, nye hiri nu obirizi a mṣhia aṣ nu budnu ikne. O mernu Jizṣi Karaṣi hi n'enwu lizo, ke nyernu aṣ okwnata ovu zi budnu.

⁴ A bna n'okehia mkpe ke za noolulu olulu, nu ke be mṣrula emeru, nu ke za nṣobo obo, ke Chiokike bitannu anṣ n'oligwe.

⁵ Chiokike jeeji iknerna a bita anṣ tem anṣ nahia onohia, kwnornu nu anṣ tukwasiri a ovu. O jeeme ka whya iwhe n'ige ipne-aznu.

⁶ Anṣ nonwodna onwodna kitna kwnornu ka, o bu n'ezi nu anṣ naata awhnuwhnu zi odo n'odo n'ige matṣ ka.

⁷ Kpakara onurna ka varu ma be tule okwnata ovu anṣ ma anṣ zi snam lele kpa be neeji bekwnu naagba golu ke noolulu olulu. O bu kpa be neeji bekwnu nootule okwnata ovu anṣ, ma anṣ nwehia onarni nu igwugwu n'obochi be jookpume Jizṣi Karaṣi.

⁸ Nye anṣ whnru n'anya, o bu n'ezi nu anṣ jile anya anṣ lawuru whnu a, anṣ kweru nu ya, o bu n'ezi nu anṣ jile anya anṣ lawuru whnu a kitna. Kam kpararu anṣ nwernu snarnima k'agida ke onu jookowali.

⁹ Anụ nahịaru nhne anụ kwnatarụ ovu ke bụ ọznohia ke mkpuru ovu anụ.

¹⁰ Ka bụ ọznohia wam ele ọwhnurninya piosiri rikne, nyosna nhne gbasiri a, be whnurnu ọwhnurninya gbasiri nkesi wam Chiokike jeenye anụ.

¹¹ Be pioru ọ mahja ige wam nụ kpa ọ jọburu bụ nhne Enine Karaịsi ke zị nù rime be kwuru, nhne gbasiri awhnụwhnu Karaịsi jaata nù igwugwu ke jooosno a.

¹² Chiokike kpumennu ele ọwhnurninya ka nù ọnu be bụo ke be, kọvu ke jaabnanụ anụ iru, bụ ke be kwuru hite n'ọnu ele znirni anụ izi ọma, hite nù rikne ke Enine Nso ke hiri n'oligwe va. Ka bụ nhne ke ele enine izi pioru o lebna anya nù rime a.

Anụ ziri nsọ

¹³ Kam kpayarụ, anụ suru ajnị n'ovu anụ, anya dū anụ ẹli, anụ neele oru ke Jizọsi Karaịsi jeenye anụ anya nga be kpumernu a.

¹⁴ Lele rụmu ke noobnonu Chiokike nsnị, anụ lánha nù rime nhne ojo ke noogwnu anụ nù mbom nga anụ zị lele ele máa nhne.

¹⁵ Tnụnuma, lele kpa nye wam sukwuru anụ zị nsọ, anụ ziri nsọ nù kpakara nhne anụ neeme.

¹⁶ Kwnornu nù be gbarụ a n'okwukwo nsọ, kaa, “Anụ ziri nsọ, lele kpa me zị nsọ.”

¹⁷ Ọ bụru nù anụ noosukwu Nda ke zá neele badnụ anya n'ikpe, bụ nye neekpe badnụ ọbula lele kpa ọnu be jiri zị, anụ ziri bụdnu lele ele izne nọtu ogwnu n'owa ka.

¹⁸ Anụ magwụ nù ọ bụo golu mọbu siliva ke noolulu olulu bụ nhne be jiri gbahja anụ hite n'aka nhne ojo ke anụ nahịaru n'aka ele nda anụ ọknani,

¹⁹ kọvu ọ bụ ọvnarna Karaịsi ke zị okne ọnu ahja, lele nnwọ atnurnu ke nwéé oru mọbu ntụpo.

²⁰ Chiokike hōhiaru a tụtụ sụ ọ tūru ntụ-ẹli ọwa. Kọvu o mernu a ọ whuya iwihne n'ọbochi ipne-aznụ ka kwnornu anụ.

²¹ Anụ kweru nù Chiokike hite nù ya, nye o mernu ma o hi n'ẹnwu lizọ, nyee a igwugwu, ma olile anya anụ nù ọkwnata ovu ziri nù Chiokike.

²² Hne anụ bītaru ẹhni anụ snam hite n'obno nsnị n'ezi ọka, nọowhnu ele kweru ekwe n'anya, anụ gweru ọwhnun'anya ke hi n'ovu anụ whuya whnụ ibne anụ n'anya.

²³ Be murnu anụ berere, ọ bụo hite nù mkpuru ke nooro oro, kọvu hite nù mkpuru ke zá nooro oro, ke bụ ikwu-ọnu Chiokike ke zị ọkwnukokwnu.

²⁴ Ọkwukwo nsọ kwuru,

“Kpakara badnụ nù lele achara,
igwugwu badnụ nù lele okoko achara,
achara chanwụ, okoko a dnahala,

²⁵ kọvu ikwu-ọnu ke Nyenwe aị jaazị ọkwnukokwnu.”

Ka bụ ikwu-ọnu ke izi ọma wam be znirni anụ.

2

¹ Kam kpayarụ, anụ gweme kpakara nhne ojo n'ẹhni anụ, irno, nù kpakara aghigho, nù ruwhnu lawuru, nù okwno-awuwa nù ọkaja.

² Lele rụmu be murnu ikne, akpři ke mini-rẹma ke zị snam ke enine, ke bụ ikwu-ọnu Chiokike nọokpo anụ bẹkwnu, ma anụ nwọ a, sopiya nù badnụ dū ọznohia.

³ Kịtna, anụ raturu a riro whnụ nù Nyenwe aị bụru ọma.

Akaworugwu zị bụdnu

4 Anụ vakwnusi Nyenwe aị lele rugwu ke zị bụdnu ke ele badnụ juru, kọvu ke Chiokike hōhiaru, zị okne ọnu ahia n'anya a.

5 Anụwa masị, lele akaworugwu ke zị bụdnu, be jiri anụ wu Oro Nso ke enine, ma anụ bụru ele ọkwa ariohna zị nso, ele jaakwa ariohna enine ke Chiokike jaanarnụ hite nụ Jizọsi Karaịsi.

6 Be gbarụ a n'okwukwo nso, kaa,
 “Le, m bītaru m nū rime Zayōni,
 akaworugwu nsukala ọro me hōhiaru ke zị okne ọnu ahia,
 nye ọbula ke tūkwasiri a ovu,
 iwhnerne jōotu a.”

7 Nū hne anụ ele kweru ekwe zị, akaworugwu ka zị okne ọnu, kọvu hne ele kwé ekwe zị, be gbarụ a n'okwukwo nso, kaa,
 “Akaworugwu ke ele noowu ọro juru,
 kiyam ghọlam risi nsukala ọro.”

8 Be gba kwno,
 “Akaworugwu ke jeeme badnụ kpōbi ọchi,
 nū rugwu ke jeeme be dna.”

Be dnarnū kwnornu nū be kwége ikwu-ọnu Chiokike, lele kpa echiche Chiokike zīnu be.

9 Kọvu anụ bụ ele Chiokike jiri aka a hōhia, ele ariohna ke eze, mbam ke zị nso, ele ke Chiokike, ma anụ gesi ọznarni nye wam sukwuru anụ hite nū rime ọchichiri bna nū rime iwhne a zị igwugwu.

10 Nū mbom anụ bụo ele ke Chiokike, kọvu kītna, anụ bụ ele ke a, ele nwée obirizi nū mbom, kọvu kītna, Chiokike dōnnu anụ obirizi.

11 Ele me whnurnu n'anya, m naariasno anụ, lele ele izne nū ele neewhe ewhe n'ọwa ka, anụ nyée nhne ojo ke nōogwnu anụ, ke nōolu masị ọgwnu megidne mkpuru ovu anụ oghere.

12 Anụ wu bụdnu ke buri ọma n'esilawuru ele máa Chiokike, ọ bụ n'ezī nū be noobno anụ nhne ojo, kọvu be whnū ọrnū ọma anụ, ma be znarni Chiokike n'ọbochi o jeelekasi aị.

Bīta ẹhni anụ nū mkpururu ele ọchichi

13 Kwnornu nū Nyenwe aị, anụ bīta ẹhni anụ nū mkpururu ọchichi ke badnū, mọbu eze, lele nye risi,

14 mọbu ele ọchi ẹli ele o ziyaru ọ ta ele ojo awhnūwhnu, nū ọ znarni nye neeme nhne ọma.

15 Ka bụ nhne Chiokike noopio, ma anụ hite n'ọrnū ọma anụ kpusni ọnu ele iwhnirniwhno.

16 Anụ wu bụdnu lele ele nwernu ẹhni be. Anụ jí ọnodi wam kpusni nhne ojo, kọvu anụ ziri bụdnu lele ele izi Chiokike.

17 Anụ sọ kpakara badnū anya, anụ whnū rumu Nda n'anya, anụ tū ogwnu Chiokike, anụ sọbisinu eze.

Awhnūwhnu Karaịsi

18 Ele ọhi, anụ gweru ọso anya bīta ẹhni anụ nū mkpururu ele nwe anụ. Anụ ménu nye ovu ọma nū nye udno kpōi, ma nye aka rikne masị.

19 Kwnornu nū Chiokike jōogozī anụ ọ buri nū anụ tarū awhnūwhnu hne ọ zá nhne ojo anụ mernu, kọvu kwnornu nū anụ tūru ogwnu Chiokike.

20 Ndaa igwugwu ke anụ jeenwe, ọ buri nū anụ tarū awhnūwhnu kwnornu nū nhne ojo anụ mernu? Kọvu anụ gwuzogidne n'awhnūwhnu hne anụ mernu nhne ọma, Chiokike jōogozī anụ.

²¹ O bụ nhne be sukwuru anụ, Karajisi taru awghnuwhnu nụ risi anụ, ghasanụ anụ nhne atụ, ma anụ snornu ęnu ọchi a.

²² “O zá mmehie o mernu,
o zá aghigho be piohjaru n'onu a.”

²³ Nga be mernu a nhne iwghnerne, o méghwnarnuge, nga o taru awghnuwhnu, o kpála rikne, kovu o gweru ęhni a yisi n'aka nye wam neekpe ikpe bụru ọma.

²⁴ Ya n'iwghuru a jiri ęhni a vuru kpakara mmehie aị n'olu ọgba, ma a bụru ele nwurnu ọnwu ghasa mmehie, ziri bụdnu ele mee mma. O jiri ęnya a gwọ kpakara ęhni igbugbu aị.

²⁵ Anụ nụ lele atnurnu ke whuru apna, kovu ke hiehnarnu hne Nye Ọznuznu nụ Nye Risi mkpuru ovu anụ zị.

3

Ele nzi nụ nnwerne

¹ Kpam masị, anụ ele bụ nnwerne, anụ bita ęhni anụ nụ mkpururu nzi anụ. O bụrubedi nụ be bụ ele kwéle ikwu-ọnu Chiokike, be jeenwe rikne hiri nụ agwa ọma anụ kweru hne anụ kwéle ọka,

² kpa be jowhnu anụ noowu bụdnu bụru ọma ke zị masị snam n'oso n'anya.

³ Anụ kwé mma anụ bụru nhne ke anya nowhnu kpọi, o bụo kpa anụ kparu risi anụ, mọbu golu anụ tū n'ęhni, mọbu iwo marnu mma anụ wogwu.

⁴ Kovu mma anụ bụru agwa ọma wam tugwaru otugwa ke zị nụ rime ovu, ke bụ nhne ęyi ke zá nooro oro, ke bụ ọzi wghnerne nụ enine ke udno, ke zị okne ọnu ahia n'anya Chiokike.

⁵ O bụ kpa ele rinya gbaka zị nsọ ele tųkwasiri Chiokike ovu mernu ęhni be mma, be bítaru ęhni be nụ mkpururu nzi be.

⁶ Sera nụ kpam, o bnonnu Ebereham nsnị, noosukwu a, “Nyenwe m.” Anụ bụ rumu a rinya, o bụru nụ anụ jeeme nhne ọma gharu o tū ogwnu nhne ọbula.

⁷ Kpam masị, anụ ele bụ nzi, anụ jiri ọso anya nụ akọ, anụ nụ nnwerne anụ wuru, hne anụ magwu nụ be bụ ele nwéle rikne. Anụ nụ be jeekehia nkesi bụdnu kwó okwo Chiokike neekesi anụ n'etekne. Anụ mee kpam, o zị nhne ọbula bnosni okpukpe anụ.

Awhnuwhnu kwnornu

ome nhne bụru ọma

⁸ N'ipne-aznụ, kpakara anụ nwe otu ovu, anụ donu ibne anụ obirizi, anụ whnu ibne anụ n'anya lele rumu nda, anụ nwe obirizi n'ęhni ibne anụ, anụ bụru ele be gwednarnu ęli.

⁹ Anụ jí nhne ojo kwųhnata nhne ojo, anụ gogwna ngugo, kovu anụ nogozi ogozi, kpa Chiokike sukwuru anụ ma anụ kehia ngozi masị.

¹⁰ Kwnornu nụ ọkwukwo nsọ kwuru,

“Nye ọbula ke whurnu bụdnu n'anya,
ke noopio ọbochi ọma,
o bita ọnu a ma o gharu o kwu ọka ojo,
bita masị mgbele-ọnu a n'aghalaghala.

¹¹ O gharu nhne ojo, mee nhne bụru ọma,
pio udno, gbasno a.

¹² Kwnornu nụ anya lawuru Nyenwe aị zị n'ęhni ele mee mma,
nsnị a nọonu okpukpe be,
kovu ruwhnu Nyenwe aị neemegidne ele neeme nhne ojo.”

¹³ Nyele jeemejọ anụ, o bụru nụ anụ gwuzosi rikne nụ nhne ọma?

¹⁴ Ọ bụru nụ anụ ta awnụwhnu kwnornu nụ anụ mernu nhne ọma, ovu sọ anụ n'ọnu, ogwnu tị anụ kwnornu be, ovu lákwadia anụ mini.

¹⁵ Anụ sọbisinu Karaịsi lele Nyenwe aị nụ rime ovu anụ. Anụ jiknernu ọ sa ajiji nye ọbula jaasikwa anụ nhne gbasiri olile anya wam zị n'ovu anụ hite n'oso anya nụ ovu zị wọhnerne.

¹⁶ Anụ bita ovu anụ snam, ma ele nookwu nhne ojo kwnornu agwa ọma anụ kweru nụ Karaịsi, iwchnerne jootu be nụ nhne ojo be nookwu.

¹⁷ Ọ ka mma, ọ bụru nụ ọ bụ echiche Chiokike nụ anụ taru awnụwhnu kwnornu nụ anụ mernu nhne ọma karu kwnornu nụ anụ mernu nhne ojo.

¹⁸ Karaịsi nwurnu otu mgbá kwnornu mmehie aị, nye ikpe mána nwurnu kwnornu ele ikpe marnu. Karaịsi mernu ka ma o duru anụ dụ hne Chiokike zị. Ọ nwurnu ẹnwu n'anọ-ẹhni, kọvu ọ zị bụdnu n'Enine,

¹⁹ nụ rime enine zị bụdnu,* o znernu zni ele enine ke zị n'oro ikelu izi ọma.

²⁰ Ka bụ ele zá noobno nsni, kpa Chiokike ji nkasi ovu neese nga Noa nọtutu ọgbo ke be jiri znọhia badnu ele nụ ele, badnu ẹsato kpọi hite nụ mini.

²¹ Ka neegesi nụ ọwu mini znọhiaru anụ, ke bụ nọorio Chiokike ovu zị snam hite n'olizọ n'ẹnwu ke Jizọsi Karaịsi. Ọ bụo ọsnuma rune ke ẹhni.

²² Karaịsi bụ nye laru oligwe daziri ẹli n'akarikwngwa Chiokike, hne kpakara ele enine izi nụ ọchi risi nụ rikne zị nụ mkpururu a.

4

Owunu Chiokike bụdnu

¹ Kpam masi, Karaịsi taru awnụwhnu n'anọ-ẹhni a, anụ jiknernu o mee kpam masi, kwnornu nye taru awnụwhnu n'anọ-ẹhni a zịma neeme mmehie.

² Kam kparyaru, ọ zá noowu bụdnu a n'ọwa ka lele kpa agwnurnu nhne ojo ke badnu, kọvu lele echiche Chiokike.

³ Kwnornu nụ ige anụ tuwhuru n'ige wheru ewhe noowu bụdnu lele ele máa Chiokike zulem. Ige wam anụ noowu bụdnu ke zila richna, agwnurnu nhne ojo, ọnwọ manya, okne otne eri, nụ ọkwa ẹnwu.

⁴ Kịtina, o jiri be anya nụ anụ zá noosno be neeme nhne ojo berere, ke kparyaru be nọovu anụ ọnu.

⁵ Kọvu be jaasa ajiji gbasiri ẹhni be nụ ruwhnu nye wam jeekpe ele zị bụdnu nụ ele nwurnu ọnwu ikpe.

⁶ Kam kparyaru, be jiri zni ele nwurnu ọnwu izi ọma nga be zị, ma be kpe ikpe be hite nụ nhne be mernu nga be zị bụdnu lele badnu, ma be ziri bụdnu n'enine lele Chiokike.

⁷ Mbimambi kpakara nhne zị ndundu. Anụ nwe anya udno, anya dụ anụ ẹli, anụ neekpe okpukpe.

⁸ Ke kakwo, anụ nwe ọwhnun'anya zị omimi n'esilawuru anụ, kwnornu nụ ọwhnun'anya nookpusni agida mmehie.

⁹ Anụ jí ntamu nabnanya ibne anụ.

¹⁰ Nye ọbula gweru nkesi ọ nahjaru n'aka Chiokike znenu ibne a izi, gweru okwesi ọkwnata ovu neekesi oru Chiokike zị ọdo n'ọdo.

¹¹ Nye neezni izi ọma, ọ zni a lele nụ ọ bụ ikwu-ọnu ke hi n'ọnu Chiokike whuya. Nye neezne izi, o mee a lele Chiokike nyernu a iknerna, ma be znarni Chiokike nụ rime kpakara nhne hite nụ Jizọsi Karaịsi, nye nwe igwugwu nụ rikne tim ọm. Amim.

* 3:19 hite nụ Enine Nso

*Awhnuwhnu lele
nye Karaïsi*

¹² Ele me whnurnu n'anya, o gbagwoji anu anya kwnornu ornurna zi igbugbu ke naarna anu lele nu o bu nhne ikne neeme anu.

¹³ Kovu anu nwudna, kwnornu nu anu sno Karaïsi takò awhnuwhnu, ma anu nwe ovu oso n'onu zi agida nga be jookpume igwugwu a.

¹⁴ O buru nu be mernu anu nhne iwhnerne kwnornu nu rewhna Karaïsi, ovu so anu n'omu, ka neegesi nu Enine igwugwu, ke bu Enine Chiokike wu nu rime anu.

¹⁵ O za nye ta awhnuwhnu n'esilawuru anu lele nye gburu badnu, mibu nye buznu, mibu nye mernu nhne ojo berere, mibu nye neelebna anya nu nhne gbasila a.

¹⁶ Kovu, o buru nu nye obula ta awhnuwhnu lele nye Karaïsi, iwhnerne tuko nye wam, kovu o nyee Chiokike oznarni kwnornu nu be nookwu a nye Karaïsi.

¹⁷ Ige valèm nga be jaapanizo ikpe n'ezi-nu-oro Chiokike. O buru be panizo ikpe nu hne a zi, ndaa kpa o jaazinu ele kwéle izi oma Chiokike?

¹⁸ O buru nu o jaara ehni o znohia ele mee mma, ndaa hne ele máa Chiokike nu ele mmehie jaazi?

¹⁹ Kam kpayaran, nye obula ke naata awhnuwhnu lele kpa echiche Chiokike jiri zi, gweru ovu oma yisi ehni a kpam kpam n'aka Nye Okike nye kwesiri okwnata ovu. Nye wam zne nu ruwhnu neeme nhne oma.

5

*Ele okno badnu nu
ele ikoro*

¹ M naariasno ele okno badnu zi n'esilawuru anu hne me bu masi nye okno badnu, m whnurnu m awhnuwhnu Karaïsi taru, m jeekehia masi igwugwu a nga be jookpume a.

² Anu znu aturnu Chiokike ke zi nu mkpururu anu, neelegidne be anya nu kpakara ovu anu kpa Chiokike pioru a, o buo nu mkpa kpagwu anu, kovu kwnornu nu o bu nhne kwesiri omume. Anu rnu ernu anu, o buo kwnornu iru anu jeenwehia, kovu nu o nhne zi n'ovu anu n'omume.

³ Anu mee be lele nu be bu nhne ke aka anu, kovu anu buru nhne atu be joonso.

⁴ Nga Nye Risi Ozuznu Aturnu varu, anu jaanahia okpu-eze zi igwugwu ke jaazi noonwu va-a-a tem.

⁵ Kpam masi, rumu ikoro, anu bita ehni anu nu mkpururu ele okno badnu. Kpakara anu woru ozi wohnernerne n'ovu lele iwo, neeznenu ibne anu izi. Kwnornu nu okwukwo nsò kwuru,

“Chiokike noogwuzogidne ele oknomokno,

kovu o neenye ele zi wohnernerne n'ovu oru.”

⁶ Kam kpayaran, anu gwedna ehni anu nu mkpururu aka dikne ke Chiokike, o joovulizo anu olu n'ige ke a.

⁷ Anu vukwnusi a kpakara mkpa anu, kwnornu nu nhne gbasiri anu neemetu a n'ovu.

⁸ Anya du anu eli, anu neese nse, nye irno anu bu Ekwensu, naagbaghari lele odum noogbo ogbugbo noopio nye o jeeri.

⁹ Anu ziri kwem nu okwnata ovu anu, anu gwuzogidne a, kwnornu nu rumu Nda anu nu kpakara owa naagawhe otu awhnuwhnu wam.

¹⁰ Nga anụ taru awnụwhnu ige matị, Chiokike ke oru nye sukwuru anụ bna n'igwugwu a kwó okwo nụ Karaịsi, joogwuzote anụ, nyee anụ rikne, gba anụ inwe.

¹¹ Kpakara rikne ọchichi bụ ke a ọkwnukokwnu. Amịm.

Obekwu ipne-aznụ

¹² Saịlasi nwene aị rukna ke kwesiri ọkwnata ovu yinnu m aka gba ọkwukwo izi matị ka, m naarịasno anụ naagba akebne nụ ka bụ ezi oru Chiokike n'olu hne anụ gwuzo.

¹³ Ọgbako Chiokike ke zị nụ Babiloni,* ke be hōhiakoru anụ nụ ya neebekwu anụ, ma Makị nnwọ m.

¹⁴ Anụ gweru ọwhnun'anya Karaịsi neebekwu ibne anụ.

Udno dazinu kpakara anụ ele zị nụ rime Karaịsi.

* 5:13 Ka bụ Rom

**Ọkwukwo izi
ke Ẹbo
Pita
gbarụ**

Nhne gbasiri ọkwukwo izi ka

Nye gbarụ ọkwukwo ka mernu ele noobno a nsni mahia nū nye Karaisi ọbula kwesiri o wu bũdnu ke nọtutu ogwnu Chiokike (1:3). Be kwesiri o jikwasi ezi ọka be nyernu be rikne (1:12).

Ọ dọru be aka nū nsni gbasiri ele ọwhnurninya aghalaghala, nū ele ojo ka bnanam ọgbako Chiokike nooduwu ele kweru n'ezi ọka. N'anya Chiokike, otu ọbochi nū lele otu pokwu awaha, otu pokwu awaha nū lele otu ọbochi. Chiokike zá noogbu ọkwu nū ọbita mkwna a lele kpa ele badnū neeche. Kọvu Chiokike nwernu ndidi k'agida kwnornu nū ọ māsila a nū otu nye mmehie ọbula joowhu etekne.

Nhne zi n'ọkwukwo izi ka

Obekwu ikwu nū okpukpe (1:1,2)

Kpa ele sno Nyenwe aị kwesiri o wu bũdnu be (1:3-15)

Igwugwu Karaisi (1:16-21)

Ele ọwhnurninya aghalaghala (2:1-22)

Nyenwe aị jaavariri berere (3:1-18)

¹ Mawa, Saịmoni Pita, nye izi nū nye dazisni anya Jizosi Karaisi, naagbaz-nenu anū ọkwukwo izi ka, anū ele hiteru n'ome mma Chiokike nū Nye Ọznohia aị Jizosi Karaisi kehia ọkwuata ovu zi okne ọnu ahia lele ke aị.

² Oru nū udno banū anū aba kpa anū neezne nū ruwgnu naamahia Chiokike nū Jizosi Nyenwe aị.

Osukwu ikwu Chiokike

³ Chiokike jiri iknernema a nyee aị kpakara nhne a pioru a jeeji wuru bũdnu nọtutu ogwnu Chiokike, kpa a zi neezne nū ruwgnu naamahia nye wam sukwuru aị bna n'igwugwu a nū ọma mma a.

⁴ Hite n'igwugwu a nū ọma mma a, o nyernu aị agida mkwna zi okne ọnu ahia, ma hite nū nhne ele ka, anū kehia igwe n'oyiye ke Chiokike, ma anū gbanahoru nhne ojo ke ọwa ka noovuya a.

⁵ Kwnornu nū otu nhne ka, anū gbalị nọtukwasi n'olu ọkwuata mkpoma anū, ọma mma, n'olu ọma mma, anū tũkwasi ọmahia nhne,

⁶ n'olu ọmahia nhne, anū tũkwasi badnū knernū ẹhni a, n'olu badnū knernū ẹhni a, anū tũkwasi ọsnuta ovu, n'olu ọsnuta ovu, anū tũkwasi ọtu ogwnu Chiokike.

⁷ N'olu ọtu ogwnu Chiokike, anū tũkwasi ọwhnun'anya rụmu nda, n'olu ọwhnun'anya rụmu nda, anū tũkwasi ọwhnun'anya.

⁸ Kwnornu nū ọ bũru nū anū nwernu kpakara nhne ka k'agida, be jeeme anū bũru ele nọornu ẹrnu ọma, naamị mkpuru dū ọmahia Nyenwe aị Jizosi Karaisi.

⁹ Kọvu nye nwée nhne ka kpuru isni, ọ whnū nhne zi ikere, o chezume nū be snusnamaru a nū mmehie ọknani a.

¹⁰ Kam kpayaru, rụmu nda m, anū ziri gnarnagnarna n'ome ikwu Chiokike sukwuru anū, hohia anū bũru nhne gwuzosiri rikne. Ọ bũru anū mee kpam, anū jáadna rịa rịa.

¹¹ Kpam, be jeenye anụ rikne anụ jeeji bna nụ rime ẹli-eze ke zị ọkwukokwunu ke Nyenwe aị nụ Nye Ọznohia aị Jizọsi Karaịsi.

¹² Kam kpayarụ, me chenwanyannụ anụ kpakara nhne ka ige ọbula, ọ bụ n'ezi nụ anụ magwụ be, anụ gwuzosi rikne n'ezi ọka wam anụ nahịaru.

¹³ M che m nụ o kwesiri ekwesi o chenwanyanụ anụ be kpa me zị kọriri bụdnu.

¹⁴ M magwụ m nụ ige matị m joowopu anọ-ẹhni ka, lele kpa Nyenwe aị Jizọsi Karaịsi kannụ m.

¹⁵ M jaagbalị rikne m, whnụ nụ nga me nwurnu nụ anụ jaazị neechenwanya be.

Igwugwu Karaịsi

¹⁶ Ọ bụo ọtutnu ruwhere be jiri akoniche tnu, nga a mernu anụ mahia ọvuva Nyenwe aị Jizọsi Karaịsi, anya aị lawuru whnurnu dudugna a.

¹⁷ Ọ nahịaru ọson'anya nụ igwugwu n'aka Chiokike Nda, nga akpịri Chiokike jiri okne igwugwu dna, kaa, “Ka bụ Nnwọ m me whnurnu n'anya, nye nhne a masịri m.”

¹⁸ A nurnu akpịri ka hi n'oligwe dna, nga aị nụ ya zị n'olu rugwu wam zị nsọ.

¹⁹ Be mernu ikwu-ọnu ele ọwhnurninya wam gwuzosi rikne k'agida, anụ bno nsnị nhne be gbarụ, kwnornu nụ ikwu-ọnu be nụ lele ọnji noonwu nụ hne gbarụ ọchichiri. Ọ jaazị kọriri noonwu tem dụ n'ọbochi Jizọsi jaava, iwhe a joonwu nụ rime mkpọma anụ.

²⁰ Ke kakwo kpakara nhne, anụ mahia nụ ọ zá nhne ọwhnurninya ọbula be gbarụ n'okwukwo nsọ ke badnụ nwernu rikne kọwa risi a hite nụ nhne zị n'echiche a.

²¹ Kwnornu nụ ọ zá ọwhnurninya ọbula be jiri echiche badnụ vu, kọvu ele badnụ kwuru ikwu-ọnu Chiokike kpa Enine Nsọ noodu be kwu.

2

Ele zni nhne aghalaghala

¹ Ele ọwhnurninya aghalaghala whųyaru iwhe n'esilawuru ele Izireli, lele kpa ele zni nhne aghalaghala jọowhuya iwhe n'esilawuru anụ. Ele ka jeeji aghigho gwebnanya iznizni ọgha zị ọdo n'ọdo ke noovuya ẹnwu, be gọnahoru Nyenwe be bụ nye gbaharu be, ele neegweya ọla n'iyi zị ngwa ngwa nụ risi be.

² Agida ele badnụ joosno apna ome ọyi be. Kwnornu nụ nhne be neeme, ele badnụ jookwulu apna ezi ọka.

³ Ele zni nhne ka jeeji ọwho-anya kwu nhne be chehuru nụ mkpọma be, gweru anụ zụ ahia. Ele ikpe ọmuma be neese be, ọla n'iyi be zá neere anyarna.

⁴ Chiokike sigbasila ele enine izi ele mernu mmehie, kọvu tubna be nụ rime bekwnu renwu, hne be turu be ijigba nụ rime ọchichiri neese ọbochi ikpe.

⁵ Chiokike sigbasila ọwa ọknani, kọvu dọhia Noa, nye mernu be badnụ ẹsato, nye neezni izi ọma ome mma, nga o gweyaru mgba-mini ẹli n'ọwa ele máa Chiokike.

⁶ Ọ marnụ ẹli Sodom nụ Gómora ikpe, gweru bekwnu rne be lele retnu, mee be buru nhne atụ nyee ele joowu bụdnu máa Chiokike.

⁷ Ọ dọhuru Lọtu nye mee mma, nye bụdnu zila richna ke ele noolulu iwu ẹli wam mekparụ ẹhni.

⁸ Nye mee mma wam wuru n'esilawuru be, whnụ, nụ masị ọka ojo ke gburu a igbugbu nụ mkpọma.

⁹ Ọ bụru kpam, Nyenwe aị magwu kpa o joodohia ele mee mma nu rime onurna, nu kpa o jaabita ele ojo nu rime awnwnwumu du n'obochi ikpe,

¹⁰ ke kakwo, ele noosno nhne ruru oru ke ano-ehni be, neeledna ele nzechichi anya.

Be neezni nhne aghalaghala n'anya rikne, ele oknomokno, ele za notu ogwnu nu okaja ele oligwe.

¹¹ Ọ bubi ele enine izi ele gbasiri rikne nu ele nwernu iknernema karu ele zni nhne aghalaghala ka, nwée rikne gweru kpari bno ele oligwe nhne nu ruwumu Nyenwe ai.

¹² Kovu ele badnu ka nookwulu nhne be ghohiage, be nu lele anohia nsini inyo, nhne be keru eke neeme kpa o masiri be, be jionwudne be, gbu be lele anohia, be la n'iyi.

¹³ Be jaanahia ogwo eru nhne ojo be mernu, o nooso be o mee nhne ojo n'iwnehnie. Be bu nhne iwernerne n'esilawuru anu. Nhne zi nu mkpoma be bu nhne ojo kpa be sno anu neeri wiri nonwo.

¹⁴ Ome oyi jiri be n'anya, inwe za noogwu be nu mmehie, be nooduwu mkpoma za rikne, ele mkpoma be jiharuru n'owho-anya nu eru ojo, ele be vuru Onu.

¹⁵ Be ghahieru apna, gharu apna ziri ezi, snornu apna Balam nnwo Boso, nye wnwuru ogwo eru nhne ojo n'anya.

¹⁶ Kovu iyinya a bigburu a nu mmehie a, anohia kwu oka, kwuru oka n'ibiri n'nkoli ke badnu, chima era nye owhnurninya wam.

¹⁷ Ele badnu ka nu lele omi nwe mini, lele erumeru ruwhere mini noovughari, be bitannu be okne ochichiri okwukokwunu.

¹⁸ Kwnornu nu onu be nookwu okne oka mpako iwahnirniwhno, be naarn-abnahna nu rime mmehie ele naagbanahuru budnu ojo.

¹⁹ Be neekwe be mkwina o nwernu ehni be, kovu be n'iwuru be bu ohi agwa ojo noovuya enwu. Kwnornu nu nhne obula ke megburu badnu, nye wam bu ohi a.

²⁰ Ọ buru nu be gbanahuru nhne noolulu ke owa nga be mahiaru Nyenwe ai nu Nye Oznohia ai Jizosi Karaisi, be knegidne kwno be nu rime a, o nwegidne be, onodi be n'ipne-aznu joojobujo karu nu opanizo.

²¹ Ọ ka mma nu be ma a apna ome mma karu nu be mahiaru a, be dnasinu iwu nsu wam be nyernu be aznu.

²² Nhne mernu be gesiri nu elulu wam bu ezi oka, "Nkita nwarnu rugburu gburu laha nu nhne o nwarnu," nu "Ezni be hnarnu ehni lahnarnu nu rime ooto."

3

Obochi Nyenwe ai

¹ Ele me wnwuru n'anya, ka bu okwukwo izi ke ebo me naagbanu anu, m naakpali echiche oma nu rime anu.

² Anu chenyanya ikwu-onu ele owhnurninya zi nsu kwuru, ya nu iwu Nyenwe ai nu Nye Oznohia ai nyernu anu hite n'aka ele izi a.

³ Anu mahia nu mbom nu ele okwa emo jaava n'obochi ipne-aznu, neezne izne n'ano-ehni be.

⁴ Be jaakaa, "Ndaa omezu mkwina ovuva a? Hite nga ele nda ai nwurnu enwu, kpakara nhne zi koriri kpa o zi hite nu okike owa."

⁵ Be ma ama lewhuru anya n'ige wheru ewhe nu Chiokike kwuru oka, oligwe nu owa ziri. O hiri nu rime mini kehia owa hite nu mini.

⁶ Ọ bu masi hite nu mini, ke okne mgba-mini eli, be jiri lulu owa oknani.

⁷ Kòvù oligwe nù òwa ke zì kítna bù ke ò bítaru hite n'ikwu-ònu Chiokike wam, o jeeji bèkwu lulu. Ò bítaru be kwnornu òbochi o jeekepe ele máa Chiokike ikpe, lulu be.

⁸ Kòvù ele me whnúrnú n'anya, anù chézu otu nhne ka, otu òbochi nù hne Nyenwe aì zì nù lele otu pokwu awaha, otu pokwu awaha nù lele otu òbochi.

⁹ Nyenwe aì zà naakpa ndnarna n'omezú mkwna a, lele kpa ele badnú neeche, kòvù o nwernu ogologo òsnuta ovu hne anù zì, kwnornu nù o píole nye òbula whu etekne, kòvù ma kpakara badnú hi nù mmehie be whúya.

¹⁰ Kòvù òbochi Nyenwe aì jaava, ò jòonu lele nye buznu, ele badnú jáazi neele anya a. Oligwe jeeji okne mkpakpò gawhe, kpakara nhne zì n'olu jeeji okne bèkwu gbaza. Òwa nù kpakara èrnu be rnúnru nù rime a jòowho iwhne.

¹¹ Kpa a mahíaru nù kpakara nhne jaagbaza, ndaa kpa a kwesiri o wu budson? A kwesiri o wu budson zì nsò, ya nù ò tù ogwnu Chiokike.

¹² Kpa anù neele anya òvuvá òbochi Chiokike,* anù mee ma ò va ngwa ngwa, oligwe jaagba bèkwu, kpakara nhne zì n'olu jeeji okne okpe bèkwu gbaza.

¹³ Kòvù a neele anya oligwe ikne nù òwa ikne, lele kpa o kweru mkwna, òro ome mma.

¹⁴ Kam kpayarù, ele me whnúrnú n'anya, hne anù neele anya nhne ka, anù gbalì ma anù zìri snam, ele nwée òtna òtna, anù nù Chiokike zìri n'udno.

¹⁵ Anù vuru nù mkpòma nù ogologo òsnuta ovu Chiokike bù òznohia anù, lele kpa nnwò nda aì Pòlu, nye a whnúrnú n'anya gbannù anù n'òkwukwo hite n'akòniche Chiokike nyernu a.

¹⁶ Ka bù nhne o nookwu nù kpakara òkwukwo izi a, nga ò naagba nhne gbasìri nhne ka, o nookwu agìda nhne siri rikne n'òghohia, ke ele máa nhne nù ele ovu be zà kwem nòokowahie, lele kpa be neeme nù nhne berere zì n'òkwukwo nsò, ka bù ma be la n'iyi.

¹⁷ Kòvù anù, ele me whnúrnú n'anya, anù magwù nhne ka, anya dù anù èli, ma nhne òjo ke ele noolulu iwu èli neezni gharù o duhie anù, mee anù dnahnala n'ogwuzosi rikne anù.

¹⁸ Kòvù anù zìri nooso oso nù oru nù nhne òmuma ke Nyenwe aì nù Nye Òznohia aì Jìzòsì Karaìsì. Kpakara igwugwu zìnu a, kítna, dù òkwukokwù. Àmìjì.

* 3:12 Mòbu òbochi Nyenwe aì jeekepe òwa nù oligwe ikpe

**Ọkwukwo izi
ke Mbọm
Jóni
gbarụ
Nhne gbasịri ọkwukwo izi ka**

Jóni mernu ma ele Karaịsi mahija nụ ọ bụru a kwuhija mmehie aị, Chiokike jaagbarụnu aị, vume mmehie aị.

Nhne neegesi nụ ele Karaịsi nwernu ọkwunata mkpọma bụ ọwhnun'anya be nwernu n'ehni badnụ ibne be (3:11-24). Chiokike bụ ọwhnun'anya n'iwuhuru a, ele ke a kwesiri ọ nụ lele ya masị (4:1-21). Nhne neegesi nụ a nwernu omegbu mmehie bụ ọwhnun'anya a nwernu n'ehni ele berere, a kweru nụ Jizọsi bụ Nnwọ Chiokike, nụ ọ bụ Karaịsi wam n'ezi, nụ ẹnwu a kwnornu aị bụ ezi ọka (5:1-12).

Nhne zị n'ọkwukwo izi ka

Ikwu-ọnu ke neenye bụdnu (1:1-4)

Chiokike bụ iwuhne aị, Karaịsi bụ nhne atụ aị (1:5---2:6)

Iwu ikne (2:7-17)

Ele irno Karaịsi nụ ele ke Chiokike (2:18---3:10)

Ọwhnun'anya Chiokike nụ ọwhnun'anya aị (3:11---4:21)

Omegbu ọwa (5:1-21)

Ikwu-ọnu ke neenye bụdnu

¹ Ikwu-ọnu Chiokike wam ke panizoru nụ mbọm, bụ ke a nurnu, ke anya aị whnurnu, ke a leru anya, bụ ke a kpaturu aka masị, bụ nhne a nọkpo okwo a, bụ ikwu-ọnu ke neenye bụdnu.

² Bụdnu wam whuyaru iwuhne, a whnurnu a, gba masị akebne a, a kpọ ọkwo bụdnu kwó okwo ke zị n'aka Nda, omekwo dū aị.

³ A nọkpo okwo nhne a whnurnu, nurnu masị, ma anụ snornu aị meko nhne. Omekorita aị bụ ke aị nụ Chiokike nụ Nnwọ a Jizọsi Karaịsi.

⁴ A gbarụ nhne ka n'ọkwukwo ma ovu ọso n'ọnu aị zu ozu.

Chiokike bụ iwuhne

⁵ Ka bụ izi a nurnu n'ọnu a bụ masị ke a znirni anụ. Chiokike bụ iwuhne, o zá ọchichiri zị nụ rime a rịa rịa.

⁶ Ọ bụru nụ a kaa nụ aị nụ ya neemeko nhne, kovu a neezne izne n'ọchichiri, a bụ ele aghalaghala, ezi ọka zila aị n'ọnu.

⁷ Kovu, ọ bụru nụ a zne izne n'iwuhne, lele kpa o neezne izne n'iwuhne, a neenwe mekorita n'esilawuru aị, ọvurna Jizọsi Nnwọ a, nọosnusnama kpakara mmehie aị.

⁸ Ọ bụru nụ a kaa nụ a nwée mmehie, a nooduhie ehni aị, ezi ọka zila aị n'ọnu.

⁹ Kovu, a kwuhija mmehie aị, Chiokike bụ nye kwesiri ọkwunata ovu nụ nye mee mma, ọ jaagbarụnu aị mmehie aị, ọ snumakwo kpakara aruru-eli aị.

¹⁰ Kovu, a kaa nụ a méne mmehie, a neeme a nye aghalaghala, ikwu-ọnu a zila nụ rime aị rịa rịa.

2

1 Rúmu takiri m, m naagbanu anu okwukwo ma anu gharu o mee mmehie. Kovu, o buru nu nye obula mehieru, a nwernu nye nookwunu ai onu nu ruwuhu Nda ai, rewhna a bu Jizosi Karaisi, nye mee mma.

2 Jizosi bu nye ji ovrnana a naawhaji-eli kwnornu mmehie ai, o buo mmehie ke ai kpoi, kovu mmehie kpakara ele badnu.

3 Ka bu nhne neegesi nu a magwu nye o bu, o buru nu a bita kpakara nhne o nyernu n'iwu.

4 O buru nu a kaa nu a magwu nye o bu, kovu a za naabita iwu a, a bu ele aghalaghala, ezi oka zila ai n'onu.

5 Ka bu nhne neegesi nu a magwu Chiokike, o buru nu a bita iwu a, owhnun'anya Chiokike zuru ozu n'ovu ai.

6 Nye obula ke kaa nu o zi nu rime a, joowu budnu lele kpa Jizosi wuru.

Iwu ikne

7 Ele me whnrnu n'anya, m za m naagbanu anu okwukwo iwu ikne, kovu iwu oknani. Iwu oknani ka bu ke anu nrnu hite nu opanizo.

8 Kovu m naagbanu anu iwu ikne, ezi oka wam zi nu rime Jizosi, nu rime anu, kwnornu nu ochichiri naagawhe, ezi iwhne wam nomukwasi ai.

9 Nye obula ke kaa nu o zi n'iwhne, kovu, sno nwene a irno, zi koriri n'ochichiri.

10 Nye obula ke whnrnu nwene a n'anya zi n'iwhne wam, o za nhne jeeme a o kpobi ochi.

11 Nye obula ke snornu nwene a irno zi n'ochichiri, neezne izne n'ochichiri, o ma hne o neezne kwnornu nu ochichiri mernu a okpu isni.

12 Rúmu takiri m, m naagbanu anu okwukwo, kwnornu nu Chiokike gbarunu anu mmehie kwnornu rewhna Karaisi.

13 Ele nda, m naagbanu anu okwukwo, kwnornu nu anu magwu Karaisi, nye zi hite n'opanizo.

M naagbanu anu okwukwo, rumu ikoro, kwnornu nu anu megburu nye ojo wam.

Rumu takiri m, m naagbanu anu okwukwo, kwnornu nu anu magwu Nda wam.

14 Ele nda, m naagbanu anu okwukwo, kwnornu nu anu magwu Karaisi, nye zi hite n'opanizo.

M naagbanu anu okwukwo, rumu ikoro, kwnornu nu anu gbasiri rikne, ikwu-onu Chiokike zi nu rime anu, kwnornu nu anu megbulem nye ojo wam.

Anu whnu nhne owa n'anya

15 Anu whnu owa n'anya, mabu nhne zi n'owa. O buru nu nye obula whnu owa n'anya, owhnun'anya ke Nda zila nu rime a.

16 Kpakara nhne zi n'owa bu egwnurnu nhne ojo ke badnu, nu egwnurnu nhne ojo ke anya, nu oknomokno ke mkpoma ke badnu. Nhne ka hige n'aka Nda ai va, o hi n'owa va.

17 Owa nu kpakara egwnurnu nhne ojo ke zi nu rime a jaagawhe, kovu nye obula ke neeme echiche Chiokike jaazi budnu okwnukokwunu.

Nye neemidne Karaisi

¹⁸ Rǫmu takiri m, ka bu ige ipne-aznu, anu nurnu nu nye wam neemegidne Karaísi wawa, me kanu anu, agida ele neemegidne Karaísi valẽm. Ka neegesi nu ige wam zi ndundu.

¹⁹ Be hiri nu hne a zi whoga, kwnornu nu be nu ai zila n'otu n'ezi. O buru nu ai nu be zi n'otu, be znernu adazigidnenu ai. Owhoga be neegesi nu ai nu be zila n'otu.

²⁰ Kovu, Nye Nso wam teru anu mono, ka neegesi nu kpakara anu mahiaru ezi oka.

²¹ M za m naagbanu anu okwukwo ka kwnornu nu anu maá ezi oka, kovu kwnornu nu anu mahiaru ezi oka. Aghalaghala zila n'ezi oka.

²² Nyele bu nye aghalaghala? O bu nye wam ke gonahoru nu Jizosi bu Karaísi. Nye wam bu nye neemegidne Karaísi. O gonahoru Nda nu Nnwọ a.

²³ Nye obula ke gonahoru Nnwọ maá nye Nda wam bu, nye obula ke magwu Nnwọ magwu Nda wam masi.

²⁴ Anu ledu anya nu nhne anu nurnu hite nu mbom dazigidnenu nu rime anu. O buru kpam, anu jaadazigidne nu rime Nnwọ nu rime Nda.

²⁵ Budnu kwó okwo bu nhne o kweru ai nu mkwana.

²⁶ M naagba ka n'okwukwo kwnornu ele piuru o duwhu anu.

²⁷ Kovu Karaísi teru anu mono Enine Nso. O kwésile nye obula zni anu nhne, mono o teru anu zi nu rime anu neezni anu kpakara nhne lele kpa otute mono wam zi ire, ma anu dazigidne nu rime Karaísi.

²⁸ Kítina, rǫmu takiri m, anu dazigidne nu rime a, ma nga o jowhuya iwhne, ovu si ai rikne o gwozoru nu ruwhnu a, iwhnerne jótou ai.

²⁹ Anu magwu nu Karaísi bu nye mee mma, nye obula ke neeme mma bu nnwọ Chiokike.

3

Rǫmu Chiokike

¹ Le, kpa Chiokike jiri whnu ai n'anya, o sukwu ai rǫmu a. Ka bu nhne a bu n'ezi. Kam kpararu, ele zi n'owa maá ele a bu, lele kpa be maá nye o bu.

² Ele me whnurnu n'anya, a bu rǫmu Chiokike kítina, nhne a jọbu whoge iwhne kítina. Kovu a magwu nga o jaava, a jọnu lele kpa o nu, kwnornu nu a jowhnu a kpa o nu.

³ Nye obula ke nwernu olile anya ka neeme ehni a ziri snam, lele kpa o zi snam.

⁴ Nye obula ke neeme mmehie, noolulu iwu, kwnornu nu mmehie bu olulu iwu.

⁵ Kovu anu magwu nu o whuyaru iwhne ma o gweme kpakara mmehie ai. Ya n'iwuhuru a nwée mmehie.

⁶ Nye obula ke zi budnu nu rime Karaísi, za neemezne mmehie. Nye neeme mmehie maá nye Karaísi bu, nye wam whnúlele a anya.

⁷ Rǫmu takiri, anu kwé nye obula duwhu anu. Nye obula ke neeme nhne buru oma bu nye mee mma, lele kpa Karaísi bu nye mee mma.

⁸ Nye obula ke neemezne mmehie bu nye Ekwensu, kwnornu nu Ekwensu bu nye neeme mmehie hite n'opanizo. Kam kpararu Nnwọ Chiokike jiri whuya iwhne, ma o lulu kpakara ernu ke Ekwensu.

⁹ Nye obula ke Chiokike murnu za neemezne mmehie, kwnornu nu mkpuru Chiokike zi nu rime a, o jénwe rikne mee mmehie, kwnornu nu Chiokike bu Nda a.

¹⁰ Ka bụ nhne rụmu Chiokike jiri zịri ichne nụ hne rụmu Ekwensu zị. Nye ọbula ke zá neeme nhne bụru ọma búo nnwọ Chiokike, ma nye ọbula ke whnúge nwene a n'anya.

Anụ whnụ ibne anụ n'anya

¹¹ Ka bụ izi anụ nurnu hite n'ọpanizo, anụ whnụrita ibne anụ n'anya.

¹² Ọ zá nye nụ lele Keni, nye Ekwensu nęechi o gbu nwene a. Kini kpayarụ o jiri gbu a? Kwnornu nụ ęrnu a búo ọma, kọvu ęrnu nwene a bụru ọma.

¹³ Rụmu nda m, ọ gbagwoji anụ anya, ọ bụru nụ ele zị n'ọwa snornu anụ irno.

¹⁴ A magwụ nụ a hiri n'ęnwu bna nụ bụdnu, kwnornu nụ a whnurnu rụmu nda aị n'anya. Nye ọbula ke zá nọowhnu n'anya bụ nye nwurnu ọnwu.

¹⁵ Nye ọbula ke snornu nwene a irno bụ nye noogbu badnụ. Anụ magwụ nye ọbula ke noogbu badnụ nwée bụdnu kwó okwo nụ rime a.

¹⁶ Ka bụ nhne neegesi ọwhnun'anya, Jizọsi Karaịsi gweru bụdnu a nyee kwnornu aị. A kwesiri o nyee bụdnu aị kwnornu rụmu nwene aị masi.

¹⁷ Ọ bụru nụ nye ọbula nwernu ękwnu k'ọwa ka, whnụ nwene a zị nụ mkpa, ọ dọla obirizi, nye wam nwée ọwhnun'anya Chiokike nụ rime a.

¹⁸ Rụmu takiri m, a whnụ n'anya n'ọnu etekne mọbu n'ikwu-ọnu kpọi, kọvu n'ęrnu n'ezi ọka.

¹⁹ Ka bụ nhne neegesi nụ a magwụ ezi ọka, ke neeme mkpọma aị si rikne nụ ruwhnu Chiokike,

²⁰ ọ bụbedi ovu aị naama aị ikpe, Chiokike kakwo ovu aị, ọ magwụ kpakara nhne.

²¹ Ele me whnurnu n'anya, ọ bụru nụ ovu aị mána ikpe, ovu jeesi aị rikne o gwuzo nụ ruwhnu a.

²² A jaanahọru a nhne ọbula a nọorio a, kwnornu nụ a naabịta iwu a neeme masi nhne nọoso a ovu n'ọnu.

²³ Ka bụ nhne o nyernu n'iwu, a kweru nụ rẹwhna Nnwọ a Jizọsi Karaịsi, a whnụrita ibne aị n'anya lele kpa o nyernu aị n'iwu.

²⁴ Ele naabịta iwu a zị bụdnu nụ rime a, ya nụ rime be. Enine Nsọ wam o nyernu aị bụ nhne neegesi nụ ọ zị nụ rime aị.

4

Anụ tule kpakara enine

¹ Ele me whnurnu n'anya, anụ kwéọ kpakara enine, anụ tule kpakara enine ma be hi n'aka Chiokike, kwnornu nụ agịda ele ọwhnurninya aghalaghala bnarnụ nụ rime ọwa.

² Ka bụ nhne anụ jeeji mahịa Enine Chiokike, enine ọbula ke kwuhịaru nụ Jizọsi Karaịsi varụ n'anọ-ęhni hi nụ Chiokike va.

³ Kọvu enine ọbula ke kwéle nụ Jizọsi hiri nụ Chiokike va, enine ka híge nụ Chiokike. Ka bụ enine nye neemegidne Karaịsi, nye anụ nurnu ọ jaava, ọ zị n'ọwa kịtna.

⁴ Rụmu takiri m, anụ bụ rụmu Chiokike, anụ megbulem ele irno wam, kwnornu nụ nye wam zị nụ rime anụ kakwo nye wam ke zị n'ọwa.

⁵ Ele ka hi n'ọwa, be nookwu hite nụ nhne be magwụ n'ọwa, ele zị n'ọwa noobnonu be nsnj.

⁶ A hi hne Chiokike zị va, nye ọbula ke magwụ Chiokike nọonu nhne a nookwu. Kọvu nye ke máa Chiokike zá nọonu nhne a nookwu. Ka bụ nhne a jiri mahịa enine ezi ọka nụ enine aghalaghala.

Chiokike bụ ọwhnun'anya

⁷ Ele me whnurnu n'anya, a whnurita ibne aị n'anya, kwnornu nu ọwhnun'anya hi nu Chiokike va. Nye ọbula ke nọowhnu n'anya bu nye Chiokike murnu, nye wam magwu Chiokike.

⁸ Nye ọbula ke whnu n'anya ma Chiokike, kwnornu nu Chiokike bu ọwhnun'anya.

⁹ Chiokike gesiri aị ọwhnun'anya n'esilawuru aị, kpa o ziyaru Nnwọ o murnu kpọi n'owa, ma a nwernu budnu hite nu rime a.

¹⁰ Ka bu ọwhnun'anya, o buo nu a whnurnu Chiokike n'anya, kovu o whnurnu aị n'anya ziya Nnwọ ma o buru nhne arjohna be jeeji gbaru mmehie aị.

¹¹ Ele me whnurnu n'anya, lele kpa Chiokike whnurnu aị n'anya, a kwesiri o whnurita ibne aị n'anya.

¹² O za nye ọbula ke whnureru Chiokike anya, kovu o buru nu a whnurita ibne aị n'anya, Chiokike wu nu rime aị, ọwhnun'anya a zuru ozu nu rime aị.

¹³ A magwu nu a wu nu rime Chiokike, nu Chiokike wumako nu rime aị, kwnornu nu o nyernu aị Enine a.

¹⁴ A whnurnu, gba akebe nu Nda ziyaru Nnwọ a ma o buru Nye Oznohia ke ọwa.

¹⁵ Nye ọbula ke kweru nu Jizosi bu Nnwọ Chiokike, Chiokike wu nu rime nye wam, nye wam masi wu nu rime Chiokike.

¹⁶ Kam kpayaru, a magwu, kweru masi nu ọwhnun'anya Chiokike bu n'ezi. Chiokike bu ọwhnun'anya. Nye ọbula ke nọowhnu'anya wu nu rime Chiokike, Chiokike wu masi nu rime a.

¹⁷ Chiokike mernu ọwhnun'anya a zu ozu n'esilawuru aị, ma a nwernu mkpoma siri rikne n'obochi ikpe, kwnornu nu a nu lele ya n'owa ka.

¹⁸ Ogwu zila n'ọwhnun'anya. Ọwhnun'anya ke zuru ozu n'echihala ogwu, kwnornu nu ogwu nu awhnwhnu nookno aka. Nye ọbula ke nọtụ ogwu zuge ozu n'ọwhnun'anya.

¹⁹ A nọowhnu n'anya kwnornu nu Chiokike beru osno whnu aị n'anya.

²⁰ Nye ọbula ke karu nu o whnurnu Chiokike n'anya, kovu sno nwene a irno bu nye aghalaghala. Nye ọbula ke whnuge nwene a n'anya, bu nye o nọowhnu anya, nwée rikne whnu Chiokike nye o za nọowhnu anya n'anya.

²¹ Ka bu nhne o nyernu n'iwu, nye ọbula ke whnurnu Chiokike n'anya, jowhnriri nwene a n'anya.

5

Okwnata ovu nu Nnwọ

Chiokike

¹ Nye ọbula ke kweru nu Jizosi bu Karaisi hi nu Chiokike va. Nye ọbula ke whnurnu Nda n'anya whnurnu Nnwọ a n'anya masi.

² Ka bu nhne negesi nu a whnurnu rumu Chiokike n'anya, o bu o whnu Chiokike n'anya, neeme nhne o nyernu n'iwu.

³ Ka bu nhne negesi nu a whnurnu Chiokike n'anya, o buru a bita nhne o nyernu n'iwu, iwu Chiokike zila rinya.

⁴ Kwnornu nu nye ọbula ke bu nnwọ Chiokike neemegebu ọwa. Okwnata ovu aị nu Chiokike bu nhne neemegebu ọwa.

⁵ Ndaa nye neemegebu ọwa? O bu nye wam ke kweru nu Jizosi bu Nnwọ Chiokike.

⁶ Jizosi Karaisi bu nye wam jiri ọvnarna nu mini va. O buo mini kpọi, kovu o varu hite n'ovnarna nu mini. Enine Nso naagba akebe a, a magwu nu akebe a bu ezi oka.

⁷ Kwnornu nu nhne akebe eto zi,

⁸ Enine, mini nù ọvna. * Nhne ẹto ka kwerekotaru otu nhne.

⁹ Ọ bụru a kwere nù nhne badnù kwuru, nhne Chiokike kwuru kakwo, kwnornu nù ọ bụ akebne Chiokike gbarụ gbasiri Nnwọ a.

¹⁰ Nye ọbula ke kwere nù Nnwọ Chiokike nwernu nhne akebne ka nù mkpọma a. Nye ọbula ke kwéle nù Chiokike neeme a nye aghalaghala, kwnornu nù o kwéle n'akebne Chiokike gbarụ gbasiri Nnwọ a.

¹¹ Ka bụ akebne wam, Chiokike nyernu aị bụdnù kwó okwo, bụdnù wam zị nù rime Nnwọ a.

¹² Ka neegesi nù nye ọbula ke nwernu Nnwọ Chiokike nwernu bụdnù kwó okwo, nye ọbula ke nwéee Nnwọ Chiokike nwéee bụdnù.

Ọka ipne-aznụ

¹³ M naagbanụ anụ ele kwere nù rẹwhna Nnwọ Chiokike, ma anụ mahia nù anụ nwernu bụdnù kwó okwo.

¹⁴ Ka bụ nhne neemesi aị ovu rikne ọ vakwnusi Chiokike. A magwụ nù a rịo nhne ọbula lele kpa echiche ovu a jiri zị, ọ jọonu aị.

¹⁵ Ọ bụru nù a magwụ nù ọ nọonu nhne a nọorio a, ovu siri aị rikne nù a jeenwehia nhne nọorio a.

¹⁶ Ọ bụru nù nye ọbula whnurnu nwene a mernu mmehie ke zá noodubna n'ẹnwu, ọ kpe okpukpe ma Chiokike nyee a bụdnù. M nookwu nhne gbasiri ele neeme mmehie ke zá noodubna n'ẹnwu. Mmehie ke noodubna n'ẹnwu zị. M zá naaka badnù kpe okpukpe gbasiri a.

¹⁷ Kpakara nhne bụo ọma bụ mmehie, kọvu agwna mmehie zá noodubna n'ẹnwu.

¹⁸ A magwụ nù nye ọbula Chiokike murnu zá neemezne mmehie. Nnwọ Chiokike naabita nye ọbula ke Chiokike murnu, nye ọjo wam nwéee rikne mekasi a nhne.

¹⁹ A magwụ nù a bụ rụmu Chiokike, kọvu kpakara ọwa zị nù mkpururu nye ọjo wam.

²⁰ A magwụ nù Jizọsi Karaịsi Nnwọ Chiokike varu, ma a mahia nye wam bụ ezi ọka. A zị masi nù rime nye wam ke bụ ezi ọka, Jizọsi Karaịsi Nnwọ a. Ya n'iwuru a bụ Chiokike n'ezí nù bụdnù kwó okwo.

²¹ Rụmu takiri m, anụ gweme ẹhni anụ n'ọkwa rẹnwu.

* 5:8 Agwna ọkwukwo ke be gbarụ kpa agida awha whemernu kwu kwono, n'oligwe Nda, Ikwu-ọnu nù Enine Nso. Nhne ẹto ka nookwu otu ọnu. 8 Nhne akebne ẹto zị n'ọwa, Enine, mini nù ọvna.

**Okwukwo izi
ke Ebo
Jɔni
gbaru**

Nhne gbasiri okwukwo izi ka

Nga Jɔni gbaru *Okwukwo izi Jɔni ke ebo*, o ghɔlam nye okno badnu. O gweznenu a “Nyerinya oma nu rumu a,” ke bu ogbako Chiokike. Okwukwo izi mati ka nookwu oka gbasiri owhnun'anya n'ehni ibne be, noɔdo be aka nu nsɔi gbasiri ele neezni nhne aghalaghala.

Nhne zi n'okwukwo izi ka

Opanizo (1-3)

Ezi oka nu owhnun'anya (4-11)

Okwukwo (12-13)

Obekwu ikwu nu okpukpe

¹ Mawa, Jɔni, nye okno badnu, naagbazzenu nwerinya Chiokike hɔhiaru nu rumu a okwukwo, ele me whnuru n'anya n'ezi, o buo me nu nsunu m, kovu kpakara ele magwu ezi oka.

² Kwnornu nu ezi oka ke zi nu rime a, ke jaazigidne a tim tom.

³ Oru nu obirizi nu udno ke hi n'aka Chiokike Nda nu Jizosi Karaɔsi Nnwɔ Nda a, jaadaɔinu a nu ezi oka nu owhnun'anya.

Ezi oka nu owhnun'anya

⁴ O neeye m ovu oso n'onu kpa me nowhnu rumu i neezne izne n'ezi oka lele kpa Nda a nyernu a n'iwu.

⁵ Kɔna, nwerinya oma, m za m naagbanu i iwu ikne, kovu o bu koriri ke a ji hite nu mbom. M naarasno ma a whnura ehni a n'anya.

⁶ Ka bu owhnun'anya wam, a zne izne noobno nsɔi nu nhne Chiokike nyernu n'iwu. Lele kpa anu nurnu n'opanizo, iwu a bu ma anu zne izne n'owhun'anya.

⁷ Agida ele nooduwu ele badnu, ele za neekweru nu Jizosi Karaɔsi varu n'an-ehni, barnu nu rime owa. Nye nu kpa bu nye nooduwu nu nye neemegidne Karaɔsi.

⁸ Anu ledu anya, o zi anu tuwhu nhne anu dogburu ehni anu n'ernu, kovu ma anu nwehia ogwo ernu zuru ozu.

⁹ Nye obula ke neezne nu ruwhnu gharu nhne Karaɔsi znirni ma Chiokike. Kovu nye obula ke zi neeme iznizni a magwu Nda nu Nnwɔ a.

¹⁰ Nye obula ke vakwnusiri anu ke gwɔyala iznizni ka, anu kwubnana oro anu, mɔbu kanu a, “I vale.”

¹¹ Nye obula ke kannu a, “I vale” jeekehia igwe n'ernu ojo a.

¹² M nwernu m agida nhne me jaagbanu anu, kovu m jeeeme kpa m'okwukwo nu nki. Tnunu, m neele anya nu m jaava me nu anu kwu oka ruwhnu nu ruwhnu, kpa, ovu oso n'onu a joozu ozu.

¹³ Rumu nwene i rinya kam Chiokike hɔhiaru neebekwu i.

**Ọkwukwo izi
ke Ẹto
Jōni
gbarū**

Nhne gbasiri ọkwukwo izi ka

Nga Jōni gbarū *Ọkwukwo izi Jōni ke ẹto*, ọ gholam nye okno badnu. O gweznenu nye risi ọgbako Chiokike, nye rewhna a bu Gayōsi. Ọkwukwo izi ka, naaznarni Gayōsi kwnornu ẹrnu ọma a hne rumu Chiokike berere zi, nọodo masi a aka nu nsnj gbasiri otu nyerukna be kwu Diotirifesi.

Nhne zi n'ọkwukwo izi ka

Ọpanizo (1-4)

Gayōsi kwesiri ọkwnata ovu (5-8)

Diotirifesi mékwalá nkari (9-10)

Demetirisi mekwaru nkari (11-12)

Ọkwukwo (13-15)

¹ Mawa, nye okno badnu, naagbazuenu Gayōsi enyi m me whnurnu n'anya nu ezi ọka.

² Enyi m me whnurnu n'anya, okpukpe m bu ma ẹhni i si rikne, ma kpakara nhne i neeme gakwanu i nkari lele kpa mkpuru ovu i naagakwa nkari.

³ O nyernu m mkpoma ọso n'onu k'agida nga agwna rumu nda varu kanu m nhne gbasiri ọkwnata ovu i n'ezi ọka nu kpa i neezne izne n'ezi ọka wam.

⁴ Ọ zá nhne nọoso m ovu n'onu kakwo nga me nurnu nu rumu m neezne izne n'ezi ọka.

Gayōsi kwesiri

ọkwnata ovu

⁵ Ezi enyi m me whnurnu n'anya, i kwesiri ọkwnata ovu nu kpakara nhne i neemenu rumu nda, ọ bu n'ezi nu be bu ele izne n'ehni i.

⁶ Be kannu ọgbako Chiokike ọwhnun'anya i, ọ jọburu ọma ma i zihala be kpa o kwesiri n'anya Chiokike.

⁷ Be kwnornu rewhna Karaṣi whoga zni izi ọma, be kwéle ọ nahoru oyi aka hite n'aka ele kwé ekwe.

⁸ A kwesiri ọ nabnanya ele ka nkari ma ai nu be snornu rnukota ẹrnu ezi ọka n'otu.

Diotirifesi mékwalá nkari

⁹ M gbazuenu m ọgbako Chiokike ọkwukwo, kovu Diotirifesi nye noopio ọ buru nye risi kwéle obno nsnj nu nhne me nookwu.

¹⁰ Nga me varu, m jeeme ele badnu mahia nhne o neeme, kpakara nhne o nookwu gbasiri ai nu kpakara aghalaghala a. Tụkwasi n'olu nhne ka, o kwéle ọ nabnanya rumu nda ai. Ele pioru o kwubnanya rumu nda ai, o kwéle be, kovu ọ chihala be n'ọgbako Chiokike.

Demetirisi mekwaru nkari

¹¹ Enyi m me whnurnu n'anya, i snó nhne buo ọma, kovu snornu nhne buru ọma. Nye ọbula ke neeme nhne buru ọma hi hne Chiokike zi va. Nye neeme nhne ojo whnúge Chiokike anya rja rja.

¹² Kpakara ele badnu nookwu Demetirisi ọka ọma hite n'ezi ọka. Aila masi nookwu a ọka ọma, anu magwu nu akebe ai bu ezi.

Obekwu ikwu ipne-aznu

¹³ M nwernu m agida nhne me kwesiri o gbanu i n'okwukwo, kovu m jeeji mkpisi okwukwo nu nki naagba a.

¹⁴ M neele anya nu m jaava whnu i anya ige mati, me nu ji kwu oka ruwhnu nu ruwhnu.

¹⁵ M neekpe ma Chiokike nyee i udno. Kpakara ele enyi i neebekwu i. Bekwu kpakara ele enyi aj n'otu n'otu.

Ọkwukwo izi Judu gbarụ Nhne gbasiri ọkwukwo izi ka

Judu gbarụ *Ọkwukwo izi Judu*, nọdo ele badnụ aka nụ nsnị gbasiri ele neezni nhne aghalaghala, ele karụ nụ be bụ ele kweru ekwe. Lele 2 *Pita*, Judu, n'ọkwukwo matị ka, naakwnagidne nye nọogwnu a, ọ naakaa be gba ọtna kwnornu ọkwnata mkpọma ke Chiokike nyernu ele ke a otu mgba be bīta.

Nhne zị n'ọkwukwo izi ka

Ọpanizo (1-2)

Ele neezni nhne aghalaghala (3-16)

Ezni ọ bīta ọkwnata mkpọma (17-23)

Ọjija zīnu Chiokike (24-25)

¹ Mawa, Judu, nye izi ke Jizosi Karaisi, nye bụ kwno nwene rukna Jemisi, naagbaznenu kpakara ele Chiokike sukwuru ọkwukwo, ele wu nụ rime ọwhnun'anya Chiokike Nda, ele Jizosi bītaru.

² Obirizi nū udno nū ọwhnun'anya banū anū ọba.

Ele neezni nhne aghalaghala

³ Ele me whnurnu n'anya, m neeyisi rikne naagbanū anū ọkwukwo gbasiri ọznohia ke a nwernu igwe nū rime a, ọ zī mkpa me gbanū anū ma anū yisi ẹhni naagba ọtna kwnornu nū ọkwnata ovu ke Chiokike nyernu ele ke a otu mgba be bīta.

⁴ Kwnornu nū agwna ele zá nọotu ogwnu Chiokike rībnanyarnu hne a máa n'esilawuru aī, ele naagbanwo izi oma ke oru Chiokike, ma be nwe oghere rnū ẹrnu ojo be, be gōnahoru Jizosi Karaisi Nyenwe aī nū eze aī. Ọkwukwo nsọ kwuru nhne gbasiri be agīda ige wheru ewhe nū be jaanahia ọmuma ikpe.

⁵ M neechenwanyanū anū nhne ka, ọ bụ n'ezī nū anū magwū kpakara nhne ka, nū Nyenwe aī dōhiaru ele Izireli n'eli Ijipiti, kọvu omekwo, gbu kpakara ele kwé ekwe.

⁶ Anū chenwanya ele enine izi ele bītala ọnodi be nū mbom, kọvu gharū ọnodi be, Chiokike tūru be ijigba tim tōm nū ọchichiri, bīta be dū n'okne ọbochi ikpe wam ọ jaama be ikpe.

⁷ Lele kpa Sodom nū Gomora nū kpakara ẹli gbarū be gburugburu, ele wu nū rime be ruru aruru-eli ke ome ọyi nū nhne zīla rīchna, be tarū be awhnūwhnu bẹkwnu noonwu tim tōm, ma be buri nhne ọdo aka nū nsnī nyee kpakara ele badnū.

⁸ Kpam masi, ele nọoro mboro ojo ka mehieru megidne anọ-ẹhni be, be ledna ọchi risi Chiokike anya, ele kajarū ele wu n'oligwe.

⁹ Ọ bụbedi nye risi ele enine izi Majkeli, nga ya nū Ekwensu nọdogbuta iznu Mozizi, nwé rikne kwu ọka ojo megidne Ekwensu, kọvu ọ karū, “Nyenwe aī bigbọ i.”

¹⁰ Kọvu ele ka naakaja nhne be máa, be nū lele rumu anọhia ojo, neeme nhne nọogwnu be, kpakara nhne ka joodoka be.

¹¹ Awhnūwhnu jaazīnu be. Be snornu apna Keni. Be kwnornu iwai dnabna nū mmehie Balam, be bụ ele risi rikne lele Kora, be joowhu etekne lele kpa Kora whuru.

¹² Ele ka nụ lele rune nụ iriri omekorita anụ, iwhnerne zá nọotu be o mee nhne ojo. Be nọoznu eñni be kpọi. Be nụ lele erumeru oligwe ruwhere neewhesa, be nwée rikne gweya mini ozuzo. Be nụ lele isisi mịla mkpuru, o bụbedi n'okochi, isisi be vnuṛnu hite nụ egwnugwu a, ke nwuṛnu onwu n'ezi.

¹³ Be nụ lele okne abaka-mini ke osimini, be nụ ẹnu iwhnerne be nọogbo okoto. Be nụ lele mbọ ghieru apna, ele Chiokike bıtannu oghere n'okne oçhichiri okwnukokwu.

¹⁴ O bụ Inoku, nye esau hite n'Adam, nye kwuru n'agida ige wheru ewhe, “Le, Nyenwe aı jaava, ya nụ agida ele nsọ a be jógwnuli onu,

¹⁵ o jeekpe kpakara ele badnụ ikpe, o jaama kpakara ele máa Chiokike ikpe, kwnornu kpakara aruru-eli be ruru, nụ kpakara oka ele mmehie ka máa Chiokike kwuru kwugidne a.”

¹⁶ Ka bụ ele zı naatakpo ntakpo, noobno ele berere nhne, be noosno nhne ojo ke nọogwu mkpoma be, be noovugnadna eñni be, naaznarnı ele badnụ ma be nwehıa nhne be pıoru.

Odo aka nụ nsnı nụ ezni

¹⁷ Ele me whnuṛnu n'anya, anụ chenwanya nhne ele izi Nyenwe aı Jizosi Karaısi kwuru.

¹⁸ Be kannu anu, “N'ige ipne-aznu, ele joomu anu rumu jaava, ele noosno nhne ojo ke nọogwu mkpoma máa Chiokike be.”

¹⁹ Ka bụ ele neegweya okewa, ele anọ-eñni neechi, ele nwée Enine Chiokike.

²⁰ Kọvu anu, ele me whnuṛnu n'anya, anu wulizọ eñni anu lele ọro hite nụ ntı-eli okwnata ovu anu ke zı nsọ. Anu kpe okpukpe nụ rikne Enine Nsọ.

²¹ Anu bıta eñni anu n'owhnu n'anya ke Chiokike, kpa anu noosno, neele anya obirizi ke Nyenwe aı Jizosi Karaısi jeenye anu nụ bıdnu kwó okwo.

²² Anu donu ele nwernu mkpoma lawuru obirizi.

²³ Anu znohia ele berere, dohia be lele ele hi nụ rime bekwu. Anu gweru ogwu donu ele berere obirizi. Kọvu anu sno o bụbedi iwo ke mmehie be gburu hite n'ernu anọ-eñni irno.

Ojja zınu Chiokike

²⁴ Chiokike bụ nye ke nwernu rikne o bıta anu ma anu gharu o dna, mee ma anu gwuzoru nwée ọru, nụ mkpoma oso n'onu nụ ruwhnu a zı igwugwu.

²⁵ Ya bụ Chiokike kpọi, Nye Oznohia aı, hite nụ Jizosi Karaısi Nyenwe aı, kpakara igwugwu, nụ dudugna, nụ rikne nụ oçhi risi zınu a, hite nụ mbom du kıtna, okwnukokwu. Amım.

Okpume Chiokike kpumennu Jōni Nhne gbasiri ọkwukwo ka

Okwukwo ka neegesi nhne Jōni whnurnu gbasiri izi Chiokike nū nhne Jizōsi Karaṣi mernu (1:2). Izi ka warū ngalaba ẹto. (1) Rikne ojo nọornu ẹnu n'owa, nye Karaṣi jaata awhnūwhnu, nwū masi. (2) Jizōsi bụ Nyenwe aṣ, o jeemegbu kpakara ele badnū nū kpakara rikne ke neemegidne Chiokike. (3) Chiokike nwernu ọgwo ẹnu ke ọ b̄tannu kpakara ele ke a, ele kwesiri be kwnata be mkpoma, ele dazigidnenu n'okwnata ovu be, ke kakwo ele nwurnu n'enu Nyenwe aṣ.

Ka b̄ izi ke nwernu olile anya nyee ele Karaṣi, ele tarū awhnūwhnu, nwū kwnornu okwnata mkpoma be nū Karaṣi. Okwukwo izi ka nookwu nū ọ b̄ n'ezī nū ọchichi aka rikne ele Rom zī naakpa rikne, kovu Nnwọ Atnurnu Chiokike nwe omegbu n'ipne-aznū. Ka mernu be buru ele kwesiri okwnata ovu dū n'enu.

Nhne zī n'okwukwo ka

Ọwhnurninya Jōni (1:1-8)

Nyenwe aṣ zī budnu (1:9-20)

Okwukwo izi ọgbako Chiokike ẹsau (2:1--3:22)

Okpukpe n'oligwe (4:1-11)

Okwukwo ke nwernu akara ẹsau (5:1--6:17)

Okpukpe nū ruwhnu ngadna eze Chiokike (7:1-17)

Okwodu ẹsau (8:1--11:19)

Agwọ nū anọhia lawuru wam (12:1--13:18)

Ikpe Chiokike nū ochekwa a (14:1--15:8)

Okiko ovu owe ẹhni Chiokike (16:1-21)

Be megburu ele irno Chiokike (17:1--20:10)

Ikpe ipne-aznū (20:11-15)

Oligwe ikne nū owa ikne (21:1-8)

Jeruselem ikne (21:9--22:6)

Karaṣi jaava wara wara (22:7-21)

¹ Okpume Jizōsi Karaṣi, ke Chiokike nyernu a, ma o gesi ele izi a nhne jeeme n'ige matī ke vazne, o zizne enine izi a o gesi nye izi a Jōni.

² Jōni gbarū akebbe ikwu-ọnu Chiokike nū akebbe Jizōsi Karaṣi, o kwuru kpakara nhne ọ whnurnu.

³ Nye ọwa ọma b̄ nye nọogwnu kpakara ikwu-ọnu ke okwukwo ọwhnurninya ka, nū ele nurnu be, b̄ta masi be, kwnornu nū ige zī ndundu.

Obekwu ikwu

⁴ Mawa, Jōni naagbaznenu ọgbako Chiokike ẹsau ke zī n'Esia okwukwo.

Oru nū udno ke Chiokike nye zī, nye zī nū mbom, nū nye ke jaava dazinu anū, hite n'aka enine ẹsau ke zī nū ruwhnu ngadna eze a,

⁵ ma n'aka Jizōsi Karaṣi, nye akebbe kwesiri be kwnata a mkpoma, nye mbom ke hi n'enu lizo, nye ke nechi ele eze k'owa.

Nye whnurnu aṣ n'anya, gweru ọvnarna a snusnama kpakara mmehie aṣ,

⁶ o mee aṣ a buru mbam ele ọkwa arjohna Chiokike a, nū Nda a, igwugwu nū rikne zinu a hite k̄t̄na dū n'ige kwó okwo. Amim.

⁷ Le, ọ vawa nū rime erumeru oligwe,

kpakara anya jṛowhnu a,
 ma ele dṛu a ara,
 kpakara ele zṛ n'ṛwa jaagbanṛ a mkpe.
 Owe! Amṛm.

⁸ “Mawa bṛ Alifa nṛ Omega,” bṛ nhne Nyenwe aṛ kwuru. “Mawa bṛ Opanizo nṛ Okwukwo, nye zṛ, nye zṛ nṛ mbṛm, nṛ nye jaava, Nye Meli Nhne Dum.”

Nye nṛ lele Nnwṛ ke Badnṛ

⁹ Mawa bṛ Jṛni, nye bṛ nnwṛ nda anṛ, nye sno anṛ nṛ rime awhnṛwhnu, a bṛ ele ḗli-eze a, a naagidne awhnṛwhnu. Be kwuznenu m nṛ rime ḗli ṛhia esilawṛu osimini ke Patimṛsi, kwnornu nṛ m kṛṛu m okwo ikwu-ṛnu Chiokike nṛ nhne Jizṛsi gbarṛ ama a.

¹⁰ M zṛ m nṛ rime Enine n'ṛbochi Nyenwe aṛ, m nṛnu m okne nkṛli n'aznṛ m ke dnarnṛ lele ṛkwodu.

¹¹ Nkṛli ka kaa, “Gbasṛ nhne ṛ whnṛnu n'ṛkwukwo, ziznenu a ṛgbako Chiokike ḗsau ka, ziznenu Efesṛsi, nṛ Sṛmaina, ziznenu Pegamṛsi, nṛ Tajira, ziznenu Sadisi, nṛ Filadefṛa, zizne masṛnu Laodisia.”

¹² M tṛhnasna ma m whnṛnu m nye nookwunu m ṛka. M whnṛnu m nhne be tṛkwasi tṛnji ḗsau be wṛu golu.

¹³ N'esilawṛu nhne be tṛkwasi tṛnji ḗsau wam gwuzo otu nye nṛ lele Nnwṛ ke Badnṛ. O wogwu iwo awura dṛu a ḗli ṛchi, o jṛ aṛnj sṛ nṛ mkṛṛoma a.

¹⁴ Risi a nṛ rukeri-ize a noonwu va-a-a lele wulu, naachna va-a-a lele mkṛṛu-mini, anya a nṛ lele riro bḗkwnu.

¹⁵ Ṛchi a lawṛu nṛ lele ṛla be gbarṛ bḗkwnu nṛ rime ite bḗkwnu, nkṛli a naadna lele agṛda mini.

¹⁶ O jṛ mbṛ ḗsau n'akarikwnunga a, ama-ṛgwnu nwernu ruwhnu lawṛu tṛga bṛko neehi n'ṛnu a nṛowhuya, ruwhnu a noonwu lele ḗnam n'esilawṛu iwhnehnie.

¹⁷ Nga me whnṛnu a, m dna n'ḗli n'ṛchi a lele nye nwṛnu ṛnu. Kṛvu ṛ tṛkwasiri m akarikwnunga a, kaa, “Ogwnu tṛko ṛ, mawa bṛ Nye Mbṛm nṛ Nye Ipne-aznṛ.

¹⁸ M zṛ m bṛdnu. M nwṛnu m ḗnu, kṛvu le, m zṛ m bṛdnu tim tṛm. M jṛ m snambj ḗnu nṛ ḗli rḗnu.

¹⁹ “Gbasṛ nhne ṛ whnṛnu n'ṛkwu-kwo, nhne zṛ kṛtna, nṛ nhne jeeme nṛ ruwhnu.

²⁰ Ka bṛ nhne miri emi ke mbṛ ḗsau wam ṛ whnṛnu n'akarikwnunga m, nṛ nhne be tṛkwasi tṛnji ḗsau wam be wṛu golu. Mbṛ ḗsau wam bṛ enine izi ṛgbako Chiokike ḗsau, nhne be tṛkwasi tṛnji ḗsau wam ṛ whnṛnu bṛ ṛgbako ḗsau.”

2

Izi ele Efesṛsi

¹ Gbaznenu enine izi ke ṛgbako Chiokike ke zṛ n'Efesṛsi ṛkwukwo: Hite n'ṛnu nye wam jṛ mbṛ ḗsau wam n'akarikwnunga a, nye neezne izne n'esilawṛu nhne be tṛkwasi tṛnji ḗsau wam.

² M magwṛ m nhne anṛ neeme. Anṛ nṛodogbu ḗhni anṛ n'ḗnu nṛ ṛsuta mkṛṛoma anṛ. Anṛ kwḗle o kwubnanya ele arṛu-ḗli, anṛ kṛarṛu ele kwuru ḗhni be ele izi iru, kṛvu be bṛo, anṛ whnṛ nṛ be bṛu ele aghalaghala.

³ Anṛ jiri ṛsuta mkṛṛoma nagidne awhnṛwhnu anṛ tarṛ kwnornu rḗwhna m, anṛ kwḗle rikne gwṛ anṛ.

⁴ Kọvu m nwernu m otu nhne megidne anụ, anụ zịma n'ọwhnun'anya lele kpa anụ neeme nụ mbom.

⁵ Anụ chenwanya hne anụ dnarnụ. Anụ hi nụ mmehie anụ tũhnasna, rnụ ẹrnu mbom anụ rnurnu. O bụru nụ anụ jootuhnasna hite nụ mmehie anụ, m jaavakwnusi anụ wara wara, gweme nhne be tũkwasi tonji anụ nụ hne o zi, okwolem ma anụ tũhnasnarnu.

⁶ Kọvu anụ nwernu otu nhne bụru oma, anụ sno ẹrnu ele Nikolata irno lele kpa me snornu a irno.

⁷ Nye nwernu nsni, o nurnu nhne Enine Nso naakanụ kpakara ogbako Chiokike. Nye megburu, m jeenye a rikne o ri mkpuru isisi ke budnu ke zi n'obna Chiokike.

Izi ele Sịmaina

⁸ Gbaznenu enine izi ke ogbako Chiokike ke zi nụ Sịmaina okwukwo: Hite n'onu nye wam bụ Nye Mbom nụ Nye Ipne-aznụ, nye nwurnu, ziri kwno budnu.

⁹ M magwu m awhnũwhnu anụ naata. M magwu m nụ anụ bụ ele mboni, kovu anụ bụ ele nwernu ekwnu k'agida. M magwu m oka ojo ele ka nụ be bụ ele Ju nookwugidne anụ, kovu be buo, be bụ ele oro ogbako Setani.

¹⁰ Ogwnu tũko anụ kwnornu awhnũwhnu anụ jaata. Le Setani jeeyisi agwna anụ n'ikelu ma be kpa anụ iru. Anụ jeenwe okpagbu nri obochi. Anụ bụru ele kwesiri okwnata mkpoma dũ n'ẹnwu, m jeenye anụ okpu-eze ke bụ budnu.

¹¹ Nye nwernu nsni, o nurnu nhne Enine Nso naakanụ kpakara ogbako Chiokike. Nye megburu, ẹnwu ke ẹbo jooḡbu a.

Izi ele Pegamọsi

¹² Gbaznenu enine izi ke ogbako Chiokike ke zi nụ Pegamọsi okwukwo:

Hite n'onu nye wam nwernu ama-ogwnu ke nwernu ruwhnu lawuru zi buko.

¹³ M magwu m hne anụ wu bụ hne ngadna Setani zi. Anụ jidnesiri ẹwhna m rikne, anụ tũwhule okwnata mkpoma anụ nụ hne me zi, o bũbedi nga be gburu Antipasi nye akebne m nye kwesiri okwnata mkpoma n'esilawuru anụ hne Setani wu.

¹⁴ Kọvu m nwernu m nhne ele nụ ele megidne anụ. Agwna ele noosno iznizni Balam nye znirni Balakị kpa o jeeme rụmu Izireli mmehie hite n'ori nhne be jiri kwanụ ẹnwu ariohna nụ hite n'ome oyi.

¹⁵ Agwna ele noosno iznizni ele Nikolata zi masi n'esilawuru anụ.

¹⁶ Anụ hi nụ mmehie tũhnasna, o buo kpa, m jaavakwnusi anụ wara wara, gweru ama-ogwnu hi n'onu m whuya lusi ele ka ogwnu.

¹⁷ Nye nwernu nsni, o nurnu nhne Enine Nso naakanụ kpakara ogbako Chiokike. Nye megburu, m jeenye a agwna mana ke tugwaru otugwa. M jeenye masi a otu akaworugwu abochna ke be gbakwasiri ẹwhna ikne n'olu a, o za nye berere marnu a, okwolem nye wam naharu a.

Izi ele Taịtira

¹⁸ Gbaznenu enine izi ke ogbako Chiokike ke zi nụ Taịtira okwukwo: Ka bụ nhne Nnwọ Chiokike kwuru, nye wam anya a lawuru nụ lele bekwnu, nye ochi a lawuru noonwu lele ọla chnarnu achna.

¹⁹ M magwu m nhne anụ neeme. M magwu m ọwhnun'anya anụ, nụ okwnata mkpoma anụ, nụ izi anụ, nụ ọsnuta mkpoma anụ. M magwu m masi nụ ẹrnu anụ kịta kakwo ke mbom.

²⁰ Kòvụ m nwernu otu nhne megidne anụ. Anụ gharuru nwerinya wam bụ Jezibeli n'esilawuru anụ. Nwerinya ka kwuru ẹhni a nye owhnurninya Chiokike, neezni ele izi m kpa be mee ọyi, nụ o ri nhne be jiri kwa renwu, nooduhie ele badnụ.

²¹ M nyernu m a ige ma ọ tūhnasna nụ mmehie ome ọyi, o kwéle.

²² Le, m jootubna n'okpata ya nụ ele ọyi a, be jaata awhnwhnu k'agida, okwolem ma be tūhnasnarnu hite nụ nhne ojo be mụhiaru n'aka a.

²³ M joogbu rụmu a, ma kpakara ọgbako Chiokike mahia nụ mawa bụ nye wam noonyosna mkpoma nụ echiche ke rụmu badnụ. M jookwuhnasi nye ọbula lele kpa ẹrnu a jiri ziri.

²⁴ Kòvụ agwna anụ gwnarnụ nụ Taịtira, ele snóge iznizni ojo ka, ele máa nhne be nookwu nhne tugwaru otugwa ke Setani, m jéenyé anụ ivu rụna berere.

²⁵ Kòvụ anụ jidnesi rikne nhne anụ ji tem m va.

²⁶ Nye megburu, bita ikwu-ọnu m dụ okwukwo, m jeenye a rikne hne kpakara mba zi.

²⁷ O jeeji mkpara rugwe neechi be,
ọ jẹliwa be lele kpa be liwa itechi,

²⁸ lele kpa me nahiaru iknerna n'aka Nda m. M jeenye a mbọ ọsisi.

²⁹ Nye nwernu nsnị, ọ nurnu nhne Enine Nso naakanụ kpakara ọgbako Chiokike.

3

Izi ele Sadisi

¹ Gbaznenu enine izi ke ọgbako Chiokike ke zi Sadisi okwukwo: Ka bụ nhne nye wam ji enine ẹsau Chiokike n'aka a, nụ mbọ ẹsau. M magwụ m nhne anụ neeme. M magwụ m nụ anụ nwernu rẹwhna nụ anụ zi bụdnu, kòvụ anụ nwurnu ọnwu.

² Anụ tnenya, jikwasi nhne ke gwnarnụ matị ọ nwụ rikne, kwnornu nụ m whnúge m ẹrnu anụ ke zuru ozu nụ ruwhnu Chiokike m.

³ Anụ chenwanya nhne anụ nahiaru, ke anụ nurnu, anụ mee be. Anụ hi nụ mmehie anụ tūhnasna. Ọ bụru nụ anụ jéetnenya, m jaavakwnusi anụ lele nye buznu, anụ jáamahia ige me jaava.

⁴ Kòvụ anụ nwernu badnụ ele nụ ele nụ Sadisi ele mérula awura be. Be joowo awura abọchna snornu m zne izne kwnornu nụ be kwesiri.

⁵ Nye megburu kpa, be joowote a awura abọchna, m jóokwome rẹwhna a n'okwukwo ke bụdnu. M jookwuhia rẹwhna a nụ ruwhnu Nda m ya nụ ruwhnu ele enine izi a.

⁶ Nye nwernu nsnị, ọ nurnu nhne Enine Nso naakanụ kpakara ọgbako Chiokike.

Izi ele Filadefia

⁷ Gbaznenu enine izi ke ọgbako Chiokike ke zi nụ Filadefia okwukwo: Ka bụ nhne nye wam zi nso nụ nye ezi ọka kwuru, nye jigwu snambị Devidi, nye ọ bụru nụ ọ gbama ọnhna, ọ zá nye nwernu rikne ọ gbasni a, nye gbasni ọnhna, ọ zá nye nwernu rikne ọ gbama a.

⁸ M magwụ m nhne anụ neeme. Le, m gbamannu m anụ ọnhna ke ọ zá nye nwernu rikne gbasni, kwnornu nụ anụ nwernu iknerna matị, kòvụ anụ bítaru ikwu-ọnu m, anụ gónahorula rẹwhna m.

⁹ Anụ ọowhnu nhne me jeeme ele ọro ọgbako Setani, ele ka nụ be bụ ele Ju, kọvu be bụo, be bụ ele aghalaghala, m jeeme be va dna n'ẹli n'ọchi anụ, be jaamahia nụ m whnuru m anụ n'anya.

¹⁰ Kwnornu nụ anụ bítaru ikwu-ọnu m, snuta ovu, m jaabita masi anụ n'ige ọrnuna ke jaadnakwasị kpakara ọwa, ọ rna ele wu n'ọwa ọrnuna.

¹¹ Le, m vawa wara wara, anụ jidnesi nhne anụ ji rikne, ọ zị nye berere nahoru anụ okpu-eze anụ.

¹² Nye megburu, m jeeme a nsusnu Ọro Nsọ Chiokike m. O jéehi nụ rime a whoga berere. M jaagbakwasị rẹwhna Chiokike m n'olu a, ya nụ rẹwhna ọhna ikne Chiokike m, ke bụ Jerusalem ikne, ke hi n'oligwe n'aka Chiokike m hiedna. M jaagbakwasị a rẹwhna ikne m n'olu a.

¹³ Nye nwernu nsị, ọ nuru nhne Enine Nsọ naakanụ kpakara ọgbako Chiokike.

Izi ele Laodisia

¹⁴ Gbaznenu enine izi ke ọgbako Chiokike ke zị nụ Laodisia ọkwukwo: Ka bụ nhne Amim kwuru, nye akebne kwesiri be kwnata a mkpoma nụ nye ezi ọka, nye nẹchi kpakara nhne Chiokike keru.

¹⁵ M magwu m nhne anụ neeme. Anụ kpéle bẹkwnu, anụ jila iyi. Ọ ọoburu oma nụ anụ kperu bẹkwnu mọbu nụ anụ jiri iyi.

¹⁶ Kọvu kwnornu nụ anụ zị marna marna, anụ kpéle bẹkwnu, anụ jila iyi, m ọogbohala anụ n'ọnu m.

¹⁷ Anụ kwuru, “M baru m eze, m nwernu m ẹkwnu, ọ zá nhne naara m,” kọvu nụ anụ máa nụ anụ bụ ele ọowhnuji anya, nụ ele be kwesiri ọ ọnu obirizi, ele mboni, ele isni nụ ele gba ẹto.

¹⁸ Me zni anụ ezni, anụ zunahoru m golu be snuru, ma anụ nwernu ẹkwnu, nụ awura abochna, ma anụ kpusni ẹto anụ gbagwu, tna ẹgwnumisi n'anya anụ ma anụ whnuru ọsno.

¹⁹ M neebigbo kpakara ele me whnuru n'anya, naapnia masi be nhne. Anụ gbalị tūnasna, hi nụ mmehie whuya.

²⁰ Le, m gwuzogwu m n'ọnuhna, nooznu aka. Nye ọbula ke nuru nkoli m, gbama ọnuhna, m jaabnazne n'oro a, snornu a ri wiri, ya snornu m masi ri wiri.

²¹ Nye megburu, m jeenye a rikne o snornu m daziri ẹli nụ ngadna eze m, lele kpa me megburu, m snornu Nda m daziri ẹli nụ ngadna eze a.

²² Nye nwernu nsị, ọ nuru nhne Enine Nsọ naakanụ kpakara ọgbako Chiokike.

4

Ngadna eze ke zị n'oligwe

¹ Nga nhne ka mekworu, m whnuru m, le, otu ọnuhna gbamarnu n'oligwe. Nkoli wam me nuru nụ mboni ke dnarnu lele ọkwodu karu, “Vaa hna, m jeegesi i nhne jeemeriri nụ ruwhnu.”

² Ngangam, m zị m n'Enine, m whnuru m nụ rime oligwe otu ngadna eze nụ nye dazị n'olu a.

³ Nye wam dazị nụ ngadna eze wam, ruwhnu a noogbu marna marna lele akaworugwu jasipa nụ sadisi, eke nụ egwurugwu hnirni ngadna eze wam gburugburu ke naachna lele emiradi.

⁴ Nri ngadna eze lawuru nụ ẹno berere gbaru ngadna eze wam gburugburu, ele okno badnu nri lawuru nụ ẹno dazị n'olu ngadna eze berere wam woru awura abochna, kpuru okpu-eze golu nụ risi be.

⁵ Amụma nụ egbe oligwe nụ ọdida hi nụ ngadna eze wam naadna. Tọnji ẹsaw zi nụ ruwhnu ngadna eze wam noonwu bẹkwnu, ke bụ enine ẹsaw wam Chiokike.

⁶ Osimiri nụ lele nyo nọowhnu ọsno zi nụ ruwhnu ngadna eze wam.

N'esilawuru ngadna eze wam ya nụ gburugburu a bụ nhne ẹno zi bụdnu bụ anya anya ruwhnu nụ aznụ zi.

⁷ Nhne ke mbom nụ lele odum, ke ẹbo nụ lele nnwọ ehni, ke ẹto nwernu ruwhnu lele ruwhnu badnụ, ke ẹno nụ lele igno neewhe ewhe.

⁸ Nhne zi bụdnu ẹno wam, ke ọbula nwernu aka-nkwu isunu, kpakara ẹhni be bụ anya anya. Be kpúsni ọnu be iwhehnie nụ abali, be nọogwmu eri naakaa,

“Nsọ, nsọ, nsọ

bụ Nyenwe aị Chiokike ke Meli Nhne Dum,

Nye zi nụ mbom, nye zi kịta, nye jaava.”

⁹ Kpa nhne wam zi bụdnu zi neenye a igwugwu nụ ọson'anya, nọotunu nye wam dazigwu nụ ngadna eze wam mmamma, nye zi bụdnu ọkwukokwnu,

¹⁰ ele okno badnụ nri lawuru nụ ẹno wam dna n'eli nụ ruwhnu nye wam dazigwu nụ ngadna eze, kpọ risi ẹli nụ ruwhnu nye wam zi bụdnu ọkwukokwnu. Be túbita okpu-eze be nụ ruwhnu ngadna eze wam, kaa,

¹¹ “I bụ nye kwesiri, Nyenwe aị Chiokike,

ọ nahọru igwugwu nụ ọson'anya, nụ iknerna,

kwnornu nụ ọ bụ j'wa keru kpakara nhne hite nụ echiche i,

ji nyernu be bụdnu.”

5

Okwukwo nụ Nnwọ Atnurnu wam

¹ M whnurnu m otu ọkwukwo n'akarikwnunga nye wam dazị nụ ngadna eze wam, be gbarụ a nhne ruwhnu nụ aznụ, be kasiri a akara ẹsaw.

² M whnurnu m otu enine izi nwernu rikne ji okno nkọli neesi okokoba, naakaa, “Ndaa nye kwesiri ọ gbaji akara ẹsaw wam nụ o kpume ọkwukwo wam?”

³ Kọvu ọ zá nye be whnurnu n'oligwe nụ ọwa mọbu nụ mkpururu ọwa, bụ nye kwesiri o kpume ọkwukwo wam mọbu lebna anya nụ rime a.

⁴ M kwna ẹkwna k'agida kwnornu nụ ọ zá nye be whnurnu kwesiri o kpume ọkwukwo wam mọbu lebna anya nụ rime a.

⁵ Otu nụ rime ele okno badnụ wam kanụ m, “I kwnáma ẹkwna, le, Odum ke ẹbnurnu Juda,* Mgbaregwnugwu Devidi,† o megbulem, o nwernu rikne o kpume ọkwukwo wam, nụ ọ tọma akara ẹsaw wam.”

⁶ Ige wam m whnurnu m otu Nnwọ Atnurnu gwuzo n'esilawuru ngadna eze wam, ma nụ esilawuru nhne ẹno wam zi bụdnu ya nụ ele okno badnụ wam, lele nụ be gburu a ogbu. O nwernu mfu ẹsaw, nụ anya ẹsaw ke bụ enine ẹsaw wam Chiokike, ke o zihalaru nụ rime kpakara ọwa.

⁷ Nnwọ Atnurnu wam zne nahọru nye wam dazị nụ ngadna eze wam ọkwukwo n'akarikwnunga a.

⁸ Nga ọ nahọruru a ọkwukwo wam, nhne ẹno wam zi bụdnu nụ ele okno badnụ nri lawuru nụ ẹno wam dna n'eli nụ ruwhnu Nnwọ Atnurnu wam, kpakara be ji ọbo be n'aka, ya nụ obele golu ke isensi jihiaru, ke bụ okpukpe ele nsọ.

⁹ Be gwnụ eri ikne,

* 5:5 Odum ke ẹbnurnu Juda Jenesis 49:9 † 5:5 Mgbaregwnugwu Devidi Azaya 11:1, 10

"I kwesiri ọ nahọru ọkwukwo wam,
nụ ọ tọma akara a,

kwnornu nù be gburu i,

i gweru ọvna nà nà i gbahja ele ke Chiokike

hite nù kpakara ẹbnurnu, nù ikwu-ọnu, hite nù mba nù ele badnù.

10 I mernu be buru mbam ele ọkwa arịohna, ke jeekpenu Chiokike,
be jọobu ele eze nẹechi ọwa."

11 M le anya, m nurnu m nkọli agida enine izi gbaru ngadna eze wam
gburugburu, nù nhne ẹno wam zì budnu nù ele okno badnù, pokwu nù
pokwu nù pokwu ndasi, nù pokwu ndasi nù ndasi.

12 Be nọogwnu eri nù okno nkọli, naakaa,

"Nnwọ Atnurnu wam be gburu kwesiri

ọ nahọru rikne, nù ẹkwnu nù akoniche, nù iknernema

nù ọson'anya nù igwugwu, nù ọznarni."

13 M nurnu m hne kpakara nhne zì budnu zì n'oligwe, n'ọwa, nù mkpururu
ọwa, kpakara nhne zì budnu ke zì n'okno osimini nù kpakara nhne zì nù rime
be, naakaa,

"Ọznarni nù ọson'anya nù igwugwu nù rikne zinu

nye wam dazì nù ngadna eze, ya nù Nnwọ Atnurnu wam tim tọm."

14 Nhne ẹno wam zì budnu, kaa, "Amim." Ele okno badnù wam dna n'ẹli,
kpọnu Chiokike nù Nnwọ Atnurnu risi ẹli.

6

Akara ẹsau wam

1 M whnurnu m nga Nnwọ Atnurnu wam tọmarnu akara ke mbọm. Otu nhne
zì budnu ẹno wam jì nkọli dnarnù lele egbe oligwe kaa, "Vaa."

2 M le anya, le otu iyinya rịchna, nye gbagwu a jì otu mgbata, be nyee a okpu-
eze, ọ whọga nọolugbu, neemegbu.

3 Nnwọ Atnurnu wam tọma akara ke ẹbo, m nurnu m nhne ẹno wam zì budnu
ke ẹbo, naakaa, "Vaa."

4 Le, iyinya berere naachna ihie ihie, be nyernu nye gbagwu a rikne o
gweme udno n'ọwa, mee ele badnù noogbu ibne be, be nyernu a ama-ogwnu
hna ezi.

5 Nga Nnwọ Atnurnu wam tọmarnu akara ke ẹto, m nurnu m hne nhne ẹno
wam zì budnu ẹto karu, "Vaa." M le anya whnù iyinya neeji riji, nye gbagwu a
jì nhne be nọotu nhne n'aka a.

6 M nurnu m nkọli n'esilawuru nhne ẹno wam zì budnu, naakaa, "Otu ntutu
ikpa wheti bụ ọgwo ẹnu otu ọbochi, ntutu ikpa balì ẹto ọgwo ẹnu otu ọbochi.
Kọvu anù lulu mọno olivu nù manya vaiñi!"

7 Nnwọ Atnurnu wam tọma akara k'ẹno, m nurnu m nkọli nhne zì budnu
k'ẹno karu, "Vaa."

8 M le anya, otu iyinya ogbu-nu-orio, rẹwhna nye dazì n'olu a bụ Ẹnwu, Ẹli
Rẹnwu sno a n'aznù. Be nyernu a rikne hne otu nga nù nga ẹno ke ọwa zì, ma
o gweru ama-ogwnu nù ọkwunyo gbu be, ma nrịria ojo nù ojo anọhia ke ọwa.

9 Nnwọ Atnurnu wam tọmarnu akara ke isne, m whnurnu m mkpuru ovu
kpakara ele be gburu kwnornu ikwu-ọnu Chiokike nù ama be gbaru nù
mkpururu ojo arịohna.

10 Be jì okne nkọli neesi okokoba, naakaa, "Nyenwe aì zì nsọ, ì bụ ezi, dọ
ngele, hne ì jeekpe ele zì n'ọwa ikpe, megwahja ọvna nà aì?"

¹¹ Be nyernu nye obula nū rime be iwo awura abochna, be kanu be, be zukwaru inwe ige mati, tem onu ogwnugwnu ele izi ibne be nū rumu nda be, ele be joogbu zute.

¹² Nnwọ Atnurnu wam tomarnu akara ke isunu, okne eli otne enye dnarnu, ehnam ji riji lele ikpe mkpe, enwa chna ihie ihie lele ovnarna.

¹³ Mbọ hi n'oligwe naadna n'owa lele ike isisi be kwu figi chna achna naadna nga ruwhere neewhe.

¹⁴ Be piakota oligwe lele okwukwo, rugwu nū eli ohia esilawuru whoga n'onodi be.

¹⁵ Ele eze ke owa nū ele dikne, ele nechi ele ogwnu ele baru eze, ele dimkpa, nye obula, ma ohi ma nye nwernu ehi a, tugwa nū rime ogba nū iketa rugwu.

¹⁶ Be kanu rugwu kwu nū rugwu mati, "Dnagidne a, kpusni a n'anya nye wam dazi nū ngadna eze, ya nū ovu owe ehi Nnwọ Atnurnu wam.

¹⁷ Kwnornu nū okne obochi ovu owe ehi be valəm. Nyele joogwuzoli?"

7

Be karu 144,000 ele badnu akara

¹ Nga nhne ka whemernu, m whnurnu m enine izi eno gwuzo nū ngeri eno ke owa, knernu ruwhere k'owa n'aka, ma ruwhere gharu o whe n'owa, ma n'osimini mọbu n'olu isisi obula.

² M whnurnu m enine izi berere hi n'obosi ehnam noowhuya, o ji akara Chiokike ke zi budnu n'aka a, o ji okne nkoli naakanu ele enine izi eno wam Chiokike nyernu rikne o lulu owa nū osimini,

³ kaa, "Anu lulu owa, mọbu osimini, mọbu isisi, tem a ka ele izi Chiokike akara n'egedege ruwhnu be."

⁴ M nurnu m onu ogwnugwnu ele be karu akara n'egedege ruwhnu be, be bu otu riwhu nū nri eno nū pokwu eno, hite nū kpakara eburnu Izireli.

⁵ Be bu hite nū eburnu Juda, nri nū pokwu lawuru, eburnu Rubeni, nri nū pokwu lawuru, eburnu Gad, nri nū pokwu lawuru,

⁶ hite nū eburnu Asa, nri nū pokwu lawuru, eburnu Nafitali, nri nū pokwu lawuru, eburnu Manase, nri nū pokwu lawuru,

⁷ hite nū eburnu Simoni, nri nū pokwu lawuru, eburnu Livai, nri nū pokwu lawuru, eburnu Isaka, nri nū pokwu lawuru,

⁸ hite nū eburnu Zebuloni, nri nū pokwu lawuru, eburnu Josefu, nri nū pokwu lawuru, eburnu Benjamini, nri nū pokwu lawuru.

Igbudu ele badnu wam

⁹ Nga nhne ka mekworu, m le anya whnu igbudu badnu o za nye nwernu rikne gwnuli onu. Be hi nū kpakara mba nū eburnu, nū eli, nū ikwu-onu va, be gwuzoru nū ruwhnu ngadna eze nū nū ruwhnu Nnwọ Atnurnu wam, be wo awura abochna, be ji masi igwugwu bukwa n'aka be.

¹⁰ Be ji okne nkoli naakaa,
"Oznohia a hi n'aka Chiokike,
nye dazi nū ngadna eze,
ya nū Nnwọ Atnurnu."

¹¹ Kpakara ele enine izi gwuzo gba ngadna eze wam gburugburu nū ele okno badnu wam nū nhne eno wam zi budnu, dna kpute ruwhnu n'eli nū ruwhnu ngadna eze wam, kponu Chiokike risi eli.

¹² Be kaa,
"Amim! Ngozi nū igwugwu
nū akoniche, nū otu mmamma nū oson'anya

nụ rikne nụ iknernema
zịnu Chiokike dụ ọkwukokwunu.

Amim.”

¹³ Otu nye okno badnụ sịkwa m, “Ele ka wogwu iwo awura abọchna be bụ ele ke ele? Ndaa hne be hi va?”

¹⁴ M sa a, “Nda-ai-kwu, m máam, jị magwụ.”

Ọ kanụ m, “Ele ka bụ ele hiri n’okne mmekpehni wam whụya, be snurnu iwo be, mee be ziri rịchna nụ rime ọvnarna Nnwọ Atnurnu wam.

¹⁵ Kam kpayarụ,

be jiri gwuzoru nụ ruwhnu ngadna eze Chiokike,
be jeekpenu a iwhehnie nụ abalị nụ rime Ọro Nsọ a.

Nye wam dazị nụ ngadna eze jaagbasa ọro-ẹka a, be wuru nụ rime a.

¹⁶ Wiri jógwunu be berere,
akpịri jókpo be bẹkwu berere,

ẹhnam jóomu kwno be berere,
whuruhuru ẹhni jéeme kwno be berere.

¹⁷ Kwnornu nụ Nnwọ Atnurnu nye ke zị n’esilawuru ngadna eze wam jọbu nye nọoznu be lele atnurnu.

O joodu be zne nụ risi mini ke bụdnu,
Chiokike jookwnosnama anya-mini ẹkwana n’anya be.”

8

Akara ke ẹsau

¹ Nga Nnwọ Atnurnu wam kpumernu akara ke ẹsau, oligwe dnarnụ bii dụ ichichi awa.

² M whnurnu m enine izi ẹsau ele gwuzo nụ ruwhnu Chiokike, be nyernu be ọkwodu ẹsau.

³ Enine izi berere ke jigwu nhne isensi golu varụ gwuzoru nụ ruwhnu ojo arịohna, be nyernu a agịda isensi, o gweru a yikota nụ okpukpe ele nsọ Chiokike, gweru a kwa arịohna n’olu ojo arịohna golu ke zị nụ ruwhnu ngadna eze wam.

⁴ Rwnurnu isensi wam nụ okpukpe ele nsọ Chiokike lizọ nụ ruwhnu Chiokike hite n’aka enine izi wam.

⁵ Enine izi wam gweru nhne isensi wam gharụ bẹkwu n’ojo arịohna, ghasa a nụ rime ọwa. Agịda egbe oligwe nụ ọdidna nụ amụma nụ ẹli otne enye dnarnụ.

Ọkwodu ẹsau wam

⁶ Enine izi ẹsau wam jị ọkwodu ẹsau jiknernu ọ gbụ be.

⁷ Enine izi ke mbom gbụ ọkwodu a, mkpuru mini nụ bẹkwu gwaru ọvnarna wusa n’ọwa, otu-ibewa nụ nga ẹto ke ọwa rne bẹkwu, otu-ibewa nụ nga ẹto ke isisi nụ kpakara achara bụdnu rneru bẹkwu.

⁸ Enine izi ke ẹbo gbụ ọkwodu a, be túbna nhne nụ lele rugwu okpotokpo neerne bẹkwu nụ rime osimini, otu-ibewa nụ nga ẹto ke osimini ghọ ọvnarna.

⁹ Otu-ibewa nụ nga ẹto ke nhne zị bụdnu nụ rime osimini nwụma, otu-ibewa nụ nga ẹto ke ọgbo mini kpu.

¹⁰ Enine izi ke ẹto gbụ ọkwodu a. Otu okne mbọ hi n’oligwe dna, noonwu lele tọnji dnakwasị otu-ibewa nụ nga ẹto mini, ma nụ risi mini.

¹¹ Rẹwhna mbọ wam bụ Nlulu. Otu-ibewa nụ nga ẹto mini noolu nlulu, agịda ele badnụ nwurnu kwnornu nụ be nwornu mini wam.

¹² Enine izi ke ẹno gbụ ọkwodu a. Be lulu otu-ibewa nū nga ẹto ẹhnam, nū otu-ibewa nū nga ẹto ẹnwa, nū otu-ibewa nū nga ẹto mbo, ke kpayarū otu-ibewa nū nga ẹto iwhe be zīma noonwu, otu-ibewa nū nga ẹto ke ọbochi nwée iwhe ya nū otu-ibewa nū nga ẹto ke abali.

¹³ M leru m anya, m nūnu m otu igno neewhe n'esilawuru oligwe, gweru okne nkoli neesi okokoba, "Awhnūwhnu! Awhnūwhnu! Awhnūwhnu zīnu kpakara ele wu n'owa nga be jōnu ọdidna ọkwodu ke ele enine izi ẹto ke gwnarnū jōogbu."

9

¹ Enine izi ke isne gbụ ọkwodu a. M whnūnu m otu mbo hiri n'oligwe dna n'owa, be nyee a snambī ọnuhna olulu awhnūwhnu.

² Mbo wam tūma ọnuhna olulu awhnūwhnu, rūnwurnu hi nū rime a whūya nū lele rūnwurnu hi n'okne ite bẹkwu, iwhe ẹhnam nū ruwhere gbarū ọchichiri kwnornu rūnwurnu hi n'olulu awhnūwhnu wam whūya.

³ Igwurube hi nū rūnwurnu wam whūya n'olu ọwa, be nyernu be rikne lele akpi ke ọwa.

⁴ Be kanū be, be lulu achara mōbu isisi, mōbu achara būdnu berere, kovu be gba nye ọbula ke nwée akara Chiokike n'egedege ruwhnu a.

⁵ Igwurube wam nwée rikne o gbu be, kovu be ta be awhnūwhnu ẹnwa isne. Nhne igbugbu be nū lele nye akpi gbarū.

⁶ N'ẹnwa isne ka, ele badnū ka joopio ẹnwu joogbu be, kovu be jōowhnu ẹnwu, ẹnwu jōogwnu be, kovu ẹnwu jaagba ẹso.

⁷ Igwurube wam nū lele iyinya jiknernu o zne ọgwu, be kpu nhne nū lele okpu-eze golu nū risi be, ruwhnu be nū lele ruwhnu badnū.

⁸ Rukeru-ize risi be nū lele rukeri-ize nyerinya, ize be nū lele ize odum.

⁹ Mbno mkpoma be nū lele mbno rugwe, ọdidna aka-nkwu be naadna lele ọgo-ẹli agida iyinya nōodopnu neezne ọgwu.

¹⁰ Ọdnu be nū lele akpi, be nwernu nhne ọgbuga n'odnu be, nwe masiri rikne n'odnu ọ kpakna ele badnū ẹhni ẹnwa isne.

¹¹ Be nwernu eze neechi be, nye bụ enine izi olulu awhnūwhnu. Nye rewhna a n'ọnu Hiburu bụ Abadoni, n'ọnu Giriki, Apoloni, ke bụ nye noolulu nhne.

¹² Nhne awhnūwhnu ke mbom kwolem, nhne awhnūwhnu lawuru berere wawa.

¹³ Enine izi ke isunu gbụ ọkwodu a, m nūnu m otu nkoli hi n'ahnio nū ngeri ẹno ke ojo arjohna golu wam bụ ke gwuzo nū ruwhnu Chiokike whūya.

¹⁴ Nkoli wam kanū enine izi ke isunu wam ke gburu ọkwodu, "Sigbasi enine izi ẹno wam ke be knernū eriri n'okne Osimini Uferetisi."

¹⁵ Be sigbasi enine izi ẹno wam, ke be jiknernernu n'otnu-ige ka n'ọbochi ka, nū ẹnwa ka, n'awha ka o gbu otu-ibewa nū nga ẹto ke kpakara ele badnū.

¹⁶ M nūnu m ọnu ọgwugwnu ele ọgwu gba iyinya bụ riwhu pokwu ndasi lawuru.

¹⁷ Nū rime ọwhnurninya wam, m whnūnu m iyinya nū ele naagba be, be nwernu mbno mkpoma naachna ihie ihie lele bẹkwu, lele jasinti, nū rugwu bẹkwu, risi iyinya wam nū lele risi odum, bẹkwu nū rūnwurnu nū rugwu bẹkwu neehi n'ọnu be nōowhuya.

¹⁸ Bẹkwu nū rūnwurnu nū rugwu bẹkwu ke hi n'ọnu iyinya wam nōowhuya gburu otu-ibewa nū nga ẹto ke ele badnū.

¹⁹ Kwnornu nū iknernema be hi n'ọnu be ya nū ọdnu be. Ọdnu be nū lele agwo, ke be ji risi be neemeru ele badnū ẹhni.

²⁰ Ele badnụ gwnarnụ ke nhne igbugbu ka gbúle, kwéle ọ sigbasi nhne aka be t̄uru, be kwéle ọ sigbasi o kpenu r̄umu r̄enwu ojo, n̄u r̄enwu golu n̄u ke siliva, n̄u ọla n̄u akaworugwu n̄u ke isisi, ke zá n̄oqwhnu ọsno, zá n̄onu nhne, zá neeze izne.

²¹ Ele badnụ wam t̄uhnasnana hite n̄u ogbu badnụ be, n̄u amusu be neeri, n̄u ome ọyi be, m̄obu n̄u buznu be nooznu.

10

Enine izi n̄u

okwukwo mat̄i

¹ Omekwo, m wh̄n̄rnu m enine izi berere ke nwernu rikne hi n'oligwe hiedna. O wogwu erumeru oligwe, eke n̄u egwurugwu z̄i n'olu risi a, ruwhnu a noonwu lele ẹhn̄a, ọchi a law̄uru n̄u lele n̄sn̄snu ọro b̄ekw̄nu.

² O ji otu ọkwukwo mat̄i be kpumernu okpume n'aka a. O b̄ita ọchikwunga a n'osimini, ọchirita a n'olu ẹli.

³ O ji okne nk̄oli si l̄ulo lele hne odum neebigb̄o, nga o sikworu okokoba, egbe oligwe ẹsau wam gba n'ọsisa.

⁴ Nga egbe oligwe ẹsau wam gbakworu, m pioru m ọ gba n'okwukwo, m n̄rnu m otu nk̄oli hiri n'oligwe naakan̄u m, “K̄pusnime nhne egbe oligwe ẹsau wam kwuru, i gbá be n'okwukwo.”

⁵ Enine izi wam me wh̄n̄rnu gwuzo n'osimini n̄u n'olu ẹli, gwelizo akarikwnunga a olu.

⁶ O gweru nye wam z̄i ọkw̄nukokw̄nu d̄u risi, b̄u nye keru oligwe n̄u kpakara nhne z̄i n̄u rime a, n̄u ọwa n̄u kpakara nhne z̄i n̄u rime a, n̄u osimini n̄u kpakara nhne z̄i n̄u rime a. Enine izi wam kar̄u, “Ige kwolem.

⁷ K̄ovu nga enine izi ke ẹsau j̄oogbu ọkwodu a, nhne tugwaru otugwa ke Chiokike jeemezu, lele kpa o kwuru hite n'ọnu ele izi a, b̄u ele ọwh̄n̄urninya.”

⁸ Nk̄oli wam me n̄rnu hi n'oligwe nookwunu m ọka, kwukwnonu m ọka berere, ọ kaa, “Zne, gweru ọkwukwo mat̄i wam be kpumernu okpume ke z̄i n'aka enine izi wam gwuzo n'osimini n'olu ẹli.”

⁹ M znekwnusi enine izi wam, kan̄u a o nyee m ọkwukwo mat̄i wam. O kaa, “Gweru a, ri a, o joolu nlulu n̄u r̄uwh̄o i, k̄ovu ọ j̄ooso n'ọnu i lele m̄ono ebeka.”

¹⁰ M gweru ọkwukwo wam n'aka a, ri a, ọ n̄u lele m̄ono ebeka n'ọnu m, k̄ovu kpa me rikworu a, o mernu r̄uwh̄o m lu nlulu.

¹¹ O kan̄u m, “I j̄ookpo okwo ikwu-ọnu Chiokike ka berere n̄u ruwhnu aḡida ele badn̄u, n̄u mba z̄i ọdo n'ọdo, n'ikwu-ọnu z̄i ọdo n'ọdo, ma n̄u ruwhnu ele eze.”

11

Ele akebne law̄uru

¹ Be nyernu m otu isisi lele nhne be ji n̄ot̄u nhne, be kan̄u m, “Lizo, t̄u Ọro Nso Chiokike, n̄u ojo ar̄iohna, gwn̄u ele n̄ookpo risi ẹli n̄u rime a.

² K̄ovu i t̄u n'ederezi, kwn̄ornu be nyernu a ele b̄uo ele Ju, ele j̄ozodna ẹli-ohna ns̄o wam nri ẹnwa ẹno n̄u ẹnwa law̄uru.

³ M jeezizne ele akebne m law̄uru, be j̄oowo iwo mkpe z̄ni izi ọma otu pokwu ọbochi n̄u riwh̄u ọbochi law̄uru n̄u nri isunu.”

⁴ Ka b̄u isisi olivu law̄uru wam n̄u nhne be b̄ita t̄on̄ji law̄uru wam gwuzo n̄u ruwhnu Nyenwe ọwa.

⁵ Nye irno ọbula ke pioru ọ kpakna be ẹhni, b̄ekw̄nu hi n'ọnu be jeernegbu be. Nye ọbula ke kpaknarn̄u be ẹhni j̄onwuriri k̄pam.

⁶ Ele ka nwernu rikne o knesni oligwe, ke mernu mini ozuzo zóle kpakara ige be n'okpo okwo ikwu-ọnu Chiokike, be nwernu rikne o mee kpakara mini ghọ ọnarna, n'ụ rikne o mee ele zị n'ọwa rịa ẹhni igbugbu ọbula lele kpa be piuru.

⁷ Nga be gbasakworu ikwu-ọnu Chiokike, anọhia wam hi n'ụ olulu awn'ụwhnu, l'usi be ogwnu, megbu be, gbu be.

⁸ Iznu be joovubi n'esilawuru apna okne ẹli-ọhna wam be nookwu n'elulu Sodom n'ụ Ijipiti, hne be kpogburu Nyenwe be n'olu ọgba.

⁹ Kpakara ele badn'ụ, n'ụ ẹbnurnu, n'ụ ikwu-ọnu, n'ụ mba zị ọdo n'odo, jeelekiri iznu be ọbuchi ẹto n'ichichi, be jéekwe be li be.

¹⁰ Kpakara ele zị n'ọwa joonwudna, mkpoma sọ be n'ọnu kwnornu n'ụ be nwurnu, be neeziznenu ibne be nkesi kwnornu ele ọwhnurninya lawuru ka nwurnu ọnwu b'ụ ele mernu ele zị n'ọwa ta awn'ụwhnu k'agida.

¹¹ Nga ọbuchi ẹto n'ichichi whemernu, enine b'udnu hiri n'ụ Chiokike bnazne n'ụ rime be, be gwuzoru, okne ogwnu t'uru kpakara ele whnurnu be.

¹² Ele ọwhnurninya lawuru wam nurnu otu nk'oli hiri n'oligwe noosukwu be, "An'ụ va n'olu hna." Be lizọ, la n'olu n'erumeru oligwe, kpa ele irno be neelekiri be.

¹³ N'ige wam, okne ẹli otne enye dnarn'ụ n'ọwa, ke mernu otu nga n'ụ nri nga ẹli-ọhna wam lulu, ẹli otne enye wam gburu pokwu badn'ụ ẹsau, ogwnu t'uru ele ke gwnarn'ụ, be znarn'ụ Chiokike ke oligwe.

¹⁴ Nhne awn'ụwhnu ke ẹbo whemernu, k'ovu le, nhne awn'ụwhnu ke ẹto vawa wara wara.

Okwodu ke ẹsau

¹⁵ Enine izi ke ẹsau gb'ụ okwodu a, agida nk'oli dnarn'ụ n'oligwe, naakaa, "Eli-eze k'ọwa ka gh'olam ẹli-eze ke Nyenwe a'ị n'ụ ke Kara'isi, ọ jaach'ị hite n'ige kw'ó okwo d'ụ n'ige kw'ó okwo."

¹⁶ Nri ele okno badn'ụ lawuru wam n'ụ ẹno ele daz'ị n'ụ ngadna eze be n'ụ ruwhnu Chiokike, dna kpu ruwhnu n'ẹli, kp'onu Chiokike risi ẹli.

¹⁷ Be kaa,

"A n'ọtunu ị mmamma, Nyenwe a'ị Chiokike ke Meli Nhne Dum,
nye z'ị, nye z'ị n'ụ mb'om,
kwnornu n'ụ i j'ị okne iknernema ị n'ẹchi.

¹⁸ Ovu neewe ele z'ị n'ọwa ẹhni, kwnornu n'ụ ọnuma ị val'em,

ige ị jeekpe ele nwurnu ọnwu ikpe val'em,
n'ụ ige ị j'okwu ele izi ị, ele ọwhnurninya ị ọgwo ẹrnu
n'ụ kpakara ele ke ị, n'ụ ele n'ọtutu ogwnu ị
ma nye kwu n'ụ nye mat'ị,
n'ụ ige o lulu ele luluru ọwa."

¹⁹ Be ghamarn'ụ Oro Nsọ Chiokike n'oligwe, be whnurnu Igbe Ọgba-Njọ-Ẹhni Chiokike n'ụ rime a, agida am'uma, n'ụ ọdidna, n'ụ egbe oligwe, n'ụ ẹli otne enye, n'ụ okne mkpuru mini dnarn'ụ.

12

Nwerinya wam n'ụ okne agwo wam

¹ Otu okne nhne ndu-ẹhni mernu n'oligwe. Otu nwerinya wogwu iwo ẹhnam, nye ẹnwa z'ị n'ụ mkpururu ọchi a, o kpu okpu-eze nwernu nri n'ụ mb'ọ lawuru n'ụ risi.

² Nwerinya wam z'ị rime, rime ọmumu nnw'ọ neeme a, ọ kwna ẹkwna kpa ọ n'ọmu nnw'ọ.

³ Nhne ndu-ẹhni berere whụya kwno n'oligwe, otu agwọ okpotokpo ihie ke nwernu risi ẹsau nụ nri mfu, kpu okpu-eze ẹsau nụ risi ẹsau a.

⁴ O ji ọdnu a ọpuru otu-ibewa nga ẹto mbọ ke oligwe ọdnda be n'owa, o zne gwuzoru nụ ruwhnu nwerinya wam nọomu nnwọ ma o ri nnwọ wam wara wara ọ mhiaru a.

⁵ Nwerinya wam mụhia nnwọ rukna, nye jeeji mkpara rugwe nẹchi kpakara mba, kọvu be kwumernu nnwọ wam, kwuznenu a Chiokike nụ ngadna eze a.

⁶ Nwerinya wam gbawhu, gbadna nụ rime ẹli-ikpa, hne Chiokike ọtannu a, ma be lekasi a anya pokwu ọbochi nụ riwhu ọbochi lawuru nụ nri isunu.

⁷ Ọgwnu dna n'oligwe, Maikeleli nụ ele enine izi a lụ ọgwnu megidne agwọ wam, agwọ wam nụ ele enine izi a lụ ọgwnu megidne be.

⁸ Kọvu Maikeleli nụ ele enine izi a megburu agwọ wam, oghere zimana agwọ wam nụ ele enine izi a n'oligwe berere.

⁹ Be ọdnda agwọ okpotokpo wam, ke bu agwọ ọknani wam bu Ekwensu mọbu Setani n'owa, nye nooduwu kpakara ele zi n'owa. Be ọdndarnu ya nụ kpakara ele izi a.

¹⁰ Ige wam, m nurnu m otu okne nkoli n'oligwe, kaa,
“Ọznohia valẹm, nụ rikne nụ ẹli-eze Chiokike aị,
nụ iknernema Karaisi a,

kwnornu nụ be ọdndarnu nye noobno rumu nda aị nhne,
bu nye noobno be nhne nụ ruwhnu Chiokike iwhehnie nụ abali.

¹¹ Be jiri ọvnarna Nnwọ Atunru wam
nụ akebe be gbaru
megbu a,

be whnuna budnu be n'anya
du n'enwu.

¹² Kam kpararu, oligwe nwudnahoru,
ovu ọso anụ n'onu ele wu nụ rime a.

Kọvu awhnwhnu zinu ọwa nụ osimini,
kwnornu nụ Ekwensu vakwnusilem anụ,
onuma jiri a mkpoma,
kwnornu nụ ọ magwu nụ ige a zi ichichi.”

¹³ Nga agwọ wam whnurnu nụ be ọdndarnu a n'owa, o bete ọ ọchi nwerinya wam ẹso bu nye murnu nnwọ rukna wam.

¹⁴ Be nyee nwerinya wam aka-nkwu lawuru ke okne igno ma o wheru iwhe zne hne o wu n'eli-ikpa, hne be jeelekasi a anya awha ẹto nụ ẹnwa isunu hne agwọ wam bọ ọ whnuna a.

¹⁵ Agwọ wam gbuhia agida onu-mini a gbasno nwerinya wam, ma o vuru nwerinya wam.

¹⁶ Kọvu ẹli yinnu nwerinya wam aka, kpumernu onu a, nwokwo mini agwọ wam gbuhiaru n'onu a.

¹⁷ Agwọ wam we ovu ẹhni k'agida megidne nwerinya wam, o zne nọolusi agwna rumu nwerinya wam ke gwnarnu ọgwnu, bu ele ọtaru nhne Chiokike nyernu n'iwu, nụ ele kwesiri ọknata ovu n'ezi ọka Jizosi gesiri.

¹⁸ Agwọ wam gwuzoru n'olu rizza ke osimini.

13

Anohia lawuru

¹ M whnurnu m otu anohia hi nụ rime osimini nọowhuya, o nwernu nri mfu nụ risi ẹsau, o kpu okpu-eze n'olu mfu a, be gbakwasiri n'olu kpakara risi a rẹwhna ojo nookwulu Chiokike.

² Anohia me whnuru nu lele agwu, ochi a lawuru nu lele anohia bea, onu a nu lele onu odum. Agwo wam nyee anohia wam rikne a, ngadna eze a nu okne iknernema.

³ O nu lele nu be gburu otu risi anohia wam, kovu nhne omernu ehni wam ke nwernu rikne o vuya enwu gworu, o tu kpakara owa n'anya, be gbasornu anohia wam.

⁴ Be kponu agwo wam risi eli ke nyernu anohia wam iknernema a, be kpo masinu anohia wam risi eli, naakaa, "Nyele nu lele anohia ka? Nyele nwernu rikne o lusi a ogwu?"

⁵ Be nyernu anohia wam rikne o ji nookwu agida nhne zi ogwu nu oka oju nookwulu Chiokike, o nwernu rikne nri enwa eno nu enwa lawuru.

⁶ Anohia wam kpume onu a nookwulu Chiokike, nu rewhna a, nu Oro Nso a, nu kpakara ele wu n'oligwe.

⁷ Be nyernu a rikne o lusi ele nso ogwu nu o megbu be, be nyee kwono a rikne megidne kpakara avnuru nu ele badnu nu ikwu-onu nu mba.

⁸ Kpakara ele wu n'owa jokponu a risi eli, ele be gbala rewhna be nu rime okwukwo budnu ke Nnwot Aturu nye be gburu hite n'okike owa.

⁹ Nye nwernu nsi, o nuru.

¹⁰ Nye obula be jodoru n'ogwu
be jodoru a n'ogwu.

Nye obula be jeeji ama-ogwu gbu,
be jeeji ama-ogwu gbu a.

Ele nso jeenwe okwnata ovu nu ndidi.

¹¹ M whnu anohia berere hi n'eli nowhuya. O nwernu mfu lawuru lele mfu nnwot aturu, o nookwu oka lele agwo.

¹² O ji rikne anohia mbom wam nu ruwhnu a. O mernu kpakara owa nu ele zi nu rime a kponu anohia mbom wam risi eli, nye be gworu nhne omernu ehni wam ke noovuya enwu.

¹³ Anohia ke ebo ka ru enu rikne, o mernu bekwnu hi n'oligwe dna n'owa n'anya ele badnu.

¹⁴ O duhie kpakara ele wu n'owa kwnornu ernu ndu-ehni ka ke be nyernu a rikne o ru nu ruwhnu anohia ke mbom. O kanu ele zi n'owa be kpu igbudu anohia wam ke be jiri ama-ogwu mernu ehni, kovu o zi budnu.

¹⁵ Be nyernu anohia ke ebo wam rikne o nwesi inwe budnu nu rime igbudu anohia mbom wam, ke kpayaru igbudu wam nookwu oka, kaa be noogbu kpakara ele kwela o kponu igbudu wam risi eli.

¹⁶ O mee kpakara ele badnu ma nye matu ma nye kwu, nye baru eze nu nye mboni, ohi nu nye buo ohi, be naru akara nu akarikwnunga be mobu n'egedege ruwhnu be.

¹⁷ O za nye nwernu rikne zu nhne mobu re nhne, okwolem nye nwernu akara anohia wam ke bu rewhna anohia wam, mobu ogwnugwu rewhna a.

¹⁸ Nye obula nwehia akoniche, nye obula ke nwernu ogwnugwu risi, o mahia ogwnugwu anohia wam, kwnornu nu o bu ogwnugwu badnu, ogwnugwu a bu riwhu isunu nu nri isunu nu isunu [666].

14

Nnwot Aturu nu ele ke a

¹ M leru m anya, whnu Nnwot Aturu gwuzo n'olu rugwu Zayoni, ya nu otu riwhu nu nri eno nu pokwu eno ele badnu, be vu rewhna a nu rewhna Nda a n'egedege ruwhnu be.

² M nurnu m otu nkoli hi n'oligwe dna lele agida mini, nu okne nkoli egbe oligwe, m nurnu m ele naagba obo ji obo be naagba.

³ Be gwnu eri ikne nu ruwhnu ngadna eze wam, ma nu ruwhnu nhne eno wam zi budnu, nu ele okno badnu wam. O za nye nwernu rikne sno be gwnu eri wam, okwolem otu riwhu nu nri eno nu pokwu eno wam ele be gbahiaru n'owa.

⁴ Ka bu ele merula ehni be n'ehni nyerinya kwnornu nu be bitaru ehni be snam. Be joosno Nnwọ Aturnu wam penupe obula o neezne, be gbahiaru be n'esilawuru ele badnu lele mkpuru mbom be kesiri Chiokike nu Nnwọ Aturnu a.

⁵ O za aghalaghala be whnurnu n'onu be, be zi snam.

Ele enine izi eto

⁶ M whnurnu m enine izi berere neewhe n'oligwe, nọokpo okwo izi oma ke zi okwnukokwuu n'owa, ma kpakara ele mba, nu avnurnu nu ikwu-onu nu ele badnu nurnu a.

⁷ O ji okne nkoli naakaa, "Anu tu ogwnu Chiokike, anu znarni ebube a, kwnornu nu ige valeu o jeekpe kpakara badnu ikpe, anu kponu nye keru oligwe, nu owa, nu osimini, nu kpakara risi mini risi eli."

⁸ Enine izi ke ebo snornu ke mbom kaa, "O dnanam, Babiloni dnanam, okne mba ke mernu kpakara eli nwọ manya okne ome oyi a."

⁹ Enine izi ke eto snornu be gweru okne nkoli kaa, "Nye obula ke kponnu anohia wam nu igbudu a risi eli, nahoru masi akara a n'egedege ruwhnu a, mọbu n'aka a,

¹⁰ o joonwo manya okne ovu owe ehni Chiokike, ke o wusaru nu rikne, ke be gwala agwa nu rime okiko onuma a, be jeeji bekwnu nu rugwu bekwnu ta a awnhuwhnu nu ruwhnu ele enine izi nsọ nu ruwhnu Nnwọ Aturnu wam.

¹¹ Rwnurnu awnhuwhnu be zi naala olu okwnukokwuu, be za noozukwa inwe iwhnehnie nu abali, bu ele wam kponnu anohia wam nu igbudu a risi eli, nu nye obula ke nahiaru akara rehwna a."

¹² Ele nsọ jeenwe ndidi, ele naabita nhne Chiokike nyernu n'iwu nu ele kwnataru Jizosi mkpoma.

¹³ Nga wam m nurnu m nkoli hiri n'oligwe kaa, "Gba n'okwukwo, owa oma zinu ele nwurnu nu rime Chiokike hite nu kitna."

Enine Nso kaa, "Owe, be joozukwa inwe n'ernu be, kwnornu nu ernu be joosno be n'aznu."

Ogwe nhne n'ekwu ke owa

¹⁴ M le anya, whnu, otu erumeru abochna, otu nye nu lele Nnwọ ke Badnu dazi n'olu erumeru wam, o kpu okpu-eze golu nu risi a, o ji ama ekwu zi buko n'aka a.

¹⁵ Enine izi berere hi nu rime Oro Nso whuya, gweru okne nkoli kanu nye wam dazi n'erumeru, "Gweru ama i, gweru nhne n'ekwu, kwnornu nu ige o gwe nhne n'ekwu k'owa valeu, mkpuru k'owa chnanam."

¹⁶ Nye wam dazi n'erumeru gweru ama a yisi nu rime owa, gweru nhne ekwu k'owa.

¹⁷ M whnurnu m enine izi berere hi n'Oro Nso n'oligwe, o ji masi ama zi buko.

¹⁸ Enine izi berere ke nwernu rikne megidine bekwnu, hi n'oyo arjohna whuya. O gweru okne nkoli kanu enine izi wam ji ama zi buko, "Gweru ama i ghohia mkpuru vaji ke ekwu, kwnornu nu vaji ke owa chnanam."

¹⁹ Enine izi wam yisi ama a, ghohia mkpuru vaji, tubna be nu rime hne be joozosna manya okne ovu owe ehni Chiokike.

²⁰ Be zọsna manya vai ni wam n'aznụ ẹli-ọhna, ọvna a gbahia nụ hne be nọzosna manya wam dụ nhne nụ lele riwhu maịli lawuru, dụ oknesni ọnu iyinya n'olu.

15

Nhne awnụwhnu ẹsau

¹ M whnụ nhne berere n'oligwe, okne nhne ndu-ehni. Enine izi ẹsau vu nhne awnụwhnu ẹsau ke ipne-aznụ, okne ovu owe ẹhni Chiokike ke ipne-aznụ zị nụ rime be.

² M whnụ kwno nhne nụ lele osimini nyno be gwaru bẹkwnu, nụ ele wam megburu anọhia wam nụ igbudu a nụ ọnu ogwnugwnu rẹwhna a, hne be gwuzo nụ ngeri osimini nyno wam, be jì ọbo Chiokike nyernu be.

³ Be nọogwnu eri Mozizi nye izi Chiokike nụ eri Nnwọ Atnuru wam, “Ernu jì tų n'anya, zị masị rikne!

Nyenwe aị Chiokike ke Meli Nhne Dum,
Kpakara apna jì sniri asị bụru ezi ọka,
Eze zị ọkwukokwnu.

⁴ Nyele jọotu ogwnu i, Nyenwe aị?

Nyele jọokwhia igwugwu ke rẹwhna jì?

Kwnornu nụ jì nụ nsunu jì zị nsọ,
kpakara mba jaava kpọ risi ẹli nụ ruwhnu i,
kwnornu nụ ikpe bụru ọma jì zuru kpakara ọwa.”

⁵ Nga ka mekworu, m whnụ Ọro Nsọ Chiokike n'oligwe gbamarnu bụ Ọro-Èka ruwhnu Chiokike.

⁶ Enine izi ẹsau wam vu nhne awnụwhnu ẹsau hi nụ rime Ọro Nsọ wam whuya, be wogwu iwo noonwu onwu, be jì ajnị mkpoma golu kne nụ mkpoma be.

⁷ Otu nhne zị bụdnu wam nyega enine izi ẹsau wam obele ẹsau okne ovu owe ẹhni Chiokike jihiaru nụ rime be, bụ nye zị bụdnu ọkwukokwnu.

⁸ Rnurnu jihia Ọro Nsọ wam hite n'igwugwu nụ iknema Chiokike, ọ zá nye nwernu rikne ọ bna Ọro Nsọ wam tem awnụwhnu ẹsau wam enine izi ẹsau wam vuyaru kwome.

16

Obele ẹsau ovu owe ẹhni

Chiokike

¹ Ige wam, m nurnu m otu okne nkọli hi n'Ọro Nsọ wam naakanu enine izi ẹsau wam, “Anu zne wusa obele ẹsau ovu owe ẹhni Chiokike n'ọwa.”

² Enine izi ke mbom zne wusa obele a n'ọwa, esuso ẹhni tų ogwnu noogbu igbugbu se kpakara ele vu akara anọhia wam n'ehni, nụ kpakara ele kpọnu igbudu wam risi n'ẹli.

³ Enine izi ke ẹbo zne wusa obele a n'osimini, ọ ghọ ọvna nụ lele ọvna nye nwurnu ọnu, kpakara nhne zị bụdnu nụ rime osimini nwukwo.

⁴ Enine izi ke ẹto zne wusa obele a nụ mini nụ kpakara risi mini, be ghọ ọvna.

⁵ M nurnu m nga enine izi ke neelegidne mini karu,

“Jì bụ nye mee mma n'ikpe
jì bụ nye zị, nye zị nụ mbom, Nye zị Nsọ,
kwnornu nụ i kperu ikpe nụ kpa.

⁶ Be wusaru ọvna ele nsọ jì nụ ele ọwhnurninya jì,
i nyee be ọvna be nwọ lele mini,
kwnornu nụ be kwesiri a.”

⁷ M nurnu m otu nkoli hi n'oyo ariohna naakaa,
 "Owe! Nyenwe aị Chiokike ke Meli Nhne Dum,
 ikpe i buru oma, bu masi ezi oka."

⁸ Enine izi ke eno zne wusa obele a n'ehnam, o neerne ele badnu lele bekwnu.

⁹ Okne okpe bekwnu rne ele badnu, be kosna rewhna Chiokike nye nwernu rikne nu hne awhnuwhnu ka zi. Kovu be kwéle o tuhnaasna nu mmehie be znarni Chiokike.

¹⁰ Enine izi ke isne zne wusa obele a n'olu ngadna eze anohia wam. Okne ochichiri gbasni eli-eze anohia wam, ele badnu naatabi riro be kwnornu nhne igbugbu.

¹¹ Be kosna Chiokike ke oligwe kwnornu nhne igbugbu be nu nhne mernu ehni be. Kovu be kwéle o tuhnaasna nu apna ojo be.

¹² Enine izi ke isunu zne wusa obele a n'okne Osimini Uferetisi, mini a takwo, kpa mini a takworu, apna ele eze hi n'obosi ehnam whuya. *

¹³ M whnu renwu eto zila richna lele redokpo, hi n'onu agwo wam, nu onu anohia wam, nu onu nye owhnurninya aghalaghala wam noowhuya.

¹⁴ Be bu renwu ojo nonu ernu ndu-ehni. Renwu eto ka znekwnusi ele eze owa, chikota be n'otu kwnornu ogwnu okne obochi Chiokike ke Meli Nhne Dum.

¹⁵ Le, m jaava lele nye buznu, ngozi zinu nye obula neese nse, bikwata iwo a, o zi kpa o gbaru eto zneghari, iwhnerne tu a n'ohna.

¹⁶ Renwu ojo wam chikota kpakara eze nu hne ele Hiburu nookwu Amgidoni.

¹⁷ Enine izi ke esau zne wusa obele a nu ruwhere. Otu okne nkoli hi nu ngadna eze zi n'Oro Nso wam, kaa, "Be menem a."

¹⁸ Agida amuma oligwe, nu odidna, nu egbe oligwe nu okne eli otne enye dnarnu, eli otne enye nu kpm zigelele hite nga Chiokike kpuru badnu. Eli otne enye ka kakwo ibne a.

¹⁹ Eli-ohna kwu wam kewamarnu nga eto, eli-ohna kpakara mba luluru. Chiokike chenwanya Babiloni, mee a o nwọ manya hi n'ikiko okne ovu owe ehni a.

²⁰ Kpakara eli ohia esilawuru nu rugwu gbawhu, whume.

²¹ Okne mkpuru mini nenyi rinya † naadnakwasị ele badnu hite n'oligwe. Ele badnu noovu Chiokike onu kwnornu mkpuru mini wam, nu kwnornu awhnuwhnu wam zi ogwnu ke agida.

17

Nwerinya nu anohia

¹ Otu nu rime ele enine izi esau wam vu obele esau vakwnusi m kaa, "Vaa, me gesi i awhnuwhnu okne nye ewhere wam ke dazi n'olu agida mini,

² nye ele eze ke owa snornu mee oyi, ele zi n'owa nwornu manya ewhere a."

³ Enine izi wam vuru m'Enine zne nu rime eli-ikpa, hne me whurnu otu nwerinya dazi n'olu anohia naachna ihie ihie. Anohia wam nwernu agida rewhna ojo nookwulu Chiokike be gbakwasiri a, o nwernu risi esau, nu nri mfu.

⁴ Nwerinya wam wogwu iwo odno odno nu ihie ihie, o jiri nhne eyi golu nu rugwu okne onu ahia nu pali mee ehni a mma, o ji ikiko golu n'aka a, nhne ruru onu nu nhne zila richna ke ome oyi a jihiaru nu rime a.

* **16:12** Nga apna wam whuyaru, ele irno be whurnu oghere bnanya lusi be ogwnu. † **16:21** Mkpuru mini wam nenyi nu nhne otutu 50 kg.

⁵ Be gbakwasiri a otu rewhna n'egedege ruwhnu,

Nhne miri emi,

okne Babiloni,

nne kpakara ele ewhere

nụ nhne ruru ọru ke ọwa.

⁶ Ọvna ele nsọ nụ ele be gburu kwnornu Jizọsi noogbu a lele manya.

Ọ gbarụ m anya aghari nga me whnurnu a.

⁷ Enine izi wam kanu m, “Ndaa kpa o jiri naagba i anya ghari? M jaakanu i nhne tugwaru otugwa gbasiri nwerinya ka nụ anohia ke vu a, bu anohia ke nwernu risi esau nụ nri mfu.

⁸ Anohia ke i whnurnu zi budnu nụ mbom, kovu o nwurnu, o jeehi n'olulu awhnwuhnu whuya zne n'enwu a. Kpakara ele wu n'owa ele be gbala rewhna be n'okwukwo ke budnu hite n'okike ọwa, o jootu be n'anya nga be whnurnu anohia wam zi budnu nụ mbom, kovu o nwurnu, o jaazi kwno budnu.

⁹ “A kwesiri o nwe ovu ke nwernu akoniche, risi esau wam bu rugwu mati esau ke nwerinya wam dazi n'olu a. Be bu masi ele eze esau,

¹⁰ isne dnanam, otu neechi koriri, otu ya vage. Nga o varu, o jaadazi ige mati.

¹¹ Anohia wam zi budnu nụ mbom, ke nwurnu, bu eze ke esato, nye zi nesilawuru eze esau wam, jaala n'iyi.

¹² “Nri mfu wam i whnurnu bu masi nri eze ele ya vage echi, kovu be jeenye be rikne otu otnu-ige lele eze snornu anohia wam chi.

¹³ Be nwernu otu mkpoma, be jeenye anohia wam iknernema nụ rikne be.

¹⁴ Ele ka jolusi Nnwọ Atnurnu wam ogwnu, kovu Nnwọ Atnurnu wam jeemegbu be, kwnornu nụ o bu Nyenwe ke kakwo ele nwe nụ Eze kakwo ele eze. Ele sno a bu ele o sukwuru, ele o hohiaru nụ ele kwesiri okwnata ovu.”

¹⁵ Ọ kanu m, “Mini ke i whnurnu hne nwerinya ewhere wam dazi, bu ele badnu, nụ agida ele badnu, nụ mba nụ ikwu-onu zi odo n'odo.

¹⁶ Anohia wam nụ nri mfu wam i whnurnu joosno nwerinya ewhere wam irno, be jaanahoru a kpakara nhne o nwernu, gbata a eto, be jeeri ano-ehni a, kporne a nụ bekwnu.

¹⁷ Kwnornu nụ Chiokike yisiri a nụ mkpoma be, ma be mee echiche a, be jeekwerikota o nyee anohia wam eli-eze be, o jaachi be tem Chiokike mezu ikwu-onu a.

¹⁸ Nwerinya wam i whnurnu bu okne eli-ohna wam ke neechi kpakara ele eze ke ọwa.”

18

Odudna Babiloni

¹ Nga nhne ka mekworu, m whnurnu m enine izi berere hi n'oligwe neehidna, o nwernu okne iknernema, ogbu marna marna ruwhnu a neenye iwhne n'owa.

² O gweru okne nkoli siwama, kaa,

“O dnanam, okne Babiloni dnanam,

o ghulam hne rumu renwu ojo wu,

oro ikelu kpakara renwu zila richna,

kpakara onunu ojo ke be ri eri zi nụ rime a.

³ Kwnornu nụ kpakara mba

nwornu manya okne ome oyi a,

ele eze ke ọwa snornu a mee oyi,

ele noozu ahia ke ọwa baru eze hite nụ okne ewhere a.”

⁴ M nụ kwno okne nkoli hi n'oligwe kaa,

“Ele ke m, anu hi nesilawuru a whuya,

o zi anu snornu a kehia igwe nu mmehie a,
o zi anu snornu a ta awnwhnu.

⁵ Kwnornu nu mmehie a gwuzo du oligwe,
Chiokike chenwyalam kpakara mmehie a.

⁶ Anu mesno a lele kpa o mernu anu,
anu mesno a mgba lawuru kpa o mernu,
okiko o gbajiri, anu gbajite a mgba lawuru ma o nwornu.

⁷ Anu ta a awnwhnu nu anya-mini
lele kpa o nyernu ehni a igwugwu nu egwnurnu ojo a,
kwnornu nu o karu nu mkpoma a,
'M bu m eze nyerinya, m bu la m nnwerne nwée nzi,
m jaagba mkpe.'

⁸ Kam kparyu, n'otu obochi, o jowhnuji anya,
enu, mkpe, nu oknuyo,
bekwnu jeernegbu a,

kwnornu nu Nyenwe a Chiokike ke neekpe a ikpe bu dikne.

⁹ "Nga ele eze ke owa ele snornu a mee oyi, n'egwnurnu ojo a, jowhnu
runwurnu bekwnu a, be jaakwna ekwna, gbanu a mkpe.

¹⁰ Be joogwuzo nu hne zi ikere kwnornu ogwnu awnwhnu a, kaa,
'Chei, chei, okne eli-ohna,
Babiloni, bu dikne,

Chiokike taru i awnwhnu n'otu otnu-ige.'

¹¹ "Ele noozu ahia ke owa jaakwanu a ekwna, gbanu a mkpe, kwnornu nu o
za nye noozu kwno mgwna ahia be berere.

¹² Be bu ele noozu ahia golu, siliva, rugwu okne onu ahia, pali, iwo marnu
mma, iwo naachna odno odno, siliki nu iwo naachna ihie ihie, isisi obula,
nhne obula be jiri ize eni kpu, nhne obula be jiri isisi zi okne onu ahia pnio, ola,
rugwe, rugwu mabulu,

¹³ nu sinamoni, nu nhne nwernu eknarna, isensi, maa, franki-isensi, nu
manya, nu monu olivu, nu ikpa nu wheti, nu anohia, nu aturnu, nu iyinya,
nu ogbo-eli iyinya nodopnu, nu ohi, ma mkpuru ovu badnu masi.

¹⁴ "Be kaa, 'Nhne i pioru whnunahuru i, kpakara ekwnu i nu ebube i whuru
etekne, i jeenwe kwno be berere.'

¹⁵ Ele noozu ahia, ele baru eze kwnornu nu be neere nhne ka, joogwuzo
nu hne zi ikere, ogwnu notu be kwnornu awnwhnu a, be naakwna ekwna,
gba masi mkpe.

¹⁶ Be jeesiwama okokoba, kaa,
'Chei, chei, eli-ohna kwu,

ke jiri iwo marnu mma odno odno nu ihie ihie,
nu golu noogbu marna marna, nu akaworugwu okne onu ahia nu pali mee
ehni a mma.

¹⁷ Agida ekwnu hna kpa whuru etekne n'otu otnu-ige.'

"Kpakara ele nookwo ogbo mini nu ele ji ogbo mini neezne, nu ele enu mini,
nu kpakara ele nhne be jiri wuru budnu hi nu mini whuya, joogwuzo nu hne
zi ikere.

¹⁸ Nga be jowhnu runwurnu bekwnu a, be jaakaa, 'O zi eli ke nu lele okne
eli-ohna ka?'

¹⁹ Be jowukwasi retnu nu risi be, kwana ekwna, gba mkpe, kaa,
'Chei, chei, okne eli-ohna,

hne kpakara ele nwernu ogbo mini
baru eze hite n'ekwnu a,
n'otu otnu-ige hne o ko tubiri etekne.

²⁰ Ovu sọ ị n'ọnu, sụ oligwe,
ele nsọ nụ ele izi nụ ele ọwhnurninya snornu anụ nwụdna,
Chiokike kperu a ikpe kwnornu nhne o mernu anụ.' ”

²¹ Otu enine izi gbasiri rikne gweru otu akaworugwu hna lele okne rugwu
ogwe wiri tũbna nụ rime osimini, kaa,
“Ọ bụ kpa be jeeji nhne rikne
kwnadna okne ẹli-ọhna Babìloni,
ọ zà nye jọowhnu a berere.

²² Be jọonu kwno eri, mọbu ọbo, opi,
mọbu ọkwodu nụ rime i berere,
nye ọbula ke nwernu nka ẹrnu
jáazị nụ rime i berere,
ọ zà nye jọonu ọdidna ogwe wiri
nụ rime i berere.

²³ Tọnji jọonwuma
nụ rime i berere,
akpịri nye nọolu nnwerne ikne nụ nye nọogbo nzi ikne,
jáazịma nụ rime i berere,
kwnornu nụ ele nọozu ahia ị bụ ele dikne ke ọwa,
i jiri amusu i duwhu kpakara mba.

²⁴ Be piohjaru nụ rime a ọvnarna ele ọwhnurninya nụ ọvnarna ele nsọ,
nụ kpakara ele be gburu ogbu nụ rime ọwa.”

19

¹ Nga nhne ele ka whemernu, m nurnu m nhne nụ lele okne nkọli igbudu
badnụ n'oligwe, naakaa,
“Aleluya,

ọznohia, nụ igwugwu nụ rikne bụ ke Chiokike aị,
² kwnornu nụ ikpe a bụru ọma nụ ezi ọka,
ọ marnụ nwerinya okne ewhere wam ikpe
nye jiri ome ọyi a meru ọwa,
o megwnahalam ọvnarna ele nsọ a n'aka a.”

³ Berere kwno be siwama, kaa,
“Aleluya,

rụnwurnu bẹkwnu a naala olu dụ ọkwnukokwnu.”

⁴ Ele okno badnụ nri lawuru nụ ẹno nụ nhne ẹno wam zị bụdnu wam dna
n'eli kpọ risi ẹli nụ ruwhnu Chiokike nye dazị nụ ngadna eze. Be kaa,
“Amịm, Aleluya.”

*Olulu nnwerne
ke Nnwọ Aturumu*

⁵ Otu nkọli hiri nụ ngadna eze wam whụya kaa,
“Znarnị Chiokike aị,
anụ ele izi a,
anụ ele nọotu ogwnu a,
ma nye matị ma nye kwu.”

⁶ M nurnu m nhne nụ lele nkọli igbudu badnụ lele ọdidna agịda mini, lele
okne egbe oligwe, naakaa,
“Aleluya,

Nyenwe aị Chiokike ke Meli Nhne Dum nẹechi.

⁷ Ngwa ma a nwụdna, ovu sọ aị n'ọnu,
a nyee a igwugwu,
kwnornu nụ ọlulu nnwerne ke Nnwọ Aturumu wam valẹm,

nnwerne a jiknernunem ẹhni a.

⁸ Be nyernu nnwerne a iwo abọchna, zị rịchna, noonwu onwu va-a-a, o woru.” (Iwo abọchna wam bụ ome mma ke ele nsọ.)

⁹ Enine izi wam kanu m, “Gba n’okwukwo, ‘Ngozi zinu nye obula be sukwuru va n’iriri olulu nnwerne Nnwọ Atnuru wam.’” O kaa kwno, “Ikwu-ọnu ka bụ ezi ọka Chiokike.”

¹⁰ M dna n’eli n’ochi enine izi wam ma m kpọnu m a risi ẹli, kọvu o kanu m, “I mée kpam, m bụ m nye izi ibne i nu ke rumu nda i ele berere bụ ele ji akebne Jizọsi. Kpọnu Chiokike risi ẹli. Kwnornu nu akebne Jizọsi gbarụ bụ enine owhnurninya.”*

Nye naagba

iyinya abọchna

¹¹ M whnuru m oligwe kpumernu nu otu iyinya abọchna, rẹwhna nye zị n’olu a bụ Nye Okwnata Ovu nu Nye Ezi Ọka. O ji ikpe buru ọma neekpe ikpe, nọolu ọgwu.

¹² Anya a lawuru nu lele riro bẹkwnu, o kpu agida okpu-eze nu risi a. O nwernu rẹwhna be gbakwasiri a ke o zá nye magwu, okwolem ya magwu nhne o bụ.

¹³ Iwo o wogwu bụ ke be tururu n’ovnarna, be noosukwu a Ikwu-Ọnu Chiokike.

¹⁴ Ele ọgwu ke oligwe sno a n’aznu n’olu iyinya abọchna woru iwo abọchna marnu mma.

¹⁵ Ama-ọgwu zị buko hi n’onu a nọowhuya, ke o ji neemegbu kpakara mba. “O jeeji mkpara rugwe neechi be.”† O nọzosna manya ke okne ovu owe ẹhni Chiokike ke Meli Nhne Dum.

¹⁶ Be gbakwasiri n’olu iwo a ma nu ochi a rẹwhna,
“EZE KAKWO ELE EZE NU
NYENWE KAKWO ELE NWE.”

¹⁷ M whnu otu enine izi gwuzo n’ehnam, o ji okne nkoli si okokoba, kanu kpakara onunu oligwe, “Anu va gbako n’okne iriri Chiokike.

¹⁸ Anu va ri anọ-ẹhni ele eze, nu ke ele risi ọgwu, nu ke ele dikne, nu ke iyinya nu ke ele gba be, nu anọ-ẹhni kpakara ele badnu, ma ohi nu ke ele buo ohi, nye kwu nu nye matị.”

¹⁹ M whnu anọhia wam nu ele eze ke ọwa nu ele ọgwu be gbakoru n’otu ma be lusi nye wam dazi n’olu iyinya ọgwu ya nu ele ọgwu a.

²⁰ Kọvu be nwudnenu anọhia wam ya nu nye owhnurninya aghalaghala wam nye nruru ẹnu ndu-ẹhni wam nu ruwhnu a, nye ji ẹnu ndu-ẹhni wam rnawhu ele nruru akara anọhia wam nu ele kpọnu igbuda anọhia wam risi ẹli. Anọhia wam nu nye owhnurninya aghalaghala wam, be tubna be nu budnu nu rime olulu bẹkwnu ji rugwu bẹkwnu neerne.

²¹ Be ji ama-ọgwu neehi n’onu nye wam dazi n’olu iyinya wam gbu kpakara ele ọgwu be, onunu oligwe rijiri ruwho hite n’anọ-ẹhni be.

20

Otu pokwu awha

¹ M whnu otu enine izi hi n’oligwe neehiedna, o ji snambi onuhna olulu awhnuwhnu, ji masi ijigba hna okpotokpo n’aka a.

² O nwudne agwo wam, bu agwo gbaka wam, nye bu Ekwensu, nu Setani kne a eriri otu pokwu awha.

* 19:10 ke neeyinu ele badnu aka kpọ okwo ikwu-ọnu Chiokike. † 19:15 Eri Ọma 2:9

³ O túbna a nù rime olulu awnñwñwu, kasnì a akara, ma ọ gharù o duwhu kpakara mba berere tem otu pokwu awha wheme. Omekwo, be jootoma a eriri ige matì.

⁴ M whnù agìda ngadna eze, be nyee ele dazì n'olu be rikne be jeeji kpe ikpe. M whnù mkpuru ovu ele be gburu kwnornu akebne be gbannù Jizòsi nù ikwu-ònu Chiokike, ele kpòla risi ẹlì nyee anòhia wam, mọbu igbudu a, mọbu nahòru akara a n'egedege ruwñwu be, mọbu n'aka be. Be zìri bụdnu snornu Karaìsi nẹechi otu pokwu awha.

⁵ (Ele berere ke nwùrnu ọnwu lizòla n'ẹnwu tem otu pokwu awha wheme.) Ka bụ olizò n'ẹnwu ke mbòm.

⁶ Chiokike jọgozi ele ke a, ele jeekehìa igwe n'olizò n'ẹnwu ke mbòm. Ẹnwu ke gba lawuru jéenwe rikne n'ẹhni be. Be jọobu ele ọkwa arìohna Chiokike nù ke Karaìsi, be jooosno a chì otu pokwu awha.

O megburu Setani

⁷ Nga otu pokwu awha whemernu, be jootoma Setani, ọ whùya n'ikelu a.

⁸ O jọowhoga duwhu agìda mba ke gbasarù nù nkala ẹno ke ọwa, Gọgi, nù Magọgi, chikota be zne ọgwu. Ọnu ọgwugwu be hna lele rìzna zì nù ngeri osimini.

⁹ Be gbasà kpakara ọwa, gahnata gburugburu hne ele nsọ zì, nù ẹlì-ọhna wam Chiokike whnùrnu n'anya, kọvu bẹkwnu hiri n'oligwe dna rnegbu kpakara be.

¹⁰ Be túbna Ekwensu wam, nye duwhuru be nù rime olulu bẹkwnu be jì rugwu bẹkwnu neerne hne anòhia wam nù nye ọwhnurninya aghalaghala wam zì. Be jaata be awnñwñwu iwñhnehnie nù abalì hna ọkwukokwu.

Ikpe ipne-aznù

¹¹ M whnù otu ngadna eze abọchna okpotokpo, nù nye dazì n'olu a, ọwa nù oligwe gbawhuru nù ruwñwu a, be whnùna be berere.

¹² M whnù ele nwùrnu ọnwu, ele kwu nù ele matì, gwuzo nù ruwñwu ngadna eze wam. Be kpume agìda ọkwukwo, be kpume kwno ọkwukwo berere, ke bụ ọkwukwo ke bụdnu. Chiokike kpe ele nwùrnu ọnwu ikpe hite nù nhne be gbarù n'ọkwukwo wam lele kpa ẹrnu be jiri zìri.

¹³ Osimini gwehìa ele nwùrnu nù rime a, ẹnwu nù ẹlì rẹnwu gwehìa ele zì nù rime be, be kpe nye ọbula ikpe lele kpa ẹrnu ọ rñrñu jiri zìri.

¹⁴ Be túbna ẹnwu nù ẹlì rẹnwu nù rime olulu bẹkwnu. Olulu bẹkwnu ka bụ ẹnwu ke mgbà lawùru.

¹⁵ Nye ọbula ke be gbála rẹwhna a nù rime ọkwukwo ke bụdnu, be túbna nù rime olulu bẹkwnu.

21

Oligwe ikne nù ọwa ikne

¹ Omekwo, m whnù oligwe ikne nù ọwa ikne, kwnornu nù oligwe ke mbòm nù ọwa ke mbòm gawheru, osimini zìma masì.

² M whnù ẹlì-ọhna nsọ wam, Jeruselem ikne, hi n'oligwe hne Chiokike zì neehiedna, be jìknernu a lele nnwerne ikne naalakwnusi nzi a.

³ M nùrnu m okne nkọlì hi nù ngadna eze wam nookwu ọka, kaa, “Le, Ọro Nsọ Chiokike zì n'esilawùru rùmu badnu. Chiokike jaadazìnu be, be jọobu ele ke a, ọ jọobu Chiokike be, dazìgidnenu be.

⁴ O jookwnosnama kpakara anya-mini n'anya be, ẹnwu jáazìma, mọbu ọgba mkpe, mọbu ọkwna ẹkwna, nhne igbugbu jáazìma, kwnornu nù nhne ọknani gawhelem.”

⁵ Nye wam dazi nū ngadna eze wam, kaa, “Le, m neeme kpakara nhne buru nhne ikne.” O kanū m, “Gba nhne ka n’okwukwo, kwnornu nū ikwu-onu ka bụ ezi oka ke kwesiri okwnata ovu.”

⁶ O kanū m, “Be menem a. Mawa bụ Alifa nū Omega, Opanizo nū Okwukwo. Nye obula akpiri n’okpo bękwnu, m jeenye a mini ke hi nū risi mini ke bụdnu n’etekne.

⁷ Nye megburu, jeekehia kpakara nhne ka, m jọoburu Chiokike a, o jọoburu nnwo m.

⁸ Kọvu ele ogwnu nū ele kwé ekwe, nū ele ruru oru, ele noogbu badnu, nū ele neeme oyi, nū ele amusu, nū ele naakwa renwu, nū kpakara ele aghalaghala jeekehia igwe nū rime olulu bękwnu ji rugwu bękwnu neerne. Ka bụ enwu ke mgbalawuru.”

Jeruselem ikne

⁹ Otu n’esilawuru ele enine izi esau wam vu obele awhnuwhnu ipne-aznu wam vakwnusi m, kaa, “Vaa, m jeegesi i nnwerne be n’olu ikne, bụ nnwerne Nnwọ Atnurnu wam.”

¹⁰ O vuru m n’Enine zne n’olu okne rugwu zi n’olu, gesi m eli-ohna nsọ wam, bụ Jeruselem hi n’oligwe hne Chiokike zi neehiedna.

¹¹ O vu igwugwu Chiokike, noonwu lele akaworugwu zi okne onu ahia, lele jasiņa, ziri snam lele nyno.

¹² O nwernu mkpọ be turu a hna n’olu, o nwernu nri nū onuhna lawuru, nū nri enine izi lawuru neese onuhna. Be gbasiri rewhna nri nū avnurnu lawuru rumu Izireli n’onuhna a.

¹³ Onuhna eto zi n’obosi ennam, n’olu olu onuhna eto, n’eli eli onuhna eto, n’odidna ennam, onuhna eto.

¹⁴ Mkpọ eli wam nwernu ntụ-eli n’olu nri nū akaworugwu lawuru, hne be gbakwasiri rewhna ele izi nri nū ebo ke Nnwọ Atnurnu wam.

¹⁵ Nye wam naakanu m oka ji otu nhne golu be neeji n’otu nhne, n’otu ike eli-ohna wam, kpakara onuhna a, nū ehni mkpọ a.

¹⁶ Eli-ohna wam hna n’otu. Ogologo a nū rude a hna n’otu. O gweru nhne be tu nhne tū eli-ohna wam, o tuchia otu pokwu nū riwhu mañi eno, ogologo a, nū rude a, nū olu a, hna n’otu.

¹⁷ O tū ehni mkpọ wam, tuchia riwhu rula lawuru, lele kpa otutu ke badnu jiri zi, ke enine izi ji n’otu.

¹⁸ Ehni mkpọ wam bụ jasiņa, eli-ohna wam bụ golu zi snam, lele nyno.

¹⁹ Be ji agida akaworugwu zi okne onu ahia mee ntụ-eli mkpọ eli-ohna wam mma. Ntụ-eli ke mbom bụ jasiņa, ke ebo bụ safia, ke eto bụ kasidoni, ke eno bụ emiradi,

²⁰ ke isne bụ sadonisi, ke isunu bụ kanelia, ke esau bụ kirisoliti, ke esato bụ berili, ke tolu bụ topasi, ke nri bụ kirisopasi, ke nri nū otu bụ jasiñti, ke nri nū ebo bụ ametisi.

²¹ Nri nū onuhna lawuru wam bụ palị nri nū ebo, otu onuhna otu palị. Ogodo apna eli-ohna wam bụ golu zi snam n’owhnu osno lele nyno.

²² M whnuna m Oro Nso n’eli-ohna wam, kwnornu nū Nyenwe a Chiokike ke Meli Nhne Dum nū Nnwọ Atnurnu wam bụ Oro Nso a.

²³ Mkpá ennam mọbu enwa za naakpa a, be za n’omu nū rime a, kwnornu nū igwugwu Chiokike n’omu nū rime a, Nnwọ Atnurnu wam bụ iwhe a.

²⁴ Ele mba ke ọwa jeezne izne n’iwhe a, ele eze ke ọwa jeegweya igwugwu be nū rime a.

²⁵ Be jaagbasni onuhna eli wam, o jeegberu anya kwnornu nū ochichiri zila nū rime a.

²⁶ Be jeegwebnanya nhne igwugwu nū oson’anya kpakara mba nū rime a.

²⁷ Nhne ọbula ke z̄l̄a r̄ichna jáabna n̄u rime a r̄ia r̄ia, m̄ọb̄u nye ọbula ke neeme nhne ruru ọru, m̄ọb̄u nye aghalaghala, okwolem ele be gbar̄u r̄ewhna be n̄u rime ọkwukwo ke b̄udnu ke Nnw̄ọ Atn̄urnu wam.

22

Mini ke b̄udnu

¹ Enine izi wam gesi m osimini ke b̄udnu noonwu lele nyno, hi n̄u ngadna eze Chiokike n̄u ke Nnw̄ọ Atn̄urnu wam naagbah̄a.

² Naagbawhe n'esilaw̄uru ogodo apna ẹli-ọhna wam, n̄u ngeri law̄uru mini wam isisi ke b̄udnu z̄i, ke naam̄j nri n̄u mgba mkp̄uru law̄uru n'awha ke b̄u otu mgba n'ẹnwa. Ọkwukwo isisi wam b̄u nhne be ji n̄ogwo ẹhni igbugbu ele kpakara mba.

³ Ọvu ọnu z̄l̄ma r̄ia r̄ia. Ngadna eze Chiokike n̄u ke Nnw̄ọ Atn̄urnu wam jaaz̄i n'ẹli-ọhna wam, ele izi a jeeznenu a izi.

⁴ Be j̄owhnu ruwhnu a, r̄ewhna a jaaz̄i n'egedege ruwhnu be.

⁵ Abal̄i jáaz̄ima berere, be j̄ọomu t̄onji, ẹhnam j̄ọomu, kwnornu n̄u Nyenwe āi Chiokike jeenye be iwhe, be j̄eechi lele eze tim t̄om.

⁶ Enine izi wam kan̄u m, "Ikwo-ọnu ka b̄u ezi ọka ke kwesiri ọkwnata ọvu. Nyenwe āi Chiokike ke enine ele ọwhnurninya ziyaru enine izi a gesi ele izi a kpakara nhne jeemer̄i n'ige mat̄i vazne n̄u ruwhnu."

Jiz̄osi vawa

⁷ "Le, m vawa wara wara, ngozi jaaz̄inu ele jaab̄ita ikwo-ọnu ọwhnurninya ke ọkwukwo ka."

⁸ Mawa, J̄oni, n̄urnu, whn̄u mas̄i kpakara nhne ka. Nga me n̄urnu, whn̄u kwo mas̄i, m dna n'ẹli n'ọchi enine izi nye gesiri m kpakara nhne ka ma m kp̄onu m a risi ẹli.

⁹ K̄ovu ọ kann̄u m, "I m̄ee kpam, m b̄u m nye izi ibne i, n̄u ke r̄umu nda i ele ọwhnurninya, n̄u kpakara ele jaab̄ita ikwo-ọnu ọkwukwo ka. Kp̄onu Chiokike risi ẹli."

¹⁰ Ọ kan̄u m, "I t̄ugwa ikwo-ọnu ke ọkwukwo ọwhnurninya ka, kwnornu n̄u ige z̄i ndundu.

¹¹ Nye ojo mernu nhne ojo a zne ruwhnu, nye z̄l̄a r̄ichna, ọ z̄l̄a r̄ichna a zne ruwhnu, nye mee mma, mernu mma a zne ruwhnu, nye z̄i ns̄ọ, z̄iri ns̄ọ a zne ruwhnu."

¹² "Le, m vawa wara wara, ọgwo ẹrnu m z̄i m n'aka, m jeenye nye ọbula lele kpa ẹrnu a jiri z̄iri.

¹³ Mawa b̄u Alifa n̄u Omega, Nye Mb̄om n̄u Nye Ipne-azn̄u, Ọpanizo n̄u Okwukwo.

¹⁴ "Ngozi jaaz̄inu ele sn̄urnu iwo awura be, be nwernu rikne o ri mkp̄uru isisi ke b̄udnu wam, be jeehi n'ogodo ọnuhna bnazne n̄u rime ẹli-ọhna wam.

¹⁵ K̄ovu r̄umu nk̄ita, n̄u ele amusu, n̄u ele neeme ọyi, n̄u ele noogbu badn̄u, n̄u ele naakwa r̄enwu, n̄u ele whn̄urnu aghalaghala n'anya neeme be jaaz̄i n'ederezi.

¹⁶ "Mawa Jiz̄osi, ziyaru enine izi m ọ gba akebe kpakara nhne ka n̄u rime kpakara ọgbako Chiokike. Mawa b̄u Mgbar̄egwnugwnu n̄u Nnw̄ọ Devidi, Mb̄ọ ọsi marn̄u mma."

¹⁷ Enine Ns̄ọ n̄u nnwerne ikne kar̄u, "Vaa." Nye ọbula ke n̄urnu, kaa, "Vaa." Nye ọbula akp̄iri n̄ookpo b̄ekwnu, vaa, nye ọ mas̄iri gweru mini ke b̄udnu n'etekne nw̄ornu.

¹⁸ M nọodo nye ọbula ke nurnu ikwu-ọnu ke ọkwukwo ọwhnurninya ka aka nụ nsị, nye ọbula ke tukurwasiri nhne n'olu a, Chiokike jọtukwasinu a nhne nụ kpakara awnụwhnu be gbarụ n'ọkwukwo ka.

¹⁹ Nye ọbula ke gwemernu nhne n'ikwu-ọnu ke ọkwukwo ọwhnurninya ka, Chiokike jeegweme igwe a n'isisi ke bụdnu nụ ẹli-ọhna nsọ, ke bụ nhne be gbarụ n'ọkwukwo ka.

²⁰ Nye gbarụ akebne kpakara nhne ka karụ, “Owe, m vawa wara wara.”
Amim. Vaa, Nyenwe aị Jizọsi.

²¹ Oru ke Nyenwe aị Jizọsi dazinu kpakara anụ. Amim.